


Teoso sãkire amaneri



New Testament in Apurinã (BR:apu:Apurinã)

Teoso sãkire amaneri
New Testament in Apurinã (BR:apu:Apurinã)

copyright © 2004 Wycliffe Bible Translators, Inc.

Language: Apurinã

Translation by: Wycliffe Bible Translators, Inc.

Copyright Information

© 2004, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Apurinã

© 2004, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 4 Mar 2019 from source files dated 20 Jan 2018
253eac7-f0c7-5b49-b6be-65ee5354d0ed

Contents

| | |
|------------------------|-----|
| Mateo | 1 |
| Marko | 59 |
| Arókasi | 93 |
| Xoão | 154 |
| Átosi | 194 |
| Homano | 245 |
| 1 Korĩto | 268 |
| 2 Korĩto | 288 |
| Ḳarásia | 302 |
| Épeso | 311 |
| Piriposi | 320 |
| Koroso | 326 |
| 1 Tesarónika | 332 |
| 2 Tesarónika | 336 |
| 1 Tximótxio | 339 |
| 2 Tximótxio | 346 |
| Txito | 351 |
| Piremõ | 354 |
| Epireo | 356 |
| Txiako | 373 |
| 1 Petro | 379 |
| 2 Petro | 386 |
| 1 Xoão | 390 |
| 2 Xoão | 396 |
| 3 Xoão | 397 |
| Xota | 398 |
| Apokorípisi | 400 |

MATEO

*Xesosi Nirimaneakori Iua Apisapanika Auakani
(Arókasi 3.23-38)*

¹ Xesosi Teoso mereëkiti itxaua. Uai aua Xesosi apika atokiriakorini uãka. Xosee inakori Xesosi iri atoko ìkorapokoriti. Apraõni, Taviini pakini Xesosi apika atokiriakorini atoko. Ininiã Xesosi Taviini, Apraõni pakini imi atoko itxa.

² Ininiã ia atoko itxa:

Kitxakapirĩka Apraõ, Isaki iri.

Isaki, Xakoo iri.

Xakoo, Xotaa itariakorikata iri.

³ Xotaa, Péresi, Sera pakini iri. Inorona Tamara.

Péresi, Ésirõ iri.

Ésirõ, Arão iri.

⁴ Arão, Aminatapi iri.

Aminatapi, Nasoõ iri.

Nasoõ, Sáomõ iri.

⁵ Sáomõ, Póasi iri. Póasi inoro Haapi.

Póasi, Opetxi iri. Opetxi inoro Hotxi.

Opetxi, Xesee iri.

⁶ Xesee, Tavii iri. Tavii Isaeokini auite itxaua.

Tavii, Saromão iri. Saromão inoro mitxi Oriã ãtanoro. Eereka Tavii takaro oa.

⁷ Saromão, Hopoão iri.

Hopoão, Apia iri.

Apia, Asa iri.

⁸ Asa, Xosapaa iri.

Xosapaa, Xorão iri.

Xorão, Osia iri.

⁹ Osia, Xotão iri.

Xotão, Akasi iri.

Akasi, Esekia iri.

¹⁰ Esekia, Manasee iri.

Manasee, Amõ iri.

Amõ, Xosia iri.

¹¹ Xosia, Xekonia itariakorikata iri. Iuasaaki ìkorakanani kãkiti Isaeokini maĩkaãka. Papirõnia tixinimoni anikaãkana.

¹² Papirõnia anikikona atoko,

Xekonia, Saratxieo iri.

Saratxieo, Soropapeo iri.

¹³ Soropapeo, Apiotxi iri.

Apiotxi, Eriakiĩ iri.

Eriakiĩ, Asoo iri.

¹⁴ Asoo, Satoki iri.

Satoki, Akĩ iri.

Akĩ, Eriotxi iri.

¹⁵ Eriotxi, Ereasa iri.

Ereasa, Mataã iri.

Mataã, Xakoo iri.

¹⁶ Xakoo, Xosee iri. Iua Xosee, Maria ãtaniri. Xesosi, iuara Teoso Mereëkiti itxaua. Inoro Maria.

¹⁷ Apraõ, iua ãkiri, imekaniri, apika mekaniri, apika mekaniri ãkiri, apika mekaniri apika mekaniri, apiko itxaãpota. Tavii auakasaaki, katosipeka pakini ninoa uãka. Eereka aua Tavii, Tavii ãkiri, imekaniri, apika mekaniri, apiko itxaãpota. Katosipeka pakini ninoa uãka. Iuasaakiika Xoteokori anikaãka Papirõnia tixinimoni. Ninoa mekaniriakori katosipeka inakasaaki, Xesosi iponaniãpeka.

*Xesosi Iponaniini Pirena
(Arókasi 2.1-7)*

¹⁸ Ia atoko itxapaniko Xesosi. Teoso mereëkiti iponaniãkasaaki, Maria ominapatari Xosee. Oïtaniriuatini apisapanika, omotokiãri amarini Erekar Matamatakoti sikakiti. ¹⁹ Xosee uãkatari Maria kamari maerekati ãtikata. Atão inakaranoka kamakari iua, ininiã kona inirekari kãkiti imaropiretiniri oa kamixi onini. Kãkiti sauaki osiniã, Xosee !inirekaro opëtauatini, kotxi erekari kamakari iua. Ininiã inirekari itakanapiniro oa, ixika kãkiti mimarotakaniã. ²⁰ Ikara atoko inini ixiniremoni, Teoso nitiri iaxitikiri apoka itaponemoni. Ininiã itxa:

—Xosee, Taviini apika mekaniri pite. Kona pipïkapero Maria papakapini pïtanoro ïkapani, kotxi Erekar Matamatakoti, iuara kamixipeka txïkitakaro. ²¹ Auako oa ãkiri. Pitakauãkatari Xesosi itxauako, kotxi imaktxakari kãkiti maerekani —itxa Teoso nitiri.

“Xesosi” popïkari sãkireë, iuatxikana, “Kãkiti Maerekani Makatxakakari,” itxa.

²² Apikomoni Teoso nitiri txari:

—Ikara atoko inakari auapeka, kotxi kitxakapirïka Teoso sãkire sãpiretakari sãpiretapekari ikara sãkiretxi. ²³ Kitxakapirïka ia atoko itxa:

Hïkenakotari. Sito kikikata masirïkato mixiuatako. Auako oimi. Itakauãkataãka Emanoeo inakori

—itxa Teoso nitiri Xoseemoni. “Emanoeo” popïkari sãkireë “Teoso atekata aua.”

²⁴ Xosee merekasaaki, iua auikari Teoso nitiri sãkire. Ininiã ïtanorouata Mariakata. ²⁵ Eereka amarini iponaniãkasaaki, Xosee takauãkatari Xesosi itxaua. Amarini iponaniini apisa iua lisirïka Mariakata.

2

Atokatxi Pokïkinimoni Auakani

¹ Xesosi iponaniã Pereë inakori sitatxiti, Xotéia tōpa, Erotxi auïtetxi inakasaakiaua. Iuasaaki atokatxi pokïkinimoni auakani sari Xerosareë sitatxitimoni Pereë takote. Iōriki imarotakani ninoa.

² Ininiã itxana kãkitimoni:

—Naniparari amarini Xoteo auïte inakariaua? Ate itikapekaro iōrikite atokatxi pokïkinimoni. Oa iōriki oerekaua auïtetxi Apiananiri iponaniãpeka. Ininiã ate apoka uai akapotoreëkiniua iua apisatoõ, kotxi Apiananiri itxaua —itxana ninoa.

³ Erotxi ikara ikenakoenetakasaaki, kona erekaxinireri. Kona inirekari ãti auïtetxi apokini. Ininiã ikinimane Xerosareë auakani kona erekaxinirena, kotxi ninoa pïkari Erotxi. ⁴ Ininiã iua apotiitana sasetotxi auïteakori, kaiõkatsoparerini pakini. Ininiã Erotxi pimaãna:

—Nanipa Teoso Mereëkiti iponaniãko? —itxa.

⁵ Ninoa apakapiretari:

—Pereë sitatxiti, Xotéia tōpa aua. Ia atoko itxapaniko Teoso sãkire sãpiretakari iõkatsopatakiti kitxakapirïka:

⁶ Pereë sitatxiti auakani, Xotéia tōpa, hïte sitatxine poiãori, iuaritika kona hïpëtauatape, kotxi hïte sitatxineë iponaniãko Isaeokini auïte. Kãkiti mïkiikakari itxauako —itxa ninoa auïtetxiakori Erotximoni.

⁷ Ininiã Erotxi akiritana ninoa iōriki imarotakani, ninoanani imisãkiretini ïkapani. Ininiã ipimaãna:

—Mïtxipitipanika kirisaakipa hïtikataro oa iōriki? —itxa ninoamoni.

Ininiã ninoa sãpiretari. ⁸ Iposo atoko iokanatana Pereëmoni:

—Hïsako Pereëmoni amarini hinitini ïkapani. Hãpokasaakiri, hïspiretano. Ininiã nota apaka sako, iua apisatoõ nikapotoreëkiniua ïkapani —itxa Erotxi.

Txamari inirekari okiniri Xesosi, kotxi linirekari ãti auïtetxi auini.

⁹ Erotxi sãkire ikenakotakana atoko, ipotorikana. Iōriki atokatxi pokïkinimoni itikakitona ïkiika. Anikana Xesosi auinimoni. Iuaãtaã oa iōriki iotoka. ¹⁰ Ninoa atamatakasaakiro iōriki, iteene ipoxokoniuatana. ¹¹ Ininiã apokana aapoko. Iroãna. Apokarina amarini inoro Mariakata. Ininiã ikapotoreëkauana Xesosi apisatoõ. Itxarina:

—Apiananiri pitxaua. Aãuïte pitxaua —itxana.

Iposo atoko itiina imakatzakana. Ininiã imakatzakarina erekari imïkitina auïtetxi-moni isikakitina ïkapani. Isikarina oro, ïsëso inakori, miha inakori pakini. ïsëso, miha pakini kamariãro peerekari. ¹² Ininiã eereka Teoso sãpiretana iõriki imarotakanimoni itaponeëna:

—Kona hïkanapiriãpe Erotximoni —itxa Teoso ninoa taponemoni.

Ininiã ninoa kanapiriãkasaaki auinimoni, äti kimaporitimoni isana.

Exitomoni Xosee, Maria Pakini Sini

¹³ Iõriki imarotakani sipeka atoko, Teoso nitiri iaxitikiri sãpiretari Xosee itaponemoni: —Paiamata. Põkitikaua. Panikari amarini, inoro apaka Exito tixinimoni. Himiteka. Kona hïkanapiriãpe nota masãpiretakanisaakii, kotxi Erotxi nitari amarini okiniri ïkapani —itxa Teoso Xoseemoni.

¹⁴ Ininiã Xosee:

—Nisapitikako —itxa.

Ininiã iua ïkanõkatika Xosee õkitikaua. Aiamata Exito tõpamoni isini, amarini anikini ïkapani. Ininiã imimitekari amarini inorokata Exitomoni. ¹⁵ Erotxi ipinakasaaki, iusaaki ikanapiriãko. Kona ikanapiriã Erotxi ipinini apisa. Ia atoko itxapaniko kitxakapiriãka Teoso sãkire sãpiretakari sãpiretakiti:

Nakiritariko namarite Exito tixini itakanapini.

Amarini Okiko Pirena

¹⁶ Erotxi imarotakasaakiri iõriki imarotakani sipe inakasaaki, ïmisãkiretaikarina iua, ininiã iua omanãkarauata. Ininiã amarini ipikananipeka inakaniua, apaka axapitipanika inakaniua, imakinikana okãkitaka Pereë sitatxitiã auakani. Ikara atoko itxa, kotxi iõriki imarotakani sãpiretari ipikananipeka oa iõriki tokiã. ¹⁷ Kitxakapiriãka Teoso sãkire sãpiretakari Xeremia inakori sãpiretakiti iaõka auape iusaaki. ¹⁸ Iua txari:

Hamaa sitatxiti ikenakotaãkako ätsaãtxi. Hakeo atoko sitoakoro txiapatako oimiakori matinani. !Onirekari kãkiti mïkapiiritiniro oa, kotxi oimiakori kona auaika.

Exito Tixini Ikanapiriinina

¹⁹ Erotxi ipinaka atoko, Xosee Exito tixini auakasaaki, Teoso nitiri misãkiretari iua itaponemoni. ²⁰ Itxari:

—Põkitikaua, pimikanapiriãri amarini, inorokata Isaeo tixinimoni. Amarini kinirão okaka inakani kona auaika —itxari.

²¹ Ininiã Xosee mikanapiriãri amarini, inorokata Xotëia tõpamoni, Isaeo tixinimoni. ²² Txamari imarotakasaakiri Akirao, Erotxi ãkiri auïtetxi ininiua irini tikini, Xosee pïkari Xotëia tõpa auini. Ininiã Teoso nitiri iuaïkana itaponemoni sãpiretari ätiãtaã isini ïkapani. Ininiã Xosee, Maria, Xesosi pakini sari Karirëia tõpamoni Isaeo tixini. ²³ Nasaree sitatxiti kaikota itxana. Ia atoko itxa kitxakapiriãka Teoso sãkire sãpiretakani sãpiretakiti iaõka inini. Ninoa txari:

Nimereëkiti, Nasareekiri itxauako.

3

Xoão Kapatxisareri Sãpiretakiti

(Marko 1.1-8; Arókasi 3.1-20; Xoão 1.19-28)

¹ Eereka Xesosi aneëpe. Iusaaki Xoão kapatxisareri, ãparaã makipakaniãtaã Xotëia tõpa aua. Iuaã iua oerekari Teoso sãkire kãkitimoni. ² Iua txa:

—Himaerekani hïtakanapako, kotxi Teoso mereëkiti païtiki apokako iua ikinipoko auïte ininiua ïkapani —itxari Xoão.

³ Kitxakapiriãka Isaía inakori, Teoso sãkire sãpiretakari, sãpiretapekari Xoão pirena. Itxari:

Auako kiki ãparaã makipakaniãtaã. Isãpirenauatako. Itxariko: “Hõeretariko kimapori Apiananiri apokini apisapanika. Itïkaãpo erekari hïkamako iua napini ïkapani,” itxa Isaía kitxakapiriãka.

⁴ Xoão takari mākaxi kamero piti kamakori. Kamero kākiti pira. Ipakiotsere aamata kamakori. Inikari txītxiri. Itximari mapaã itopakero. ⁵ Kākiti Xerosareēkini, ikinimane Xotéia tōpakini, ikinimane Xotão tinikata auakani pakini sari ikenakotinirina ĩkapani. ⁶ Iuaã ninoa sãpiretari Teosomoni maerekati ikamakitina, imaerekani imaktxakini ĩkapani. Eereka iua patxisatana Xotão uiniti.

⁷ Txama Xoão atapakasaakina pariseoakori, satoseoakori pakini apokini iuamoni ipatxisatikona ĩkapani, iua txana:

—Imini katsiiri anaakorirai hīte. Teoso misiritapitikai himaerekani xika. Himitekini ! auari. Hinirekari hīpatxisatiko, txamari ! hinirekari hītakanapiniri himaerekani. ⁸ Hinirekiniāri himaerekani hītakanapini, ininiā hīkamariko erekari. Ikara atoko ininiā, hōerekari Teoso atāo hītakanapiniri himaerekani. ⁹ Hākixiniremoni ! hīxinikapiri: “Teoso apakapapitikauako ate, kotxi ate atokirini Apraãoni txaua,” !hītxapeko. Ari, nota sãpiretai hīte, Teoso nirekiniāri, iposotari ia kai soroã Apraãoni mekaniriakori ikamini. Kona Apraãoni posotari anikinii Teosomoni. ¹⁰ Aamina maereka iriti atoko hītxa. Teoso iposopeka hīte ixipokini. Kākiti auari ikitaite kauanari aamina maereka iriti itokini ĩkapani. Ikinika aamina maereka iriti tokaãkako. Xaminaã oka inaãkanako. Teoso kamakiti iua atokokana itxa. Ininiā Teoso kitaite kauanapeka, aamina kotsa sauakiko tīkane. Iua atokokana ininiā, Teoso aiamatapeka hīte ixipokini ĩkapani.

¹¹ —Hīte nipatxisata āparaã. Hīpatxisatiko oerekari maerekati hīkamakiti hītakanapeka. Nota tikini apoākari patxisataiko hīte Erekari Matamatakotiã, xaminaã pakini. Apiatakari itxaua iua. !Apakata iua takote napokini ikiti mata nimaktxakini ĩkapani, kotxi iua apiata. Nota poiãoka. Imaktxakari himaerekani, itxiko metao āki auakari arikini atoko. ¹² Katarereri āpokari ahoisi otāta imaktxakini ĩkapani. Otāta arikaãka. Oki nīkataãka ikiena nīkatikoãtaã. Iua atokokana Teoso nīkatariko kākiti erekarini. Maerekati kamakani arikaãkako xamina maxipoãkatiã —itxa Xoão.

*Xesosi Patxisatiko Pirena
(Marko 1.9-11; Arókasi 3.21-22)*

¹³ Iuasaaki Xesosi potorika Kariréia tōpa. Isari Xotão uunitimoni, Xoão patxisatiniri ĩkapani. ¹⁴ Txamari Xoão txari Xesosi:

—Pite nirekatari nota patxisatinii? !Apakata, kotxi pitemoni maerekati !auari. Notara nirekari pite patxisatinino nota —itxa Xoão.

¹⁵ Xesosi apakapapiretari:

—Apakatapitika pipatxisatinino. Uatxa akamariko ikinika Teoso nirekaãkiti —itxa.

Ininiā Xoão:

—Ateeneka.

¹⁶ Eereka ipatxisataãka atoko ikanikiīta imiriī. Iuasaakipeka iaxiti takaka. Ininiā kākiti atapari Erekari Matamatakoti katxakaãpotini kamoã atoko inakari. Xesosimoni oãpoka.

¹⁷ Eereka Teoso sãkirauata iaxiti:

—Pite namarite, nitiretakiti, napokaerekatai, kotxi ninirekakiti pikama —itxa Teoso.

4

*Satanasi Nirekari Xesosi Kaminiri Maerekati
(Marko 1.12-13; Arókasi 4.1-13)*

¹ Erekari Matamatakoti anikari Xesosi āparaã makipakaniãtaã Satanasi atamakaerekatiniri ĩkapani. ² Iuaã Xesosi takanapari inipokotini Teoso imisākiretini ĩkapani. Koarēta pokamara, koarēta ĩkanōkati pakini itakanapari inipokotini. Ininiā inatxikatani iuani.

³ Ininiā iuasaakiika Satanasi apoka Xesosimoni. Iua katamakaerekareri itxaua. Itxari: —Pite Teoso ākiri pininiãua, ininiā ere kai soro komiri pitxīkitaka —Satanasi txari Xesosi.

⁴ Xesosi apakapapiretari:

—Kona nikamari pite paniãtakiti, kotxi Teoso sãkire iōkatsopatakori txari:

Kona komirinani txīkitakari kākiti ātipirika auini tīkane. Ikinika Teoso sãkirera txīkitakari kākiti ātipirika auini tīkane

—itxa Xesosi Satanasimoni.

⁵ Eereka Satanasani anikari Xesosi Xerosareëmoni. Iua sitatxi akiritaäka Teoso nakiti. Satanasani anikari Xesosi Teoso misäkiretiko aikotimoni apiata otano tsokitiri nopini.

⁶ Ininiä Satanasani txari Xesosi:

—Teoso äkiri pininiäua, pokaua xiti. Ininiä ikinipoko käkiti imarotariko Teoso äkiri pininiäua, kotxi Teoso säkire iökatsopatakori txari:

Teoso iokanatanako initiriakori iaxitikini pite inikatinina tükane. Ninoa maïkai pimap-inakani tükane, ininiä pikarouatini lauari. Kona kai soro karotari pikiti,

—itxa Satanasani.

⁷ Xesosi apakapapiretari:

—Teoso säkire iökatsopatakori apaka txari:

Kona patamakaerekatapiri Apiananiri piTeosone.

⁸ Eereka Satanasani anikari Xesosi ätiätaä uuaïkana. Itano xiratarimoni anikari. Iuaä Satanasani oerekari ikini itixiti, ikinika tiitxiti iuaä auakari pakini. ⁹ Ininiä itxa:

—Pikapotoreëkiniäua nota apisatoö piteosonetinino, ininiä ikinika nisikaiko —itxa Satanasani.

¹⁰ Xesosi apakapapiretari:

—Konapitini. Pisipeka Satanasani. Teoso säkire iökatsopatakori txari:

Apiananiri piTeosone, iuanokara piteosoneta. Iua ikapaninokara piparïkauatako

—itxa Xesosi.

¹¹ Ininiä Satanasani takanapa txari iua. Ininiä Teoso nitiriakori iaxitikini apoka Xesosi-moni inikatinirina ikapani, kotxi itapara lauauka.

*Xesosi Mipotorikari Iparïka Kariréia Töpa
(Marko 1.14-15; Arókasi 4.14-15)*

¹² Xesosi kenakoenetakasaakiri Xoão kapatxisareri kateia äki takiko, isari Kariréia töpamoni. Nasaree sitatxitimoni isa. ¹³ Ininiä eereka itakanapari Nasaree sitatxiti. Kapanaoö sitatxitipeka aua itxa. Kapanaoö, Kariréia poa takote, apaka Seporö, Natarii pakini töpati takote. ¹⁴ Kitxakapirïka Isaía, Teoso säkire säpiretakari säpiretapekari, iuaä Xesosi auako. Ia atoko Teoso säkire txapeka:

¹⁵ Seporö, Natarii pakini töpati ipoa mitari takote, Xotäo uiniti ipiniä. Käkiti takauäkatari iua itixi, Kariréia töpa. Xoteo minakanuia tixine itxaua. Iuaä Erekari apokako.

¹⁶ Ninoa käkiti, ipiä auakani, limarotari Teoso. Ipïkaniätaä ninoa auanäta. Ninoa atamatariko tirikapi. Ikamara mitari. Iua tirikapi iopinipokotako ipiä auakani sauaki.

Ikara atoko itxa Isaía kitxakapirïka.

¹⁷ Xesosi apokasaaki Kapanaoö sitatxiti, imipotorikari oerekarauatini. Ia atoko itxa:

—Himaerekani hitakanapa, kotxi iposope Teoso hïauïte ininiua —Xesosi txana ikinipoko käkiti.

*Xesosi Akiritari Ipi Ipi Pakini Kokatsaãriti
(Marko 1.16-20; Arókasi 5.1-11)*

¹⁸ Xesosi Kariréia poa tiniä itïpokotakasaaki, itikari ipi kiki, Simäo Petro inakori, itari Ätree inakori pakini. Itakanätarina hetxi. Kokatsaãriti itxauana. ¹⁹ Ininiä Xesosi akiritana ninoa:

—Masa notakata. Hitakanapariko hökatsaätini parïkatxiti. Noerekaiko hïte Teoso säkire hõerekini ikapani, käkiti imarotini ikapani —itxa Xesosi.

²⁰ Ininiä iusaakiika ninoa takanapari okatsaätinina. Xesosikata sa itxana.

²¹ Apikomoni itïpokotakasaaki, atamatana Txiako, Xoão pakini. Sepeteo anaakori itxauana. Ninoa irikata kanauaä auanäta. Ihetxina iotsaänätana. Ininiä Xesosi akiritana ninoa. ²² Iusaakipeka itakanaparina iri, kanaua pakini. Xesosikata sa itxana imoianatinirina ikapani.

*Xesosi Amianatakani Imakananitini
(Arókasi 6.17-19)*

²³ Xesosi sari ikini Kariréia tōpamoni. Aiko Xoteoakori apotiitiniātaāua isa. Iuaā isāpiretana Teoso iokanapirena erekari, Teoso kākiti auīte inini pirena. Apaka erekapeka itxīkitakana amianatakani. ²⁴ Xesosi kamakiti, apaka isāpiretakiti, iaripiretapeka ikinika Síria tixini. Ininiā kākiti minana itomaneri amianatakani iuamoni. Ikini sereti amianari auakini sari iuamoni. Kākiti maerekati matamatakoti Satanasi nitiri auāītotakiti apoka iuamoni. Apaka kākiti mapitxiritakani apoka. Apaka titinanakakari amianariti auakini apoka. Apaka kākiti maposota tīpokotakani pakini apoka Xesosimoni. Ikinikana erekape itxīkitakana ninoa. ²⁵ Itomaneri sari iua tikini. Kākiti Kariréiakini, tesi pakini sitatxitikini, Xerosareēkini, kākiti Xotéia tōpakini, Xotāo uiniti ipiniākini pakini sari iua tikini.

5

Xesosi Sākirauata Ixirata Auīte Nopini
(Kapítoro 5, 6, 7)

¹ Xesosi itomaneri kākiti atapakasaaki, ixirata nopini isa, topāka itxa oerekarauatini ĩkapani. Imoianariakori apotiitaua iuamoni. ² Iuasaaki oerekana ia sākiretxiti:

Kirimonipa Teoso Sikatari Erekar?
(Arókasi 6.20-23)

³ —Teoso takari erekari kākitimoni, ia atoko inakanimoni. Ninoa nirekari Teoso nireēkiti ikaminina, iuaritika imarotarina liposotarina Teoso nireēkiti ikaminina, ininiā amanaārina Teoso sikaposotiiretinina ninoa. Teoso takari erekari kākiti ikara atoko inakanimoni. Ninoa sari Teoso auītetxi ininiātaāua.

⁴ —Teoso takari erekari kākitimoni, ia atoko inakanimoni. Mitxi ninoa txiapata imaerekanina xika. Ininiā eereka Teoso mīkapiritana ninoa, amarini mīkapiritiko atoko.

⁵ —Teoso takari erekari kākitimoni, ia atoko inakanimoni. Pataparaxinirena ninoa, iuaritika !itxitarina āti. Iamonīkarina āti. Teoso sikapanikariko ikinika itixi ikara atoko inakanimoni.

⁶ —Teoso takari erekari kākitimoni, ia atoko inakanimoni. Ninoa iteene nirekari erekarinoka ikaminina. Nipokori inirekinina atoko, āparaā inirekinina atoko, ninoa iteene nirekari erekari ikaminina. Ininiā Teoso sikana ninoa ikinipoko erekari inirekak-itina.

⁷ —Teoso takari erekari kākitimoni, ia atoko inakanimoni. Ninoa amonīkari ninoa misiritakani, ininiā iua atokotxikana Teoso amonīkanako ninoa kaamonīkarerini.

⁸ —Teoso takari erekari kākitimoni, ia atoko inakanimoni. Ninoa kamari Teoso nireēkitinoka, ininiā ninoa aōkitariko Teoso.

⁹ —Teoso takari erekari kākitimoni, ia atoko inakanimoni, kauāīrerinimoni. Ninoa parīkauata neenamati xipokini ĩkapani. Ininiā ninoa akiritaākako Teoso anaakori.

¹⁰ —Teoso takari erekari kākitimoni, ia atoko inakanimoni. Ninoa kamari erekari, ininiākara apanakini kākiti misiritana. Ninoa erekari kamakani auako Teoso auītetxi ininiātaāua.

¹¹ —Teoso takari erekari hītemoni, apanakini misiritakasaakii, imisākirepiretakasaakii, aāpirena ikamakasaaki hītemoni nota sākire hāuikini xika. ¹² Poxokonoka hītxako, kotxi Teoso sikai hīparīka ĩki ito, itixine hāpokasaaki. Hīte misiritiko atokokana Teoso sākire sāpiretakani kitxakapirīka misiritaāka, ininiā hīpoxokoniuatako —itxa Xesosi.

Iōkira Pirena
(Marko 9.50; Arókasi 14.34-35)

¹³ Iuaīkana Xesosi sākirauata:
—Iōkira erekaro atoko hītxaua ikinimane ĩkapani. Iōkira matxoatapeka onakasaaki, ininiā !apakata otxoa kanapiriini iuaīkana. Ininiā oōkaāka. Kākiti kitakaro, kotxi kona otxaika.

Tirikapi Pirena

¹⁴ —Tirikapi atoko hītxaua ikinimane kākiti ĩkapani. !Hīposotari hīkipatiniri sitatxi xirata nopini auakari, kotxi ikinimane atamatari tirikapi. ¹⁵ Kākiti !itakari tirikapi kopiti

āki. Itakarina itano ikini aapokotxiti iopinikini ĩkapani. ¹⁶ Iua atokokanera hĩtxako, kotxi erekari hĩkamakiti tirikapi kamara atoko itxa. Erekarinokara hĩkamako. Ininiā apanakini atamatarı erekari hĩkamakiti. Ininiāra itxarina aĩri iaxitikirimoni: “Peerekai pite.”

Teoso Sākire Moisesi Apakapakiti

¹⁷ Iuaĩkana Xesosi sākirauata:

—Kona hĩtxape: “Xesosi xipokariko Teoso sākire Moisesini apakapakiti,” kona hĩtxape. Apaka, “Kitxakapirĩka Teoso sākire sāpiretakani sāpiretakiti Xesosi xipokako,” kona hĩtxape. Kona ikara inakari !nixipoka. Nota ina ikinipoko ninoa sāpiretakiti nikamini ĩkapani. ¹⁸ Atāopitika ikinika Teoso sākire apokako. Kona xatiki Teoso sākire iōkatsopatakorı kona xipoka. Iaxiti, itixi pakini xipokini apisa Teoso sākire !ixipoka. Apokapitikako imakinika isākire. ¹⁹ Teoso sākire ipaniātakiti apiari aua, apaka poiāori aua. Kākiti makamakaniāri ikinika Teoso sākire, oerekiniāri apanakini ikinika Teoso sākire imakamakani ĩkapani, poiāori itxaua Teoso auĩtetxi ininiātaāua. Āti kākitipekana, ikaminiāri ikinika Teoso sākire, oerekiniāri apanakini ikinika Teoso sākire ikamini ĩkapani, apiari itxaua Teoso auĩtetxi ininiātaāua. ²⁰ Ia nisāpiretai. Kaiōkatsopareriakori, pariseoakori pakini !ikamari atāo inakari Teoso nireēkiti. Ininiā hĩte kaminiāri ninoa atokotxikana, !hāuiritaāka hĩiroini Teoso auĩtetxi ininiātaāua. Atāo inakari Teoso nireēkiti hĩkaminiā, hĩiroāpitika iuaā.

Omanākaretxi Pirena

²¹ —Hĩte imarotari kākiti kitxakapirĩka sāpiretaāka. Ia atoko inaāka: “Kona apanakini hōkape. Kokaniri anikaākako imisiritikomoni,” inaāka kitxakapirĩka. ²² Uatxa apikomoni nota sāpiretaiko hĩte. Maxikatiika pomanatiniāri pitari, panikaākako pimisiritikomoni. Pite napetiniāri pitari, ininiā auĩtetxiakori misiritapitikai. Pakiritiniāri pitari: “Kĩĩkitei,” ininiā pimisiritiko paĩtiki apokako. Nota txai hĩte, kona erekari kokaniri. Iua atokokana kona erekari hinaperauatini. Hinaperauatiniā, ininiā maerekani misiritikoātaā hĩsapitikako.

²³ —Ininiā hĩsikaasaaki Teoso apisatoō hĩsikakiti hĩsikini ĩkapani, iusaaki hĩxinikari hĩtari homanatakiti. ²⁴ Iusaakiika hĩtakanapariko hĩsikakiti iuaā hĩsikiniri apisa. Hĩsako katimaritika homanakitimoni. Himisākiretari, homanākare hĩxipokini ĩkapani. Iposo atoko kanapiriā, hĩsikakiti tĩkane sika hĩtxako Teosomoni —itxa Xesosi.

²⁵ Iuaĩkana Xesosi sākirauata:

—Kākiti kinirāo apoĩtakiniāi, ininiā pimisiritiko mereēkarimoni iua anikinii apisapanika, katimariā pisa iuamoni. Pimisākiretari iua, kotxi pimisiritiko mereēkari sikaiko pite pimisiritakirimoni. Ininiā eereka iua takai kateia āki. Iuaā pikaikotako. Ininiā apisapanika pimisākiretariko iua pomanatakiri. ²⁶ Atāo nisāpiretai, kona posipikari kateia ikinika pimisiritiko mereēkari paniātakiti pimiĩkitxitanisaaki —itxa Xesosi.

Kipa Txĩkitakai Maerekati Pikamini?

²⁷ Xesosi apikomoni sākirauata:

—Hĩte imarotapekari kitxakapirĩka sāpiretakori: “Pĩtanoro minakotokatika kona pisirĩkape.” ²⁸ Kitxakapirĩka ikara atoko itxama. Nota sāpiretaiko hĩte apikomoni. Sito atamatakari kinirāo oakata sirĩkaka inakari, iuara kamapekari maerekati ākixinireē. ²⁹ Kona pauiritapiri maerekati pikamini txĩkitaākari pitekata ikaikotini. Patamatakiti txĩkitakiniāi maerekati pikamini, pimakatxakari poki, oka pitxari, kotxi maerekati pikaminiā, maerekani misiritikoātaā pokaākako. Apiaerekata Teosokata ātipirika pauini āti pokinoka pauini. ³⁰ Piuako pikikomoni auakari txĩkitakiniāi maerekati pikamini, ininiā pisauaka, oka pitxa, kotxi maerekati pikaminiā, maerekani misiritikoātaā pokaākako. Apiaerekata mauakotikai pauini ātipirika Teosokata. Kona pauiritapiri maerekati kaikotini pitekata. Pitakanapariko maerekati.

Kiki Ītanorokata Itakanapakakini

(Mateo 19.3-9; Marko 10.2-12; Arókasi 16.18)

³¹ —Kitxakapirĩka ia atoko itxa sākiretxi:

Pītanoro pitakanapiniā, aātsopa pisika oamoni itanorotxi takanapiko aātsopati.

³² Iuaritika nota sāpiretaiko hīte, !hītakanapaperoko pītanoro. Pitakanapiniāro, ininiā maerekati pikamapitika, kotxi eereka oa atxiīti nirekakari āti kiki. Ininiā iusaaki oa kamari maerekati apaka pite xika. Apaka oa takakari kamari maerekati. Apakata pitakanapiniro pītanoro, ātikata osirīkiniā —itxa Xesosi sākire.

Atāopitika Inakari Sākiretxi

³³ Iuaīkana Xesosi sākiraauata:

—Hīte imarotapekari kitxakapirīka sākiretxiti. Ia atoko itxapaniko: “Hīkamariko imakinika hīkamaenetakiti. Hīkamariko hīkamaenetakiti Teoso īkapani,” itxa. ³⁴ Notara sāpiretai hīte apikomoni: “Nikamapitikariko,” pinakasaaki, !pakiriuākatapiri Teoso tixine uāka, kotxi iuaā Teoso auītetxi ininiātaāua. “Nikamapitikariko,” pinakasaaki, kona apikomoni pakiritape. ³⁵ “Nikamapitikariko,” pinakasaaki, !pakiriuākatapiri itixi uāka, kotxi Teoso uai aua apaka. “Nikamapitikariko,” pinakasaaki, !pakiriuākatapiri Xerosareē uāka, kotxi auītetxi Apiananiri sitatxine itxa. ³⁶ “Nikamapitikariko,” pinakasaaki, !pakiriuākatapiri pikii uāka, kotxi !apakata pitxīkitakiniri piāko pomama inini, kasarori inini. Ātika piāko kona piposotari pitxīkitakiniri kasarori inini, pomamari inini. ³⁷ “Ari,” pinakasaaki, pikamapitikariko. “Kona,” pinakasaaki, kotxi kona piposotari pikaminiri. Kona āti sākiretxi !pikamape. Maxikatīka kamakori sākiretxiti Satanasi sākire itxaua —itxa Xesosi.

Xikatxitakaniua Pirena (*Arókasi 6.29-30*)

³⁸ Xesosi oerekarauatapanika:

—Ia atoko kitxakapirīka sākiretxiti: “Neenamatsisaaki āti makatxakiniāri poki, pixikatxitariko. Iusaaki pimakatxakariko iua oki apaka. Pitsiriī pataka āti kākiti xika, pixikatxitariko. Iusaaki iua tsiriī apaka pimapatakako,” itxa sākiretxi kitxakapirīka. ³⁹ Txamari nota sāpiretaiko hīte apikomoni. Kona hīxikatxitapiri maerekati hītemoni auakasaaki. Āti aritiniāri pitoō, ininiā pikirioka ipinitoō iaritini īkapani. ⁴⁰ Atxiīti āti nirekari anikinii pimisiritiko mereēkarimoni, kotxi iua nirekari pite sikiniri pimāka iuamoni iua txineirote pimasikakani xika. Ininiā anikinii apisapanika, pisikariko pimāka inirekakiti, apaka apikomoni āti pimāka. Ikara atoko hīkamako. ⁴¹ Ia āti sākiretxiti: Āti paniātiniāi itii panikini āti ōti, ininiā ipi ōti panikari itii. Poerekariko pitiraōki. ⁴² Atxiīti āti amanaāi pitii, ininiā pisikariko iuamoni inirekakiti. Iua amanainiāi pitii “Akamoni iuaīkana !nisikai,” ininiā iusaaki pisikariko iuamoni —itxa Xesosi.

Pomanatakini Pitiretini (*Arókasi 6.27-28, 32-36*)

⁴³ Iuaīkana Xesosi sākiraauata:

—Hīkenakotapekari ia sākiretxiti: “Hītiretariko hinirimane. Homanatariko himokaiakari.” Ikara atoko kitxakapirīka auari. ⁴⁴ Ikara atoko itxama. Nota sāpiretaiko hīte ipinimoni. Kona homanatapiri himokaiakari. Hītiretariko iua apaka. Hamanaāri Teoso hīte omanatakani erekari isikini īkapani. ⁴⁵ Apakatapitika amokaiakarimoni erekari akamini, kotxi Teoso kamari atokatxi kākiti erekarini auiniātaā iopinikini īkapani, apaka maerekani auiniātaā iopinikini īkapani. Iua iokanataro āparaā atāo inakari kamakanimoni, apaka atāo minakati kamakanimoni. ⁴⁶ Hīte tirketakaninani hītiretiniā, kinirepa Teoso sikari erekari hītemoni hinirimanenokara hītiretakasaaki? Kotxi kākiti maerekati kamakani apaka tirketari ninoa tirketani. ⁴⁷ Hīte misākirketakaninani himisākiretiniā, kākiti Teoso mimarotakani atoko hītxa, kotxi ninoa misākirketakani imisākiretana. ⁴⁸ Ikinipoko hīri iaxiti auakari kamakiti erekari, ininiā iua atokokana hītxīkitakariko ikinipoko hīte kamakiti erekari —itxa Xesosi.

Xesosi Oerekari Teoso Sikiko

¹ Iuaīkana Xesosi sākiraauata:

—Erepaniko. Erekarri pikamakasaaki, kona pikamapiri piukiniua ikapani, erekarri pikamakiti apanakini imarotini ikapani. Pikaminiari erekarri apanakini apokaerekatini ikapani, kona papakapari piparika iki iaxiti, airi iaxiti auakari sikakiti. ² Aua kãkiti ia atoko inakari. Ikamakiti atxiiti erekarri, txamari ixinikakiti kona erekarri. Kãkiti ikara atoko inakari sikarauatakasaaki minakati matiitimoni aiko Xoteo apotiitiniãtaãua, apaka mapara kãkiti napiniãtaã, inirekarina ikinimane itikiniri erekarri ikamakitina. Inirekarina kãkiti iuikinina. Ikara atoko !pitxape minakati matiitimoni pisikarauatakasaaki. Pixinikariko ia: Ninoa apakapapekari ikinika erekarri kãkiti sikakiti, txamari !apakaparina erekarri Teoso sikakiti. ³ Pisikarauatakasaaki minakati matiitimoni, kona pauiritapiri piuako pisaneremoni auakari imarotini piuako pikikomoni auakari sikakiti. ⁴ Ikara atoko ininiã, pitenani imarotari pisiãkiti. Piri iaxitikiri, ikinipoko amatakari, ikitxitaiko kãkiti apisatoõ —itxa Xesosi.

*Teoso Misãkiretiko Pirena
(Arókasi 11.2-4)*

⁵ Iuaikana Xesosi sãkirauata:

—Teoso himisãkiretakasaaki, kona hikamapiri kamisirienereri atoko hinini. Ninoa potxitari itiminina aiko Xoteo apotiitiniãtaãua, kimaporiã apaka, Teoso imisãkiretini ikapani. Ininiã ikinimane itikana. Hixinikari. Ninoa apakapapekari poxokonitxi uai ikorapokoriti auakari. Txamari ninoamoni atão poxokonitxi !auari. ⁶ Teoso pimisãkiretakasaaki, pisa pitenani auiniãtaã. Kona pauiritapiri ãti kaikotini pitekata Teoso pimisãkiretakasaaki. Iuaã pimisãkiretari piri matamatakoti. Iuaã iua amatakoti pite. Eereka isikaiko erekarri iaxitikiri.

⁷ —Teoso pimisãkiretakasaaki, pimixinikariko pisãkire. Maxikatiika kona pisãkirauatape iuakata. Teoso sãkire mauiãkati xinikari Teoso kenakotiniri isãkire kotxi kaiãori isãkire. ⁸ Ikara atoko !pikamape pimisãkiretakasaakiri iua, kotxi pisãkirauatini apisapanika Teoso imarotapekari pinirekakiti. ⁹ Ia atoko hitxako Teoso himisãkiretakasaaki: “Airi iaxiti auakari, ate nirekarri piuãka paxitiko.

¹⁰ Anirekarri ikini itixiti auakani auitetini pite. Pite tixine pinireãkiti kamiko atokokana, anirekarri pinireãkiti kamiko ikorapokoriti,

¹¹ Nipokori ikiniõtika pisikauako.

¹² Pimaxinikaretariko maerekati akamakiti. Maerekati atemoni kamakori amaxinikaretini atokokana pimaxinikaretariko.

¹³ Kona panikapeua aãtaerekatikomoni. Pisikakauako ate, maerekati sauaki aãuakasaaki. Ikara atoko piposota, kotxi pitenanira auitetxi txaua. Pitenanira kaposotiire. Aãtipirika peerekai pite. Ameã.”

Ikara atoko hitxako Teosomoni.

¹⁴ —Pimaxinikaretiniãri maerekati ãti kamakiti pitemoni, ininiã piri iaxiti auakari maxinikaretari maerekati pite kamakiti apaka. ¹⁵ Pimaxinikaretaniãri maerekati ãti kamakiti pitemoni, ininiã piri iaxitikiri kona maxinikaretari maerekati pite kamakiti apaka —itxa Xesosi.

Nipokori Takanapiko Pirena

¹⁶ Iuaikana Xesosi sãkirauata:

—Aua kãkiti ia atoko inakari. Ikamakiti atxiiti erekarri, txamari ixinikakiti kona erekarri. Kãkiti ikara atoko inakari takanapari inipokotini Teosokata isãkirauatini ikapani. Txamari ninoa nirekarri ikinimane imarotini itakanapinirina inipokotinina, kãkiti iuikinina ikapani. Ininiã ninoa matinaniuata itooãna ikara kãkiti imarotini ikapani. Atão nitxai, ninoa apakapapekari ikinika erekarri kãkiti sikakiti, txamari !apakaparina erekarri Teoso sikakiti. Kona ikara atoko !pitxape nipokori pitakanapakasaaki Teoso pimisãkiretini ikapani. ¹⁷ Hite ikara atoko !hikamape. Hinipokotini hitakanapakasaaki Teoso himisãkiretini ikapani, hãrokatoõtaua. Hõeretari hiãko. ¹⁸ Ininiãkara apanakini !imarotari hitakanapiniri hinikini. Ininiã hiri matamatakoti, iuananira itikariko hikamakiti, apanakini mimarotakinini, ininiã isikaiko hiparika iki —itxa Xesosi.

Pitiretakiti
(*Arókasi 12.33-34*)

¹⁹ Iuaĩkana Xesosi sákirauata:

—Maxikatiĩka kona papotiitapiri pitiretakiti uai auakari, kotxi atxiĩti kamara nikari pitii. Atxiĩti oerėkata. Atxiĩti kiĩtiriri ĩtirĩkari iua. ²⁰ Ikara atoko kona pikamape. Papotiitariko pitiretakiti Teoso tixineė, kotxi iuaã !auari kamara. Iuaã tiitxi !oerėkata. Kona ixipoka. Kiĩtiriri !ĩtirĩkari iua. ²¹ Pitiretakiti auiniãtaã, iuaã pixinikapika. Iuaã pinirekari pauini —itxa Xesosi.

Tirikapi Ītotxiãkiri Pirena
(*Arókasi 11.34-36*)

²² —Poki tirikapi atoko itxa piĩto ĩkapani. Poki ereka inakasaaki, ipinikare aua pãkixinireė, ininiã pinireėkiti imakinika erekari. Erekarinokara patamatiniã, erekari pixinire. ²³ Txamari poki oerekasaakii maerekati pikamini, ipiã apoka pãkixiniremoni. Iuusaaki tirikapi kamara na xatiki !auari pitemoni —itxa Xesosi.

Ipi Auĩtetxi Pirena
(*Arókasi 16.13; 12.22-31*)

²⁴ Iuaĩkana Xesosi sákirauata:

—!Apakata kãkiti parĩkauatini ipi iauĩtena ĩkapani, kotxi atxiĩti ãti omanata, ãti itireta. Atxiĩti ãti apokaerekata, ãti inorita. Iua atokokana kãkiti kona posotari iparĩkauatini tiitxi ikinipoko iamotini ĩkapani, Teoso ĩkapani iparĩkauatakasaaki. !Apakata piauĩtetiniri Teoso, txineiro piauĩtetakasaaki.

Teoso Nĩkatiniua Ate
(*Arókasi 12.22-31*)

²⁵ —Ininiã nitxai: Pinirekari nipokori, iãriã pakini auãki pinini ĩkapani. Apaka pinirekari mãkatxi piĩto ĩkapani. Ikara pinirekini xika maerekaxiniretika kona pitxape. Erekarini nipokori. Apiaerekata pixinire. Erekarini mãkatxi. Apiaerekata piĩto. Ininiã ãtipirika !pixinikapiri nipokori, mãkatxi pakini pinitini. ²⁶ Kona pipĩkarauatape nipokori poião auakasaaki. Pixinikariko kotipiriki. Kona ninoa takarauata. Kona apotiitari ikiena. Kona ipotetari ikiena. Iuaritika piri iaxitikiri sikakienatana ninoa. Ininiã ninoamoni nipokori !ixipoka. Teoso apia xinikai hĩte. Ininiã kona pipĩkarauatape. ²⁷ Kinirepa maerekaxiniretinoka pitxa? Pimaerekaxinirene !itxĩkitakai apikomoni ãti oara pauini.

²⁸ —Kinirepa maerekaxiniretinoka pitxa pimãka pinirekini xika. Aãui pixinikako. Kona aãui parĩkauata. !Ikamari imãka, iuaritika aãui peereri. ²⁹ Kitxakapirĩka auĩtetxi Saromão inakori, iteene katiiri itxaua. Kaiãori imãka ereri, iuaritika apia ereri ikinika aãui. ³⁰ Aãui !okanani aua. Uatxa aua. Katana ikatikata iotikaãka. Iuaritika Teoso nĩkatari aãui. Ininiã apiata inĩkakai hĩte. Ikamamãkatapitikai. Poiãonoka hĩte auikari Teoso sãkire. Ikara xika maerekaxiniretinoka hĩtxa.

³¹ —Ininiã maerekaxiniretinoka kona hĩtxape. “Kipa ninika? Kipa niãta? Nãpa napokari mãkatxi?” kona hĩtxape. ³² Teoso sãkire mauĩãkani maerekaxiniretinoka itxana ikara atoko. Piri iaxiti auakari imarotari pinirekaãkiti. Ininiã maerekaxiniretika !pitxape. ³³ Merepitipanika pinirekariko Teoso piauĩte ininiãua. Iua nireėkiti pinitako, ininiã atão inakarinoka pikamako. Ikara atoko inakari pikaminiã, pite nirekakiti apaka isikaiko. ³⁴ Maerekaxiniretinoka kona pitxape katana pinirekakiti pixinikini xika. Pinirekakiti auapitikako katana, iuaritika mitxipanika kona pixinikapiri ikara maerekaxiniretika, kotxi ikiniõtika aua ikara atoko inakari —itxa Xesosi.

7

Apoiřetxi Pirena
(*Arókasi 6.37-38, 41-42*)

¹ Iuaĩkana Xesosi sákirauata:

—“Kona erekari pikamakiti,” kona pitxape ãtimoni, ininiãkara Teoso kona txai pite: “Kona erekari pite kamakiti,” !itxai, ² kotxi Teoso misiritai pimaerekani xika, ãti pite misiritini atokokana. Iteene pimisiriniãri ãti imaerekani xika, iteene Teoso misiritai

pite, pite maerekani xika. ³ Ikara ia atoko. Pisāpiretari āti: “Aāso aua poki āki,” txamari kona pimaākatari aātxirata pite oki āki auakari. Kinirepa ikara atoko inakari pikama? ⁴! Apakata pisākire pitarimoni: “Pauiritano aāso poki āki auakari nimakatzakini.” Ikara atoko pininiā !erekari, kotxi aātxirata aua pite oki āki. ⁵ Maerekati kamakarii pite, kotxi pikamakiti erekari atxiīti, txamari maerekatinoxa pixinikakiti. Pimakatzakariko aātxirata pite oki āki auakari merepanika, ininiā eereka apakata patamatiniri aāso pitarini oki āki auakari pimakatzakini. Ikara oerekaua piteka maerekani auakasaaki, pitakanapariko piteka maerekani, ininiā eereka apakata pimoianatiniri āti iua maerekani itakanapini īkapani.

⁶ —Kākiti kona sikari Teoso nakiti anāpamoni, kotxi atxiīti iua anāpa kirioka, akatsata txai. Iua atokokana Teoso nakiti kona asika Teoso mapaxitakatimoni, kotxi iua anāpa atoko. Eereka iua misiritapitikai.

—Apaka kona pinoakitsa ereri kona pisika irarimoni, kotxi iua katxaratari. Iua atokokanera Teoso mapaxitakanimoni kona hīsikari Teoso nakiti, kotxi eereka imisiritari Teoso nakiti noakitsatxi irari misiritini atoko —itxa Xesosi.

Kona Hītakanapapiri Teoso Himisākiretini
(Arókasi 11.9-13)

⁷ Iuaīkana Xesosi sākirauata:

—Teosomoni pamanarauatakasaaki, papakapariko pinirekakiti. Pinitarauatakasaaki, papokapitikariko pinireēkiti. Aīri iaxitikiri pakiritiniā, iua apakapapiretai. Ia atoko itxako: “Pikanikauata. Pīroā,” itxako. ⁸ Ikinika amanarauatakari apakapariko inirekakiti. Nitarauatakari apokariko initakiti. Teoso akiritakari apakapaākapitikako. ⁹ Amarini amanainiāri iri komiri, atauako kai sorokani isikatarini imi? ¹⁰ Ximaki amanainiāri, atauako iminikani isikari? Konapitini. Irītxi kona kamari ikara atoko inakari. ¹¹ Kākiti maerekani apaka imarotari erekari isikini amaritenamoni. Aīri iaxitikiri apiata imarotari isikiniri erekari iua anaakorimoni, ninoa amanaākasaakiri.

Āti Pitiretini Pirena

¹² —Pixinikariko. Natokopa pinirekari apanakini tiretini pite? Ininiā iua atokokana pitiretariko apanakini. Ikara atoko itxa ikinika Teoso paniātakiti aātsopaā auakari, apaka Teoso sākire sāpiretakani sāpiretakiti kitxakapirika —itxa Xesosi.

Ipi Kimapori Pirena
(Arókasi 13.24)

¹³ Iuaīkana Xesosi sākirauata:

—Teoso tixine hīroā axapitiri īronakikoātaā. Mitari īronakikoātaā sikari sari maerekani misiritikoātaā. Iua kimapori mitari, kotxi itomaneri kākiti sari iuaā. ¹⁴ Axapitiri īronakikoātaā, kimapori axapitiri. Iua apo sari auapininiika inini tixinemoni. Iua kimaporiti axapitiki, kotxi poiāoka kākiti sari iua kimaporiti —itxa Xesosi.

Omina, Ori Pakini Pirena
(Arókasi 6.43-44)

¹⁵ Iuaīkana Xesosi sākirauata:

—Erepaniko. Auapitika Teoso sākire sāpiretakari, txamari iua na atāo isāpireta, kotxi isāpiretari iua sākire Teoso sākirekata. Ikoketari. Atāo inakari ikoketa maerekatikata. Erepaniko. Pamonoākoniri iua. Mapara patamatakasaakiri, soti auīte atoko itxa. Ākixiniremoni ākiti atoko itxa. ¹⁶ Pimarotari kākiti ikara atoko inakari, kotxi patamatari ninoa kamakiti maerekati. Inako mina kona iritari kīpaima. Aanaia kona iritari pama. Iua atokotxikana kākiti maerekati kamakani kona kamari erekari. ¹⁷ Ikinika aamina erekari, erekari iri. Aamina maerekati, ininiā maerekati iri. ¹⁸ Aamina erekari kona posotari maerekati iritini. Iua atokokana aamina maerekati kona posotari erekari iritini. ¹⁹ Aamina maereka iriti itoāka, arika inaāka. ²⁰ Ininiā aamina iriāra kākiti imarotari ereka inini. Iua atokokanera kākiti imarotaāka —itxa Xesosi.

Kākiti Teoso Tixine Īroākani
(Arókasi 13.25-27)

²¹ Iuaĩkana Xesosi sãkirauata:

—Apanakini txano nota: “Pite niauĩte” inakani, !isapanina Teoso auĩtetxi ininiã-taũua. Niri iaxiti auakari nireẽkiti kamakarinanira sapaniko iuaã. ²² Itixi xipokini õtisaaki, itomaneri kãkiti maxikatiĩka akiritano: “Pite aãuĩte apiatakari. Papakapaua. Aõerekapekari pisãkire apanakinimoni. Aõmitikapekari maerekati matamatakoti pi-uãkaã. Akamapekari posotiiretxi kaiãopokori,” itxanako ninoa. ²³ Txamari nitxanako: “Kona nimarotai hĩte. Hĩsipiniikaua. Maerekatira hĩkama.” Ikara atoko nisãpiretanako ninoa, kotxi maerekati kamakani itxauana —itxa Xesosi.

Aapokotxi Kamakari
(Arókasi 6.46-49)

²⁴ Iuaĩkana Xesosi sãkirauata:

—Nisãkire kenakotakari, nisãkire nĩkaenetakari, ia kiki kimaroreri atoko itxa. Ia kiki kamakasaakiri aapoko, iopitimita aapokotxi tsota. Otsomori ikama. ²⁵ Ininiã ãparaã kipakasaaki, uini apoãtakasaaki, ĩtima apisatakasaaki, aapoko kona irika, kotxi iua tsota itakapekari otsomori. Nisãkire kenakotakani nisãkire nĩkaenetakani, iua kiki kimaroreri atoko itxana.

²⁶ —Nisãkire kenakotakari, nisãkire miinĩkaenetakati, kãkiti miĩkiteti atoko itxa. Iua kamari aapoko ikipatxiteẽ. ²⁷ Ikipakasaaki, uini apoãtakasaaki, ĩtima apisatakasaakiri, aapoko irika. Irika, kotxi aapokotxi !otsomori. Poião tsomikari. Irikasaaki, ikinika xipoka. Ikara atoko itxa nisãkire miinĩkaenetakati. Iua imarotapitikamari, txamari ! ikamari. Ikara atoko nisãkire mapaxitakani —itxa Xesosi.

Xesosi Posotiire Pirena

²⁸ Xesosi oerekarauatini xipoka atoko, kãkiti xinikari: “Paimatireri Xesosi. Iua imarotari atão.” ²⁹ Ikara atoko ixinikana, kotxi Xesosi imarotapitikari Teoso sãkire oerekini. Kaposotiireri iua isãkirauatakasaaki. Kaiõkatsoparerini atoko kona itxa. Ninoa kona imarotari Teoso sãkire Xesosi imarotiniri atoko.

8

Kiki Maere Matati
(Marko 1.40-45; Arókasi 5.12-16)

¹ Xesosi ixirata iokiriĩtaka atoko, itomaneri kãkiti sari iua tikini. ² Iuasaaki ami-anatakari maere matati apoka iuamoni. Ikapotoreẽkua iua apisatoõ. Itxari:

—Nimarotari pinirekiniã, erekapeka pitxĩkitakano nota —itxa.

³ Xesosi maãtakari iua. Ininiã itxa:

—Ari, ninirekapitikari. Erekapekai —itxari.

Iuasaakipeka erekapeka itxa. ⁴ Ininiã Xesosi:

—Kona ĩkora !pisãpiretape apanakinimoni. Uatxa sasetotximoni pisa. Poerekaua iuamoni erekapeka pinini. Moisesini paniãtakiti atoko pikama. Pikaminiãri ipaniãtakiti atoko, ininiã ikinimane imarotari erekapeka pinini —itxa Xesosi.

Ereka isari Xesosi paniãtakiti ikamini ĩkapani.

Sotato Auĩte Nitiri Makananitiko
(Arókasi 7.1-10)

⁵ Kapanaoõ sitatxiti apokasaaki, sotatoakori auĩte sari Xesosimoni. Homano itxaua. Iua iteene amanaãri Xesosi:

⁶ —Xesosi, ninitiri iteene amianata naapoko. Ikikinana. !Itĩpokotaika. Inikoriãtsi-itari —itxari Xesosi.

⁷ Ininiã Xesosi:

—Iuaã nisako erekape inini ĩkapani —itxa Xesosi.

⁸ Ininiã iua Homano:

—Konapitini. Pite auĩtetxi apiatakari pitxaua. Nota poiãorino. !Apakata naapoko piĩroini. Pisãkirenani piokanata. Ininiã erekapeka itxako ninitiri. ⁹ Nimarotari ikaranani apakatako, kotxi nota kamari nota auĩte paniãtakiti. Apaka sotato auĩte nitxaua nota. Nisãkirauatakasaaki, nisotatone kamapitikari nipaniãtakiti. Nota txari: “Pisa.”

Iuasaakipeka isa. Nitxari āti: “Pina.” Iuasaakipeka ina itxa. “Ia pikama,” nitxari ninitiri. Iuasaakipeka ikamari. Ininiā pisākirenani apakatapitika —itxari Xesosi.

¹⁰ Isākire Xesosi kenakotakasaaki, iteene ipotxitari isākire. Iposo atoko itxa:

—Atāo nitxai. Isaeo auakani poiāo auikari nisākire. Ia Homano itxaua, iuaritika apiata iua auikari nota posotiire. Kona nitikapanikari kākiti Isaeo auakari auikiniri nisākire ia kiki auikiniri atoko. ¹¹ Nota sāpiretai hīte, itomaneri kākiti āti uāka atokatxi pokīkini tixinimoni auakani, atokatxi ereēkokini tixinimoni auakani apaka, itomaneri itixi auakani kiiniritauatako Teoso auītetxi ininiātaāua. Ninoa nipokotako anirimanekata kitxakapirīka auakanikata. Apraāo, Isaki, Xakoo pakinikata inipokotana. ¹² Iuasaaki apanakini Apraāo apika mekaniriakori kona sari iua Teoso kiiniritemoni, kotxi ninoa !auikari Teoso sākire. Piākatximoni iokanataākanako. Iuaā itxiapatana, akatsakatsiriūtanauako imisiritikona xika —itxa Xesosi sākire.

¹³ Ininiā Xesosi txari sotatoakori auīte:

—Pisa paapokomoni. Pite auikari niposotiire pinitiri erekape inini īkapani. Uatxa auape pinirekakiti —itxa Xesosi.

Ininiā initiri iuasaakipeka erekape itxa.

Simāo Petro Imakiro Makananitiko
(Marko 1.29-34; Arókasi 4.38-41)

¹⁴ Iposo atoko Xesosi sari Petro aapokomoni. Iuaā apokasaaki, atamataro Petro imakiro. Osirimata nopini osirīkanāta. Oāpoomata. ¹⁵ Ininiā Xesosi takapiotaua ouako nopini. Iuasaakipeka apoomari xipoka. Ininiā oōkitikaua. Osikakienatana ninoa.

Xesosi Makananitana Amianatakani

¹⁶ Mapiāpeka inakasaaki, kākiti anikana itomaneri maerekati matamatakoti auāto-takini iuamoni. Isākireē omitikana maerekani matamatakoni. Imakananitana ikinikana amianatakani. ¹⁷ Ikara atoko itxa Xesosi, kotxi inirekari Isaía sākire iaōka apokini. Kitxakapirīka Teoso sākire sāpiretakari Isaía inakori txari:

Iua tiretariko amianatakari. Imakatzakariko aamianare. Imakananitaua. Iuaka atatsi-irauata ate īkapani.

Kākiti Xesosi Imoianatinina Nireēkani
(Arókasi 9.57-62)

¹⁸ Itomaneri kākiti iuakata auakasaaki, Xesosi txari imoianariakori:

—Masa ipiniāmoni —itxana.

¹⁹ Iuasaakipeka āti kaiōkatsopareri apoka Xesosimoni. Itxa:

—Koerekareri, nota iposope nisini pite nirekinimoni —itxa.

²⁰ Ininiā Xesosi:

—Atauako pinirekatari pisini notakata? Aripa aua auini iriko. Araākani auari ikoa. Txamari nota kākiti itari iaxitikiri !auari nimakiniātaā —itxa Xesosi.

²¹ Ātipekana apoka Xesosimoni. Xesosi moianari iua. Itxari:

—Niaūite, pauiritano niri nikatanapini merepanika, kotxi kiomātxipekari iua. Eereka nisa pitekata —itxari.

Iteene iua linirekari isini Xesosikata. ²² Xesosi apakapapiretari:

—Notakata pisa uatxa. Nisākire mauīākani ipīkani atoko itxana. Ininiā pauiritana ipīkani katiniri inirimane nisākire mauīākani —itxa Xesosi.

Xesosi Iotokakiniri Ītima Pirena
(Marko 4.35-41; Arókasi 8.22-25)

²³ Iposo atoko, Xesosi imoianariakorikata iereētaua, ipiriātinina īkapani.

²⁴ Mokatanitika ĩtima kataparari apoākata. Tsakati okari āparaā kanaua āki. Iuasaaki Xesosi imkanāta. ²⁵ Imoianariakori sari iuamoni. Ōpirīkarina. Akiripoakatana:

—Apiananiri, !pauiritapiri apinini. Apinanapanoka —itxana.

²⁶ Ininiā Xesosi:

—Kinirepa hīpīkarauata? Poiāonoka hāuikari niposotiire —itxa.

Iposo atoko ōkitikaua, pinita itxari ĩtima, tsakati pakini. Iuasaakipeka ĩtima, tsakati pakini iotoka. ²⁷ Ininiā imoianariakori tsorīkaāta. Itxana:

—Natokopa inakaripa ia kiki? Ītima, tsakati pakini kenakotari isākire —itxana imoianariakori.

Ipi Kiki Maerekani Matamatakoni Auaītotakini
(Marko 5.1-20; Arókasi 8.26-39)

²⁸ Ipiniā apokasaakina Xerasa tōpamoni, itaōkitarina ipi kiki itomane maerekani matamatakoni auaītotakini. Akauariā auanātana. Paneenamana. Ikara xika kākiti pīkari akauarimoni isinina. ²⁹ Xesosi inaāpotakasaaki, maerekani matamatakoni iītoāna auakani akiripoakata:

—Xesosi, Teoso ākiri pitxaua. Kiripa pinirekaka atemoni? Pite ina uaimoni amisiritiko ōti apisapanika pimisiritiniua īkapani atxiīti? —itxarina.

³⁰ Ikara ininiātaā takote auana itomane irariakori. Ikira atoko inipokonātana. ³¹ Ininiā maerekani matamatakoni txari:

—Ate pomitikiniā, irariakorimoni piokanataua —itxarina.

³² Ininiā Xesosi:

—Hīsipeka ninoamoni —itxa.

Iuasaakipeka irariakori iītoā iīroāna. Ininiā imakinikana irariakori miteēkata. Iokir-īikatana. Ipoamoni isana. Iuaā ikomokana, axāpoāta itxana. ³³ Ninoa irariakori nīkatakani miteka sitatximoni. Iuaā ikinika isāpiretana irari ipinini pirena, kiki maerekani matamatakoni auaītotakini pirena apaka. ³⁴ Ininiā ikinimane sitatxikini sari Xesosi itaōkitinina īkapani. Iua itaōkitakasaakina, amanaārina ninoa tixine itakanapini īkapani.

9

Matīpokotakati Pirena
(Marko 2.1-12; Arókasi 5.17-26)

¹ Ininiā Xesosi iereētatau kanauaā. Ikanapiriā iua auinimoni Kapanaoō sitatxitimoni. ² Ātikaka kikiakori minari matīpokotakati Xesosimoni. Xesosi imarotari ninoa auikini iua sākire. Ininiā itxari:

—Namarite, pipoxokoniuatako. Pimaerekani makatxakapeēkaika —itxa.

³ Iuasaaki aua ātikaka kaiōkatsoparerini iuaā. Ninoa ākixinireē itxana:

—Kona erekari isākire. Teosonanira posotari kākiti maerekani imakatxakini —itxana ninoa.

⁴ Xesosi imarotari maerekati ixinikakitina ākixinireēna. Ininiā iua txa:

—Kinirepa hīuākatari nisākire maerekati inini? ⁵ Nītxari iua imaerekani nimakatxakini, txamari !himarotari imaerekani atāo nimakatxakini. “Pōkitikaua. Pitīpokota,” nininiā, himarotari nisākire atāo ininiāua, kotxi hītikari. Niposotiire imaerekani nimakatxakini īkapani, niposotiire iua nōkitikini īkapanitxikana. ⁶ Ininiā uatxaika no-erekai hīte, Teoso iokanatanano nota hītari iaxitikiri īkorapokoritimoni kākiti maerekani nimakatxakini īkapani —itxa Xesosi.

Ininiā itxari matīpokotakatimoni:

—Pōkitikaua. Pisirimata pikoseka, sipe pitxa paapokomoni —itxa Xesosi.

⁷ Iuasaakipeka iua ōkitikaua, aapokomoni sipe itxa. ⁸ Ikara inakari apanakini itikasaaki, ipīkarauatana.

—Peerekari Teoso, kotxi iua oerekari iposotiire kākitimoni —itxana.

Mateo Pirena
(Marko 2.13-17; Arókasi 5.27-32)

⁹ Ikara inakari oereka atoko Xesosi sipeka. Isikasaaki, itaōkitari Mateo inakori. Auītetxiakori txineirote apotiitakari iua. Xesosi napakasaaki, iitopākanāta txineiro apakapiniātaā. Ininiā Xesosi txari:

—Masa notakata pimoianatinino īkapani.

Ininiā Mateo ōkitikaua, Xesosikata sa itxa. ¹⁰ Eereka Xesosi imoianariakorikata nipokota Mateo aapoko. Txineiro apotiitakani, apanakini kākiti maerekati kamakani pakini apoka Xesosikata inikinina īkapani. Kākiti kona potxitari txineiro apotiitakani,

kotxi ninoa sikaro oa txineiro āti uāka auīteakorimoni. !Neerekana ninoa. ¹¹ Pariseoakori itikari ninoa nipokotini, ininiā itxana Xesosi moianariakorimoni:

—Kinirepa hīauīte nipokota txineiro apotiitakanikata, maerekanikata? —itxana.

¹² Ininiā Xesosi kenakotari ninoa sākire. Itxa:

—Maerekati kamakari amianatakari atoko itxa. Ninoa nirekari erekape ininina. Kākiti mamianatakani !inirekari ipini sikakarimoni isinina. Amianatakaninoka nirekari ipini sikakarimoni isinina. Hīte !inirekari nota makatxakiniri himaerekani, kotxi hīte uākatari !uari himaerekani. ¹³ Hīxinikariko ia Teoso sākire iōkatsopatakori:

Hīskarauata notamoni. Apiaerekata hiamonīkiniri apanakini.

Nota ina !korapokoriti kona kākiti “atāo inakarino kamakarino nota” inakani !kapanini, kotxi ninoa uākatari erekarini ininiāuana, txamari kona erekana. Kākiti maerekati kamakani !kapanira nina nota uai imaerekanina itakanapinina !kapani —itxa Xesosi.

Nipokori Takanapiko Teoso Misākiretiko !kapani

(Marko 2.18-22; Arókasi 5.33-39)

¹⁴ Eereka Xoāo kapatxisareri moianariakori apoka Xesosimoni. Itxana:

—Ate, pariseoakori pakini atakanapari anipokotini itokata Teoso amisākiretini !kapani. Kinirepa pite moianariakori !itakanapari inikinina Teoso imisākiretinina !kapani? —itxana.

¹⁵ Ininiā Xesosi apakapapiretana:

—Nota kiiniri kamakari atoko nitxa. Kiki nirekiniā !tanorouatini, ikamari kiiniri. Iuasaaki imoianariakori kona nirekari imatinaniuatinina, iua ninoakata auakasaaki. Ininiā kona itakanaparina inikinina Teoso imisākiretinina !kapani. Āti ōti nimaīkaākako. Nanikaākako ninoa mauakaniātaā. Iuasaakiko itakanaparina inikinina Teoso imisākiretinina !kapani —itxa Xesosi.

Mākatxi Tāpanatiko Pirena

¹⁶ —Kiomātxiakori kitxakapirīka auakani sākirekata kona hīkoketapiri nota sākire. !kara hīkaminiā, ininiā mākatxi kitxakari amaneriā hītāpanatini atoko itxa. Mākatxi kitxakari amaneriā kona hītāpanatape, kotxi parokasaakiri, amaneri txikika, ininiā ikatsorākari mākatxi kitxakari. Ininiā mitari itsorākare. Mākatxi amaneri nota oerekakiti atoko. Mākatxi kitxakari, kākiti kitxakapirīka oerekakiti atoko itxa. Hīkoketiniāri kitxakapirīka oerekakiti, amaneri oerekakitikata, imakinika xipoka.

Sako Aamata Kamakori

¹⁷ —Kitxakapirīka kākiti takari iāriā sako aamata kamakori āki. Iuasaaki kona kākiti takari amaneri iāriā kitxakari mata āki, kotxi iāriā txiōkaātakasaaki, itiākaāpota. Ininiā omata kitxakari tsorakitako, kotxi paikori. Kona itiāka. Ininiā iāriā katxaka. Iāriā, aamata pakini xipoka. Amaneri matariā itakaāka iāriā amaneri. !kara atoko ininiā, erekapitikari. Kona ixipokapaniko. Iua atokokana kona hīkoketapiriko kiomātxi kitxakapirīka oerekakiti nota oerekakitikata —itxa Xesosi sākire.

Xoteoakori Auīte Pirena

(Marko 5.21-43; Arókasi 8.40-56)

¹⁸ Xesosi sākirauatapanika, inakasaaki Xoteoakori auīte apoka iuamoni. !kaporeēkaua Xesosi apisatoō. Itxa:

—Namarite opinanapanoka. Masa. Piuako pitaka oa nopini, ininiā kona opina —itxari Xesosi.

¹⁹ Ininiā Xesosi imoianariakorikata ōkitikaua, iuakata sa itxana.

Xesosi Māka Maātakakaro

(Mateo 9.20-22; Arókasi 8.43-48)

²⁰ Isikasaakina, sito apoka iua porikimoni. Oamianare oārēka !iotokiniāro. Tosikanani oamianatini. Oāpokasaaki, omaātakari imāka imapotomatare. ²¹ Oākixinireē otxa:

—Imāka nimaātakiniā, erekape nitxako —otxa.

Ininiā otikakari imāka. ²² Iuasaakipeka Xesosi kirioka, atamata itxaro:

—Namarite, kataparaxinire pitxako. Pauikari niposotiire, ininiā erekapekai —itxaro.

Iuusaakipeka oa erekape.

Xáiro Ākero Ōkitikiko Pirena
(Marko 5.35-43; Arókasi 8.49-56)

²³ Iposo atoko Xesosi sari Xoteoakori auíte aapokomoni. Iuaã apokasaaki, iïroã. Itikari sokonaki xōkakani, itomaneri kākiti txiapatakani apaka. ²⁴ Ininiã Xesosi:

—Mapara hīsa, kotxi oa amarini kona opina. Omakanāta —itxa Xesosi.

Ininiã ninoa napetari Xesosi:

—!Omakanāta. Opīpe. Pite !imarotari —inapetarina.

²⁵ Ikinimane mapara isikasaakina, Xesosi sari oa ātokoromoni. Imaïkaro ouako. Iuusaakipeka oōkitikaua. ²⁶ Ikara ene iaripireta iua tōpa.

Xesosi Kōsiārepeka Txīkitakari Mōsiāreti

²⁷ Iposo atoko Xesosi sipe. Iuusaaki ipi mōsiāreni sari iua tikini. Iuusaaki ninoa akiripoakata:

—Tavii apika mekanirii, piamonīkaua ate —itxana.

²⁸ Aapokotxi Xesosi iroākasaaki, ninoa iroã apaka. Ininiã Xesosi:

—Hāuikatari niposotiniri erekapeka nitxīkitakinii hīte? —itxa Xesosi.

Ininiã ninoa:

—Ari, Apiananiri —itxana.

²⁹ Ininiã itakapiotaua ninoa oki nopini. Ininiã itxa:

—Ari, hāuikakiti iaōka itxako —itxa Xesosi.

³⁰ Iuusaakipeka ninoa kōsiārepeka itxana. Ininiã Xesosi:

—Kona hīsāpiretapiri nikamakiti apanakinimoni —itxa Xesosi.

³¹ Eereka ninoa sipe. Txamari iaripiretarina ikamakiti ikinika iua tōpa.

Masākireti Pirena

³² Ninoa kiki potorikasaaki, masākireti anikaāka Xesosimoni. Iua kona kasākireri, maerekati matamatakoti auaītotakiti xika. ³³ Iuusaaki Xesosi omitikari iua maerekati matamatakoti. Iuusaakipeka iua kiki sākirauata. Itomaneri kākiti itikari. Iuusaakiika ninoa tikoka. Ininiã itxana:

—Ikinika Isaeo tixiniã auakani, mitxi !itikapanikari iġkora atoko inakari —itxana.

³⁴ Txamari pariseoakori txari:

—Xesosi omitikari maerekati matamatakoti Satanasi posotiireē —itxana.

Na atão ninoa sākire.

Xesosi Ikini Sitatxiti Sini

³⁵ Ininiã Xesosi sari ikini sitatxiti tōpa. Aapokotxi auiniātaã apaka isa. Oerekarauata aiko Xoteo apotiitiniātaãua. Isāpiretari Teoso iokanapirena erekari, Teoso auītetxi ininiãua pirena. Apaka erekapeka itxīkitakana ikinipoko amianatakani. Ikini sereti amianari aua kākitemoni. Ikinika imakananita. ³⁶ Atamatakasaakina ninoa kākitemokoni, iamoniġkana ninoa, kotxi soti auíte minġkatakoni atoko itxana, kotxi !imarotarina isinimonina. Imaākauana. ³⁷ Ininiã itxari imoianariakori:

—Kaiãori kākiti iposope auġkiniri nisākire, txamari !imarotarina nisākire, kotxi ! ikenakotapanirina. Ninoa kikio erekari atoko itxana. Imakinika iposope iuaã. Ininiã iposope auġkinirina nisākire. Txamari, poiãoka parġkauatakani aua nisākire isāpiretinina iġapani. ³⁸ Ininiãkara himisākiretariko Apiananiri iaxitikiri iokanatinina parġkauatakani iua sākire auġġakani apotiitinina iġapani. Ikara atoko hġtxako Teosomoni —itxa Xesosi.

10

Xesosi Mereēna Toġi Imoianariakori
(Marko 3.13-19; Arókasi 6.12-16)

¹ Xesosi mereēna toġi imoianariakori. Isikari iposotiire ninoamoni maerekati matamatakoti omitikinina iġapani. Isikari iposotiire ninoamoni amianatakani imakananitinina iġapani, ikinika amianari inokasaakina ninoa amianatakani. ² Naia imoianariakori uāka: Merepitipanika auari Simão Petro inakorima, apaka itari Ātree inakorima. Auari Txiakoma, apaka itari Xoãoma. Ninoa Sepeteo anaakori. ³ Auari Piripima, Patoromeoma,

Tomeema. Apaka auari Mateoma, txineiro apotiitakari. Apaka āti Txiakoma, Aoepo ākiri. Aua Tateoma. ⁴ Aua Simāoma, Homano omanatakari. Apaka aua Xotasi Isikariotxi inakorima. Iua Xesosi mīkapiritakari itxaua. Ninoa Xesosi moianariakori itxauana.

Xesosi Iokanatana Imoianariakori Kākitimoni
(Marko 6.7-13; Arókasi 9.1-6)

⁵ Ininiā Xesosi iokanatana ninoa isākire isāpiretinina. Ia atoko ōtākikana:

—Kona hīsipeko Xoteo minakonimoni, apaka Samaria tōpa sitatxitimoni kona hīsipeko. ⁶ Hīsako kākiti Isaeo tixinikinimoni. Hinirimanemoni, Xoteoakorimoni hīsako. Ninoa soti auīte pīpinanaākani atoko itxana. ⁷ Hāpokasaaki kākitimoni, hītchariko: “Teoso ikinimane auīte ininiua manapi paītiki apokako.” ⁸ Himakananitanako amianatakani. Maere matati erekapeka hītixikitakako apaka. Ipīkani hōkitikako. Homi-tikariko maerekati matamatakoti kākiti auaitotakini. Ikara atoko hīkamako. Kona hīte īkitxitari Teoso hāpakapakiti īkapani. Ininiā ikara atokokana hītchako. Kona hinirekapiri kākiti iīkitxitinini hīte, hīte sikakiti īkapani. ⁹ Kona hanikapero txineiro oro kamakoro. Pirata kamakoro, ātiāo txineiro apaka, kona hanikape. ¹⁰ Uatxa hianaxititakasaaki, sako mata !hanikape. Āti himāka !hanikape. Āti hīkiti mata kona hanikape. Hītsonere !hanikape. Kona himaākapeua, kotxi parīkauatakani apakapariko nipokori. Hinirekakiti apokapitikako.

¹¹ —Sitatxi hāpokasaaki, hinitari kākiti Teoso sākire kenakotakani, hīte apakapakani. Hīkaikota ninoakata. Eereka kona hīsipe āti aapokomoni hīkaikotini īkapani. ¹² Aapokotxi āki hīiroākasaaki, hītchako: “Erekari Teoso sikakiti kaikotako hītekata,” hītchako. ¹³ Kākiti ipoxokoniritika apakapiniāi, hītchako: “Teoso takari erekari hītemoni,” hītchako. Imanirekakaniāi, hītchariko: “Teoso kona takari erekari hītemoni.” ¹⁴ Atxiīti aapokotxi hāpokasaaki, kākiti iuaātaā !apakapai. Atxiīti !inirekarina hīsākire, ininiā iuasaaki hīsipeka. Hītakanapariko iuaātaā. Hīpotorikasaaki, himakatkakari kipatxi hīkiti mataā auakari. Ininiā iuasaaki ninoa imarotari Teoso kona apokaerekatana. ¹⁵ Hīxinikariko ia nisākire. Kākiti misiritiko ōti apokasaaki, ninoa apiata misiritaāka. Sotoma sitatxiti auakani, Komoha sitatxiti auakani pakini misiritaāka poiāoka —itxa Xesosi.

Misirikaretxi Pirena
(Marko 13.9-13; Arókasi 21.12-19)

¹⁶ Iuaīkana Xesosi sākirauata:

—Erepaniko, pamonōkoniri. Hīte soti auīte atoko hītcha, kotxi !kaposotiirei hīte, iuaritika niokanatai kākitimoni. Ninoa ākiti atoko, ininiā erepaniko. Ininiā kimarorei hītchako. Imini kimaroreri atoko hītchako. Ininiā maerekati ninoa auakiti kona misiritai. Iuasaakiika kama atoko hītchako, kotxi kama !misiritari kākiti.

¹⁷ —Erepaniko. Araōkire hītchako. Auako kākiti kinirāo anikinii maxikatiīka kākiti misiritiko mereēkanimoni. Apanakini xirokaiko hīte maxikatiīka aiko āki Xoteo apoti-itiniātaāua. ¹⁸ Nota sākire hāuikini xika hanikaākako auītetxiakorimoni himisiritiko himarotini īkapani. Ikara atoko ininiā, iuasaaki erekapitikari, kotxi hīsāpiretariko nota sākire iuaā auakanimoni, Xoteo minakonimoni apaka.

¹⁹ —Kākiti misiritiko mereēkarimoni hanikikosaaki, kona himaākapeua hīsākirauatini apisa. Teoso sikaiko hīsāpirena tīkane. ²⁰ Sākiretxi hīsāpiretakiti kona hīte sākireni. Erekari Matamatakoti, iuarako sikariko sākiretxi hīsākirauatini īkapani iuasaaki.

²¹ —Āti ōti hītari sikaiko hīte homanatakinimoni okinii īkapani, kotxi hīte auikari nota sākire. Iua atokokanerako irītchi sikariko imi ātimoni okiniri īkapani, kotxi imi auikari nota sākire. Auako apaka imi omanatinina iri, inoro pakini, kotxi inoro, iri pakini auikari nota sākire. Iua sikanako ātimoni okinina īkapani. ²² Ikinimane omanataiko hīte nota sākire hāuikini xika, iuaritika hāuikiniāri nisākire ātipirika, nimakatkakai himapinakani īkapani. ²³ Sitatxiā hāuakasaaki, himisiritikosaaki, āti sitatxitimoni himitekako. Atāo nota sāpiretai hīte. Kona hīte xipokapaniri hīparīka ikini sitatxiti Isaeo tixini hītari iaxitikiri kanapiriini apisa —itxa Xesosi sākire.

Apiatakari, Poiāori Pakini

²⁴ Iuaĩkana Xesosi sãkirauata:

—Apaiaõkarauatakari poião. Koerekareri apiata. Apaka nitiritxi poião. Iauĩte apiata. ²⁵ Apakatapitika apaiaõkarauatakari koerekareri imarotakiti iaõka imarotini. Iua atokokanera nitiritxi iua auĩte atoko inini. Apanakini akiritano nota “Peosepoo,” Satanasi inakori. Ininiã itakauãkakai hĩte hĩuãka apia maerekati, kotxi nota anaakorirai hĩte —itxa Xesosi.

Kipatakori !Auari

(*Arókasi 12.1-3*)

²⁶ —Ininiã kona !hĩpikapena ninoa maerekati kamakani, kotxi nota kanapiriãkasaaki, kona kipatakori auapanika. Ikinika imarotaãkako. ²⁷ Hĩtemoni iƙanõka nimaasakapiretakiti, iƙara nisãkire hãkiripoakatako aapokotxi nopini imakinika kãkiti imarotini iƙapani. Uatxa hĩtemoninani nisãpiretakiti ãti õti ikinimanemoni hĩsãpiretako.

Kipa Apĩka?

(*Arókasi 12.4-7*)

²⁸ Kona hĩpikapena hĩto okakani, kotxi !iposotarina hĩxinire okinina. Hĩpikariko Teoso, kotxi iuanokara posotari iokanatinii hĩte, hĩto, hĩxinire pakini maerekani misiritikoãtaã. Iuara hĩpĩkako.

²⁹ —Ipi kotipiriki iƙi poião, ãtika txineiro otanoka. Iuaritika hĩri iaxiti auakari tiretana ninoa. Imauiritakaniãri, kona ãtika ipina. ³⁰ Kipakinipa piãko pikiiã auakari aua? ! Pimarotari. Teoso imarotapitikari, kotxi iteene inĩkakai, ininiãkara !hĩpĩkarauatape. ³¹ Kotipiriki iƙi poião, iuaritika Teoso tiretari kotipiriki. Ininiãkara kona hĩpĩkarauatape. Kaiãopokori kotipiriki auiniã, iuaritika hĩte iƙi apiata, ininiã Teoso tiretapitikai hĩte —itxa Xesosi.

Xesosi Tiretakani, Xesosi Manirekakani Pakini

(*Arókasi 12.8-9*)

³² Xesosi sãkirauatapanika:

—Apanakini apisatoõ hĩsãpiretiniãri: “Xesosi nakiti nitxaua nota,” iua atokokanerako nitxariko niri iaxiti auakari apisatoõ: “Nota nakitipitikara iua,” nitxako —itxa Xesosi. ³³ Hĩsãpiretiniãri apanakini: “Xesosi nakiti !nitxaua nota,” iusaaki nisãpiretari niri iaxiti auakari: “Kona nota nakitini iua.”

Pinirekakiti Pirena

(*Marko 8.34-35; Arókasi 12.49-53; 14.26-27*)

³⁴ —Kona hĩxinikapiri nota iƙorapokoriti napokini neenamtxi nixipokini iƙapani. Kotxi kãkiti auikari nisãkire, ininiã eereka apanakini omanatana. Kona neenamtxi xipokapanika, kotxi nota minari niposotiire maerekati nixipokini iƙapani. ³⁵ Nota apokini xika imi omanatana iri, inoro pakini, kotxi ninoa auikari nisãkire. Tiĩrotxi omanataro oimakiro, kotxi ãto omanatano nota, ãto tiretano nota. ³⁶ Iusaaki pinirimane pimokaiakarinarako itxauanako.

³⁷ —Poiãoka pitiretiniãno nota, apiata pitiretiniãna pinoro, piri pakini, kona erekari nimoianari pininiua. Apiata pitiretiniãna pamariteakori, kona erekari nimoianari pininiua. ³⁸ Nota kinirão moianataka hinakasaaki, notakata hĩsa. Himamĩteenekakanisaakiri himisiritiko nota iƙapani, ininiã !apakata himoianatinino. ³⁹ —Pite ãtipirika kaminiãri piteka nireẽkitinoka, ininiã pinireẽkiti xipokapitikako pitekata. Pite nireẽkiti xipokiniã, nota sãkire pauikini xika, pite auapininiika txako Teosokata —itxa Xesosi.

Hĩte Apakapakani Pirena

(*Marko 9.41*)

⁴⁰ Iuaĩkana Xesosi sãkirauata:

—Kãkiti hĩte apakapakani, apakapano nota apaka. Nota apakapakari apakapari nota iokanatakari apaka. ⁴¹ Papakapiniãri Teoso sãkire sãpiretakari, kotxi iua sãpiretari Teoso sãkire, ininiã papakapari erekari Teoso sikakiti iua apakapakiti iaõka. Papakapiniãri atão inakari kamakari, kotxi iua kamari atão inakari, ininiã papakapari erekari Teoso sikakiti

iua apakapakiti iaõka. ⁴² Pisikiniãri ãparaã nimoianari poiãorimoni iãtini ïkapani, kotxi nimoianari itxaua, Teoso ïkitxitapitikai pite —itxa Xesosi.

11

Xoã Kapatxisareri Tikini Sikani (Arókasi 7.18-35)

¹ Xesosi moianariakori tosi pakini isãkire oerekini xipoka atoko, Xesosi sipe. Isa ãti sitatxitimoni, eereka ãti sitatxitimoni Kariréia tõpa itxaãpota oerekarauatakasaaki. Teoso sãkire isãpiretari kãkiti.

² Xoã kapatxisareri, kateia ãki auakasaaki, ikenakoenetari Xesosi kamakiti, ininiã iokanatarari ipi imoianariakori Xesosimonikari.

³ Ininiã Xoã txari imoianariakori:

—Hĩpimaãri Xesosi: “Pitekani iaxiti ïkari, kãkiti iãtapakiti pitxataua? ãtikani atxiiti aiãtapakiti pitxataua?” hĩtxariko —itxa Xoã.

Ininiã ninoa sipe. Ipimaãrina Xesosi Xoã sãkire iaõka. ⁴ Ininiã Xesosi apakapapiretana:

—Hĩkanapiriã Xoãomoni. Hĩsãpiretari hĩkenakotakiti, hãtamatakiti pakini. ⁵ Hĩte atamatapekari mõiãreتي kõiãrepeka inini. Matĩpokotakati tĩpokotapeka. Hãtamatapekari maere matati erekapeka inini. Makenakokiti kakenakokipeka. Ipĩkani õkitikapekaua. Teoso iokanapirena erekari sãpiretapeẽkaika minakati mauapikinitinimoni. Pakini hãtamatapeka. Ikara hĩsãpiretako Xoãomoni. ⁶ Kãkiti iteene auikiniãri nota sãkire, Teoso takari erekari iuamoni. Ikara nisãkire hĩsãpiretari Xoã —itxa Xesosi.

⁷ Ininiã ninoa sipe. Isikasaakina, Xesosi sãpiretari Xoã pirena itomaneri kãkitimoni. Ia atoko itxa:

—Kipa ïkai hĩte, Xoã kapatxisarerimoni hĩsikasaaki, ãparaã makipakaniãtaã iua auakasaaki? Hĩte sari iuamoni, kotxi ãtixika isãkire aua. Teoso sãkirenoka isãpireta. ãtima ãpokaxitikasaaki, katsotati ipinimoni ipapĩka, iuaĩkana ipinimoni ipapĩka inini atoko kãkiti, kotxi isãkire kita ãti, isãkire uatxa ãtiã, isãkire katana iuaĩkana ãtiã, itxaãpota isãkire. Ikara atoko !itxa Xoã.

⁸ —Kipa ïkai hĩte Xoãomoni hĩsikasaaki? Hĩte sari iuamoni, kotxi !inirekari tiitxi, txineiro pakini. !Kakaroneri imãka, kotxi !ikaikota auĩtetxi aapoko. Auĩtetxi aapoko peereri mãkatxi.

⁹ —Kipa ïkai hĩte iuamoni hĩsikasaaki? Hĩte sari iuamoni, kotxi iua Teoso sãkire sãpiretakari itxaua. Atãopitika Teoso sãkire sãpiretakari itxaua. Iua Xoã Teoso sãkire sãpiretakari apiari.

¹⁰ —Teoso sãkire iõkatsopatakori kitxakapirĩka txari:

Niokanatariko nisãkire sãpiretakari kãkitimoni pite apisa, papokini isãpiretini ïkapani, kãkiti iposope inini ïkapani.

¹¹ Atãopitikara. Ikinimane sauaki Xoã kapatxisareri apiatakari itxaua. Iuaritika Teoso auĩtetakari poiãori inakari apia imarotariko Teoso kamakiti tĩkane. ¹² Xoã auakasaaki Teoso auĩtetakani misiritaãka, kotxi kãkiti kaneenamari naiatana ninoa. Ninoa nirekari ixiipokinirina Teoso auĩtetxi ininiua ïkorapokoriti. Uatxapiima auapanika ikara atoko inakari. ¹³ Xoã apokini apisapanika, ikinika Teoso sãkire sãpiretakani, ikinika Teoso sãkire iõkatsopatakani, sãpiretari Teoso auĩtetxi ininiua pirena. Xoã apokasaaki, iua apaka oerekari Teoso auĩtetxi ininiua pirena.

¹⁴ —Kitxakapirĩka Teoso sãkire sãpiretakani sãpiretaua:

ãti Teoso sãkire sãpiretakari Erfasi atoko inakari apokako, itxana. Iuakara Xoã. Hãuikiniãri nisãkire, hãuikariko iuara apokapeka. ¹⁵ Kakenakokii, ininiã hĩkenakotariko nisãkire —itxa Xesosi.

¹⁶ —Kanatokopa itxa kãkiti ïkorasaaki auakani? Amarini sarauatini atoko itxana ïkorasaaki auakani. Ninoa amarini topãka tiitxi amotikoãtaã. Apanakini amarini txitana apanakini amarini. Itxana: ¹⁷ “Ate xikarauata hĩte serenini ïkapani, txamari !hĩserena. Kãkiti pĩkasaaki xikariti axikareta, txamari !hĩtxiapata.” Ninoa amarini sarauatini atoko

itxana ĩkorasaaki auakani, ¹⁸ kotxi Xoão kapatxisareri apoka ĩkorapokoriti. Itakanapari inikini Teoso imisãkiretini ĩkapani. !Iãtari ovaã. Iuaritika hĩte txari: “Maerekati matamatakoti auaĩtotari Xoão,” hĩtxari. ¹⁹ Nota hĩtari iaxitikiri apoka ĩkorapokoriti. !Nitakanapari ninikini. Ikiniõtika ninipokota. Niãtari ovaã. Ininiã hĩte txari: “Iua kiki ixori. Poãtakari iua. Iua moianatana txineiro apakapakani, kãkiti maerekati kamakani,” himisãkirepirenãtano. Kimaroreri atão inakari kamari erekarinani. Kãkiti atamatakasaakiri ikamakiti, imarotari kimaroreri atão inakari ininiua —itxa Xesosi.

Sitatxi Auakani Teoso Sãkire Mauiãkani
(Arókasi 10.13-15)

²⁰ Ininiã Xesosi pinitana Korasiĩ sitatxiti auakani, Petsãita sitatxiti auakani pakini, kotxi kaiãopokori iposotiire ikamapeka iuaãtaã, iuaritika kona itakanaparina maerekati.

²¹ Xesosi txana ninoa:

—Kãkiti Korasiĩ auakani himisiritaãkako. Kãkiti Petsãita auakani hĩte apaka misiritaãkako. Kitxakapirĩka Txiro, Sitoõ pakini sitatxitikini kamari maerekati, ininiã Teoso xipokana ninoa arikatxiã. Ninoa atamataãkamariko nota posotiire hĩte atamatiniri atokokana, ininiã ninoa mãkatamariko sako mata. Itakamariko atapani iĩtoãna. Ikara atoko ininiã, ninoa oerekari maerekati itakanapinina. ²² Nisãpiretai hĩte ia: “Kãkiti misiritiko õtisaaki, Txirokini, Sitoõkini pakini misiritaãka poião. Hĩte apiata.” ²³ Hĩte Kapanaoõkinipekana, Teoso ãkiri aua hĩtekata. Hĩte itikapekari ito posotiiretxi iaxitikiri. Txamari hõkakatapeãkako maerekani misiritikoãtaã. Nikamakiti hĩtemoni Sotoma auakani sauaki nikamaãkamako, kona ninoa xipokamako. Auapanikamanako. ²⁴ Ininiã nitxai hĩte: “Himisiritikosaaki, apiata himisiritaãka. Poiãoka Sotomakini misiritaãka,” —itxa Xesosi.

Teoso Imarore Apakapakani
(Arókasi 10.21-22)

²⁵ Iuasaaki Xesosi misãkiretari iri:

—Niri, pitixine auakani auĩte pitxaua. Uai ikini itixiti auakani auĩte apaka pitxaua. Peerekai pite, kotxi na poerekari pimarore kãkiti kimarorerinimoni, iuikakanimoni. Pite oerekari pimarore kãkiti poiãorinimoni, miuikakanimoni. ²⁶ Ari niri, ikara atoko pinireka. Ikara atoko papokaerekata —itxari iri.

²⁷ Eereka imisãkiretari kãkiti:

—Niri sikapekano ikinika. Kãkiti !imarotano nota Teoso ãkiri nininiua. Nirinokara atão imarotano nota. Apaka kãkiti na atão imarotari niri. Notanokara imarotari niri, kotxi iua ãkiri nitxaua. Kãkiti nirekiniãri imarotini niri, nota oerekari niri iuamoni.

²⁸ —Iteene minari atoko itxa himaerekani. Hinireka hĩtakanapiniri iua, txama ! hĩposota hĩtakanapiniri. Hĩsãpakiniã himaerekani xika, hina notamoni hĩtomatini ĩkapani. Iuasaaki nimaktxakari himaerekani. ²⁹ Hĩtakariko nipaniãtakiti hãkixinireẽ. Hãpaiaõkariko nota pirena. Erekapitikari hãpaiaõkiniri ninirekakiti, kotxi kona kanenamano. Kona nota napetari kãkiti. Niuikiniua !auari. Ikara atoko ininiã, hĩxinire tomatapitika. ³⁰ Hĩposotapitikari nipaniãtakiti hĩkamini, notakata hĩparĩkauatiniã. Nipaniãtakiti !kasãpaniri. Kona kamimari. Peerekari nipaniãtakiti —itxa Xesosi.

12

Tomatiko Õti Pirena
(Marko 2.23-28; Arókasi 6.1-5)

¹ Mapaõti atoko tomatiko õtisaaki, Xesosi imoianariakorikata napaãpota triko takikoãtaã. Inatxitana. Inapaãpotakasaakina, imaktxakarona triko iki mapaki inikinirona ĩkapani. ² Pariseoakori ikara itikasaaki, itxarina Xesosi:

—Patamata. Pimoianariakori kamari ate mauritakiniti. Ninoa parĩkauata tomatiko õtisaaki —itxana.

³ Ininiã Xesosi:

—Atxiĩti kona hãtatsopatapanikari Taviini kamakiti imoianariakorikata kitxakapirĩka inatxitakasaakina? ⁴ Iua ĩroã Teoso misãkiretikoãtaã. Imoianariakorikata inikari komiri

Teosomoni sikakori. Sasetotxinokara auiritaäka iua komiri inikinina. Apanakini ! auiritaäka inikiniri. Iuaritika ninoa sasetotxiakori turetari Taviini, imoianariakori pakini inatxitakasaakina. ⁵ Atxiiti kona hätsopatapanikari Moisesini iökatsopatakiti. Iua auiritari sasetotxi parikauatini tomatiko õtisaaki, Teoso misäkiretiko aikotiä. Iusaaki ninoa ! ikamari maerekati, kotxi iparikauatana Teoso misäkiretiko aikotiä. ⁶ Atäo nisäpiretai, hite paniätakiti poiäori. Nota paniätakiti apiari. ⁷ Teoso säkire iteene häuikasaaki, kona häpoõtana käkiti maxikatiika, kotxi Teoso säkire txari: Nota nirekari apanakini hitiretini. Pimatiretakanisaakiri äti, !apakata pisikarauatini notamoni. Iusaaki kona ninirekari pisikakiti, itxa Teoso kitxakapirika.

⁸ —Nota hitari iaxitikiri posotari ikinipoko ninirekiti nikamini tomatiko õtisaaki, kotxi Apiananiri nitxaua —itxa Xesosi.

*Motikauakotakari Pirena
(Marko 3.1-6; Arókasi 6.6-11)*

⁹ Xesosi ikara inaäka atoko, isa aiko Xoteoakori apotiitiniätaäua. ¹⁰ Iuaä aua kiki motikauakotakari. Iuaä aua apaka pariseoakori Xesosi kiniräo apoõtaka inakani tomatiko õtisaaki iparikauatini xika. Ninoa amanaäri Xesosi:

—Atauako apakata atxiiti tomatiko õtisaaki, erekape pitxikitakiniri käkiti? —itxarina.

¹¹ Ininiä Xesosi pimaäna:

—Hïpira soti auite tomatiko õtisaaki aariko äki irikiniä, himaktxakatari? Atäopitikara Teoso säkire auiritapitikari käkiti makatxakiniri ipira tomatiko õtisaaki. ¹² Soti auite poiäori, käkiti apiari. Ininiä Teoso säkire auiritapitikari tomatiko õti erekape nitxikitakiniri käkiti —itxa Xesosi.

¹³ Ininiä itxari kiki motikauakotakarimoni:

—Poerekauakotauako —itxa.

Oerekauakotakasaakia, erekapeka itxa, ipini uako atokopeka itxa. ¹⁴ Iusaaki pariseoakori sipeka atoko, ninoakakarika misäkiretakakauana:

—Natokopa atxatari Xesosi aökini? —itxakakana.

Nitiritxi Teoso Merekiti

¹⁵ Xesosi imarotakasaakiri ninoa okaenetiniri iua, iusaakipeka Xesosi sipeka. Itomaneri käkiti sa iuakata. Ikinika amianatakani erekapeka itxikitaka. ¹⁶ Xesosi ! auiritana isäpiretinirina ikamakiti apanakinimoni. ¹⁷ Ikara atoko itxa Xesosi, Teoso säkire säpiretakari Isaía inakori säpiretakiti iaõka apokini ikapani. Ia atoko itxa Teoso Isáamoni:

¹⁸ Ia ninitiri nimerekiti. Ia nitiretakiti napokaerekatakiti. Nota sikariko Erekar Matamatakoti iuamoni. Iua säpiretariko nota säkire Xoteo minakonimoni.

¹⁹ !Katapasäkireri ahoa kimaporiti itiniäpo isäkirauatakasaaki. !Ineenamauata. ! Itxitakaka apanakinikata käkiti napiniätaä.

²⁰ Apanakini Teoso säkire auiäkani oiõkapeta äkixinireëna. Itapara !auari. Ninoa aanaia katxitoäkori atoko itxana. Iuaritika kona imapirinikari iua aanaia katxitoäkori. Iua atokokana kona ixipokari iua säkire auiäkani mataparani. Itiretana. Apanakini Teoso säkire auiäkani, kona iteene auikari Teoso säkire. Ininiä ninoa tirikapi iopinikare xapitikiri atoko itxana, iuaritika kona iua oakari. Iua atokokana kona ixipokana Teoso säkire auiäkani. Ikamaäpotari erekari, erekarinoka käiatini ikapani.

²¹ Xoteo minakanuia auikariko iua säkire. Itxa Isaía säpirena kitxakapirika.

*Maerekani Matamatakoni Omitikiko
(Marko 3.20-30; Arókasi 11.14-23)*

²² Iusaaki käkiti anikari kiki maerekati matamatakoti auaïtotakiti Xesosimoni. ! Isäkirauata. Mõsiäreti itxaua iua, maerekati matamatakoti xika. Xesosi erekapeka txikitakari iua. Iusaaki kõsiärepeka, kasäkirepeka itxa. ²³ Iusaaki kaiäopokori käkiti iuaä tsorikaäta. Ininiä ipimaäkakauana:

—Atauako ia kiki aãuïte Taviini apika mekanirikani? Atxiïti Teoso iokanatakitikani? —itxana.

²⁴ Pariseoakori ikara ikenakotakasaakina:

—Konapitini. Maerekati matamatakoti aũte Peosepoo inakori sikari iposotiire Xesosi-moni maerekati matamatakoti omitikini ïkapani —itxana pariseoakori.

²⁵ Xesosi imarotari ikara ixinikakitina. Ininiã itxa Xesosi:

—Kãkiti tixine auakani ninoakakarika inaiatakakiniãuana, ixipokakakauana. Iarikape-nako. Iua atokokana kãkiti aapokoã auakani inaiatakakiniãuana, ixipokakakauanako.

²⁶ Iua atokokana Satanasi nitiriakori, ninoakakarika inaiatakakiniãuana, ixipokako Satanasi tapara. ²⁷ Hïte sãkire, Peosepoo sikari iposotiire notamoni maerekati mata-matakoti nomitikini ïkapani. Ininiã nota pimaã: “Kipa sikari posotiiretxi hïte moianari-akorimoni, maerekati matamatakoti omitikinina ïkapani?” Himoianariakori sãpiretai: “Teosonoka sikari posotiiretxi maerekati matamatakoti omitikanimoni.” ²⁸ Teoso posotiireẽ nomitikari maerekani matamatakoni. Ikara atoko ininiã, Teoso oerekai iua apokapeka hïtemoni hïauïte inini ïkapani.

²⁹ —Kiki pataparari iua aapoko auiniã, kona kiïtiriri ïroã ïtiriuatini ïkapani. Kiïtiriri iaxirikiniãri iua kiki pataparari, iuasaakiika apakata iïtirikiniri itii.

³⁰ —Notakata maparïkauatakani omanatano nota. Imamoianatakaniãno, inirekari niparïka ixipokini. ³¹ —Ininiã nisãpiretai. Apakata Teoso makatxakiniri ikinipoko maerekati kãkiti kamakiti, imaerekani Teoso imisãkirepiretini pakini. Txamari Erekari Matamatakoti misãkirepiretakari maerekani makatxakiko kona auari. ³² Kãkiti mis-ãkirepiretiniãno nota hïtari iaxitikiri, eereka amanainiãri Teoso ikara imaerekani imakatxakini, ininiã Teoso makatxakapitikari. Kãkiti misãkirepiretiniãri Erekari Mata-matakoti, !kimakatxakikori ikara maerekati ikamakiti —itxa Xesosi.

Aamina Iri Pirena
(Arókasi 6.43-45)

³³ Ininiã Xesosi sãkirauata iuaïkana pariseoakorimoni:

—Aamina atoko hïtxa. Aamina erekari ininiã, iri erekari apaka. Aamina maerekati ininiã, iri apaka !erekari. Patamatiniãri amãtiiri, pimarotari imina. ³⁴ Nimarotai hïte. Imini katsiiri atoko hïtxaua hïte. Hïte maerekati kamakanii. Ininiã !hïposotari erekari hïsapiretini, kotxi hãkixinire !erekari. Hinamaã hïsapiretakiti hãkixinireẽ potoriãkari itxaua. ³⁵ Kãkiti erekari ininiã, erekarinoka isãkire, kotxi iua ãkixinireẽ erekarinoka aua. Kãkiti maerekati ininiã, isãkire maerekati apaka, kotxi maerekatinoka auari iua ãkixinireẽ. ³⁶ Atão nisãpiretai hïte. Ikinipoko kãkiti sãkire Teoso atamakaerekata xipokatxi õtisaaki. Iuasaaki Teoso mereẽri kãkiti misiritiko. Maxikatiïka hïsapiretakiti kona apakata. Kona iua potxitari. Ininiã iuasaaki iua pimaã: “Kinirepa ikara atoko pisãkire?” itxako. ³⁷ Pisãkire ereka ininiã, ixika !auari Teoso misiritinii. Pisãkire maerekati ininiã, pisãkire maerekati xika Teoso misiritai —itxa Xesosi.

Pariseoakori Nirekari Xesosi Oerekiniri Iposotiire
(Marko 8.11-12; Arókasi 11.29-32)

³⁸ Ætikaka kaiõkatsoparerini, pariseoakori pakini txari:

—Koerekareri, takaõtxikari Teoso posotiire poerekaua ate, aãtamatiniri ïkapani, Teoso iokanatinii ïkorapokoriti aimarotini ïkapani —itxarina.

³⁹ Xesosi apakapapiretana:

—Kãkiti uatxarini !erekana. Itakanaparina Teoso. Hïte nirekari noerekinii Teoso takaõtxikare, iposotiire. Konapitini. Kona noerekai hïte. Kitxakapirïka Teoso sãkire sãpiretakari Xonasini inakori auakasaaki, Teoso kamari posotiiretxi. Ikara atoko inakari posotiiretxi Xonasini auakasaaki, iuaïkana ikamapanikariko. Iua posotiiretxi Teoso takaõtxikare itxapanikaua hïte ïkapani. Iua takaõtxikarinoka Teoso takaõtxikare hïte ïkapani. ⁴⁰ Xonasi kaikota ximaki mitari tikako ãki ipi ãti pakini õti. Iua atokokanerako hïtari iaxitikiri napako ipi ãti pakini õti ipïkani auiniãtaã.

⁴¹ —Itixi xipokini õtisaaki, kãkiti Nïnivi sitatxiti auakani sãkirauatapitikako. Ni-noa txai hïte: “Kona erekai hïte, kotxi !hïtakanapari himaerekani. Ate takanapari

amaerekani Xonasi sākire akenakotakasaaki,” itxanako ninoa. Uatxa uai aua hīte apisatoō Xonasi apiatakari. Imisākiretai hīte, iuaritika kona !hītakanapari himaerekani.

⁴² —Xipokatxi ōtisaaki, sito Sapaa auakani auīte sākirauatapitikako. Oa ōtakoxiti auakaro, iuaritika osari Saromāomoni imatire okenakotini ĩkapani. Uatxa apopeka Saromāo apiatakari, iuaritika hīte !auikari nota sākire —itxa Xesosi.

Maerekati Matamatakoti Kanapiriini Pirena
(Arókasi 11.24-26)

⁴³ Iuaĩkana Xesosi sākirauata:

—Maerekati matamatakoti kiki auaĩtotakiti takanapakasaakiri iua kiki, iua maerekati matamatakoti saāpota āparaā makipakaniātaā, ikaikotiniātaā inītini ĩkapani, txamari !apokari. ⁴⁴ Ininiā itxa: “Nikanapiriāpiriko mitxi nauinimoni nipotorikinimonikari,” itxa iua maerekati matamatakoti. Ininiā ikanapiriā. Apokasaaki, āti iuaā auakari ! auari. Oeretapeēkaika. Iposope āti auini ĩkapani. ⁴⁵ Ininiā apana apikomoni setxi pakini maerekani matamatakoni apia maerekanitakani. Imakinikana aua iua kiki ĩtoā. Ininiā iua kiki mitxi poiāoka imaerekani, eereka apia maerekanita. Ikara atoko itxako kākiti uatxarini maerekani —itxa Xesosi.

Xesosi Inoro, Itariakori Pakini
(Marko 3.31-35; Arókasi 8.19-21)

⁴⁶ Xesosi sākirauata itomane kākitimoni, inakasaaki oāpoka inoro, itariakorikata. Iporikiti auana. Ipĩkapiretarina. ⁴⁷ Ininiā āti txari Xesosi:

—Pinoro, pitariakori ikiraā iporikiti auana. Inirekakarina imisākiretinii pite —itxa.

⁴⁸ Ininiā Xesosi:

—Keropa ninoro? Kiripa nitariakori? —itxa Xesosi.

⁴⁹ Ininiā imioakari imoianariakori:

—Hātamata. Uai aua ninoro, nitariakori pakini. ⁵⁰ Niri iaxitikiri nirekaākiti kamakanira, ninoara nitariakori, nitaroakoro, ninoro txaua —itxa Xesosi.

13

Katakareri Pirena
(Marko 4.1-9; Arókasi 8.4-8)

¹ Iua ōtisaaki Xesosi takanapari iua aapokotxi. Ipoa tiniā isa. Iuaā ipoa tiniā iitopāka. ² Iuaā auana itomaneri kākiti. Apotiitauana iua takote. Ininiā kanaua āki iereētaua, topāka itxa oerekarauatini ĩkapani. Ninoa kaikota imiriĩ. ³ Ininiā itori sāpirenatxi atāo inakari oerekiko isāpiretana ninoa Teoso imarotinina ĩkapani.

Ia atoko itxa:

—Katakareri potorika itakarauatini ĩkapani. ⁴ Takari iki itakaāpotakasaaki, okaāpotakasaaki, ātikaka irika kimapori tiniāpo. Kotipiriki apoka. Inikari imakinika. ⁵ Apanakini irika kai auiniātaā. Poiāoka kipatxi auari, ininiā mokatanitika ipitxaka. ⁶ Txamari, atokatxi papatakari inakasaaki, arikari iua takari. Otxiaroka, kotxi kona kakotsari. ⁷ Apanakinipekana irika aanaia auiniātaā. Ininiā aanaia aneē takari takote. Aāpitsa iapinokari takari, oka txari. ⁸ Apanakinipekana irika kipatxi erekariātaā. Ininiā iriuata. Ātiātaā āti takari iriuata seĩ oki pakini. Ātiātaā takari iriuata sesēta oki pakini. Ātiātaā āti takari iriuata trĩta oki pakini. ⁹ Kakenakokii, ininiā hīkenakotariko nisākire —itxa Xesosi.

Kākiti Mimarotakiniti Xesosi Sāpiretini Pirena
(Marko 4.10-12; Arókasi 8.9-10)

¹⁰ Imoianariakori apoka Xesosimoni. Ipimaārina:

—Kinirepa sāpirenatxi atāo inakari oerekiko pisāpiretari kākiti? —itxarina.

¹¹ Ininiā Xesosi:

—Kākiti xinikiniāri Teoso auĩtetxi ininiāua pirena, auapitika kaiōpokori ninoa mimarotakiniti, kotxi Teoso kona oerekana ninoa. Teoso oerekai hīte ninoa mimarotakiniti.

¹² Teoso sākire auakiti, iua sākire kĩpitakari, Teoso sikari apikomoni imaroretxi iuamoni. Txamari Teoso sākire kenakotakari, isākire makĩpitakati, imarore xapiti iuamoni auakari

makatxakaãkako. ¹³ Nisãkirauatakasaaki kãkitikata, nisãpiretana sãpirenatxi atão inakari oerekiko, kotxi kokiri kãkiti, iuaritika !atamatari Teoso kamakiti. Kakenakokiri kãkiti, iuaritika !imarotari Teoso sãkire. ¹⁴ Ininiã apokaþeka Isaía sãkire kitxakapirika, kotxi iua sãpiretari Teoso sãkire:

Hïkenakotapiikamari nisãkire, iuaritika !himarotari. Hïtikapiikamari nikamakiti, iuaritika !himarotari,

¹⁵ kotxi !hinirekari himarotini atão inakari. !Hinirekaikari nisãkire hïkenakotini. !Hinirekaikari nikamakiti hãtamatini. Hinirekaãkamariko, hãtamatamariko nikamakiti. Hinirekaãkamariko, hïkenakotamariko nisãkire. Hinirekaãkamariko, himarotamariko nisãkire. Hïkanapiriaãkamako notamoni, nimaktxakamariko himaerekani,

itxa Teoso.

¹⁶ —Hïteþekana, Teoso sikari erekari hïtemoni, kotxi hïki atamatapitikari iua kamakiti. Hïkenakoki kenakotapitikari iua sãkire. ¹⁷ Atão nisãpiretai. Itomaneri Teoso sãkire sãpiretakani, apanakini kiki atão inakari kamakani pakini kitxakapirika nirekari atamatiniri hïte atamatakiti, txamari kona atamatarina. Inirekarina ikenakotininirina hïte kenakotakiti, txamari kona ikenakotarina —itxa Xesosi.

Katakareri Pirena Oerekiko
(Marko 4.13-20; Arókasi 8.11-15)

¹⁸ Xesosi sãkirauanãtapanika:

—Hïtakaõtxikari ikara sãpirenatxi atão inakari oerekiko, katakareri pirena. Noerekai ikara. ¹⁹ Kãkiti kenakotakasaakiri Teoso auïtetxi ininiua pirena, imimarotakaniãri ikenakotakiti, kimapori kãkiti katxaratakiti ikotaxiti atoko itxa iua ãkixinire, kotxi Satanasi apoka iuamoni. Imaktxakari Teoso sãkire iua ãkixinireẽ apokakari. Teoso sãkire takariki atoko itxa.

²⁰ —Takariki kai auiniãtaã iriãkari, Teoso sãkire ipoxokoniritika apakapakari atoko itxa. ²¹ Itxama kona okanani aua, kotxi kona kakotsari. Omanatiko inakasaaki, inapetiko inakasaaki, Teoso sãkire auikini xika, itakanapari Teoso sãkire auikini.

²² —Ãti kãkitipekana kenakotari Teoso sãkire, txamari ixinikapikari tiitxi, nipokori, iparika pakini. Ikinipoko ixinikapika, ininiã maerekaxiniretinoka itxa. Txineiro ipotxitini xika !inirekaikari Teoso sãkire. Takariki aanaia auiniãtaã iriãkari atoko itxa iua. Takari mariti atoko itxa iua ãkixinire.

²³ —Ãti kãkitipekana ikenakotakasaakiri Teoso sãkire, atão iua auikari. Iua ãkixinire kipatxi erekari atoko itxa. Takari mininiua atoko, iua kãkiti minari atxiïti seï pakini kãkiti Teosomoni isãkire auikinina ïkapani. Atxiïti iminari sesëta pakini kãkiti. Atxiïti iminari trïta pakini kãkiti Teosomoni isãkire auikinina ïkapani —itxa Xesosi.

Katsotati Ahoisi Atoko Inakaro

²⁴ Iuaïkana Xesosi sãpiretari ãti sãpirenatxi atão inakari oerekiko. Ininiã ia atoko itxa: —Teoso auïtetxi ininiua ia atoko itxa. Teoso katakareri atoko itxa. Iua katakareri takari erekari takariki ikikioteẽ. ²⁵ Ãti ïkanõkati ikinimane imakasaaki, imokaiakari apoka. Itakaro katsotati ahoisi atoko inakaro ahoisi sauaki. Kona !otxa. Iposo atoko ïkorape itxa. ²⁶ Takari aneëka atoko, oriuta. Iusaaki kãkiti imarotapekari katsotati ahoisi atoko inakaro auapeka. Kona otxa. ²⁷ Ininiã katakareri nitiriakori apoka iauïtemonina. “Auïtetxi, pite takaro takariki erekaro. Nanipa oina katsotati?” itxana ninoã.

²⁸ —“Amokaiakari takari,” itxa.

—“Pinirekatari amaporokiniri?” itxana initiriakori.

²⁹ —“Kona. Katsotati himaporokiniã, atxiïti himaporokaro nitakare apaka. ³⁰ Hïtakanapari imakinika aneinina ïkapani. Oamikosaakirako, omaktxakaãka. Ininiã iusaakiko nipaniãtaiko hïte: ‘Merepanika himaktxakaroko katsotati. Hãpotiitaro. Xaminamoni oka inaãkako. Iposo atoko hãpotiitari ahoisi. Hïtakari nikiena nïkatiko aikoti ãki.’”

Mostata Pirena
(Marko 4.30-32; Arókasi 13.18-19)

³¹ Iuaĩkana Xesosi oerekari āti sãpirenatxi atão inakari oerekiko. Ininiã ia atoko itxa:
—Teoso auĩtetxi ininiua, kiki takiniro mostata iki ikikioteẽ atoko itxa. ³² Mostata iki axapitiki. Apanakini takariki apiata, iuaritika oaneẽka atoko amananiikaro. Aamina otxaua. Ininiã kotipiriki ina. Ikamari ikoa okatiã —itxa Xesosi.

Tirekakari Pani
(*Arókasi 13.20-21*)

³³ Xesosi iuaĩkana sãpiretari sãpirenatxi atão inakari oerekiko. Ininiã ia atoko itxa Xesosi:

—Teoso auĩtetxi ininiãtaãua ìkorapokoriti ia atokokana itxa. Sito kosekari tirekakari pani. Okoketari axapiti tirekakari pani kaiãopokori triko panikata, ãparaãkata. Eereka ikinika ipe tirekaãpota otxa.

Sãkiretxi Atão Inakari Oerekiko
(*Marko 4.33-34*)

³⁴ Xesosi sãkirauatakasaaki kãkitikata, isãpiretari sãpirenatxi atão inakari oerekiko. Ikara sãpirenatxinokara isãpiretari kãkiti. ³⁵ Ininiã kitxakapirĩka Teoso sãkire sãpiretakari sãpiretakiti apokapeka, kotxi iua txari:

Nisãkirauatakasaaki kãkitikata, nisãpiretari sãpirenatxi atão inakari oerekiko. Itixi kamikosaakipanika aua kãkiti mimarotakiniti. Ikara noerekako kãkitimoni, itxa Teoso sãkire.

Xesosi Sãpiretari Katsotati Pirena

³⁶ Eereka Xesosi takanapana ninoa kãkitipokoni. Iĩroã aapokotxi. Imoianariakori apoka iuamoni. Itxana:

—Poerekaua ate ikara sãpirenatxi atão inakari oerekiko, katsotati pirena, mixikanani pisãpiretakiti. Ate ìmarotari —itxana.

³⁷ Ininiã Xesosi:

—Hĩtari iaxitikiri, iua erekari oki taãkari itxaua. ³⁸ Itixi iua kikio atoko itxa. Teoso auĩtetakani takariki erekari atoko itxana. Kãkiti Satanasi nakitiakori iua katsotati atoko itxana. ³⁹ Katsotati takakari Teoso nakitiakori mokaiakari itxaua. Satanasi itxaua. Itixi xipokini õti iua takari amiko õti atoko itxa. Teoso nitiriakori iaxitikini ninoa takari amakani atoko itxana. ⁴⁰ Iua katsotati apotiitaãka, xaminamoni oka inaãka. Iua atokotxikana inaãka itixi xipokini õti. ⁴¹ Hĩtari iaxitikiri iokanatanako initiriakori itiximoni. Apotiitarinako maerekati oerekakani. Apotiitarinako ikinimane maerekati kamakani. ⁴² Iposo atoko Teoso nitiriakori okana ninoa xaminamoni. Iuaã iteene itxiapatana. Akatsatsiriĩtauana. ⁴³ Iuasaaki atão inakarínoka kamakani aua iotximerena Teoso auĩtetxi ininiãtaãua. Atokatxi iotximere atoko itxa ninoa iotximere. Kakenakokii, ininiã hĩkenakotariko nisãkire —itxa Xesosi.

Txineiro Kipatakoro Pirena

⁴⁴ —Teoso auĩtetxi ininiua, txineiro itomanero kipatakoro atoko itxa. Oa txineiro kipataãka kikio. Āti õti kiki napaãpotakasaaki, apokaro, ininiã iuaĩkana ikipataro. Iteene ipoxokoniuaata, ininiã ivẽtxitari ikinika itii, iua kikio iamotini ìkapani. Eereka sa itxa iua kikio iamotini ìkapani. Ikara atoko itxa Teoso auĩtetxi ininiua.

Pérora Inakori Pirena

⁴⁵ —Teoso auĩtetxi ininiua, pérora iamotakari atoko itxa. Iua nitari pérora apia erekari. ⁴⁶ Pérora iteene erekari apokiniã, ikinika itii ivẽtxita iua pérora iamotini ìkapani.

Hetxi Pirena

⁴⁷ —Teoso auĩtetxi ininiua hetxi ipoaã taãkari atoko itxa. Ikini sereti ximaki apotiita hetxi. ⁴⁸ Ixãpokasaaki kaiotaroriti kosekaãpotari itakoãmoni. Iuaã kaiotaroriti iitopãka. Imereẽrina ximaki. Ximaki erekari kotariã itaka. Kãkiti maniãkiniti mapara oka. ⁴⁹ Xipokatxi õtisaaki ikara atoko itxa. Teoso nitiriakori mereẽriko kãkiti. Mapara itakarina erekarini. Mapara itakarina maerekani. ⁵⁰ Ininiã xaminamoni okanako kãkiti maerekati kamakani. Iuaã itxiĩtana. Akerakitatsiriĩtauana, kotxi patsiiri.

Kitxakapirĩka Oerekakori, Amaneri Oerekakori Pakini

⁵¹ Xesosi pimaãna imoianariakori:

—Hĩte imarotatari ikara atoko inakari nisãpiretakiti? —itxa.

—Ari, aimarotapitikari —itxarina.

⁵² Ininiã Xesosi:

—Kaiõkatsopareri oerekikosaaki Teoso auĩtetxi ininiua imarotini ĩkapani, imarotari amaneri oerekakori, apaka kitxakari oerekakori. Kaapokori atoko itxa. Iua kaapokori makatxakari apokaerekatakiti mareta āki inĩkatakiti. Amaneri, kitxakari apaka imakatk-aka.

Nasaree Auakani Kona Auakari Xesosi Sãkire
(Marko 6.1-6; Arókasi 4.16-30)

⁵³ Ikara sãpirenatxi atão inakari oerekiko ixipokapiretaka atoko, Xesosi sipe.
⁵⁴ Ikanapiriã Nasaree sitatxitimoni. Ininiã oerekarauata aiko Xoteoakori apotiitiniã-taãua. Ininiã kãkiti tsorĩkaãta isãkire ikenakotakasaakina. Itxana:

—Kiripa sikatari iua imarore? Kiripa sikaposotiiretari iua? ⁵⁵ Aapokotxi kamakari ākiri iua. Inoro Maria. Itariakori Txiako, Xoão, Simão, Xotasi pakini. ⁵⁶ Itaroakoro uai apaka aua. Nanipa apaiaõkari ikinika imarore? —itxana.

⁵⁷ Ininiã kona inirekarina iua. Ininiã Xesosi txari:

—Teoso sãkire sãpiretakari paxitaãka, txamari Teoso sãkire sãpiretakari itixineẽ auakasaaki, inirimane sauaki auakasaaki, ĩpaxitaãka. Isãkire !auikaãka —itxa Xesosi.

⁵⁸ Ininiã Xesosi kona kamari itori Teoso posotiire iuaã Nasaree sitatxiti auakani ĩkapani, kotxi kãkiti iuaãkini !auikari isãkire.

14

Xoão Kapatxisareri Ipinini Pirena
(Marko 6.14-29; Arókasi 9.7-9)

¹ Iuasaaki Erotxi Kariréia auakani auĩte txaua. Iuasaaki ikenakopiretari Xesosi pirena.

² Iuasaaki itxana initiriakori:

—Iua Xoão kapatxisareri ipĩpekariika õkitapekaua. Iuakara Xesosi txaua. Ininiã uatxa apiata iposota ikamini —itxa Erotxi.

Txamari Xesosipitikara. Kona Xoãoni iua. ³ Mitxi Erotxi paniãtari Xoão kapatxisareri iaxirikiko, itari Piripi ĩtanoro xika. Ouãka Erotxia. Oomanatari Xoão, ininiã itakaãka kateia āki. ⁴ Mitxi Xoão kapatxisareri txari Erotximoni:

—Kona erekari pitari ĩtanorokata pisirĩkini. !Apakata pikamakiti —itxa.

⁵ Ininiã Erotxi nirekamari okiniri Xoão, iuaritika kona okari, kotxi ipĩkana Xoão sãkire auiaãkani. Ninoa uãkatari Xoão, Teoso sãkire sãpiretakari ininiua. ⁶ Erotxi kamari kiiniri auini õti pirena. Erotxia ākero serena iua Erotxi apisatoõ, ikemaĩxitakini apisatoõ pakini. Ininiã oserenini kamari ninoa poxokoniuatini. ⁷ Ininiã Erotxi poxokoniu-atakasaaki itxa:

—Nisikai imakinika pinireẽkiti pitemoni —itxaro oa.

Ininiã osari onoromoni. ⁸ Onoro nirekari Xoão okiko, ininiãkara oamanaãri Xoão kii prato nopini. Ininiã otxari Erotximoni:

—Xoão kapatxisareri kii ninireka prato nopini.

⁹ Ininiã Erotxi kona erekaxinireri. Kipa ikama? Kotxi ikinimane ikemaĩxitakini kenakotari isikaenetiniri oa nirekakiti oamoni. Ininiã iua paniãtari oa nirekakiti sikiko oamoni. ¹⁰ Ininiã iua iokanatarari sotatoakori kateiamoni Xoão kii tsotakiko ĩkapani.

¹¹ Ininiã ninoa minari ikii prato nopini. Isikarina oamoni. Oa sikari onoromoni. ¹² Eereka Xoão moianariakori sari kateiamoni. Ninoa anikari ĩto akauarimoni. Iuaã ikatarina. Eereka ninoa sari Xesosimoni. Isãpiretarina Xesosi Xoão ipinini pirena.

Sĩko Mio Kãkiti Xesosi Sikakienatini
(Marko 6.30-44; Arókasi 9.10-17; Xoão 6.1-14)

¹³ Xesosi kenakopiretakasaakiri Xoão okiko, ipotorika kanauaã. Ātiãtaã iuanani auini nire isa, txamari itomaneri kãkiti imarotari Xesosi sinimoni. Ininiã itakanaparina sitatxi.

Isana imiriĩ iua sinimoni. ¹⁴ Iua kanĩkiĩtakasaaki, atapari kãkiti apokaãpotini. Ininiã iua amonĩkana ninoa. Imakananitana amianatakani.

¹⁵ Mapiãpeka inakasaaki, imoianariakori apoka iuamoni. Itxarina:

—Mapiãpeka. Uai aapokotxi mauakaniãtaã, ininiã uai nipokori !auari. Piokanitari kãkiti aapokotximoni, ininiã iamotarina nipokori iuaãtaã —itxana imoianariakori.

¹⁶ Xesosi apakapapiretana:

—Nota kona iokanatana isinina. Hĩtekarako sikakienatana ninoa —itxa Xesosi.

¹⁷ Ininiã ninoa:

—Komiri ipi ipi ãti pakininokara aua atemoni. Ipi ximaki apaka aua. !Apakata —itxana.

¹⁸ Ininiã Xesosi:

—Himina uai notamoni —itxa.

Ininiã imoianariakori minari Xesosimoni. ¹⁹ Eereka iua paniãtari kãkiti xiti topãkini. Eereka ikosekari komiri siko, ximaki ipi pakini. Ininiã iua ionakaãta iaxiti. Itxari:

—Niri pisikakiti peerekari —itxa.

Ininiã imaxinĩkaãpotari. Isikaãpotana imoianariakori. Ninoa sikaãpotana kãkiti.

²⁰ Ikinikana nipokota. Ikinimane:

—Kamitopekaua ate —itxana.

Eereka imoianariakori apotiitari itetakori. Ininiã xãpokaka itxarina tosi kotari.

²¹ Iuasaaki siko mio kikiãkini nipokota. Sitoãkini, amarini pakini nipokota apaka.

Xesosi Ipoa Nopini Itĩpokotini

(Marko 6.45-52; Xoão 6.15-21)

²² Eereka ipaniãtana imoianariakori kanauaã iereẽtiniua iua apisa ĩpiriãtinina ĩkapani. Ninoa sipeka. Iua kaikota kãkiti itakapiretini nire. ²³ Kãkiti itakapiretanapaka atoko, Xesosi sari oxiratarimoni, Teoso imisãkiretini nire. ĩkanõkapeka inakasaaki, iuanani iuaã aua. ²⁴ Iuasaaki kanaua ipoa apanĩkakiãpeka. ĩtima apiãkataro kanaua. Ininiã tsakati iteene apoãkata.

²⁵ Imaropirĩkatapeka inakasaaki Xesosi sari ninoamoni. Itĩpokota ipoa nopini.

²⁶ Imoianariakori atapakasaakiri Xesosi ipoa nopini itĩpokotini, ninoa pĩkarauata.

—Kamiri napani —itxana.

Akiripoakatana. ²⁷ Iuasaakipeka Xesosi:

—Kataparaxinire hĩtxako. Notara. Kona hĩpĩkarauatape —itxa.

²⁸ Ininiã Petro sãkirauata:

—Apiananiri. Xesosi pininiãua, pipaniãtano pitemoni napokini ipoa nopini —itxa Petro.

²⁹ Ininiã Xesosi:

—Uai pina —itxari.

Ininiã Petro katxaka. Ipotorika ianini ipoa nopini Xesosimoni isini. ³⁰ Txamari kataparari ĩtimati itikasaaki, ipĩkarauata, ininiã ipatapiã itairakaãpota. Ininiã iua akirikata:

—Apiananiri. Pimaĩkano.

³¹ Iuasaakipeka Xesosi maĩkari iua. Itxari:

—Poiãoka pauikari niposotiire. Kinirepa kona atão pauikari? —itxa Xesosi.

³² Iuaĩkana morõkoka itxauana kanaua ãki. Iuasaaki ĩtima iotoka. ³³ Imoianariakori kapotoreẽkaua Xesosi apisatoõ:

—Apiananiri pitxaua. Atãopitikara Teoso ãkiripitikarai —itxana.

Xesosi Makananitana Amianatakani Xenesareekini

(Marko 6.53-56)

³⁴ Ipoa ĩpiriãtana, Xenesaree tõpamoni apoka itxana. ³⁵ Iuaã kãkiti imarotari Xesosi, ininiã iokanapireta kãkiti ninoa tixine takote auakanimoni:

—Amianatakani himina.

Ininiã kãkiti minari itomane amianatakani Xesosimoni. ³⁶ Amianatakani amanaãri Xesosi:

—Pauritaua pimãka mapotomatare atakapiotini —itxana.

Ikinimane imãka takapiotakani makananitaãka.

15

Xoteoakori Iikite Pirena
(Marko 7.1-13)

¹ Iuasaaki pariseoakori, kaiõkatsopareriakori pakini apoka Xesosimoni. Xerosareëkini ninoa. Ipimaärina Xesosi:

² —Kinirepa pimoianariakori kona kamari aätokiriakorini sãkire iaõka, kotxi inipokotakasaakina, kona arokauakotauana —itxana.

³ Ininiã Xesosi apakapiretana:

—Hitepekana, kinirepa kona hite kamari Teoso sãkire iaõka? Hite kamari hõereëkitinokara, ⁴ kotxi Teoso txari: “Pipaxitariko piri. Pipaxitaroko pinoro.” Apaka Teoso txari: “Piri, pinoro pimisãkirepiretiniã, pokaãkako.” ⁵ Txamari hite oerekari kãkiti: “Kãkiti auakiti iri, inoro pakini nirekiniã, iua manirekakaniãri isikiniri ninoamoni, isãpiretana: ‘Ia nota auakiti nisika Teosomoni.’” Ininiã !isikari ninoa nirekakiti ninoamoni. ⁶ Ininiã hite oerekari kãkiti mapaxitakanina iri, inoro pakini. Ininiãkara hite sãkire hõereëkiti kipatari Teoso sãkire. ⁷ Hite txari: “Akamapitikari Teoso sãkire iaõka,” txamari kona hite kamari. Atãopitikara Isaía sãkire kitxakapirika. Iua sãpiretari Teoso sãkire hite pirena. Teoso txari:

⁸ Kamisirienererini ninoa kãkiti. Ninoa sãkireënanira ipaxitanona. Ækixinireëna ! inirekanona.

⁹ Maxikatiika ninoa kapotoreëkaua nota apisatoõ. Maxikatiika ninoa txano: “Ateosone pitxaua,” kotxi ninoa !oerekari nota sãkire. Ninoaka sãkire oerekana, txamari “Teoso sãkire asãpiretai” itxana.

Itxa Teoso Isaíamoni kitxakapirika —itxa Xesosi.

Ækixiniretxi Txiko Pirena
(Marko 7.14-23)

¹⁰ Xesosi akiritana kãkiti, ininiã itxana:

—Hikenakota himarotini ikapani. ¹¹ Nipokori, piixirãkakiti kona kamatxikotari pãkixinire. Pisãkire maerekati, pinamaã potoriãkari, iuara txikotapitikari pãkixinire — itxa Xesosi.

¹² Iuasaaki Xesosi moianariakori apoka iuamoni. Itxarina:

—Pimarotatari pariseoakori !apokaerekatari ikara pisãkire ninoamoni?

¹³ Ininiã Xesosi:

—Kãkiti takari atoko itxa. Ininiã ikinika takari niri iaxitikiri mataãkiniti maporokaãkako. ¹⁴ Kona himaãkatapena pariseoakori. Ikiikakani mõiãreni atoko itxana. Mõiãreti mikiikiniãri mõiãreti, ikinipoko irikako aariko ãki. Iua atokokana maerekati õtãkikiniãri maerekati, imakinika ninoa sari imisiritikoõtaã —itxa Xesosi.

¹⁵ Ininiã Petro:

—Poerekaua ate ikara sãpirenatxi atão inakari oerekiko. Ate !imarotari —itxa.

¹⁶ Ininiã Xesosi:

—Hite apanakini atoko hõtxa atxiiti? Kona himarotapanikari? ¹⁷ Himarotari. Nipokori hinamaã hixirãkakiti hitikakomoni isa. Eereka hitikatakasaaki, inapa. ¹⁸ Hissãkire hinamaã pokikakari potorika hãkixinireë. Iuara txikotari kãkiti ãkixinire. ¹⁹ Kotxi hãkixinireë hixinikakiti maerekati potorika. Okaniuatakatxi, ãti kãkiti itanorokata sirikiko nire, anokaretxi, itiriuatakatxi, misirieneretxi, ãti misãkirepiretiko pakini potorika hãkixinireë. ²⁰ Ikara atoko inakaranira txikotari kãkiti ãkixinire. Kãkiti marokauakotakanuia kona txikotari ãkixinire —itxa Xesosi.

Xoteo Minakatoua Auikiniri Xesosi Sãkire
(Marko 7.24-30)

²¹ Ikara atoko inaãka atoko Xesosi sipe. Isipeka Txiro, Sitoõ pakini tõpamoni.

²² Iuasaaki sito Kanaãkero, iuaã auakaro, apoka Xesosimoni. Iteene oamanaãri:

—Apiananiri, Tavii apika mekaniri, piamonikano. Maerekati matamatakoti auaitotaro namarite. Iua iteene misiritaro oa —otxari.

²³ Txamari Xesosi kona apakapiretaro oa. Imoianariakori apoka Xesosimoni. Itxana:

—Piokanataro, osipekako. Atemoni ātipirika oākiripoanāta —itxana. ²⁴ Xesosi apakapapiretaro oa:

—Niokanataāka Isaeokini ninīkatini īkapani. Ninoa soti auīte pīpinanaākani atoko itxana. Txamari pite kona Isaeokero. Pite āto uāka —itxa.

²⁵ Iuaritika oa sito apoka iuamoni. Okapotoreēkaua iua apisatoō. Ininiā oa:

—Apiananiri, pimakananitaro namarite —otxari.

²⁶ Ininiā Xesosi:

—Isaeokini amarini atoko. Nota ninoa iri atoko. Kona erekari amarini komirite nimixirikini, anāpamoni nisikini īkapani —itxaro.

²⁷ Ininiā oa:

—Ari, atāopitikara pisākire. Anāpa atoko nitxaua, iuaritika anāpa nikari nipokori iriākari kaapokori patapi koa —otxa.

²⁸ Ininiā Xesosi:

—Atāopitikara. Sito, pite iteene auikari niposotiire. Pinirekakiti nikamapitikako —itxaro.

Iusaakipeka oimi erekapeka otxa.

Xesosi Erekapeka Txīkitakari Kākiti

²⁹ Eereka Xesosi sari Karirēia poatimoni. Iuaā oxiratari nopini topāka itxa. ³⁰ Itomane kākiti iuamoni apoka. Ninoa minari iuamoni kākiti mōsiāreni, masākireni, matīpokotakani, apanakini amianatakani itomaneri pakini. Xesosi makananitanina ninoa. ³¹ Kākiti iuaā auakani tsorīkaāta, kotxi itikarina Xesosi makananitinina amianatakani. Kākiti masākireti sākirauatapeka. Kākiti matīpokotakati tīpokotapeka. Mōsiāreti, kōsiārepeka itxapeka. Ikinimane txari:

—Peerekari Teoso, Isaeo auakani Teosone —itxana.

Xesosi Sikakienatana Ipi Ipi Pakini Mio Kākiti

(Marko 8.1-10)

³² Xesosi akiritana imoianariakori. Itxana:

—Nota amonīkana naia kākiti. Ipi ōti, āti ōti pakini notakata auana. Uatxa kona minakati kona auari inikinina īkapani. Kona nota iokanatanana ninoa natxiritika, kotxi arikama ipītaxititamana, irika itxamana —itxa Xesosi.

³³ Ininiā imoianariakori txari:

—Nanipa ate apokari nipokori komiri naia kākiti asikakienatini? —itxana.

³⁴ Ininiā Xesosi:

—Kipakinipa komiri aua hītemoni? —itxa Xesosi.

Ininiā ninoa:

—Setxi komiri, ātikaka ximaki axapitiri pakini —itxana.

³⁵ Ininiā Xesosi:

—Hīpaniātana kākiti xiti topākini —itxa Xesosi.

³⁶ Eereka imaīkari ninoa setxi komiri, ximaki pakini. Itxari Teoso:

—Erekapitikari ia komiri, ximaki pakini pite sikakiti.

Mapixinika itxari komiri, ximakikata. Eereka xanakaāpota itxari imoianariakorimoni. Ininiā ninoa xanakaāpotari kākitimoni. ³⁷ Ikinika nipokota. Kamitopeka itxana. Imoianariakori xāpokakari setxi kotari nipokori itetakori. ³⁸ Ipi ipi pakini mio kikiākini nipokotapeka, apaka sitoākini, amarini pakini. ³⁹ Eereka Xesosi iokanatanana kākiti aapokomonina. Iposo atoko iereētaua kanaua āki. Makataā tōpamoni isa.

16

Teoso Takaōtxikare

(Marko 8.11-13; Arókasi 12.54-56)

¹ Pariseoakori, satoseoakori pakini sari Xesosimoni. Inirekarina Xesosi kerokiniri, ininiā itxarina Xesosi:

—Takaōtxikari, Teoso posotiire poerekaua ate, aātamatiniri īkapani, Teoso iokanatinii īkorapokoriti aimarotini īkapani —itxarina.

² Txamari Xesosi txana:

—Na noerekai. Mapiñnikata iaxiti pōkamarari inakasaaki: “Peereōtiri katana,” hītxa. ³Iua atokokana iñanōkapanika iaxiti pōkamarari, piākaxitita inakasaaki: “Āparañnapani. Kataparari itimatipani,” hītxa. Himarotapitikari takaōtxikari iaxiti auakari. Txamari kona himarotari Teoso kamanātakiti iñorakanani. Hīsākirauatakasaaki, kākiti erekarini atoko hītxa, txamari maerekati hīkama. ⁴Kākiti uatxarini !erekana. Itakanaparina Teoso. Hīte nirekari noekinii Teoso takaōtxikare, iposotiire. Konapitini. Kona noerekai hīte. Kitxakapirīka Teoso sākire sāpiretakari Xonasi inakari auakasaaki, Teoso kamari posotiiretxi. Ikara atoko inakari posotiiretxi Xonasi auakasaaki, iuaikana ikamapanikariko. Iua posotiiretxi Teoso takaōtxikare itxapanikaua hīte iñapani. Iua takaōtxikarinoka Teoso takaōtxikare hīte iñapani —itxa Xesosi.

Iposo atoko Xesosi takanapana, sipe itxa.

Pāo Tireēkari Pirena
(*Marko 8.14-21*)

⁵Xesosi imoianariakorikata iñpiriātari ipoa. Ipinia apokasaakina, imoianariakori xinikaro pāo imaxinikaretakitona. ⁶Iuasaaki Xesosi otākikana ninoa:

—Erepaniko. Pariseoakori, satoseoakori pakini pāote tireēkari pamonōkoniri —itxana imoianariakori.

⁷Ininia imoianariakori misākiretakakaua:

—Pāo amaxinikaretini xika Xesosi ikara atoko txaua ate —itxana imoianariakori.

⁸Xesosi imarotari imisākiretakakiniuana, ininia iua:

—Kinirepa himisākiretakakaua, pāo himaxinikaretini xika? Kona iteene hāuikari ninikatini. ⁹Atauako kona kiikitepanikai hīte? Atauako himaxinikaretapekari pāo sikonoka siko mio kākiti nisikakienatini? Hīxinikariko kipakinipa kotari hīxāpokaka pāo itetakoro? ¹⁰Atauako kona hīxinikatari āti ōti ipi ipi pakini mio kākiti setxinoka pāo nisikakienatini? Hīxinikariko kipakinipa kotari hīxāpokaka pāo itetakoro? ¹¹Hīte nōtākikasaaki: “Erepaniko. Pariseoakori, satoseoakori pakini pāote tireēkari pamonōkoniri,” ninakasaakii, kinirepa kona himarotatari kona pāoni ikara atoko nitxai hīte? —itxa Xesosi ninoamoni.

¹²Iuasaakiika imarotarina kona pāo tireēkarini monōkori txaua. Imarotarina pariseoakori, satoseoakori pakini sākirera, ninoa oereēkitira, monōkori txaua.

Petro Auikari Xesosi Teoso Ākiri Ininiaua
(*Marko 8.27-30; Arókasi 9.18-21*)

¹³Xesosi sari Sesaréia-Piripi sitatxiti takote. Iuaā ipimaāna imoianariakori:

—Kipa kākiti uākatano nota hītari iaxitikiri?

¹⁴Ininia imoianariakori:

—Ātikaka uākatai Xoāoni kapatxisarerini iuaikana ōkitikaua inakarii. Apanakini uākatai Eríasini iuaikana ōkitikaua inakarii. Apanakinipekana uākatai Xeremiani iuaikana ōkitikaua inakarii. Minakanisaaki ātikaka: “Āti Teoso sākire sāpiretakarini iuaikana ōkitikaua inakarii,” itxaina —itxarina.

¹⁵Ininia Xesosi:

—Hītepekana, kipa hīte uākatano nota? —itxana ninoa.

¹⁶Simão Petro apakapapiretari:

—Teoso mereēkitirai pite. Teoso mapīkati ākirirai pite —itxari iua.

¹⁷Ininia Xesosi:

—Simão Petro, Xoāo ākiri, Teoso takari erekari pitemoni, kotxi kona kākitini sāpiretai Teoso ākiri nininiu. Niri iaxitikirira sāpiretai. ¹⁸Nisāpirenauatapanika pitemoni. Piuāka Petro. Kai sorotxikana piuāka. Kai aapokotxiti kamakari mereēri kai kaikori xiti itakini iñapani, aapokotxi iua kai nopini ikamini iñapani, ininia aapokotxi !irika, kotxi kaikori nopini aua. Aapokotxi kamakari takari kai kaikori xiti. Iua kai atoko itxa ikara Teoso sākire, isāpiretakiti pitemoni. Kākiti nota nakitiakori naapoko atoko, ninoa sauaki nauini iñapani. Napotiinātapanikari kākiti naapoko iñapani. Satanasi tapara kona posotapaniri ixipokiniri ia naapoko. ¹⁹Nipaniātai Teoso sākire pisāpiretini kākitimoni. Xavi nisikini atoko itxa ikara, kotxi kākiti auikasaakiri Teoso sākire iñroā

Teoso auñtetxi ininiãtaãua. Īkorapokoriti kãkiti kamakiti pimauritakaniã, Teoso tixine apaka !auritaãka. Īkorapokoriti kãkiti kamakiti pauiritiniã, apaka auiritaãka Teoso tixine —Xesosi txari Petro.

²⁰ Iposo atoko Xesosi:

—Teoso mereẽkiti nininiua, apanakinimoni !kasãpirena hĩtxapeko —itxana imoianariakori.

Xesosi Sãpiretari Ipinini

(Marko 8.31-9.1; Arókasi 9.22-27)

²¹ Iua õtisaaki Xesosi potorika isãpiretinina imoianariakori:

—Nisako Xerosareẽmoni. Iuaã kiomãtxiakori, kaiõkatsoparerini, sasetotxi auñteakori pakini misiritanoko. Iposo atoko oka ninaãkako. Ipi ãti õtisaaki iuaikana nõkitikaãkako. Iuaikana aua nitxako —itxana.

²² Ininiã Petro misãkiretari Xesosi iuanoka inakasaaki. Itapararitika itxari:

—Konapitini, kona ikara atoko inakari kona auapani pitemoni, Apiananiri. Kona Teoso auiritapaniri ikara atoko piniko —itxari.

²³ Ininiã Xesosi kirioka Petromoni.

—Pisipiniikaua Satanasi. Nikimapore katokapareri atoko pitxa, kotxi pite nireẽkiti kãkiti nireẽkiti atokotxikana. Pite nireẽkiti kona Teoso nireẽkiti atokoni —itxari.

Xesosi Moianari Atão Inakari

(Marko 8.34-38; Arókasi 9.23-27)

²⁴ Iposo atoko Xesosi misãkiretana imoianariakori:

—Notakata kinirão sika pinakasaaki, piteka nireẽkiti kona pinirekape. Notakata kinirão sika pinakasaaki, nota misiritiko atokokana pimisiritaãkako. Ia atoko pinirekiniã, notakata pisapitikako. ²⁵ Pite ãtipirika kaminiãri pite nireẽkitinoka, ininiã pinireẽkiti xipokapitikako pitekata. Pite nireẽkiti pimanirekakaniã, nota sãkire pauikini xika, Teoso iokanapirena erekari pisãpiretini xika, pite auapininiika txako Teosokata. ²⁶ Atxiĩti papakapari ikinipoko tiitxi, ikini itixiti auakani tii, pinakiti ĩkapani. Atxiĩti iua tiitxi xika kona pikĩpitari Teoso sãkire, ininiã kona pikaikota ãtipirika Teosokata. Ikara atoko ininiã, erekari atxiĩti ikinipoko tiitxi auinii? Konapitini. Apiaerekata Teosokata ãtipirika pikaikotini. !Apakata kãkiti ĩkitxitiniri Teoso, iuamoni isini ĩkapani. ²⁷ Nota hĩtari ĩaxitikiri apokako ninitiriakorikata. Iusaaki niri iotximeretxikana nota iotximeretako. Iusaakirako erekari isika erekari kamakanimoni. Iparĩkana ĩki isika iparĩkana iaõka. Txamari imisiritanako maerekati kamakani. ²⁸ Atãopitikara nisãpiretai hĩte. Uai uatxa aua kãkiti, ninoa imarotapanikariko nota hĩtari ĩaxitikiri auñtetxi nininiua. Ikara imarotininina apisa kona ipinapanikana —itxa Xesosi.

17

Moisesi, Erĩasi Pakini

(Marko 9.2-13; Arókasi 9.28-36)

¹ Seisi õti napaka atoko Xesosi anikana Petro, Txiako, Xoão pakini. Xoão Txiako itari. Ikanĩkana oxiratari nopinixiti. Ninoanani anika iuaã. ² Iuaã ninoa atamatari iua. Ipinimonipo itxapeka. Itoõ iotximere atokatxi iotximere atoko itxa. Imãka serõka ipinikare atoko itxa. ³ Iusaakipeka Moisesi, Erĩasi pakini tokiã iuaã, misãkireta itxarina Xesosi. ⁴ Ininiã Petro akiritari Xesosi:

—Apiananiri, erekapitikari uai aãuini. Pinirekiniãri, nota kamari ipi ãti pakini papiri uai. Pite nakiti ĩkapani, Moisesi nakiti ĩkapani, Erĩasi nakiti ĩkapani nikama.

⁵ Petro sãkirauanãtakasaaki, katxiãri pomẽkoriri ninoa nopini apoka. Katxiãri ãki Teoso txari:

—Ere namarite, nitiretakiti. Napokaerekatari iua, kotxi ikamari ninirekakiti. Hĩkenakotariko iua sãkire.

⁶ Xesosi moianariakori ikara atoko inakari ikenakotakasaakina, iteene ipĩkarauatana, ininiã iriãkatana xitipe. Itoõna ikipatana. ⁷ Xesosi sari ninoamoni. Itakauakotaua ninoa nopini. —Hõkitikaua. Kona hĩpikarauatape —itxana.

⁸ Ininiã itikapokotana. Xesosinoka aua.

⁹ Oxiratari xirata iokiriiãpotakasaakina, Xesosi txana ninoa:

—Kona hīsãpiretapiri apanakinimoni hītikakiti. Nota hītari iaxitikiri nipina iuaīkana naua ninaka atokoikarako hītikakiti mixikanani hīsãpiretako —itxana.

—Ateeneka —itxarina.

¹⁰ Xesosi moianariakori pimaāri iua:

—Kinirepa kaiōkatsoparerini oerekaua: “Eríasi apokako Teoso mereēkiti apokini apisa?”

¹¹ Ininiã Xesosi apakapapiretana ninoa:

—Ari, atãopitikara ninoa sãkire. Merepitipanika Eríasi apokapitika. Iua kamari imakinika iposope inini ĩkapani. ¹² Ari, nisãpiretai, Eríasi apokapeka. Txamari kãkiti !imarotari iua. Imisiritarina iua inireēkitina iaōka. Iua atokotxikana itxanonako nota hītari iaxitikiri. Imisiritanona —Xesosi txana Petro, Txiako, Xoão pakini.

¹³ Ininiã imoianariakori imarotari Xesosi sãkire. Eríasi, Xoão kapatxisareri itxaua.

*Amarini, Maerekati Matamatakoti Auaĩtotakiti Pirena
(Marko 9.14-29; Arókasi 9.37-43)*

¹⁴ Ikanapiriākana atoko, itomaneri kãkiti apotiitiniãtaãua apokasaakina, kiki apoka Xesosimoni. Ikapotoreēkaua iua apisatoō. ¹⁵ Itxari:

—Apiananiri, piamonĩkari namarite. Maerekati matamatakoti auaĩtotari iua. Atatsi-irauata. Xaminaã irikapika. Kãuaãriã ikomokapika. ¹⁶ Niminamari namarite pimoianari-akorimoni. Ninoa kona posotari erekapeka itxĩkitakinirina.

¹⁷ Ininiã Xesosi txari:

—!Kauikarei hīte. Maerekati kamakanii hīte. Kipakinikananipa Teoso nirekatari hītekata nauini? Kipakinikananipa Teoso nirekatari hīte nimĩteenekini? Himinari amarini notamoni —itxana.

¹⁸ Apokaãka atoko, Xesosi txitari iua maerekati matamatakoti:

—Písipe.

Ininiã iua maerekati sipe. Iusaakipeka iua amarini erekapeka itxa.

¹⁹ Eereka imoianariakori apoka Xesosimoni. Iusaaki ninoanoka aua iuakata. Imisãkiretarina:

—Kanatokopa ininiãpa ate kona posotari maerekati matamatakoti aomitikini?

²⁰ Ininiã Xesosi:

—Kona atãoni hãuikari nisãkire, ininiã kona hĩposotari homitikiniri iua. Atãoenepi-tikara nisãpiretai hīte. Mostata iki axapitikiri. Axapitipitika nisãkire hãuikiniã, mostata iki atoko nisãkire hãuikiniã, hĩposotari ia õtanoxiratari hĩpaniãtini: “Pite oxiratari, uai posipika, ikaimoni pisa,” ininiã oxiratari sapitikamako. Hīte posotari ikinipoko hinireēkiti hĩkamini. ²¹ Txamari himamisãkiretakaniãri Teoso, hinipokotini himatakanapakaniã Teoso himisãkiretini ĩkapani, ininiãra kona hĩposotari maerekati matamatakoti homitikini —itxa Xesosi.

*Xesosi Iuaīkana Sãpiretari Ipinini
(Marko 9.30-32; Arókasi 9.43-45)*

²² Kariréia tōpa apokasaakina, Xesosi misãkiretana imoianariakori:

—Nota, hītari iaxitikirino mĩkapiritaãkako. Nisikaãkako kikiakorimoni inirekaãkitina ikaminina tĩkane. ²³ Ninoa okano nota. Ipi āti pakini õtisaaki iuaīkana nõkitikauako, iuaīkana aua nitxako —itxana ninoa.

Ikara inakari ikenakotakasaakina, imatinaniuatana.

Txineiro Teoso Misãkiretiko Aikoti ĩkapani

²⁴ Kapanaoō sitatxiti apokasaakina, kikiakori sari Petromoni. Ninoa kiki apakaparo txineiro Teoso misãkiretiko aikoti nĩkatakani amanaãkito. Ipimaãrina Petro:

—Hīte oerekakari sikataro txineiro Teoso misãkiretiko aikoti nĩkatakani amanaãkito? —itxarina iua Petro.

²⁵ Ininiã Petro:

—Ari, isikapitikaro —itxa.

Ereka Petro ñroã aapokotxi ãki ikara sãkiretxiti Xesosi isãpiretini ñkapani. Xesosi sãkirauata, Petro masãkirauatakani apisa:

—Petro, ikini itixiti kipa sikataro txineiro auñtetxiakorimoni? Atauako auñtetxi nirimane sikataro? Atauako kãkiti ãtiãtaã ñkanikani sikataro? —itxari.

²⁶—Kãkiti ãtiãtaã ñkani sikaro txineiro auñtetximoni —itxa Petro.

—Ari atãopitikara. Ininiã kona auñtetxi nirimani sikaro txineiro iuamoni. Iuaritika asikapitikaro. ²⁷ Txineiro amasikakaniã, txineiro apotiitakani !apokaerekataua. ! Anirekari ikara atoko inakari. Ininiã ipoa pisa. Pokatsaãta. Pimanamãkaro ximaki merepitipanika pimañkakito. Onamaã papokaro txineiro ota añkitxirauatini ñkapani. Oa txineiro ota apakata nota sikakito ñkapani, pite sikakito ñkapani apaka. Panika. Pisikaro oa txineiro Teoso misãkiretiko aikoti ñkatakanimoni —itxa Xesosi.

Ininiã Petro kamari Xesosi sãkire iaõka.

18

Kiripa Kãkiti Apiatakari Txataua?

(Marko 9.33-37; Arókasi 9.46-48)

¹ Iuasaaki Xesosi moianariakori apoka iuamoni.

—Teoso auñtetxi ininiãtaãua, kipa kãkiti apiatakari txataua? —itxana.

² Xesosi akiritari amarini axapitiri. Ninoa apisatoõ taka itxari.

³ —Atãopitikara nota sãkire. Himaerekani himatakanapakanisaaki, Teoso nireẽkiti himakamakanisaaki, amarini axapitiri atoko himinakanisaaki, kona hñsapani Teoso auñtetxi ininiãtaãua. ⁴ Ia amarini axapitiri liuikaua. Kãkiti ia amarini atoko inakarira, iuaka poiãotakiniãua, iuara apiatakari itxaua Teoso auñtetxi ininiãtaãua. ⁵ Nota nireẽkiti pikamakasaaki, pipoxokoniritika papakapiniãri amarini ia atoko inakari pinakasaaki, papakapano nota apaka —itxa Xesosi.

Maerekati Oerekakari

(Marko 9.42-48; Arókasi 17.1-2)

⁶ Xesosi sãpirenauatapanika:

—Kãkiti txñkitakiniãri amarini, nota sãkire auiãkari, maerekati ikamini, !apakata. Erekamariko kai mitari iua kãkiti maerekati oerekakari iaxirikanokitaãkamako, iposo atoko ipoa apanñkakiã okaãkamako ipinini ñkapani. ⁷ Kãkiti ikini itixiti auakani misiritaãkako, kotxi auari kãkiti maerekati apanakini kamini txñkitakakani. Auapika kãkiti ikara atoko inakani. Ninoa misiritaãkako. ⁸ Piuako txñkitakiniãri maerekati pikamini, ininiã pitsotakari, oka pitxariko. Pikiti txñkitakiniãri maerekati pikamini, ininiã pitsotakari, oka pitxariko. Kotxi maerekati pikaminiã arikatxi maxipokatimoni pokaãkako. Apiaerekata mauakotikai pauini ãtipirika Teosokata. Apiaerekata makititikai pauini ãtipirika Teosokata. Pauiritiniãri maerekati pikamini txñkitaãkari pitekata ikaikotiniã, ininiã pite kamari maerekati apaka, ininiã arikatxi maxipokatimoni pokaãkako. ⁹ Iua atokokana poki txñkitakiniãri maerekati pikamini, pimaporoka, oka pitxariko. Kotxi maerekati pikaminiã, arikatximoni maerekani misiritikoãtaã pokaãkako. Apiaerekata Teosokata ãtipirika pauini ãti pokinoka pauini. Kona pauiritapiri maerekati pikamini txñkitaãkari pitekata ikaikotini —itxa Xesosi sãkire.

Soti Auñte Pñpinanaãkari

(Arókasi 15.3-7)

¹⁰ —Ikinipoko amarini pipaxitako, kotxi niri tixine aua niri nitiriakori. Ninoa ñkatari amarini. Niri apisatoõ ãtipirika initiriakori auapika, ininiã kãkiti mapaxitakaniãri amarini, isãpiretarina niri. ¹¹ Nota hñtari iaxitikiri napoka ñkorapokoriti kãkiti pñpinanaãkani atoko inakani napokini ñkapani, kotxi !imarotarina Teoso kimapora.

¹² —Kiãtokopa itxa hñxinikakiti? Kiki aua ipiraakori soti auñte señ pakini. Txamari ãtika pñpinanaka. Kiãtokopa itxa? Itakanapari ipiraakori novẽta novi pakini. Isari oxiratarimoni. Initari iua pñpinanaãkari. ¹³ Ipiraakori novẽta novi na pñpinanaka, ininiã ipoxokoniua. Apokasaakiri iua pñpinanaãkari, iteene ipoxokoniua. ¹⁴ Iua atokokana

hīri iaxitikiri kona nirekari amarini ātika pīpinanakini. Hīri nirekari imakinika amarini imarotiniri ikimapore iuamoni sikari apo —itxa Xesosi sākire.

Maerekati Pitemoni Kamakari

¹⁵ —Pitari nisākire auiākari kaminiāri maerekati pitemoni, ininiā pisa iuamoni. Pitenoka pisa iuamoni. Iuanani pimisākiretako. Pōtākikiniri ikīpitakasaaki, pimoianari iuaīkana itxapekaua. ¹⁶ Pōtākikiniri imakīpitakanisaaki, ipi kākiti panikako iuamoni. Ipi minakanisaaki ātika panika iuamoni. Ininiā iuaīkana pōtākikari iua maerekati kamakari. Iuasaaki pitekata sikani apaka otākikari. Kotxi Teoso sākire iōkatsopatakorori oerekaua kākiti sākire kenakotakani, kākiti kamakiti itikakani ipi āti pakini auiniā, apakata apanakini atāo inakari imarotini ikapani. Ipi āti minakanisaaki, ipi apakata. ¹⁷ Ninoa pitekata sikani sākire imakīpitakanisaaki, pisāpiretana kākiti Teoso misākiretikoātaā apotiitakaniua. Ninoa ikinipoko Teoso sākire auiākani otākikariko iua. Imakīpitakanisaakiri ninoa sākire, himarotari atāo maerekati kamakari itxaua iua. Teoso sākire mauīakati atoko itxaua iua, kotxi kona inirekari otākikiko. Ate mokaiakari moianari atoko itxaua —itxa Xesosi sākire.

Pauiritakiti, Pimauiritakiniti Pakini

¹⁸ —Atāopitikara nitxai hīte. Īkorapokoriti kākiti kamakiti himauiritakiniti, Teoso tixine apaka !auritaāka. Īkorapokoriti kākiti kamakiti hāuiritakiti, apaka auiritaāka Teoso tixineē.

¹⁹ —Apikomoni ia nisāpiretai. Pite xinikakitixikana āti xinikiniā apaka, hinirekakiti hamanainiāri Teoso, niri iaxitikiri sikapitikai hamanaākiti. ²⁰ Kākiti apotiitakasaakiaua nota ixinikinina ikapani, nota ninoakata aua. Atxiīti ipi ātinoka aua. Atxiīti ipinoka aua. Iuaritika nota aua ninoakata —itxa Xesosi.

Nitiritxi Āti Matiretakati

²¹ Petro sari Xesosimoni, pimaā itxari Xesosi:

—Apiananiri, kipakinikatapa napakapari nitari, maerekati ikaminano ātipirika inakasaaki? Setxikata atxiīti?

²² Ininiā Xesosi:

—Kona, kona setxikatani papakapari iua. Setxikata setēta papakapari iua, ininiā ātipirika papakapariko.

²³ —Apikomoni noerekai papakapiniri kākiti, maerekati ikamakasaaki pitemoni. Teoso auītetxi ininiua patrāo ia atoko inakari itxa. Ia patrāo nirekari iniritiakori iīkitxitiniri iua. ²⁴ Ininiā iua iaōtaro txineiro isikakitopeka. Iuasaaki iniriti minaāka iuamoni. Mitxipeka iua patrāo sikari tesi mirāo txineiro ota iua iniritimoni. Txineiropokoni. Oa txineiro isikasaaki, itxari iniriti: “Āti ōti iuaīkana pisikano oia nitxineirote,” itxari iniritimoni. Txamari, !isikaro, kotxi !oāuaika. ²⁵ Kona katxineiroteri. Ininiā ipatrāote paniātari ivētxitiko iua, itanoro, imiakori, itii ikinipoko, ipatrāote iīkitxitini ikapani. ²⁶ Iua iniriti ikara inakari sākiretxiti ikenakotakasaaki, ipatrāote apisatoō ikapotoreēkaua. Itxari iua: “Piātaparoko. Ikinika pitxineirote nisikaiko,” itxari ipatrāotemoni.

²⁷ —Ininiā ipatrāote amonīkari. “Kona ninirekaikaro nitxineirote pisikinino.” Ininiā auiritari isini.

²⁸ —Ininiā sipe itxa. Iua nitiritxi mitxi sikapekaro txineiro iua inakito seī ota āti ipatrāote nitirimoni. Poiāonoka oa txineiro. Iuasaaki, aapokomoni isikasaaki, aōkitari iua āti nitiritxi ipatrāote nitiri. Imaīkari inoakiā. “Uatxa pisikano nitxineirote,” itxari.

²⁹ —Ininiā imoianari kapotoreēkaua iua apisatoō. “Piātaparoko. Ikinika pitxineirote nisikaiko,” itxari.

³⁰ —Txamari mitxiri nitiritxi: “!Niātapakaroko,” itxari. Ininiā kateiamoni ieretakakitākari imoianari txineiro xika. “Ikinika nitxineirote pisikasaakiikanoko, pikatxakako,” itxari. ³¹ Ikara inakari ene apanakini iua patrāo nitiriakori kenakotakasaaki, ninoa naiataua. Ininiā isana ipatrāotemonina. Isāpiretarina iniriti iokanatiniri āti iniriti kateiamoni. ³² Ininiā iua patrāo akiritari iua iniriti: “Pite maerekati pitxaua, kotxi kita pite amanaāno nota niamonīkinii, ininiā pīkitxitinino !nininirekaika. ³³ Kinirepa kona pite amonīkari pimoianari nota amonīkinii atokokana? Kona erekai,” itxari.

³⁴ —Ininiã ipatrãote iteene naiataua. Iokanatari iua kateiamoni imisiritikomoni ipatrãote txineirote okinika imasikakanisaaki.

³⁵ Ininiã Xesosi xipokapiretari ia isãpirena:

—Niri iaxitikiri iua atokokana txaiko hïte, maerekati ãti kamakasaakii hïtemoni himamaxinïkaretakaniã hãkixinireẽ —itxa Xesosi.

19

Kiki İtanorokata Itakanapakakini

(Mateo 5.31-32; Marko 10.1-12; Arókasi 16.18)

¹ Ikara inaka atoko Xesosi potorika Kariréia tōpa. Isa Xotéia tōpamoni uini Xotão ipiniã. ² Iuaã itomaneri kãkiti sari iuamoni. Erekapeka itxïkitakana amianatakani.

³ Pariseoakori apaka sari iuamoni. Inirekarina Xesosi kerokiniri isãkire. Ininiã ipimaãrina Xesosi:

—Auiritaãka atxiïti kiki takanapiniro ïtanoro, itakanapiniro inirekasaaki? —itxarina.

⁴ Ininiã Xesosi:

—Hïte imarotapekari ia Teoso sãkire iōkatsopatakori:

Kitxakapirïka merepitipanika ikinipoko Kamakari kamari kãkiti, kiki inini, sito onini apaka ikamari kãkiti.

⁵ Ikara atoko ininiã, kiki takanapari iri, inoro pakini, ïtanorokata auini ïkapani, ininiã ninoa ãtika atoko itxauana,

itxa Teoso sãkire iōkatsopatakori. ⁶ Ininiã kona ipi !itxaikauana. ãtika itxauana. Ikara atoko ininiã, !erekari kãkiti kiarikiniri Teoso apotiitakini —Xesosi txana ninoa.

⁷ Ininiã ninoa pariseoakori pimaãri:

—Ikara atoko ininiã, kinirepa Moisesi paniãtari kiki iōkatsopatiniri aãtsopa, ïtanoro itakanapini aãtsopate, ininiã eereka auiritari iua iokanatiniro oa?

⁸ Ininiã Xesosi apakapapiretana:

—Moisesi auiritai hïtanoro hïtakanapini, kotxi paikori hïxinire. Teoso nireëkiti himanirekakani xikara, Moisesi auiritai hïtanoro hïtakanapini. Txamari kitxakapirïka merepitipanika kona kiki takanaparo ïtanoro. ⁹ Ininiã nitxai hïte, kiki takanapiniãro ïtanoro, ãtikata masirïkatoka, iua kamari maerekati. Itakiniãro ãto sito, maerekati apiata ikama, kotxi !imaãkatari Teoso paniãtakiti. Oa itakanapakito taãkari apaka kamari maerekati —Xesosi txana ninoa.

¹⁰ Ininiã imoianariakori ikara ikenakotakasaakina, itxarina Xesosi:

—İtaniritxi, ïtanorotxi !auiritaãka itakanapakakinina, ininiã erekapiimana imïtaniri-uatakanina —itxarina.

¹¹ Ininiã Xesosi:

—Erekapitikari kãkiti ïtanorouatini. ãtikakanoka Teoso kona nirekari ïtanorouatini. ¹² Ixika auapitika kãkiti mïtanorouatakani. Kotxi ãtikaka kiki auakasaaki, iïtona kona apakata ninoa takiniro sito. Apanakinipekana ikisauakatsikitiko xika kona ninoa posota itakinirona sito. Apanakinipekana kona nirekari ïtanorouatini Teoso auïtetxi ininiãua ãtipirika isãpiretini ïkapani. Teoso manirekakaniãri pite ïtanorouatini, ininiã kona pïtanorouatape —itxa Xesosi.

Xesosimoni Amarini Apokini

(Marko 10.13-16; Arókasi 18.15-17)

¹³ Iposo atoko kãkiti minana amarini Xesosimoni. Inirekarina ninoa kii nopini iuako itakini. Inirekarina Xesosi misãkiretiniri Teoso amarini ïkapani. Txamari imoianariakori txitana. !Auiritana amarini anikinina Xesosimoni. ¹⁴ Ininiã Xesosi txana imoianariakori:

—Hãuiritanako amarini notamoni apokini. Kona hïtokakapena notamoni apokinina. Kotxi kãkiti Teoso auïtetakani amarini atoko itxauana —itxana.

¹⁵ Ininiã iuako itaka ninoa kii nopini. Iposo atoko ïkorape itxa.

ãtokori Ito Txineiroteri

(Marko 10.17-31; Arókasi 18.18-30)

¹⁶ ãtokori apoka Xesosimoni.

—Koerekareri erekarii, kiripa erekari nikama ātipirika Teosokata nauini ĩkapani? — itxari.

¹⁷ Ininiā Xesosi:

—Kininiāpa “erekari” pitxano? Kākiti erekari lauari. Teosonanira erekari. Teosokata ātipirika pauini pinirekiniā, pikamariko Teoso paniātakiti.

¹⁸ —Īkiripa? —itxa.

Ininiā Xesosi:

—!Pokaniuatape. !Pisirĩkape āti ĩtanorokata. !Piitiriuatape. Poxiene !pikamape. ¹⁹ Piri, pinoro pakini pipaxitako. Pitiretanako apanakini, piteka pitiretiniua atokokana, pitxapaniko —itxari.

²⁰ —Nikamapitikari ikara atoko pinakiti. Kiripa apikomoni nikamaā Teosokata ātipirika nauini ĩkapani? —itxari.

²¹ —Ikinika kinirāo kamaka pinakasaaki, ikinika pitii pivētxitako. Txineiro papakapakitō pisika kākiti matxineirotenimoni. Ikara atoko inakari pikaminiā, Teoso tixine papokasaaki ikinipoko erekari auiniiko pite. Pitii pivētxitaka atoko, notakata sa pitxako —Xesosi txari.

²² Iua ātokori ikara ikenakotakasaaki, isipe. Imatinaninoka itxari ātokori, kotxi kaiāori itii. !Inirekari itii ivētxitini. ²³ Ininiā Xesosi txana imoianariakori:

—Atāopitikara ia nitxai hĩte. Pamimari katxineiroterini auĩtetiniri Teoso. ²⁴ Apikomoni nisāpiretai. Atauako kamero napatari ākorike sonakiā? Apia mimari kākiti katxineiroterini auĩtetiniri Teoso —itxana.

²⁵ Xesosi moianariakori ikara ikenakotakasaakina, itsorĩkaātana. Ninoa uākatari katxineiroterinimoni txineiro aua, kotxi Teoso apokaerekatana ninoa, ininiā txineiro isika ninoamoni, ninoa uākatakiti. Ininiā ninoa pimaāri:

—Katxineiroteri maposotakaniāri Teoso tixinemoni isini, kipa posotari iuaā isini? — itxanātana.

²⁶ Xesosi atamatana. Apakapapiretana:

—Kākitika kona posotari. Teoso posotari ikinipoko ikamini.

²⁷ Petro misākiretari Xesosi:

—Atepekana, ate takanapapekari ikinipoko pitekata asini ĩkapani. Ikara atoko aniniā, kiripa ate apakapako? —itxari.

²⁸ Ininiā Xesosi:

—Atāopitikara nitxai hĩte. Nota, hĩtari iaxitikiri niitopākako auĩtetxi itopanere nopini. Iuasaaki ikini itixiti amaneri itxauako. Ikinipoko atamatanoko nota hĩtari iaxitikiri iotximere. Iuasaaki hĩte nisākire kĩpitakanii apaka topākako auĩtetxi itopanere nopini. Iua iitopaneretxi tosi pakini. Tosi nirimanetxi Isaeo tixine auakani auĩteakori hĩtxauako.

²⁹ Atxiĩti nota ĩkapani pitakanapari paapoko, pitariakori, pitaroakoro. Atxiĩti nota ĩkapani pitakanapari piri, pinoro, pamarite. Atxiĩti pitakanapari pikikiote nota ĩkapani. Ikara pitakanapakasaaki nota ĩkapani, apiata papakapariko. Itori papakapariko. Ikara atoko pininiā nota ĩkapani, ātipirika paua Teosokata. ³⁰ Itori kākiti apiarini uatxa, itixi xipokini ōtisaaki poiāorini itxapekauana. Uatxa itori kākiti poiāorini, apiarini itxapekauana itixi xipokini ōtisaaki —itxa Xesosi sākire.

20

Ova Takakoriātaā Parĩkauatakani

¹ Xesosi txari:

—Teoso auĩtetxi ininiua ia kakikioteri atoko itxa. Ia kakikioteri takapekari txipokori ova inakoro ikikioteē. Ovanoka itaka. Oiōpeka onakasaaki, iua kakikioteri potorika ĩkanōkapanika. Initari parĩkauatakani ova amakani ĩkapani. ² Aōkitakasaakina, ipimaāna: “Hinirekatari parĩkatxi?” itxa.

—“Ari, anirekapitikari,” itxana.

—“Atauako ātoka txineiro ota pirata kamakori apakata āti ōti pokamara piparĩka ĩki ĩkapani?” itxana.

—“Ari, apakatapitika,” itxana. Kotxi ātoka ota pirata kamakori iuasaaki atāo parīkatxi īki āti ōti pokamara kākiti parīkauatini īki. Ininiā itakaremoni iokanatana iparīkauatini ina īkapani.

³—Novi oarape inakasaaki iuaīkana ipotorika. Nipokori vētxitikoātaāmoni isa. Iuaā atamatana kākiti maparīkauatakani. ⁴Ininiā imisākiretana: “Hīte apaka atxiīti nirekatari hīparīkauatini nitakareātaā, ininiā niīkitxitai atāo inakari hīparīka īki,” itxa. Ininiā ninoa apaka sari.

⁵—Apaniāxitipeka inakasaaki iuaīkana iokanatana apanakini parīkauatakani itakaremoni. Itinītikitakasaaki iuaīkana iokanatana apanakini parīkauatakani itakaremoni. Mitxi isākire atokokana itxa isākire ninoamoni. ⁶Mapiānikata takotepeka inakasaaki iuaīkana isa parīkauatakani initini. Apokapanikana maparīkauatakani. Ipimaāna: “Kinirepa ia ōti maparīkauatakanika hītxa?” itxana.

⁷—“Kotxi kona kākiti sikaua parīkatxi,” itxarina.

—“Nitakareātaā hīsa. Iuaā hīparīkauata. Hīte apakapariko hīparīka īki erekari,” itxana.

⁸—Īkanōkapeka inakasaaki kakikioteri akiritari initiri apiari: “Parīkauatakani pakirita. Piīkitxitana. Merepanika piīkitxitana kikata parīkauatakani. Eereka piīkitxitana tinītikita parīkauatakani, pitxaāpotako,” itxari.

⁹—Kikata parīkauatakani imakinikana apakapari ātoka txineiro ota pirata kamakori. ¹⁰Kikiākini īkanōkapanika parīkauatakani ikara itikasaakina, oākatarina: “Ate apakaparo apiatako aparīka īki,” itxamana. Ātoka txineiro ota pirata kamakoro imakinikana apakapana. ¹¹Txineiro apakapakana atoko, omanākarauatana. “!Erekari kakikioteri,” itxanātana. ¹²Ininiā ninoa txari iua: “Naia kikata parīkauatakani poiāoka iparīkauatana. Āto oaranoka iparīkauanātana. Ate parīkauata ikiniōtika kapatakariā. Ate parīkauatapi-tipo, txamari pite īkitxitaua ate naia piīkitxitini atokokana. Kona erekai,” itxarina.

¹³—Iua kakikioteri apakapapiretana: “Nītiretakini, kona nota misirienetai hīte. Īkanōkapanika nipimaāi: ‘Atauako ātoka txineiro ota pirata kamakori apakata āti ōti pokamara piparīka īki īkapani?’ nitxai mixikanani. Ininiā hīte: ‘Ari, apakatapitika,’ hītxa. Ininiā na nimisirienetai hīte. ¹⁴Ininiā txineiro nisikakito hanikaika. Haāpokomoni hīsipeka. Nota nirekari niīkitxitinina hīte tikini parīkauatakani hīte niīkitxitini iaōka. ¹⁵Atauako kona erekari nota txineirote ninirekakitimoni nisikini? Hīte xikotano, erekari nikamini xika,” itxana ninoa.

¹⁶Xesosi xipokari isāpirena:

—Itori kākiti apiarini uatxa, itixi xipokini ōtisaaki poiāorini itxapekauana. Uatxa itori kākiti poiāorini, apiarini itxapekauana itixi xipokini ōtisaaki. Teoso aiatana kaiāopokori kākiti itixine isinina īkapani, txamari poiāonoka iua mereē —itxa Xesosi.

Iuaīkana Xesosi Sāpiretari Ipinini

(Marko 10.32-34; Arókasi 18.31-34)

¹⁷Xesosi Xerosareēmoni ikimaporitakasaaki, akiritana imoianariakori. Ninoanoka imisākireta.

¹⁸—Hīkenakotari nisākire. Xerosareēmoni asako. Iuaā nota hītari iaxitikiri mīkapiritāākako. Sasetotxi auīteakori, kaiōkatsoparerini pakinimoni nisikaākako, ininiā ninoa apotiitaua. Iuasaakiko ninoa txari: “Okaākapitikako.” ¹⁹Eereka ninoa sikano Xoteo minakonimoni. Ninoa napetano. Ixirokitatanona aāpitsaā. Iposo atoko aamina ipiriāmitakariā tokakita ninaākako, oka itxanonako. Ipi āti ōtisaaki nōkitikauako, iuaīkana aua nitxako —itxa imoianariakorimoni.

Txiako, Xoāo Pakini Amanaākiti

(Marko 10.35-45)

²⁰Eereka Sepeteo ītanoro apoka Xesosimoni. Ominana imi Txiako, Xoāo pakini. Ninoa Txiako, Xoāo pakini Xesosi moianariakori. Okapotoreēkaua iua apisatoō.

—Atauako ninirekakiti pikaminano? —otxari.

²¹—Kipa pinireka? —itxaro.

—Ikinimane auïte pinakasaakia, ninirekari naia ipi namariteni auïtetxiakori ininiãuana pitekata. Pauiritatana pitekata iitopãkinina, ãti pikikomoni inini, ãti pisaneremoni inini? —otxari.

²² Ininiã Xesosi apakapapiretana ninoa:

—!Himarotari hamanaãkiti. Mapaõti napa atoko iteene nimisiritaãkako. Atauako hïposotatari hãtatsiitiniri notakata? —itxana ninoa.

—Aposotapitika —itxarina.

²³ —Atãopitikara hãtatsiirauata notakata, txamari kona notani mereẽna kãkiti nikikomoni, nisanaremoni topãkakani ïkapani. Nirira mereẽpekana ninoa kãkiti notakata topãkini ïkapani —itxana.

²⁴ Apanakini Xesosi moianariakori kenakoenetari Txiako, Xoão pakini amanaãri Xesosi auïtetxi ininiuana ïkapani, ininiã omanatana. ²⁵ Ininiã Xesosi akiritana ninoa imakinikana iuamoni.

—Himarotari Xoteo minakaniau auïteakori paniãtari kãkiti ikinika auïteakori nireẽkiti ikaminina ïkapani. Kona atão itiretana kãkiti. Kãkiti kona kamari auïtetxiakori mauritakiniti. ²⁶ Kona ninoa auïtetxiakori atoko !hïtxape. Atão apiari pininiua pinirekiniã, pimoianatariko apanakini. ²⁷ Apanakini auïte pininiã pinirekiniã, nitiritxi pitxauako merepanika. ²⁸ Ikara atoko nitxa nota hïtari iaxitikiri ïkorapokoriti napokasaaki. Ninitiri !auari. ïkorapokoriti napoka, kãkiti nitiri nininiua ïkapani, kãkiti nitiretini ïkapani. ïkorapokoriti napoka nipinini ïkapani, kaiãopokori kãkiti mapinakani ïkapani, kotxi nota ïkitxirauata ninoa mapinakani ïkapani —itxana ninoa.

Ipi Mõsiãreni Xesosi Makananitini

(Marko 10.46-52; Arókasi 18.35-43)

²⁹ Xerikoo sitatxiti ipotorikasaakina, itomaneri kãkiti sari Xesosikata, imoianariakori pakinikata. ³⁰ Iuasaaki ipi mõsiãreni topãkanãta kimapori tiniãpo. Xesosi napaãpotini ikenakotakasaakina, akiritana:

—Apiananiri, aãuïte Taviini apika mekanirii, piamonïkaua ate —itxarina.

³¹ Kãkiti iuaã pinitana:

—Himaãtako —itxana.

Txamari apiata akirikatana:

—Apiananiri, aãuïte Taviini apika mekanirii, piamonïkaua ate —itxarina.

³² Ininiã Xesosi iotoka. Akiritana ninoa mõsiãreni. Apokana iuamoni.

—Kipa hinireka nikaminii hïte? —itxa.

³³ —Apiananiri, aïtikapokotini anireka.

³⁴ Ininiã Xesosi amonïkana. Okina nopini itakari iuako. Iuasaakipeka kõiãrepekana, sa itxana Xesosikata.

21

Xesosi Xerosareẽ Apokaãpotini

(Marko 11.1-11; Arókasi 19.28-40; Xoão 12.12-19)

¹ Xesosi imoianariakorikata imatokoãpotari Xerosareẽ. Apokana Petxipaxee inakori aapokotxiti, õtanoxiratari takote Oriva inakori xiratamoni. Iuaã Xesosi iokanatana ipi imoianariakori aapokotximoni.

² —Hïsa ikiraã kaixiti auakari aapokotxitiã. Iuaxiti hãpokasaaki, hãpokaroko xomẽta iaxiriãkoro oimikata. Hïkoxirikana. Uaimoni mina hïtxanako. ³ ãti misãkiretakasaakii: “Kinirepa hïkaxirikatari pirãtxi?” Ininiã hïte: “Apiananiri nirekana,” hïtxako. Ininiã iua auiritai himininina —itxana ninoa.

⁴ Kitxakapirïka Teoso sãkire sãpiretakari sãpiretapekari ikara atoko inakari. Ininiã iua sãpiretakiti kitxakapirïka atão inakari apokapeka. ⁵ Iua txari:

Hïtxariko Xerosareẽ auakanimoni: “Hãtamata. Hïauïte apokaãpota hïtemoni. !Kaneenamari. Xomẽta nopini iitopãkanãta. Xomẽta ãkiri nopini isaãpota,” hïtxako ninoamoni, itxa Teoso sãkire sãpiretakari kitxakapirïkapeka.

⁶ Ininiã Xesosi moianariakori sari. Ipaniãtakiti iaõka ikamana. ⁷ Ininiã iminaro xomêta oimikata. Itakarina imãkana inopinina Xesosi topãkini ìkapani. Ininiã Xesosi topãka xomêta ãkiri nopini. ⁸ Itomaneri kãkiti katamêkari imãkana kimapori ãpo. Apanakini sauakari aãxike. Ikasirìkaxikeãpotarina aãxike kimapori ãpo. Ikara atoko ikamana, Xesosi paxitiko oerekinina ìkapani. Imãkana nopini, aãxike nopini, xomêta napaãpota. ⁹ Kãkitipokoni ìkiikakani. Kãkitipokoni Xesosi tikini ìkani. Imakinika saãpotakasaakina, akirikatana:

—Peerekari Tavii apika mekaniri. Teoso posotiirekata ìkari, Teoso nireêkiti kamakari iua. Teoso sikariko erekari iuamoni. Peerekari Teoso, iaxiti apiko nopinixiti auakari. Apiananiri itxaua —itxaãpokatana.

¹⁰ Ininiã Xesosi apokapeka Xerosareë. Iuasaaki ikinimane Xerosareë auakani tsoriãkaãta.

—Kirinapanipa ikira kiki inatari? —itxanãtakakana.

¹¹ Kãkiti Xesosikata ìkani sãpiretana:

—Xesosikara ikira. Teoso sãkire sãpiretakari, ikira. Nasaree sitatxitikiri, Kariréia tõpa auakari ikira —itxana.

Pirãtxi Vêtxitakani Omitikiko

(Marko 11.15-19; Arókasi 19.45-48; Xoão 2.13-22)

¹² Xesosi ìroã aiko ãki Teoso misãkiretikoãtaã. Omitikenatana tiitxi vêtxitakani. Amotiitakani Teoso misãkiretikoãtaã auakani omitikenata. Ikitakari txineiro vêtxitakani mesate. Kamoã vêtxitakani topãkini apaka ikitaka. ¹³ Xesosi misãkiretana:

—Teoso sãkire iõkatsopatakori txari:

Ia naapoko, “Teoso misãkiretiko aikoti” akiritaãkako,

itxa. Txamari hite txìkitakari ia aiko kiitiririni iomaãtiniãtaã ininiua —itxa Xesosi.

¹⁴ Mokirini, kãkiti matìpokotakani pakini apoka Xesosimoni Teoso misãkiretiko aikotiã. Erekapeka itxìkitakana ninoa. ¹⁵ Iuasaaki amarini Teoso misãkiretikoã auakani iteene akirikata:

—Peerekari aãuïte Taviini apika mekaniri —itxanãtana.

Sasetotxi auïteakori, kaiõkatsoparerini pakini itikari Xesosi posotiire, kãkiti erekapeka itxìkitakini. Ninoa kenakotari amarini akiritakiti:

—Peerekari aãuïte Taviini apika mekaniri.

Ininiãkara ninoa omanãkarauata. ¹⁶ Ininiã imisãkiretarina Xesosi:

—Pikenakotatari ikara amarini akiritakiti? —itxana.

—Nikenakotapitikari. Hite atatsopatapekari ia Teoso sãkire iõkatsopatakori:

ãtokoriakori, amarini pakini, ninoapeka apaka txariko: “Peerekari iua,” itxanako,

itxa Teoso sãkire iõkatsopatakori. Ininiã Teoso sãkire iaõka ninoa kamanãta. Ininiã erekapitikari ninoa akiritakiti —itxa Xesosi.

¹⁷ Iposo atoko itakanapana. Ìkorape itxa. Itakanapari Xerosareë. Isa aapokotximoni Petãnia inakorimoni. Iuaã itxiaka.

Piko Mina Marito Pirena

(Marko 11.12-14, 20-25)

¹⁸ Katimatinìkata iuaìkana Xesosi sari sitatximoni. Ipixinipokoriti inatxita.

¹⁹ Atamataro piko mina kimapori ìtiniãpo. Isa oamoni txipokori itximini ìkapani. Txamari otsopanani auaro. Iuasaaki itxa:

—Kona kariikaiko —itxaro.

Iuasaakipeka otxiaroka.

²⁰ Imoianariakori ikara itikasaakina, itsorikitaãtana.

—Ii natokopa otxape katimari otxiarokini? —itxanãtana ninoa.

²¹ Ininiã Xesosi:

—Atão nisãpiretai. Teoso sãkire hãuikiniã, hite posotari hikaminiri mixikanani nikamakiti atoko inakari. Piko mina txiarokini nitxìkitakini atoko, hìposota hikamini. Teoso sãkire iteene hãuikiniã, apiata hikamako. Hìposotamariko hìpaniãtiniri ikira ixirata: “Põkitikaua. Ipoamoni oka pitxaua.” Iuasaakipekamako ixirata ipoamoni oka

itxamauako. ²² Pite atão pauikiniári Teoso sãkire, iua pimisãkiretakasaaki, ikinipoko pamanaãkiti Teoso sikai —itxa Xesosi.

*Xesosi Paniãtakari Moerekakoni
(Marko 11.27-33; Arókasi 20.1-8)*

²³ Xesosi ãroã Teoso misãkiretiko aikotiã. Kãkiti oerekasaaki, sasetotxi auãteakori, kiomãtxiakori pakini apoka iuaã. Ipimaãrina Xesosi:

—Kipaniãpa pikamari ãkora pikamakiti? Kipa paniãtai? —itxarina.

²⁴ Ininiã Xesosi:

—Nota apaka pimarauatako hãtemoni. ãtinoka nipimaãiko hãte. Nota pimaãkitiko hãtemoni hãsapiretiniãno, nota apaka sãpiretai hãte hãpimaãkiti notamoni, ininiã nisãpiretai nota paniãtakari uãka apaka. ²⁵ Ia nipimaãi hãte: “Kipa paniãtari Xoãoni ipatxisarauatini? Teosokani paniãtari Xoão? Kãkitikani paniãtari Xoão?” —itxana.

Ininiã ninoa misãkiretakakaua:

—“Teoso paniãtari,” aniniã, “Kinirepa kona hãuikatari isãkire?” Xesosi txamaua eereka. ²⁶ “Kãkitira paniãtari Xoão,” aniniã, apanakini omanatamaua, kotxi ninoa uãkatari Xoão Teoso sãkire sãpiretakari ininiua.

Ikara atoko itxana imisãkiretakakiniuana. ²⁷ Ininiã apakapapiretana:

—!Aimarotari iua paniãtakari.

Ininiã Xesosi:

—Nota apaka kona sãpiretai nota paniãtakari uãka.

Iri Sãkire Kãpitakari, Iri Sãkire Makãpitakati Pakini

²⁸ —Hãxinikariko ia nisãpiretakitiko: Kiki auari ipi imi. Akiritari anekari. “Namarite uatxa piparãkauata nitakare ova auiniãtaã,” itxari imi.

²⁹ —Ininiã imi anekari: “!Nisapani. !Ninirekari niparãkauatini,” itxari. Eereka ixinikaxitinãta. “Ari, nisapitikako,” ininiã isa iri takaremoni.

³⁰ —Iua kiki akiritari imi maneritakari. Ipaniãtari iua atokokana. Iua imi: “Ari, nisapitikako.” Txamari, lisari.

³¹ —Ininiã ãkiripa kamatarari iri paniãtakiti? —itxa Xesosi.

Ininiã ninoa kiomãtxiakori, sasetotxi auãteakori pakini apakapapiretari:

—Anekarira.

Ininiã Xesosi:

—Atãopitika nisãpiretai hãte. Kãtiriri apokako Teoso auãtetxi ininiãtaãua hãte apisapanika. Kanokarero apokako Teoso auãtetxi ininiãtaãua hãte apisapanika. ³² Kotxi Xoão kapatxisarerini apoka hãtemoni. Oerekai erekari kimaporiti. Txamari kona hãte auikari isãkire. Kãtiriri, kanokarero pakini auikari isãkire. Iuasaaki himarotari ninoa maerekati kamakani takanapiniri imaerekanina. Ikamarina erekarinoka. Hãte itikapekari. Txamari hãte kona takanapari himaerekani. Kona hãuikari Xoão sãkire, ininiã iua kiki sãkire makãpitakati atoko hãtxa, kotxi hãsãkire: “Akãpitapitikari Teoso sãkire,” txamari kona hãkãpitari —itxa Xesosi.

*Parãkauatakani Maerekani
(Marko 12.1-12; Arókasi 20.9-19)*

³³ —ãti sãpirenatxi atão inakari oerekiko nisãpiretai. Hãkenakota —Xesosi txana.

—Kiki kakikioteri takaro txipokori ova inakoro. Ovanoka itaka. Iposo atoko ipirike-taro. Eereka iuaãtaã ikamari ova katsonakiko. Iposo atoko ikamari aapokotxi õtanori, ikinipoko itakare atamatini ãkapani. Iposo atoko ãkitxitana kikiãkini itakare ãkatakani ãkapani. Ininiã ninoa ãkatari itakare. Eereka kakikioteri sari ãti itixiti. ³⁴ Ova manapi inakasaaki, iokanatana initiriakori itakare ãkatakanimoni, ova apakapinina ãkapani.

³⁵ —Txamari, ninoa maãkapena initiriakori. Ixirokitatarina ãti. Okapirina ãti. ãti kai soroã ikiporonakana. ³⁶ Iuaãkana iua kakikioteri iokanatana initiriakori. Iuasaaki ito iokanata. Mitxirini atokokana itakare ãkatakani txapena ninoani. ³⁷ Eereka imapotãkire iokanatarari imi ninoamoni. Iuãkatari: “Namarite iua, ininiã ninoa paxitari iua,” itxa.

³⁸ —Txamari, imi atapakasaakina, imisäkiretakakana: “Erepani imi. Maõkari, ininiã okinika itakare kaikotinua atemoni.” ³⁹ Ininiã imaïkarina imi. Kikio xiripirexiti anikarina. Iuaã oka itxapirina.

Ininiã Xesosi pimaãri kãkiti iua takote auakani:

⁴⁰ —Ininiã iua kakikioteri ikasaaki, kiãtokopa itxatanako ninoa kikiãkini? —itxa Xesosi.

⁴¹ Ininiã ninoa iua takote auakani apakapapiretari:

—Kakikioteri okanako ninoa maerekati kamakani. Iïkitxitanako apanakini itakare nïkatakani ikapani, ininiã ninoa sikapitikaroko ova oiõkasaaki —itxarina Xesosi.

⁴² Ininiã Xesosi:

—Hïte atatsopatapekari ia iõkatsopatakori Teoso sãkire:

Kai aapokotxi kamakani kona nirekari ãti kai soro. Iua kai imanirekakiniti kai apiari itxapekua. Apanakini kai soro maïkakari itxaua. Teosokara txïkitakari ikara atoko inini. Ikara peerekari atemoni.

Nota hïtari iaxitikiri iua kai atoko nitxaua. Peerekari Teoso, kotxi nota hïtari iaxitikiri kãkiti manirekakiniti. Teoso txïkitakano nota apiananiri nininiãua.

⁴³ —Ininiã nisãpiretai hïte, Teoso kona hïauïte !itxaikauako. Iua mereëriko apanakini kãkiti inakitiakori ikapani. Ninoa kamapitikari Teoso nireëkiti. ⁴⁴ Apikomoni Teoso sãkire iõkatsopatakori sãpiretaua iua kai apiari atoko inakari. Itxari:

Kãkiti iua kai nopini irikasaaki, ikarouata iua. Kai kãkiti nopini irikiniã, lauauka kãkiti, —Xesosi txana ninoa.

⁴⁵ Sasetotxi auïteakori, pariseoakori pakini kenakotakasaakiri ikara sãpirenatxi atão inakari oerekiko Xesosi sãpiretakiti, ninoa !apokaerekatarina isãpirena, kotxi imarotarina ninoa takari nïkatakani maerekani atoko inakani itxauana. ⁴⁶ Ininiã ia xika inirekarina imaïkinirina. Txamari !imaïkarina, kotxi ipïkarina kãkiti iuaã apotiitakaniua. Kãkitimoni Xesosi atão Teoso sãkire sãpiretakari itxaua.

22

Kiiniri Ìtanorouatiko Pirena (Arókasi 14.15-24)

¹ Iuaïkana Xesosi sãkirauatakasaaki kãkitikata, isãpiretari sãpirenatxi atão inakari oerekiko. Itxari:

² —Teoso auïtetxi ininiãua ia auïtetxi atokokana. Ia auïtetxi kamari kiiniri imi ïtanorouatini ikapani. ³ Ipaniãtari initiriakori akiritinina ikemaïtxitakini kiiniriã ininina ikapani. Txamari ikemaïtxitakini !inirekari ikiiniriteë isinina. ⁴ Iuaïkana iokanatarari apanakini initiriakori ikemaïtxitakinimoni. “Hïtxanako: ‘Nipokori iposopeka. Nokapekari kema auïte, kema auïte ãkiri pakini. Païpepokori. Imakinika niposotapekari. Hïsapoka kiinirimoni,’ hïtxanako.” Ininiã ninoa kamari isãkire iaõka.

⁵ —Txamari ikemaïtxitakini !imaãkapiretarina. Iparïkamoni isana. ãtikaka sari kikiomoni. Apanakini sari ãtiãtaã tiitxi ivëtxitinimoni. ⁶ Apanakinipekana maïkapena initiriakori, noropata, oka itxapena. ⁷ Iua auïtetxi ikara inakariene ikenakotakasaaki, iteene inaiataua. Iokanatarari isotatoneakori ninoamoni. Ininiã okapena ninoa kokanirini. Iotikapirina ninoa aapoko.

⁸ —Eereka iua auïtetxi akiritana apanakini initiriakori: “Kiiniri namarite ïtanorouatini pirena iposopeka. Txamari merepitipanika nikemaïtxitakini !erekana. ⁹ Iua atoko ininiã, hïsa ahoaãtaã, kãkiti napanakiniãtaã. Hïkemaïtxitana ikinimane haõkitakini,” itxana ninoa.

¹⁰ —Ininiã isana ahoaãtaã. Ikemaïtxitana ikinimane aõkitakini. Apotiitarina kãkiti itanapoko. Maerekani, erekarini pakini apotiitana. Anikana kiinirimoni, ininiã kãkitipokoni xãpoãkata.

¹¹ —Iua auïtetxi atamatana ikemaïtxitakini. Atamatari kiki mãkatxi ïtanorouatikosaaki ieretaãkori mieretaãkati. ¹² Ininiã akiritari iua: “Nimoianari, kiãtokopa pïroã naapoko, kotxi mãkatxi ïtanorouatikosaaki ieretaãkori kona pieretaka?” Iua kona kasãkireri.

¹³ —Ininiã iua auĩtetxi paniãtari initiriakori: “Himaĩkariko. Hĩaxirrikariko iuako, ikitinota pakini, anika hĩtxariko mapara. Piãkatximoni hõkariko,” itxana initiriakori. Iuaãtaã kãkiti txiapatiniãtaã, kãkiti akerakitatsiriĩtiniãtaã.

¹⁴ Xesosi xipokapiretari isãpirena.

—Itomaneri kemaĩtxitakoni. Txamari poiãoka mereẽkoni —itxana ninoamoni.

*Homano Auĩte Īkitxitiko Pirena
(Marko 12.13-17; Arókasi 20.19-26)*

¹⁵ Ninoa pariseoakori sipeka. Eereka apotiitauana. Imisãkiretakakana. Ixinikaxitinãtarina:

—Anirekari Xesosi kerokiniri isãkire, aãpoĩtiniri ĩkapani. Ininiã kiãtokopa atxtari apimainiri ikerokiniri ĩkapani? —itxanãtakakana.

¹⁶ Ininiã ninoa pariseoakori paniãtana ãtikaka ninoa oerekakini, apaka ãtikaka Erotxi sãkire auĩãkani, Xesosimoni isinina ĩkapani. Ininiã isana iuamoni. Imisãkiretarina. Pariseo sãkire iaõka isãpiretana.

—Koerekareri, aimarotari atãoenepitikara pisãkire. Atãoenepitikara pisãpiretari Teoso nireẽkiti akamini ĩkapani. Pite na pĩkarauata xatiki kãkiti sãkire xika. Ātinoka pisãkire pisãpireta ikinakariti kãkitimoni. Apanakinimoni pisãpiretakiti iuatxikana pisãpiretari apanakininapemoni. ¹⁷ Ininiã pisãpiretaua. Atãokani txineiro asikini Homanoakori auĩtemoni, Sesa inakorimoni? Apakata amasikakaniri iuamoni? —itxarina iua.

¹⁸ Xesosi imarotari ninoa nirekari ikerokiniri isãkire. Ininiãkara itxana:

—Kinirepa hinirekari nikerokiniri nisãkire? Kona erekai hĩte. Hĩsãkirauatakasaaki, kãkiti erekarini atoko hĩtxa, txamari maerekati hĩkama. ¹⁹ Hõerekano txineiro ota Homano auĩte asikini ĩkapani.

Ininiã iminarona txineiro ota.

²⁰ —Kisanõkapa ia? Kiuãkapa aua uai? —itxana ninoa.

²¹ —Ari, Homano auĩte —itxana.

—Ininiãkara hĩsakariko Sesamoni iua nakiti. Hĩsakariko Teosomoni iua nakiti —Xesosi txana ninoa.

²² Ikara apakapapirenatxi ikenakotakasaakina itsorĩkaãtana.

—Paimatireri iua —itxanãtakakana.

Ininiã itakanaparina, sipeka itxana.

*Ipĩkari Ōkitikiniua Mauikakoni
(Marko 12.18-27; Arókasi 20.27-40)*

²³ Iua õtisaakipeka ãtikaka satoseo apoka Xesosimoni. Satoseo inakoni !auikari ipĩkani iuaĩkana õkitikiniua.

²⁴ —Koerekareri, Moisesinira oerekari ia sãkiretxiti: “Kiki meenetipanika ipininiã, iua itari takaroko tikinitakoro. Iua itari keene ininiã, itakauãkatari amarini iua itarini ipĩpekarini uãka,” itxa Moisesini. ²⁵ Setxi itaritxiakori aua mitxi ĩkorapokoriti. Apia anekatakari ĩtaniriuata. Eereka ipĩpe meenetika, ininiã itari takaro iuani tikinitakito.

²⁶ Iua atokokana iua itari ipĩpe meenetika. Āti itari iuaĩkana takaro iuani tikinitakito. Txamari iua atokokana ipĩpe meenetika. Iua atokokana txaãpota ikinika itariakori.

²⁷ Eereka oa sito apaka opĩpe. ²⁸ Ininiã ipĩkani iuaĩkana õkitikasaakia iuaĩkana auãki ininina, ĩkiripa oĩtaniri aua oakata iusaaki? Kotxi ikinimane ninoa setxi itariakori takapekaro oa —itxarina iua.

²⁹ Ininiã Xesosi:

—Hĩte kerokari, kotxi !himarotari Teoso sãkire iõkatsopatakori. !Himarotari Teoso posotiire apaka. ³⁰ Ipĩkani iuaĩkana aua inakasaaki, kona ninoa ĩtaniriuataika. Teoso nitiriakori iaxitikini atokopeka itxanako. ³¹ Hĩte !auikari ipĩkani õkitikiniua iuaĩkana auãki inini. Atauako kona hãtatsopatapanikari Teoso sãpiretakiti hĩtemoni? Iara isãpiretai:

³² Apraõ, Isaki, Xakoo pakini Teosonekarano nota,

itxa Teoso. Ininiã Apraão, Isaki, Xakoo pakini auãkipanika itxana, kotxi auãki inakani Teosonera iua. Ninoa uatxa auãki inakani, kotxi kona ipikani Teosoneni Teoso —itxa Xesosi.

Iuusaaki kãkitipokoni kenakotari ikara Xesosi sãkire. ³³ Xesosi sãkire ikenakotakasaakina, itsorikaãtana, kotxi paimatireri Xesosi apakapapiretakiti satoseoakorimoni.

Teoso Paniãtakiti Apiari Akamini
(Marko 12.28-34)

³⁴ Xesosi iikiteritika apakapapiretari satoseo pimainiri, ininiã satoseo !ipimarauataika. Pariseoakori kenakotari ikara, ininiã apotiitauana. ³⁵ Pariseo, Moisesi sãkire oerekakari, iua nirekamari Xesosi kerokiniri isãkire. Ininiã ipimaãri:

³⁶ —Koerekareri, ikiripa Teoso paniãtakiti apiari txataua? Kipa apiaerekata Teoso nireëkiti akamini? —itxa.

³⁷ Ininiã Xesosi apakapapiretari:

—“Pitiretariko Apiananiri piTeosone, ikinipoko pinireëkitiã, ikini pãkixinireë, ikinipoko pixinikakitiã pakini.” ³⁸ Ikara atoko inakari Teoso merepitipanika paniãtaua akamini. Ia ipaniãtakiti akamini apiari itxaua. ³⁹ Iuaikana Teoso paniãtaua. Ia ipaniãtakiti apaka apiari. Merepanika ipaniãtakiti akamini atoko itxa. “Piteka pitiretiniãua atoktxikana, pitiretariko ãti.” ⁴⁰ Itene atiretiniãri Teoso, itene atiretiniãri ãti, ininiã akamapitikari apanakini Teoso paniãtakiti, Moisesinimoni isãpiretakiti. Itene atiretiniãri Teoso, itene atiretiniãri ãti, ininiã akamapitikari Teoso sãkire sãpiretakani paniãtakiti apaka —Xesosi txari iua.

Teoso Mereëkiti Tavii Apika Mekaniri
(Marko 12.35-37; Arókasi 20.41-44)

⁴¹ Pariseoakori apotiitapanikaua inakasaaki, Xesosi pimaãna ninoa:

⁴² —Teoso mereëkiti pisãpiretano. Kiripa apika mekaniripa iua? —itxana ninoa.

Ninoa apakapapireta:

—Ari, Taviini apika mekanirira —itxana.

⁴³ Ininiã Xesosi:

—Ikara atoko ininiã, kinirepa Erekar Matamatakoti kamasãkiretari Tavii: “Teoso mereëkiti niauïte itxaua,” ina sãkiretini? ⁴⁴ Kotxi Tavii txari:

Apiananiri misãkiretari niauïte: “Nota kikomoni piitopãkiniritika nixipokariko pimokaiakariakori. Nikamariko ninoa pikiti pitakiniãtaã atoko ininiua,” Apiananiri txari niauïte,

itxa Taviini. ⁴⁵ Ininiã Tavii akiritari Teoso mereëkiti “niauïte.” Ikara atoko ininiã, kiãtokopa itxa Teoso mereëkiti Taviini apika mekaniri ininiãua? —Xesosi txari pariseoakori.

⁴⁶ Kona imarotarina, ininiã kona kasãkirena ninoa. Ikara eereka kona kãkiti pimarauataika Xesosimoni, kotxi ipikarina Xesosi imarore.

23

Xoteo Auïteakori Maerekani
(Marko 12.38-40; Arókasi 11.37-54; 20.45-46)

¹ Ininiã Xesosi misãkiretana imoianariakori, itomaneri kãkiti iuaã auakani apaka. ² Ia atoko isãpiretana:

—Kaiökatsoparerini, pariseoakori pakini, Moisesini sãkire oerekakani itxauana.

³ Ininiãra ikinika kaiökatsoparerini, pariseoakori pakini paniãtakiti hïkamako, kotxi ninoa sãpiretari Moisesini sãkire Teoso oerekakiti. Ikara erekari. Txamari kona ninoa kamari Moisesini paniãtakiti. Ikara !erekari. Ininiã ninoa kamakiti atoko !hïkamape. Kotxi isãkirena erekari, txamari ikamakitina !erekari. ⁴ Ninoa kaiökatsoparerini, pariseoakori pakini, kiki ia atoko inakari ninoa. Ia kiki takari iminani imoianariakori porikiã, txamari iuaka na xatiki nirekari iporikitiniri. Kaiökatsoparerini, pariseoakori pakini, ikara kiki atoko itxana. Ninoa paniãtakiti iua iminani atoko itxa.

⁵ —Pariseoakori kamari erekari apanakini atamatini ikapaninoka, ereka ininina apanakini uakatini ikapaninoka. Himarotari kākiti ieretakari Teoso sākire iōkat-sopatakori aākoana xapitikiri āki. Eereka iaxirikarina iteētaāna, iuakonotaāna pakini. Ninoa kaiōkatsoparerini, pariseoakori pakini takari aākoana mitari apanakini atamatini ikapaninoka. Paītanori itsarāpe imākana apanakini atamatini ikapani. ⁶ Kiinirisaaki ninoa nirekari kākiti potxitiniātaā iitopākinina. Aiko āki Xoteoakori apotiitiniātaāua inirekarina kākiti potxitiniātaā iitopākinina. ⁷ Apokaerekatarina okapiretikona ipax-itikona kienatxi vētxitikoātaā. Apokaerekatarina kākiti akiritinina: “Koerekareri” inikona.

⁸ —Txamari, ātinani hīte oereēkari txaua, Teoso mereēkitira iua. Koerekareri hiniko !hāuiritapeko, kotxi himakinikara hītaritakakaua. ⁹ Kona ikorapokoriti auakari “niri,” !hītxape, kotxi ātinani aīri auari iaxiti auakari. ¹⁰ Apaka apanakini akiritinii “aāuīte,” !hāuiritapeko, kotxi ātinani hīauīte. Teoso mereēkiti itxaua. ¹¹ Auītetxi pininiua pinirekiniā, apanakini nitiri atoko pitxauako. ¹² Iua “Auītetxi nitxaua,” inakari, Teoso txīkitakariko nitiritxi itxauako. Iua “Nitiritxi nitxaua,” inakari, Teoso txīkitakariko auītetxi itxauako.

Xoteo Auīteakori Misiritaākako
(Marko 12.40; Arókasi 11.37-44, 52; 20.47)

¹³ Iuaikana Xesosi sākirauata:

—Erepaniko hīte kaiōkatsoparerinii, pariseoakorii pakini. Hīsākire atxiīti erekari, txamari kona hīkamari hīsākire iaōka. Kinirāo iroākari apisapanika aapokotxi tore totakani atoko hītxa, kotxi hīte iotokakari kākiti Teoso sākire atāo auikini, ininiākara hīte iotokakari kākiti iroini Teoso auītetxi ininiātaāua. Hīte kona iroā. Apaka kona hīte auiritana kinirāo iroākani. ¹⁴ Erepaniko hīte kaiōkatsoparerinii, pariseoakorii pakini. Hīsākire atxiīti erekari, txamari kona hīkamari hīsākire iaōka. Hīte mixirikari tikinitakoro aapoko. Himisirienetana. Teosokata hīsākirauatakasaaki, itori sākiretxi hīkama apanakini, “paimatirena” inini ikapaninokara. Ikara xika himisiritiko apiatako.

¹⁵ —Erepaniko hīte kaiōkatsoparerinii, pariseoakorii pakini. Hīsākire atxiīti erekari, txamari kona hīkamari hīsākire iaōka. Hīte sari ōtakoxiti. Hīpiriātari kāuaāri. Imiriī ōtakoxiti hīsa, hīsākire auikakari hinitini ikapani. Ātinoka hīsākire auikakari auiniā, iuaritika hīsa iuaxiti. Eereka hōerekari iua ikinipoko himarotakiti. Eereka hīte maerekani xika, iua kiki maerekani apiatako. Isapitika hītekata maerekani misiritikoā-taā.

¹⁶ —Erepaniko hīte. Mōsiāreni atoko hītxa, iuaritika hinirekari hōerekiniri Teoso kimapore apanakinimoni. !Hīposotari. Hīte oerekari apanakini ia hīsākire: “‘Ia nikamapitikako’ pinakasaaki, Teoso misākiretiko aikoti pakiriuākatakasaaki, pimakamakaniāri, kona pimisiritaākako,” itxa hīte sākire. Iuaikana hīte sākire: “‘Nikamapitikariko,’ pinakasaaki, Teoso misākiretiko aikoti āki auakaro oro pakiriuākatakasaaki, pikamapitikariko pikamaenetakiti. Ikara pimakamakanisaaki, pimisiritaākako,” itxa hīte sākire.

¹⁷ —Hīte mōsiāreni atoko. Kona kiīkitei hīte. Īkiripa apiari? Orokani? Teoso misākiretiko aikotikani? Teoso misākiretiko aikoti apiari, kotxi oa oro aiko āki aua, ininiā aiko txīkitakaro oro Teoso nakito oniniāua.

¹⁸ —Hīte oerekari apanakini ia hīsākire apaka: “‘Nikamapitikariko’ pinakasaaki, Teosomoni sikakori takikoātaā pakiriuākatakasaaki, pikamaenetakiti pimakamakaniā, kona pimisiritaākako. ‘Nikamapitikako’, pinakasaaki, Teosomoni sikakori takikoātaā nopini takakori pakiriuākatakasaaki, pikamapitikariko pikamaenetakiti. Pimakanakanisaakiri, pimisiritaākako,” itxa hīte sākire.

¹⁹ Hīte mōsiāreni atoko hītxa. !Kiīkitei hīte. Īkiripa apiata? Sikakorikani? Sikakori takikoātaākani? Sikakori takikoātaā apiata, kotxi sikakori inopini takikosaaki, iusaakipeka Teoso nakitipeka. Ininiā sikakori takikoātaā txīkitakari sikakori Teoso nakiti ininiāua. ²⁰ Ininiā pisāpiretakasaakiri Teoso pikamaenetakiti, Teoso sikakori takikoātaā pakiriuākatiniā, iuatxikana iua nopini auakari pakiriuākata.

²¹ Pakiriuākatakasaakiri Teoso misākiretiko aikoti, iua atokotxikana pakiriuākatari Teoso, kotxi iua aiko āki aua. ²² Pakiriuākatakasaakiri Teoso tixine, ininiā iua atokotxikana pakiriuākatari Teoso topākini. Iua atokotxikana pakiriuākatari Teoso, kotxi Teoso topākini nopini iitopāka Teoso.

²³ —Erepaniko hīte kaiōkatsoparerinii, pariseoakorii pakini. Hīsākire atxiīti erekari, txamari kona hīkamari hīsākire iaōka. Ipixini hinakiti hīsikari Teosomoni. Tesi hītii auiniāi, hīsikari āti Teosomoni. Tesi txineiro ota auiniāi, hīsikari āto Teosomoni, hītxaāpota. Ikara hīkamakiti erekari. Nipokori koke, oteraā, erva tosi, komínio, axapitiki inakari, iuaritika ipixini hīsika Teosomoni. Ikara Teoso paniātakiti hīkamapitika. Txamari, Teoso paniātakiti apiari !hīkama, kotxi !hīkamari atāo apanakinimoni. ! Hiamonikana apanakini. Hīkamaenetakiti !hīkama. Ikinika Teoso paniātakiti hīkamako. ²⁴ Mōsiāreni atoko hītxaaua, iuaritika hinirekari hōerekiniri Teoso kimapore apanakinimoni. !Hīposotari. Himaktxakaro xikiri iāriā āki komokakaro, txamari hīxirapoataro kamero, kotxi Teoso paniātakiti poiāori hīkama, txamari ipaniātakiti apiari kona hīkama.

²⁵ —Erepaniko hīte kaiōkatsoparerinii, pariseoakorii pakini. Hīsākire atxiīti erekari, txamari kona hīkamari hīsākire iaōka. Hōeretari hīto maparakiri, txamari hākixinireē !erekari. Papotxinanii, patirenanii, paītirii. ²⁶ Hīte pariseoakorii, mōsiāreni atoko hītxa. Merepitipanika himaktxakariko maerekati hākixinire auakari, ininiā hīto erekatxikana. Hākixinire ereka ininiā, hīkamakiti ereka apaka.

²⁷ —Erepaniko hīte kaiōkatsoparerinii, pariseoakorii pakini. Hīsākire atxiīti erekari, txamari kona hīkamari hīsākire iaōka. Kai auīte iriko, ipīkari takikoātaā atoko hītxa. Mapara txīta kasarori minapaākapeka, ininiā mapara peerekari. Txamari, iriko āki ipinakari api, arakapoakatakari aua. ²⁸ Iua atokokanera hītxa. Kākiti uākatai hīte atāo inakaranoka kamakani hininiua, kotxi hinopini ererini hītxaaua. Txamari, hākixinire !ereri, kotxi maerekatinoka hīkama. Hīsākire atxiīti erekari, txamari kona hīkamari hīsākire iaōka —itxa Xesosi sākire.

*Xoteo Auīteakori Misiritiko
(Arókasi 11.47-51)*

²⁹ Iuaīkana Xesosi sākirauata:

—Erepaniko hīte kaiōkatsoparerinii, pariseoakorii pakini. Hīsākire atxiīti erekari, txamari kona hīkamari hīsākire iaōka. Hīkamari akauari Teoso sākire sāpiretakanini īkapani. Peereri akauari hīkama. Hīkamari akauari ipīkani atāo inakaranoka kamakani īkapani. Txīta himinapa akauariā. Aāui hītaka iuaātaā. ³⁰ Hītixari: “Kitxakapirīka aātokiriakorini okana Teoso sākire sāpiretakani. Atepitika auaākamako iusaaki, konimako ate okana ninoa,” hītxa. ³¹ Teoso sākire sāpiretakanini okakani mekaniriakori hītxaaua hīte. Kotxi hītekara txari: “Aātokiriakorini okana Teoso sākire sāpiretakani.” Hīte maerekati kamakani ninoa atokokana hītxa. ³² Hātokiriakorini mipotorikari Teoso sākire sāpiretakani okinina. Hīte xipokapanikanako ātikaka kaikotakani Teoso sākire sāpiretakani.

³³ —Imini atoko hītxa. Imini anaakori atoko hītxa hīte. Himisiritaākapitikako maerekani misiritikoātaā. Himitekini !auari. ³⁴ Ininiā nisāpiretai hīte. Niokanatapanikari hītemoni Teoso sākire sāpiretakani, Teoso iokanapirena imarotakani, korekererini pakini niokanata hītemoni. Txamari ātikaka hōka, aamina ipiriāmitakari nopini hītokakitana apanakini. Apanakinipekana hīxirokitata aiko Xoteo apotiitiniātaāua. Eereka hāsikatikinitana ninoa āti sitatxitimoni sikani, eereka āti sitatxitimoni, eereka āti sitatxitimoni hītxaāponāta ninoa hāsikatikinitini. ³⁵ Ininiā hīte misiritaākako ikinika atāo inakari kamakani okiko xika. Kitxakapirīka Apeo inakorini okapeēka. Atāo inakari kamakari iua. Ikinimane okapekoni tikinimoni okapeēka Sakariani, Parakia ākiri. Iua Sakariani okapeēka sikakori takikoātaā takote Teoso misākiretiko aikoti āki. ³⁶ Atāopitikara nisāpiretai hīte. Kākiti uatxa auakani apakapariko misirikaretxi ninoa erekarini okapekoni xika —itxa Xesosi sākire.

*Xerosareē Xesosi Tiretini
(Arókasi 13.31-35)*

³⁷ Iuaĩkana Xesosi sãkirauata:

—Xerosareẽ auakanii, Xerosareẽ auakanii, hĩte okapekana Teoso sãkire sãpiretakani. Kai soroã hĩkiporonakana ninoa hĩtemoni Teoso iokanatakini. Kaiãokatani ninirekamari ninĩkatini, patari oimiakori omĩkita patapi otakini atokokana nitxanakamaiko hĩte. Txamari !hãuiritano nota nĩkatini. ³⁸ Ikara atoko inakari xika haãpoko asikaãkako. Teoso !auaika hĩtekata. ³⁹ Nisãpiretai. Ia õti hãtamatanano, eereka !hãtamataikano. “Teoso takari erekari uaimoni ĩkarimoni, Apiananiri posotiireẽ ĩkarimoni,” hinakasaaki, iuasaakinanirako hãtamatanoko nota —itxa Xesosi.

24

Teoso Misãkiretiko Aikoti Irikiko
(Marko 13.1-2; Arókasi 21.5-6)

¹ Teoso misãkiretiko aikoti Xesosi potarikasaakipeka, imoianariakori apoka iuamoni. —Patamata. Peerepokori aikoniri —itxarina.

² Ininiã Xesosi:

—Ari, hãtamatatari ere aikoniri? Atãopitikara nisãpiretai hĩte. Koniko kai kaikotapani ãti kai nopini. Imakinika kai irikaãkako —itxana.

Misirikaretxi Apokaenetini
(Marko 13.3-13; Arókasi 21.7-19)

³ Iposo atoko Xesosi sari oxiratarimoni, Oriva inakorimoni. Iuaã topãka itxa. Imoianariakori sari iuamoni. Ninoanoka auari iuaãtaã.

—Pisãpiretaua kirisaakiparako aiko Teoso misãkiretiko irikataãkako. Natokopa ininiãparako ate imarotatari pite kaiama kanapirikape pinini? Natokopa ininiãparako aimarotatari itixi xipokini õti kaiamapeka inini õti? —itxarina Xesosi.

⁴ Ininiã Xesosi:

—Erepaniko. !Hãuiritapena apanakini misirienetini. ⁵ Kotxi apokako kãkiti itomaneri “Teoso mereẽkiti nitxaua nota,” inakani. Ninoa misirienetana itomaneri. ⁶ Hĩkenakopiretariko neenamataxi ene uaimoni, õtakoxiti apaka. Iuaritika !hĩpikarautape. Kotxi auapitikako neenamataxi. Txamari itixi xipokini õti !apokapanika. ⁷ Ikara inakari apisapanika, ãti uãka neenamauatako ãti uãkakata. Apanakini auĩte inirimanekata neenamauatako apanakini auĩtekata inirimane pakinikata. ãtiãtaã kãkiti inikoriãriko natxi. ãtiãtaã amianari inokanako kãkiti. ãtiãtaã itixi iakeẽkatakato. ⁸ Ikara atoko itxako misirikaretxi potarikini. Sito amarini tsii atoko itxako iuasaaki.

⁹ —Iuasaaki hĩte maĩkaãkako, himisiritiko ĩkapani. Iposo atoko oka hinaãkako. Nisãkire hãuikini xika ikinimane omanataiko hĩte. ¹⁰ Iuasaaki itomaneri !auikaikari Teoso sãkire. Itakanapapekarina Teoso kimapore. Imĩkapiritakakanako. Omanatakakanako. ¹¹ Apokako kãkiti “Nota Teoso sãkire sãpiretakari nitxaua,” inakari. Txamari kona atão. Ninoa misirienetanako itomaneri kãkiti. ¹² Kãkiti tiritiko poiãotako, kotxi maerekanitxi iarikako ikini itixitimoni. ¹³ Iuasaaki kãkiti mĩteenekiniãri misirikaretxi, imatakanapakaniãri Teoso sãkire, auapikako ãtipirika Teosokata. ¹⁴ Teoso iokanapirena erekari, Teoso auĩtetxi ininiãua, sãpiretaãkako ikini itixiti auakani, ikini kãkititi imarotini ĩkapani. Ikara inakari auaãka atokoikarako itixi xipokini õti apokako.

Iteene Maerekanitxi Apokini
(Marko 13.14-23; Arókasi 21.20-24)

¹⁵ Xesosi sãpirenauatapanika:

—Hĩte itikariko iteene maerekati kamakari timini aiko Teoso misãkiretiko ãki. Kitxakapirika Tanieo inakori, Teoso sãkire sãpiretakari, sãpiretapekari ikara ene. Hĩte ia atatsopatakani, himarotariko ikara. ¹⁶ Ikara atoko inakari hĩtikasaaki hĩte ĩkorapokoriti Xotẽia auakani, oxiratarimoni himitekako. ¹⁷ Ikara õti apokasaaki haãpoko nopini hãuiniã, katima hĩtxako himitekini. !Apakata haãpoko ãki hĩtii himaktxakini. ¹⁸ Kikio hĩparĩkauanãtakasaaki, hãapokomoni !hĩkanapiripe himãka hãpini ĩkapani. ¹⁹ Ikara õti apokasaaki, kamixironi, kaxitakareroni pakini iteene atatsiitariko. Pasãpaniri ninoa mitekini. ²⁰ Hamanaãriko Teoso katxĩkareri mauakani himitekini õtisaaki. Hamanaãriko

tomatiko òtisaaki ikara inakari mauakani ìkapani. ²¹ Kotxi ikara mitekatxi òtisaaki kākiti iteene atatsiitariko imisiritiko. Ikara òti apisa kākiti ìmarotari iteene imisiritiko. Itixi kamikosaakipanika !auari ikara atoko inakari misirikaretxi. Ikara mitekatxi òti napaāka atoko kākiti ìmarotaikari iteene imisiritiko. Ikara òti apiatako kākiti misiritiko. ²² Teoso poiāotakari iua òti ikinipoko kākiti mapinakani ìkapani. Ito òti ininiā, kākiti !auaika. Ipoiāotakari iua òti, kotxi itiretana kākiti imereēkini.

²³ —Iuasaakiko āti: “Ia kiki Teoso mereēkiti aiātapakiti inakari,” inakasaakii, !hāuikapiri. Ātipekana: “Ikira Teoso mereēkiti inakari,” inakasaakii, !hāuikapiri. ²⁴ Kotxi apokako kākiti paxirari kamakari, “Teoso mereēkiti hiātapakitino nota,” inakari, “Teoso sākire sāpiretakari nitxaua nota,” inakari. Ninoa kamariko posotiiretxi kākiti tsorik-itaātini ìkapani. Inirekarina kākiti Teoso mereēkini imisirienetinina. ²⁵ Hīkenakota. Nōtākikai hīte ikara inakari apokini òti apisa.

²⁶ —Hīte sāpiretikosaaki: “Hīkenakota. Teoso mereēkiti aiātapakiti āparaā makipakaniātaāpekarari,” hinikosaaki, !hīsipe iuaā. Hīsāpiretikosaaki: “Iriko ākirari iua,” hinikosaaki, kona hāuikapiri. ²⁷ Kotxi nota hītari iaxitikiri nikanapiriākasaaki, !ikara atokoni nitxa. Mēkokari atoko itxa nota hītari iaxitikiri nikanapiriākasaaki, kotxi mēkokari atokatxi pokīkinimoni imēkoka, isapitipo atokatxi ereēkokinimoni, ininiā ikinimane itikariko. Iua atokokana nota hītari iaxitikiri napokini. Ikinimane itikanoko nota. ²⁸ Aātamatakasaakiri maiori apotiitiniua, aimarotari ipīkari iuaātaā auini. Iua atokokana nota kanapiriākasaaki, ikinimane imarotari napokini.

Kākiti Itari Iaxitikiri Kanapiriini
(Marko 13.24-27; Arókasi 21.25-28)

²⁹ Xesosi sāpirenauatapanika:

—Apikomoni nisāpiretai nikanapiriini pirena. Iua inikoriākori napaka atoko, atokatxi piākako. Kasiri kona ponikaikako. Iōriki iaxitikero irikako. Iaxiti iōriki auiniātaā auakari iakeēkatakako. ³⁰ Iuasaaki Teoso takaōtxikare auako iaxiti, nota hītari iaxitikiri kaiamapeka uai nikanapiriini himarotini ìkapani. Ikara atoko inakasaaki, ikini kākītiti itixi auakani txiapatakako, kotxi ninoa atapanoko nota kākiti itari iaxitikiri katxiāri āki nikatxakaāpotini. Nitapararitika napoākatakako, kotxi ikinimane auīte nitxauako iuasaaki. Niotximerekata nikatxakaāpota. ³¹ Okenakotaākako koitxi mitaro, trōpetā inakoro. Iuasaakipekako niokanatana ninitiriakori itixi iaōka kākiti Teoso mereēkini apotiitakani ìkapani.

Piko Mina Pirena
(Marko 13.28-31; Arókasi 21.29-33)

³² Xesosi sāpirenauatapanika:

—Nisāpiretai sāpirenatxi atāo inakari oerekiko, piko mina pirena, nikanapiriini apiata himarotini ìkapani. Pooīoporipeka onakasaaki, otomorekasaaki, “Kamoī apokanapanoka,” hītxa. ³³ Iua atokokana, ikara misirikaretxi mixikanani nisāpiretakiti hītikasaaki, himarotapekariko nota kaiama kanapirikapeka ninini. ³⁴ Ia nisākire atāo. Itixi auakani lixipoka ikinipoko nisāpiretakiti mapokakani apisa. ³⁵ Iaxiti xipokapitikako. Īkoraxiti apaka xipokapitikako. Iuaritika nota sākire !ixipoka.

Kākiti !Imarotari Xesosi Apokini Manapi
(Marko 13.32-37; Arókasi 17.20-37)

³⁶ Xesosi sāpirenauatapanika:

—Kākiti !imarotari ikara òti, nota hītari iaxitikiri nikanapiriini òti. Teoso nitiriakori iaxitikini apaka !imarotari ikara òti. Nirinanira imarotari. ³⁷ Nota hītari iaxitikiri nikanapiriākasaaki, kitxakapirika Noee auakasaaki atoko itxako. ³⁸ Xirataātxi apisa ikinimane nipokota, iāta itxa. Kiki, sito itaniriuata. Ikara atokokanera itxa Noee maporo āki iereētini òti. ³⁹ Ikara apisa !imarotarina ipininina tīkane. Mokatanitika xirataātxi apoka, ikinikana xipoka itxana. Nota hītari iaxitikiri nikanapiriākasaaki, iua atokokanerako itxa, ininiā iposope hītchako.

⁴⁰ —Iuasaaki nikanapiriini õtisaaki, ipi kiki parĩkauanãta kikio. Teoso nitiri iaxitikiri anikariko ãti, ãti kaikota itxako. ⁴¹ Ipi sito atarokiri kamakani, ãto anikaãkako, ãto takanapaãkako. ⁴² Ininiã iposope hĩtxako, kotxi kona himarotari hĩauĩte kanapiriini õti. ⁴³ Hĩxinikariko. Kaapokori imarotaãkamariko kĩtiriri apokini õti, !imakamako. ! Auiritamariko kĩtiriri anikiniri itii. ⁴⁴ Kĩtiriri apoka kãkiti miãtapakinitipanika. Iua atokokanerako nota apokako himimarotakinitipanikarako. Ininiã iposope hĩtxako nota hĩtari iaxitikiri hiãtapini —itxa Xesosi sãkire.

Nitiritxi Erekarĩ, Nitiritxi Maerekati Pakini
(Arókasi 12.41-48)

⁴⁵ —Ininiã Teoso nitiriakori erekarini hĩtxauako. Nisãpiretai nitiritxi kimaroreri inakari, kotxi iua kĩpitari ipatrãote sãkire. Iuakara ipatrãote paniãta, apanakini iniritiakori inĩkatini ĩkapani. Isikakienatana ipatrãote nitiriakori, nipokori sikiko manapi. ⁴⁶ Iua initiri poxokoniuata ipatrãote paniãtakiti iaõka ikaminiã, ipatrãote apokasaaki iposope itxa. ⁴⁷ Atãopitikara nitxai hĩte. Iua patrão paniãtariko iua initiri ikinika inakiti inĩkatini ĩkapani. ⁴⁸ Nitiritxi maerekatipekana xinikari: “!Katimari ikanapiriã nipatrãote,” itxa. ⁴⁹ Ininiã apanakini nitiritxi ixiroka. Inipokota, iãta poãtakanikata. ⁵⁰ Ininiã ipatrãote kanapiriãko imiãtapakinitipanika. Ikanapiriãko initiri mimarotakinitipanika. ⁵¹ Ininiã ipatrãote xirokitatariko aãpitsã. Iposo atoko imisiritaãkako maerekanikata, “Erekapitikaua ate,” inakanikata. Iuaã kãkiti txiapata, akatsatsiriĩtaua ãtipirika. Ininiã ikara nitiritxi maerekati atoko kona hĩtxape —itxa Xesosi sãkire.

25

Tesi ãtokoroakoro Pirena

¹ Xesosi sãpirenauatapanika:

—Ia nisãpirena oerekai Teoso auĩtetxi ininiãua. Tesi ãtokoroakoro kosekari tirikapi. Isana kimaporiã. Iãtaparina ipatrãotena. Iua inapanikako kiinirimoni ĩtanorouatini ĩkapani. ² Sĩko ãtokoro kiĩkiterini, sĩko miĩkiteni. ³ Miĩkiteni anikari tirikapi koana, txamari !anikarina tirikapiã. ⁴ Kiĩkiterini anikari tirikapi koana. Apaka anikarina tirikapiã. ⁵ Ipatrãotena !katimari apokini. Ininiã itaponoka ininiãna, imakanãtana.

⁶ —Apanĩkanõka ikenakotarina: “Apokanapanoka. Hĩsapoka. Hãpiãkatari.”

⁷ —Ininiã ãtokoroakoro õkitikaua, tirikapi iopotokaka, sa itxana. ⁸ Ninoa miĩkiteni amanaãri kiĩkiterini tirikapiãte, kotxi miĩkiteni tirikapite oakaarita.

⁹ —Kiĩkiterini apakapapiretana: “Kona. Tirikapiã ate nakiti !apakata hĩte ĩkapani. Ate ĩkapaninokara apakata. Hĩsa tirikapiã vẽxtitakarimoni. Hiamotariko.”

¹⁰ —Ininiã ninoa miĩkiteni sari tirikapiã iamotinina. Ninoa sikasaaki, ipatrãotena apoka. ãtokoroakoro iposope inakani ĩroã iuakata aapokotxi ãki ĩtanorouatakari kiiniritiã. Itore totaãka.

¹¹ —Eereka ãtokoroakoro tirikapiã amotakani kanapiriã. Ninoa akirita: “Patrão, patrão, pimatakakinoua itore aĩroini ĩkapani,” itxana.

¹² —Ipatrãotena apakapapireta: “Hĩsipeka. Atão nisãpiretai. !Nimarotai hĩte.”

¹³ Xesosi sãkirauata:

—Erepaniko. Iposope hĩtxako, kotxi !himarotari nota hĩtari iaxitikiri kanapiriini õti. ! Himarotari amonikitaauako napokini —itxa Xesosi.

Ipi ãti Pakini Nitiritxiakori
(Arókasi 19.11-27)

¹⁴ Xesosi sãpirenauatapanika:

—Nikanapiriini ia atoko itxapaniko. Kiki aiamatapeka õtakoxiti ãti itixitimoni isini ĩkapani. Ininiã akiritari iniritiakori. “Hinĩkatariko ikini nitii,” itxana. ¹⁵ Isikari initiri apia imaroretakari txineiro ota sĩko mio. ãti initiri isika txineiro ota ipi mio. ãti initiri poiãoka imarotakari ãtika mio txineiro ota isikari iua. Eereka sipe itxa.

¹⁶ —Sĩko mio apakapakari amotari tiitxi, eereka vẽxtita itxari. Ikara atoko ininiã apakaparo txineiro ota tesi mio. ¹⁷ Iua ipi ãti mio apakapakari iua atokokana itxa. Iua

apakaparo ipi ipi pakini mio txineiro ota. ¹⁸ Iua ātika mio txineiro ota apakapakari, ikisakari kipatxi, taka itxaro txineiro iua aariko āki. Ikataro ipatrāote txineirote.

¹⁹ —Eereka okananixiti inaka atoko ipatrāotena kanapiriā. Akiritana: “Kiātokopa hītxataro nitxineirote?” itxana. ²⁰ Iua sīko mio apakapakari minari tesi mio. Iua sāpiretari ipatrāote: “Patrāo, pite sikano sīko mio txineiro ota. Patamata. Napakapari apikomoni sīko mio txineiro ota pite ĩkapani,” itxa.

²¹ —Ipatrāote apakapapiretari: “Erekapitikai pite. Erekarini nitiritxi pitxaua. Erekarini pinīkatiniro nitxineirote. Erekapitikari pinīkatiniro poiāoka nisikini. Ininiā nauritaiko itomaneri pinīkatini. Ininiā pipoxokoniatako notakata,” itxa.

²² —Iua ipi mio ota apakapakari apoka. Iminaro ipi ipi pakini mio. Isāpiretari ipatrāote: “Patrāo, pite sikano ipi mio txineiro ota. Patamata. Apikomoni nota apakaparo ipi mio txineiro ota pite ĩkapani,” itxa.

²³ —“Erekapitikai pite. Erekarini nitiritxi pitxaua. Erekapitikari nitxineirote pinīkatini. Erekarini poiāoka pinīkatini. Ininiā itomane nitakanapako pinīkatini ĩkapani. Ininiā pipoxokoniatako notakata,” itxa.

²⁴ —Eereka iua ātika mio txineiro ota apakapakari apoka. Iua sāpiretari ipatrāote: “Patrāo, nimarotai pite. Pataparaxinirei pite. Pite amotari pikiena, kotxi kona pite takarauata. Pite apari pikiena pimaparīkauatakaniātaā. ²⁵ Nipīkarauatiniā, nikipataro pitxineirote kipatxi āki. Patamata. Oia pitxineirote,” itxa.

²⁶ —“Nitiritxi maerekati iareri pitxaua pite. Pimarotari niamotiniri nikiena, kotxi Initakarauata. Pimarotari nota apari nikiena nimaparīkauatakaniātaā. ²⁷ Ikara atoko ininiā, pimanirekakaniāri piparīkauatini, kinirepa kona pisikatari nitxineirote pākomoni? Pisikaākamaroko, napakapamaroko apikomoni nitxineirote nikanapiriākasaaki,” itxa.

²⁸ Ininiā āti ipaniāta:

—“Pimakatxakariko iua mio ātika mio auakiti. Tesi mio txineiro ota auakitimoni pisika. ²⁹ Kotxi apikomoni isiākako iua itomaneri auakiti, ininiā apiata auinariko iua. Iua poiāoka auakiti, inakito mixirikaākako. ³⁰ Ia ninitiri iareri hōka mapara piākatximoni. Iuaā kākiti txiapata. Akerakitatsiriāta itsii xika.”

Ikinimane Apotiitaākako Xesosi Apisatoō

³¹ Apikomoni Xesosi sāpirenauata:

—Nota hītari iaxitikiri nikanapiriākasaaki auītetxi ninakasaakiua, ikinika Teoso nitiriakorikata, niitopākako auītetxi itopanere nopini. Peerekari iusaaki. Ikinimane paxitanoko nota. ³² Ikini uākati kākiti apotiitaākako nota apisatoō. Iusaaki nikaiarikitatanako ninoa. Soti auīte, kapra pakini piratakari ipiraakori koketaniua ikaiarikitatini atokokanera, nota hītari iaxitikiri kaiarikitatana ikinimane kākiti. ³³ Pirātxi piratakari takiniri soti auīte ikikomoni, itakiniri kapra isanaremoni, iua atokokanera nota hītari iaxitikiri takari kākiti erekarini nikikomoni. Kākiti maerekani nitaka nisanaremoni.

³⁴ —Eereka nota kākiti auīte txanako ninoa kākiti erekarini nikikomoni auakani: “Niri sikari erekarini hītemoni. Hina. Hīroā auītetxi nininiātaāua. Ia auītetxi nininiātaāua maiamatapeēkaika hīte ĩkapani itixi kamikosaakipeka. ³⁵ Mitxipeka ninatxitakasaaki, hīte sikakienatapekano nota. Niposonatakasaaki, āparaā hīsikapekano. Āti itixiti nīkasaaki, hīte apakapapekano nota. ³⁶ Nimamākanisaaki, mākatxi hīsikapekano. Namianatakasaaki, hinīkatapekano. Kateia āki nauakasaaki, himotikaētapekano. Ininiā hīroā,” nota kākiti auīte txanako kākiti erekarini.

³⁷ —Ininiā kākiti atāo inakari kamakani apakapapiretariko: “Apiananiri, kirisaakipa pinatxitakasaaki, asikakienatai? Kirisaakipa piposonatakasaaki, āparaā asikai? ³⁸ Kirisaakipa āti itixiti pīkasaaki, āpapakapai? Kirisaakipa pimamākanisaaki, mākatxi asikai? ³⁹ Kirisaakipa pamianatakasaaki, anīkatai? Kirisaakipa kateia āki pauakasaaki, amotikaētai?” itxanonako nota.

⁴⁰ —Ininiā nota kākiti auīte apakapapiretanako: “Atāopitikara nitxai hīte. Kākiti poiāori, nisākire auīākari, hītiretiniā, iusaaki nota hītiretini atokokana hītiretari,” nitxanako ninoa.

⁴¹—Iuasaaki nitxanako nisanaremoni auakani: “Hīsipeka. Teoso misiritaiko hīte, kotxi !hīkīpitari iua sākire. Hīsipeka arikatxi maxipokatimoni. Teoso kamari iua arikatxi, Satanasi misiritikoātaā tīkane, Satanasi nitiriakori misiritikoātaā tīkane. Hīsipeka iuamoni. ⁴² Kotxi ninatxitakasaaki nipokori !hīsikano. Niposonatakasaaki, āparaā ! hīsikano. ⁴³ Āti itixiti nīkasaaki, !hinirekano haāpoko napokini. Nimamākanisaaki, kona mākatxi !hīsikano. Namianatakasaaki, !hinīkatano. Kateia āki nauakasaaki, ! himotikaētano,” itxanako kākiti maerekani.

⁴⁴ —Ininiā ninoa apakapapiretariko: “Apiananiri, pinatxitakasaaki, pi- pisonatakasaaki, pamianatakasaaki, pimamākanisaaki, kateia āki pauakasaaki, āti itixiti pīkasaaki, kirisaakipa ate !apakapai?” maerekani txanoko nota.

⁴⁵ —Ininiā nota kākiti auīte apakapapiretanako ninoa: “Atāopitikara nitxai hīte. Himanirekakanisaakiri hītiretiniri kākiti poiāori nisākire auīākari, iuasaaki !hinirekari nota hītiretini,” nitxanako ninoa.

⁴⁶ —Ininiā Teoso iokanatanako ninoa maerekani kamakani misiritikoātaā. Iuaātaā ninoa misiritaākapikako. Imisiritikona kona xipokaikako. Kākiti atāo inakarinko kamakani auapininiika imaxipopekaniika Teosokata —itxa Xesosi.

26

Xesosi Okaenetiko Pirena

(Marko 14.1-2; Arókasi 22.1-2; Xoão 11.45-57)

¹ Ikara inakari isāpiretaka atoko, Xesosi misākiretana imoianariakori:

² —Hīte imarotari ipi ōti napaka atoko aua Páskoa inakori kiiniriti. Iua kiiniriti auakasaaki nota hītari iaxitikiri nisikaākako nimokaiakariakorimoni. Aamina ipiriāmi- takari nopini nitakaākako. Iua atoko ipina nitxako —Xesosi txana imoianariakori.

³ Iuasaaki sasetotxi auīteakori, kaiōkatsopareriakori, kiomātxiakori pakini apotiitaua. Sasetotxi auīte apiatakari Kaipasi inakori aapoko āki apotiitauana. ⁴ Imapapiretarina Xesosi imaīkinina īkapani. Inirekarina Xesosi imaīkinina apanakini mimarotakinītika. Imisākiretakakana Xesosi okinina īkapani.

⁵ —Kiinirisaaki !amaīkapaniri. Amaīkiniāri, apanakini kākiti naiatamaua ate — itxakakana.

Sito Kamariāro Mīkaro

(Marko 14.3-9; Xoão 12.1-8)

⁶ Xesosi auanāta aapokotxi Petánia inakoriātaā. Isari Simão inakori aapokomoni. Iua Simão mitxi amianatakari, maere matati. Eereka erekapekari. ⁷ Simão aapoko Xesosi auakasaaki, sito apoka iuamoni. Ominari kopitipaki kai kamakori, kai arapástiro inakori. Kopitipaki xāpoka kamariāro. Oa pakaronero. Xesosi nipokonātakasaaki, oa sito kitakaro kamariāro ikiiā.

⁸ Imoianariakori itikari Xesosi kiiā okitakiniro, ininiā ninoa naiataua:

—Kinirepa oa ioanataro kamariāro? ⁹ Kinirepa kona ovētxitataro? Ovētxitaākamaroko oāpakapamaroko txineiro ito, matxineirotenimonikari osikini īkapani —itxakakana.

¹⁰ Xesosi imarotari ninoa ikara atoko ininina.

—Kinirepa homanataro oia sito? Erekari okaminano notamoni. ¹¹ Auapikanako matxineiroteni hītekata. Kona nota auapani hītekata. ¹² Oia kitakaro kamariāro nikiiā, nota iposope ninini nikatiko apisa. ¹³ Atāo nisāpiretai hīte. Teoso iokanapirena erekari sāpiretikoātaā ikini itixiti, isāpiretaākako apaka oia sito kitakiniro kamariāro nikiiā, ininiā kākiti ikini itixiti auakani xinikapikaro oa —Xesosi txana ninoa.

Xotasi Sari Sasetotxi Auīteakorimoni

(Marko 14.10-11; Arókasi 22.3-6)

¹⁴ Eereka Xesosi moianari Xotasi Isikariotxi inakori sari sasetotxi auīteakorimoni.

¹⁵ —Xesosi nisikiniāi hītemoni, kiripa hīte sikano nota? —itxana ninoa.

Ininiā ninoa:

—Asikaiko trīta txineiro ota pirata kamakoro —itxana ninoa.

Ininiã iikitxitarina. ¹⁶ Eereka Xotasi iätapari Xesosi poiãonoka kãkitikata auakasaaki, imikapiritiniri ikapani.

Páskoa Kiiniriti Kamiko
(Marko 14.12-21; Arókasi 22.7-13)

¹⁷ Pão miãtiãkati nikiko kiiniriti potorikini õti, Xesosi moianariakori apoka iuamoni. —Namonipa ate maiamatari Páskoa kiiniriti pite ikapani? —itxarina iua.

¹⁸ —Hisa sitatximoni. Nisãpiretakiti iaõka hinitari kiki. Hãpokasaakiri, hĩtxariko iua: “Koerekareri txai, ipinini tikane kaiamapeka. Ikamariko kiiniri Páskoa inakori pite apoko imoianariakorikata,” hĩtxako.

¹⁹ Ininiã imoianariakori kamari Xesosi paniãtakiti iaõka. Imaiamatari ikinika kiiniri ikapani.

²⁰ Ìkanõkapeka inakasaaki, Xesosi imoianariakorikata topãka inipokotinina ikapani.

²¹ Inipokotakasaakina, Xesosi txana:

—Atão nisãpiretai hĩte. Ætika hĩte sauaki mikapiritanoko nota.

²² Ininiã imoianariakori tsorĩkaãta. Iteene imatinaniuatana. Æti pimaãri:

—Apiananiri, atauako notakani?

Iua atokokana ãtipekana:

—Apiananiri, atauako notakani?

Ikara atoko itxanãtana ikinikana, ipimaaãpotinirina Xesosi. ²³ Ininiã Xesosi apakapapiretana:

—Ia tiitxiã notakata nikakari mikapiritanoko. ²⁴ Nota hĩtari iaxitikiri okaãkako. Teoso sãkire iõkatsopatakori sãpiretapekari nipinini tikane. Nota hĩtari iaxitikiri mikapiritakari iteene misiritaãkako. Erekamariko maponaniãkatika inaãkamako.

²⁵ Ininiã Xotasi kamikapirireri misãkiretari Xesosi:

—Koerekareri, atauako notakani?

Xesosi apakapapiretari:

—Ari, pitepitikara.

Xesosi Ìto, Iarẽka Pakini
(Marko 14.22-26; Arókasi 22.14-23; 1 Korĩto 11.23-25)

²⁶ Inipokonãtakasaakina, Xesosi kosekari komiri. Imisãkiretari Teoso:

—Erekapitikari ia komiri pisikakiti atemoni —itxa.

Eereka imaxinĩkitari, sika itxari imoianariakorimoni.

—Apakapa, nika hĩtxako. Ia niĩto —itxana.

²⁷ Eereka ikosekari iãkoanãtxi iãriã auini. Imisãkiretari Teoso:

—Erekapitikari ia iãriã pisikakiti atemoni —itxa.

Eereka sika itxari iãkoanãtxi ninoamoni:

—Hĩkinika hiãtariko. ²⁸ Ia niarẽka xiketakari makãtxakariko kaiãopokori kãkiti maerekani. Teoso sãpiretapekari kãkiti ikamaenetakiti amaneri kãkiti ikapani. Ia niarẽka oerekari kãkiti, Teoso kamapekari ikamaenetakiti. ²⁹ Atão nisãpiretai. ! Niãtaikaroko ovapeẽ, Teoso auĩtetxi ininiãtaãua nimapokakanisaaki. Iuaã napokasaaki niãtari. Amaneri iãriãti niãtako hĩtekata —itxana imoianariakori.

³⁰ Xipoka atoko ixikaretarina xikari Teoso ikapani. Eereka isana oxiratarimoni Oriva inakorimoni.

Xesosi Sãpiretari Petro Kipatiniri Iua
(Marko 14.27-31; Arókasi 22.31-34; Xoão 13.36-38)

³¹ Iuaã Xesosi misãkiretana imoianariakori:

—Ia ìkanõkati hĩkinika hĩte takanapanoko nota, kotxi Teoso sãkire iõkatsopatakori sãpiretapekari ikara atoko inakari. Itxari:

Nokariko soti auĩte piratakari, ininiã ikinika ipiraakori iarikitatako,

itxa Teoso sãkire iõkatsopatakori. ³² Ininiã eereka nota nipinaãka atoko, iuaĩkana nõkitikaãkaua atoko, nisako hĩte apisa Karirẽiamoni —itxa.

³³ Ininiã Petro apakapapiretari:

—Nota !nitakanapai pite. Atxiïti ikinimane takanapai, iuaritika kona nota takanapai —itxa.

³⁴ Ininiã Xesosi:

—Atão nisãpiretai. Ia ïkanõkati patari sãkirauatini apisapanikako, “!Nimarotari iua,” pitxanoko ipi ãti pakinikata.

³⁵ Ininiã Petro:

—Ikara atoko !nitxapanii pite. Nikipatinii apisapanikamako, nipinamako. Ikinika Xesosi moianariakori ikara atoko itxana.

*Xesosi Misãkiretiniri Teoso Xetsẽmani Inakoriãtaã
(Marko 14.32-42; Arõkasi 22.39-46)*

³⁶ Eereka Xesosi sari imoianariakorikata Xetsẽmani inakoriãtaã. Xesosi:

—Uai hïitopãka. Ikiraã nisako Teoso nimisãkiretini ïkapani —itxa Xesosi.

³⁷ Anikari Petro, Sepeteo anaakori ipi pakini iuakata isinina. Iuaã Xesosi tsoriãkãnãta, imaromaxiretari. ³⁸ Imisãkiretana ninoa:

—Nixinire imaromaxiretari. Iteene nimaxire, ininiã okaaritano. Uai hïkaikota. Araõkire hïtxako —itxana ninoa.

³⁹ Apikomoni isa, pamaka itxa, misãkireta itxari Teoso:

—Niri, atauako apakata pimakatxakiniri nimisiritiko akamoni ïkari? Kona ninirekari natatsiirauatini. Iuaritika pite nirekiniãri, ininiã nota apaka nirekari —itxari Teoso.

⁴⁰ Iuasaaki ikanapiriã ipi ãti imoianariakori auiniãtaã. Ninoa imakanãta:

—Petro, atauako kona hïte mïteenekari hïtikapokotini ãto oaranoka? ⁴¹ Erepaniko. Hinirekasaakiri maerekati hïkamini, !hïkamapiri. Araõkire hïtxako. Himisãkiretariko Teoso, ininiã !hïkamari maerekati. Kãkiti xinire atxiïti !inirekari maerekati ikamini. Txamari kãkiti ïto tapara poiãoka, ininiã ikamari maerekati. Ininiã erepaniko —Xesosi txari Petro.

⁴² Iuaïkana isa apikomoni Teoso imisãkiretini ïkapani:

—Niri, pinirekiniãri natatsiitiniri nimisiritiko akamoni ïkari, ininiã nikamapitkariko pinirekakiti —itxari Teoso.

⁴³ Iuaïkana ikanapiriã imoianariakorimoni. Imakanãtapanikana. Itaponoka itxana. Kona iposotarina ikoatinina. ⁴⁴ Iuaïkana Xesosi takanapana, iuaïkana ïkanapiriã iuaãtaãkana. Iuaïkana misãkireta itxari Teoso. Mitxi atokokana itxa isãkire.

⁴⁵ Iuaïkana ikanapiriã imoianariakorimoni:

—Himakanãtapanika? Hïtomanãtapanika? Nisikiko manapi apopeka. Nota hïtari iaxitikiri nimïkapiritaãka maerekanimoni nisikiko, inireëkitina ikaminina ïkapani.

⁴⁶ Hõkitikaua. Masipeka. Hãtapa. Ikiraã ina nota mïkapiritakari —itxana ninoa.

Xesosi Maïkiko Pirena

(Marko 14.43-50; Arõkasi 22.47-53; Xoão 18.1-11)

⁴⁷ Xesosi sãkirauanãtapanika inakasaaki, Xotasi, Xesosi mitxi moianari, apoka. Iuakata ina itomaneri kãkiti, saasara mïkani, piriri mïkani pakini. Sasetotxi auïteakori, kiomãtxiakori pakini iokanatana ninoa. ⁴⁸ Iua Xotasi kamïkapirireri sãpiretapekana ninoa:

—Iuapitipanikarako napitxokapaniko. Himaïkariko iua napitxokakiti.

⁴⁹ Xotasi apoka. Xesosimonipitipo isa.

—Ereëkai koerekareri.

Eereka apitxoka itxari. ⁵⁰ Ininiã Xesosi txari Xotasi:

—Nitiretakiti, pikamariko pinirekakiti. Nauritai —itxari.

Iuasaakipeka Xotasikata sikani sakata Xesosimoni, maïka itxarina. ⁵¹ ãti Xesosi moianari kosekaro saasara. Isauaãkatari sasetotxi auïte apiatakari nitiri. Itsotakakïpitatari.

⁵² Ininiã Xesosi txari:

—Pitaka saasara mitxi oãuiniãtaã. !Pineenamauatape. Ikeekotxi himaïkiniã, ãti õti hïpinako ikeekotxi xika. ⁵³ !Pimarotari niposotiire. Nota nirekiniãri, nakiritari niri moianatinino nota. Nakiritiniãri, iuasaakipeka iua iokanatamariko seï mio initiriakori nota imakatzakinina ïkapani. ⁵⁴ Kona nakiritari niri, kotxi Teoso sãkire iõkatsopatakori sãpiretapekari nimaïkiko tïkane ia atoko inakari.

⁵⁵ Iuasaaki Xesosi misãkiretana iuamoni ïkani:

—Kinirepa himinari saasara, piriri pakini himaïkinino ïkapani? !Kiïtirino nota. ! Kikeekono nota. Ikiniõtika niitopãka Teoso misãkiretiko aikoti ãki noerekinii hïte. Iuasaaki kona himaïkano. ⁵⁶ Ia atoko himaïkano, kotxi kitxakapirïka Teoso sãkire sãpiretakani iøkatsopatapekari ia atoko himaïkinino. Ininiã Teoso sãkire iøkatsopatakori iaõka uatxa apokapeka —itxa Xesosi. Iuasaakipeka Xesosi moianariakori asikari iua, miteka itxana.

Xesosi Xoteo Auïteakori Apisatoõ

(Marko 14.53-65; Arókasi 22.66-71; Xoão 18.12-14, 19-24)

⁵⁷ Ninoa Xesosi maïkakani anikari Xesosi Kaipasi aapokomoni. Iua Kaipasi sasetotxi auïte apiatakari itxaua. Iuaãtaã kaiøkatsopareriakori, kiomãtxiakori pakini apoti-itapekua iuasaaki. ⁵⁸ Ninoa anikasaakiri Xesosi, Petro sari Xesosi tikini. Ikira atoko auãponãta. Sasetotxi auïte apiatakari aapoko takote isa. Iïroã pirikere ãki. Iitopãka Kaipasi nitiriakorikata. Kiatokopa inaãkapani Xesosi, ininiãra isa Xesosi tikini imarotini ïkapani.

⁵⁹ Kaipasi aapoko ãki Sasetotxi auïteakori, kiomãtxiakori, ikinika Xoteo auïteakori pakini nitana kãkiti aãpirena kamakani Xesosi okinina ïkapani. ⁶⁰ Itori kãkiti sãpiretari aãpirena Xesosi ikamapiretinina. Txamari ixika !auari Xesosi okinina ïkapani.

Eereka apokana ipi aãpirena kamakani. ⁶¹ Ninoa txari:

—Ia kiki txari: “Nota posotari aiko Teoso misãkiretiko nirikini. Ipi ãti õtisaaki nuposotari iuaïkana nõkitikiniri,” itxa isãkire.

Kona atão ninoa sãkire. ⁶² Sasetotxi auïte apiatakari õkitikaua.

—Kona papakapiretari pitemoni apoïrauatakani? Atãokani piposotari ikara atoko pikamini? —itxari Xesosi.

⁶³ Xesosi !kasãkireri. Ininiã sasetotxi auïte apiatakari iuaïkana misãkiretari Xesosi:

—Uatxa nipimaãi Teoso mipïkati apisatoõ. Atãonani pisãpiretaua. Pite, Teoso mereëkiti pitxataua? Teoso ãkirikai pite? —itxari Xesosi, kotxi inirekari Xesosi kerokiniri isãkire.

⁶⁴ —Ari, iuapitïkarano. Nisãpiretaiko hïte hïkinika. Hãtamatariko kãkiti itari iaxitikiri topãkini Kaposotiireri kikomoni. Hãtapariko kãkiti itari iaxitikiri uai apokaãpotini katxiãri ãki —Xesosi txana ninoa.

⁶⁵ Sasetotxi auïte apiatakari kenakotari ikara Xesosi sãkire. Iuasaakipeka iua mat-sorãkari imãka, kotxi kona xatiki ipotxitari Xesosi sãkire.

—Maerekati isãkire: “Teoso ãkirirano,” itxa. !Anirekaikari apanakini kamapiretiniri Xesosi. Uatxaika hïkenakotapekari isãkire maerekati. ⁶⁶ Kiãtokopa atxatari Xesosi? —itxana ninoa.

—Ixika auapeka ipinini ïkapani ininiã uatxa okaãkapitikako —ninoa txari iua.

⁶⁷ Eereka ikiisokatoõtarina. Iãsokarina. Apanakini aritoõtari Xesosi.

⁶⁸ —Pite Teoso mereëkiti pininiãua, pisãpiretaua, kipa aritai? —itxarina iua.

Inapetarina.

Petro Kipatari Xesosi Imarotini

(Marko 14.66-72; Arókasi 22.54-62; Xoão 18.15-18, 25-27)

⁶⁹ Iuasaaki Petro topãkanãta mapara pirikeri ãki. ãtokoro Kaipasi nitero sari iuamoni. —Pite Xesosi Kariréiakiri moianaripitïkarai —otxari iua.

⁷⁰ Txamari iua kipatari ikinimane apisatoõ.

—!Nimarotari ikara atoko pinanãtakiti.

⁷¹ Ininiã isa pirikeri ïroãnakikomoni. Iuaã ãto ãtokoropekana Kaipasi nitero amatatari iua. Ininiã osãpiretana kãkiti iuaã auakani:

—Xesosi Nasareekiri moianaripitïkara ikira —otxa.

⁷² Iuaïkana ikipatari:

—Teoso imarotari iua kiki nimimarotakani —itxa.

⁷³ Eereka païtiki atoko kikiãkini iuaã auakani sari Petromoni:

—Pite atãopitika iua moianaripitïkarai, kotxi pisãkire ipinimoni. Kãkiti Kariréiakiri sãkire atokokana, Xesosi sãkire atokokana pitxa pite sãkire —ninoa txari Petro.

⁷⁴ Ininiã Petro apakapapiretana:

—Atão nisãkire minakaniãua Teoso misiritanoko. Nisãkire atãopitika. !Nimarotari iua kiki —itxama.

Iuasaakipeka patari sãkirauata. ⁷⁵ Ikara ikenakotakasaaki, Petro xinikari Xesosi sãkire, kotxi mitxiipe Xesosi txari iua: “Patari sãkirauatini apisapanikako, ipi ãti pakinikata, !Nimarotari iua,’ pitxanoko.” Ininiã Petro sipeka. Itxiapakata.

27

Xesosi Pirato Apisatoõ

(Marko 15.1; Arókasi 23.1-2; Xoão 18.28-32)

¹ Katimatiníkata sasetotxi auíteakori, kiomãtxiakori pakini apotiitaua. Imisãkiretakakana:

—Kiãtokopa atxatari Xesosi aõkini? —itxana.

² Eereka iaxirikãkitakarina Xesosi, anika itxarina Homano auíte Põsio Pirato inakorimoni, sikanapa itxarina.

Xotasi Ipinini

(Átosi 1.15-19)

³ Xotasi, Xesosi mĩkapiritakari, kenakoenetakasaakiri Xesosi ipinini tĩkane, maerekaxiniretinoka itxa, kotxi iuaka sikari Xesosi imokaiakariakorimoni okiko tĩkane. Iuaĩkana isipikaro trĩta txineiro ota pirata kamakoro sasetotxi auíteakori, kiomãtxiakori pakinimoni.

⁴ —Nota kamari maerekati. Nimĩkapiritari Xesosi. Ixika !auari iua ipinini ĩkapani —itxana ninoa.

Ininiã ninoa:

—Pite kamakiti xikakara. Pitekara sikaua ate Xesosi.

⁵ Ininiã Xotasi okaro txineiro ota Teoso misãkiretiko aikoti ãki, eereka isipe ãtiãtaã. Iuaãtaã iuaka iaxirikanokitapeua, aamina poriã iaxirikaua, arõka, ipĩpe itxa.

⁶ Teoso misãkiretiko aikoti ãki sasetotxi auíteakori kosekaro oa txineiro.

—Oia txineiro kiki okiko ĩki. Ia xika ate !auritaãka aãpotiitiniro oia txineiro ãto txineirotikata Teoso misãkiretiko aikotiãkero. ⁷ Kiãtokopa atxataro oia txineiro? —itxakakana.

Eereka ninoa imarotape. Iamotarina kikio, tiitxi kamakari kikiote, Xoteo minakaniua ikatiko tĩkane. ⁸ Oa txineiro kiki okiko ĩki xika, Xesosi okiko ĩki xika, iua akauari takauãkataãka “Arẽkatxi Akauariti” inaãka. Uatxa akiritaãkapanika iuaãtaã “Arẽkatxi Akauariti.” ⁹ Iua atoko ininiã, kitxakapirĩka Teoso sãkire sãpiretakari Xeremia inakori atão txari:

Isaao auakani iĩkitxitari trĩta ota pirata kamakoro Teoso mereẽkiti okiko ĩkapani.

¹⁰ Eereka isikarona oa txineiro ota tiitxi kamakarimoni, ikikiote iamotinina ĩkapani, kotxi

Teoso nirekari ia atoko ikaminina, itxa Xeremia kitxakapirĩka. Ininiã Xeremia sãkire iaõka apopeka iuasaaki.

Xesosi Pirato Apisatoõ

(Marko 15.1-5; Arókasi 23.1-5; Xoão 18.28-38)

¹¹ Iuasaaki Xesosi tima Homano auíte Pirato inakori apisatoõ. Pirato pimaãri Xesosi:

—Pitekani Xoteoakori auíte txataua?

—Ari, iuapitikarano —itxari.

¹² Eereka sasetotxi auíteakori, kiomãtxiakori pakini apoĩtari Xesosi. !Kasãkireri Xesosi iuasaaki. ¹³ Ininiã Pirato txari:

—Atauako kona pikenakotatari apoĩtiniina?

¹⁴ Xesosi !kasãkireri, ininiã Pirato tsorĩkaãta. ãkixinireẽ iua:

—Kininiãpa !kasãkireri?

Xesosi Okiko Nirekiko

(Marko 15.6-15; Arókasi 23.13-25; Xoão 18.38-19.16)

¹⁵ Ikini kiiniriti Pãskoa inakori, Homano auíte sikakari ãtika kateia ãki auakari kãkiti nirekakiti. ¹⁶ Iuasaaki aua kateia ãki auakari Pahapasi inakori. Ikinimane imarotari iua.

¹⁷ Itomaneri kãkiti apotiitakasaakiua, Pirato pimaãna ninoa:

—Īkiripa kateia āki auakari hinireka nisikakini? Pahapasikani? Xesosi Teoso mereēkiti inakorikani? —itxana ninoa.

¹⁸ Pirato imarotari Xesosi isikinina iuamoni ixikotinirina xika.

¹⁹ Iuasaaki Pirato topākanāta kākiti misiritiko isāpiretini pakita āki. Iuasaaki ĩtanoro iokanapireta iuamoni.

—Maerekati !pikamape iua kikimoni, kotxi ixika !auari pokiniri. Erekari iua. Minipani nitaponetari iua kiki, ininiā maerekaxiniretinoka nitxa —otxari.

²⁰ Mapara sasetotxi auĭteakori, kiomātxiakori pakini misākiretana kākiti iuaātaā apotiitakaniua:

—Piratonomi hĭtxako: “Pisikakariko Pahapasi. Pokākitakariko Xesosi,” hĭtxariko —itxana kākiti.

Ininiā ninoa auikari isākirena. ²¹ Eereka Pirato pimaāna kākiti iuaā apotiitakaniua:

—Īkiripa kateia āki auakari hinireka nisikakini?

Ininiā ninoa akirikata:

—Pahapasira.

²² —Kiātokopa nitxtari Xesosi, Teoso mereēkiti inakorima? —itxa Pirato.

Ikinikana apakapapiretana:

—Aamina ĩpiriāmitakari nopini pitokakitariko.

²³ Ininiā Pirato:

—Kixikapa? Maerekati !ikama —itxa.

Iuasaakipeka ninoa iteene akiripoakatana:

—Aamina ĩpiriāmitakari nopini pitokakitariko.

²⁴ Ininiā Pirato kona sāpiretaikari Xesosi isikakini, kotxi ninoa neenamauatanapanoka. Ikosekari āparaā. Arokauakotaua ninoa apisatoō.

—Na nota xikani ia kiki ipinako. Hĭte xikakara ia kiki ipina —Pirato txana ninoa.

²⁵ Ikinimane apakapapiretari:

—Atāopitikara. Misirikaretxi auiniā okiko xika, ate, amariteni pakini apakapariko iua misirikaretxi —itxana.

²⁶ Iuasaakipeka Pirato sikakari Pahapasi. Eereka ipaniātari Xesosi xirokitatiko aāpitsaā. Eereka isikari Xesosi isotatonemoni aamina ĩpiriāmitakari nopini itokakitinirina tĭkane.

Sotatoakori Napetiniri Xesosi

(Marko 15.16-20; Arókasi 22.63-65; Xoāo 19.2-3)

²⁷ Ininiā sotatoakori anikari Xesosi ninoa auĭte aapokomoni. Iuaā akiritarina apanakini sotatoakori, ininiā ikinimane sotatoakori ākitari Xesosi. Inapetarina.

²⁸ Imaktxakarina Xesosi māka. Mākatxi pōkamarari ieretaka itxarina. ²⁹ Eereka itakarina saporĭēta kotipiaro kamakori ikiiā. Iuako ikikomoni taka itxari aāke. Ininiā itxĭkitakarina Xesosi auĭtetxi atoko ininiāua. Eereka ikapotoreēkauana iua apisatoō, napeta itxarina Xesosi:

—Aāuĭte —itxarina Xesosi inapetinina.

—Xoteo auĭtekai pite —itxarina.

³⁰ Ikiisokarina. Iua aāke ikosekana, arikiita itxapikarina. ³¹ Inapetarina, eereka imaktxakarina mākatxi pōkamarari. Iua nakiti imāka iuaĭkana ieretaka itxarina. Eereka mapara anika itxarina, aamina ĩpiriāmitakari nopini itokakitinirina ĭkapani.

Xesosi Tokakitaāka Aamina ĩpiriāmitakari Nopini

(Marko 15.21-32; Arókasi 23.26-43; Xoāo 19.17-27)

³² Xesosi anikaāpotakasaakina, aōkitarina Sireni sitatxitikiri, Simāo inakori. Ninoa paniātari iua, Xesosi anikakiti aamina ĩpiriāmitakari, anikini ĭkapani, kotxi Xesosi ! iposotaikari anikiniri. Ininiā Simāo anikari. ³³ Apokana Kóokota inakoriātaā. Apanakini akiritari “Kiitātatxi” inaāka akiritiko. ³⁴ Iuaā ĩāriāmoni ikoketarina pinĭtxi kipixiāri, sika itxarina Xesosimoni, Xesosi iātini ĭkapani, imakini ĭkapani. Atapixiātaāka atoko, !iātari.

³⁵ Ininiā itokakitarina Xesosi aamina ĩpiriāmitakari nopini. Inaāka atoko ikamarina

sarauatxi kai soroã. Sarauatxi kãiatakani apakapari Xesosi mãka. Kitxakapirĩka Teoso sãkire sãpiretakari sãpiretapekari ikara atoko inini tĩkane. Iua txari:

Ixanakarina nimãka. Sarauatxi ikamana nimãka apakapakani imarotinina ĩkapani. Itxa Teoso sãkire sãpiretakari kitxakapirĩka. ³⁶ Sarauatxi xipoka atoko iitopãkana. Imoiaãrina Xesosi, kãkiti manikakaniri ĩkapani. ³⁷ Aamina ĩpiriãmitakariã ikii nopini itakarina iõkatsopatakori: “Xesosi, Xoteoakori Auĩte,” itxa iõkatsopatakori. Ikara xika okaãka Xesosi.

³⁸ Xesosi takote itokakitarina ipi kiĩtiririni aamina ĩpiriãmitakari nopini, ãti Xesosi kikomoni, ãti Xesosi sanaremoni. ³⁹ Kãkiti iuaã napakani napetari, nokonoko itxa kiitana. Maerekaeneti isãkirepiretarina Xesosi:

⁴⁰ —Pite txari: “Aiko Teoso misãkiretiko niriãka atoko, ipi ãti õtisaaki iuaĩkana nõkitikari,” pitxa. Piteka pimakatxakaua. Pite Teoso ãkiri pinakasaakia, pikatxaka. Ikara atoko itxa sãkiretana kãkiti iuaã napakani. ⁴¹ Iua atokotxikana itxana sasetotxi auĩteakori, kaiõkatsoparerini, kiomãtxiakori pakini ikara atoko inapetarina Xesosi:

⁴² —Iua makananitapekari apanakini. Txamari iuaka liposotari imakananitinia. Iua Isao auakani auĩte ininiãua, iuaka imakatzakamauako. Ikatxakiniã, ate auikari iua sãkire. ⁴³ Iua auikari Teoso sãkire. Maiãtapari. Atauako Teoso nirekari imakatzakini iua uatxa, kotxi iua txari: “Teoso ãkirirano nota,” itxa —itxana.

⁴⁴ Kiĩtiririni iuakata tokakitakoni apaka maerekaeneti isãkirepiretarina Xesosimoni.

Xesosi Ipinini Pirena

(Marko 15.33-41; Arókasi 23.44-49; Xoão 19.28-30)

⁴⁵ Apaniãxiti itixi piãka. Ipi ãti pakini oara ipiãka. ⁴⁶ Ipi ãti pakini oarape kikatomipeka Xesosi iteene akirikata:

—Erii, Erii, aremaa sapakatani.

Ikara Epireo sãkire. Ia atatsopatakari sãkireẽ, “NiTeosone, niTeosone, kinirepa pitakanapano?”

⁴⁷ Kãkiti iuaã auakani kenakotari Xesosi sãkire. Ninoa uãkatari akirinãtiniri Eríasi.

⁴⁸ Ininiã ãti miteka, mapoa atoko inakari iãka itxari iãriã katxioãrimoni. Aãke mapotõkire taka, isirĩka itxamari Xesosi iãtini ĩkapani. ⁴⁹ Txamari apanakini:

—Kona pisikapiri. Atxiĩti Eríasi makatzakari iua —itxana.

⁵⁰ Iuaĩkana Xesosi iteene akirikata. Eereka iokanitari ixinire Teosomoni, eereka ipĩpe.

⁵¹ Iuasaakipeka mãkatxi mata Teoso misãkiretiko aikoti ãki arõkakari tsorakita. Itano itsorakita. Ixitipeka apoka. Mitxi iua mãkatxi mata !auiritari kãkiti ĩroni Teosonani Auini Pakitaãtaã. Itsorakitakasaaki, itixi iakeẽkata. Kai mitari xoreka iuasaaki. ⁵² Apanakini akauari xoreka. Itomaneri kãkiti ipĩkani Teoso nakitiakori iuaĩkana õkitikapekaua. ⁵³ Osipikarina akauari. Xesosi iuaĩkana õkitikaãkaua atoko, isana Xerosareẽmoni, Teoso nakiti sitatxitimoni. Iuaã itomaneri kãkiti itikana ninoa iuaĩkana õkitikakania.

⁵⁴ Sotato auĩte, sotatoakori Xesosi moiaãkani apaka, itikarina Xesosi ipinini. Imarotarina itixi iakeẽkatini, ininiã iteene ipĩkarauatana.

—Atãopitikara Teoso ãkiri itxaua —itxana.

⁵⁵ Itoro sitoãkini ikira atoko atamanãtari Xesosi. Kariréia tãpa Xesosi potarikasaaki ninoa sitoãkini moianatari iua. ⁵⁶ Maria Matarena inakoro iuaã aamina ĩpiriãmitakari ikira atoko auanãta apaka. Txiako, Xosee pakini inoro, Maria inakoro iuaã aua. Sepeteo anaakori inoro iuaã auanãta apaka.

Xesosi Ikatiko Pirena

(Marko 15.42-47; Arókasi 23.50-56; Xoão 19.38-42)

⁵⁷ ĩkanõka katxineiroteri Xosee inakori, Arimateia sitatxitikiri, apoka. Iua apaka Xesosi sãkire auiaãkari itxaua. ⁵⁸ Isa Piratomoni. Xesosi ĩto amanaã. Ininiã Pirato paniãtari isikiko. ⁵⁹ Ininiã Xosee anikari Xesosi ĩto. Mãkatxi mataã iapirika itxari. Mãkatxi mata amaneri arínio inakoriã iapirikari. ⁶⁰ Eereka taka itxari akauari ãki. Iua akauari amaneri, Xosee kisakakiti kai auĩte iriko. Ikamari iua akauari ipĩkasaaki ikatiko ĩkapani. Xesosi ĩto iriko ãki itaka atoko ikakanapiritari kai meraminapoari, itota itxari

akauari iriko, sipe itxa. ⁶¹ Iuasaaki Maria Matarena inakoro, âto Maria inakoro apaka topãkanãta akauari apisatoõ.

Imoiaãrina Xesosi Akauari

⁶² Iua õti sesta veira, tomatiko õti apisa. Iua õti Xoteoakori parĩkauatapitipo, tomatiko õti imaparĩkauatakani ïkapani. Katimatinĩkata sasetotxi auĩteakori, pariseoakori pakini sari Piratomoni. ⁶³ Ninoa txari:

—Ate xinikari iua kamisirienereri sãkire. Iua txari: “Nipĩkasaaki eereka ipi âti pakini õtisaaki iuaĩkana nõkitikauako.” ⁶⁴ Pipaniãtana pisotatoneakori ipi âti pakini õti akauari imoiainina. Imamoiaãkaniãrina, imoianariakori ïkanõka sari iuaã iĩto iĩtirĩkinina. Ininiã eereka isãpiretarina kãkiti: “Teoso õkitikapekari iua. Iuaĩkana auãki itxapeka,” itxamana ninoa imoianariakori. Ininiã ikara misirieneretxi apiatama eereka. Mĩtxiri misirieneretxi poiãoka —itxarina Pirato.

⁶⁵ —Ininiã hanikari sotatoakori akauari moiaãkani tĩkane. Hĩsa. Hĩtotariko akauari sona —Pirato txana.

⁶⁶ Ininiã isana iuaã. Akauari sona iteene itotinina ïkapani. Itakarina Pirato takaõtxikare itore nopini. Sotatoakori iuaã kaikota. Imoiaãrina akauari.

28

Xesosi Iuaĩkana Auãki Inini

(Marko 16.1-8; Arókasi 24.1-12; Xoão 20.1-10)

¹ Tomatiko õti xipoka atoko, tomĩko ïkanõkapanika Maria Matarena, oa âto Maria pakini sari akauarimoni.

² Ninoa saãpotakasaaki, katimaritika itixi iakeẽkata itapararitika. Iuasaaki Teoso nitiri iaxitikiri katxaka. Ikatapakiritari kai akauari tore, topãka itxa iua kai nopini. ³ Itoõ atokatxi iotximere atoko itxa. Imãka mapoa saro atoko itxa. ⁴ Sotatoakori, akauari moiaãkani, kikinanaãkata, ipĩkarauatinina. Irikana xitipeka. Ipĩkani atokopeka itxana.

⁵ Eereka ninoa sitoakoro apoka akauari. Teoso nitiri misãkiretana:

—!Hĩpĩkarauatape. Nimarotari hĩte nitanãtiniri Xesosi, aamina ïpiriãmitakari nopini tokakitakori. ⁶ !Auaika uai. Teoso õkitikapekari iua. Ikara iua sãpiretapekai hĩte. Uai hina. Hãtamatarari iĩto mitxi auiniãtaã.

Ininiã ninoa atamatari.

⁷ —Katima hĩtxako imoianariakorimoni hĩsini ïkapani. Hĩsãpiretana: “Iuaĩkana auapeka itxa Xesosi. Teoso õkitikapekari iua. Iua sari hĩte apisapanika Kariréiamoni. Iuaã haõkitariko iua,” hĩtxako ninoamoni. Ikara atoko nitxa nisãpirena hĩtemoni —itxa Teoso nitiri.

⁸ Ininiã ninoa takanapari akauari. Ipĩkareritikana, ieneniritikana isana. Imitekana Xesosi moianariakorimoni õkitikiniua isãpiretini tĩkane. ⁹ Ninoa mitekaãpotakasaaki, ipixinipokoriti Xesosi tokiã ninoamoni:

—Hĩtepinini ina —itxana.

Ininiã ninoa kapotoreẽkaua iua apisatoõ, maĩkakitita itxarina.

—Peerekai. Apiananiri pitxaua —itxanãtana.

¹⁰ Ininiã Xesosi:

—Kona hĩpĩkarauatape. Nitariakorimoni hĩsa. Hĩsãpiretana Kariréiamoni isinina. Iuaã aõkitanonako nota —Xesosi txana ninoa Mariaakoro.

Ininiã ninoa sipe.

Sotatoakori Xesosi Akauare Moiaãkani

¹¹ Sitoãkini sikasaaki, ãtikaka sotatoakori akauari moiaãkani kanapiriã sitatximoni. Isãpiretarina itikakitina sasetotxi auĩteakorimoni. ¹² Ininiã sasetotxi auĩteakori, kiomãtxiakori pakini apotiitaua ikara ene ixinikinina ïkapani. Eereka isikarina itoro txineiro sotatomoni, atão imasãpiretakanina ïkapani apanakinimoni. ¹³ Ininiã sasetotxi auĩteakori, kiomãtxiakori pakini txana:

—Hĩtxariko apanakinimoni: “Xesosi moianariakori apoka ïkanõka aimakasaaki. Iĩtirĩkarina Xesosi ïto,” hĩtxako. ¹⁴ Hĩauĩte Pirato imarotakasaakiri himakini, ininiã ate misãkiretariko iua, ininiã kona himisiritaãka himakini xika —itxarina sotatoakorimoni.

¹⁵ Ininiã sotatoakori apakaparo txineiro, sãpireta itxarina kãkiti Xesosi moianariakori ãtirĩkiniri Xesosi ãto. Ikara aãpirena iaripireta Xoteoakorimoni. Uatxa apaka ikara aãpirena auiãkapanika.

Xesosi Apoka Imoianariakorimoni

(Marko 16.14-18; Arókasi 24.36-49; Xoão 20.19-23; Átosi 1.6-8)

¹⁶ Õsi pakini Xesosi moianariakori sari oxiratarimoni Xesosi paniãtinimoni Kariréia tãpamoni. ¹⁷ Ninoa atamatari Xesosi. Ikapotoreẽkauana iua apisatoõ.

—Peerekai. Apiananiri pitxaua —itxanãtana.

Txamari ãtikaka kona iteene auikari iua Xesosi ininiãua. ¹⁸ Xesosi apoka ninoa takote, misãkireta itxana ninoa:

—Teoso txĩkitakano itixine auakani auĩte nininiãua. Itxĩkitakano ãkoraxiti auakani auĩte apaka nininiãua. Ininiã ikinika posotiiretxi aua notamoni. ¹⁹ Ininiã nipaniãtai. Hĩsako ikini uãkati kãkitimoni ikini itixitika. Hõerekana ninoa nisãkire. Hĩpatxisatana nisãkire kĩpitakani niri uãkaã, imi uãkaã, Erekari Matamatakoti uãkaã pakini hĩpatxisatanako. ²⁰ Hõerekanako ninoa ikinika nipaniãtakiti ikaminina ãkapani. Hĩxinikariko ia. Nota ãtipirika auako hĩtekata. Hĩtekata nauiniritika itixi xipokako —itxa Xesosi sãkire.

MARKO

Hoão Kapatxisareri Sãpiretakiti

(Mateo 3.1-12; Arókasi 3.1-20; Hoão 1.19-28)

¹ Ia Xesosi Kristo iokanapirena erekari. Teoso äkiri itxaua Xesosi.

² Teoso sãkire sãpiretakani iökatsopataria ia:

Niokanatariko niokanapirena aniäkari kãkitimoni kimapori oeretini ikapani pite uai apokini apisa.

³ Iua auako äparaã makipakaniãtaã. Isãpirenauatako: “Höeretariko kimapori Apiananiri apokini apisapanika. Itikaãpo erekari hïkamako iua napini ikapani,” itxa iua. Itxa Teoso sãkire iökatsopatakori kitxakapirïka.

⁴ Ikara atoko Hoão kapatxisareri äparaã makipakaniãtaã aua. Ipatxisatakasaakiri kãkiti, isãpiretari ia pirena:

—Hïtakanapariko maerekati hïkamakiti. Hïpatxisataãkako. Ininiã Teoso makatxakariko maerekati hïkamakiti —itxa Hoão kapatxisareri.

⁵ Ikinimane kãkiti Xotéia auakani Xerosareë sitatxiti auakani pakini sari Hoãomoni isãkire ikenakotinina ikapani. Ninoa sãpiretakasaakiri maerekati ikamakitina, ipatxisatana uini Xotão inakoriãtaã.

⁶ Hoão takari imãka kamero piti kamakori. Itakari ipakiomatare pirãtxi mata kamakori. Inikari txïtxiri. Mapaã itxima. ⁷ Iua txari kãkitimoni:

—Nota poiãori. Nota tikini apokako apiatakari. !Apakata nikapotreëkinia iua takote ikiti mata nimaktxakini ikapani, kotxi nota poiãoka. Iua apiata. ⁸ Nota patxisatai äparaãnokara. Iua patxisataiko Erekar Matamatakotiã. Iuasaaki hïte apakapariko Erekar Matamatakoti.

Xesosi Patxisatiko Pirena

(Mateo 3.13-17; Arókasi 3.21-22)

⁹ Iuasaaki Xesosi apoka Nasaree sitatxiti, Kariréia tãpamoni. Iuasaaki Hoão kapatxisareri patxisatari iua uini Xotão inakoriãtaã. ¹⁰ Xesosi kanïkiïtakasaaki, iua itikari iaxiti takakini. Iuasaaki Erekar Matamatakoti katxaka kamo katxakini atoko. Iua nopini apoka. ¹¹ Iuasaakipeka Teoso iaxitikiri txari:

—Pite namarite, nitiretakiti, napokaerekatai, kotxi ninirekakiti pikama.

Satanasi Atamakaerekatini Xesosi

(Mateo 4.1-11; Arókasi 4.1-13)

¹² Iuasaaki Erekar Matamatakoti iokanataria Xesosi äparaã makipakaniãtaã. ¹³ Iuaãtaã ikaikota koarëta õti. Iuasaaki Satanasi atamakaerekatari iua. Iuaãtaã auari kaxipirini kaneenamarini. Ininiã Teoso nitiriakori iaxitikini nïkatari Xesosi.

Xesosi Mipotorikiniri Iparïka Kariréia Tãpa

(Mateo 4.12-22; Arókasi 4.14-15)

¹⁴ Hoão kateia äki takikosaaki, Xesosi sari Kariréia tãpamoni. Iuaãtaã isãpiretari Teoso iokanapirena erekari, Teoso auïtetxi ininiãua pirena. ¹⁵ Itxari:

—Teoso keto apopeka. Iua auïtetxi ininiãua apokaãpotapeka. Ininiã hïtakanapariko himaerekani. Hãuikariko Teoso iokanapirena erekari —itxa Xesosi.

¹⁶ Xesosi tïpokota Kariréia poati tiniã. Iuasaaki atamatana ipi hetxi takakani, Simão Petro, itari Ätree pakini. Iua atamatana itakinirina hetxi. ¹⁷ Ininiã Xesosi txana:

—Uatxa masa notakata. !Himaïkaikariko ximaki. Ätião hïparïka auako. Nisãkire hïãpiretako kãkitimoni —itxa.

¹⁸ Ininiã iuasaaki ninoa takanapari hetxi, sa itxana Xesosikata.

¹⁹ Apikomoni ninoa saãpota. Itikana Txiako, itari Hoão pakini. Ninoa Sepeteo anaakori. Kanaua miramaneri äki auanãtana iuasaaki. Hetxi iotsaãnãtana. ²⁰ Iuasaaki

iua akiritana ninoa. Ininiã ninoa takanapari iri, iri nitiriakori pakini kanaua ãki. Eereka isana Xesosikata.

*Kiki Maerekati Matamatakoti Auãitotakiti
(Arókasi 4.31-37)*

²¹ Xesosi imoianariakorikata apoka Kapanaoõ sitatxiti. Ininiã tomatiko õtisaaki Xesosi sari aiko Xoteo apotiitiniãtaãua oerekarauatini ìkapani. ²² Iua sãkire kenakotakani tsorìkaãta, kotxi kona kaiõkatsoparerini atokoni litxa. Iua oerekakiti sãkiretxiti pataparari, kotxi lisãpiretari ãti koerekareri sãkire apanakini kaiõkatsoparerini atoko. Iuaka sãkirekara isãpireta.

²³ Iuasaaki aiko ãki Xoteo apotiitiniãtaãua aua kiki maerekati matamatakoti auakiti. Iua akiripoakata:

²⁴ —Xesosi Nasaree sitatxitikiri. Kipa pinireka atemoni? Pite ina ate pixipokini ìkapanikani? Erekarinoka kamakarii. Teoso nakiti pitxaua —itxa.

Ìkara atoko iua akiripoakata, kotxi iua maerekati matamatakoti pìkari Xesosi.

²⁵ Ininiã Xesosi itapararitika txari:

—Piotoka. Pitakanapariko ere kiki ìto.

²⁶ Iuasaaki maerekati matamatakoti iõkokaãtotari. Ikatxakasaaki, akiripoakata.

²⁷ Kãkiti iuaãtaã auakani tsorìkaãta. Iuasaaki imisãkiretakakauana:

—Kiripa? Atxiiti oerekakori sãkiretxiti amaneri apopeka? Iua sãkire kaposotiireri. Ipaniãtakiti maerekati matamatakoti kamapeka —itxanãtana.

²⁸ Ininiã ikara pirenã iaripireta ikini Kariréia tõpati.

*Xesosi Makananitiniro Simão Petro Imakiro
(Mateo 8.14-15; Arókasi 4.38-39)*

²⁹ Ininiã Xesosi, Txiako, Xoão pakini takanapakasaakiri aiko Xoteo apotiitiniãtaãua, isana Simão, ãtree pakini aapokomoni. ³⁰ Iuasaaki Simão imakiro apoomata. Osirìkanãta. Ininiã ninoa sãpiretari Xesosi oamianare. ³¹ Ininiã Xesosi sari oamoni. Imaĩkaro ouako. Õkitikaro. Iuasaakipeka oãpoomare !auaika. Ininiã opotorika oparìkauatini, ninoa kiena okamini ìkapani.

*Xesosi Makananitinina Amianatakani
(Mateo 8.16-17; Arókasi 4.40-41)*

³² Ininiã mapiãnikata kãkiti minana ikinipoko amianatakani, maerekati matamatakoti auãitotakini pakini iuamoni. ³³ Ininiã ikinimane iua sitatxi auakani apotiitaua aapokotxi tore takote. ³⁴ Ininiã Xesosi makananitana itomaneri amianatakani. Kaiãopokori amianari auakini imakananita. Apaka omitikana itomaneri maerekani matamatakoni. Iuasaaki !auiritana ninoa sãkirauatini, kotxi ninoa imarotari Teoso ãkiri ininiua Xesosi.

*Xesosi Sãpiretiniri Teoso Sãkire
(Arókasi 4.42-44)*

³⁵ Ìkanõkapanika mapiãpanika Xesosi õkitikaua. Itakanapari aapokotxi. Iuanoka sari kãkiti mauakaniãtaã iri iaxitikiri imisãkiretini ìkapani. ³⁶ Eereka Simão imoianariakorikata sari Xesosi initinina ìkapani. ³⁷ Ninoa apokasaakiri, itxana:

—Ìkinimane nitai —itxarina.

³⁸ Xesosi apakapapiretana:

—Masa ãtiãtaã kãkiti aapokomoni. Iuaã nisãpiretariko Teoso sãkire, kotxi ikara atoko itxa niparìka kãkitimoni. ³⁹ Xesosi sari ikini Kariréia tõpa. Aiko Xoteo apotiitiniãtaãua isãpiretari Teoso sãkire. Apaka omitikana maerekani matamatakoni kãkiti ìtoã auakani.

*Kiki Maere Matati
(Mateo 8.1-4; Arókasi 5.12-16)*

⁴⁰ Amianatakari maere matati apoka Xesosimoni. Ikapotoreẽkaua iua apisatoõ. Iua iteene amanaãri:

—Nimarotari, pinirekiniãri piposotari erekape pitxìkitakinino —itxa.

⁴¹ Ininiã iuasaaki Xesosi iteene tiretari iua. Itakari iuako iua nopini. Itxari:

—Ari, ninirekapitikari. Erekepekai uatxa.

⁴² Iuasaakipeka amianari lauauka. Erekapekari iua.

⁴³ Xesosi iokanataru iua. Iuasaaki isāpiretari iua:

⁴⁴ —Kona pisāpiretapiri apanakini pitemoni nikamakiti. Uatxa merepanika pisa sasetotxiakorimoni. Poerekari piito ninoamoni. Eereka pikamariko Moisesini paniātakiti. Ikara atoko oerekari kākiti atāo erekapeka pinini —itxari.

⁴⁵ Iuaritika isāpiretapikari Xesosi kamakiti. Ininiā iaripireta ikara pirena. Ikara xika Xesosi !iposotaika isini aapokotximoni. Ikaikota kākiti mauakaniātaā. Iuaritika kākiti sari iuamoni.

2

Matīpokotakati Pirena

(Mateo 9.1-8; Arókasi 5.17-26)

¹ Eereka mapaōtipeka inaka atoko iuaikana Xesosi Kapanaoō sitatxiti apoka itxa. Iaripireta Xesosi inirimane aapoko apokini. ² Iuasaakipeka mirikiniti kākiti apoka iuamoni, ininiā iua aapokotxi xāpoka. Apotiitauana ironakikoātaā apaka. Ininiā lapakata apanakini kākiti ironi aapokotxi āki. Iuasaaki Xesosi sāpiretari Teoso sākire kākitimoni. ³ Iuasaaki ipi ipi pakini kikiakori minari matīpokotakati. ⁴ Kākiti itomaneri ironakikoātaā aua, ininiā kona iposotarina Xesosi takote apokinina. Ininiā aapokotxi nopini, Xesosi manapi ninoa sonataru iua matīpokotakati iokatxakinina tīkane Xesosimonikari. Iposo atoko isikakaāpotarina iua manapi. ⁵ Xesosi imarotari ninoa atāo auikiniri iua sākire. Ininiā Xesosi txari matīpokotakatimoni:

—Namarite, pimaerekani makatxakapeēkaika —itxa.

⁶ Iuasaaki ātikaka kaiōkatsopareriakori topākanāta iuaā. Itsorīkaānātana. Ixiremon-inani:

⁷ —Kinirepa ia kiki ikara atoko itxa? Maerekati isāpiretakiti, kotxi Teosonanira posotari imakatxakiniri kākiti maerekani —itxa ninoa sākire.

⁸ Iuasaakipeka Xesosi imarotari ninoa xinikakiti ākixinireēna. Ininiā Xesosi txana ninoa:

—Kininiāpa ikara atoko hītixa xinireta? ⁹ Nitxari iua imaerekani nimakatxakini, txamari !himarotari imaerekani atāo nimakatxakini. “Pōkitikaua. Pisirimata pikoseka, sipe pitxa,” nininiā, iuasaaki himarotari nisākire atāo ininiāua, kotxi hītikari. Niposotiire imaerekani nimakatxakini ikapani, niposotiire iua nōkitikini ikapanitxikana. ¹⁰ Ininiā uatxaika noerekai hīte, Teoso iokanatanota hītari iaxitikiri ikorapokoritimoni kākiti maerekani nimakatxakini ikapani —itxana kaiōkatsopareriakori.

¹¹ Ininiā matīpokotakatimoni itxa:

—Pōkitikaua. Pisirimata pikoseka, sipe pitxa paapokomoni —itxa.

¹² Iuasaakipeka iua ōkitikaua. Ikosekari isirimata. Īkorape itxa ikinimane okiātaā. Imakinika kākiti tikoka.

—Peerekari Teoso kamakiti. Kona mitxi ate itikari ikora atoko inakari —itxanātana kākiti.

Mateo Pirena

(Mateo 9.9-13; Arókasi 5.27-32)

¹³ Ininiā iuaikana isari ipoamoni. Kaiāopokori kākiti apotiitaua iuakata. Iuasaaki oerekana ninoa. ¹⁴ Isaāpotakasaaki, atamatari Arevii inakori. Āti iuaika Mateo inaāka. Aoopo inakori ākiri itxaua iua. Iitopākanāta auītetxiakori txineirote apakapiniātaā. Ininiā Xesosi txari:

—Masa notakata.

Iuasaakipeka ōkitikaua, Xesosikata sa itxa.

¹⁵ Eereka Xesosi nipokota Arevii aapoko. Itori auītetxiakori txineirote apakapakani, itori apanakini maerekani, topākanāta Xesosi takote, imoianariakori takote pakini. Kaiāopokori kākiti aua iuasaaki, kotxi kaiāopokori kākiti Xesosikata sikani.

¹⁶ Pariseoakori, kaiōkatsopareriakori pakini itikari Xesosi auītetxiakori txineirote apakapakanikata, apanakini maerekaniakata pakini inipokotini. Ininiā kaiōkatsopareriakori, pariseoakori pakini pimaāna Xesosi moianariakori:

—Kinirepa hinipokota auñtetxiakori txineirote apakapakanikata, maerekanikata? — itxana.

¹⁷ Xesosi ikara ikenakotakasaaki, itxana:

—Käkiti mamianatakani kona nirekari käkiti pinñtxi imarotakari. Amianatakani-nokara nirekari pinñtxi imarotakari. Nota uai apoka maerekani nakiritini ñkapani, imaerekanina itakanapinina ñkapani. Kona nakiritari käkiti “atão inakari kamakani” uãkatakaniua —itxa Xesosi.

Nipokori Takanapiko Teoso Misãkiretiko ñkapani

(Mateo 9.14-17; Arókasi 5.33-39)

¹⁸ Æti õti Xoão moianariakori, pariseoakori pakini takanapari inikinina Teoso imisãkiretinina ñkapani. Iuasaaki käkiti pimaãri Xesosi:

—Kinirepa Xoão moianariakori, pariseoakori pakini takanapari inikinina Teoso imisãkiretinina ñkapani, txamari pite moianariakori kona ikara atoko !itxana.

¹⁹ Ininiã Xesosi:

—Kiiniri käkiti ñtanorouatakasaaki, ñtanorouatakari aua iuaã, ininiã kona käkiti takanapari inikini iuasaaki. Kona iua ñtanorouatakari nirekari käkiti natxitini. Ininiã iua auakasaaki ninoakata, ikinimane nipokota.

²⁰ Ininiã nota ñtanorouatakari atoko nitxa. Nota auakasaaki nimoianariakorikata, kona itakanaparina inikinina Teoso imisãkiretinina ñkapani. Æti õti nota !auaika nimoianari-akorikata. Iuasaakiikarako itakanaparina inipokotinina Teoso imisãkiretinina ñkapani.

Amaneri Mãkatxi Pirena

²¹ Kona käkiti tãpanetari mãkatxi kitxakari mãkatxi mata amaneriã. Mãkatxi mata amaneri itxikika, ininiã kitxakari tsorakita.

Amaneri Sako Aamata Kamakori

²² Kona käkiti takari iãriã amaneri sako kitxakari aamata kamakori ãki. Itakiniãri, koanatxi kitxakari aamata kamakori tsorakita, ininiã iãriã xikepoata, ininiã koanatxi !kikeikari. Sako amaneri ãki itakaãka iãriã amaneri. Iua atokokana kona hñkokerari kitxakari sãkiretxiti amaneri sãkiretxitikata.

Tomatiko Õti Pirena

(Mateo 12.1-8; Arókasi 6.1-5)

²³ Tomatiko õti Xesosi imoianariakorikata napaãpota kikio triko takikoãtaã. Ininiã ninoa makatxakaro triko iki mapaki inikinirona ñkapani. ²⁴ Pariseoakori atamatana, ininiã itxarina:

—Kinirepa ninoa parñkauata tomatiko õtisaaki? —itxana.

²⁵ Ininiã Xesosi apakapapiretana:

—Kona hãtatsopatapanikari Taviini kamakiti? Iua, imoianariakorikata natxitakasaaki, kona himarotatari ikamakiti? ²⁶ Iua ñroã Teoso misãkiretikoãtaã. Apiataa inakori sasetotxi auñte apiatakari iuasaaki. Iuaã Tavii nikari komiri Teosomoni sikakori. Sase-totxinokara auiritaãka iua komiri inikinina. Apanakini !auiritaãka inikiniri. Txamari Tavii sikari imoianariakori inikinina ñkapani.

²⁷ —Tomatiko õti kamaãka, käkiti ñto ereka inini ñkapani. Kona käkiti kamaãka tomatiko õti auini ñkapani. ²⁸ Nota hñtari iaxitikiri posotari ikinipoko ninireëkiti nikamini tomatiko õtisaaki, kotxi Apiananiri nitxaua —itxa Xesosi.

3

Motñkauakotakari Pirena

(Mateo 12.9-14; Arókasi 6.6-11)

¹ Iuañkana Xesosi imoianariakorikata ñroã aiko Xoteoakori apotiitiniãtaãua. Iuaã apokari kiki motñkauakotakari. ² Ininiã iuaã auakani txari

—Atxiñti iua erekapeka txñkitakari motñkauakotakari uatxa tomatiko õtisaaki?

Ninoa xinikari ikara atoko inini, kotxi ninoa kinirão apoñtaka txari Xesosi. ³ Ininiã Xesosi akiritari iua motñkauakotakari:

—Uaimoni pina —itxari.

⁴ Iposo atoko ipimaãna iuaã auakani:

—Kipa atão Teoso paniãtaua akamini tomatiko õtisaaki? Maerekati akaminikani? Erekar akaminikani? Ipaniãtataua ãti amakananitini? Ipaniãtataua ãti aõkini?

Txamari ninoa !kasãkirena. ⁵ Xesosi atamatana. Iuasaaki inaiataua, iuaritika imatini-niuata, kotxi ninoa !nirekari atão imarotinina. Ininiã Xesosi txari iua motikauakotakari: —Pisirikauakota —itxari.

Ininiã itamẽkauakota. Erecape itxa iuako. ⁶ Ininiã pariseoakori potorika iuaã. Isana Erotxi sãkire auiãkanimoni. Iuaãtaã ninoa xinikari Xesosi okaenetinina.

Itori Amianatakani Sari Xesosimoni

⁷ Ininiã Xesosi sari Kariréia poamoni. Iuasaaki itori kãkiti Kariréia tixinikini, Xotéia tixinikini pakini sari iuamoni. ⁸ Xerosareẽ sitatxitikini, Itoméiakini, Xotão ipiniãkini, Txirokini, Sitoõkini pakini sari iuamoni. Ninoa kenakoenetari ikamakiti, ininiã iuamoni isana. ⁹ Ininiã ipaniãtana imoianariakori:

—Kanaua himina, kotxi kaiãopokori kãkiti katikaãpotano. Ininiã kanaua ãki niereẽtaua —itxa Xesosi.

¹⁰ Iuasaaki kaiãopokori kãkiti erekapeka itxikitakapeka. Apanakini amianatakani nirekakari imaãtakinirina Xesosi, erekapeka ininina ïkapani. Ininiã ikatikaãpotarina Xesosi, kotxi kaiãori kãkiti. ¹¹ Maerekati matamatakoti auakini atamatakasaakiri Xesosi, irikana Xesosi apisatoõ. Akiripoatana:

—Teoso ãkiripitikai pite.

¹² Ininiã Xesosi kona auiritana ninoa: “Teoso ãkiripitikai,” ininina.

Xesosi Mereẽna Tosi Imoianariakori (Mateo 10.1-4; Arókasi 6.12-16)

¹³ Iposo atoko Xesosi sari õtanoxiratarimoni, akirita itxana inirekaãkini. Ininiã ninoa sari iuamoni. ¹⁴ Ininiã iua mereẽna tosi kikiakori iuakata kaikotakani tĩkane, Teoso sãkire sãpiretakani ïkapani. ¹⁵ Iua sikari iposotiire ninoamoni, amianatakani erekapeka itxikitakinina ïkapani, apaka maerekati matamatakoti omitikinina ïkapani. ¹⁶ Ininiã akiritari Simão. Xesosi takauãkatari Simão ãti iuãka. Petro itxaua. ¹⁷ Akiritana Txiako, itari Xoão pakini. Sepeteo anaakori itxauana. Xesosi takauãkatana ninoa Poanexi. Poanexi Popĩkari sãkireẽ “Ikarokirauari anaakori.” ¹⁸ Akiritana ãtree, Piripi, Patoromeo, Mateo, Tomee, Txiako pakini. Aopeo ãkiri itxaua iua Txiako. Akiritana Tateo, Simão pakini. Homano omanatakari iua Simão. ¹⁹ Akiritari Xotasi Isikariotxi inakori apaka. Xesosi mĩkapiritakari itxaua iua Xotasi Isikariotxi. Pakini Xesosi akiritakini imoianariakori ininiuana ïkapani.

Maerekani Matamatakoni Omitikiko (Mateo 12.22-32; Arókasi 11.14-23; 12.10)

²⁰ Iuaĩkana ãti aapokotxitimoni isa Xesosi, imoianariakorikata. Iuasaaki mirikiniti kãkiti iuaĩkana apotiitaua. Ikara atoko ininiã kona ninoa nipokota. !Apakata inipokotinina, kotxi mirikiniti kãkiti aua iuaã. ²¹ Xesosi nirimane kenakotari kãkiti apotiitiniua iuakata. Ininiã isana iua apinina ïkapani.

—Imapitxiritapeka —itxana.

²² Kaiõkatsopareriakori Xerosareẽ ïkani apoĩtari Xesosi maerekati ikamini. Ninoa sãkire:

—Peosepoo inakori auaitotari iua. Ininiã Peosepoora omitikari maerekati matamatakoti —itxana.

Peosepoo Satanasi itxaua. Apanakini sãkire:

—Maerekani matamatakoni auĩte sikaposotiiretari Xesosi maerekati matamatakoti omitikini.

²³ Ininiã Xesosi akiritari kãkiti isãkire ikenakotinina ïkapani. Sãpirenatxi atão inakari oerekiko isãpiretana ninoa. Ipimaãna:

—Natokopa itxa Satanasika omitikiniua? ²⁴ Auñtetxi tixine auakani naiatakakiniäua, ixipokaãkanako. ²⁵ Kãkiti aapoko ãki auakani ninoakakarika neenamauatiniã, ixipokaãkanako apaka. ²⁶ Iua atokokana, Satanasika nitiriakori, ninoakakarika naiatakakiniäua, Satanasika tapara xipokako.

²⁷ —Kona kãkiti ñroã kiki mitapoari aapoko ãki ñtiritiatini ñkapani. Kinirão ñtiritiatana, ininiã iaxirikari mitari mitxi. Iposo atoko inirekaãkiti ñtiritika.

²⁸ —Ari, atãopitikara nota txai hñte. Apakata Teoso makatxakiniri ikinipoko maerekati kãkiti kamakiti, imaerekani Teoso imisãkirepiretini pakini. ²⁹ Txamari ãtipekana maerekati kamakari aua. Erekar Matamatakoti misãkirepiretakari maerekani makatxakiko kona auari. Ikara atoko inakani inikoriãriko imisiritiko maerekani misiritikoãtaã —itxa Xesosi.

³⁰ Xesosi ikara atoko itxa, kotxi pariseokori txari: “Iua auari maerekati matamatakoti.”

Xesosi Inoro, Itariakori Pakini
(Mateo 12.46-50; Arókasi 8.19-21)

³¹ Iuasaaki itariakori inorokata apoka porikiti. Ipaniãtarina ãti akiritiniri Xesosi.
³² Iuasaaki itori kãkiti topãkakani ãkitari Xesosi. Isãpiretarina:

—Pitariakori, pinoro apaka porikiti aua. Initanãtai —itxarina.

³³ Ininiã Xesosi apakapireta:

—Kiripa nitariakori, ninoro pakini?

³⁴ Iua atamatana itakote topãkakani:

—Hãtamata, uai aua ninoro, nitariakori pakini. ³⁵ Teoso nireẽkiti kamakani nitariakori, nitaroakoro, ninoro pakini itxauana —itxa Xesosi.

4

Katarereri Pirena
(Mateo 13.1-9; Arókasi 8.4-8)

¹ Iuañkana Xesosi oerekarauata ipoa takote. Kãkiti mirikiniti, ininiã imorõkokaua kanaua ãki. Iitopãka. Ninoa aua imiriñ, ininiã iua kanauaã oerekarauata. ² Itori Teoso sãkire oerekana ninoa sãpirenatxi atão inakari oerekikoã. Itxana:

³ —Hñkenakota. Katarereri takarauata. ⁴ Itakarauatakasaaki itakareki irika kimapori tiniãpo. Ininiã kotipiriki nikari itakareki.

⁵ —Apanakini itakareki irika kai auiniãtaã, kipatxi mauakaniãtaã. Atãoka ipitxaka.

⁶ Kipatxi poiãoka auiniã atokatxi pataka apokasaaki itxarika. Omakotsani xika osonãka.

⁷ Apanakini irika inako sauaki. Inako aneẽkasaaki, okari takari. !Iriuata. Ipinã.

⁸ —Apanakini irika kipatxi auiniãtaã. Ininiã iriuata. ãti poiãoka iriuata, trñtakata. ãti apiata iriuata, sesẽtakata. ãti kaiãopoko iriuata, señkata.

⁹ —Kakenakokii, ininiã hñkenakotariko nisãkire —itxa Xesosi.

Kãkiti Mimarotakiniri Xesosi Sãpiretini Pirena
(Mateo 13.10-23; Arókasi 8.9-15)

¹⁰ Iuanani imoianariakorikata auakasaaki, ipimaãrina Xesosi:

—Poerekaua mixikanani sãpirenatxi atão inakari oerekiko pisãpiretakiti? —itxarina.

¹¹ Ininiã isãpiretana:

—Teoso sãkire mauñkani !imarotari Teoso auñtetxi ininiua. Teoso oerekai hñte ninoa mimarotakiniri. Teoso oerekana ninoa isãkire sãpirenatxi atão inakari oerekikoã.

¹² Atxiñti ninoa iteene atamatari Teoso oerekakiti, iuaritika !imarotarina atamatakinitina. Atxiñti iteene ikenakotarina Teoso sãkire, iuaritika !imarotarina ikenakotakitina. Imarotaãkamariko, akiritaãkamariko Teoso, ininiã Teoso makatxakamariko ninoa maerekani.

¹³ Ininiã Xesosi txari:

—Himarotari ikara sãpirenatxi atão inakari oerekiko?

—!Aimarotari —itxana.

—Ininiã natokopa ininiãparako himarotari apanakini sãpirenatxi atão inakari oerekiko?

¹⁴ Ininiã imimarotakinitina oerekana:

—Iua takarauatakari takari Teoso sãkire. ¹⁵ Aua kãkiti kimapori tiniãpo takarekitxi irikiniãtaã atoko inakani. Ininiã Teoso sãkire ikenakotakasaaki Satanasi apoka. Ininiã imakatzakari Teoso sãkire ãkixinireẽna apokakari.

¹⁶ —Aua kãkiti kai auiniãtaã atoko inakani. Ninoa kenakotakasaakiri Teoso sãkire, iuasaakipeka apakaparina ipoxokoniritikana. ¹⁷ Itxamana, kona kakotsari. Imaxikiko apokiniã, imisiritiko Teoso sãkire auikinina xika apokiniã, iuasaaki itakanaparina Teoso sãkire.

¹⁸ —Aua kãkiti aanaia auiniãtaã atoko inakani. Ninoa kenakotapitikari Teoso sãkire. ¹⁹ Txamari maerekaxiniretinoka itxana. Txineironoka inirekana, ininiã ikara misiriene-tana ninoa. Kaiãopokori inireẽkitina, Teoso manirekakiniti. Maerekaxiniretinoka ininina, txineiro, inireẽkitina pakini inako atoko itxa, ininiã lixinikaikarina Teoso sãkire, ininiã kona iriuata.

²⁰ Aua kãkiti kipatxi erekari auiniãtaã atoko inakani. Ninoa auikari Teoso sãkire. Iriuata. ãti iriuata poiãoka, trítakata. ãti iriuata apiata, sesêtakata. ãti iriuata ito, seíkata.

Tirikapi Pirena

(*Arókasi 8.16-18*)

²¹ Xesosi pimaãna ninoa:

—Nanipa hítakari tirikapí? Kopiti ãkikani hítakatari? Amesã patapikani hítakatari? Konapitini. Hítakari itano imakinika iopinikini íkapani. ²² Iomaãtakori ãti õti oerekaãkako. Kipatakori oerekaãkako, kotxi nota imarotapitikari hĩkamakiti.

²³ Kakenakokii, ininiã hĩkenakotariko nisãkire —itxa Xesosi.

²⁴ Xesosi sãkirauatapanika:

—Hítakaõtxikariko nisãkire. Imakinika hĩkenakotako. Erepaniko pikamakiti ãtimoni, kotxi pite kamakititxikana kamaãka pitemoni. Erepaniko, kotxi apiata ikamaãka pitemoni. ²⁵ Teoso sãkire auakiti, iua sãkire kípítakari, Teoso sikari apikomoni imaroretxi iuamoni. Txamari Teoso sãkire kenakotakari, isãkire makípítakati, imarore xapiti iuamoni auakari makatzakaãkako.

Takariki Pirena

²⁶ Apikomoni Xesosi txari:

—Teoso auítetxi ininiãua kiki takariki taãkari atoko itxa. ²⁷ Itakarauata. Imaka íkanõka. ãti iparíka ikama pokamara. Iuasaaki itakare pitxakapeka. Kona iua imarotari otomorekini. ²⁸ Merepanika otomoreka. Iposo atoko opitxaka. Eereka opa aua.

²⁹ Oaneẽpeka onakasaaki katakareri makoapataro, kotxi oamiko manapipeka itxa.

Ikara atoko itxa Teoso auítetxi ininiãua.

Mostata Pirena

(*Mateo 13.31-32; Arókasi 13.18-19*)

³⁰ Xesosi sãkirauatapanika. Itxari:

—Natokopa itxa Teoso auítetxi ininiãua? Íkiripa sãpirenatxi atão inakari oerekiko oerekaua? Ia atoko itxa: ³¹ Teoso auítetxi ininiãua mostata oki atoko itxa. Axapitikiro oa. Apanakini iki apiata. ³² Otakaãka atoko opitxaka. Eereka oaneẽ. Apanakini takari ítano apiata oa. Amaripokoro okati. Kotipiriki takari okoa okatiã. Iua atokotxikana Teoso auítetxi ininiãtaãua.

Merepanika poião kãkiti. Eereka apiata. Eereka kaiãopokori kãkiti auítetari Teoso. Txamari iuasaaki Satanasi apoka ninoamoni kotipiriki apokini atokokana.

³³ Kaiãopokori sãpirenatxi atão inakari oerekiko isãpiretana, Teoso sãkire imarotinina íkapani. Ninoa imarotakasaakiri isãkire, apiata isãpiretana. Imimarotakanisaakiri isãkire, poiãonoka isãpiretana. ³⁴ Teoso sãkire oerekasaakina ninoa, sãpirenatxi atão inakari oerekikonoka isãpireta. Eereka imoianariakorinoka auakasaaki iuakata, oerekana ikara imarotinina íkapani.

Xesosi Iotokakiniri Ítima

(*Mateo 8.23-27; Arókasi 8.22-25*)

³⁵ Iua òtipanika mapiānikata itxana imoianariakori:

—Maīpiriāta ipoa. Ipiniāmoni masa —itxana.

³⁶ Ininiā itakanapana itomaneri kākiti. Iuasaaki imoianariakori anikari Xesosi kanauaã. Apanakini kanaua axapitiri apaka sari ninoakata. ³⁷ Īpiriātakasaakina ĩtima kataparari apoka ninoamoni. Tsakati kataparari, ininiā āparaã ierepeēpokataua kanaua āki. Kanaua sakikaariāpotape.

³⁸ Iuasaaki Xesosi ikapokiāmoni imakanāta. Isirimata nopini imakanāta. Ninoa òpirikari iua:

—Kona pimaākataua ate. Kona pitiretataua? Apinanapanoka —itxana.

³⁹ Ininiā imereka. Ipinitari ĩtima:

—Piotoka. Auapika pitxako —itxari ipoa.

Ininiā itsorikaxitita. ĩtima iotoka. Tsakati iotoka apaka. ⁴⁰ Ininiā Xesosi:

—Natokopa ininiāpa kapikarei hĩte? Kinirepa hĩte kona auikano nota? —itxana ninoa.

⁴¹ Apiapikareta ninoa. Ininiā ninoa:

—Kinakaripa ia kiki, kotxi ĩtima, tsakati pakini auikari iua sākire —itxana.

5

Kiki Maerekani Matamatakoni Auaĭtotakiti (Mateo 8.28-34; Arókasi 8.26-39)

¹ Xesosi imoianariakorikata apoka ātiātaã Xerasa tōpa, Kariréia poa ipiniā. ² Xesosi kanikiĭtakasaaki, kiki ina iuamoni. Iua akauariātaã auakari. ³ Iuaātaã iua auanāta. Kākiti ĩposotari ĩtxikiniri iua. ĩtxikare metao kamakori karakitapekata. ⁴ Kaiōkatani kākiti ĩtxikari iuako, ikiti pakini metaoã, txamari ikakarakitsatari metao. ĩApakata kākiti nĭkatiniri iua. ⁵ ĩkanōka, pokamara pakini ixirataātaã akiripoanāta akauari auiniātaã. Kai soroã iuaka ikisauakitataua. ⁶ Ōtakopanika atapari Xesosi inini. Ininiā imiteēkata iuamoni. Ikapotoreēkaua iua apisatoõ.

—Apiananiri pitxaua —itxa.

⁷ Akiripoakata:

—Xesosi, Teoso ākiri pitxaua. Apiananiri ākiri pitxaua. Kipa pinireka nota ĩkapani? Teoso uākaã namanaāi pite, kona pimisiritapeno —itxa maerekati matamatakoti. ⁸ Ikara atoko itxa kotxi Xesosi paniātari:

—Maerekati matamatakoti pisipeka. Pitakanapari ere kiki —itxari.

⁹ Xesosi pimaāri:

—Kipa piuāka? —itxari.

Iua apakapapiretari:

—“Itori” ninaāka niuāka. Kotxi itori maerekani matamatakoni ate.

¹⁰ Iteene iua amanaaāpotari Xesosi:

—Kona piokanatapeua ātiātaã.

¹¹ Iuasaaki auari kaiāopokori irari ixiratamoni nipokonātakani. ¹² Maerekati matamatakoni iteene amanaāri Xesosi:

—Piokanataua ate irarimoni. Pauritaua ate sini ninoamoni —itxanātana.

¹³ Ininiā Xesosi iokanataua. Iuasaakipeka maerekani matamatakoni takanapari iua kiki, ĩroã itxana irari ĩtomoni. Iuaātaã auari ipi mio irari. Ninoa ĩroākasaaki, irari miteēkata oiokiriĭtini ipoamoni. Komoka, axāpoāta itxana iuasaaki.

¹⁴ Irari nĭkatakani miteka sitatximoni, aapokotxi poiāo auinimoni pakini. Isāpiretana kākiti itikakitina. ¹⁵ Eereka isana Xesosimoni. Iuasaaki atamatarina kiki mitxi maerekati auaĭtotakiti. Iitopākanāta. Mākatxi auapekari. Atāo ĩĭkitapeka auari. Iuaritika ninoa pĭkarauata. ¹⁶ Itikakani sāpiretari apanakini iua kiki pirena, irari pirena pakini. ¹⁷ Kākiti iuaātaã auakani paniātari Xesosi osipikiniri iuaātaã.

¹⁸ Xesosi iereētakasaakiaua kanaua āki, iua kiki amanaāri iuakata isini ĩkapani. ¹⁹ Xesosi ĩauritari. Itxari:

—Pisa pinirmanemoni. Pisāpiretana Apiananiri kamakiti pite ĩkapani. Pisāpiretana iua iteene iamoniĭkai pite. ²⁰ Ininiā iua sipe. Iuaātaã auari sitatxi tesi pakini. Iua kiki sari

ninoa tesi sitatxitimoni. Isāpiretari kākiti Xesosi kamakiti iua ĩkapani. Iuaātaā auakani tsorĩkaāta:

—Anekani, peerekari Teoso —itxana.

Xáiro Amanaãkiti Pirena
(Mateo 9.18-19; Arókasi 8.40-42)

²¹ Ininiã eereka Xesosi ĩpiriãta ipoa. Ininiã ipoa ĩtiniã kaiãopokori kākiti apotiitaua iuakata. ²² Aiko Xoteo apotiitiniãtaãua sikani auĩte apoka iuamoni. Akiritaãka Xáiro iua. Iua kapotoreẽkaua Xesosi apisatoõ. ²³ Iua iteene amanaãri Xesosi:

—Namarite opinanapanoka. Masa notakata. Pitakari piuako oa nopini erekape onini ĩkapani.

²⁴ Ininiã Xesosi sari iuakata. Kākiti kinapokope itxakata isinina.

Xesosi Mãka Maãtakakaro
(Mateo 9.20-22; Arókasi 8.43-48)

²⁵ Iuasaaki sito amianatakaroo apoka. Tosikanani oa arẽka !iotoka. ²⁶ Okinika otxineiroteẽ oĩkitxitapekari oamianare imarotakani. Kaiãopokori ipitamaro. Txamari ninoa !iposotari imaktxakinirina oamianare. Kona erekaro. Apiata oamianare. ²⁷ Okenakoenetakasaakiri Xesosi napini, osari iuamoni. Omaãtakari imãka, ²⁸ kotxi oamoni: “Nimaãtakiniãri imãka, iuasaakiika erekapekano,” otxanãta oxinikakiti. ²⁹ Ininiã omaãtakasaakiri, oarẽka iotoka. Iuasaakipeka oimarotari erekape onini.

³⁰ Iuasaakiika Xesosi posotiire sari oamoni. Ininiã ikirioka kākiti sauaki. Eereka ipimaãna:

—Kipa maãtakatari nimãka? —itxa.

³¹ Iuasaaki imoianariakori apakapapiretari:

—Apiananiri, patamata. Itomaneri kākiti kinapokopeka, iuaritika pite pimaãri kākiti: “Kipa maãtakatano?” pitxa —itxana.

³² Iuaritika Xesosi nitari imãka maãtakakari. ³³ Iuasaaki oa sito imarotari erekape onini, ininiã okapotoreẽkaua iuamoni. Opĩkarauata. Okikinanaka. Eereka osãpiretari ikinika oamianare iuamoni. ³⁴ Ininiã Xesosi txaro:

—Namarite, pite erekapekai uatxa, kotxi pauikari niposotiire. Pisipiniikaua, erekaxiirepekai —itxa Xesosi.

Xáiro Ākero Ōkitikiko
(Mateo 9.23-26; Arókasi 8.49-56)

³⁵ Xesosi sãkirauatakasaaki oakata, apanakini Xáiro nitiriakori apoka. Itxari:

—Pamarite !lauaika. Opĩpeka. Pauiritari Xesosi kanapiriini.

³⁶ Ininiã Xesosi limaãkatari ikara pirena. Itxari Xáiro:

—Kona pipĩkarauatape. Pauikano —itxari.

Ininiã ninoa sari Xáiro aapokomoni. ³⁷ Xesosi auiritana Petro, Txiako, Txiako itari Xoõo pakini sini iuakata. !Auiritana apanakini sini iuakata. ³⁸ Ninoa apokasaaki Xáiro aapoko, kākiti iuaãtaā auakani !imarotarina ikamakitina. Ikinipoko kākiti txiapanãta, akiripoakanãtana. ³⁹ Xesosi ĩroã. Itxana:

—Kinirepa iteene hĩtxiapanãta? Kinirepa hãkiripoanãta? Amarini !lipina. Oimakanãta —itxa.

⁴⁰ Ininiã inapetarina iua. Ininiã iokanatanana ninoa mapara. Oĩri, onoro, Xesosi moianariakori pakini ĩroã amarini auiniãtaā. ⁴¹ Imaĩkaro ouako. Iuasaaki isãpiretaro oa isãkireẽ:

—Taritaa komii.

Popĩkari sãkireẽ: “Amarini põkitikaua.” ⁴² Iuasaakipeka oõkitikaua. Otĩpokota. Oa amarini aua tosi anokanani. Iuasaaki ninoa iteene tsorĩkaāta. ⁴³ Ininiã Xesosi paniãtana:

—!Hĩsãpiretapiri apanakini nimakananitiniro oa.

Apaka ipaniãtana isikakienatiniro oa.

6

Nasaree Auakani Kona Auikari Xesosi Säkire
(Mateo 13.53-58; Arókasi 4.16-30)

¹ Xesosi imoianariakorikata potorika iuaã. Nasaree sitatxitimoni isana. Iuaãtaã mitxi Xesosi aneẽ. ² Tomatiko õtisaaki iua oerekari kãkiti aiko Xoteo apotiitiniãtaãua. Xesosi sãkire kenakotakani tsoriãkaãta. Itxana:

—Nanipa apaiaõkarauata, ikara atoko imarotini? Kipa oerekari imarore? Ikamakiti oerekari apiata imarore aua. Kininiãpa ìkora atoko itxa posotiireta? ³ Ate imarotari iua, kotxi aapokotxi kamakari itxaua iua. Maria ãkiri iua. Iua itariakori Txiako, Xosee, Xota, Simão pakini itariakori itxauana. Itaroakoro apaka aua uai, ininiã ate imarotari iua — itxana.

Ikara xika kona ninoa auikari isãkire.

⁴ Ininiã Xesosi txana ninoa:

—Teoso sãkire sãpiretakari paxitaãka, txamari Teoso sãkire sãpiretakari itixineẽ auakasaaki, iuaã auakani, inirimane, iua aapoko ãki auakani pakini !ipaxitari. !Auikarina iua sãkire —itxa.

⁵ Ininiã iuaã kona ikamari iposotiire apiari. Iuako itaka ãtikaka amianatakani nopini, ininiã amianatakani erekapeka itxikitaka. ⁶ Itsoriãkaãta, kotxi iuaã auakani !auikari isãkire. Ininiã iua tõpa isari aapokotximoni. Oerekarauata iuaã. Eereka isari apanakini aapokotxitimoni. Iuaãkana oerekarauata. Itxaãpota iuaãtaã.

Xesosi Iokanatana Imoianariakori Kãkitimoni.
(Mateo 10.5-15; Arókasi 9.1-6)

⁷ Xesosi akiritana imoianariakori tosi pakini. Ipi iokanata ãtiãtaã, iuaãkana ãtiãtaã iokanatana ipi. Ikara atoko iokanaãpotana imoianariakori. Iposotiire isikana ninoa maerekani matamatakoni omitikinina ìkapani.

⁸ Itxana:

—Kona minakati hanikape. Hìtsonerenoka hanika. Kona hìtii, kona auatxi, kona txineiro !hanikape. ⁹ Hìkiti mata hìeretaka. ãtika kasipiri himãka hanika. ¹⁰ Sitatxi hãpokasaaki, ãtika aapokotxinanirako hãua. Iua sitatxi hãuakasaaki, hikaikota iua kãkiti aapoko. Kona hãuape ãti kãkiti aapoko. ¹¹ Kãkiti mapakapakanisaakii, hìsãkire imakenakotakanisaakina, ininiã hìtakanapana. Hìpotorikasaaki, hìkaxipokari kipatxi hìkiti mataã auakari, ininiã ikara atoko hõerekana ninoa maerekani ininiuana. Kãkiti misiritiko sãpiretiko õti apokasaaki, Sotoma sitatxiti auakani misiritiko auapitika. Iuasaaki Komoha sitatxiti auakani misiritiko auapitika. Iuaritika sitatxi auakani hìte mapakapakani misiritaãkako apiata iuasaaki.

¹² Ininiã isana. Isãpiretari kãkiti imaerekani itakanapini.

¹³ Mirikiniti maerekati matamatakoti iokanatana. Iitxiã itakana amianatakani nopini. Ininiã erekapeka itxikitakana amianatakani.

Xoão Kapatxisareri Ipinini
(Mateo 14.1-12; Arókasi 9.7-9)

¹⁴ Auñtetxi Erotxi inakori kenakopiretari Xesosi pirena. Xesosi uãka iaripireta ikini tõpati. Ininiã Erotxi xinikanãta:

—Ikara Xesosi, Xoão kapatxisareri itxaua. Uatxa iua õkitikapekaua. Iuakara Xesosi itxa. Ininiãkara iposotiire aua iuamoni.

¹⁵ ãtikaka uãkatari Xesosi Eríasi ininiu. ãtikaka uãkatari Xesosi Teoso sãkire sãpiretakari kitxakapirika ininiu.

¹⁶ Ikara Erotxi kenakopiretakasaaki, itxari: —Xoãokara nitsotakakiitakitikara iua Xesosi txa. Ipìpekariika iuaãkana õkitikapekaua —itxa.

¹⁷ Mitxi Erotxi takaro itari Piripi ìtanoro. Ouãka Erotxia inakoro. Oa xika Erotxi maĩkari Xoão. Iaxiriitotari, kateia ãki taka itxari. ¹⁸ Xoão takaãka kateia ãki, kotxi itxari Erotximoni:

—!Erekari pitari ìtanoro pitakini —itxari.

¹⁹ Ikara xika Erotxia apaka omanatari Xoão. Oa iteene kinirão okaka otxamari Xoão. Kona oposotari oõkiniri iua, ²⁰ kotxi Erotxi pĩkari Xoão. Iua imarotari, atão inakarinoka kamakari, erekarinoka kamakari ininiua Xoão. Xoão sãkire ikenakotakasaaki, liteene ! imarotari isãkire, iuaritika iua apokaerekatari ikenakotiniri isãkire.

²¹ Erotxi kamari isaiã kiiniriti. Iua kemaĩtxitana sotato auĩteakori, Kariréia auakani auĩteakori, apanakini auĩteakori pakini. ²² Ininiã Erotxia ãkero apoka iua kiiniritiã. Iuasaaki oserenapirĩkata Erotxi apisatoõ, ikemaĩtxitakini apisatoõ pakini. Ninoa potx-itari oserenini. Ininiã Erotxi txaro oa ãtokoro:

—Pinirekakiti pamanaãno, ininiã nisikai. ²³ Atãopitikara nisikai pamanaãkiti. Nitixine pinirekiniã, ipixini nisikai —itxaro.

²⁴ Ininiã oa miteka onoromoni. Oa pimaã txaro onoro:

—Kiripa namanaãtari? —otxaro.

Ininiã onoro txaro:

—“Xoão Kapatxisareri kii prato nopini ninireka,” pitxari. Ikara atoko pamanaãri iua —otxaro.

²⁵ Ininiã katimariã okanapiriã kiiniri auiniãtaã iuaĩkana. Katimariã auĩtetximoni osa. Oamanaãri iua:

—Ninirekari Xoão kapatxisareri kii prato nopini —otxa.

²⁶ Ininiã Erotxi maerekaxiniretinoka itxa, kotxi mitxi iua sãpiretaro oa amanaãkiti isikiniro oa ikemaĩtxitakini apisatoõ. Ininiã !apakata imasikakaniãri isikaenetakiti.

²⁷ Ininiã katimariã ipaniãtari sotatoakori okiniri Xoão:

—Ikii himina —itxa.

Ininiã isana kateiamoni. Itsotakakiitarina Xoão. ²⁸ Pirato nopini itakarina ikii, sika itxarona ãtokoro. Ininiã oa sikari onoromoni.

²⁹ Ininiã Xoão moianariakori kenakopiretakasaakiri Xoão okiko pirena, isana kateiamoni. Aparina iĩto. Itakarina iĩto kai iriko ãki.

Sĩko Mio Kãkiti Xesosi Sikakienatini

(Mateo 14.13-21; Arõkasi 9.10-17; Xoão 6.1-14)

³⁰ Ininiã Xesosi iokanatakini kanapiriã iuamoni. Apoka itxana Xesosimoni. Isãpiretarina ikamakitina, oerekakitina pakini. ³¹ Iuasaaki kaiãopokori kãkiti aua iuaãtaã, ininiã !apakata inipokotinina. Ininiã:

—Amasipeka kãkiti mauakaniãtaã atomatini ĩkapani —itxana.

³² Ininiã kanauaã iereẽtauana. ĩpiriãtarina ipoa. Isana kãkiti mauakaniãtaã. ³³ Kãkiti itikari Xesosi inapaãpotini, ininiã ninoa miteka. Iopiriãrina ipoa koropoa, apoka itxana Xesosi apisapanika. ³⁴ Iua kanĩkiĩtakasaaki apisamoni mirikiniti kãkiti, ininiã iamoniãkana, kotxi soti auĩte ipitikiri mauakinini atoko itxana. Iuasaaki Xesosi oerekana kaiãori Teoso sãpiretakiti.

³⁵ Ininiã mapiãpeka inaãpotiniã, Xesosi moianariakori iuamoni apoka. Itxarina:

—Kona kãkiti aapoko auari uai. Uatxa mapiaãpopeka. ³⁶ Ininiã pipaniãtana kãkiti isinina ĩkapani nipokori iamotinina tĩkane.

³⁷ Ininiã Xesosi:

—Hĩtekarako sikakienatana ninoa —itxana.

Ininiã ninoa:

—Pinirekatari asini komiri aamotini ĩkapani? Oito kasiriti kãkiti parĩkauatini ĩki anireka komiri ĩki naia kãkiti nikini ĩkapani —itxana.

³⁸ Ininiã Xesosi pimaãna ninoa:

—Kipakinipa komiri katari aua? Hãtariko —itxa.

Ninoa imarotakasaakiri, apoka iuamoni. Itxana:

—Sĩko pakini komiri katari, ipi ximaki pakini aua —itxarina.

³⁹ Xesosi paniãtana ikinika kãkiti topãkini katsotati nopini. ⁴⁰ Ātiãtaã iitopãkana sĩkoẽta, ipinimoni iitopãkana seĩ. Imakinikana ikara atoko itxaãpotana iitopãkinina.

⁴¹ Ininiã Xesosi kosekari sĩko pakini komiri, ipi ximaki pakini. Iuasaaki ionakaãta iaxiti: —Erekapitikari pisikakiti —itxa.

Eereka imaxiõpekari komiri. Isikari imoianariakori. Imoianariakoripekana sikaãpotana apanakini. Iuaĩkana imapirinikari ximaki, xanaka itxari imakinikana. ⁴² Ikinimanekana nipokota, kamitopeka itxana. ⁴³ Ininiã imoianariakori apotiitari ximaki itetakori, komiri itetakori pakini. Tosi pakini kotari xãpoka itetakori. ⁴⁴ Iuasaaki siko mio kikiakori nipokotakani.

Xesosi Ipoa Nopini Itĩpokotini

(Mateo 14.22-33; Xoã 6.15-21)

⁴⁵ Xesosi takapiretakasaakiri kãkiti, iuasaaki iokanatana imoianariakori ĩpiriãtinina iua apisa, Petsãita tixinimoni isinina ĩkapani. ⁴⁶ Xesosi takapiretanapaka atoko, mitaxiratarari nopini isa Teoso imisãkiretini ĩkapani. ⁴⁷ Mapiãpe inakasaaki kanaua ipoa apanĩkakiãxitipeka aua. Iuasaaki Xesosi imiriĩpanika aua.

⁴⁸ Xesosi atamatana ninoa, itaparanoka itxana imekoãtinina, kotxi ĩtima, tsakati pakini anikaãpotana ninoa. Ininiã ikatimaãpotakasaaki, Xesosi apokaãpota ninoamoni. Itĩpokota ipoa nopini. Inapaãpoaritana imoianariakori. ⁴⁹ Ininiã ninoa atapakasaakiri ipoa nopini itĩpokotini, ninoa uãkatari kamiri. Ininiã ninoa akiripoakata. ⁵⁰ Ininiã iua misãkiretana:

—Kataparaxinire hĩtxako. Notakara. Na !hĩpĩkarauatape —itxana imoianariakori.

⁵¹ Eereka kanauaã iereẽtaua. Iuasaaki ĩtima iotoka itxa. Ininiã itikokitatana ninoa. Itsoriãkaãtana:

—Kiripa atxiĩti? —itxana.

⁵² Ikara atoko isãkirena, kotxi kona ixinikaikarina Xesosi posotiire komiri ixanakasaaki. Paikoxinirena ninoa iuasaaki.

Xesosi Makananitana Amianatakani Xenesareekini

(Mateo 14.34-36)

⁵³ Xesosi imoianariakorikata ĩpiriãtari ipoa. Isari Xenesaree tixinimoni. ⁵⁴ Ikanĩkiĩtakasaakina apanakini itikari Xesosi.

—Xesosira —itxana.

⁵⁵ Ininiã imitekana kãkiti auinimoni amianatakani apinina ĩkapani. Anikana isirimatana nopini Xesosimoni. ⁵⁶ Ikini sitatxiti kãkiti amianatakani sirĩka kimapori tiniãpo. Amanaãrina Xesosi auitinina ninoa imãka itikakinina. Ikinikana imãka tikakakani erekapeka itxĩkitaka.

7

Xoteoakori ĩkĩte Pirena

(Mateo 15.1-9)

¹ Ininiã pariseoakori, kaiõkatsopareriakori pakini, Xerosareẽ ĩkani, apotiitaua Xesosikata. ² Iuasaaki itikarina Xesosi moianariakori marokapiotakanuia nipokori inikinina apisa. Ininiã itxana:

—!Erekari imarokapiotakaniauana —itxana.

³ Pariseoakori, imakinikana Xoteoakori apaka kamari ikiomaneakori kitxakapirĩkarini sãkire iaõka. Inipokotinina apisapanika arokapiotauana.

⁴ Nipokori amotikoãtaã Xoteoakori sikasaaki, eereka apokasaakina aapokona imarokapiotakaniãuana kona inipokotana. Tiitxi iãkoanaxi, kopiti, apanakini itiina pakini arokasaakina ikiomaneakorini oerekakiti iaõka arokana.

⁵ Ininiã pariseoakori, kaiõkatsopareriakori pakini pimaãri Xesosi:

—Kinirepa pimoianariakori kona kamatarari kitxakapirĩka atoko ininina? Kinirepa marokapiotakanikaua inikarina nipokori? —itxarina.

⁶ Ininiã Xesosi apakapireta:

—Mĩtxipitipanika Isaía sãpiretai hĩte. Atão iua sãkire, kotxi hĩsãkire atxiĩti erekari, txamari kona hĩkamari hĩsãkire iaõka. Iua txari:

Kamisirienererini ninoa kãkiti. Ninoa sãkireẽnanira ipaxitanona. ãkixinireẽna ! inirekanona.

⁷ Maxikatiika ninoa kapotoreëkaua nota apisatoõ. Maxikatiika ninoa txano: “Ateosone pitxaua,” kotxi ninoa !oerekari nota sãkire. Ninoaka sãkire oerekana, txamari “Teoso sãkire asãpiretai” itxana.

Ikara atoko Isaía iõkatsopatakiti Teoso sãkire.

⁸ —Ininiã hĩtakanapapekari Teoso sãkire, kãkiti oereëkiti hĩkamini ĩkapani. ⁹ Hĩtakanapapikari Teoso paniãtakiti, hinirekaãkiti hĩkamini ĩkapani. ¹⁰ Kitxakapirika Moisesi txari:

Pipaxitariko piri. Pipaxitaroko pinoro. Piri, pinoro pimisãkirepiretiniã, pokaãkako, itxa Moisesi sãkire. ¹¹ Txamari hĩte oerekari kãkiti: “Kãkiti auakiti iri, inoro pakini nirekiniã, iua manirekakaniãri isikiniri ninoamoni, isãpiretana: ‘Ia nota auakiti nisika Teosomoni.’” Ininiã ĩsikari ninoa nirekakiti ninoamoni. Ikara atoko inakari kãkiti sikakiti Teosomoni, hĩte takauãkatari “Kopaã.” ¹² Ininiãkara hõerekari kãkiti imatiretakanina iri, inoro pakini. !Apakata hõerekakiti. ¹³ Ikara hõerekakiti xika kona hĩte maãkatari Teoso sãkire. Apiata hinirekari kãkiti oereëkiti. Auapanika itori hõereëkiti sãkiretxiti ikara atoko inakari —itxa Xesosi.

*Ãkixiniretxi Txiko Pirena
(Mateo 15.10-20)*

¹⁴ Xesosi iuaĩkana akiritana ikinimane kãkiti. Itxana:

—Hĩkinika hĩkenakota. Hĩtakaõtxikariko nisãkire. ¹⁵ Imakinika hinikakiti, mapara auakari. !Ikamari ate maerekani. Hĩxinireë potoriãkarira kamari maerekanitxi.

¹⁶ Kakenakokii, ininiã hĩkenakotariko nisãkire —itxa Xesosi.

¹⁷ Ikinimane kãkiti itakanapaka atoko, aapokotxi ãki ĩroã. Iuasaaki imoianariakori pimaãri:

—Pisãpiretaua mixikanani pisãpiretakiti —itxana.

¹⁸ Ininiã iua txari:

—!Kĩĩkitej hĩte. Kona hĩte imarotatari hinamaã ĩroãkari kona kamari maerekanitxi.

¹⁹ Kotxi ĩroãkari ĩsari hĩxiniremoni. Hĩtikako ãki isa. Iposo atoko hĩtikatakasaaki inapa. Ikara atoko ininiã, erekari ikinipoko kãkiti niãkiti.

²⁰ —Ixinireë potoriãkari iuara kamari kãkiti maerekani. ²¹ Kãkiti ãkixinire ipotorika ixinikakiti maerekati, anokaretxi, ĩtiriatakatxi, okaniuatakatxi, ãti kãkiti ĩtanorokata isirĩkini nire pakini. ²² Kãkiti ãkixinireë ipotorika itirenani, maerekati Satanasi oerekakiti, misirienereTXi, pẽtauatakatxi kamakari, xikotakatxi, ãti misãkirepiretiko, iuikiniua, miĩkiteti inini pakini. ²³ Ikinika ikara maerekati kãkiti ãkixinire auakari txikotari kãkiti xinire —itxa Xesosi.

*Xoteo Minakatoua Auikiniri Xesosi Sãkire
(Mateo 15.21-28)*

²⁴ Xenesaree tixini Xesosi potorika. Txiro sitatxiti tõpa, Sitoõ tixini pakinimoni isa. Iuaã kãkiti aapoko ĩroã. Kona inirekari kãkiti imarotiniri iua auiniãtaã. Txamari ! iposotari iomaãtiniua. Kãkiti imaroãpotari iua auiniãtaã. ²⁵ Sito apoka Xesosimoni, kotxi oa kenakopiretari Xesosi pirena. Maerekati matamatakoti auãtotaro oimi. Oãpokasaaki Xesosimoni, okapotoreëkaua iua apisatoõ.

²⁶ Oa sito sãkiretari Kreko sãkire. ãto uãka oa. Siropenísia tixinikero oa. Okapoteëkasaakiua Xesosi apisatoõ, oamanaãri Xesosi:

—Pomitikenatariko maerekati matamatakoti namarite ĩtoã auakari —otxari.

²⁷ Ininiã Xesosi:

—Xoteo !pitxaua. Maparakerorai. Pite nirekakari nisikinii Xoteoakori nakiti. Amarini mitxi nikini atão. !Erekari nokiniri amarini kiena anãpamoni —itxaro oa.

²⁸ Oa apakapapireta:

—Atãopitikara ikara atoko pitxa, kotxi nota maparakerero, anãpa atoko Xoteoakorimoni. Iuaritika kãkiti auiritari anãpapiki nikiniri nipokori katxakakari amarini nipokotiniãtaã patapi —otxari Xesosi.

²⁹ Ininiã Xesosi apakapapireta:

—Erekari papakapapiretini, ininiã paapokomoni pisa. Maerekati matamatakoti ! auaika pamarite ĩtoã —itxaro.

³⁰ Oaãpoko oãpokasaaki, oãpokaro oamarite siríkanãta. Erekapekaro oa. Maerekati matamatakoti asikapekaro.

Makenakoreti Pirena

³¹ Eereka Xesosi takanapari Txiro sitatxiti tõpa. Ìpirixititari Sitoõ tixini. Sitatxi tõpa tesi pakini ìpirixitita. Apoka Kariréia poamoni. ³² Átikaka kãkiti minari makenakoreti Xesosimoni. Iposota atão isãkirauatini. Ninoa iteene amanaãri Xesosi:

—Piuako pitaka iua nopini kakenakorepeka inini ìkapani —itxana.

³³ Xesosi anikari iua kiki kãkiti mauakaniãtaã. Itakari iuakoki ikĩpita ãki. Eereka ikiisoka, taka itxari ienemaã masãkireti nini nopini. ³⁴ Eereka ionakaãta iaxiti, oõka itxa: —Epataa —itxa.

Popĩkari sãkireẽ, “Piauãka.” ³⁵ Iuasaakipeka ikenakoki auãka, ininiã kakenakorepeka itxa. Iuasaaki inini poiõpeka apaka. Eereka erekapeka itxa isãkirauatini. ³⁶ Ininiã Xesosi txana ninoa:

—Kona hĩsãpiretapiri apanakini nimakananitiniri iua.

Txamari apiata ninoa sãpirenauata. ³⁷ Kãkiti tsorĩkaãta:

—Ìkinika ikamakiti peerekari. Makenakoreti kakenakorepeka itxa. Mimatasaãkiretakati, kasãkirepeka itxa —itxana.

8

Xesosi Sikakienatana Ipi Ipi Pakini Mio Kãkiti (Mateo 15.32-39)

¹ Eereka mapaõti itomaneri kãkiti apotiitaua Xesosimoni. Nipokori xipokapeka, ininiã Xesosi akiritana imoianariakori. Itxana ninoa:

² —Nota amonĩkana naia kãkiti, kotxi ipi õti, ãti õti pakini õtipeka auana notakata. Ininiã uatxa nipokori !auaika. ³ Niokanatiniaãna auinimoni manipokotakatipanikana, ininiã ipixiniãpo iõkapetana. Irikana. Átikaka õtako ìkani kona apakata manipokotakanika isinina —Xesosi txana imoianariakori.

⁴ Imoianariakori apakapapireta:

—Uai aapokotxi mauakaniãtaã, ininiãkara nãpa aãpokari nipokori ito naia kãkiti asikakienatini ìkapani? —itxana.

⁵ Ininiã Xesosi:

—Kipakinipa komiri katari hĩtemoni aua?

—Setxinokara komiri aua atemoni —itxana.

⁶ Ipaniãtari kãkiti topãkini ixiti. Imaĩkari iua komiri setxi.

—Erekari pisiãkiti —itxari Teoso.

Iposo atoko imaxiõpekari komiri, sika itxana imoianariakori. Imoianariakori sika itxana apanakinimoni. ⁷ Ninoamoni aua átikaka ximaki axapitiri. Ininiã Xesosi txari:

—Ia erekari —itxa Teosomoni.

Eereka ipaniãtana imoianariakori sikiniri kãkitimoni. ⁸ Ininiã ikinipoko kamitopeka itxana. Iposo atoko apotiita itxarina itetakori. Xãpokaka itxarina setxi kotarina. ⁹ Ninoa komiri nikakani ipi ipi pakini mio kãkiti. Kamitopeka itxana.

Ininiã itakapiretanapana ninoa. ¹⁰ Iposo atoko imoianariakorikata iereãtaua kanaua ãki. Taomanota tõpamoni isana.

Pariseokori Nirekari Xesosi Oerekiniri Iposotiire (Mateo 12.38-42; 16.1-4; Arókasi 11.29-32)

¹¹ Pariseokori apoka Xesosimoni. Inirekarina Xesosi kerokiniri, ininiã itxarina Xesosi:

—Takaõtxikari, Teoso posotiire poerekaua ate, aãtamatiniri ìkapani, Teoso iokanatinii ìkorapokoriti aimarotini ìkapani —itxarina. ¹² Ininiã Xesosi oõka. Itxari:

—Kinirepa kãkiti uatxarini nirekari noerekiniri Teoso takaõtxikare, iposotiire? Atãopitikara nota txai hĩte, kona noerekai hĩte.

¹³ Ininiã itakanapana. Iereãtaua kanaua ãki. Ikanapiriã ipoa ipiniãmoni iuaĩkana.

*Pão Tireêkari Pirena
(Mateo 16.5-12)*

¹⁴ Xesosi moianariakori maxinîkaretari pão. Átika pão porîi kanaua âki aua. ¹⁵ Ininiã Xesosi ôtãkikana:

—Erepaniko, pamonõkoniri pariseoakori, Erotxi pakini pãote tireêkari —itxa Xesosi.

¹⁶ Xesosi moianariakori misãkiretakakaua:

—Ikara atoko itxaua, kotxi amaxinîkaretari pão.

¹⁷ Xesosi imarotari ninoa sãkire, ininiã itxana:

—Kinirepa hîsãkirauanãta pão mauakani xika? Kona himarotatapanikari niposotiire? Kona hiikitetapanikari? Kona hinirekatari hãuikiniri nisãkire? ¹⁸ Kokimai, txamari, ! hãtamatari. Kakenakokimai, txamari !hîkenakotari nisãkire. ¹⁹ Kona hîxinikapanikari iusaaki nimaxiõpekitakiti sîko komiri, sîko mio kãkiti nisikakienatini? Kipakinipa kotari itetakori hîxãpokaka? —ipimaãna.

Ininiã ninoa apakapapireta:

—Tosi kotari axãpokaka.

²⁰ Xesosi txana ninoa:

—Eereka áti ôti nimaxiõpekari setxi komiri porîi. Nisikari ipi ipi pakini mio kãkiti. Itetakori hãpotiitakiti, kipakinipa kotari hîxãpokaka? —ipimaãna.

Ininiã ninoa:

—Setxi kotari axãpokaka.

²¹ Ininiã Xesosi:

—Ininiã kinirepa kona hiikitetapanikari?

Mõsiãreti Petsáita Aapokotxitikiri

²² Xesosi Petsáita aapokotxitimoni apoka. Iusaaki kãkiti minari mõsiãreti iuamoni. Amanaãrina Xesosi maãtakiniri iua mõsiãreti. ²³ Ininiã iua anikaãpotari iuakoã kãkiti mauakanimoni. Iuaã iminapari ienemaã mõsiãreti okiã. Eereka taka itxari iuako iïtoã. Ipimaãri iua:

—Kõsiãrepekai? —itxari.

²⁴ Ininiã iua atamata.

—Nota itikapokotapeka, txamari nitikari kãkiti tîpokotakari aamina atoko —itxa.

²⁵ Iposo atoko Xesosi iuaikana takari iuako mõsiãreti nopini. Eereka mõsiãreti atão itikapokotapeka. Ikinipoko atamata. ²⁶ Ininiã Xesosi iokanatarari:

—Pisipeka paapokomoni. Kona pisipe Petsáita aapokotxitimoni, kotxi kona ninirekari pisãpiretiniri nikamakiti kãkitimoni —itxa Xesosi.

*Petro Auikari Xesosi Teoso Mereêkiti Ininiãua
(Mateo 16.13-20; Arókasi 9.18-20)*

²⁷ Eereka Xesosi imoianariakorikata sari kãkiti poiãoka auinimoni, Sesaréia-Piripi sitatxiti takote isana. Ipixiniãpo Xesosi pimaãna imoianariakori:

—Kiripa kãkiti uãkatano nota? —itxa.

²⁸ Ninoa apakapapireta:

—Xoão kapatxisareri iuãkataina. Apanakini “Eríasi inakori” iuãkataina. Ininiã apanakini “Teoso sãkire sãpiretakari” iuãkataina —itxana Xesosi moianariakori.

²⁹ Iuaikana Xesosi pimaãna:

—Hîtepekana, kipa hîte uãkatano? —itxana.

Ininiã Petro apakapapiretari:

—Teoso mereêkiti, kãkiti iãtapanãtakiti pitxaua —itxari.

³⁰ Ininiã Xesosi txana imoianariakori:

—Teoso mereêkiti nininiua lhîsãpiretapiri apanakini —itxa.

Xesosi Sãpiretari Ipinini

(Mateo 16.21-28; Arókasi 9.22-27)

³¹ Ininiã ia atoko oerekarauata:

—Nota hîtari iaxitikiri iteene atatsiirauatako. Kiomãtxiakori, sasetotxi auíteakori, kaiõkatsoparerini pakini kona nirekapanino nota. Nokaãkako. Eereka ipi áti pakini ôtisaaki iuaikana nõkitikauako.

³² Ikara isāpireta ikinimane kākitimoni. Ininiā Petro anikari iua maparamoni. Itxari:
—Kona ikara atoko !pityape. Kona erekari pisākire ikara atoko pinini —itxa Petro.

³³ Ininiā Xesosi kirioka imoianariakorimoni. Iua txitari Petro:
—Pisipiniikaua Satanasi. Pite nireēkiti kākiti nireēkiti atokotxikana. Pite nireēkiti kona Teoso nireēkiti atokoni —itxa Xesosi.

Xesosi Moianari Atāo Inakari
(Mateo 16.24-28; Arókasi 9.23-27)

³⁴ Xesosi akiritana kākiti imoianariakori apaka. Itxana ninoa:
—Notakata kinirāo sika pinakasaaki, piteka pinireēkiti kona pixinikape. Notakata kinirāo sika pinakasaaki, nota misiritiko atokokana pimisiritaākako. Ia atoko pinirekiniā, notakata pisapitikako. ³⁵ Pite ātipirika kaminiāri piteka nireēkitinoka, ininiā pinireēkiti xipokapitikako pitekata. Pite nireēkiti xipokiniā, nota sākire pauikini xika, Teoso iokanapirena erekari pisāpiretini xika, pite auapininiika txako Teosokata.

³⁶ Atxiīti papakapari ikinipoko tiitxi, ikini itixiti auakani tii, pinakiti ikapani. Atxiīti iua tiitxi xika kona pikīpitari Teoso sākire, ininiā kona pikaikota ātipirika Teosokata. Ikara atoko ininiā, erekari atxiīti ikinipoko tiitxi auinii? Konapitini. Apiaerekata Teosokata ātipirika pikaikotini, kotxi tiitxi iki poiāoka, pixinire karone apiata. ³⁷ ! Apakata kākiti iikitxitiniri Teoso, iuamoni isini ikapani.

³⁸ Īkorsaaki kākiti ! inirekari Teoso. Inirekari maerekatinoka. Īkorsaaki pipētatiniano nota, pipētatināri nota sākire, ininiākara nota kākiti itari iaxitikirino pētataiko pite, uai nikanapiriākasaaki. Nikanapiriākasaaki, niri iotximere aua notamoni. Nina niri nitiriakorikata, erekarinikata.

9

¹ Xesosi txana ninoa:
—Hixinikariko ia nisākire. Apanakini hīte uatxa uai auakanii, hīpinini apisapanika himarotari Teoso auītetxi ininiāua. Auītetxi kaposotiireri itxaua —itxa Xesosi.

Moisesi, Eríasi Pakini
(Mateo 17.1-13; Arókasi 9.28-36)

² Seisi pakini ōti napaka atoko Xesosi anikana Petro, Txiako, Xoāo pakini oxiratarimoni, mitaxiratarimoni. Iuasaaki ninoanani aua iuaā. Iuaā auakasaakina, Xesosi ito ipinipo itxa. ³ Imāka kasarori itxaua. Iotximere apaka auari. Ikara imāka saro atoko inakari, !auari. Kākiti iteene arokiniāri mākatxi, iuaritika ikara isaro atoko !auari. ⁴ Iuasaaki Eríasi, Moisesi pakini tokiā iuaā. Isākirauatana Xesosikata. ⁵ Ininiā Petro txari Xesosi:

—Koerekareri, erekapitikari uai aūuini. Makamari papiri ipi āti pakini, pite ikapani, Moisesi ikapani, Eríasi ikapani —itxa.

⁶ Ikara atoko itxa Petro, kotxi !imarotaikari isākire, iteene ipīkarauatiniā.

⁷ Iuasaaki katxiāri apoka ninoamoni. Katxiāri āki auana. Katxiāri āki Teoso txari:

—Ere namarite, nitiretakiti. Hīkenakotariko iua sākire —itxa.

⁸ Katimaritika Xesosi moianariakori sapotorika. Itikapokotana. Mitxi Xesosikata sākirauatakani !auaika iuaā. Xesosinokara kaikota ninoakata.

⁹ Ōtanoxirataro iokiriiāpotakasaakina, Xesosi txana:

—Mixikanani hītikakiti !hīsāpiretapiri apanakini. Nota hītari iaxitikiri nipinaka atoko iuaīkana nōkitikaākaua atokoikarako, hīsāpiretariko mixikanani hītikakiti —itxana.

¹⁰ Ininiā !isāpiretarina apanakinimoni. Ninoanoka isākirauanātana:

—Natokopa itxa kākiti ipīkaripeka iuaīkana ōkitikiniāua —itxanātana.

¹¹ Ipimaārina Xesosi:

—Kinirepa kaiōkatsoparerini sākire: “Teoso mereēkiti apokini apisapanikarako Eríasi apokako.” Kinirepa ikara atoko itxana?

¹² Ininiā Xesosi:

—Inipitikara Eríasi apoka merepanika, kākiti iposope inini ikapani. Teoso sākire iōkatsopatakori txari: “Kākiti itari iaxitikiri iteene atatsirauatoko. !Inirekaākako.” Kinirepa ikara atoko itxa Teoso sākire iōkatsopatakori? ¹³ Nisāpiretaiko Eríasi apokapeka.

Kākiti misiritapekari iuani. Inireēka iaōka imisiritarina. Teoso sākire iōkatsopatakori sāpiretapekari ikara ene —itxa Xesosi.

*Amarini Maerekati Matamatakoti Auaītotakiti
(Mateo 17.14-21; Arókasi 9.37-43a)*

¹⁴ Ninoa apokaāpotakasaaki apanakini imoianariakorimoni, atamatana kākitipokoni. Ninoa ākitana Xesosi moianariakori. Iuasaaki kaiōkatsoparerini kākitikata itaparakiene-takakaua. ¹⁵ Iuasaaki kākiti atapari Xesosi. Ipoxoniritikana itxana:

—Xesosi napani.

Ininiā imitekana iuamoni, okapireta itxarina:

—Piteni?

¹⁶ Ininiā Xesosi:

—Ari, notara.

Ipimaāna:

—Kininiāpa hītxitakakaua? —itxa.

¹⁷ Ininiā kiki kākiti sauaki auakari apakapapiretari:

—Nota minamari namarite pitemoni. Maerekati matamatakoti auaītotari iua. ! Auiritari namarite sākirauatini. ¹⁸ Iua maīkasaakiri, okaītotari iua xiti. Iuasaaki namarite sorikipeta. Akatsakatsiriitaua. Itorōkaītota. Ininiā nimisākiretamana pimoianariakori omitikiniri maerekati matamatakoti, txamari ninoa liposotari.

¹⁹ Xesosi txari:

—!Kauikarei hīte. Maerekati kamakanii hīte. Kipakinikananipa Teoso nirekatari hītekata nauini? Kipakinikananipa Teoso nirekatari hīte nimīteenekini? Himinari amarini notamoni —itxana.

²⁰ Ininiā ninoa anikari iua amarini Xesosimoni. Iuasaakipeka maerekati matamatakoti atamatarari Xesosi. Iuasaakipeka maerekati matamatakoti txīkitakari amarini okaratinuia. Ininiā iua amarini iriākata. Ikanapirikata, isorikipekata, itxīkitakari amarini.

²¹ Xesosi pimaāri iri:

—Kirisaaqipa ipotorika ĩkora atoko inini?

—Axapitipanikara ipotorika ĩkora atoko inini. ²² Itokata maerekati matamatakoti okaītotari xaminamoni. Itokata okaītotari kăuaārimoni. Inirekari okiniri iua. Piposotiniāri, pomitikariko maerekati matamatakoti. Piamonīkauako atepaniko —itxa iri sākire.

²³ Ininiā Xesosi:

—Nota posotatari? Teoso sākire auiaākari posotari ikaminiri ikinika —itxari.

²⁴ Iuasaaki iua kiki apakapapiretari iātsaritika:

—Nauikapitikari piposotiire. Axapitikinoka ! nauikari, ininiā pisikaposotiiretano iteene pisākire nauikini ĩkapani.

²⁵ Isākirauanātakasaakina, kākitipokoni miteēkata ninoamoni Xesosi kamakiti imarotina ĩkapani. Ininiā Xesosi itapararitika txitari maerekati matamatakoti:

—Pite maerekati matamatakoti. Pitxīkitakari kākiti masākireti inini. Pitxīkitakari kākiti makenakokiti inini. Nota omitikai pite. Pipokīka. Iuaīkana !piīroāpinikako iua ĩtoā —itxa Xesosi.

²⁶ Iua maerekati matamatakoti akiripoakata. Okaraītokatari atoko, sipe itxa. Iua amarini ipīkari ĩto atokopeka itxa. Ininiā apanakini kākiti:

—Ipīpeka —itxarina.

²⁷ Ininiā Xesosi maīkauakotari. Ōkitikari iua, ininiā itima.

²⁸ Xesosi aapokotxi āki auakasaaki, iuanoka inakasaaki, imoianariakori pimaāri:

—Natokopa ininiāpa kona ate posotatari maerekati matamatakoti aomitikini? —itxana iuamoni.

²⁹ Ininiā Xesosi:

—Teoso pimisākiretakasaaki, iuasaaki pimanipokotakaniāra, iuasaaki piposotari ikara atoko inakari maerekati matamatakoti pomitikini —itxa Xesosi.

*Xesosi Iuaīkana Sāpiretari Ipinini
(Mateo 17.22-23; Arókasi 9.43b-45)*

³⁰ Iuaã ipotorikana. Īpirixititarina Kariréia tōpa. Xesosi !inirekari apanakini kenakenetini iua auiniātaã. ³¹ Kotxi inirekari oerekinina imoianariakorinoka ipinini pirena. Ininiã Xesosi:

—Nota hītari iaxitikiri mīkapiritaākako. Nisikaākako kikiakorimoni inirekaākitina ikaminina tīkane. Ninoa okano nota. Ipi ōti āti ōti inakasaaki iuaīkana nōkitikauako —itxa.

³² Ninoa !imarotari Xesosi sākire. Ninoa pīkari ipimainirina iua.

Kiripa Kākiti Apiatakari Txataua?

(Mateo 18.1-5; Arókasi 9.46-48)

³³ Kapanaoō sitatxiti apokana. Aapokotxi āki auakasaakina, Xesosi pimaãna ninoa:

—Natokopa itxa hīsākire, uaimoni aīkasaaki hītaparakienatakakasaakia? —itxa.

³⁴ Masākirenika itxana, kotxi kimaporiāpo ninoa sākire: “Īkiripa ate apiatakari?” itxana. ³⁵ Xesosi, iitopāka atoko, akirita itxana imoianariakori tosi pakini.

—Hīkinika uaimoni hīitopāka. Apiatakari pininiāua pinirekiniā, piteka poiāotakaua. Ikinimane nitiri pitxauako.

³⁶ Xesosi kosekari amarini, mina itxari imoianariakori sauaki, katarata itxari.

³⁷ —Papakapiniāri amarini pipoxokoniritika, papakapano nota apaka. Papakapiniāno nota, na notananini papakapa. Iuasaaki papakapari iua uaimoni niokanatakiri —itxa Xesosi.

Maerekani Matamatakoni Omitiākari

(Arókasi 9.49-50)

³⁸ Xoão sāpiretari Xesosi:

—Koerekareri, ate kenakotari kiki omitikinina maerekani matamatakoni pite uākaã. Kona pimoianarini iua. Ininiã ate: “Ikara atoko !pitxape,” atxari.

³⁹ Ininiã Xesosi:

—!Hīotokapiri ikara ikamini. Kākiti nota uākaã maerekati matamatakoti omitiākari, kona imisākireporetano. ⁴⁰ Iua ate mokaiakari minakatiua. Atiretakiri itxaua. ⁴¹ Nota atāopitikara nitxai hīte. Atxiīti kākiti sikai āparaã, kotxi Teoso mereēkiti nakiti pitxaua. Iua kamakiti erekari, ininiã apakapitikariko ikamakiti īki.

Maerekati Oerekakari

(Mateo 18.6-9; Arókasi 17.1-2)

⁴² !Erekari kākiti mitari oerekiniāri amarini nota sākire auīākari maerekati ikamini. !Erekari. Erekamariko kai mitari iaxirikaākamako iua kākiti mitari nokiā, eereka okaākamako ipoamoni ipinini ĩkapani. ⁴³ Piuako maerekati ikamākitakiniāi, pitsotakari. Erekamariko ātinani piuako Teosokata ātipirika pauini ĩkapani, kotxi maerekati pikaminiā, pisa maerekani misiritikoātaã. Iuaã xamina tirinapika. !Oakaāka. Atxiīti piuako ipi aua, txamari pite sari iuaātaã. !Erekari. ⁴⁴ Iuaã kītxi pītoā auakaro !opina. Xamina !oakaāka.

⁴⁵ Pikiti maerekati ikamākitakiniāi, pitsotakari. Erekamariko ātinani pikiti Teosokata ātipirika pauini ĩkapani, kotxi maerekati pikaminiā, pisa maerekani misiritikoātaã. Iuaã xamina tirinapika. !Oakaāka. Atxiīti pikiti ipi aua, txamari pite sari iuaā. !Erekari.

⁴⁶ Iuaã kītxi pītoā auakaro !opina. Xamina !oakaāka. ⁴⁷ Poki maerekati ikamākitakiniāi, pimakatxakari. Erekamariko ātinoka poki auini Teoso auītetxi ininiātaāua pisini ĩkapani, kotxi maerekati pikaminiā pisa maerekani misiritikoātaã. Iuaã xamina tirinapika. !Oakaāka. Atxiīti poki ipi aua, txamari pite sari iuaā. !Erekari. ⁴⁸ Iuaã kītxi pītoā auakaro !opina. Xamina !oakaāka.

⁴⁹ Iōkira nipokorimoni takiko atokokana xamina tirinakari takaākako ikinimane kākitimoni. Ikara atokokana ikinimane ataerekataākako. ⁵⁰ Iōkira erekaro. Txamari iōkira koketikosaaki kipatxikata, !erekaikaro. !Apakata xinitxi piōkiratini ĩkapani. Atāo iōkira atoko hītxako. !Hītxitakapeua.

¹ Xesosi potorika iuaã. Xotéia tōpa isa. Īpiriākitari Xotão kãuaãriti. Iuaĩkana kãkiti apotiitaua iuamoni. Kaiãopokori kãkiti, ininiã oerekarauata, mitxi oerekarauanãtini atokokana.

² Kikiakori, pariseo inakaniua, apoka Xesosimoni. Ninoa nirekari Xesosi kerokiniri isãkire, ininiã ipimaãrina:

—Atãokani erekari kiki takanapiniro ĩtanoro?

³ Ininiã Xesosi:

—Kiatokopa itxa Moisesi paniãtakiti?

⁴ Ininiã ninoa:

—Moisesi paniãtari kiki iõkatsopatiniri aãtsopa, ĩtanoro itakanapini aãtsopate, ininiã eereka auiritari iua iokanatiniro oa —itxana.

⁵ Ininiã Xesosi:

—Moisesi auiritari hĩtanoro hĩtakanapini, kotxi paikori hĩxinire. Teoso nireẽkiti himanirekakani xikara, Moisesi auiritari hĩtanoro hĩtakanapini. ⁶ Kotxi merepitipanika Teoso ikinipoko ikamakasaaki, ikamari kiki, sito pakini. ⁷ Ikara atoko ininiãpitikara, kiki takanapari iri, inoro pakini, ĩtanorokata auini ĩkapani. ⁸ Ininiã ãtika atoko itxauana. Ininiã ipi kãkiti litxaikauana. Ātinokara itxapekauana. ⁹ Ikara atoko ininiã, !erekari kãkiti kaiarikiniri Teoso apotiitakini —itxa Xesosi.

¹⁰ Eereka Xesosi imoianariakorikata kanapiriã aapokomonina. Iuaã apokasaakina, imoianariakori pimaãri iua ikara sãkiretxiti iuaĩkana oerekinina ĩkapani. ¹¹ Ininiã isãpiretana:

—Kiki ĩtanoro takanapakari, ãto sito itaka inakari, maerekati ikaminaro ĩtanoro. ¹² Iua atokokana sito õtaniri takanapakaro, ãti õtanirita inakaro maerekati okaminiri õtaniri —itxa Xesosi.

Xesosimoni Amarini Apokini

(Mateo 19.13-15; Arókasi 18.15-17)

¹³ Iposo atoko ãtikaka kãkiti anikari amarini Xesosimoni. Inirekarina Xesosi misãkiretiniri Teoso ninoa amarini ĩkapani. Txamari imoianariakori txitana. !Auiritana amarini anikinina Xesosimoni. ¹⁴ Xesosi ikara ikenakotakasaaki, !apokaerekatari. Ininiã iua:

—Hãuiritariko amarini notamoni apokini. !Hĩtokakapiri, kotxi kãkiti Teoso auĩtetakani amarini atoko itxauana. ¹⁵ Ia atão: Kãkiti mapakapakaniãri Teoso, amarini apakapiniri atoko iminakaniã, kona isa Teoso auĩtetxi ininiãtaãua —itxa Xesosi.

¹⁶ Ininiã Xesosi kataratari amarini. Itakari iuako ikiina nopini. Amanaãri Teoso erekari itakini amarinimoni.

Ātokori Ito Txineiroteri

(Mateo 19.16-30; Arókasi 18.18-30)

¹⁷ Xesosi iuaĩkana potorika. Iuasaaki ãtokori miteka iuamoni. Ikapotoreẽkaua Xesosi apisatoõ.

—Koerekareri erekari, kiripa nikama Teosokata ãtipirika nauini ĩkapani? —itxa.

¹⁸ Ininiã Xesosi:

—Kininiãpa “erekari” pitxano? Teosonanira erekari. ¹⁹ Pite imarotari Teoso paniãtakiti. !Pokaniuatape. !Pisiriãkape ãti ĩtanorokata. !Piĩtiriuatape. Poxiene !pikamape. Apanakini !pimisirienetape. Piri, pinoro pakini pipaxitako —itxa Xesosi.

²⁰ Iua ãtokori txari:

—Noereẽkiri, axapitipanikara ninakasaaki, nikĩpitari ikara Teoso paniãtakiti —itxari.

²¹ Ininiã Xesosi apokaerekatari iua.

—Auapanika ãtinoka pikamini tikane. Pisa. Tiitxi ikinika pinakiti pivẽtxitako. Txineiro papakapakito pisikako matxineirotenimoni. Eereka pimoianatanoko nota. Ikara atoko inakari pikaminiã, Teoso tixine papokasaaki ikinipoko erekari auiniiko pite —itxari iua.

²² Ikara Xesosi sãkire ikenakotakasaaki, imatinaniuata. Isipe. Maerekaxiniretinoka itxa, kotxi kaiãori itii.

²³ Xesosi sapotorika, misãkireta itxana imoianariakori:

—Pamimapaniri katxineiroteri sini Teoso auĩtetxi ininiãtaãua —itxa.

²⁴ Imoianariakori:

—Anekani? —itxana.

Iuaikana Xesosi txari:

—Pamimapaniri katxineiroteri sini Teoso auitetxi ininiātaāua. ²⁵ Atauako kamero napatari ākorike sonakiā? Apia mimari kākiti katxineiroterini auitetiniri Teoso —itxana.

²⁶ Imoianariakori iteene tsorikaānāta.

—Ininiā kipa sari Teoso auitetxi ininiātaāua? —itxana imoianariakori.

²⁷ Ininiā Xesosi apakapapiretana:

—Teoso posotari ikinipoko ikamini. Kākiti !iposotari. Teoso posotari anikiniri katxineiroteri itixinemoni —itxa.

²⁸ Petro txari:

—Ate takanapapekari ikinipoko pite amoianatini ikapani —itxari Xesosi.

²⁹ Ininiā Xesosi:

—Atāo nitxai. Paapoko pitakanapiniā, pitariakori, pitaroakoro, piri, pinoro, pītanoro, pamariteni, pikikiote, pitakanapiniā notakata pisini ikapani, Teoso iokanapirena erekari pisāpiretini ikapani, ³⁰ pitakanapakiti iua apiata nisikaiko. Īkorasaaki nisikaiko itomaneri aapokotxi, itomaneri pitariakori, itomanero pitaroakoro, itomanero pinoroakoro, itomaneri pamariteni, itomaneri pikikiote, nisikaiko. Txamari iusaaki patatsiitari pimisiritiko. Iuaritika eereka Teosokata pauapika ātipirika. ³¹ Uatxa apiari inakari, iusaakiko minakati itxauako. Uatxa minakati inakari, iusaakiko apiari itxauako —itxa Xesosi sākire.

Iuaikana Xesosi Sāpiretari Ipinini

(Mateo 20.17-19; Arókasi 18.31-34)

³² Xesosi imoianariakorikata Xerosareē kimaporite iāpotakasaakina, Xesosi ikiika. Iusaaki ninoa maerekaxiniretinoka itxana. Apanakini ninoa tikini sikani pīkarauata. Ininiā Xesosi iotoka. Akiritana imoianariakori tosi pakini. Isāpiretana paītiki kākiti kamakiti iuamoni tikane. ³³ Ininiā iua:

—Hīkenakota. Xerosareēmoni asa uatxa. Iuaā nota hītari iaxitikiri sikaākako sasetotxi auiteakorimoni, kaiōkatsopareriakorimoni pakini. Ninoa paniātariko nota okiko. Iposo atoko Xoteo minakonimoni sika ninaākako. ³⁴ Inapetanonako. Inoropatanonako aāpitsaā. Ikiisokanonako. Iposo atoko oka ninaākako. Ipi āti pakini ōti inakasaaki iuaikana nōkitikauako —itxa imoianariakorimoni.

Txiako Xoāo Pakini Amanaākiti

(Mateo 20.20-28)

³⁵ Iposo atoko Txiako, Xoāo pakini sari Xesosimoni. Ninoa Sepeteo anaakori.

—Koerekareri, ate nirekari aamanaākiti pikamini —itxana.

³⁶ Ininiā Xesosi pimaāna:

—Kipa hinireka nikaminii hīte? —itxana.

³⁷ —Pite ikinimane auite pinakasaakiaua, pauiritaua pitekata aītopākini, pikikomoni, pisaneremoni aītopākini —itxana.

³⁸ Ininiā Xesosi:

—!Himarotari hamanaākiti, kotxi mapaōti napa atoko nota apakapariko iātatxi tsiitxiā niātini ikapani. Hīposotatari ikara hiātini? Nipatxisataākako tsiitxiā. Hīposotatari ikara atoko hīpatxisatiko?

³⁹ —Aposotapitika —itxana ninoa.

Xesosi txana ninoa:

—Inipitikara hiātariko nota iātakiti. Inipitikara hīpatxisataākako nota patxisatiko atokokana. ⁴⁰ Txamari Iniposotari nauiritinii hīte nikikomoni, nisanaremoni hītopākini, kotxi Teoso mereēpekana kākiti nikikomoni, nisanaremoni topākakani tikane —itxa Xesosi.

⁴¹ Xesosi moianariakori tesi pakini kenakopiretakasaakiri Txiako, Xoāo pakini amanaākiti, ininiā ninoa omanatana. ⁴² Ininiā Xesosi akirita txana imoianariakori:

—Uaimoni hina. Hītopāka notakata —itxana ninoa.

—Hīte imarotari Xoteo minakaniua auīteakori pataparana. Ninoa auiritari kākiti kaminiri ninoa paniātakinoka. ⁴³ Ninoa atoko !hītxape. Apiari pininiua pinirekiniā, pimoianatana apanakini. ⁴⁴ Apanakini auīte pininiā pinirekiniā, nitiritxi pitxauako merepanika. ⁴⁵ Ikara atoko nitxa nota hītari iaxitikiri ĩkorapokoriti napokasaaki. Ninitiri !auari. ĩkorapokoriti napoka, kākiti nitiri nininiua ĩkapani, kākiti nitiretini ĩkapani. ĩkorapokoriti napoka nipinini ĩkapani, kaiāopokori kākiti mapinakani ĩkapani, kotxi nota ĩkitxirauata ninoa mapinakani ĩkapani —itxa Xesosi.

Mōsiāreti Patximeo Inakori
(Mateo 20.29-34; Arókasi 18.35-43)

⁴⁶ Xesosi imoianariakorikata apoka Xerikoo sitatxiti. Eereka ipotorikasaaki imoianariakorikata itomaneri kākitekata, iusaaki mōsiāreti Patximeo inakori kimapori ĩtiniāpo iitopākanāta. Tximeo inakori ākiri iua. Iua mōsiāreti amanaānātarō txineiro. ⁴⁷ Iua kenakotari Xesosi Nasareekiri inapaenetini, ininiā akirināta:

—Xesosi, Taviini apika mekanirii, piamonīkanoko —itxa.

⁴⁸ Ininiā apanakini kākiti pinitari:

—Maātako. !Pakirinātape —itxarina mōsiāreti.

Iuaritika apiata akirinānikata:

—Taviini apika mekani. Piamonīkanoko nota —itxanāta.

⁴⁹ Ininiā Xesosi iotoka itxa.

—Hākiritari iua mōsiāreti —itxa.

Ininiā ninoa:

—Pīpoxokoniuatako. Pōkitikaua. Akiritapekai —itxarina iua mōsiāreti.

⁵⁰ Ininiā Patximeo okanapari imāka inopini auakari. Pakoteri ōkitikaua, sa itxa Xesosi akiritiniri manapi.

⁵¹ Ininiā Xesosi:

—Kipa pinireka nota kaminii pite? —itxari.

—Apiananiri, nōsiārera ninireka —itxari.

⁵² Ininiā Xesosi:

—Pisa. Erekapekai, kotxi pite auikari niposotiire —itxari.

Iusaakipeka Patximeo kōsiārepeka itxa. Xesosikata sa itxa kimaporiā.

11

Xesosi Xerosareē Apokaāpotini
(Mateo 21.1-11; Arókasi 19.28-40; Xoão 12.12-19)

¹ Xesosi imoianariakorikata imatokoāpotari Xerosareē. Ōtanoxiratarī, oriva mina takikoātaā takote apokana. Iuaā aua aapokotxi Petxipaxee inakori, Petánia inakori apaka. Iuaā Xesosi iokanatana ipi imoianariakori.

² —Hīsa ikiraā kaixiti auakari aapokotxiā. Iuaā hāpokasaaki, hāpokari xomēta ākiri iaxiriākori. Kākiti !iitopākapanika iua nopini. Hīkoxirikari. Uaimoni mina hītxari.

³ Kākiti pimaākasaakii hīte: “Kinirepa hīkoxirikatarī xomēta ākiri?” hinikosaakiko: “Apiananiri nirekari iua. Iuaīkana akamoni aminariko,” hītxako.

⁴ Ininiā eereka isana. Apokarina iua xomēta ākiri iaxiriākori kimaporiā aapokotxi tore takote. Ininiā ikoxirikarina. ⁵ Ātikaka kākiti iuaā auakani:

—Kinirepa hīkoxirikatarī xomēta ākiri? —itxana Xesosi moianariakorimoni.

⁶ Ininiā Xesosi paniātini iaōka apakapapiretana. Ininiā kākiti iuaā auakani:

—Ininiā hanikaikari —itxana.

⁷ Ninoa anikari xomēta ākiri Xesosimoni. Ininiā imākana āti imākana nopini auakari itakarina xomēta ākiri nopini Xesosi topākini ĩkapani. ⁸ Apanakini kākiti matameēkari imākana āti imākana nopini auakari kimaporiā Xesosi napini tīkane. Apanakinipekana sauakari aāxike. Kimaporiā itakaāpotarina. ⁹ Ninoa Xesosi tikini ĩkani, iua apisa sikani pakini akiriāpokatana ipoxokoniritikana imakinikana:

—Peerekari Teoso, Apiananiri. Iua iokanatai pite atemoni. Anirekari erekari isikinii pite. ¹⁰ Peerekari Teoso, aätokirini Tavii aäuñte ininiua atokokana iuaikana apoka. Peerekari Teoso, iaxiti apiko nopinixiti auakari. Apiananiri itxaua —itxañpokatana.

¹¹ Xesosi apoka Xerosareë. Teoso misäkiretiko aikotimoni isa. Iuaã ñroã itxa. Ikinika iroko äki itikapokota. Iua atoko mapiäpe, ininiã isari Petánia aapokotxitimoni tosi imoianariakorikata.

Piko Mina Marito Pirena
(Mateo 21.18-19)

¹² Ikatimatakasaaki ipotorikana Petánia. Iuusaaki Xesosi natxita. ¹³ Ikira atoko atamataro piko mina. Ito otsopa aua. Isari oamoni kariro iuäkatiniãro, kotxi piko mina tsopa auakasaaki, ori auapitika. Txamari apokasaaki, otsopanani auari, kotxi kona ori manapini. ¹⁴ Ininiã Xesosi:

—Käkiti litximaikaiko piri —itxari piko mina.

Imoianariakori kenakotari isäkire.

Pirätxi Vētxitakani Omitikiko
(Mateo 21.12-17, 20-22; Arókasi 19.45-48; Xoão 2.13-22)

¹⁵ Xesosi imoianariakorikata apoka Xerosareë. Xesosi ñroã Teoso misäkiretiko aikotiã. Omitikana käkiti iuaãtaã amotiitakani, sikatiitakani. Ikapakitikari amesa ninoa txineiro apakapakani amesane. Ikapakitikari kamoã vētxitakani topäkini apaka. ¹⁶ Iua !auiritana käkiti anikiniri tiitxi aiko ñpirikoatinina. ¹⁷ Xesosi oerekana käkiti iuaã auakani:

—Teoso säkire iökatsopatakori txari:

Ia naapoko. “Teoso misäkiretiko aikoti” akiritaäkako, ikini itixiti auakani misäkiretinino ñkapani,

itxa. Txamari hñte txíkitakari ia aiko kiñtiririni iomaätiniãtaã ininiua —itxa Xesosi.

¹⁸ Sasetotxi auñteakori, kaiökatsoparerini pakini kenakotari Xesosi säkire. Ininiã ninoa tsoríkaãta. Ixinikaxititana.

—Kanatokopa atxatari Xesosi aökini? —itxanãtana.

Ikinimane iteene apokaerekatari Xesosi säkire, ininiãkara sasetotxi auñteakori, kaiökatsoparerini pakini píkari Xesosi.

¹⁹ Ipiäkapokotapeka Xesosi takanapari sitatxi imoianariakorikata.

²⁰ Katimatiníkatata kimaporiã isaãpotakasaakina, atamatarona oa piko mina. Opñpe. Okotsapekara ipinakepeta apaka. ²¹ Petro xinikari iua apisapanika Xesosi säkire, ininiã akiritari Xesosi:

—Koerekareri, patamataro piko mina. “Käkiti !itximaikaiko piri,” pinakito. Oa piko mina ipñpeka —itxari.

²² Ininiã Xesosi:

—Pauikapiretariko Teoso säkire. ²³ Atãoenekara nisãpiretai. Pauikiniãri Teoso säkire, piposotari pipaniãtiniri ikira õtanoxiratari: “Pökítikaua. Pokakataua potxoari uinitimoni.” Päkixinireë iteene pauikiniãri pisäkire iaõka apokini, ininiã apokapitakako pamanaäkiti. ²⁴ Ikara atoko ininiã nota txai hñte, Teoso pimisäkiretakasaaki, pamanaãkasaakiri pinirekakiti, pauikariko iposope Teoso sikinii, ininiã papakapanikariko. ²⁵ Teoso pimisäkiretakasaaki, äti pomanatiniã, pitakanapariko pomanãkare. Pimaxiníketiniãri maerekati ikaminii, ininiã piri iaxitikiri maxiníketari maerekati pite kamakiti. ²⁶ Pimaxiníketakaniãri maerekati äti kamakiti pitemoni, ininiã piri iaxitikiri kona maxiníketari maerekati pite kamakiti apaka.

Xesosi Paniãtakari Moerekakoni
(Mateo 21.23-27; Arókasi 20.1-8)

²⁷ Iuaikana apokana Xerosareë. Xesosi tñpokota aiko Teoso misäkiretiko pirikere äki tinikata. Itñpokonãtakasaaki, sasetotxi auñteakori, kaiökatsoparerini, kiomãtxiakori pakini apoka iuamoni. ²⁸ Ininiã ninoa txari:

—Kipaniãpa pikamari ñkora pikamakiti? Kipa paniãtai? —itxarina Xesosi.

²⁹ Ininiã Xesosi apakapapiretana:

—Nota apaka pimarauatako hitemoni. Ātinoka nipimaāiko hīte. Hīsāpiretiniāno, nota sāpiretai hīte niokanatakiri uāka apaka. ³⁰ Kipa paniātari Xoāoni ipatxisarauatini? Teosokani paniātari Xoāo? Kākitikani paniātari Xoāo? Hīsāpiretano —itxana.

³¹ Ininiā ninoa xinikaxitināta. Imisākiretakakana. Ipimaākakana:

—Natokopa itxa aāpakapapiretiniri iua? Aāpakapapiretiniāri: “Teoso paniātari iua,” ininiā iua: “Kinirepa kona hāuikatari iuani sākire?” itxapemaua. ³² Aāpakapapiretiniāri: “Kākiti paniātari iua,” ikinimane omanataua —itxanātana.

Ninoa pīkari kākiti kotxi ikinimane auikari Xoāoni atāo Teoso sākire sāpiretakari ininiua. ³³ Ikara atoko ininiā ninoa apakapapiretari Xesosi:

—Ate limarotari.

Ininiā Xesosi:

—Ikara atoko ininiā, nota !nisāpiretai hīte nipaniātakiri uāka.

12

Parīkauatakani Maerekani
(Mateo 21.33-46; Arókasi 20.9-19)

¹ Eereka Xesosi sāpiretana ninoa sāpirenatxi atāo inakari oerekiko. Itxari:

—Kiki takarauata. Txipokori ova inakoronoka itaka. Ipiriketari. Ikamari ova maōkiko. Iposo atoko itakare apanīkakixitika ikamari aapokotxi axapitiri ōtanori ikikiote imakinetini ikapani. Iposo atoko ipaniātana ātikaka kikiakori itakare inīkatina ikapani, kotxi iua sariko ōtakoxiti. Ninoa apakapamaroko ipixini ova iparīkana īki. Iposo atoko katakareri sipe. ² Ova manapi, iua katakareri iokanatarini itiri ninoa kikiakorimoni ova ipixini apakapini ikapani. ³ Txamari iua apokasaaki ninoa maīkari iua. Ixirokitarina. “Pisipeka,” itxarina. Miketika ikanapiripe.

⁴ —Iuaīkana katakareri iokanatarini āti itiri ninoamonikana. Txamari ninoa kikiakori misiritari iua. Kai soroā ikiporonakarina, karota itxapirina ikiiā. ⁵ Iuaīkana katakareri iokanatarini āti ninoamonikana, txamari ninoa okapiri iuani. Kaiāopokori initiriakori iokanata ninoamoni. Apanakini inoropatana. Apanakini okana. Itxaāpotana.

⁶ —Iua katakareri auapanika ātinoka iokanatinini ikapani, imi iteene itiretakiti. Imapotōkire iokanatarini imi ninoamonikana. “Notamoni ninoa paxitariko namarite” itxa. Ininiā imi apoka ninoamoni. ⁷ “Katakareri ākiri napani. Maōkari. Aōkiniāri, itakare imakinika kaikotinaua ate,” itxakakana kikiakori.

⁸ —Ininiā ninoa maīkari katakareri ākiri, oka itxapirina, kiki xiripire oka itxarina iito.

⁹ —Ininiā kiripa ikama katakareri? —itxa Xesosi.

—Iua kanapiriā. Okanako ninoa kikiakori. Ipaniātana apanakini itakare imakinetinina ikapani —itxa Xesosi.

¹⁰ Hīte atatsopatapekari ia Teoso sākire iōkatsopatakorini:

Aapokotxi kamakani kona nirekari ātika kai soro. Iua kai imanirekakiniti kai apiari itxapekaua. Apanakini kai soro maīkakari itxaua.

¹¹ Teosokara txīkitakari ikara atoko inini. Ikara peerekari atemoni, itxa Teoso sākire iōkatsopatakorini.

¹² Xoteo auīteakori imarotarina Xesosi sākire. Ninoa imarotari ikamakitina takari makinetakani kamakiti atokokana, ininiā ninoa omanākarauata Xesosi sāpiretakiti xika. Ninoa kinirāo maīkaka itxarina Xesosi, txamari !imaīkarina iua, kotxi ipīkarina kākiti. Ininiā itakanaparina Xesosi, sipe itxana.

Homano Auīte Īkitxitiko
(Mateo 22.15-22; Arókasi 20.19-26)

¹³ Eereka Xoteo auīteakori iokanatana ātikaka Erotxi sākire auīākani, ātikaka pariseoakori pakini Xesosimoni. Inirekarina Xesosi kerokiniri isākire, kotxi ninoa nirekari Xesosi kaminiri maerekati imaīkinirina ikapani. ¹⁴ Ninoa apokasaaki, imisākiretarina Xesosi:

—Koerekareri, ate imarotari pite sākire atāonani ininiāua. Poerekari atāonani Teoso nireēkiti kākiti kamini ikapani. !Pipīkari kākiti. Kākiti poiāori pimisākiretini atokokana

kākiti apiari pimisākireta apaka. Ikara atoko ininiā, pisāpiretaua. Atāokani txineiro asikini Homanoakori auitemoni, Sesa inakorimoni? ¹⁵ Atāokani asikiniri iuamoni? Apakata amasikakaniri iuamoni? —itxana.

Xesosi imarotari isākirena. Imarotari ninoa pimarauatini isākire ikerokini ikapani. ! Inirekarina atāo inakari imarotini. Ininiā Xesosi txana ninoa:

—Kinirepa hātamakaerekatano nota? Himinaro txineirota. Ninirekari natamatiniro —itxa.

¹⁶ Ininiā iminarona.

—Kisanōkapa ia? Kiuākapa aua uai? —itxana.

Ininiā ninoa:

—Sesa sanōka, iuāka pakini —itxana.

¹⁷ Ininiā Xesosi:

—Ikara atoko ininiā, hīsikariko Sesamoni iua nakiti. Hīsikariko Teosomoni iua nakiti —itxana.

Ininiā kasākirena ninoa, kotxi peerekari Xesosi apakapapiretakiti.

Ipikari Ōkitikiniua Mauikakoni

(Mateo 22.23-33; Arókasi 20.27-40)

¹⁸ Kikiakori satoseo inakoni, lauikari kākiti ipikaripeka iuaikana ōkitikiniua iuaikana auāki inini ikapani. Ninoa satoseo apoka Xesosimoni.

¹⁹ —Koerekareri, Moisesini iōkatsopatari ia ipaniātakiti: “Kiki meenetipanika ipininiā, iua itari takaroko tikinitakoro. Iua itari keene ininiā, itakauākatari amarini iua itarini ipīpekarini uāka,” itxa Moisesi. ²⁰ Setxi itaritxiakori aua ikorapokoriti. Apia kiomanetakari takaro sito. Txamari ipīkasaaki meenetopanika itikinitaro. ²¹ Ininiā āti itari takaro oakana. Ipīkasaaki !keenepanikaro oa. Iua atokokana itxape āti itari. ²² Ininiā imakinikana ninoa takapiimaro oa. Ikinikana ninoa meenenipanika ipīpena. Eereka oanipekana apaka opīpe. ²³ Ipīkani ōkitikasaakiaua, kiriūtanoropa otxatauako? Kotxi ikinikana setxi takapekaro oa —itxana.

²⁴ Ininiā Xesosi:

—Hīte kerokari, kotxi !himarotari Teoso sākire iōkatsopatakori. Teoso posotiire apaka !himarota. ²⁵ Ipīkani iuaikana ōkitikasaakiaua, Teoso nitiriakori iaxitikini atoko itxapekauana. Iūtanorouataikako. ²⁶ Hīte !auikari ipīkani ōkitikiniua. Hīte atatsopatapekari Moisesi iōkatsopatakiti aanaia tirinakari pirena. Iuasaaki Teoso misākiretari Moisesi: “Apraño, Isaki, Xakoo pakini Teosonekarano nota,” itxari Moisesimoni. ²⁷ Ikara atoko ininiā Apraño, Isaki, Xakoo pakini ōkitikapekaura iuaikana, kotxi auāki inakani Teosonera iua. Kona ipīkani Teosoneni itxaua Teoso. Amananini hīkerokari —itxa Xesosi satoseoakorimoni.

Teoso Paniātakiti Apiari Akamini

(Mateo 22.34-40)

²⁸ Iuaātaā aua kaiōkatsopareri. Ikenakotana ninoa misākiretakakiniua. Ikenakotari Xesosi apakapapiretakiti erekari ene. Ininiā iua pimaāri Xesosi:

—Īkirīpa Teoso paniātakiti apiari txataua? Kipa apiaerekata Teoso nireēkiti akamini?

²⁹ Xesosi apakapapiretari:

—Teoso paniātakiti apiari ia: “Isaero tōpa auakani, hīkenakota. Ateosone Apiananiri iua. Iuananira Teoso txaua. ³⁰ Pitiretariko Apiananiri piTeosone, ikinipoko pinireēkitiā, ikini pākixinireē, ikinipoko pixinikakitiā, ikini pitaparaxinireē pakini.” ³¹ Ātipekana Teoso paniātakiti apiari ia: “Piteka pitiretiniāua atokotxikana, pitiretariko āti.” Iuananira Teoso paniātakiti ipi apiari txaua —itxa Xesosi.

³² Ininiā iua kaiōkatsopareri apakapapiretari Xesosi:

—Inipitikara pisākire, koerekareri. !Auari āti Teoso. Iuanokara auari. ³³ Ininiā atiretamariko Teoso ikinipoko anireēkitiā, ikinipoko axinikakitiā, ikini ataparaxinireē. Atiretamanako apanakini aītoka atiretini atokokana. Ikara Teoso paniātakiti ipi apiari txaua. Teoso paniātakiti pirātxi aōkini iua ikapani poiāori —itxa Xesosimoni.

³⁴ Xesosi kenakotakasaakiri isākire ereka inini, itxari iua:

—Pite auītearitari Teoso.

Iposo atoko apanakini lkataparaxinireika apikomoni ipimainirina.

Teoso Mereëkiti Tavii Apika Mekaniri
(Mateo 22.41-46; Arókasi 20.41-44)

³⁵ Xesosi Teoso misäkiretiko aikoti oerekaruanãtakasaaki, ipimaãri:
—Kinirepa kaiökatsoparerini säkire: “Tavii apika mekanirako Teoso mereëkiti tx-
auako?” itxana. ³⁶ Erekar Matamatakoti kamasäpirenatakari Tavii:
Apiananiri misäkiretari niauïte: “Nota kikomoni piitopäkiniritika nixipokariko pimoka-
iakariakori. Nikamariko ninoa pikiti pitakiniãtaã atoko ininiua,” Apiananiri txari
niauïte,
itxa Taviini. ³⁷ Tavii akiritari iua Teoso mereëkiti “Niauïte.” Ikara atoko ininiã, natokopa
itxa iua Tavii apika mekani ininiua? —itxa Xesosi.

Iuasaaki ikinimane kãkiti iuaã apitiitakaniua potxitari Xesosi säkire.

Kaiökatsoparerini Maerekani Pirena
(Mateo 23.1-36; Arókasi 20.45-47)

³⁸ Xesosi oerekaruanãtakasaaki, õtäkikana kãkiti:
—Kaiökatsoparerini moianari !hïtxapeua. Ninoa potxitari mäkatxi ereri ieretakinina
kãkiti apisatoõ inapinina ïkapani, kãkiti atamatinina ïkapani. Ninoa apokaerekatari
imisäkiretikona ipaxitikona nipokori sikikoõtaã inapaãpotakasaakina. ³⁹ Ninoa potxitari
kãkiti topäkinini apiaerekatakari nopini iitopäkinina aiko Xoteo apotiitiniãtaãua. Kiiniriã
ninoa potxitari kakiiniriteri topäkinimoni iitopäkinina. ⁴⁰ Ninoa mixirikari tikinitakoni
aapoko, iuaritika okanani imisäkiretarina Teoso kãkiti apisatoõ, ininiã kãkiti uãkatari
ninoa erekarini atoko ininiãuana. Teoso iteene misiritanako kãkiti ikara atoko inakani.

Tikinitakoro Matxineiroto Sikakito
(Arókasi 21.1-4)

⁴¹ Xesosi topäka txineiro Teoso ïkapani apakapikoõtaã. Xesosi itikari kãkiti iere-
takiniro txineiro kaixa äki. Itori katxineiroterini okaro txineiro mirikinito kaixa äki.
⁴² Eereka tikinitakoro matxineiroto apoka iuaã. Otakaro ipi txineiro otaki kaixa äki.
Poiãonoka txineiro. ⁴³ Ininiã Xesosi akiritana imoianariakori.
—Inipitikara nisäpiretai hïte. Õkora tikinitakoro matxineiroto sikakito apiata.
Apanakini sikakito poiãoka. ⁴⁴ Kotxi ninoa sikaro txineiro itetakoro. Oa matxineiroto
sikari okinika onakito —itxa Xesosi.

13

Teoso Misäkiretiko Aikoti Irikiko
(Mateo 24.1-2; Arókasi 21.5-6)

¹ Teoso misäkiretiko aikoti Xesosi pokïkasaaki, imoianari misäkiretari iua:
—Koerekareri, patamata ia kai aapokotxiti itomaneri. Amaripokori. Ia aiko Teoso
misäkiretiko peerekari.
² Ininiã Xesosi:
—Hätamatari ia aiko mitari. Äti õti imakinika irikaãkako. Kona kai kaikotaikako äti
kai nopini —itxa Xesosi.

Misirikaretxi Apokaenetini
(Mateo 24.3-14; Arókasi 21.7-19)

³ Xesosi topäka oxiratari nopini Teoso misäkiretiko aikoti apisatoõ. Iuaã aua oriva
minanape. Iuasaaki Petro, Txiako, Xoão, Ätree pakini apoka iuamoni. Ninoanoka aua
iuaã. ⁴ Ipimaãrina Xesosi:
—Kirisakipa aiko Teoso misäkiretiko irikaãka? Natokopa itxa aimarotiniri ikara õti
apisapanika?
⁵ Ininiã Xesosi:
—Erepaniko. !Häuiritapiri apanakini misirienetini hïte. ⁶ Itopaniriko kãkiti, “Xe-
sosikarano,” inakanipaniko. Ninoa misirienetari kaiãopokori kãkiti. ⁷ Neenamtxi
hïkenakoenetakasaaki, neenamtxi ene hïkenakoenetakasaaki, !hïpïkaruatape. Ikara
auapitikako, iuaritika kona xipokatxi õtipanikani. ⁸ Äti uãka neenamauata äti uãkakata.

Āti tixini auakani neenamauatako āti tixini auakanikata. Ātikaka itixi iakeēkatako. Kaiāopokopaniri natxi. Amarini auini tsii atoko itxapaniko.

⁹—Erepaniko hīte. Himaīkaākako, auītetximoni hīsiākako. Hinoropataākako aāpitsaā aiko āki Xoteo apotiitiniātaāua. Nota sākire hāuikini xika hīte anikaākako poiāori auītetximoni. Apiari auītetximoni apaka hanikaākako. Iuasaaki hīte sāpiretanako ninoa Teoso iokanapirena erekari. ¹⁰ Itixi xipokini apisapanika Teoso iokanapirena erekari sāpiretaākako ikinimanemoni ikini itixitikinimoni. ¹¹ Kākiti maīkasaakii hīte, anikasaakii hīte auītetxiakorimoni, !hīxinikapiri hīsākire tīkane hīsākirauatini apisapanika. Hīsākirauatakasaaki, iuasaakipeka himarotari hīsākire. Erekaru Matamatakoti txīkitakai iuasaaki hīsākire himarotini. ¹² Kākiti sikanapariko atāo itariakori auītetximoni okiko tīkane. Iriakoritxi sikanapanako imiakori auītetximoni okiko tīkane. Eenetxiakori omanatana iriakori, inoroakoro pakini. Eenetxiakori xika ninoa okapeēka. ¹³ Nota sākire hāuikini xika, ikinimane omanatai hīte, iuaritika himatakanapakaniāri nisākire hāuikini, hanikaākako Teoso tixinemoni —itxa Xesosi imoianariakorimoni.

Iteene Maerekanitxi Apokini

(Mateo 24.15-28; Arókasi 21.20-24)

¹⁴ Iuaīkana Xesosi sāpiretana:

—Hītikariko Maerekati Apiatakari Teoso misākiretiko aikoti āki. Kitxakapirīka Teoso sākire sāpiretakari Tanieo inakori sāpiretapekari ikara pirena. (Ininiā hīte ia atatsopanātakanii, hīkenakotariko Xesosi otākikiniua.) Maerekati Apiatakari Teoso misākiretiko aikoti āki hītikasaaki, hīte Xotéia tōpa auakanii, himitekapoka mitaxiratarimoni. ¹⁵ Iuasaaki hīte haāpoko nopini auakanii, katima hītxako hīkatxakini. Haāpoko !hīiroāpe hītii himaktxakini īkapani. ¹⁶ Hīte kikiu auakanii, !hīkanapiripe haāpokomoni himāka hāpini īkapani. ¹⁷ Ikarasaaki !erekapaniri sito kamixiromoni, sito kaxitakakareromoni. ¹⁸ Teoso hamanaā himitekini kamoīsaaki, kotxi himitekini mitaāsaaki !erekari. ¹⁹ Iuasaaki atatsiiri auakatapitikako. Ia atatsiiri apiata atatsitaākako. Kitxakapirīka itixi Teoso kamakasaaki kākiti atatsiirauata poiāoka. Ikara atatsiiri ōti apisa kākiti atatsiirauata poiāoka. Ikara atatsiiri ōti napa atoko likara atoko inakari atatsiiri !auaikako. ²⁰ Teoso mapoiāotakaniāri iua ōti kākiti atatsiirauatini ōti, !auaikamako kākiti. Ikinipekamako ipīpemanako. Teoso iotokakariko īkora atatsiiretxi, imereēkini mapinakani īkapani.

²¹—Apanakini sāpiretiniāi hīte: “Xesosi Teoso mereēkiti ia,” hinikosaaki, !hāuikapiri. “Xesosi Teoso mereēkiti ikiraātaā,” hinikosaaki, !hāuikapiri. ²² Kotxi Teoso mereēkiti minakaniua apokapitikako, “Xesosikarano nota,” inakari. Apaka apanakini apokapitikako, “Teoso sākire sāpiretakarikarano nota,” inakari. Paxirari ninoa sākire. Kākiti ikara atoko inakani kamariko posotiiretxi, kākiti itikiniri īkapani. Ninoa nirekamari Teoso mereēkini imisirienetinina. ²³ Erepaniko. Ikara ōti apokini apisapanika nōtākikai hīte —itxa Xesosi imoianariakorimoni.

Kākiti Itari Iaxitikiri Kanapiriini

(Mateo 24.29-31; Arókasi 21.25-28)

²⁴—Iua misirikaretxi napa atoko atokatxi iuakapeka. Kasiri !iponikaika. ²⁵ Iōriki iaxitikero irikako. Ikinipoko kaikori iaxiti auakari ioīketaākako. ²⁶ Iuasaakipekako ikinimane atapariko kākiti itari iaxitikiri apokaāpotini katxiāri āki. Itapararitika apoka. Kaiotximereri itxaua iuasaaki. ²⁷ Iuasaaki iokanatana iniritiakori iaxitikini itinixitimoni, ipinimoni itinixitimoni, atokatxi pokīkinimoni, atokatxi ereēkokinimoni. Iokanatana iniritiakori ikini itixitimoni kākiti imereēkini apitiitinina īkapani —itxa Xesosi imoianariakorimoni.

Piko Mina Pirena

(Mateo 24.32-35; Arókasi 21.29-33)

²⁸ Iuaīkana Xesosi sākirauata.

—Nisāpiretai sāpirenatxi atāo inakari oerekiko, piko mina pirena, nikanapiriini apiata himarotini īkapani. Pooīporipeka onakasaaki, otomorekasaaki, “Kamoī

apokanapanoka,” hĩtxa. ²⁹ Iua atokokana ikara misirikaretxi mixikanani nisāpiretakiti hĩtikasaaki, himarotapekariko nota kaiama kanapirikapeka ninini. ³⁰ Ia nisākire atāo. Itixi auakani lixipoka ikinipoko nisāpiretakiti mapokakani apisa. ³¹ Iaxiti xipokapitikako. Īkoraxiti apaka xipokapitikako. Iuaritika nota sākire !lixipoka —itxa Xesosi imoianariakorimoni.

Kākiti !Imarotari Xesosi Apokini Manapi
(Mateo 24.36-44)

³² Iuaĩkana Xesosi sākirauata:

—Kākiti !imarotari ikara ōti manapi apokini. Teoso nitiriakori iaxitikini apaka !imarotari ikara ōti. Nota Teoso ākirikanera !imarotari ikara ōti. Nirinanira, Teosonanira, imarotari. ³³ Hiātapapikariko. Hĩkoatapikako. Teoso himisākiretapikako. Kotxi !himarotari ikara ōti apokini.

³⁴ —Nikanapiriāksaaki, kiki ōtako sikari kanapiriini atoko nitxa. Iua kiki potorikasaaki, ipaniātana initiriakori aapoko inĩkatinina. Ikininape isikanapana parĩkatxi ikaminina. Ipaniātari initiri aapoko toreātaā kaikotakari, “Araōkire pitxako,” itxari. ³⁵ Nota hĩtari iaxitikiri iua kiki ōtako sikari atoko nitxako. Ātipirika hiātapapikanoko, kotxi !himarotari nota apokini ōti. !Himarotari mapiātikikauako napoka. !Himarotari apanĩkanōkauako napoka. Imaropirĩkatauako napoka. Īkanōkapanikauako napoka !himarotapaniri. ³⁶ Atxiĩti patimari napokini, ininiā hĩkoatapikako, mimakatika hinini ĩkapani nota apokasaaki. ³⁷ Ininiā ātipirika hiātapapikanoko. Ikininapemoni apaka ikara nitxa —itxa Xesosi imoianariakorimoni.

14

Xesosi Okaenetiko Pirena
(Mateo 26.1-5; Arókasi 22.1-2; Xoão 11.45-53)

¹ Iuasaaki kākiti apotiitaua ipi kiiniriti auakasaaki. Páskoa kiiniriti, pāo miātiākati nikiko kiiniriti pakini aua. Ipi ōti kiiniri potorikini apisapanika sasetotxi auĩteakori, kaiōkatsoparerini pakini xinikaxitita:

—Natokopa atxatariko Xesosi amaĩkini aōkini ĩkapani? ² !Amaĩkapaniri kiinirisaaki, kotxi amaĩkiniāri, kākiti naiatamaua eereka —itxanātana.

Sito Kamariāro Mĩkaro
(Mateo 26.6-13; Xoão 12.1-8)

³ Xesosi auanāta Petánia aapokotxiti Simão inakori aapoko. Iua Simão akiritaāka “Maere Matati.” Simão aapoko Xesosi nipokonātakasaaki, sito apoka. Oa minari kopitipaki kai kamakori, kai arapástiro inakoro. Kopitipaki āki aua kamariāro, nato inakoro. Pakaronepokoro. Oāpokasaaki Xesosimoni, opakauanakari kopitipaki. Okitakaro kamariāro Xesosi kiiā. ⁴ Iuasaakipeka apanakini iuaā auakani omanākarauata.

—Kinirepa oioanataāka kamariāro? ⁵ Ovētxitamaroko, ininiā kaiāopokomaniko txineiro oāpakapamako. Tresētosi txineiro ota prata kamakori oāpakamako. Txineiro mauakinitimoni osikiniā erekamariko —itxana.

Iteene ikapatitana. ⁶ Ininiā Xesosi:

—Ikara atoko !hĩtxapero. !Homanatapero. Erekarı okaminano. ⁷ Kākiti matxineiroteni auapikako hĩtekata. Hinirekasaakiriko hĩsikaro txineiro ninoamoni. Nota !lauari ātipirika hĩtekata. ⁸ Oia sito kamari ikinipoko oimarotakiti nota ĩkapani. Nipinini apisapanika oina notamoni. Omaritari niĩto, niĩto iposope inini nikatiko ĩkapani. ⁹ Atāo nisāpiretai hĩte. Teoso iokanapirena erekari sāpiretikoātaā ikini itixiti, osāpiretaākakako apaka oia sito kitakiniro kamariāro nikiiā, ininiā kākiti ikini itixiti auakani xinikapikaro oa —itxa Xesosi.

Xotasi Mĩkapiritiniri Xesosi
(Mateo 26.14-16; Arókasi 22.7-16, 21-23; Xoão 13.21-30)

¹⁰ Tosi pakini Xesosi moianariakori. Imoianari Xotasi inakori sari sasetotxi auĩteakorimoni. Imisākiretana ninoa Xesosi imĩkapiritini ĩkapani, ninoamoni isikiniri ĩkapani.

¹¹ Ikenakotakasaakirina Xotasi sãkire, ipoxokoniuatana. Isikaenatarona txineiro iua-
moni. Eereka Xotasi iãtapari Xesosi imikapiritini õti.

Pãskoia Kiiniriti Kamiko
(*Mateo 26.17-25; Arókasi 22.7-13*)

¹² Pãskoia kiiniriti potorikini õti, soti auñte anaakori okiko õti, Xesosi moianariakori
misãkiretari iua:

—Namonipa pinirekatari Pãskoia kiiniriti akamini?

¹³ Ininiã Xesosi iokanatana imoianariakori ipi.

—Hñsa sitatximoni. Iuaã kiki ãparaã kopitiã anikakari hãpiãkata. Iua kikikata hñsa.

¹⁴ Iua sinimoni kaapokori himisãkireta. Hñtxariko iua: “Koerekareri nirekari imarotini,
namonipa erekari imoianariakorikata inipokotini Pãskoia kiiniriti ikamakasaakina?”
hñtxariko. ¹⁵ Ininiã iua oerekaiko hñte itanokiri koa mitapoari. Auapeka kãkiti topãkini.
Imakinika oeretapeẽkaika —itxana.

¹⁶ Ininiã imoianariakori sari. Sitatxi apokasaakina Xesosi sãkire iaõka aua. Ininiã
ninoa kamari nipokori Pãskoia kiiniriti ãkapani.

¹⁷ Ìkanõkapeka inakasaaki Xesosi apoka tosi imoianariakorikata.

¹⁸ Inipokonãtakasaakina, Xesosi txana:

—Atão nisãpiretai. ãti hñte notakata nipokotakari mĩkapiritanoko nota —itxa.

¹⁹ Ininiãkara Xesosi moianariakori matinaniuata. Ipimaãrina Xesosi:

—Notakani atxiñti?

ãtipekana:

—Notakani atxiñti?

Ininiã imakinikana ikara atoko itxana. ²⁰ Ininiã Xesosi:

—ãtika hñte notakata auakari mĩkapiritano. Notakata komiri iopitiãtakarikarako
sikano nimokaiakariakorimoni. ²¹ Nota hñtari iaxitikiri okaãkako. Teoso sãkire iõkat-
sopatakori sãpiretapekari nipinini ãkane. Nota hñtari iaxitikiri mĩkapiritakari iteene
misiritaãkako. Erekamariko maponaniãkatika inaãkamako.

Xesosi Ìto, Iarẽka Pakini
(*Mateo 26.26-30; Arókasi 22.14-23; 1 Korĩto 11.23-25*)

²² Xesosi imoianariakorikata nipokonãtakasaaki, Xesosi kosekari komiri. Imisãkiretari
Teoso:

—Erekapitikari ia komiri pisikakiti atemoni —itxari.

Imapopeẽri komiri, xanaka itxari imoianariakorimoni.

—Apakapa, nika hñtxako. Ia nñito —itxana.

²³ Iposo atoko koseka itxaro iãkoanãtxi. Imisãkiretari Teoso:

—Erekapitikari ia iãriã pisikakiti atemoni.

Ininiã iãkoanãtxi isikana imoianariakori. Ikinikana iãtarina iãriã. ²⁴ Ininiã Xesosi:

—Ia niarẽka xiketakari makãtxakariko kaiãopokori kãkiti maerekani. Teoso sãpire-
tapekari kãkiti ikamaenetakiti amaneri kãkiti ãkapani. Ia niarẽka oerekari kãkiti, Teoso
kamapekari ikamaenetakiti. ²⁵ Atão nisãpiretai. !Niãtaikaroko ovapeẽ, Teoso auñtetxi
ininiãtaãua nimapokakanisaaki. Iuaã napokasaaki niãtari. Amaneri iãriãti niãtako —itxa
Xesosi.

²⁶ Eereka ninoa xikarauata Teoso ãkapani. Iua atoko isana oriva mina auiniãtaã,
oxiratari nopini.

Xesosi Sãpiretari Petro Kipatiniri Iua
(*Mateo 26.31-35; Arókasi 22.31-34; Xoão 13.36-38*)

²⁷ Xesosi misãkiretana imoianariakori:

—Ia ãkanõkati hñkinika hñte takanapanoko nota, kotxi Teoso sãkire iõkatsopatakori
sãpiretapekari ikara atoko inakari. Itxari:

Nokariko soti auñte piratakari, ininiã ikinika ipiraakori iarikitatako,
itxa Teoso sãkire iõkatsopatakori. ²⁸ Ininiã eereka nota nipinaãka atoko, iuañkana
nõkitikaãkaua atoko, nisako hñte apisa Karirẽiamoni —itxa Xesosi.

²⁹ Ininiã Petro:

—Nota !nitakanapai pite. Atxiīti ikinimane takanapai, iuaritika kona nota takanapai.

³⁰ Ininiã Xesosi:

—Atão nisãpiretai. Ia iãkanõkati patari ipikata sãkirauatini apisapanikako, ipi ãti pakinikata, “!Nimarotari iua,” pitxanoko —itxari Petro.

³¹ Petro apakapapiretari itaparaxinireritika:

—Atxiīti pitekata nokaãka, iuaritika kona nota sãpiretari apanakini nimimarotakanii pite.

Ikininape Xesosi moianariakori Petro sãkire iaõka ikamana.

Xesosi Misãkiretiniri Teoso Xetsẽmani Inakoriãtaã
(Mateo 26.36-46; Arõkasi 22.39-46)

³² Xesosi imoianariakorikata apoka ãtiãtaã kãkiti akiritakiti Xetsẽmani inakoriãtaã. Iuaã Xesosi paniãtana imoianariakori:

—Uai hiĩtopãka. Teoso nimisãkiretako —itxa.

³³ Anikari Petro, Txiako, Xoão pakini iuakata apikomoni. Iuaã Xesosi iteene matinani-uata. Maerekaxiniretinoka itxa. ³⁴ Ininiã iua:

—Nixinire imaromaxiretari. Iteene nimaxire, ininiã okaaritano. Uai hĩkaikota. Araõkire hiĩtxako —itxana.

³⁵ Apikomoni isa. Ipamaka xitimoni, misãkireta itxari Teoso. ³⁶ Itxari iri:

—Papai, pite posotari ikinipoko pikamini. !Pauiritapeno paĩtiki natatsiirauatini, iuaritika ninirekari pite nirekakiti nikamini. Nota nirekakiti nikamini kona ninireka —itxari iri.

³⁷ Eereka ikanapiriã Petro, Txiako, Xoão pakinimoni, txamari ninoa imakanãta. Xesosi akiritari Petro:

—Simão, himakanãta? Kona hiĩposotatari ãti oaranoka hĩkoatini? ³⁸ Erepaniko. Hinirekasaakiri maerekati hĩkamini, !hĩkamapiri. Araõkire hiĩtxako. Himisãkiretariko Teoso, ininiã !hĩkamari maerekati. Kãkiti xinire atxiīti !inirekari maerekati ikamini. Txamari kãkiti ito tapara poiãoka, ininiã ikamari maerekati. Ininiã erepaniko —itxana ninoa.

³⁹ Iuaĩkana isa Teoso imisãkiretini iãkapani. Teoso imisãkireta, mitxi isãkire atokokana itxa. ⁴⁰ Iposo atoko ikanapiriã. Txamari iuaĩkana ninoa imakanãtapanika. !Iposotarina ikoatinina. Ipẽtauatana, ininiã !kasãkirena.

⁴¹ Iuaĩkana ikanapiriã Petro, Txiako, Xoão pakinimoni.

—Himakanãtapanika? Hiĩtomanãtapanika? Iaõpe. Hãtapana. Hiĩtari iaxitikiri uatxa sikaãkako maerekati kamakanimoni. ⁴² Hõkitikaua. Masa. Hãtapana. Apokaãpota kiki nimĩkapiritakiri —itxana.

Xesosi Maĩkiko Pirena
(Mateo 26.47-56; Arõkasi 22.47-53; Xoão 18.1-11)

⁴³ Xesosi sãkirauanãtakasaaki, Xotasi apoka. Iua Xotasi Xesosi moianarikamara. Iminana ito kiki, saasara mĩkani, piriri mĩkani. Sasetotxi auĩteakori, kaiõkatsoparerini, kiomãtxiakori pakini iokanatari Xotasi kikiakorikata Xesosi imaĩkinina iãkapani. ⁴⁴ Xotasi mitxipeka sãpiretari kikiakori:

—Nota apitxokakiti Xesosipitikarako iua. Iuasaaki himaĩkapekariko. Erepaniko hanikasaakiri, imamitekakani iãkapani —itxa.

⁴⁵ Xotasi apokasaaki, isakatapitipori Xesosimoni. Akiritari:

—Koerekareri.

Inakasaakipeka apitxoka itxari.

⁴⁶ Inakasaakipeka kikiakori maĩka, anika itxarina Xesosi. ⁴⁷ Kiki iuasaaki iuaã auakari kosekaro saasara. Iua sauaãkatari sasetotxi auĩte apiatakari nitiri. Itsotakakĩpitari.

⁴⁸ Iuasaakipeka Xesosi:

—Hiĩte ina himaĩkinino iãkapani, saasarakata, piririkata. Kiĩtiriri atoko hiĩtxapeno nota himaĩkinino. ⁴⁹ Ikiniõtika nota auanãtari hiĩtekata Teoso misãkiretiko aikoti ãki, noerekarauatakasaaki. Iuaã hiĩte imaĩkano nota, kotxi Teoso sãkire iõkatsopatapeẽkaika hiĩte maĩkinino kiĩtiriri himaĩkini atoko —itxana ninoa.

⁵⁰ Iuusaakipeka ikinika Xesosi moianariakori miteka, asika itxarina iua. ⁵¹ Iuusaaki ātokori sari Xesosi tikini. Iua māka ātinoka aua iūtoā pirikakari. Kikiakori maīkamari iua. ⁵² Imākanoka kaikota iuakoāna. Kasarapeka imiteka iua ātokori.

Xesosi Xoteo Auīteakori Apisatoō

(Mateo 26.57-68; Arókasi 22.54a, 63-71; Xoāo 18.12-14, 19-24)

⁵³ Ninoa anikari Xesosi sasetotxi auīte apiatakari aapokomoni. Iuaā ikinika sasetotxi auīteakori, kiomātxiakori, kaiōkatsoparerini pakini apotiitaua. ⁵⁴ Petro ikira atoko isaāpota Xesosi anikakani tikini. Īroā sasetotxi auīte aapoko piriketakoriā. Iuaā iitopāka sasetotxi auīte apiatakari nitiriakorikata. Iroka xamina tinipoki.

⁵⁵ Aapokotxi āki sasetotxi auīteakori, ikinika Xoteo auīteakori pakini pimaāna kākiti:
—Kipa imarotatari maerekati Xesosi kamini?

Ninoa nirekari Xesosi okiko imaerekani xika. Txamari !apokarina imaerekani imarotakani, kotxi !ikamari maerekati. ⁵⁶ Kaiāopokori kākiti sāpiretari maerekati Xesosi kamakiti, txamari paxirari ninoa sākire, kotxi āti sāpiretakiti ipinimoni, āti sāpiretakiti ipinimoni, itxaāpotana.

⁵⁷ Apanakini kiki ōkitikaua, sāpireta itxarina ia aāpirena Xesosi ikamapiretinina. ⁵⁸ Ninoa:

—Ate kenakotari isāpiretiniri: “Nirikariko ia aiko Teoso misākiretiko aikoti kākiti kamakiti. Ipi āti pakini ōti inakasaaki nikamariko āti aiko kākiti makamakiniti,” itxa isākire.

⁵⁹ Txamari ikara sākiretxi āti sāpiretakiti ipinimoni, āti sāpiretakiti ipinimoni, itxaāpota.

⁶⁰ Iposo atoko sasetotxi auīte apiatakari tima ikinimane apisatoō. Iua pimaāri Xesosi:
—Kininiāpa na papakapapiretari ninoa sākire? Kixikapa ninoa ikara atoko txanātai? —itxari.

⁶¹ Txamari !kasākireri Xesosi. !Apakapapiretari. Ininiā sasetotxi auīte apiatakari iuaīkana pimaāri:

—Pitekani Teoso mereēkiti txataua? Pitekani Teoso ākiri txataua? —itxari.

⁶² Ininiā Xesosi:

—Ari, iua ākiripitikanano. Hātamatariko kākiti itari iaxitikiri topākini Kaposotiireri kikomoni. Hātapariko kākiti itari iaxitikiri uai apokaāpotini katxiāri āki —itxa.

⁶³ Iuusaakipeka sasetotxi auīte apiatakari matsorākari imāka, kotxi iuākatari Xesosi sākire maerekati ininiua.

—!Anirekaikari Xesosi kamakiti sāpiretakani. Atokopeka. ⁶⁴ Kotxi hīte kenakotapekari isākire maerekati, “Teoso ākirirano” inini. Natokopa atxatari iua? —itxana.

Ininiā ninoa apakapapiretari:

—Okaākapitikako —itxarina.

⁶⁵ Apanakini kiisokari Xesosi. Mākatxi mataā iapirikarina ikiā oki manapi imata-matakani īkapani. Iposo atoko iāsokarina.

—Pisāpiretaua, kipa āsokai? —itxarina.

Sasetotxi auīte nitiriakori apaka āsokari iua iuakoāna.

Petro Kipatari Xesosi Imarotini

(Mateo 26.69-75; Arókasi 22.54b-62; Xoāo 18.15-18, 25-27)

⁶⁶ Iuusaaki Petro ixiti aua aapokotxi piriketakori āki. Sasetotxi auīte apiatakari nitero ātokoro apoka iuaā. ⁶⁷ Oātamatarari Petro irokanātini xamina tinipoki. Oa mixinitari iua. Ininiā oa:

—Xesosi Nasareekiri moianarikai pite apaka —otxa.

⁶⁸ Ininiā:

—Kona, nota !imarotari pisākire —itxaro.

Iuusaaki pirikere ĩronakikoātaā isari. Iuusaakipeka patari sākirauata. ⁶⁹ Oa sasetotxi auīte nitero atamatari iua iuaā.

—Ere kiki iua moianaripitikara —otxana ninoa Petro takote auakani.

⁷⁰ —Kona iuano nota —itxa.

Paītiki ninoa iuaā auakani:

—Iua moianaripitikarai. Pite Kariréiakirikarai. Pisäkireëra ate imarotai —itxarina.

⁷¹ Ininiã Petro:

—Nota !imarotari kiki ikara atoko hinanãtakiti. Atãoene nimasãpiretakaniã, Teoso misiritamanoko. Teoso imarotari nota sãkire atãoka nisãpiretinii —itxana.

⁷² Ikara atoko Petro inakasaaki, iuaĩkana patari sãkirauata. Ininiã Petro xinikari Xesosi sãpiretakiti iuamoni. “Ipikata patari sãkirauatini apisapanikako, ipi ãti pakinikata, ‘! Nimarotari iua,’ pitxanoko.” Ikara inakari ixinikasaaki, itxiapata.

15

Xesosi Pirato Apisatoõ

(*Mateo 27.1-2, 11-14; Arókasi 23.1-5; Xoão 18.28-38a*)

¹ Katimatiníkata sasetotxi auĩteakori, kiomãtxiakori, kaiõkatsoparerini, ikinimane Xoteo auĩteakorikata xinikaxitinãta. Ipaniãtarina Xesosi iaxirikiko. Iposo atoko anika, sika itxarina Piratonomi. ² Pirato pimaãri Xesosi:

—Pitekani Xoteoakori auĩte txataua? —itxari.

Ininiã Xesosi:

—Ari, pisäkire atãopitikara.

³ Sasetotxi auĩteakori apoiãpotari Xesosi, txamari Xesosi !kasãkireri. ⁴ Ininiã Pirato:

—Na papakapapiretari? Ninoa iteene misãkirepiretai —itxari.

⁵ Iuaritika Xesosi !apakapapiretari. Ininiã Pirato ãkixinireë:

—Kinirepa kona apakapapiretari? —itxa.

Xesosi Okiko Nirekiko

(*Mateo 27.15-26; Arókasi 23.13-25; Xoão 18.38b-19.16*)

⁶ Pãskoa kiiniriti auakasaaki, Pirato itotari isikakiniri kateia ãki auakari kãkiti nireëkiti. ⁷ Iuasaaki Xesosi maĩkikosaaki, Pahapasi inakori aua kateia ãki. Iua Pahapasi apanakini kateia ãki auakanikata okaniuatapeka Homanoakori inaiatakasaaakina. ⁸ Pirato sãkirauatakasaaaki Xesosikata, kãkitipokoni apoka Piratonomi.

—Kateia ãki auakari pisikaka —itxarina.

⁹ Ininiã Pirato pimaãna:

—Hinirekatari nisikakiniri Xoteo auĩte hĩte ïkapani? —itxana.

¹⁰ Pirato iteene imarotari sasetotxi auĩteakori sikari Xesosi iuamoni Xesosi ixikotinina xika. ¹¹ Sasetotxi auĩteakori maasakana ninoa iuaã apotiitakaniua:

—Hamanaãri Pirato Pahapasi isikakini ïkapani —itxana kãkitimoni.

¹² Pirato iuaĩkana pimaãna:

—Natokopa nitxatari ia kiki Xoteo auĩte inakori? —itxa.

¹³ Akiripoakatana:

—Aamina ïpiriãmitakari nopini hĩtokakitari —itxana.

¹⁴ Ininiã Pirato:

—Kixikapa? Maerekati !ikama —itxa.

Apiata akiripoakatana:

—Aamina ïpiriãmitakari nopini hĩtokakitari —itxakatana.

¹⁵ Ininiã Pirato sikakari Pahapasi ninoa ïkapani, kotxi inirekari ikamapoxokonitininina ninoa kãkiti. Eereka ipaniãtari Xesosi xirokitatiko aãpitsaã. Eereka Pirato paniãtari sotatoakori tokakitiniri Xesosi aamina ïpiriãmitakari nopini.

Sotatoakori Napetiniri Xesosi

(*Mateo 27.27-31; Arókasi 22.63-65; Xoão 19.1-3*)

¹⁶ Ininiã sotatoakori anikari Xesosi Pirato aapoko ãki. Akiritarina ikinika sotato.

¹⁷ Iposo atoko ieretakarina mãkatxi põkamarari Xesosi ïtoã. Ikamarina saporieãta kotipiaro kamakori, taka itxarina Xesosi kiiã.

¹⁸ —Aãuĩte —itxarina Xesosi inapetinina.

—Xoteo auĩtekai pite —itxarina.

¹⁹ Iaritakiitarina aãkeë. Ikiisokarina. Ikapotoreëkauana Xesosi apisatoõ.

—Aãuĩte —itxarina Xesosi inapetinina.

²⁰ Inapetakarina atoko imakaxkarina mākaxi pōkamarari. Xesosi māka iuaikana ieretaka. Eereka anikarina Xesosi aamina ipiriāmitakari nopini itokakitinirina ikapani.

Xesosi Tokakitaāka Aamina Īpiriāmitakari Nopini
(Mateo 27.32-44; Arókasi 23.26-43; Xoão 19.17-27)

²¹ Ipixinipokoriti itaōkitarina kiki Simão inakori. Sireni sitatxitikiri iua. Iua anaakori Arexātri, Hopo pakini. Iuasaaki Simão apoka Xerosareē. Sotatoakori paniātari iua:

—Ia aamina ipiriāmitakari panikinari —itxana.

²² Anikarina Xesosi ixirataā, Kóokota inakoriātaā. Xoteo sākire “Kóokota.” Apanakini akiritari iua oxirataru uāka “Kiitātaxi,” inaāka akiritiko. Iuaā apokana. ²³ Isikamarina iāriā pinītxikata, miha inakorokata, Xesosi iātini ikapani, itsii imimarotakani ikapani, txamari !inirekaro iātiniro. ²⁴ Ininiā itokakitatarina aamina ipiriāmitakari nopini. Eereka ikamarina sarauatxi, Xesosi māka apakapakani imarotiniina ikapani. Ikara atoko apanakini anikari Xesosi māka. ²⁵ Īkanōkapanika novi oara itokakitapeēka Xesosi aamina ipiriāmitakari nopini. ²⁶ Aaminaā auari iōkatakita, apoitiko pirena, “Xoteoakori Auīte” itxa. ²⁷ Ninoa tokakitana ipi kiitiririni apaka aamina ipiriāmitakari nopini, ikikomoni āti, isanaremoni āti. ²⁸ Kitxakapirīka Teoso sākire iōkatsopatakori txari:

Okapeēkako iua, kokaniri okiko atoko inapeēkako.

Ininiā Xesosi okikosaaki ia Teoso sākire iōkatsopatakori iaōka auapeka iuasaaki.

²⁹ Ninoa iuaā napakani misākirepiretapikari Xesosi:

—Kiikitei. Pite sākire: “Nirikariko Teoso misākiretiko aikoti. Ipi āti pakini ōti inakasaaki nikamari iuaikana,” pitxama. ³⁰ Ikara atoko piposotiniā, piteka pimakax-akauako, ininiā pikatxaka aamina ipiriāmitakariā —itxarina Xesosi inapetinina.

³¹ Sasetotxi auīteakori, kaiōkatsoparerini pakini napetari Xesosi:

—Iua makananitapekari apanakini. Txamari iuaka !iposotari imakananitinua —itxakakana.

³² —Ikatxakiniārako ate auikari Teoso mereēkiti ininiāua. Ikatxakiniā, aāuikari Isaeo auakani auīte ininiāua —itxakakana.

Kiitiririni iuakata tokakitakoni apaka misākirepiretari.

Xesosi Ipinini Pirena
(Mateo 27.45-56; Arókasi 23.44-49; Xoão 19.28-30)

³³ Iuasaaki apaniāxiti ipiāka. Ikini itixitika piāka. Ipi āti pakini oara ipiāka. ³⁴ Ipi āti pakini oara napa atoko Xesosi akiripoakata:

—Erii, Erii, aremaa sapakatanii —itxa.

Ia atatsopatakari sākireē: “NiTeosone, niTeosone, kinirepa pitakanapano?” itxa.

³⁵ Kākiti iuaā auakani kenakotari akirinātini.

—Hīkenakota. Akirinātari Eríasi —itxana.

³⁶ Iuasaakipeka kiki ina katimariā. Iākari mapoa atoko inakari iāriā katxioārimoni, aāke mapotōkire taka itxari, sika itxari Xesosi iātini ikapani.

—Mitxipanikako. Maiātapani. Atauako Eríasi makatxakatapaniri Xesosi —itxana.

³⁷ Xesosi itapararitika akiripoakata, eereka ipipe itxa. ³⁸ Iuasaakipeka mākaxi mata Teoso misākiretiko aikoti āki arōkakarari tsorakita. Itano itsorakita. Ixitipeka apoka. Mitxi iua mākaxi mata lauiritari kākiti iroini Teosonani Auini Pakitaātaā. ³⁹ Sotatoakori auīte aua aamina ipiriāmitakari apisatoō. Ikenakotari Xesosi akiritini. Itikari ipinini.

—Atāopitikara Teoso ākiri itxaua ia kiki —itxa.

⁴⁰ Ātokaka sitoakoro ikira atoko atamanātarina Xesosi, Maria Matarenama, Saromeema, āto Mariama, apanakini sitoakorokata. Xesosi, Txiako pakini inoro oa Maria. Iua Txiako maneripanika inakari. ⁴¹ Xesosi Kariréia auakasaaki, ninoa sitoakoro moianatari iua. Imiparīkatarina. Xesosi ipikasaakikanera apanakini sitoakoro kaiāpokoro aua iuaātaā. Ninoa apoka Xerosareē Xesosikata.

Xesosi Ikatiko Pirena
(Mateo 27.57-61; Arókasi 23.50-56; Xoão 19.38-42)

⁴² Ikara òti, Xesosi ipinini òti, kãkiti parĩkauatini òti, kãkiti tomatini òti apisapanika, iuasaaki kikatatikipeka. ⁴³ Iuasaaki Xosee inakori, Arimateia sitatxitikiri, sari Piratomoni. Iua Xosee Xoteo auĩte apanakinikata. Ikinimane paxitari iua. Iua apaka iãtapari Teoso ikinimane auĩte ininiua òti apokini. Itaparaxinireritika Piratomoni isa, amanaã itxari Xesosi ìto. ⁴⁴ Ininiã Pirato ãkixinireẽ:

—Atauako patimari Xesosi ipinini? —itxa.

Ininiã ipĩkapiretari sotatoakori auĩte. Iua apokasaaki Pirato pimaãri:

—Atauako Xesosi ipĩpeka? —itxa.

⁴⁵ Ininiã iua:

—Ari, ipinapitipeka —itxari.

Ininiã Pirato:

—Panikaikari iĩto —itxari Xoseemoni.

⁴⁶ Iuasaaki Xosee amotari mãkatxi mata erekari, arĩnio inakori. Eereka imakatzakari Xesosi ìto. Iapirikari iĩto mãkatxi mataã, anika itxari akauari irikomoni. Kai kisakakori ãki ieretakari Xesosi ìto. Eereka kai mitapoari ikatika, tota itxari iriko. ⁴⁷ Ipi Maria itikanãtari Xesosi ìto takikoãtaã, Maria Matarenama, Maria, Xesosi inakori inoroma pakini.

16

Xesosi Iuaĩkana Auãki Inini

(Mateo 28.1-8; Arókasi 24.1-12; Xoão 20.1-10)

¹ Tomatiko òti xipoka atoko mapiãnikata, ipi ãto pakini sito amotaro kamariãro, Xesosi ìto ikamamaritinina ìkapani, Maria Matarenama, Saromeema, Maria Txiako inoroma pakini. ² Katimatinĩkata, tomĩkosaaki, ìkanõkapanika, atokatxi pokĩkasaaki, ninoa sari akauarimoni. ³ Kimaporiã isikasaakina, isãkirauaãpotana:

—Kipa makatzakinaua kai auĩte iriko tore? —itxaãpotana.

Amaripokori iua kai. ⁴ Iuaã apokasaakina, atamatarina. Kai makatzakapeẽkaika.

⁵ Ininiã ìroãna iriko ãki. Atamatarina ãtokori topãkanãta ikikomoni. Imãka ìtanori, kasarori. Ininiã ninoa tikoka.

⁶ Ininiã iua:

—!Hĩtikokape. Hĩte nitanãtari Xesosi Nasareekiri, aamina ìpiriãmitakari nopini tokak-itakori. Òkitikapekaua iua. !Auaika uai. Hãtamata. Mitxi itakarina iĩto uai. ⁷ Hĩsipeka. Hĩsãpiretari Petro, apanakini Xesosi moianariakori pakini: “Xesosi sapanikako hĩte apisa Kariréiamoni. Iuaã hĩte aõkitari iua, kotxi ipinaka apisapanika isãpiretapekari ikara hĩtemoni,” —itxana ninoa.

⁸ Itimaritikana ninoa pokĩka. Imitekana. Ikikinanakana, ipĩkarena xika. !Isãpiretarina apanakini, kotxi ipĩkarauatana.

Xesosi Oerekaua Maria Matarenamoni

(Mateo 28.9-10; Xoão 20.11-18)

⁹ Xesosi õkitikasaakiua ipinaka atoko ìkanõkapanika semana potarikini òti, tomĩkosaaki, oerekaua merepitipanika Maria Matarenamoni. Mitxi Xesosi aõkitakasaakiro oa Maria, omitikari maerekani matamatakoni setxi pakini oa ìtoã auakani. ¹⁰ Xesosi õkitikasaakiua, iua oaõkitaka atoko, osari merepanika Xesosi moianariakorimoni. Iuasaaki iteene imatinaniuatana. Itxiapanãtana. Osãpiretana ninoa:

¹¹ —Xesosi iuaĩkana auãki itxapeka. Nota aõkitari iua —otxana.

Txamari ninoa kona auikari osãkire.

Xesosi Oerekaua Ipi Imoianariakorimoni

(Arókasi 24.13-35)

¹² Eereka iuaka oerekaua ipi imoianariakorimoni, kimaporiã isikasaakina aapokotxi mauakaniãtaã. Iuasaaki itoõ ipinipo itxa. ¹³ Eereka ninoa kanapiriã. Isãpiretana apanakini imoianariakori, txamari lauikarina isãkirena.

Xesosi Oerekaua Imoianariakorimoni

(Mateo 28.16-20; Arókasi 24.36-49; Xoão 20.19-23)

¹⁴ Eereka Xesosi oerekaua õsi imoianariakorimoni inipokotakasaakina. Xesosi õtãkikana:

—Kinirepa hïte !auikatari nota iuaïkana auãki ninini? Kinirepa !hãuikatari nota aõkitakani sãkire? !Kaiokakarekii —itxa.

¹⁵ Iposo atoko Xesosi txana:

—Ikini itixiti hïsakõ. Hïspïretariko Teoso iokanapirena erekari ikinimanemoni.

¹⁶ Teoso sãkire auïãkari patxisatakori, iuarako sari Teoso tixinemoni. Teoso sãkire mauikakati, Teoso misiritapikariko. ¹⁷ Teoso sikaposotiiretanako isãkire auïãkani, ininiã apanakini imarotari Teosokara sikari iposotiire ninoamoni. Ia atoko Teoso sikaposotiiretana. Omitikarina maerekani matamatakoni nota uãkaã. Isãkirauatana imimarotakinitina sãkiretxitiã. ¹⁸ Imaïkiniãrina imini, !ipinana. Iãtiniãrina ikianari, !amianatana. !Ipinana. Itakauakotaua amianatakani nopini, ininiã amianatakani makananitaãka —itxa Xesosi sãkire.

Xesosi Anikaãka Teoso Tixinemoni

(Arókasi 24.50-53; Átosi 1.6-11)

¹⁹ Imoianariakori imisãkiretanapaka atoko, Xesosi anikaãka Teoso tixinemoni. Iuaã iua topãka Teoso kikomoni. ²⁰ Xesosi moianariakori eereka isipekana, Teoso sãkire ikini aapokotxiti auakani isãpïretinina ïkapani. Apiananiri moianatana. Apiananiri sikaposotiiretana ninoa, ininiã apanakini imarotari ninoa sãpïretakiti atão inini. Ameẽ.

ARÓKASI

Arókasi Iōkatsopata Teópiromoni

¹ Nota Arókasi iōkatsopata pite Teópiromoni. Iteene nipaxitai. Kākiti ito iōkatsopatapekari ikinipoko Xesosi kamakiti Xoteoakori sauaki auakasaaki. ² Ninoa, nota pakini imarotari ikinipoko Xesosi kamakiti, kotxi Xesosi kamakiti atamatakani, isākire oerekakani, sāpiretapekaua ate. ³ Nota apaka apaiaōkapekari ikinipoko Xesosi sākire, ikamakiti pakini. Ininiā nota apokaerekatari ikinipoko Xesosi pirena niōkatsopatini pite Teópiromoni. Merepitipanika ikamakiti nisāpiretai. Ininiā eereka ikamakiti nisāpiretai. Ininiā eereka ikamakiti nisāpiretai, nitxaāpotako. ⁴ Koerekarerini oerekapekai Xesosi pirena, ininiā uatxa pimarotari ninoa oerekakiti atāo inini.

Xoão Kapatxisareri Iponaniini Sāpiretiko

⁵ Erotxi inakori Xoteoakori auīte inakasaakiua Xotéia tōpa, iuasaaki auanāta sasetotxi Sakaria inakori. Sakaria auīte, apanakini sasetotxiakori auīte apaka, Apia inakori. Sakaria tanoro ouāka Isapeo otxaua. Oīri, oātokiri, oātokiri iri imakinikana sasetotxi itxauana. Oātokiri kitxakapirīkari Moisesi itari Arāo inakori. Iua apaka sasetotxi itxaua. ⁶ Teoso nirekaākitinanira ikamana Sakaria, Isapeo pakini. Ninoa kamari ikinipoko iua paniātakiti, Apiananiri paniātakiti. Atāo inakaranoka ikamana. !Ikerokarina ikamakitina. ⁷ Txamari !keenena. Isapeo !oposotari kamixi onini. Iuasaaki ikiomaneēpeka.

⁸ Āti ōti Sakaria, apanakini sasetotxiakorikata, parīkauanāta Teoso misākiretiko aikoti āki. Iuasaaki ninoatene iuaā parīkauata. ⁹ Sasetotxiakori itotari sasetotxi imereinina Apiananiri misākiretiko aikoti ĩroini kamariāro arikini ĩkapani, ininiā iuasaaki ninoa mereēri Sakaria. Ininiā iua ĩroā. ¹⁰ Sakaria aiko āki kamariāro arikanātakasaaki, mapara kākiti apotiitakania misākiretari Teoso.

¹¹ Iuasaakipeka Teoso nitiri iaxitikiri tokiā Sakariamoni kamariāro arikikoātaā takote. ¹² Sakaria atamatakasaakiri, itikoākata, pīkarauata itxa. ¹³ Teoso nitiri misākiretari iua: —Sakaria, kona pipīkarauatape. Teoso sipapitikaiko pamanaākiti. Ininiā pītanoro Isapeo keenepitikaroko. Pitakauākatari pamarite Xoão. ¹⁴ Iua auakasaaki ikamapoxokonitaiko pite, itori kākiti apaka. ¹⁵ Apiananirimoni apiari itxauako iua Xoão. Kona Xoão iātapaniroko kapoāro. Erekari Matamatakoti auariko iua ākixinireē. Inoro irokota ākipanika auakasaaki, Erekari Matamatakoti auako iua ākixinireē. ¹⁶ Iua Xoão anikanako itomaneri kākiti Isaeo auakani Teosomoni. Apiananirimoni iua anikana. Ininiā iuaīkana ninoa kanapiriā iTeosonemonina, isākire auikinina ĩkapani. ¹⁷ Xoão apokako Apiananiri apokini apisapanika. Erekari Matamatakoti sikataparatarari Eríasi kitxakapirīka. Iuatxikana Erekari Matamatakoti sikataparatariko Xoão. Ikara atoko ininiā, iua oerekariko irītxi iuaīkana amaritena itiretinina ĩkapani. Iua Xoão oerekariko kākiti Teoso paniātakiti makamakani, imaerekanina itakanapinina, erekarinoka ikaminina ĩkapani. Paimatirenako ninoa iuasaakiko. Iua Xoão oerekariko kākiti iposope ininina Apiananiri apokini apisapanika —itxa Teoso nitiri Sakariamoni.

¹⁸ Ininiā Sakaria pimaāri:

—Kiātokopa nitxa uatxa keenepeka ninini, kotxi nota, nītanoro apaka kiomaneēpeka —itxa.

¹⁹ Teoso nitiri apakapireta:

—Niuāka Kapirio. Nota auari Teosokata ipaniātakiti nikamini ĩkapani. Teoso iokanatano pitemoni pite nimisākiretini ĩkapani, ia erekari pirena niminapiretini ĩkapani. ²⁰ Txamari na pauikari nisāpiretakiti. Ia xika !kasākireikaiko, kotxi nisāpiretakiti atāopitika. Teoso sikaenetakiti apokapitikako. Apokasaaki, pimarotariko nisākire atāo ininiua. Iuasaakiikaroko piposotari pisākirauatini —itxa Teoso nitiri Sakariamoni.

²¹ Iuasaaki kākiti mapara auakani iātapanātari Sakaria.

—Kiripa ikamanāta Sakaria aiko āki? !Katimari —itxanātana.

²² Ipokĩkasaaki lkasãkireikari. Ninoa kãkiti imarotari Teoso misãkiretiniri iua aiko ãki itaponeẽ, kotxi lkasãkireikari. Iuakoãnokara imisãkiretana ninoa.

²³ Mapaõti iparĩka xipoka atoko aapokomoni isipeka. ²⁴ Eereka Isapeo kamixipeka otxa. Onapari ipi ipi ãti pakini kasiriti oaãpoko. !Osari ãtiãtaã.

²⁵ —Apiananiri sikano namarite. Erekari ikaminano notamoni. Uatxa !nipẽtauataika kãkiti apisatoõ. Keenepekano —otxa.

Kapirio Iokanataãka Mariamoni

²⁶ Isapeo seisi pakini kasiriti kamixi onakasaaki Teoso iokanatarini ititiri iaxitikiri Kapirio Nasaree sitatxitimoni, Kariréia tõpamoni. ²⁷ Iuaã iokanatarini iua ãtokoromoni Maria inakoromoni. Oa kona sirikapanika kikikata. Osãpiretapedekari ãtokori Xosee inakori iuakata oĩtaniriuatini iƙapani. Xosee atokiri kitxakapirĩka Xoteoakori auĩte Taviini inakori. ²⁸ Teoso nitiri apokasaaki oamoni, akiritaro Maria:

—Ereẽkai. Apiananiri pitekata aua. Iua mereẽi pite. Itoro sitoakoro ikini itixiti aua, iuaritika pitenanirako Teoso sika iteene erekari —itxaro oa.

²⁹ Maria pĩkarauata Teoso nitiri sãkire okenakotakasaaki.

—Kinirepa ikara atoko itxa sãkireta? —otxa oãkixinireẽ.

³⁰ Teoso nitiri txaro:

—!Pipĩkarauatape, Maria. Teoso apokaerekatai pite. ³¹ Pimixiuatako, keene pitxako. Pitakauãkatariko pamarite Xesosi. ³² Iua Apiatakari itxauako. Apiananiri ãkiri akiritãkako. Teoso Apiananiri kamariko iua auĩtetxi ininiãua. Kitxakapirĩka Xoteoakori auĩte Taviini. Taviini auĩtetxi ininiua atokokana, Teoso txĩkitakariko Xesosi Xoteoakori auĩte ininiua. ³³ ãtipirika Xoteoakori auĩte, Xakooni apiko mekaniriakori auĩte, itxauako. Iua auĩtetxi ininiua !ixipoka —itxaro oa.

³⁴ Ininiã oa:

—Kiãtokopa nitxa kikikata masirĩkatokano, keenepe ninini? —otxa.

³⁵ Teoso nitiri apakapapiretaro:

—Erekari Matamatakoti apokako pãkixinireẽ. Apiananiri posotiire ãkitaiko pite, ininiã amarini auakari Teoso ãkiri akiritãkako. ³⁶ Pinoromane Isapeo kiomãtxipe, iuaritika kamixiro oa. Kãkiti sãkirema: “!Oposotaikari kamixi onini” iuaritika seisi pakini kasiritipe kamixi onini. ³⁷ Kotxi Teoso posotari ikinipoko ikamini —itxaro oa.

³⁸ —Nikamapitikariko Apiananiri nirekaãkiti. Pisãpiretakiti iaõka ninirekapitika —otxa Maria.

Iuasaakipeka Teoso nitiri sipeka.

Maria Isapeomoni Motikini

³⁹ Mapaõti napa atoko Maria katimariã sari oxiratarimoni, Xotéia tõpamoni. Iuaã osari sitatximoni. ⁴⁰ Oĩroã Sakaria aapoko. Oãkiritaro Isapeo:

—Ereẽkai —otxa.

⁴¹ Isapeo kenakotakasaakiri Maria akiritiniro oa, iuasaaki amarini otikakoãkiri oãkika. Iuasaakipeka Erekari Matamatakoti itapararitika apoka Isapeo ãkixinireẽ. ⁴² Iuasaaki otapararitika otxaro Maria:

—Kaiãopokoro sito itixi auakani, iuaritika pitenokara Teoso sika apia erekari. Apaka Teoso sikariko erekari pamaritemoni. ⁴³ Erekari Teoso kaminano nota, kotxi niauĩte inoro motikaẽtano. Kinirepa ia erekari Teoso kaminano, kotxi nota minakato nitxaua. ⁴⁴ Nikenakotakasaakiri “Ereẽkai” pininino, namarite nitikakoãkiri oãkika, ipoxokoniuatiniã. ⁴⁵ Teoso sikari erekari pitemoni, kotxi pite auikari isãkire. Pite auikari isikaenetakiti atão isikinii —otxa Isapeo Mariamoni.

Maria Xikaretakiti

⁴⁶ Maria txari:

“Erekapitikari Apiananiri notamonikari.

⁴⁷ Nipoxokoniuaata, kotxi Teoso nimaerekani makatxaãkari itxaua.

⁴⁸ Nipoxokoniuaata, kotxi ixinikano nota. Initero poiãoro nitxaua. Ìkorakanani eereka auakani kãkiti txanoko: ‘Teoso kamapoxokonitaro, erekari isikiniro,’ txanoko nota.

⁴⁹ Nipoxokoniuaata, kotxi Teoso Apiananiri kaminano posotiiiretxi. Maerekati !auari iuamoni.

⁵⁰ Iua amonĩkari kãkiti iua paxitakani, kitxakapirĩkarini, ìkorakanani auakani, eereka auakani apaka iamoniãka.

⁵¹ Pataparari iua, ininiã ikamari posotiiiretxi. Teoso txĩkitakana kãkiti iuikakaniua minakani ininiãuana, kotxi ãkixinireẽ iuikauana.

⁵² Teoso makatxakapekari auĩtetxi pataparari inakaniua. Eereka auĩtetxi !itxaikauana ninoã. Kãkiti poiãorini inakaniua Teoso kamari auĩtetxi ininiãuana.

⁵³ Isikakientari natxitakani. Iokanitari katxineiroteri sini. Kona xatiki isikari iuamoni.

⁵⁴ Imoianatapekana Xoteoakori, iua ìkapani parĩkauatakani. !Imaxinĩkaretari iamoniĩkinina ninoã.

⁵⁵ Kitxakapirĩka Teoso xinikari Apraãoni iamoniĩkini. Apaka iua tikini auakani ãtipirika iamoniãka, kotxi: ‘Nimoianataiko hĩte,’ itxa anirimanemoni kitxakapirĩkarini-moni,”

otxa Maria.

⁵⁶ Okaikota ipi, ãti pakini kasiriti Isapeokata. Eereka oaãpokomoni kanapiriã otxa Maria.

João Kapatxisareri Iponaniini

⁵⁷ Amarini auini õti apopeka. Isapeo auãkitakari amarini kiki. ⁵⁸ Oaãpoko takote auakani, onirimane pakini kenakotari erekari Teoso kaminaro oa, ininiã ninoã, Isapeo pakini poxokopeka itxana ninoã.

⁵⁹ Oito õtisaaki, onirimane motika oamoni, Teoso takaõtxikare amarinimoni itakinina ìkapani. Inirekarina iuãka Sakaria itakauãkatinirina, kotxi iri uãkatxikana ninoã nireka itakauãkatinirina. ⁶⁰ Txamari inoro:

—Kona Sakariani iuãka. Xoãorako akiritaãkako —otxa.

⁶¹ Ininiã ninoã txaro:

—Pinirimane ãtika kona Xoão txa uãkataua.

⁶² Ninoã pimaãri amarini iri Sakaria iuakoãna amarini uãka inirekaãkiti. ⁶³ Ininiã Sakaria amanaãri iõkatsopatiko. Iõkatari: “Imi uãka Xoão.” Ininiã ikinimane tsoriãkaãta.

⁶⁴ Iuasaakipeka Teoso sikaposotiiiretari isãkirauatini:

—Peerekari Teoso —itxa Sakaria.

⁶⁵ Kãkiti iua aapoko takote auakani pĩkarauata. Teoso posotiiire ipĩkana. Ikara inakariene Sakaria, Xoão pakini pirenã iaripireta oxiratari Xotéia tõpa, ininiã kãkiti iuaãtaã sãpirenauanãta ikara pirenã. ⁶⁶ Kãkiti ikara inakariene kenakotakani tsoriãkaãta:

—Kanatokopa inakaripa itxatapaniua ia amarini? —itxana.

Ikinimane imarotari Apiananiri nĩkatiniri iua amarini.

Sakaria Xikaretakiti

⁶⁷ Iuasaaki Erekari Matamatakoti sikaposotiiiretari Xoão iri Sakaria, ininiã Sakaria sãpiretari Teoso sãkire:

⁶⁸ “Peerekari Apiananiri aTeosone, ikinimane Xoteoakori Teosone, kotxi iua apoka inakitiakorimoni imakatxakinina ìkapani, imapinakanina ìkapani.

⁶⁹ Teoso iokanitari kãkiti maerekani makatxakakari kaposotiiireri atemoni. Teoso nitiri Taviini mekanirira iua.

⁷⁰ Kitxakapirĩka Teoso sãkire sãpiretakani erekarini sãpiretari ikara Teoso sãkire.

⁷¹ Teoso txari: ‘Nimakatxakaiko hĩte himokaiakari mokakanii tĩkane, homanatakini mokakanii tĩkane.’

⁷² Isãpiretari aãtokiriakorini kitxakapirĩkarini:

‘Niamoniãkai. Nikamariko nikamaenetakiti hĩte ìkapani,’ itxa ninoamoni. Ikara Teoso kamaenetakiti erekari.

⁷³ Kitxakapirĩka Teoso txari aãtokiri Apraãoni: ‘Kona nimaxinĩkaretari nisikaenetakiti.

- ⁷⁴ Nimakatzakapitikaiko hīte himokaiakari mokakanii tīkane, ininiā hīparīkauata nota īkapani mapīkaretika.
- ⁷⁵ Ininiā hīte auini erekari. Kona hīkamari maerekati hāuapanika hinakasaaki, Teoso txari Apraōni.
- ⁷⁶ Pitepekana namarite Xoō, Teoso sākire sāpiretakari pitxauako. Teoso Apiananiri iaxitikiri sākire sāpiretakari pitxauako. Pite sari Apiananiri apisa. Ikinika pimaiamatako iua apokini apisa, ikinika iposope inini īkapani.
- ⁷⁷ Pisāpiretariko kākiti Teoso nakitiakori, Teoso makatzakiniri maerekanitxi kākiti kamakiti. Ininiā ninoa imarotariko ikara.
- ⁷⁸ Katiraōkiri aTeosone. Kaamonīkareri iua. Ininiā iua tixinekiri apokako atemoni. Atokatxi pokīkini atoko itxako. Iuasaaki ipiā !auaika, kotxi iua makatzakari amaerekani.
- ⁷⁹ Ininiā iua iopinikari kākiti xinire, ipinini pīkakani xinire. Ipiaā auakani atoko ninoa. Ininiā iua iopinikari axinire Teoso kimapore aimarotini īkapani, aūuini ereka inini īkapani.”

Itxa Sakaria xikare.

⁸⁰ Iua amarini aneē. Teoso sākire iaōka ikamapika. Teoso sākire Xoteoakorimoni imasāpiretakani apisapanika āparaā makipakaniātaā aua Xoō.

2

Xesosi Iponaniini Pirena (Mateo 1.1-25)

¹ Iuasaaki Homanoakori auīte Sesa Akósito inakori. Iua paniātana iniritiakori iaōtiniri ikininape kākiti iua auītetxi ininiātaāua tōpa auakani, ikini aapokotxitikini uāka imakatzakini īkapani. ² Mitxi Sesa Akósito !ikamapanikari kākiti iaōtiko. Iuasaaki Síria tixini auakani auīte Sirénio inakori. ³ Iuasaaki ikinimane sari sitatximoni iponaniiniātaāna. Iuaā isikarina iuākana.

⁴ Ininiā Xosee apaka sari iuāka isikini īkapani. Ininiā ipotorika Nasaree sitatxiti Kariréia tōpa. Xotéia tōpamoni isa, Pereē sitatxitimoni. Iuaā isa, kotxi iuaā auītetxi Taviini kitxakapirīka aua. Taviini nirimane itxaua Xosee. ⁵ Isa Mariakata. Ītanoro tīkane oa. Iuasaaki !itakapanikaro. Kamixipeka otxa iuasaaki. ⁶ Pereē apoka itxana. Iuaā auakasaakina, aua itxa amarini. ⁷ Oāūākitakari merepitipanika oimi kiki. Ininiā mākatxi mataā oiapirikari, pirātxi nipokotini tiitxitiā taka otxari amarini, kotxi kākiti imakanakiniātaā imakinika xāpokapeka, ininiā ninoa auanāta pirātxi auiniātaā.

Soti Auīte Piratakani Pirena

⁸ Iuaātaā Pereē sitatxiti mapotōkire īkanōka kikiakori soti auīte piratakani nīkanā-tari ipiraakorina. ⁹ Iuasaaki katimaritika Apiananiri nitiri iaxitikiri tokiā ninoamoni. Iuasaaki Apiananiri iotximere iopinikari ninoa auiniātaā, ininiā imarotarina Teoso apokini iuaātaā. Ininiā iteene ipīkarauatana ninoa. ¹⁰ Ininiā Teoso nitiri txana ninoa:

—!Hīpīkarauatape. Nota minapiretari erekari pirena ikinimane kākiti enenīkini īkapani, ¹¹ kotxi ia ōti kākiti maerekani makatxaākari iponaniāpeka Taviini auini sitatxitiā. Iua Teoso mereēkiti. Apiananiri iua. ¹² Himarotariko nisākire atāo inini, kotxi hāpokariko ia amarini mākatxi mataā iapirikiko pirātxi nikini tiitxitiā —Teoso nitiri txana ninoa.

¹³ Iuasaakipeka itomaneri Teoso nitiriakori iaxitikini tokiā iuaātaā. Ninoa xikarauata Teoso īkapani. ¹⁴ Ixikaretarina:

—Peerekari Teoso, iaxiti apiko nopinixiti auakari. Iua kamaerekaxiniretari kākiti iua apokaerekatakini —itxana ixikarena.

¹⁵ Teoso nitiriakori kanapiriā itxana Teoso tixinemoni. Iuasaaki ninoa pirātxi nīkatakani misākiretakakaua:

—Masa Pereēmoni. Maātamataru ikara Apiananiri sāpiretakiti —itxana.

¹⁶ Ininiā katimaritika isana Pereēmoni. Iuaā apokasaakina, initarina amarini. Apokana Xosee, Maria pakini. Ininiā atamatarina amarini pirātxi nikini tiitxitiā. ¹⁷ Ikara

atamataākana atoko, isāpirenātarina Teoso nitiri sāpiretakiti amarini pirena ikini-manemoni. ¹⁸ Kākiti kenakotakasaakiri soti auīte nīkatakani sāpiretakiti, ikinimane tsorīkaāta iuasaaki. ¹⁹ Maria kenakotakasaakiri soti auīte nīkatakani sāpiretakiti, oa ākixinireē onīkatari ikara ene. !Omaxinīkaretari ninoa sāpiretakiti. Oxinikapikari. ²⁰ Eereka pirātxi nīkatakani kanapiriā ipiraakori auinimoni. Imisākiretakakana:

—Peerekari Teoso. Apiananiri iua, kotxi erekapitikari aītikakiti. Erekapitikari iniriti iaxitikiri sāpiretakiti. Isāpiretakiti atāopitika, kotxi aāmatari isāpiretakiti iaōka — itxanātana ninoa soti auīte nīkatakani.

Xesosi Takauākatiko

²¹ Xesosi oīto ōti auakasaaki, inirimane kamari Teoso takaōtxikare iītoā. Iuasaaki inirimane takauākatari Xesosi, kotxi iua iaōka Teoso nitiri iaxitikiri sāpiretapekaro Maria oa kamixi oinini apisapanika.

Xesosi Anikiko Teoso Misākiretiko Aikotimoni

²² Moisesini ketotiniri manapi Xosee, Maria pakini kamari Moisesini paniātakiti iaōka amarini auakasaaki, Xosee, Maria pakini maerekani Teoso makatxakini īkapani. Ikara xipoka atoko anikarina Xesosi Xerosareē sitatxitimoni Apiananirimoni isikinirina īkapani, ²³ kotxi Apiananiri paniātakiti iōkatsopatakori txari:

Merepitipanika iponaniākari sikaākako Teosomoni, kotxi Teoso nakiti iua.

²⁴ Apaka Apiananiri paniātakiti iōkatsopatakori txari:

Amarini iponaniākasaaki, ipi kamoā pisika Teosomoni. Iminakaniā, ipi kamoā ākiri pisika Teosomoni,

itxa Teoso. Ininiā Xosee, Maria pakini sari Xerosareē kamoā isikinina īkapani.

²⁵ Iuasaaki kiki Simiāo inakori aua Xerosareē. Iua erekari kamakari. Ikinipoko Teoso paniātakiti ikama. Erekari Matamatakoti auari ākixinireē. Ākixinireē iāta-panātapikari Teoso Mereēkiti apokini, kotxi Isaeo auakani maerekani makatxaākari itxaua. ²⁶ Erekari Matamatakoti sāpiretapekari iua: “Pipinini apisa paōkitapanikariko Apiananiri Mereēkiti,” itxari Simiāo. ²⁷ Erekari Matamatakoti sikanireōtari Simiāo aiko Teoso misākiretiko aikoti iroini. Iuasaaki Xosee, Maria pakini iroā iuaātaā, Apiananirimoni Xesosi isikinina īkapani, Teoso paniātakiti ikaminina īkapani. ²⁸ Iuasaakipeka Simiāo apakapari Xesosi:

—Peerekari Teoso. ²⁹ Niauīte Apiananiri, uatxa apokapeka ia amarini pisikaenetakiti. Nota pite īkapani parīkauatakarino. Uatxa niposotari nipinini erekaxinirepeka ninini, ³⁰ kotxi nota atamataria ia amarini piokanatakiti atemoni, amaerekani imaktxakini īkapani, amapinakani īkapani. ³¹ Pite iokanatapekari ia īkorapokoriti ikini itixiti auakani maerekani imaktxakini īkapani. ³² Ia amarini tirikapi atoko, kotxi iopinikariko pikimapore, pisākire Xoteo minakaniua imarotini īkapani. Ia amarini tirikapi apiatakari atoko Xoteoakorimoni pinakitiakorimoni, kotxi oerekai pite ninoamoni —itxa Simiāo sākire Teosomoni.

³³ Xosee, Xesosi inoro apaka tsorīkaānāta ikara Simiāo sākire ikenakotakasaakina. ³⁴ Simiāo amanaāri Teoso ikinipoko erekari ninoamoni isikini īkapani. Eereka imisākiretaro Maria, Xesosi inoro:

—Teoso mereēri ia amarini Xoteoakorimoni iokanatiniri īkapani. Ia apakapakari Teoso apakapa apaka. Ia mapakapakati Teoso !apakapari. Imisiritaākako. Ia amarini oerekari Teoso kākitimoni, txamari itori kākiti !auikari isākire. ³⁵ Ikara atoko ininiā, itori kākiti xiniākiti kipatakori ākixinireē, imarotaākako. Pitepekana pite matinaniuatako. Pākipa iouata iorotini tsii atoko itxako —itxa Simiāo sākire Mariamoni.

³⁶ Iuasaaki oāua sito Teoso sākire sāpiretakaro Ana inakoro. Panoeo ākero oa. Oātokiri kitxakapirīka Asee inakori. Iuasaaki kiomātxipekaro oa. Oāua setxi ano ōtanirikata. Eereka ipīpe. ³⁷ !Oītaniriuataika. Oitēta koatrokananipeka oāuini. Oa auapika Teoso misākiretiko aikoti āki. Iuaā ikini ōti, ikini īkanōkati pakini omisākiretapikari Teoso. Itokata otakanapari onipokotini Teoso omisākiretini īkapani. ³⁸ Xosee, Maria pakini Simiāo misākiretaka atoko Ana apoka. Omisākiretari Teoso:

—Erekapitikari ia amarini pimereēkiti kākiti iātapakiti piokanatinini atemoni —otxa.

Eereka osāpirenauata Xesosi apokini pirena Xerosareē auakanimoni kākiti maerekani makatxaākari iātapakanimoni.

Nasaree Sitatxitimoni Ikanapiriinina

³⁹ Xosee, Maria pakini Apiananiri paniātakiti iōkatsopatakori imakinika ikamaākana atoko, kanapiriā itxana Kariréia tōpamoni. Iuaā isana aapokomonina Nasaree sitatxitiā. ⁴⁰ Iua amarini aneē. Itapara auaāpotari. Kimaroreri itxaua. Teoso iteene tiretari iua Xesosi.

Xesosi Misākirenātari Koerekarerini

⁴¹ Ikinikanani Xosee, Maria pakini sari Páskoa kiiniritimoni Xerosareē sitatxitimoni. ⁴² Xesosi tosi anopeka inakasaaki, isana Xerosareē auakari kiiniritimoni mitxi isanātinina atokokana. ⁴³ Kiiniri xipoka atoko Xosee, Maria pakini potorika aapokomonina isinina ikapani. Iuasaaki Xesosi kaikota Xerosareē. Txamari ninoa !imarotari ikaikotini. ⁴⁴ Ninoa uākatamari apanakini inirimanekata isini. Ikara atoko ininiā, ikimaporitana āti ōtipeka. Mapiānikata ipixinipokoriti initamarina inirimanemoni, aōkimaneremoni. !Apokarina. ⁴⁵ Ininiā ikanapiriāna Xerosareēmoni iuaikana initinirina ikapani. ⁴⁶ Ipi, āti pakini ōti initapiimarina. !Apokarina Xesosi. Eereka apokarina Teoso misākiretiko aikoti āki. Moisesi sākire oerekakanikata iitopākanāta. Xesosi kenakonātari ninoa sākire. Apaka ipimarauata. ⁴⁷ Ninoa Xesosi sākire kenakotakani tsorikaānāta, kotxi paimatireri iua. ⁴⁸ Xosee, Maria pakini apokasaakiri iua, kona imarotarina Xesosi parīka. Inoro txari: —Namarite, kinirepa pimisiritaua ate? Piri, nota pakini pikamamaxirexiniretaua ate. Anitapiimai. Kona aāpokai —otxari Xesosi.

⁴⁹ Ininiā Xesosi:

—Kinirepa hinitanātano? Kona himarotatari uai niri aapoko ninirekari nauini, ipaniātakiti nikamini ikapani —itxa.

⁵⁰ Txamari ninoa !imarotari Xesosi sākire.

⁵¹ Ikara atoko ininiā, Xesosi kanapiriā ninoakata Nasaree sitatxitimoni. Ikinika Xosee, Maria pakini sākire ikīpita. Inoro xinikapikari Xesosi sākire oākixinireē. Opotxitari oxinikiniri Xesosi sākire. ⁵² Xesosi aneē. Imatire apaka aneē. Teoso apokaerekatari Xesosi. Kākiti apaka apokaerekatari Xesosi.

3

Xoão Kapatxisareri Sāpiretakiti

(Mateo 3.1-12; Marko 1.1-8; Xoão 1.19-28)

¹ Homa sitatxitiā Homanoakori auīte Txipério inakori iua. Kīsi anokananipeka iua auītetxi ininiua iuasaaki. Iuasaaki Xotéia tōpa auakani auīte Pōsio Pirato inakori. Kariréia tōpa auakani auīte Erotxi inakori. Erotxi itari Piripi inakori. Itoreia tixini auakani auīte, Takonitxi tixini auakani auīte apaka itxaua Piripi. Iuasaaki Apireni auakani auīte Arisánia inakori. ² Iuasaaki Anasi inakori, Kaipasi inakori pakini sasetotxi auīteakori apiatakani itxauana ninoa. Iuasaaki Teoso sāpiretari isākire Xoōmoni Sakaria ākirimoni, āparaā makipakaniātaā auakasaaki. ³ Ininiā Xoão sari ikininape kākitimoni, uini Xotāo takote auakanimoni. Isāpiretari Teoso sākire:

—Hītakanapariko himaerekani. Eereka patxisata hinaākako. Ikara atoko hininiā, Teoso makatxakinii himaerekani —itxanāta Xoão ikininape kākitimoni.

⁴ Kitxakapirīka Teoso sākire sāpiretakari Isaía inakori iōkatsopatari:

Auako kiki āparaā makipakaniātaā. Isāpirenauatako. Itxariko: “Hōeretariko kimapori Apiananiri apokini apisapanika. Itīkaāpo erekari hīkamako iua napini ikapani.

⁵ Kipatxiā ixāpokakaākako ikini isauana. Ixirata miriī oerekataākako. Kimapori ikitokare oerekataākako. Kimapori pakota totaākako.

⁶ Ikinimane kākiti itixi auakani imarotariko Teoso makatxakiniri kākiti maerekani imapinakani ikapani,” itxanāta.

Ikara atoko itxa Isaía iòkatsopatakiti Xoão pirena. Kimapori kākiti oerekatini atokokana, auñtetxi apokini apisa, iua atokokana Xoão nirekari kākiti iposope inini Apiananiri apokini apisa, imaerekanina itakanapinina ìkapani.

⁷ Itomaneri kākiti sari Xoãomoni ipatxisatikona ìkapani. Ininiã Xoão:

—Imini katsiiri anaakorirai hñte. Teoso misiritapitikai himaerekani xika. Himitekini ! auari. Hinirekari hñpatxisatiko, txamari ! hinirekari hñtakanapiniri himaerekani.

⁸ Hinirekiniãri himaerekani hñtakanapini, ininiã hñkamariko erekari. Ikara atoko ininiã, hñerekari Teoso atão hñtakanapiniri himaerekani. Hñkixiniremoni !hñxinikapiri: “Teoso apakapapitikauako ate, kotxi ate atokirini Apraãoni txaua,” !hñtxapeko. Ari, nota sãpiretai hñte, Teoso nirekiniãri, iposotari ia kai soroã Apraãoni mekaniriakori ikamini. Kona Apraãoni posotari anikini Teosomoni. ⁹ Aamina maereka iriti atoko hñtxa. Teoso iposopeka hñte ixipokini. Kākiti auari ikitaite kauanari aamina maereka iriti itokini ìkapani. Ikinika aamina maereka iriti tokaãkako. Xaminaã oka inaãkanako. Teoso kamakiti iua atokokana itxa. Ininiã Teoso kitaite kauanapeka, aamina kotsa sauakiko tñkane. Iua atokokana ininiã, Teoso aiamatapeka hñte ixipokini ìkapani —itxa Xoão ninoamoni.

¹⁰ —Ikara atoko ininiã, kipa akama Teoso mamisiritakaniua ìkapani? —itxarina.

¹¹ Ininiã Xoão apakapapireta:

—Pimãka kuanata ipi auiniãi, ãti pisika mñkatxi kuanata mauakinitimoni. Nipokori auiniãi, pisikari nipokori mauakinitimoni —itxa Xoão sãkire.

¹² Kikiãkini, txineiro apakapakani Homano auñte nitiriakori, apoka apaka ipatxisatikona ìkapani.

—Koerekareri, atepékana, kipa ate kama Teoso mamisiritakaniua ìkapani? —itxarina.

¹³ Ininiã Xoão:

—Kākiti txineirote himaktxakakito, Homano auñte nireẽkito iaõka himaktxakako. Apikomoni !himaktxakapero —itxana.

¹⁴ ãtikaka sotatoakori apaka pimaãri:

—Atepekana, kipa ate kama amaerekani atakanapini ìkapani?

Ininiã Xoão:

—!Himañkapiri kākiti, itxineirote himixirikini ìkapani. Kona ãti maxikatñka !hñpoñtape. Hñpoxokoniuatoko txineiro hñpakapakitoã hñparñka ìki. !Hinirekapero apikomoni —itxa sotatoakorimoni.

¹⁵ Iuusaaki kākiti iãtapanãtari Teoso mereẽkiti apokini. Ininiã Xoão sãpiretakiti ikenakotakasaakina, ãkixinireẽna ixinikarina:

—Xoãokani Teoso mereẽkiti txataua atxñti? —itxanãtana ixinikanãtakitina.

¹⁶ Ininiã Xoão:

—ãparaañnokara nipatxisatai hñte. Nota tikini apoãkari patxisataiko hñte Erekarereri Matamatakotiã, xaminaã pakini. Apiatakari itxaua iua. !Apakata iua takote napokini ikiti mata nimaktxakini ìkapani, kotxi iua apiata. Nota poiãoka. Imaktxakari himaerekani, itxiko metao ãki auakari arikini atoko. ¹⁷ Katarereri ãpokari ahoisi otãta imaktxakini ìkapani. Otãta arikaãka. Oki nñkataãka ikiena nñkatikoãtaã. Iua atokokana Teoso nñkatariko kākiti erekarini. Maerekati kamakani arikaãkako xamina maxipoãkatñã.

¹⁸ Ikara atokora itxa Xoão sãpirena otãkikinina kākiti. Isãpiretari erekari pirena Teoso pirena kãkitimoni. ¹⁹ ãti õti Xoão pinitari Erotxi, Karirẽia auakani auñte:

—Pitakiniãro pitari Piripi ãtanoro Erotxia inakoro, maerekati pikama. Apaka apikomoni maerekati pikamapitipo —itxa Xoão.

²⁰ Ininiã iuusaaki iuañkana Erotxi kamari maerekati, kotxi itakari Xoão kateia ãki isãkire imapokaerekatakani xika.

*Xesosi Patxisatiko Pirena
(Mateo 3.13-17; Marko 1.9-11)*

²¹ Xoão Erotxi mañkini apisapanika ikinimane kākiti ipatxisatakasaaki, Xesosi apaka patxisataãka. Iuusaaki Xesosi sãkirauatakasaaki Teosokata, iaxiti takaka. ²² Erekarereri Matamatakoti katxaka Xesosi nopini. Kamoã katxakini atoko itxa ikatxakini. Iuusaaki ikenakotaãka iaxitikiri sãkire:

—Pite namarite, nitiretakiti, napokaerekatai, kotxi ninirekakiti pikama —itxa.

Xesosi Nirimaneakori Iua Apisapanika Auakani

(Mateo 1.1-17)

²³ Iuasaaki Xesosi potorika iparíkauatini Teoso ìkapani. Trīta anokananipeka itxaua iuasaaki Xesosi. Kākiti uākatari iua Xosee ākiri ininiāua.

Xosee iri Erii.

²⁴ Erii iri Matatxi.

Matatxi iri Arevii.

Arevii iri Meokii.

Meokii iri Xanai.

Xanai iri Xosee.

²⁵ Xosee iri Matatxia.

Matatxia iri Amosi.

Amosi iri Naoō.

Naoō iri Esirii.

Esirii iri Nakai.

²⁶ Nakai iri Maatxi.

Maatxi iri Matatxia.

Matatxia iri Semei.

Semei iri Xosee.

Xosee iri Xota.

²⁷ Xota iri Xoanaã.

Xoanaã iri Hesa.

Hesa iri Soropapeo.

Soropapeo iri Saratxieo.

Saratxieo iri Nerii.

²⁸ Nerii iri Meokii.

Meokii iri Atxii.

Atxii iri Kosaã.

Kosaã iri Eomataã.

Eomataã iri Eri.

²⁹ Eri iri Xosoe.

Xosoe iri Eriesa.

Eriesa iri Xoriĩ.

Xoriĩ iri Matatxi.

Matatxi iri Arevii.

³⁰ Arevii iri Simião.

Simião iri Xotaa.

Xotaa iri Xosee.

Xosee iri Xonaã.

Xonaã iri Eriakiĩ.

³¹ Eriakiĩ iri Mereaa.

Mereaa iri Mena.

Mena iri Matata.

Matata iri Nataã.

Nataã iri Tavii.

³² Tavii iri Xesee.

Xesee iri Opetxi.

Opetxi iri Póasi.

Póasi iri Sáomõ.

Sáomõ iri Nasoõ.

³³ Nasoõ iri Aminatapi.

Aminatapi iri Átximĩ.

Átximĩ iri Anii.

Anii iri Ésirõ.

Ésirõ iri Péresi.

Péresi iri Xotaa.

³⁴ Xotaa iri Xakoo.

Xakoo iri Isaki.

Isaki iri Apraão.

Apraão iri Tera.
 Tera iri Nakoo.
³⁵ Nakoo iri Seroki.
 Seroki iri Hakaoo.
 Hakaoo iri Pareki.
 Pareki iri Epi.
 Epi iri Sara.
³⁶ Sara iri Kainaã.
 Kainaã iri Apaxatxi.
 Apaxatxi iri Seĩ.
 Seĩ iri Noee.
 Noee iri Arameki.
³⁷ Arameki iri Metosareẽ.
 Metosareẽ iri Enoki.
 Enoki iri Xaretxi.
 Xaretxi iri Marereo.
 Marereo iri Kainaã.
³⁸ Kainaã iri Enosi.
 Enosi iri Setxi.
 Setxi iri Adão.
 Adão iri Teoso. Imapotökirepe.

4

Satanasi Nirekari Xesosi Kaminiri Maerekati
 (Mateo 4.1-11; Marko 1.12-13)

¹ Xesosi ipatxisatiko atoko, Erekar Matamatakoti iteene sikaposotiiretari iua. Erekar Matamatakoti txĩkitakari Xesosi uini Xotão itakanapini, ãparaã makipakaniãtaã isini ĩkapani. ² Iuaã koarêta õti auakasaaki, Satanasi atamakaerekatari Xesosi. Koarêta õti manipokotakatinoka itxa Xesosi. Ininiã natxinoka itxa Xesosi.

³ Ininiã Satanasi txari:

—Pite Teoso ãkiri pitxaua, ininiã ia kai soro komiri pitxĩkitaka —itxari Xesosi.

⁴ Ininiã Xesosi apakapapiretari:

—Kona, kotxi Teoso sãkire iõkatsopatakori txari:

Kona komirinanini txĩkitakari kãkiti ãtipirika auini tĩkane. Ikinika Teoso sãkirera txĩkitakari kãkiti ãtipirika auini tĩkane.

⁵ Ininiã iuasaaki Satanasi anikari Xesosi ixirata nopinixiti. Iuaã pakoteri oerekiniri ikinimane tixine. ⁶ Ininiã Satanasi:

—Nota posotari nisikinii ikinimane auĩtetxiakori posotiire. Ikinipoko ninoa txineirote apaka niposotari nisikinii. Merepitipanika notamoni isikaãka ia posotiiretxi, ininiã nota sikari ninirekaãkitimoni. ⁷ Ikara atoko ininiã, piteosonetiniãno, ia posotiiretxi nisikai pite —Satanasi txari Xesosi.

⁸ Ininiã Xesosi:

—Konapitini. Pisipeka Satanasi. Teoso sãkire iõkatsopatakori txari:

Apiananiri piTeosone. Iuanokara piteosoneta. Iua ĩkapaninokara piparĩkauatako.

⁹ Eereka Satanasi anikari Xesosi Xerosareẽmoni, aiko Teoso misãkiretiko nopinixiti. Itanoxiti paĩtanori. Pamonõkoniri. Iuaã itxari:

—Teoso ãkiri pininiãua, pokaua xiti. Ininiã ikinipoko kãkiti imarotariko Teoso ãkiri pininiãua, ¹⁰ kotxi Teoso sãkire iõkatsopatakori txari:

Teoso iokanatanako initiriakori iaxitikini pite inĩkatinina tĩkane.

¹¹ Ninoa maĩkai pimapinakani tĩkane, ininiã pikarouatini !auari. Kona kai soro karotari pikiti,

itxa Teoso sãkire —Satanasi txari Xesosi.

¹² Ininiã Xesosi:

—Teoso sãkire iõkatsopatakori apaka txari:

Kona patamakaerekatapiri Apiananiri piTeosone,
 —itxari.

¹³ Iuasaakipeka Satanasi atamakaerekatini Xesosi xipope. Ininiã itakanapari Xesosi ãti õti iuaĩkana ikanapiriini iuamoni ĩkapani.

Xesosi Mipotorikari Iparĩka Kariréia Tõpa
(Mateo 4.12-17; Marko 1.14-15)

¹⁴ Ikara inaãka atoko Xesosi kanapiriã Kariréia tõpa auakanimoni. Paposotiireri, kotxi Erekar Matamatakoti auari iuakata. Iua pirena iaripireta ikini Kariréia tõpa auakanimoni. ¹⁵ Iua oerekarauata aiko ãki Xoteo apotiitiniãtaãua. Ininiã ikinimane txari: —Peerekari iua, kotxi erekapitikari iua sãpiretakiti —itxana.

Nasaree Auakani Kona Auikari Xesosi Sãkire
(Mateo 13.53-58; Marko 6.1-6)

¹⁶ Eereka Xesosi sari Nasaree sitatxitimoni. Iuaã Xesosi aneẽ mitxi. Xoteo tomatini õtisaaki Xesosi itotapekari aiko Xoteo apotiitiniãtaãua isini. Ininiã iuasaaki, Xoteo tomatini õtisaaki isari iuaã. Iuaãtaã itima Teoso sãkire iõkatsopatakori atatsopatini ĩkapani. ¹⁷ Teoso sãkire sãpiretakari Isaía iõkatsopatakiti tsopa isikaãka. Ininiã imatakireẽri aãtsopa. Ia Teoso sãkire inita, atatsopata itxa:

¹⁸ —Erekari Matamatakoti notakata aua, ininiã Apiananiri mereẽno nota matxineirotenimonikari erekari pirena nisãpiretini ĩkapani. Iokanatano kateia ãki auakani nisikakini ĩkapani. Iokanatano mõsiãrenimoni iuaĩkana atamarauatinina ĩkapani. Iokanatano misiritakonimoni, ninoa misiritakani nixipokini ĩkapani.

¹⁹ Ipaniãtano kãkiti nisãpiretini: “Īkorakanani Teoso apokapeka kãkiti maerekani imaktxakini ĩkapani, imapinakanina tĩkane.”

Ikara atatsopata Xesosi.

²⁰ Aãtsopa iapirikaãka atoko, sika itxari sasetotxi nitirimoni. Ikara inaãka atoko Xesosi topãka. Imakinika kãkiti aiko Xoteo apotiitiniãtaãua ãki auakani, imakinikana atamatari Xesosi, isãpiretakiti kinirão kenakotaka inakani. ²¹ Ininiã Xesosi sãpiretana:

—Ikara Teoso sãkire hĩkenakotakiti apokapeka uatxa —itxa ninoamoni.

²² Ikinimane kãkiti sãpirenauata Xesosi ereka inini. Itsorĩkaãnãtana isãkire erekari ikenakotakasaakina:

—Kiãtokopa ininiãpa imarotatari ikara atoko inakari isãpiretini? Kotxi Xosee ãkirira iua, minakati ãkirira iua —itxanãtana.

²³ Ininiã Xesosi txana ninoa:

—Atxiĩti hĩte txanoko nota imatiretxi kitxakapirĩka kiomãtxiakori sãkire. Ninoa txari: “Pinĩtxi imarotakari pininiãua, piteka pipitaua.” Atxiĩti hĩxinikanãtari: Kapanaoõ sitatxiti nauakasaaki, nikamari posotiiretxi iuaãtaã. Kinirepa na nikamatari posotiiretxi uai nauiniãtaã? Ikara atoko atxiĩti hĩxinikanãta. ²⁴ Atão nisãpiretai, kãkiti Teoso sãkire sãpiretakari inirimane sauaki auakasaaki, inirimane !auikari isãkire. Ia xika kona nikamari posotiiretxi uai. ²⁵ Atãopitika nisãpiretai hĩte. Kitxakapirĩka Teoso sãkire sãpiretakari Eríasi inakori auakasaaki, ipi ãti pakini ano ipixini ano pakini ãparaã ! ikĩpa. Iuaã Isaeo tixini natxinoka aua. Iuasaaki kaiãopokoro sitoakoro tikinitakoro auari iuaãtaã. ²⁶ Iuaritika Teoso !iokanatar Eríasi ninoa ikininapemoni. Iokanatar ãtoka sitomoni tikinitakoromoni, nipokori isikiniro ĩkapani. Oa sito aua Sarepita sitatxiti Sitoõ tõpa, Isaeo tixini takote. Xoteo !otxaua oa.

²⁷ —Ikara atokotxikana itxa Teoso sãkire sãpiretakari Eriseo inakori. Iua auakasaaki, kaiãopokori amianatakani maere matati Isaeo tixini auakani aua. Kona imakinikani erekapeka inaãkana. Kiki Naamaã inakori Síria tixini auakari, iuanokara erekapeka itxĩkitakaãka. Iua Naamaã kona Xoteo litxaua iua —itxa Xesosi ninoamoni.

²⁸ Ikinimane aiko ãki apotiitakaniua, ikara ikenakotakasaakina, iteene inaiatauana. ²⁹ Ininiã ikosekaĩtotarina Xesosi sitatxi mapotõkiremoni. Anikarina ixirata nopini sitatxi auiniãtaã. Iuaã inirekarina Xesosi okinina ixiratamoni ipinini ĩkapani. ³⁰ Txamari Xesosi napari ninoa sauaki, ĩkorape itxa.

Kiki Maerekati Matamatakoti Auãitotakiti
(Marko 1.21-28)

³¹ Eereka Xesosi sari Kapanaoõ sitatxitimoni Kariréia tōpa. Iuaã tomatiko õtisaaki oerekana kākiti Teoso sākire. ³² Kākiti iuaã auakani tsorikaãnãta oerekakiti ikenakotakasaakina, kotxi paimatireri iua. Isãpiretakiti atãonoka itxa isākire. ³³ Iuasaaki aiko āki kākiti apotiitiniãtaãua, aua kiki maerekati matamatakoti auaitotakiti.

³⁴ Iua kiki ākixinire auakari akiripoakata:

—Xesosi Nasareekiri, kipa ĩkai uai? Kiãtokopa pitxataua ate? Atxiĩti papoka ate pixipokini ĩkapani? Nota imarotai pite. Pite maerekati mauakiniti pite. Teoso nakiti pitxaua pite —itxa maerekati matamatakoti Xesosimoni.

³⁵ Ininiã Xesosi txitari iua. !Auiritari isãkirauatini:

—Maãtako. Posipikari ere kiki —itxari.

Ininiã maerekati matamatakoti iriãkatari iua kiki ikinimane okiãtaã. Ininiã itakana- pari iua, makarotika itxa kiki. ³⁶ Kākiti iuaãtaã tsorikaãnãta. Imisãkiretakakauana:

—Īkora kiki paposotiireri isākire. Itapararitika ipaniãtari maerekati matamatakoti sini, ininiã nãkorape itxapena maerekani matamatakoni.

³⁷ Ininiã Xesosi pirena iua tōpa iaripireta.

Xesosi Makananitaro Simão Petro Imakiro
(Mateo 8.14-17; Marko 1.29-34)

³⁸ Eereka Xesosi potorika aiko Xoteoakori apotiitiniãtaãua. Simão aapokomoni isa. Iuasaaki Simão imakiro iteene oãpoomata. Ininiã amanaãrina Xesosi oa erekape inĩkitakini. ³⁹ Ininiã ipapĩka oamoni:

—Nipaniãtari apoomari iotokini —itxa.

Ininiã apoomari iotoka. Iuasaakipeka oa õkitikaua, nipokori osikana ninoo.

Xesosi Makananitana Amianatakani
(Mateo 8.16-17; Marko 1.32-34)

⁴⁰ Atokatxi ereẽkokaãpotapeka inakasaaki, kākiti anikana amianatakani ikinipoko amianari auakini, Xesosimoni. Itakari iuako amianatakani nopini. Iuasaakipeka ninoo erekapeka itxana. ⁴¹ Omitikari maerekati matamatakoti kākiti ĩtoã auakari apaka. Osipikasaakina, akiripoakatana:

—Pite Teoso ākiri pitxaua.

Ininiã Xesosi txitana ninoo. !Auiritaikana akiritinina, kotxi ninoo imarotari Teoso mereẽkiti ininiãua Xesosi.

Xesosi Sãpiretari Erekar Pirena
(Marko 1.35-39)

⁴² Katimatinĩkata Xesosi sari kākiti mauakaniãtaã. Iuasaaki kākiti nitanãtari iua. Apokasaakirina, amanaãrina Xesosi:

—Pikaikota atekata —itxarina.

⁴³ Txamari Xesosi txari:

—!Apakata uai nikaikotini, kotxi ātiãtaã apaka nisãpiretariko erekari pirena Teoso auĩtetxi ininiãua pirena. Ikinimanemoni ikara nisãpiretini ĩkapanira, Teoso iokanatano kãkitimoni.

⁴⁴ Ikara atoko ininiãra, isãpirenauata ikininape aiko āki Xoteoakori apotiitiniãtaãua ikinipoko Xoteoakori tixine.

5

Merepitipanika Xesosi Moianariakori
(Mateo 4.18-22; Marko 1.16-20)

¹ Āti õti Xesosi auanãta Xenesaree inakori poa tinikata. Xenesareetxikana Kariréia poa. Ipi iuãka aua. Iuasaaki kãkitipokoni ākitari iua Teoso sākire ikenakotinina ĩkapani. Iuakatapeka xãpoka itxana. ² Iuasaaki Xesosi atamatari ipi kanaua ioporoko. Kokatsaãriti kanauate. Ninoo imiriĩ arokanãtari hetxi. ³ Xesosi iereẽtaua Simão kanauate āki:

—Pikatika pikanauate amaãtiki apanĩkakiã —itxa Simãomoni.

Eereka iitopāka kanaua āki. Iuaātaā isāpiretari Teoso sākire kăkitimoni imiriĩ apotiitakanimoni.

⁴ Isāpirenauataka atoko itxari:

—Apanĭkakiā pimekota. Iuaātaā pitakari hetxi kăuaāriā —Xesosi txari Simão.

⁵ Ininiā Simão:

—Koerekareri, hetxi atakapikama ĭkanōka. Iteene aōkatsaākatapiikama. Txamari na xatiki ximaki amaĭka. Kona ātika amaĭka. Iuaritika pite paniātiniāno, iuaritika nitakapĭtikariko hetxi —itxa Simão.

⁶ Hetxi ninoa takasaaki kăuaāriā, ximakipokoni imaĭkana, ininiā hetxi tsorakiarita.

⁷ Ikara xika akiritana imoianariakori āti kanauate āki auakani:

—Āpina. Himoianataua ate. Hetxi tsorakiāpotanapanoka.

Ininiā ninoa ina. Ikinimane kosekari hetxi. Ximakipokoni. Ipi kanaua xāpoākata ximakinoka. Ximaki xika kanaua sakikaarita. ⁸ Simão Petro atamatakasaakiri ximaki pokoni, ikapotoreēkaua Xesosi apisatoō:

—!Pikaikotape nota takote, kotxi erekai pite. Maerekati kamakarino nota —itxa.

⁹ Ikara atoko itxa Simão sākire, kotxi iua, imoianariakori apaka tsorĭkaāta kaiōpokori ximaki ninoa maĭkakiti xika. ¹⁰ Simão moianariakori Txiako, Xoão pakini, ninoa apaka tsorĭkaāta. Txiako, Xoão pakini Sepeteo anaakori. Ininiā Xesosi txari Simão:

—!Pipĭkarauatape. !Pimaĭkaikari ximaki. Ātiāo piparĭka auako. Nisākire pisāpiretako kăkitimoni —itxa.

¹¹ Eereka ninoa apokitaāka atoko, ikinika itiina itakanapana, Xesosikata sa itxana imiparĭkatinirina ĭkapani.

Kiki Maere Matati

(Mateo 8.1-4; Marko 1.40-45)

¹² Āti ōti Xesosi auanāta āti sitatxitiā. Iuaā auakasaaki, aua kiki maere matati. Atamatakasaakiri Xesosi, ikapotoreēkaua, iāka Xesosi apisatoō. Iteene amanaāri Xesosi:

—Apiananiri, pinirekiniāri, piposotari nota ereka pitxĭkitakini —itxari.

¹³ Ininiā Xesosi maātakari iua:

—Ari ninirekapĭtikari. Erekapekai —itxari.

Iuasaakipeka erekapekai itxa. ¹⁴ Ininiā Xesosi paniātari:

—!Pisāpiretapiri apanakini ereka nitxĭkitakinii. Pisa sasetotximoni. Poerekari piĭto iuamoni, ininiākara itxai: “Atāopitika erekapekai pite.” Eereka pisikari Teosomoni Moisesi paniātakiti iaōka. Ikara atoko pikaminiā, ikinimane imarotari pite atāo ereka pininiāua —itxa Xesosi.

¹⁵ Xesosi paniātari iua apanakini imasāpiretakani, iuaritika Xesosi pirena apikomoni iaripireta. Ininiā kăkitipokoni sari iuamoni isākire ikenakotinina ĭkapani, amianari imaktxakini ĭkapani. ¹⁶ Ininiākara Xesosi itotapekari iuanoka isini kăkiti mauakaniātaā Teosokata isākirauatini ĭkapani.

Matĭpokotakati Pirena

(Mateo 9.1-8; Marko 2.1-12)

¹⁷ Āti ōti Xesosi sāpirenauata. Iua takote pariseoakori, kaiōkatsoparerini apaka topākanāta. Ninoa Karirĕia tōpakini, Xotĕia tōpakini, Xerosareē sitatxitikini pakini. Iuasaaki Xesosi sāpirenauatakasaaki, Apiananiri sikaposotiiretari Xesosi amianatakani erekapekai itxĭkitakini ĭkapani.

¹⁸ Iuasaaki kikiakori apoka iuaā. Iminarina kiki matĭpokotakatinoka inakari. Isirimata nopini iminarina. Inirekarina aapokotxi āki ĭroinina, Xesosi apisatoō iua matĭpokotakati itakinina ĭkapani. ¹⁹ Txamari !apakata ninoa ĭroini, kotxi kăkitipokoni xāpoka. Ininiā ikanĭkana kanikoatxiā aapokotxi nopini. Imaktxakarina itano auakari kipatxi kai kamakori, eereka isikakaāpotarina iua matĭpokotakati isirimata nopini Xesosi manapi kăkiti sauaki. Xesosi apisatoō apoka. ²⁰ Ininiā Xesosi imarotari ninoa auikiniri iua posotiire. Ininiā itxari matĭpokotakati:

—Namarite, pimaerekani maktxakapeēkaika.

²¹ Iuasaaki pariseoakori, kaiōkatsoparerini pakini tsorĭkaānāta. Ākixinireēna ninoa:

—Teosonokara posotari amaerekani imakatzakini. Maerekati Xesosi kama Teosomoni —itxana.

²² Xesosi imarotari ninoa xinikakiti ākixinireēna, ininiā Xesosi txana:

—!Erekari hākixinireē ikara hīxinikakiti. ²³ Nitxari iua imaerekani nimakatzakini, txamari !himarotari imaerekani atāo nimakatzakini. “Pōkitikaua. Pitipokota,” nininiā, ininiā himarotari nisākire atāo ininiāua, kotxi hītikari. Niposotiire imaerekani nimakatzakini ikapani, niposotiire iua nōkitikini ikapanitxikana. ²⁴ Ininiā uatxaika noerekai hīte. Teoso iokanatano nota hītari iaxitikirino ikorapokoritimoni kākiti maerekani nimakatzakini ikapani.

Ininiā ipaniātari matipokotakati:

—Pōkitikaua. Pisirimata pikoseka, sipe pitxa paapokomoni —itxari.

²⁵ Iusaakipeka ōkitikaua. Ikinimane kākiti okiātaā ōkitikaua. Ikosekari isirimata, sipe itxa aapokomoni. Isikasaaki ipoxokoniua.

—Peerekari Teoso —itxaāpota iua.

²⁶ Ikinimane kākiti tsorikaāta. Ipikarauatana.

—Peerekari Teoso. Mitxi !aītikari matipokotakati erekapeka txīkitaākari. Peerekari uatxa aītikakiti —itxanātana ninoa.

Mateo Pirena

(Mateo 9.9-13; Marko 2.13-17)

²⁷ Eereka Xesosi tīpokoāponātakasaaki, atamatari kiki Arevii inakori. Iitopākanāta iparīkauatiniātaā. Iuaā apakapari txineiro Homanoakori auīte paniātakiti kākiti ātiātaā tiitxi anikini ikapani. Xesosi akiritari Arevii:

—Āpina, uatxa nimoianari pitxaua —itxari.

²⁸ Iusaakipeka Arevii ōkitikaua. Ikinika itii itakanapa, Xesosikata sa itxa, Xesosi imiparīkatini ikapani. ²⁹ Eereka Arevii kamari kiiniri aapokoā Xesosi ikapani. Kiinirisaaki aua ikamanere kaiōpokori. Txineiro apakapakanani aua kiiniriā. Ninoa apanakinikata nipokota Xesosikata Arevii aapokoā. ³⁰ Pariseoakori, ninoakata parīkauatakani, kaiōkat-soparerini pakini txitana Xesosi moianariakori, Xesosi txineiro apakapakanikata nipokotini xika. Ininiā ninoa txari:

—Kinirepa hīte nipokota txineiro apakapakanikata, maerekati kamakanikata? —itxana.

³¹ Xesosi apakapapiretana:

—Kākiti mamianatakani !inirekari pinītxi siākarimoni isinina. Amianatakarinoka nirekari pinītxi siākarimoni isini. ³² Iua atokokana, nota ina ikorapokoriti kona kākiti “Atāo inakarino kamakarino” ikapanini, kotxi ninoa uākatari atāo inakarino ikaminina, txamari !ikamarina atāo. Kākiti maerekati kamakanani ikapanira nina nota uai imaerekani itakanapini ikapani. Nota pinītxi siākari atoko inakarino nota —itxa Xesosi sākire iusaaki.

Nipokori Takanapiko Teoso Misākiretiko Ikapani

(Mateo 9.14-17; Marko 2.18-22)

³³ Kākiti txari Xesosi:

—Xoāo kapatxisareri moianariakori itokata takanapari inikinina Teoso imisākiretinina ikapani. Iua atokotxikana itxa pariseoakori moianariakori. Txamari pite moianariakori !itakanapari nipokori, iāriā, Teoso imisākiretinina ikapani. Kinirepa? —itxana kākiti.

³⁴ Ininiā Xesosi apakapapiretana:

—Kiki itaniriuatini pirenasaaki erekari atxiīti kemaītxitakoni manikakaniāri nipokori? !Erekari. Ninoa poxokoniua imoianari itaniriuatini, ininiā inipokotapitikana.

³⁵ Txamari āti ōti ninoa moianari maīkaākako, oka inaākako. Iusaakiko ninoa takanapari inipokotini, kotxi imatinaniuatana. Iua atokotxikana nota. Nota auapanika nimoianariakorikata. Āti ōti nokaākako. Iusaakiko ninoa takanapari inipokotini Teoso imisākiretinina ikapani —itxa Xesosi.

³⁶ Eereka Xesosi sāpiretari sāpirenatxi, atāo inakari oerekiko.

—! Pikitsorākitari mākatxi amaneri, kitxakari pitāpanetini ĩkapani. Ikara atoko pikaminiā, mākatxi amaneri pioanata. Mākatxi mata amaneri ĩsapekata piotsainiā, mākatxi kitxakari tsorakita iuaĭkana. ³⁷ Kākiti kitakari ovaā sako aamata kamakori āki. Ovaā amanero auiniā, !otakaāka aamata kitxakari āki. Pitakiniāro aamata kitxakari āki, aamata tsorakita. Ovaā xikepoatamako. Sako !otxaika. ³⁸ Ovaā amanero pikitakako aamata amanero āki. ³⁹ Ovaā kitxakaro auiniā, kākiti !inirekaro amanero, kotxi: “Ovaā kitxakaro apiaerekata,” itxa.

Ikara atoko Xesosi txari kākitimoni. Ikara sākiretxiti Xesosi sāpireta, kotxi apanakini kākiti itotapekari Moisesini sākire, Teoso sākire kitxakapirĭka isāpiretakiti, ininiā ! inirekari Xesosi sākire amaneri inakari. Ninoa mākatxi kitxakari atoko. Sako kitxakari atoko ninoa. Ovaā kitxakaro atoko ninoa. Xesosi sākire mākatxi amaneri atoko. Ovaā amanero atoko itxa Xesosi sākire.

6

Tomatiko Ōti Pirena (Mateo 12.1-8; Marko 2.23-28)

¹ Xoteoakori tomatini ōtisaaki Xesosi imoianariakorikata motipetari kiki takari triko auiniātaā. Īpiripetakasaakirina, imoianariakori makatxakaāpotari triko oki. Iuakoā ikotxokarona, ixōka itxarona otāta katxakini ĩkapani, okinoka nika itxana. ² Ātikaka pariseoakori itikana imakatxakinirona:

—Kinirepa triko ĩkotxoka tomatiko ōtisaaki? !Auiritaāka tomatiko ōtisaaki parĭkauatiko —itxana.

³ Ininiā Xesosi apakapapiretana:

—Himarotari Taviini kamakiti kitxakapirĭka, iua imoianariakorikata natxitakasaaki.

⁴ Iua ĩroā Teoso misākiretikoātaā. Iuasaaki imakatxakari komiri Teosomoni sikakori. Inikari, sika itxari imoianariakorimoni. Ninoa nikari apaka. Sasetotxinokara auiritaāka iua komiri inikinina. Apanakini !auiritaāka inikiniri. Iuaritika iua Taviini nikari.

⁵ Nota ĩtari iaxitikiri posotari ikinipoko ninireĕkiti nikamini tomatiko ōtisaaki, kotxi Apiananiri nitxaua —Xesosi txana ninoa pariseoakori.

Motĭkauakotakari Pirena (Mateo 12.9-14; Marko 3.1-6)

⁶ Āti tomatiko ōtisaaki Xesosi ĩroā aiko āki Xoteoakori apotiitiniātaāua. Oerekarauata. Iuasaaki iuaātaā aua kiki iuako ikikomoni motĭkauakotakari. ⁷ Kaiōkatsoparerini, pariseoakori apaka aua iuaā. Atamatapikarina Xesosi, atauako erekapeka itxĭkitapaniri motĭkauakotakari tomatiko ōtisaaki. Inirekarina Xesosi kerokiniri. Tomatiko ōtisaaki iparĭkauatiniā, ninoa apoĭtari iua. ⁸ Xesosi imarotari ākixinireĕna ixinikakitina, ininiā ipaniātari kiki motĭkauakotakari:

—Pōkitikaua. Āpina ikinimane okiātaā.

Ininiā iua kiki ōkitikaua, sa itxa Xesosimoni. ⁹ Ininiā Xesosi pimaāna kaiōkatsoparerini, pariseoakori pakini:

—Natokopa itxa Moisesini paniātakiti iōkatsopatakiti tomatiko ōtisaaki atāo akamini? Ipaniātataua maerekati akamini tomatiko ōtisaaki? Ipaniātataua erekari akamini tomatiko ōtisaaki? Inirekatari amoianatiniri āti imapinakani ĩkapani tomatiko ōtisaaki? Inirekatari aōkaniuatini tomatiko ōtisaaki? —itxa Xesosi ninoamoni.

¹⁰ !Kasākirena ninoa kaiōkatsoparerini, pariseoakori pakini. Xesosi atamatana ikinimane.

—Piuako poerekata —itxari iua kiki.

Oerekatari iuako. Iuasaakipeka iuako erekapeka itxa. ¹¹ Pariseoakori, kaiōkatsoparerini pakini omanākarauata. Imisākiretakakauana Xesosi okinina ĩkapani.

Xesosi Mereĕna Tosi Imoianariakori (Mateo 10.1-4; Marko 3.13-19)

¹² Āti ōti Xesosi kanĭka oxiratarini nopini, Teoso imisākiretini ĩkapani. Īkanōka ikaikota iuaātaā Teosokata isākirauatini ĩkapani. ¹³ Katimatiniĭkata akiritana itomaneri

imoianariakori iuamoni apokinina ĩkapani. Apokasaakina, imereēna kikiakori tosi pakini kăkitimoni iokanatakini tĳkane. ¹⁴ Imereēna

Simăoma, (Iuăka Petro apaka.)

Ătreema, (Simăo itari)

Txiakoma,

Xoăoma,

Piripima,

Patoromeoma,

¹⁵ Mateoma,

Tomeema,

Txiakoma, (Aopeo ākiri)

Simăoma, (Homano omanatakari)

¹⁶ Xotasima, (Txiako ākiri, āti Txiakoti)

Xotasi Isikariotxima (Xesosi mĳkapiritakari tĳkane) pakinima.

Ninoa kikiakori tosi pakini Xesosi mereēkini imoianariakori ĩkapani.

Xesosi Amianatakani Imakananitini

(Mateo 4.23-25)

¹⁷ Eereka oxiratari iokiriiăpotana. Ipitexitimoni apokana. Iuaă aua kaiăopokori imoianariakori. Apanakini kăkiti iuaătaă aua apaka. Xotėia tőpa ĩkani, Xerosareē sitatxiti ĩkani pakini auari iuaă. Apaka auari Txiro sitatxiti ĩkani, Sitoō sitatxiti ĩkani apaka. Txiro, Sitoō pakini potxoari uiniti ĩtinikata aua. ¹⁸ Ninoa kăkitipokoni sari Xesosimoni isăkire ikenakotinina ĩkapani, amianarena imakatzakini ĩkapani. Ninoa maerekati matamatakoti auaiătotakini sari Xesosimoni maerekati imakatzakini ĩkapani. ¹⁹ Ikinimane nirekari imaătakiniri Xesosi, kotxi imaătakiniărina, apakapari Xesosi tapara amianarena sini ĩkapani. Ininiă ikinimane amianatakani Xesosi maătakakani iuaĳkana erekape itxana.

Kirimonipa Teoso Sikatari Erekari?

(Mateo 5.1-12)

²⁰ Eereka Xesosi misăkiretana imoianariakori:

—Hĳte matxineiroteni Teoso sikai erekari. Teoso hĳauĳte itxaua. Iua nakitiakori hĳtxaua.

²¹ —Hĳte ĩkorapokoriti natxitakani Teoso sikai erekari. Himitouatapanikako.

—Hĳte ĩkorapokoriti txiapatakani Teoso sikai erekari. Hăpiapoxokonitapanikako. Hĳsiroatapanikako.

²² —Apanakini omanatiniăi hĳte, hĳtari iaxitikiri săkire hăuikini xika, Teoso sikai erekari. Atxiĳti apanakini !nirekai. Atxiĳti apanakini misăkirepiretai. Atxiĳti ninoa akiritai “maerekati kamakari” nota hĳtari iaxitikiri săkire hăuikini xika. Ikara atoko hinaăkako.

²³ —Ninoa misiriăpotakasaakii, hĳpoxokoniuatako. Himĳteenekariko hĳpoxokoniritika, kotxi erekari Teoso nĳkatinii iaxiti itixine. Inĳkatakiti hĳte ĩkapani peerekari. Apanakini misiritinii atokokanera, ninoa atokiriakorini misiritari Teoso săkire săpiretakani kitxakapirĳka.

²⁴ —Hĳte ĩkorapokoriti katxineiroterini misiritaăkako. Mitxi papoxokonii hĳte. Uatxa hĳpoxokoni !auaika.

²⁵ —Hĳte ĩkorapokoriti ikiniőtika mitouanătakanii misiritaăkako. Hinatxitapanikako.

—Hĳte ĩkorapokoriti siroatakanii misiritaăkako. Himatinaniuatapanikako. Hĳtxiapatapanikako.

²⁶ —Ikinimane: “Peerekai pite,” ininiă, himisiritaăkako, kotxi ninoa nirimane kitxakapirĳkarini săpiretari ikara atoko inakari Teoso săkire atăo masăpiretanimoni —itxa Xesosi.

Kăkiti Mokaiakari Tiretiko

(Mateo 5.38-48)

²⁷ Iuaĳkana Xesosi săpirenauata:

—Nõtākikai hīte nisākire kenakotakanii. Hītiretanako himokaiakari. Erekarī hīkam-inana hīte omanatakani. ²⁸ Himisākiretariko Teoso erekari hīte misākirepiretakani isikini īkapani. Himisākiretariko Teoso hīte misiritakani īkapani. ²⁹ Kākiti aritiniāi pikakota, ipinimoni pikakota iuaīkana pisikana. Kākiti anikiniāri pimāka ōtanominari, paunitari iua pimāka kauanata apaka anikini. ³⁰ Pitii amanaākarimoni pisika inirekakiti. Kākiti anikiniāri pitii, !pamanaāpiri iuaīkana imikanapiriiniri. ³¹ Āti tiritinii pinirekini atokotxikana, pitiretari āti.

³² —Pite tiretakaninani pitiretiniā, kinirepa Teoso sikari erekari pitemoni, piniri-manenokara pitiretakasaaki? Kotxi kākiti maerekati kamakani apaka tiretari ninoa tiretakani. ³³ Pimoianatiniāna pite moianatakaninani, !apakata, kotxi iua atokotxikana maerekati kamakari moianatana iua moianatakaninani. ³⁴ Pisikiniāro pitxineirote, pitxineirote mikanapiriākarimoninani, !apakata, kotxi iua atokotxikana maerekati kamakani sikaro itxineirotena apanakini maerekati kamakanimoni āti ōti iuaīkana imikanapiriiniro īkapani. ³⁵ Iua atokokana na pitxape. Pitiretariko pimokaiakari. Erekarī pikaminariko. Inirekiniāri pitii iparīkauatini īkapani, pisika iuamoni. !Pimaākapewa, pitii iuaīkana imasikaniāi. Iua atokokana hīkaminiā, Teoso sikai hīte iteene erekari. Iua atokokana hīkaminiā, Apiananiri iaxitikiri anaakori hītixauako, kotxi iua amonīkari kākiti maerekati kamakani. Ninoa !isāpiretari Teoso iua ereka inini, iuaritika Teoso amonīkana. ³⁶ Piamonīkariko āti, aīri Teoso amonīkaruatini atokokana —itxa Xesosi.

Apoiretxi Pirena

(Mateo 7.1-5)

³⁷ —!Papoītapiri āti. Papoītiniāri āti, ininiā pite apaka apoītaākako. !Pisāpiretapiri āti ikamakiti maerekati inini, ininiākara Teoso !isāpiretai pite pikamakiti maerekati inini. !Pixinikapinikari maerekati āti kamakiti pitemoni, ininiā Teoso !ixinikaikari maerekati pite kamakiti. ³⁸ Pisikarauatako ātimoni, ininiā Teoso sikarauata ito pitemoni. Kaiāopokori papakapa. Atarokiri arata āki takakori atokokana papakapa. Atarokiri iōkokakori, kaiākakori kinapakopeka iuaīkana atarokiri inopini takaāka. Xāpoākata, ininiā katxapoaāpota. Iua atokotxikana Teoso sikai kaiāopokori, ātimoni pisikarauatiniā. Ātimoni pisikarauatini atokotxikana, Teoso sikarauata pitemoni —itxa Xesosi.

³⁹ Xesosi sāpiretari ia sāpirenatxi atāo inakari oerekiko:

—Apakata āti mōsiāreti anikiniri āti mōsiāreti? !Apakata. Ninoa ipi irikako aariko āki. Ininiā nota sākire himimarotakanisaaki, kona apakata hōerekiniri āti. Hōerekiniri āti, hīkerokari. Ninoa mōsiāreni aariko āki irikakani atoko hītixa. ⁴⁰ Apaiaōkarauatakarī !imarotari koerekareri imarotakiti atoko. Poiāonoka imarota. Apaiaōkaruatini ixipokasaaki, iusaaki koerekareri imarotakiti atoko imarotape.

⁴¹ —Pisāpiretari āti: “AāSORO aua poki āki,” txamari kona pimaākatari aātxirata pite oki āki auakari. Kinirepa ikara atoko inakari pikama? ⁴² Kinirepa pitxari pitari? “Nitari, nota makatxakinii aāSORO pokiā auakari,” kotxi !piposotari patamatiniri aātxirata piteka pokiā auakari. Pisākire atxiīti erekari, txamari pikamakiti kona erekari. Merepitipanika pimakatxakari aātxirata piteka pokiā auakari. Eereka piposotari patamatiniri aāSORO pitari okiā auakari pimakatxakini. Maerekati pite kamakiti apiata atxiīti iua aātxirata atoko. Maerekati āti kamakiti poiāoka atxiīti iua aāSORO atoko. Iuaritika !pimaākatari maerekati piteka kamakiti. Pōtākikari āti imaerekani itakanapini. Ikara atoko !apakata. Merepitipanika pite takanapariko pite maerekani, eereka pōtākikari āti imaerekani itakanapini —itxa Xesosi sākire.

Amātiiri Pirena

(Mateo 7.15-20; 12.33-35)

⁴³ —Amātiiri erekari kona iritari matximakoti. Amātiiri matximakoti kona iritari erekari. ⁴⁴ Patamatiniāri amātiiri, pimarotari imina. Txipokori piko inakoro pinirekiniā, kona pisa inakomoni. Ova pinirekiniā, kona pisa inakomoni. ⁴⁵ Kākiti erekari amātiiri erekari atokokana itxa. Iua erekari, ininiā erekarinoka ikama, kotxi iua ākixinireē erekarinoka aua. Kākiti maerekati amātiiri matximakoti atoko itxa. Iua maerekati,

ininiã ikamakiti maerekati apaka, kotxi maerekatinoka auari iua ãkixinireẽ. Iua ãkixinire ereka, ininiã isãkire ereka apaka. Iua ãkixinire maerekati, ininiã isãkire maerekati apaka, kotxi isãkire potorika ãkixinireẽ —itxa Xesosi sãkire.

Aapokotxi Kamakari

(Mateo 7.24-27)

⁴⁶ Xesosi sãkirauatapanika:

—Kinirepa pakiritano nota “Apiananiri,” nipaniãtakiti pimakanakanisaaki? ⁴⁷ Kãkiti notamoni ãkari, nisãkire kenakotakari, nisãkire kãpitakari, aapokotxi kamakari atoko itxa. ⁴⁸ Iua kamari aapokotxi. Ikisakari kipatxi. Otsomori aapoko tsota ikama. Iua apokari kai, ininiã iopitãkari aapoko tsota iua kai nopini. Ininiã aapokotxi ikamakiti paikori. Æparaã apoãtakasaaki, itorõkani inokasaakiri iua aapoko, !iakeka, kotxi iua kiki atão ikamari aapoko. Iua kiki atoko kãkiti nisãkire kãpitakari.

⁴⁹ —Ãti kiki aapokotxi kamakari, iua iopitãkari aapoko tsota motsomotika popaiape ininiãtaã. Æparaã apoãtakasaaki, itorõkani inokasaakiri iua aapoko pakitika. Xipoka itxa. Iua kiki atoko kãkiti nisãkire kenakotakari, nisãkire mauiaãkati —itxa Xesosi.

7

Xesosi Makananitiniri Sotato Auãte Nitiri

(Mateo 8.5-13)

¹ Ikara sãkiretxiti isãpiretaka atoko, Kapanaoõ sitatxitimoni isa Xesosi. Iuaãtaã apoka.

² Kapanaoõ auari kiki ãti uãka Homano inakori. Sotatoakori auãte itxaua iua Homano. Ipaniãtana sotatoakori seã pakini inireẽkiti ikaminina. Xesosi apokasaaki Kapanaoõ, iua Homano nitiri iteene itiretakiti amianata. Ipinanapanoka.

³ Iua Homano kenakopiretari Xesosi. Ininiã ipaniãtari Xoteoakori kiomãtxiakori Xesosimoni isinina.

—Hitxariko: “Homano nirekai iuamoni pisini, initiri pimakananitini ãkapani.”

⁴ Ininiã ninoa sa itxana Xesosimoni, aõkita itxarina.

—Masa sotatoakori auãtemoni. Initiri amianata. Masa, pimakananitiniri ãkapani. Iua Homano erekari itxaua, ininiã erekapitãkari pimoianatiniri iua. ⁵ Itiretari Xoteoakori. Aiko aãpotiitiniãtaãua ikaminua ate, ininiã iua Homano erekari itxaua —itxana ninoa.

⁶ Ininiã Xesosi sari ninoakata. Iua Homano aapoko takote apokasaaki, iua Homano iokanataro imoianariakori Xesosimoni, isãpiretinirina ãkapani:

—Apiananiri, apikomoni !pisipe, kotxi minakati nota. Pite Apiananiri txaua. Nota apakapiniãi naapoko ãki !apakata. ⁷ Nota pitemoni napokini !apakata, kotxi pite Apiananiri, nota poiãori. Ininiãkara ereẽ piotoka. Ereẽkarako pitxãkitakariko ninitiri ereka inini. ⁸ Nota auãte paniãtiniãno nota ipaniãtakiti nikamini ãkapani, ininiã nikamapitãkariko. Nota auãtetxi nitxaua apaka. Nota paniãtakiti sotatoakori kamapitika. Æti nipaniãta: “Pisa,” ininiã iua sa. Æti nipaniãta: “Uai pina,” ininiã iua ina. Ninitiri nipaniãta: “Ia pikama,” ininiã iua kamari. Ininiã nimarotari ereẽ pite paniãtiniãri ninitiri ereka inini, ereẽkarako erekapeka pitxãkitakari ninitiri —itxa Homano sãkire Xesosimoni.

⁹ Iua Homano sãkire ikenakotakasaaki, Xesosi tsoriãkaãta. Isapotorika, misãkireta itxana kãkiti iuakata sikani.

—Iua Homano iteene auikari nisãkire. Peerekari. Mitxi Inaõkitari nisãkire auiaãkari iua Homano atoko inakari. Na naõkitapanikari Xoteo iua Homano atoko inakari —itxa.

¹⁰ Eereka ninoa Homano iokanatakini kanapiriã Homano aapokomoni. Iuaã apokasaakina, atamatarina Homano nitiri. Erekapeka itxa.

Xesosi Txãkitakari Ipãkari Iuaãkana Auãki Inini

¹¹ Mapaõti napaãka atoko Xesosi sari Naiã sitatxitimoni. Imoianariakori, kãkitipokoni apaka sari iuakata. ¹² Iimatokoãpotakasaakiri sitatxi pirikere tore kãkiti ãronakikoãtaã, ipãkari imipokãkaãka sitatxi mapara. Sito imatonõkari oimi ipãpe. Oa sito tikinitakoro. Kaiãopokori kãkiti sitatxi auakani pokãka oakata sikani. ¹³ Apiananiri atamatakasaakiro, iamoniãkaro oa, ininiã:

—!Pitxiapatape —itxaro.

¹⁴ Isa ipīkarimoni. Imaātakari ipīkari auini kaixati, ininiā iua kaixa anikakani iotoka. Iuasaaki iua akiritari:

—Ātokori, nipaniātai pōkitikaua —itxa Xesosi.

¹⁵ Iuasaakipeka iua ātokori topāka, sākirauata itxa. Ininiā Xesosi sikari iua inoromoni.

¹⁶ Ikinimane pīkarauata.

—Peerekari Teoso. Teoso iokanatarari isākire sāpiretakari apiatakari atemoni. Teoso apokapeka īkorapokoriti ate inakitiakori imoianatini īkapani —itxanātana ninoa.

¹⁷ Ia Xesosi pirena iaripireta ikini tōpati Xotéia tōpa. Apaka apikoxiti Xesosi pirena kenakopiretaāka.

Hoão Kapatxisareri Pimaākiti Sākiretxiti

(Mateo 11.2-19)

¹⁸ Hoão kapatxisareri moianariakori minapiretari Xesosi pirena Hoāomoni. Eereka Hoão akiritari imoianariakori ipi:

¹⁹ —Hīsa Xesosimoni. Hīpimaāri: “Teoso mereēkitikai pite? Kākiti iāpapanātakitikai pite? Kākiti iāpapanātakiti ātikani atxiīti?” Ikara atoko hītxako Xesosimoni —Hoão txana ninoa.

²⁰ Ininiā ninoa ipi sari Xesosimoni. Iuamoni apoka itxana.

—Hoão kapatxisareri iokanataua ate pitemoni. Ipimaāri: “Teoso mereēkitikai pite? Kākiti iāpapanātakitikai pite? Kākiti iāpapanātakiti ātikani atxiīti?” itxai —itxana.

²¹ Iuasaaki ninoa Xesosimoni apokasaaki, amianatakani kaiāopoko erekapeka itxīkitaka Xesosi. Iua omitikari maerekani matamatakoni kākiti itotaā auakani. Mōsiāreni kōsiārepeka itxīkitaka. ²² Ininiā Xesosi apakapapiretana Hoão moianariakori:

—Hīkanapiriā Hoāomoni. Hīsāpiretari mixikanani uai hītikakiti, hīkenakotakiti pakini. Hīsāpiretari mitxi mōsiāreni uatxa kōsiārepeka nitxīkitakapeka. Hīsāpiretari mitxi matīpokotakani tīpokotapeka uatxa. Mitxi maere matati erekapeka uatxa. Mitxi makenakokini uatxa kakenakokipeka. Mitxi ipīkani iuaīkana auāki itxapekana. Hīsāpiretari Hoão, nota sāpiretari Teoso iokanapirena erekari minakati mauakinimoni. ²³ Kākiti iteene auikiniāri nota sākire, Teoso takari erekari iuamoni. Ikara nisākire hīsāpiretari Hoão —itxa Xesosi.

Hoão Kapatxisareri Pirena

²⁴ Ininiā ninoa Hoão moianariakori sipe. Eereka Xesosi sāpiretari Hoão pirena kākiti iuamoni apotiitakaniua.

—Kipa īkai hīte Hoão kapatxisarerimoni hīsikasaaki āparaā makipakaniātaā iua auakasaaki? Hīte sari iuamoni, kotxi isākire ātinoka, Teoso sākirenoka. Kākiti katsotati itīma anikakiti atoko itxa. Isākire kita āti, isākire uatxa ātiāo, isākire katana iuaīkana ātiāo, itxaāpota isākire. Ikara atoko litxa Hoão. ²⁵ Kipa īkai hīte Hoāomoni hīsikasaaki? Hīte sari iuamoni, kotxi !inirekari tiitxi, txineiro pakini. !Kakaroneri imāka, kotxi !ikaikota auītetxi aapoko. Auītetxi auiniātaā kākiti māka peereri. ²⁶ Kipa īkai hīte iuamoni hīsikasaaki? Hīte sari iuamoni, kotxi iua Teoso sākire sāpiretakari itxaua. Atāo inakari Teoso sākire sāpiretakari itxaua. Apiata iua Hoão. ²⁷ Apiata iua, kotxi kitxakapiriāka Teoso sākire iōkatsopatakori sāpiretaperi Hoão pirena:

Ia kiki nisākire sāpiretakari. Niokanatarari iua kākitimoni, pite nimereēkiti sini apisa, papokini isāpiretini īkapani, kākiti iposope inini īkapani, itxa Teoso sākire iōkatsopatakori.

²⁸ Iuaīkana Xesosi txana kākiti:

—Atāo nisāpiretai, āti Hoão atoko inakari lauari. Hoão apiata. Iuaritika kākiti Teoso auītetakari poiāori inakari apia imarotariko Teoso kamakiti tīkane —itxa Xesosi.

²⁹ Ikinimane kākiti, txineiro apakapakani apaka kenakotakasaakiri Xesosi sākire, imarotarina Teoso nireēkiti kākiti kamini īkapani atāo inini, kotxi ninoa sari Hoāomoni ipatxisatikona īkapani. ³⁰ Txamari pariseoakori, Teoso paniātakiti oerekakani pakini !inirekari Hoão patxisatinina ninoa, ininiākara Teoso nireēkiti iaōka !inirekana ikaminina.

Kākiti Īkorasaaki Auakani

³¹ Xesosi sãpirenauatapanika:

—Kiãtokopa itxana kãkiti ĩkorasaaki auakani? ³² Amarini sarauatini atoko itxana ĩkorasaaki auakani. Ninoa amarini topãkanãta tiitxi amotikoãtaã. Ipixini amarini tsoanãta. Itxana apanakinimoni: “Ate xikarauata hĩte serenini ĩkapani, txamari !hĩserena. Kãkiti ipĩkasaaki xikariti axikareta, txamari !hĩtxiapata.” Ninoa amarini sarauatini atoko itxana ĩkorasaaki auakani, ³³ kotxi Xoão kapatxisareri apoka ĩkorapokoriti. Itakanapari inikini Teoso imisãkiretini ĩkapani. !Iãtari ovaã. Iuaritika hĩte txari: “Maerekati matamatakoti auãĩtotari Xoão,” hĩtxari. ³⁴ Nota hĩtari iaxitikiri apoka ĩkorapokoriti. !Nitakanapari ninikini. Ikiniõtika ninipokota. Niãtari ovaã. Ininiã hĩte txari: “Iua kiki ixori. Poãtakari iua. Iua moianatana txineiro apakapakani, kãkiti maerekati kamakani,” himisãkirepiretano. ³⁵ Paimatireri Teoso. Iua nakitiakori imarotari isãkire atão ininiua —itxa Xesosi.

Sito Arokari Xesosi Kiti Oãtsaã

³⁶ Āti õti pariseo Simão inakori aiataru Xesosi inipokotini iuakata, ininiã Xesosi sari iua aapoko. Iuaã apoka atoko iitopãka inipokotini ĩkapani. ³⁷ Simão auini sitatxiti oãua sito kanokarero. Oa kenakopiretari Xesosi iua pariseo aapoko inipokotini, ininiã oa anikaro kamariãro iuamoni. Kopitipaki kai arapãstiro kamakori ãki oãua kamariãro. Xãpoka. ³⁸ Otima Xesosi kiti takote. Otxiapanãta. Oãtsaã oãrokari ikiti. Okaxipokari oiãkoã. Ikiti oãpĩtxoka. Eereka okitakari kamariãro ikiti nopini.

³⁹ Iua Simão atamatakasaakiro Xesosi kiti oãrokini, ãkixinireẽ ixinikari:

—Xesosi atão Teoso sãkire sãpiretakari inaãkamako, imarotamaroko oa sito iua maãtakakaro. Imarotamaroko maerekati kamakaro oa —itxa ãkixinireẽ.

⁴⁰ Ininiã Xesosi:

—Simão, ninirekari nimisãkiretinii —itxa.

—Ei, koerekareri, pisãkirauata —itxa Simão.

⁴¹ Ininiã Xesosi:

—Ipi kiki apakapari txineiro sikakari txineirote. Imikanapiriãpanikaroko txineiro isikakito. Āti apakapari isikakito txineiro kaiãopokoro, kiẽtosi txineirota. Ātipekana apakapari isikakito poiãonoka, sikoõta txineirota. ⁴² Ninoa ipi !liposotaikarina iuaĩkana txineiro isikinirina txineiro sikakarimoni, kotxi !oãuaika. Iuaritika iua xipokari ninoa kõtane. !Inirekaikaro itxineirote. Ininiãkara ĩkiripa ninoa kiki ipi apia apokaerekatari iua txineiro sikakari? —Xesosi pimaãri Simão.

⁴³ Ininiã Simão:

—Niuãkatari kiẽtosi txineirota apakapakari. Iua apia apokaerekatari txineiro sikakari, kotxi iua apakaparo kaiãopokoro txineiro —itxa.

—Iuapitikara —itxa Xesosi.

⁴⁴ Iuasaaki Xesosi saporitika sitomoni. Itxari Simãomoni:

—Patamatataro oia sito? Niĩroã pite aapoko, txamari kona pite sikano ãparaã nikiti narokini ĩkapani. Oia arokapekari nikiti oãtsaã. Oiãkoã okaxipokari. ⁴⁵ Uai napokasaaki kona pite apĩtxokano. Oia !iotoka nikiti oãpĩtxokini. ⁴⁶ Pite na takari iĩtxi nikiiã. Oia kitakari kamariãro nikitiã. ⁴⁷ Oia iteene taretano, ininiã aimarotari omaerekani kaiãopokori makatxakaãkapeka. Kãkiti poiãonoka taretakasaakino, aimarotari imaerekani poião inakari makatxakaãkapeka —itxa Xesosi.

⁴⁸ Iuasaaki Xesosi sãpiretaro:

—Nimakatxakapekari pimaerekani —itxaro oa sito.

⁴⁹ Xesosikata nipokonãtakani ãkixinireẽna ixinikanãtarina:

—Kiripitipa ia kiki atxiĩti? Iua makatxakatari kãkiti maerekani? —itxanãtana ninoa.

⁵⁰ Iuasaaki Xesosi txaro oa sito:

—Atão pauikari nisãkire, ininiãkara pimaerekani makatxakaãkapeka. Pisipiniikaua erekaxinirepeka pinini —itxaro oa.

¹ Mapaõti napaãka atoko Xesosi sari ãti sitatxitimoni, ininiã eereka ãti sitatxitimoni isa, itxaãpota. Isãpiretari erekari pirena Teoso auĩtetxi ininiãua. Imoianariakori tosi pakini sari iuakata. ² Sitoakoro apaka sari iuakata. Mitxipe Xesosi erekapeka txĩkitakana ninoa sito. Mitxipe ãtikaka amianata. Mitxipe maerekati matamatakoti auãitotana ãtikaka. Maria Matarena inakoro sari iuakata. Mitxipe Xesosi omitikana maerekani matamatakoni setxi pakini oĩtoã auakani. ³ Xoana inakoro, Kosa inakori tanoro, oa apaka sari Xesosikata. Kosa parĩkauata auĩtetxi Erotxi inakorikata. Erotxi paniãtakiti ikama. Sosana inakoro apaka sari Xesosikata. Apanakini sitoakoro apaka sari iuakata. Ninoa sikari itxineirotena Xesosimoni, imoianariakori pakinimoni nipokori iamotinina ãkapani.

Katakareri Pirena
(Mateo 13.1-9; Marko 4.1-9)

⁴ Kãkitipokoni apokaãpota Xesosimoni, ãti sitatxitikini, iuaĩkana ãti sitatxitikini, iuaĩkana ãti sitatxitikini txaãpota apokinina Xesosimoni. Kãkitipokoni apotiitakasaak-
iua Xesosikata, Xesosi sãpiretana ninoa sãpirenatxi atão inakari oerekiko.

⁵ —Kiki sari ikikiote itakarauatini ãkapani. Triko oki itaka. Okaãpotari. Okaãpotakasaakiro, kimaporiã apaka oãpoka oki okakiti. Eereka oki katxarataãka. Apanakini kotipiriki nika. ⁶ Oki apoka kai nopini. Kai auiniãtaã kipatxi poiãonoka auari. Eereka ipitxaka, txamari pitxakakaro kotsa imiti masikaniã, ãparaã mauakaniã, opina. ⁷ Triko oki apoka inako sauaki apaka. Eereka inako aneẽ takarikata, txamari inako matxorotakaro takari, ininiã opina. ⁸ Oki apoka kipatxi erekari nopini apaka. Eereka takari pitxaka, aneẽ otxa. Eereka ominaua kaiãopokori. Triko katiã seĩ oki aua.

Xesosi sãkirauata iuaĩkana:

—Kakenakokii, ininiã hĩkenakotariko nisãkire —itxa Xesosi.

Kãkiti Mimarotakiniti Xesosi Sãpiretini Pirena
(Mateo 13.10-23; Marko 4.10-20)

⁹ Xesosi moianariakori pimaãri iua:

—Poerekaua ikara sãpirenatxi atão inakari oerekiko pisãpiretakiti. !Aimarotari mixikanani pisãpiretakiti.

¹⁰ Ininiã Xesosi:

—Nisãpiretapitikaiko hĩte Teoso auĩtetxi ininiãua, ininiã hĩte imarotari. Apanakini !imarotari hĩte imarotakiti Teoso auĩtetxi ininiãua. Ninoa apanakinimoni nisãpiretari sãpirenatxi atão inakari oerekiko. Ninoa kenakotari, txamari !imarotarina nisãpiretakiti sãkiretxiti, kotxi kitxakapirĩka Teoso sãkire sãpiretakani sãpiretari:

Kokiri kãkiti, txamari !atamatari Teoso kamakiti. Karokokenakokiri kãkiti, txamari !
ikenakotari Teoso sãkire.

¹¹ —Noerekai hĩte ikara sãpirenatxi atão inakari oerekiko, kiki takarauatini pirena. Triko oki atoko itxa Teoso sãkire.

¹² Apanakini kãkiti kimapori atoko itxa. Ninoa kenakotari Teoso sãkire, kimapori nopini oki apokini atoko itxa. Txamari Satanasi apoka kotipiriki apokini atoko. Imaktxakari Teoso sãkire ãkixinireẽna apokakari, ininiã ninoa !auikaikari Teoso sãkire, ininiã Teoso !imaktxakari ninoa maerekani.

¹³ —Apanakini kãkiti kai auiniãtaã atoko itxa. Ninoa kenakotari Teoso sãkire, ininiã ipotxitarina. Txamari oki kipatxi poião nopini apokini atoko, Teoso sãkire !ĩroã ninoa ãkixinireẽ. Mapa kasiriti ninoa auikari Teoso sãkire atxiĩti. Eereka imisiritaãkana Teoso sãkire auikinina xika, ininiã itakanaparina Teoso sãkire.

¹⁴ —Apanakini kãkiti inako auiniãtaã atoko itxa. Ninoa kenakotari Teoso sãkire. Eereka ninoa maerekaxinirenoka itxana. Inirekarina txineiro, tiitxi pakini. Inirekarina isarauatinina. Inako atoko itxa txineiro, tiitxi, isarauatinina, maerekaxinirenoka ininina pakini. Ininiã !ixinikaikarina Teoso. Oki inako sauaki pitxakakaro !ominaua. Iua atokokana, ninoa kãkiti likamari erekari Teoso ãkapani.

¹⁵ —Apanakini kākiti kipatxi erekari atoko itxa. Ninoa kenakotari Teoso sākire. Teoso sākire ĩroã ninoa ākixinireē ikaikotini ĩkapani. Erekari ninoa ākixinire. Ninoa nirekari Teoso paniātakiti ikaminina ikiniōtika. Eereka ninoa kamapitikari erekari Teoso ĩkapani.

Tirikapi Pirena

(Marko 4.21-25)

¹⁶ —Tirikapi iopotokaākari iomaātataritari tirikapi kopiti āki atxiīti? Isīkatatxi patapi itakataritari atxiīti? Konapitini. Itano itakari tirikapi, ininiā iopinikari aapokotxi āki ĩroākani atamarauatini ĩkapani. ¹⁷ Ikinika iomaātakori atamataākako. Ikinika ipatakori apokaākako, iopinikaremoni anikaākako.

¹⁸ —Erepaniko. Iteene pikenakotariko Teoso sākire, kotxi isākire auakiti, Teoso sākire kĭpitakari, Teoso sikari apikomoni imaroretxi iuamoni. Txamari Teoso sākire kenakotakari, isākire makĭpitakati, imarore xapiti iuamoni auakari makatxakaākako — itxa Xesosi.

Xesosi Inoro, Itariakori Pakini

(Mateo 12.46; Marko 3.31-35)

¹⁹ Xesosi sāpirenauanātakasaaki, inoro, itariakori pakini apoka iuaātaā. Inirekamarina Xesosimoni apokinina, txamari kākitypokoni ākitari iua. ²⁰ Iuasaaki kākiti txari Xesosi:

—Pinoro, pitariakori porikiti auanāta. Inirekarina imisākiretinii —itxana.

²¹ Ininiā Xesosi sāpiretari ikinimane:

—Teoso sākire kenakotakani, isākire kĭpitakani, ninoro atoko itxauana. Nitariakori atoko itxauana —itxa Xesosi.

Xesosi Iotokakiniri Ītima

(Mateo 8.23-27; Marko 4.35-41)

²² Āti ōti Xesosi iereētaua kanaua āki imoianariakorikata. Aiatana:

—Masa ipoa ipiniā —itxana imoianariakori.

Ininiā ĩpiriātana. ²³ ĩpiriātakasaakina, Xesosi imaka. Mokatanitika ĩtima inataparata. Kataparari ĩtima apokasaaki, tsakati kataparari apaka, ininiā ierepeēpokataua. Iuasaaki kanaua āki āparaā xāpokaāpokata. Pamonōkoniri. ²⁴ Xesosi moianariakori ōpirĭkari.

—Apiananiri, Apiananiri, pimereka. Apinanapanoka.

Ininiā Xesosi ōkitikaua. Ipaniātari ĩtima, tsakati pakini iotokini:

—Hĭotokako —itxa.

Iuasaakipeka ĩtima, tsakati pakini iotoka. Itsorĭkaāta. ²⁵ Iuasaaki Xesosi txari imoianariakori:

—Kinirepa hĭte lauikano nota?

Itsorĭkaākatana, ipĭkarauakatana. Ninoakakarika isākirauatana:

—Kinakaripa ia kiki? Iua paniātari ĩtima, tsakati pakini iotokini, ininiā ninoa kĭpitari isākire —itxakana.

Kiki Maerekani Matamatakoni Auaĭtotakiti

(Mateo 8.28-34; Marko 5.1-20)

²⁶ Eereka ipoa ipiniā apokana Xesosi imoianariakorikata. Ninoa potorikiniātaā Karirĕia tōpa. Ninoa apokiniātaā Xerasa tōpa. ²⁷ Xesosi kanĭkĭitakasaaki, kiki apoka iuamoni. Xerasa sitatxitikiri iua. Maerekani matamatakoni auaĭtotari iua. Okananipe ! itakaikari imāka. !Inirekari aapoko āki ikaikotini. Akauariā auanāta. ²⁸ Atamatakasaakiri Xesosi, akiripoakata. Iriākata Xesosi apisatoō. Maerekati matamatakoti akiritari Xesosi:

—Xesosi, Teoso ākiri, Apiananiri ākiri, kiatokopa pitxanoko? Namanaāi !pimisiri-tapeno —itxa.

²⁹ Ikara atoko itxa isākire, kotxi Xesosi paniātana maerekani matamatakoni takanap-iniri iua kiki. Mitxi inirimane ĩtxikapiimari ĩto imasikani ĩkapani. ĩtxikarina iuako, ikiti kohĕtxiā. Txamari maerekati matamatakoti itotapekari imaĭkiniri, ininiā iua kiki kapatakari kohĕtxi. Maerekati matamatakoti txĭkitakari iua kiki mitekini kākiti mauakaniātaā.

³⁰ Xesosi aōkitakasaakiri iua kiki, ipimaāri:

—Kipa piuāka?

Ininiā maerekati matamatakoti txari:

—Nota uāka “Itori,” ninaāka —itxa.

Ikara atoko iuāka, kotxi itori maerekani matamatakoni auaītotari iua kiki. ³¹ Maerekati matamatakoti amanaāri Xesosi:

—Aariko mamapotōkire irikotimoni lpiokanatapeua ate —itxa.

³² Iuaātaā auari kaiāopokori irariakori piratakoni. Inipokonātana oxiratarari nopini. Maerekati matamatakoni amanaāri Xesosi:

—Pauiritaua irariakori āki aīroini —itxana.

Ininiā Xesosi auiritana. ³³ Ininiā ninoa takanapari iua kiki. Irariakori īto āki īroāna. Iuasaakipeka ikinika irari miteēkata. Iokiriīkatana oxiratarari. Kāuaāriāmoni ikomoākatana, ipīpe itxana irariakori.

³⁴ Kikiakori irari piratakani itikari irari mitekini, ininiā imitekana sitatximoni. Anikapiretarina itikakitina sitatxi auakanimoni, sitatxi mapara auakanimoni apaka.

³⁵ Ininiākara kākiti sari Xesosimoni ikamakiti imarotinina ikapani. Ninoa apoka iuamoni. Atamatarina iua kiki mitxi maerekani matamatakoni auaītotakiti. Iitopākanāta Xesosi apisatoō. Kamākapekari. Kiikitepekari apaka. Ininiā iuasaaki ninoa kākiti pīkari Xesosi posotiire. ³⁶ Xesosi kamakiti itikakani sāpiretari ninoa kākiti, Xesosi erekapeka itxīkitakiniri iua kiki. ³⁷ Eereka ikinimane kākiti Xerasa tōpa auakani paniātari Xesosi ātiātaā isini ipīkarena xika. Ininiā Xesosi iereētaua kanaua āki ipoa iuaīkana ipiriātini ikapani. ³⁸ Iua kiki mitxi maerekani matamatakoni auaītotakiti amanaāri Xesosi:

—Pauiritano pitekata nisini.

Txamari Xesosi iokanatarari aapokomoni.

³⁹ —Pikanapiriā paapokomoni. Pisāpiretari kākiti Teoso kamakiti pitemoni —itxa Xesosi.

Ininiā iua sari ikini aapokotxitimoni. Isāpiretari ikinimane kākiti Xesosi kaminiri iua erekapeka inini.

Xáiro Amanaākiti Pirena

(Mateo 9.18-19; Marko 5.25-34)

⁴⁰ Xesosi kanapiripe, ipoa ipiriātini. Apokitakasaaki, kākitypokoni apakapari Xesosi ipoxokoniritikana. Ninoa iātapanātari iua, ipiniā iua auakasaaki. ⁴¹ Iuasaaki kiki Xáiro inakori apoka iuaā. Iua auītetxi itxaua aiko Xoteo apotiitiniātaāua. Apoka Xesosimoni. Ikapotoreēkaua Xesosi apisatoō.

—Masa naapoko. ⁴² Nota ākero imatonōkaro, tosi ano auakaro, opinanapanoka —itxari Xesosi.

Iuakata Xesosi sikasaaki, kākitypokoni ākitari iua, ininiā ikaiarikaāpotana kākiti.

Xesosi Māka Maātakakaro

(Mateo 9.20-22; Marko 5.25-34)

⁴³ Kākiti sauaki oāua sito amianatakaro. Tosi ano oamianata oārēka !iotokinaro. Otxineirote !auaika, kotxi okinika otxineiroteē oīkitxitapekari pinītxi siākani, txamari erekapeka otxīkitakakiri !auari. ⁴⁴ Kākiti sauaki oāpoka Xesosi porikimoni. Omaātakari imāka mapotomatare. Omaātakasaakipeka, oārēka iotoka. ⁴⁵ Ininiā Xesosi pimaāri kākiti:

—Kipa maātakano?

Ikinimane kākiti:

—!Ateni —itxana.

Ininiā Petro:

—Apiananiri, kākitypokoni ākitai. Ikinimane kākiti tikakai.

⁴⁶ Txamari Xesosi:

—Kākiti maātakapitikano, kotxi iuasaaki nitapara sari iuamoni.

⁴⁷ Iuasaaki oa sito imarotari Xesosi imarotiniro oa maātakiniri. Ininiā osa Xesosimoni otitinanakiniritika. Okapotoreēkaua iua apisatoō. Ikinimane okiātaā osāpiretari Xesosi:

—Notara maātakai namianatiniā. Nimaātakasaakii, iuasaakipeka erekapekano —otxari.

⁴⁸ Ininiā Xesosi:

—Namarite, pauikari niposotiire, ininiãkara erekapekai. Pisipiniikaua erekax-
inirepeka pinini —itxaro.

Xáiro Ākero Ōkitikiko
(*Mateo 9.23-26; Marko 5.35-43*)

⁴⁹ Xesosi sãkirauanãtakasaaki, Xáiro aapoko potoriãkari apoka Xáíromoni.

—Pamarite !oãuaika. Pauiritari Xesosi kanapiriini —itxa.

⁵⁰ Xesosi kenakotari iminapiretakiti, ininiã Xesosi txari:

—!Pipĩkarauatape. Pauikari nisãkire, ininiã iuaĩkana oãuapanikako pamarite —Xesosi
txari Xáiro.

⁵¹ Xesosi apokasaaki Xáiro aapoko, auiritana Petro, Xoão, Txiako, Xáiro, Xáiro ãtanoro
pakini ãroini iuakata.

⁵² Iuaãtaã ikinimane kãkiti txiapanãta. Imatinaniuatana amarini ipinini xika. Ininiã
Xesosi:

—!Hĩtxiapatape. !Opina. Oimakanãta —itxa.

⁵³ Ininiã ninoa napetari Xesosi, kotxi imarotarina amarini ipinini. ⁵⁴ Ininiã Xesosi
paniãtana ninoa porikiti ipokĩkinina. Eereka Xesosi maĩkaro oa ãtokoro uako, akirita
itxaro:

—Ãtokoro, põkitikaua.

⁵⁵ Iuasaakipeka iuaĩkana oa auãkipeka otxa. Oõkitikaua. Xesosi paniãtana oĩri, onoro
pakini nipokori isikinirona. ⁵⁶ Oĩri, onoro pakini tsorĩkaãta. Xesosi sãpiretana apanakini
imasãpiretakanina ãkapani.

9

Xesosi Iokanatana Imoianariakori Kãkitimoni
(*Mateo 10.5-15; Marko 6.6-13*)

¹ Xesosi akiritana imoianariakori tosi apotiitiniuana ãkapani. Iuasaaki isikataparatanana.
Isikaposotiiretana maerekani matamatakoni iokanatinina ãkapani, amianari imakax-
akinina ãkapani. ² Eereka iokanatana imoianariakori kãkitimoni Teoso auĩtetxi ininiãua
isãpiretinina ãkapani, amianatakani erekapeka itxĩkitakinina ãkapani. ³ Xesosi txana
ninoa:

—Hĩsikasaaki, !hanikapiri hĩtii. Na hĩtsonere !hanikape. Na sakora, na nipokori,
na txineiro, na ãti himãka, !hanikape. ⁴ Kãkiti apakapakasaakii, iuaã ninoa aapoko
hĩkaikota iua sitatxiti hãuakasaaki. ⁵ Kãkiti mapakapakaniãi, hĩtakanapari iua sitatxiti.
Hõsipikasaakiri, hĩkaxipokariko kipatxi hĩkitiãkiri. Ikara oerekana iua sitatxiti auakani
Teoso misiritanako ninoa, kotxi ãnirekarina ikenakotinirina Teoso sãkire —itxa Xesosi
imoianariakorimoni.

⁶ Eereka imoianariakori potorika. Ninoa sari ikinipoko aapokotxiti. Isãpiretarina
Teoso iokanapirena erekari aapokotxiã auakanimoni. Erekapeka itxĩkitakana ami-
anatakani ikini aapokotxiti auakani.

Erotxi Nirekari Xesosi Aõkitini
(*Mateo 14.1-12; Marko 6.14-29*)

⁷ Erotxi Kariréia tõpa auakani auĩte kenakopiretari Xesosi pirena. Maerekax-
iniretinoka itxa, kotxi kãkiti sãpiretari:

—Xoão kapatxisareri iuaĩkana auãki itxapekaua. Iuara Xesosi txaua —itxana.

⁸ Apanakini sãpiretari:

—Eríasi iuaĩkana uatxa auãki itxapekaua. Iuara Xesosi txaua —itxana.

Apanakinipekana:

—Teoso sãkire sãpiretakari kitxakapirĩka auakari iuaĩkana uatxa auãki itxapekaua.
Iuara Xesosi txaua —itxana.

⁹ Erotxi txari:

—Notara paniãtari Xoão nopi tsotakiko, ininiã Xesosi kona Xoãoni. Kiripitipa Xesosi?
Ãtipirika nikenakopiretari iposotiire —itxa Erotxi.

Kinirão aõkitaka itxari Xesosi.

Sīko Mio Kākiti Xesosi Sikakienatini
(Mateo 14.13-21; Marko 6.30-44; Xoão 6.1-14)

¹⁰ Ninoa Xesosi iokanatakini kanapiripeka iuamoni. Ikinika ikamakitina isāpiretarina Xesosi. Eereka Xesosi anikana ninoa kākiti mauakaniātaā, Petsáita sitatxiti takote. Ninoanoka sari iuaā. ¹¹ Txamari apanakini kenakopiretari Xesosi sinimoni, ininiā kākitipokoni sari iua tikini. Ninoa apokasaaki Xesosimoni, Xesosi apakapana ipoxokonir-itika. Isāpiretana Teoso auītetxi ininiāua. Erekapeka itxīkitakana amianatakani.

¹² Tinītikita imoianariakori tosi pakini apoka iuamoni:

—Piokanataka kākiti aapokotxi imatokotininimoni inipokotinina īkapani, imakinina īkapani, kotxi uai aapokotxi mauakaniātaā —itxarina Xesosi.

¹³ Txamari Xesosi txana:

—Hītekarako sikakienataka ninoa.

Ininiā ninoa:

—Poiāonoka nipokori aua atemoni, sīkonoka komiri, ipinoka ximaki pakininokara aua. !Apakata aiamotiniri nipokori kaiāopokori kākiti asikakienatini īkapani —itxarina Xesosi.

¹⁴ Iuaātaā kikiakorinoka sīko mio auakata. Xesosi paniātana imoianariakori:

—Hīpaniātari kākiti topākini, uai sīkoēta, apikomoni iuaīkana sīkoēta, apikomoni iuaīkana sīkoēta, txaāpokata kākiti —itxa. ¹⁵ Ininiā imoianariakori paniātari kākiti ikara atoko iitopākinina. Ininiā ninoa topāka. ¹⁶ Iuasaaki Xesosi kosekari komiri sīko, ximaki ipi pakini. Iaxiti ionakaāta, misākireta itxari Teoso:

—Peerekari ia nipokori pisikakiti —itxa.

Iuasaaki ixanakari komiri, ximaki pakini, sika itxari imoianariakorimoni, ininiā ninoa sikari kākitimoni. ¹⁷ Ikinimane nikari, kamitopeka itxana. Eereka Xesosi moianariakori amari nipokori itetakori. Ixāpokakarina kotari tosi pakini.

Petro Auikari Xesosi Teoso Mereēkiti Ininiāua
(Mateo 16.13-20; Marko 8.27-30)

¹⁸ Āti ōti Xesosi iuanani misākiretari Teoso. Eereka imoianariakori apoka iuamoni. Ipimaāna:

—Kiripa kākiti uākatano nota? —itxa.

¹⁹ Ininiā ninoa:

—Apanakini xinikakiti pite Xoão kapatxisarereri pitxaua. Apanakinipekana xinikakiti pite Eríasi pitxaua. Apanakinipekana xinikakiti pite Teoso sākire sāpiretakari kitxakapirīka auakari iuaīkana auāki inakari pitxaua —itxarina Xesosi.

²⁰ Ininiā Xesosi:

—Hītepekana, kipa hīte uākatano nota? —itxa.

Petro apakapapiretari:

—Pite Teoso mereēkiti kākiti iātapanātakiti pitxaua —itxa.

²¹ Ininiā Xesosi iteene pinitari ikara apanakinimoni imasāpiretakani.

Xesosi Sāpiretari Ipinini
(Mateo 16.21-28; Marko 8.31-9.1)

²² Ininiā Xesosi:

—Nota hītari iaxitikiri iteene natatsiitariko nimisiritiko. Kiomātxiakori, sasetotxi auīteakori, kaiōkatsoparerini pakini !inirekano nota, ininiā nokaākako. Ipi āti ōtisaaki Teoso ōkitikanoko nota iuaīkana auāki ninini īkapani —itxari imoianariakori.

Xesosi Moianari Atāo Inakari
(Mateo 16.24-28; Marko 8.34-38)

²³ Eereka isāpiretari ikinimane:

—Notakata kinirāo sika pinakasaaki, piteka pinireēkiti kona pixinikape. Notakata kinirāo sika pinakasaaki, nota misiritiko atokokana pimisiritiākako. Ia atoko pinirekiniā ikiniōtika, notakata pisapitikako. ²⁴ Pite ātipirika kaminiāri piteka nireēkitinoka, ininiā pinireēkiti xipokapitikako pitekata. Pite nireēkiti xipokiniā, nota sākire pauikini xika, Teoso iokanapirena erekari pisāpiretini xika, pite auapininiika txako Teosokata. ²⁵ Atxiīti papakapari ikinipoko tiitxi, ikini itixiti auakani tii, pinakiti īkapani. Atxiīti iua tiitxi

xika kona pikīpitari Teoso sākire, ininiā kona pikaikota ātipirika Teosokata. Ikara atoko ininiā, erekari atxiīti ikinipoko tiitxi auini? Konapitini. Apiaerekata Teosokata ātipirika pikaikotini. ²⁶ Pipētatiniāno nota, pipētatiniāri nisākire, nota kākiti itari iaxitikiri pētataiko pite uai nikanapiriākasaaki. Peerekari iusaaki uai nikanapiriini ōti. Iusaaki kākiti imarotariko niposotiire, niri posotiire, initiriakori iaxitikini posotiire apaka. Teoso nitiriakori erekarini itxauana. ²⁷ Atāo nisāpiretai, apanakini hīte uatxa uai auakanii, hīpinini apisapanika himarotari Teoso auītetxi ininiāua —itxa Xesosi.

Moisesi, Eríasi Pakini Xesosi Aōkitini
(Mateo 17.1-3; Marko 9.2-13)

²⁸ Āti semanati napaka atoko, Xesosi anikana Petro, Xoāo, Txiako pakini. Ikanīkana oxirataro nopini Teoso imisākiretini īkapani. ²⁹ Teosokata isākirauanātakasaaki, itoō ipinipo itxa, imāka ponika, kasarori. ³⁰ Iusaaki ipi kiki tokiā iuaā, Moisesi, Eríasi pakini. Isākirauatana Xesosikata. ³¹ Ninoa iotximere aua, kotxi ipotorikana Teoso tixine. Isākirauatana Xesosikata, Xesosi ipinini pirena, mapa semanati napaka atoko Xerosareē ipinini Teoso paniātakiti ikamini īkapani. ³² Iusaaki Petro, Xoāo, Txiako pakini imakanāta. Eereka imerekana. Atamatarina Xesosi iotximere. Atamatarina ninoa ipi kiki iuakata itiminina. ³³ Moisesi, Eríasi, takapiretakasaakiri Xesosi, Petro akiritari Xesosi:

—Koerekareri, erekari uai akaikotini. Makamari papiri ipi āti pakini, pite īkapani, Moisesi īkapani, Eríasi īkapani —itxa.

Txamari maxikatiika isākirauata. Imarotari amanaākiti.

³⁴ Petro sākirauanātakasaaki, katxiāri apoka. Xesosi moianariakori pīkarauata katxiāri āki auakasaakina. Katxiāri ākitana. ³⁵ Katxiāri āki ikenakotaāka sākiretxi:

—Ere namarite, nitiretakiti. Hīkenakotariko iua sākire —itxa.

³⁶ Isākirauataka atoko Xesosi moianariakori atamataro Xesosinani. Eereka !isāpiretarina itikakitina apanakinimoni. Masākirenika itxana.

Amarini Maerekati Matamatakoti Auaītotakiti
(Mateo 17.14-20; Marko 9.14-29)

³⁷ Katimatiniākata iokiriūtana. Iusaaki kākitypokoni apoka Xesosimoni. ³⁸ Ninoa sauaki kiki akiritari Xesosi:

—Koerekareri, patamataro nota ākiri imatonōkari namarite. ³⁹ Ātipirika maerekati matamatakoti maīkari iua. Iusaaki akiripoakata, okarakataua. Isorikipekata inamanoni. Maerekati matamatakoti kamatsiitari namarite. Poiāonoka itakanapari. ⁴⁰ Iteene namanaāpekari pimoianariakori omitikiniri, txamari liposotarina —itxa Xesosimoni.

⁴¹ Ininiā Xesosi txari kākitymoni:

—!Kauikarei hīte. Maerekati kamakanii hīte. Kipakinikananipa Teoso nirekatari hītekata nauini? Kipakinikananipa Teoso nirekatari hīte nimīteenekini? —itxa.

Eereka ipaniātari iua kiki:

—Pamarite pimina uai.

⁴² Iua amarini apokaāpotakasaaki, maerekati matamatakoti irikari ixiti. Amarini okarakataua. Xesosi paniātari maerekati takanapiniri amarini. Erekapeka itxīkitakari amarini, ininiā isika iua iuaīkana irimoni. ⁴³ Ikinimane tsorīkaāta Teoso posotiire itikasaakina.

Xesosi Iuaīkana Sāpiretari Ipinini
(Mateo 17.22-23; Marko 9.30-32)

Ikinimane tsorīkaātakasaaki, Xesosi misākiretari imoianariakori.

⁴⁴ —!Himaxiniāketapiri uatxa nisāpiretakiti. Nota hītari iaxitikiri mīkapiritaākako. Nisikaākako kākitymoni ninoaka nirekakiti ikaminina īkapani —Xesosi txana ninoa.

⁴⁵ Imoianariakori kenakotari Xesosi sākire, txamari !imarotarina isāpiretakiti. Teoso !nirekari ninoa imarotiniri Xesosi sāpiretakiti iusaaki. Ninoa pīkari Xesosi ipimainina isākire oerekinina īkapani.

Kiripa Kākiti Apiatakari Txataua?
(Mateo 18.1-5; Marko 9.33-37)

⁴⁶ Āti ōti Xesosi moianariakori !auikakauana isākirena, kotxi inirekarina imarotirinina apiatakari ninoa sauaki auakari. ⁴⁷ Xesosi imarotari ninoa xinikakiti, ininiā iminari amarini ninoamoni. Xesosikata tima itxa amarini. ⁴⁸ Iusaaki Xesosi txana:

—Papakapiniāri amarini ia atoko inakari, papakapano nota apaka. Papakapiniāno nota, papakapari niokanatakiri apaka. Iuaka poiāotakakariua hīte sauaki, iuarako apiatakari txauako —itxa Xesosi.

Kiki Maerekani Matamatakoni Omitiākari
(Marko 9.38-41)

⁴⁹ Xoāo sāpiretari Xesosi:

—Koerekareri, ate kenakotari kiki omitikinina maerekani matamatakoni pite uākaā. Ate sāpiretari iua kiki ikara atoko inakari imakamakani, kotxi kona pimoianarini iua —itxa.

⁵⁰ Ininiā Xesosi:

—!Hīotokakapiri ikara atoko inakari ikamini, kotxi iua kiki !omanataua ate. Iua apamonīkaua ate —itxa.

Samaria Auakani !Apakapari Xesosi

⁵¹ Teoso tixine iuaīkana Xesosi kanapiriini ōti apokaāpota, ininiā Xesosi ākixinireē txari:

—Nisapitikako Xerosareēmoni.

⁵² Iokanatarari kākiti iua apisa, imakiniātaā initinina īkapani. Ipixinipokoriti ninoa kākiti nitari imakiniātaā aapokotxi Samaria auakani auiniātaā. ⁵³ Txamari kākiti iuaātaā ! inirekarina Xesosi apakapinina, kotxi iua nirekari Xerosareēmoni isini. Samaria auakani omanatana Xerosareē auakani. ⁵⁴ Txiako, Xoāo pakini kenakopiretari ikara ene. Iusaaki ipimaārina Xesosi:

—Apiananiri, pinirekatari aamanainiri Teoso xamina iaxitikiri iokanatinini ninoamoni ixiipokinirina īkapani?

⁵⁵ Txamari Xesosi pinitana, isākirena maerekani xika.

⁵⁶ —Nota, hītari iaxitikiri kona kākiti nixipokini īkapanini napoka uai. Kākiti maerekani nimakatkakini īkapanira uaimoni nina —Xesosi txari Txiako, Xoāo pakini.

Eereka ninoa sari apikoxiti apanakini kākiti auiniātaāmoni.

Kākiti Xesosi Imoianatinina Nireēkani
(Mateo 8.18-22)

⁵⁷ Xesosi imoianariakorikata saāpotakasaaki kimaporiā, kiki txari Xesosi:

—Apiananiri, pite sinimoni nota apaka sako.

⁵⁸ Ininiā Xesosi:

—Karikori aripa auini. Kakoari kotipiriki auini, txamari nota hītari iaxitikiri ni-makiniātaā !auari. Pimoianatinianō, ikara atoko pimisiritiko pinireka atxiīti? —itxa Xesosi.

⁵⁹ Xesosi txari āti kiki:

—Notakata pisako.

Txamari iua kiki:

—Koerekareri, merepanika ninirekari niātapiniri niri ipinini —itxa.

⁶⁰ Ininiā Xesosi:

—Ikara piparīka pauiritari āti kamini. Piparīka apiari uatxa aua. Pite sari kākitemoni. Pisāpiretanako Teoso auītetxi ininiāua —itxa Xesosi iuamoni.

⁶¹ Āti kikipekana txari Xesosi:

—Koerekareri, nota pimoianari nitxamauako. Mitxi pauiritano nikanapiriini nauini-moni. Nitakapiretanapana ninirimane —itxari.

⁶² Ininiā Xesosi:

—Teoso kimaporeē potoriākari nirekiniāri mitxi ikamakiti iuaīkana ikamini, !apakata iparīkauatini aāuīte Teoso īkapani —itxa Xesosi.

10

Xesosi Iokanatanana Setēta Pakini Kākiti

¹ Ikara inaāka atoko Apiananiri mereēna setēta pakini kākiti. Iokanatanana ipi, iuaīkana ipi, iuaīkana ipi, itxaāpotana iokanatinina. Iokanatanana iua sini apisapanika ikini aapokotxitimoni. Ninoa īkiika. Apokana Xesosi apisa. ² Xesosi txana ninoa:

—Kaiāori kākiti iposope auikiniri nisākire, txamari !imarotarina nisākire, kotxi ! ikenakotapanirina. Ninoa kikio erekari atoko itxana. Imakinika iposope iuaā. Txamari, poiāoka parīkauatakani aua nisākire isāpiretinina īkapani. Ininiākara himisākiretariko Apiananiri kakikioteri iokanatinina parīkauatakani iua sākire auīākani apotiitinina īkapani. ³ Hīsa. Soti auīte anaakori ākitimoni iokanatika atoko, niokanatai hīte kākitimoni, kotxi pamonōkonina ninoa. ⁴ Txineiro !hanikape. Tiitxi !hanikape. Āti hīkiti mata !hanikape. Kimaporiāpoā kākiti akiritakasaakii, !hīotokaāpotape kākitikata hīsākirauatini īkapani. Hīsapitiporiko niokanatinimoni. ⁵ Kākiti aapoko hāpokasaaki, merepitipatika hītxariko: “Namanaāri Teoso, ikamaerekaxiniretinina kākiti uai auakani,” hītxako. ⁶ Kaapokori nirekiniāri Teoso ikara atoko inakari ikaminana ninoa, Teoso kamapitikari hamanaākiti. Kaapokori manirekakaniāri, hīsāpiretana Teoso kona kamaerekaxiniretana ninoa. ⁷ Kaapokori apakapiniāi hīte, hīkaikotako iua aapokonoka. Āti aapoko, eereka āti aapoko kona hītxaāpotapeko iua sitatxiti hāuakasaaki. Iuaā ninoa sikakiti hinikini īkapani, hiātini īkapani hāpakapariko. !Hīpētauatape hāpakapiniri, kotxi hīte nota īkapani parīkauatakani hītxaua. Apakatatipitika hāpakapiniri hīparīka īki.

⁸ —Aapokotxiātaā hāpokasaaki hāpakapikoā, iuaā hīsikiko hinikako, hiāta hītxaāpotako. !Hīxinikapiri ninoa sikakiti mapitxiri ininiua. Hinikariko. ⁹ Erekapeka hītxīkitakanako amianatakani iuaā auakani. Hīsāpiretana ninoa, kaimapekari Teoso ninoa auīte ininiua tīkane. ¹⁰ Aapokotxiātaā himapakapakoniā, hīsa kākiti napaāporetxiā. Hīsāpiretana kākiti iuaā auakani: ¹¹ “Hāuiniākiri pani akitiākiri akaxipoka, kotxi ! erekari uai, kotxi maerekati hīkama ate himapakapakaniā. Hīxinikariko, ate apoka uai Teoso auītetxi ininiāua asāpiretinii īkapani, txamari !hinirekari.” Ikara atoko hītxa sākiretako ninoamoni. ¹² Kākiti misiritiko ōtisaaki Teoso misiritanako kākiti Sotoma sitatxiti auakani ninoa maerekani xika, txamari Teoso apia misiritanako iua aapokotxiti auakani hīte mapakapakani, kotxi hīte sāpiretana Teoso sākire, iuaritika !auikarina. Kitxakapirīka Teoso sākire sāpiretakani līsana Sotoma sitatxitimoni —itxa Xesosi.

Kākiti Sitatxi Auakani Maerekati Matakanapakani

(Mateo 11.20-24)

¹³ —Hīte Korasiī sitatxiti auakani inipitika atatsiitariko misirikaretxi. Hītepekana Petsáita sitatxiti auakani apaka atatsiitariko misirikaretxi, kotxi nota kamapekari posotiiretxi hīte sauaki, txamari !hītakanapari himaerekani. Ikara posotiiretxi Sitoō sitatxiti, Txiro sitatxiti pakini auaākamako, kākiti iuaā auakani uatxakapokoikamani itakanapamarinako maerekati ikamakitina. Ninoa sako mata ieretakamanako, atapani iītoāna itakamanako, imaerekanina itakanapinina oerekinina. ¹⁴ Kākiti misiritiko ōti apokasaaki, Teoso misiritariko Txiro sitatxiti auakani, Sitoō sitatxiti auakani pakini, txamari iua apia misiritariko hīte Petsáita sitatxiti auakani, hīte Korasiī sitatxiti auakani apaka. ¹⁵ Hītepekana Kapanaoō sitatxiti auakani apiarini hinireka hininiāua, txamari maerekani misiritikoātaā iuamonirako hōkapeēkako —itxa Xesosi.

¹⁶ Xesosi misākiretana imoianariakori:

—Hīte sākire kenakotakani kenakotari nota sākire apaka. Hīte mapakapakani ! apakapano nota apaka. Nota mapakapakani lapakapari nota uaimoni iokanatakari apaka —itxana imoianariakori.

Setēta Pakini Kākiti Kanapiriini

¹⁷ Ninoa setēta pakini kākiti kanapiriā. Poxokonoka itxakatana.

—Apiananiri, maerekani matamatakoni apaka kīpitari asākire, pite uākaā aiokanatakasaakina —itxarina Xesosi.

¹⁸ Ininiā Xesosi:

—Ari, nitikapekari Teoso patimari iokanatiniri Satanasi, okaratxirari patimari imêkokini atoko itxa. ¹⁹ Hîkenakota. Nota sikaposotiiretai hîte imini, kaxipiro pakini hîkatxaratini. Kona ioâkai hîte. Amokaiakari Satanasi pataparari, iuaritika hîposota hîokanatiniri iua, kotxi nota sikataparatai hîte. !Auari hîte karotakani. ²⁰ Hîpoxokoniuaata, kotxi maerekani matamatakoni kamari hîpaniâtakiti. Apia hîpoxokoniuaata, kotxi hîuâka Teoso tixine aâtsopateê iôkatsopatapeêkaika iuaâ hîsini îkapani —Xesosi txana ninoa.

Xesosi Iri

(Mateo 11.25-27; 13.16-17)

²¹ Iuasaaki Erekarî Matamatakoti kamapoxokonitari Xesosi, ininiâ Xesosi misâkiretari Teoso:

—Niri, pitixine auakani auîte pitxaua. Uai ikini itixiti auakani auîte apaka pitxaua. Peerekai pite, kotxi kimarorerini, iuikakaniua kona poereka pimarore. Poiâorini, miuikakaniua poereka pimarore. Ari niri, ikara atoko pinireka. Ikara atoko papokaerekata —itxari iri.

²² Eereka imisâkiretari kâkiti:

—Niri sikapekano ikinika. Kâkiti !imarotano nota Teoso âkiri nininiua. Nirinokara atâo imarotano nota. Apaka kâkiti na atâo imarotari niri. Notanokara imarotari niri, kotxi iua âkiri nitxaua. Kâkiti nirekiniâri imarotiniri niri, nota oerekari niri iuamoni —itxa Xesosi.

²³ Eereka Xesosi aua imoianariakorikata. Ninoanani aua iuakata. Imisâkiretana:

—Teoso sikari erekari hîtemoni, kotxi hîte atamatari nota kamakiti, hîte kenakotari nota sâpiretakiti. ²⁴ Nota sâpiretai hîte. Kitxakapirîka Teoso sâkire sâpiretakani, auîtetxiakori pakini kinirâo atamataka txari hîte atamatakiti, txamari ninoa !atamatari. Ninoa nirekari hîte kenakotakiti ikenakotinina, txamari !ikenakotarina —Xesosi txari imoianariakori.

Kiki Karotakori Tiretakari

²⁵ Kiki Moisesi sâkire oerekakari apoka Xesosimoni. Inirekamari Xesosi kerokiniri isâkire.

—Koerekareri, kiripa nikama Teosokata âtipirika nauini îkapani? —itxa.

²⁶ Ininiâ Xesosi:

—Kiripa patatsopata Teoso aâtsopateê? Pisâpiretano Teoso paniâtakiti —itxari.

²⁷ Ininiâ iua kiki apakapapireta:

—Teoso paniâtaua: “Pitiretariko Apiananiri piTeosone, ikinipoko pinireêkitiâ, ikini pâkixinireê, ikini pitaparaxinireê, ikinipoko pixinikakitiâ pakini.” Apaka Teoso paniâtaua: “Piteka pitiretiniâua atokotxikana, pitiretariko âti,” itxa.

²⁸ —Atâopitikara papakapapiretano. Ikara pikaminiâ, pauapika âtipirika Teosokata —itxa Xesosi.

²⁹ Txamari iua kiki linirekari ikara atoko inakari ikamini, ininiâ iua pimaâri Xesosi:

—Kiripa âti nitiretini îkapani?

³⁰ Xesosi apakapapiretari, ia sâpirenatxi atâo inakari oerekiko isâpiretini:

—Kiki potorika Xerosareê. Inirekari Xerikoo sitatxitimoni isini. Ipixinipokoriti kîitiririni maîkari iua. Iîtirîkarina imâka, itii pakini, noropata, karota, itxarina. Mauâkixiniretinoka itakanaparina iua kiki. ³¹ Iuasaaki sasetotxi îâpota iua kimaporiti. Iua atamatari iua kiki karotakori, txamari !imaâkatari. Iopiriâri, napa, îkorape itxa. ³² Eereka kiki Arevii apika mekaniri, sasetotxiakori moianatakari apoka. Iua apaka atamatari iua kiki karotakori, txamari iua sasetotxi atokokana !imaâkatari. Iopiriâri, napa, îkorape itxa. ³³ Eereka kiki Samaria tîpakiri îâpota iua kimaporiti. Iua apoka iuaâ. Atamatari iua kiki maîkapekari, ininiâ iua amonîkari. ³⁴ Iuamoni isa. Arokari ikaro ipiniâ. Ipitari ikaro iîtxiâ. Mâkatxi mataâ iapirika itxari ikaro. Eereka ôkitika itxari, ipira poho nopini taka itxari. Anikari kâkiti imakiniâtaâ aikotimoni. Iuaâ imoiaâri. ³⁵ Katimatinîkata isikari txineiro kaapokorimoni. Ipi ota pirata kamakori isika. “Nisipekako. Pite moiaâriko ia kiki. Apikomonipanika txineiro pinirekiniâ ikiena

ĩkapani, nikanapiriãkasaaki niĩkitxitai,” itxa Samariakiri, —itxa Xesosi Moisesi sãkire oerekakarimoni.

³⁶ Xesosi pimaãri iua:

—Ipi ãti kikiakori iãpota iua kimapori. Īkiripa iua kiki kiĩtiririni maĩkakiti turetakari? —itxa.

³⁷ Ininiã iua Moisesi sãkire oerekakari:

—Ari, Samariakirinokara turetari iua —itxa.

Ininiã Xesosi:

—Pisipe. Samariakiri kamakiti atoko inakari pikamako, kotxi iua turetari ãti.

Xesosi Motika ẽtaro Mata, Maria Pakini

³⁸ Xesosi imoianariakorikata sipeka. Apokana aapokotxiãtaã. Iuaã sito Mata inakoro apakapana oaãpoko. ³⁹ Oĩtaro Maria inakoro topãka Apiananiri takote isãkire okenakotini ĩkapani. ⁴⁰ Mata maerekaxiniretonoka otxa oparĩka ito inini xika. Ininiã osari Xesosimoni.

—Apiananiri, nitaro topãkanãta ereẽ. Notanani parĩkauanãta. Pitemoni erekari atxiĩti? Pipaniãtaroko notakata nipokori okamini —otxa.

⁴¹ Ininiã Xesosi:

—Mata, Mata, maerekaxiniretonokai pitxa, kotxi piparĩka ito inini xika. ⁴² Ātinoka pikamini tĩkane ninireka. Maria mereẽri ikara. Omereẽri nota sãkire okenakotini. Oa mereẽkiti apiaerekata, ininiã !niotokakaro oa nisãkire okenakotini —itxa Xesosi.

11

Teoso Misãkiretiko Pirena
(Mateo 6.5-15; 7.7-11)

¹ Āti õti Xesosi misãkiretari Teoso. Ixipoka atoko ãtika imoianari txari:

—Apiananiri, Xoão oerekari imoianariakori Teoso imisãkiretinina. Iua atokokana poerekaua ate Teoso amisãkiretini. Natokopa itxa Teoso amisãkiretini?

² Xesosi apakapapireta:

—Teoso himisãkiretakasaaki, ia atoko hĩtxako:

“Aĩri, iaxiti auakari, ate nirekari piuãka paxitiko. Anirekari ikini itixiti auakani auĩtetinii pite. Pite tixine pinireẽkiti kamiko atokokana, anirekari pinireẽkiti kamiko ĩkorapokoriti.

³ Nipokori ikiniõtika pisikauako.

⁴ Pimaxinĩkaretariko maerekati akamakiti. Maerekati atemoni kamakori amaxinĩkaretini atokokana, pimaxinĩkaretariko. Kona panikapeua aãtaerekatikomoni. Pisikakauako ate, maerekati sauaki aãuakasaaki.”

Ikara atoko hĩtxako Teoso himisãkiretini —itxa Xesosi.

⁵ Eereka Xesosi oerekana imoianariakori:

—Atxiĩti apanĩkanõka pisa pimoianari aapokomoni nipokori pamanaini ĩkapani. Ininiã pakiritari iua: “Nimoianari, ipi ãti pakini komiri pisikano. ⁶ Naõkimanere iãpotakari uatxaika apoka naapoko. Natxinoka itxape. Nipokori !auari nisikiniri,” atxiĩti pĩtxari iua.

⁷ —Atxiĩti pimoianari iroko ãki apakapapiretai: “!Pakirinãtapeno. Naapoko tore katoreri. Nota, namariteni apaka imakanãtape. !Niposota nõkitikiniua, nipokori nisikinii.”

⁸ —Pimoianari itxaua iua, iuaritika atxiĩti !inirekari õkitikiniua. Iuaĩkana, iuaĩkana pakiritiniãri pimoianari, iua õkitikapitika. Ikini nipokoriti pinirekakiti isikaiko, iuaĩkana imakini ĩkapani. Iua pimoianari na atoko itxa Teoso. ⁹ Ininiãkara pamanaãriko pinirekakiti, ininiã Teoso sikapitikai. Pinitariko pinirekakiti, ininiã papokapitikari. Pakiritariko Teoso, ininiã iua apakapapiretai. ¹⁰ Amanarauatakari apakapapitikari amanaãkiti. Nitarauatakari apokapitikari initakiti. Teoso akiritakari apakapapiretaãkapitika.

¹¹ —Hĩte irĩtxiakori, hamariteni amanainiãi komiri, kaikani hĩsikatana hamariteni? Ximaki amanainiãna, iminikani hĩsikatana hamariteni? ¹² Patari naki amanainiãna, kaxipirokani hĩsikatana hamariteni? Konapitini. ¹³ Hĩte maerekati kamakani hĩtxaua,

iuaritika himarotari erekari hamaritenimoni hīsikini, ininiā hīri iaxiti auakari, erekari-nani kamakari, iua sikapitikariko Erekaru Matamatakoti hītemoni hamanainiāri iua — itxa Xesosi.

Maerekani Matamatakoti Omitikiko
(Mateo 12.22-32; Marko 3.20-30)

¹⁴ Āti ōti Xesosi omitikari maerekati matamatakoti masākireti. Iua maerekati matamatakoti sipeka atoko, iua kiki mitxi maerekati matamatakoti auaiŋtotakiti posotari iuaikana isākirauatini. Kākiti Xesosi kamakiti itikakani tsorīkaānāta. ¹⁵ Ātikaka ninoa txari:

—Satanasi, maerekani matamatakoti auīte, iuakara sikataparataru Xesosi maerekani matamatakoti omitikini.

¹⁶ Apanakinipekana nirekari Xesosi kerokiniri, ininiā itxarina Xesosi:

—Takaōtxikari, Teoso posotiire poerekaua ate, aātamatiniri ikapani, Teoso iokanatinii ikorapokoriti aimarotini ikapani —itxarina.

¹⁷ Xesosi imarotari ninoa xinikanātakiti, ininiā iua txana:

—Kākiti tixine auakani, ninoakakarika inaiatakakiniāuana, ! apakata. Ixipokakakauana. Iua atokokana kākiti aapokoā auakani inaiatakakiniāuana, ninoakakarika ixipokakakauana. ¹⁸ Iua atokokana Satanasi nitiriakori, ninoakakarika inaiatakakiniāuana, Satanasi tapara xipokako. Ikara atoko ininiā, kona atāo hīte sākire, nota iokanatinina Satanasi nitiriakori, maerekani matamatakoti, Satanasi taparaā. Ikara hīsākire kona atāoni. ¹⁹ Hīte sāpiretano, maerekani matamatakoti Satanasi taparaā nomitika, ininiākara kitaparaāpa hīte moianariakori omitikana maerekani matamatakoti? Ninoa omitikana maerekani matamatakoti Teoso taparaā, ininiā ninoakara oerekari !atāo hīsākire nota pirena. ²⁰ Teoso posotiireē nomitikari maerekani matamatakoti. Ikara atoko ininiā, Teoso oerekai iua apokapeka hītemoni hīauīte inini ikapani.

²¹ —Kiki pataparari ikeeko iposope inakari moiainiāri aapoko, kona kiītirikikori itii.

²² Txamari āti kiki apiataparata iniatiniāri, iriākata, ininiā anikapitikari kaapokori ikeeko. Mitxi iua kaapokori sākire: “Nikeeko auiniā, kona kamakatkakikori nitii,” itxama, iuaritika kiki apiataparataru itirikari itii. Eereka imoianariakorimoni ixanakari tiitxi.

²³ —Notakata maparīkauatakani omanatano nota. Imamoianatakaniāno, inirekari niparīka ixipokini —itxa Xesosi.

Maerekati Matamatakoti Kanapiriini Pirena
(Mateo 12.43-45)

²⁴ Iuaikana Xesosi sāpirenauata:

—Maerekati matamatakoti omitikikosaaki, kākiti itakanapakasaaki, isaāpota āparaā makipakaniātaā auiniātaā initini ikapani. Imapokakaniāri, “Iuaikana nikanapiriāko mitxi nauinimoni,” itxa. ²⁵ Iuaā apoka. Iua aapoko mitxi inakari iusaaki peereri. Oeretapeēkaika. ²⁶ Ininiā apana apikomoni setxi pakini maerekani matamatakoti, apia maerekanitakani. Ninoa ikinikana iroaiŋtotari iua kiki. Iua iŋtoā aua itxana. Iusaaki oitope maerekani matamatakoti misiritari iua kiki, ininiā apiata itsii inikoriā. Mitxipe ātinoka maerekati matamatakoti paniātari iua maerekati ikamini. Eereka oito paniātari iua —itxa Xesosi.

²⁷ Xesosi sākirauataka atoko, sito iuaā kākiti sauaki auakaro txari Xesosi:

—Pite auākītakakaro, pite axitakakaro, poxokoniuata, kotxi Teoso sikari erekari oamoni —otxa.

²⁸ Xesosi apakapapiretaro oa:

—Ari, inipitikara. Iuaritika Teoso sākire kenakotakani, isākire auīākani, apia poxokoniuatako, kotxi Teoso sikari apikomoni erekari ninoamoni —itxa Xesosi.

Xonasi Pirena
(Mateo 12.38-42; 16.1-4; Marko 8.11-13)

²⁹ Kaiāopokori kākiti apokaāpota Xesosi takote. Iusaaki Xesosi txari:

—Kākiti uatxarini !erekana. Hīte nirekari noerekinii Teoso takaōtxikare, iposotiire. Konapitini. Kona noerekai hīte. Kitxakapirīka Teoso sākire sāpiretakari Xonasini inakori auakasaaki, Teoso kamari posotiiretxi. Ikara atoko inakari posotiiretxi Xonasini auakasaaki, iuaīkana ikamapanikariko. Iua posotiiretxi Teoso takaōtxikare itxapanikaua hīte īkapani. Iua takaōtxikarinoka Teoso takaōtxikare hīte īkapani. ³⁰ Kitxakapirīka Nínivi sitatxiti auakani imarotari Teoso iokanatiniri Xonasi ninoamoni. Iua atokokana kākiti uatxa auakani imarotariko Teoso iokanatinino nota kākiti itari iaxitikiri ninoamoni.

³¹—Kitxakapirīka sito Sapaa auakani auīte sari ōtakoxiti auītetxi Saromão inakorimoni imarore okenakotini īkapani. Kākiti misiritiko ōti apokasaaki, oa sito txitanako kākiti uatxa auakani, kotxi uatxa uai aua Apiatakari. Iua Saromão auītetxi itxaua, iuaritika uatxa uai aua auītetxiakori auīte. Txamari kākiti uatxa auakani !inirekari ikenakotinirina nota sākire.

³²—Kākiti misiritiko ōti apokasaaki, kākiti Nínivi sitatxiti auakani txitaiko hīte īkorasaaki auakani, kotxi nino kenakotari Xonasi sākire. Iuasaaki itakanaparina maerekati ikamakitina. Uatxa uai aua Apiatakari. Xonasi poiāoka. Hīte kenakotapekari nota sākire, txamari himaerekani !hītakanapa —itxa Xesosi.

Tirikapi Ītotxiākiri Pirena

(Mateo 6.22-23)

³³ Iuaīkana Xesosi sāpirenauata:

—Kākiti iopotokakasaakiri tirikapi, itano itaka ikinimane ĩroākani atamarauatini īkapani. !Ikipatari tirikapi. !Iomaātari tirikapi kopiti āki. ³⁴ Poki tirikapi atoko itxa piīto īkapani. Poki ereka inakasaaki ipinikare aua pākixinireē. Poki maerekanisaaki, pākixinireē mapiāriko. ³⁵ Erepaniko. Atxiīti piuākatari ipinikare pākixinireē auini, txamari atxiīti ipiānoka auari pākixinireē. ³⁶ Ipinikarenoka pākixinireē auiniā, ipiā na xatiki auinii, tirikapi ipinikinii atoko itxa —itxa Xesosi.

Pariseoakori Maerekani

(Mateo 23.1-36; Marko 12.37-40)

³⁷ Xesosi sākirauataka atoko pariseo aiataro Xesosi:

—Manipokota naapoko —itxari.

Ininiā Xesosi sari iuakata. Apokaāka atoko, iitopāka inipokotini īkapani. ³⁸ Iua pariseo tsorīkānāta Xesosi marokauakotakaniāua inipokotini apisa, kotxi iuasaaki Xesosi ! ikamari Xoteo kiomaneakorini oerekakiti iaōka. ³⁹ Ininiā Xesosi:

—Hīte pariseoakori arokari hīto, txamari hākixinire patxīkopīri, kotxi maerekatinoka hīkama. Kapotxinaniri hītxaua. Iākoanatchi inopininoka arokiko atoko hītxa. Pirato inopininoka arokiko atoko hītxa. ⁴⁰ !Kīkītei hīte. Teoso hīto kamakari kamari hākixinire apaka. ⁴¹ Iākoanatchi āki auakari iāriā hīsikako matxineirotenimoni. Hīpratone āki auakari nipokori hīsikako matxineirotenimoni. Hītiretariko apanakini. Ikara atoko hīkaminiā, Teoso atamatari hākixinire ereka inini.

⁴²—Hīte pariseoakori misiritaākako. Hīte sikari ipixini hītakare kikio auakari Teosomoni Moisesi paniātakiti iaōka. Apikomoni hīkama, kotxi ipixini takari kanaua āki hītakakiti apaka hīsika Teosomoni, oteraā, seporīa hīsika. Erekapitikamari hīte sikakiti Teosomoni, txamari himisirienetari kākiti. Teoso !hītireta. Erekarari ipixini hītii hīsikiniri Teoso. Iukatikana erekari atāo hīkaminari kākiti. Erekarari atāo hītiretiniri Teoso.

⁴³—Hīte pariseoakori misiritaākako. Hīte potxitari hītopākini kākiti apisatoō, aiko āki Xoteo apotiitiniātaāua kākiti atamatinii īkapaninoka. Nipokori sikaretikoātaā hāuakasaaki, hīte apokaerekatari kākītipokoni paxitinii hīte koerekareri hininiāua.

⁴⁴—Hīte pariseoakori misiritaākako. Akauari matakaōtxiākoti atoko hītxa. Iua nopini kākiti napa imimarotakoniā, kotxi hīto peerekari, txamari hākixinire !erekari. Akauari āki arakakari atoko itxa hākixinire —itxa Xesosi.

Moisesi Paniātakiti Oereēkani Maerekani

⁴⁵ Ikara sākiretxiti kiki Moisesi paniātakiti oereēkari kenakotakasaaki, omanākarauata. Itxari Xesosi:

—Koerekareri, ikara atoko pisākirauatiniā, ate apaka “maerekati kamakani” pitxataua ate —itxari.

⁴⁶ Ininiā Xesosi:

—Hīte Moisesi paniātakiti oereēkanii hītekanerako misiritaākako. Hīte paniātari kākiti hīteka paniātakiti ikaminina. Ninoa !iposotari ikinika hīpaniātakiti ikaminina. Iminani ninoa porikiā hītakini atoko hīkamanāta hīte. !Iposotarina anikinirina. Hīte apaka !hīkamari hīteka paniātakiti. ⁴⁷ Hīte misiritaākako. Hīte kamari takaōtxikari peereri Teoso sākire sāpiretakanini ikatikoātaā hītakini. Txamari hīte atokiriakorinikara okapena ninoa Teoso sākire sāpiretakanini. ⁴⁸ Iuaritika hīte sāpiretari ikinimane hāpokaerekatiniri hīte atokiriakorini kamakiti. Txamari ninoara okana Teoso sākire sāpiretakanini. Hītera takari takaōtxikari peereri ninoa Teoso sākire sāpiretakanini akauariātaā, ininiā kākiti uākatari hīpaxitinina ninoani, txamari !hīkamari ninoani paniātakiti.

⁴⁹ —Paimatireri Teoso, kotxi mitxipe imarotari ninoa kamakiti tīkane. Mitxipe iua txari: “Nota iokanatanako nisākire sāpiretakani, niokanapirena aniākani pakini ninoamoni, txamari ninoa okapanikana apanakini. Imisiritapanikana apanakini,” itxa Teoso. ⁵⁰ Kākiti uatxa auakani misiritaākako, Teoso sākire sāpiretakanini okiko xika. Teoso itixi ikamakasaakipeka ipotorika Teoso sākire sāpiretakani okiko. ⁵¹ Merepitipanika Apeo inakori okapeēka. Eereka apanakini okaāpotapeēka. Imapotōkire okakori Sakaria inakori. Teosomoni sikakori takikoātaā takote, Teoso Auini Pakitaātaā takote apaka, iuaā okapeēka Sakaria. Inipitikara nota sāpiretai hīte, uatxa auakani misiritaākako ninoa Teoso sākire sāpiretakani okiko xika.

⁵² —Hīte Moisesi paniātakiti oereēkani misiritaākako. Hīte kipatari atāo inakari Teoso iokanapirena. Hīte apaka !auikari ikara. !Hāuiritari apanakini auikiniri —itxa Xesosi.

⁵³ Ikara Xesosi sākire xika, Moisesi paniātakiti oereēkani, pariseoakori pakini tsoata, Xesosi omanatinina. Ātipirika ipimaānātapikarina Xesosi. ⁵⁴ Inirekarina Xesosi kerokiniri isākire, imaīkiko īkapani.

12

Kipatakori !Auari

(Mateo 10.26-27)

¹ Kākitipokoni apotiitaua kinapokopeka, ininiā ikatxarakititakakauana. Iuasaaki Xesosi merepanika ōtākikana imoianariakori:

—Erepaniko pariseoakori sākire. Pamonoākoniri isākirena, kotxi !likamarina isākirena iaōka. Ikara imaerekanina kipataua pāo tireēkari pani koketakori atoko itxaua. Eereka imarotaāka imaerekani. ² Ikinika seretakori oerekaākako. Ikinika kipatakori imarotaākako. ³ Ininiā ipiāpokoā pisāpiretakiti, pokamara imarotaākako. Aapokotxi katoreri āki pimaasakapiretakiti aapokotxi nopini akiritaākako ikinimane imarotiniri īkapani.

Kipa Apīka?

(Mateo 10.28-31)

⁴ —Nimoianariakori nōtākikapanikai hīte. !Hīpīkapiri hīte okakani tīkane. Hītonanira iposotana okinina. Hīxinire !iposotana okinina. ⁵ Nisāpiretai hīpīkakiti tīkane. Teosora hīpīkako. Iuara posotari hīto okini, eereka iposotari iokanatinii maerekani misiritikoātaā. Ari, iuara hīpīkako.

⁶ —Kirīpa ipi ipi āti pakini kotipiriki karone? Poiāonoka txineiro, ota ipinoka. Iuaritika Teoso !imaxinīkaretari ātika kotipiriki. ⁷ Kipakinipa piāko pikiiā auakari aua? !Pimarotari. Teoso imarotapitikari, kotxi iteene inīkatali, ininiākara !hīpīkarauatape. Kotipiriki īki poiāo, iuaritika Teoso tiretari kotipiriki. Kaiāopokori kotipiriki auiniā, iuaritika hīte īki apiata, ininiā Teoso tiretapitikai hīte —itxa Xesosi.

Xesosi Nakitiakori

(Mateo 10.32-33; 12.31-32; 10.19-20)

⁸ Xesosi sāpirenauatapanika:

—Apikomoni nisāpiretai. Kākiti ikinimanemoni: “Xesosi nakiti nitxaua nota,” inakari, iua atokokana nota hītari iaxitikiri txako Teoso nitiriakorimoni: “Nota nakitipitikara iua,” nitxako. ⁹ Kākiti ikinimanemoni: “Xesosi nakiti !nitxaua nota,” inakari, iua atokokana nota hītari iaxitikiri txako Teoso nitiriakorimoni: “Kona nota nakitini iua,” nitxako.

¹⁰ —Kākiti misākirepiretiniāno nota hītari iaxitikiri, eereka amanainiāri Teoso ikara imaerekani imaktxakini, ininiā Teoso makatxakapitikari. Kākiti misākirepiretiniāri Erekar Matamatakoti, !kimaktxakikori ikara maerekati ikamakiti.

¹¹ —Hanikikosaaki aiko Xoteo apotiitiniātaāua hāpoītikoā, hanikikosaaki auītetxiakorimoni hāpoītikoā, mitxi !hīxinikapiri hīte apoītakani hāpakapapiretini. Maerekaxiniretinoka !hītixape. ¹² Iuasaaki ninoa apoītakasaakii, Erekar Matamatakoti sāpiretaiko hīte hāpakapapiretini ikapani —itxa Xesosi sākire.

Kiki Katxineiroteri Miikiteti

¹³ Kiki kākitipokoni sauaki misākiretari Xesosi:

—Koerekareri, pipaniātari nitari sikinino nota ipixini aīrini tii ipīkasaaki itakanapakiti —itxa.

¹⁴ Ininiā Xesosi:

—Naōkimanere, kona nota parīkani pirini tii nixanakini —itxa Xesosi.

¹⁵ Ininiā Xesosi misākiretana ikinimane:

—Erepaniko. !Erekar tiitxi iteene pinirekini. Kapotxinani !hītixape. Itomaneri tiitxi !itxīkitakai okanani pauini —itxa Xesosi.

¹⁶ Ininiā Xesosi sāpiretari ia sāpirenatxi atāo inakari oerekiko:

—Kiki katxineiroteri aua kiki mitari. Itakare peerekari, kaiāopokori. ¹⁷ Ixinikaxitita ākixinireē: “Nāpa ninīkatarī nikiena? Nikiena nīkatikoātaā xapitikiri. !Apakata itomaneri nikiena ikapani. Kīpa nikama? ¹⁸ Ari, nimarotari nikamakiti tīkane. Nōtikariko nikiena nīkatikoātaā. Iuaīkana nikamari āti mitari. Iuaā ikinika nikiena, nitii apaka ninīkata. ¹⁹ Eereka notaka nitxauako: ‘Peerekano nota. Kaiāopokori nikiena. Kaiāopokori nitii. Apakatapitikako kaiāopokori anokanani ikapani. Ininiā !niparīkauataika. Ninipokotako, niātako, nipoxokoniuatako nitxako,’” itxa iua kiki. ²⁰ Txamari Teoso misākiretari iua: “Kīikitei pite. Uatxa ia ikanōkati pipinako, ininiā kīpa apakapatari ikinipoko pikiena, pitii apaka?” itxa Teoso.

²¹ —Ikara atoko itxa kākiti tiitxinoka xinikakari, Teoso maxinikati —itxa Xesosi ikara sākiretxiti ixipokini.

Teoso Nīkatiniua Ate (Mateo 6.25-34)

²² Ininiā Xesosi misākiretari imoianariakori:

—Ininiākara nota sāpiretai hīte, maerekaxiniretinoka !hītixape, hiniākiti nire, mākatxi hīeretaākiti nire. ²³ Nīpokori, mākatxi pakininoka kona txīkitakari pauini ereka inini. Nīpokori, mākatxi pakini poiāoka. ²⁴ Hātamatari kotipiriki. Ninoa !itakarauata. !Amarina ikiena. !Ipotetarina ikiena. Iuaritika Teoso sikakienatana ninoa. Teoso nīkatiniāri kotipiriki, inīkatapitakai hīte apaka. Hīte īki apiata. ²⁵ Kinirepa maerekaxiniretinoka pitxa? Pimaerekaxinirene !itxīkitakai apikomoni āti oara pauini. ²⁶ Pimaerekaxinirene kona txīkitakai axapitiki apikomoni pauini, ininiā kinirepa maerekaxiniretika pitxa?

²⁷ —Aāui pixinikako. Kona aāui parīkauata. !Ikamari imāka, iuaritika aāui peereri. Kitxakapirīka auītetxi Saromāo inakori, iteene katiiri itxaua. Kaiāori imāka ereri, iuaritika apia ereri ikinika aāui. ²⁸ Aāui !okanani aua. Uatxa aua. Katana ikatikata iotikaāka. Iuaritika Teoso nīkatari aāui. Ininiā apiata inīkatai hīte. Ikamamākatapitikai. Poiāonoka hīte auikari Teoso sākire. Ikara xika maerekaxiniretinoka hītixa. ²⁹ Ininiākara maerekaxiniretinoka !hītixape. !Hīxinikanātapiri nīpokori mauakanisaaki, iāriā mauakanisaaki. ³⁰ Kākiti Teoso sākire mauīkāni ikiniōtika maerekaxiniretinoka itxana imākana ixinikinina xika, inipokore ixinikinina xika. Hīri imarotari himāka hinirekini, hīkiena hinirekini. ³¹ Merepitipanika pinirekariko Teoso piauīte ininiāua. Iua nireēkiti pikamako, ininiā, himāka, hīkiena apaka Teoso sikaiko hīte —itxa Xesosi sākire.

Hīparīka Īki Nīkatiko
(Mateo 6.19-21)

³² —Ininiā hīte ninakitiakori !hīpīkarauatape, kotxi hīri apokaerekatari isikinii ikinipoko erekari iua auītetxi ininiātaāuakiri. ³³ Ikinika hītii hīvētxitako. Txineiro hīsikako matxineirotenimoni. Ikara atoko hīkaminiā, hīparīka īki auapitika Teoso tixine. Iuaā hīparīka īki !ixipoka. Kītiriri !ītirīkari. Kīiriki !inikari. Iuaā hinīkatariko hīparīka īki. ³⁴ Erekari hīparīka īki Teoso tixine auiniā, ininiākara iuaā pixinikapika. Iuaā pinirekari pauini —itxa Xesosi.

Nitiritxi Erekarini

³⁵ Xesosi sāpirenauatapanika:

—Himerekako, kamāka hītxako. Tirikapi hīopotokakako. Iposope hītxako nīparīka hīkamini īkapani. ³⁶ Nitiritxi ipatrāotena iātapakani atoko hītxako. Ipatrāotena sari ītanorouatakari kiiniritemoni. Initiriakori iātapari ikanapiriini. Apokasaaki, akiritakasaaki, pakoteri initiriakori matakakari itore ipatrāotena īroini īkapani. Ninoa nitiritxi atoko hītxako. ³⁷ Patrāo apokasaaki initiriakori merekapanika inakasaaki, iātapanaātakasaakiri iua, ininiākara erekapitikari. Himarotatarī patrāo kamakiti? Iua ieretakari imāka iparīkauatini īkapani. Ipaniātana ninoa topākini. Eereka isikakienatana initiriakori. ³⁸ Erekapitikari ipatrāotena apokasaaki imirekiniāna. Atxiīti apanīkanōka apoka ipatrāotena. Atxiīti imaropirīkata apoka ipatrāotena, iuaritika iposope itxana, ininiā erekapitikari.

³⁹ —Hīxinikari ia. Kaapokori imarotaākamariko kītiriri apokini, !auiritamariko iua aapoko īroini itii ītirīkini īkapani. ⁴⁰ Hītepekana, hīte apaka iposope hītxako, kotxi nota hītari iaxitikiri kanapiriāko. Iuasaaki, “!Apoka uatxa,” hinakasaaki, iua ōtipitika nota kanapiriā uai —itxa Xesosi.

Nitiritxi Erekarī, Nitiritxi Maerekati Pakini
(Mateo 24.45-51)

⁴¹ Petro misākiretari Xesosi:

—Apiananiri, ikara sāpirenatxi atāo inakari oerekiko pisāpiretakiti, atenani poerekini īkapanikani? Ikinimane poerekini īkapanikani ikara pisāpireta? —itxa Petro Xesosi-moni.

⁴² Ininiā Xesosi:

—Nitiritxi kimaroreri ipatrāote paniātakiti kamakari ia atoko itxako. Iuara apanakini nitiritxi auīte itxaua. Iuara sikakienatana apanakini nitiritxi nipokotiko manapi. ⁴³ Nitiritxi ipatrāote paniātakiti iaōka kamakari poxokoniūata ipatrāote apokasaaki, kotxi ipatrāote paniātakiti iaōka ikama. ⁴⁴ Ipatrāote auiritariko iua ikinika itii, aapoko, ikikiote pakini inīkatini.

⁴⁵ —Txamari atxiīti āti patrāo nitiri !inirekari ipatrāote paniātakiti iaōka ikamini, ipatrāote auapokotini xika. Atxiīti inoropatari apanakini ipatrāote nitiriakori, apanakini ipatrāote niteroakoro apaka. Atxiīti inipokota, kapoāro iāta, ipoāta. ⁴⁶ Ipatrāote apoka initiri mimarotakanisaaki, ininiākara initiri liposopanika ipatrāote apakapini. Ikara xika ipatrāote misiritari iua. Eereka iokanatarī iua Teoso sākire mauiākani misiritikoātaā.

⁴⁷ —Nitiritxi ipatrāote nireēkiti imarotakari makamakaniāri ipatrāote paniātakiti iposope inini īkapani, ixirokitataākako aāpitsaā. ⁴⁸ Nitiritxi ipatrāote nireēkiti mimarotakati kaminiāri maerekati, ixirokitataākako, txamari poiāonoka. Teoso sikari parīkatxi, imaroretxi pakini kākitimoni. Kaiāopokori parīkatxi, kaiāopokori imaroretxi isikiniāi pitemoni, ininiā Teoso nirekari pite iteene parīkauatini iua īkapani. Apikomoni parīkatxi, apikomoni imaroretxi isikiniāi pitemoni, ininiā Teoso nirekari pite apiata piparīkauatini iua īkapani —itxa Xesosi sākire.

Neenamtxi Xesosi Sākire Auikiko Xika
(Mateo 10.34-36)

⁴⁹ Xesosi sākirauatapanika:

—Teoso misiritariko kākiti imaerekani xika. Xamina tirinini atoko itxa kākiti misiritiko. Ia itixi napoka ikara xamina tirinini nitxīkitakini ĩkapani. Ninirekari ikara niparīka nixipokini. ⁵⁰ Nota atatsiirauatako. !Erekaxinireno. Ninirekakari natatsiirauatini katima xipokaka inini. ⁵¹ Kona neenamatzixi niotokakini ĩkapanini napoka ĩkorapokoriti. Nota sākire auikiko xika neenamatzixi auapitikako. ⁵² Aapokotxi āki auakani sīko. Atxiīti ipi āti pakini naiatari ipi, atxiīti ipi naiatari ipi āti pakini, nota sākire auikiko xika. ⁵³ Irītxiakori omanatana ninoa ākiri nota sākire auikiko xika. Ninoa ākiri omanatana iriakori. Inorotxiakoro omanatana ninoa ākero. Ninoa ākero omanatana inoroakoro. Imakirotxiakoro omanatana otiiroakoro. Otiiroakoro omanatana oimakiroakoro nota sākire auikiko xika —itxa Xesosi sākire.

Iaxiti Imarotiko
(Mateo 16.1-4)

⁵⁴ Xesosi iuaīkana misākiretari kākiti:

—Atokatxi erekōkinimoni ipiākaāpotakasaaki, “Āparaānapani,” hītxa. Ari, ikipapitakako. ⁵⁵ Ītima ikiitaā ĩkari apokasaaki ĩkorapokoriti, hīte: “Kamoīpani,” hītxa. Ari, kapatakapitikariko. ⁵⁶ Kamisirienererini hītxaua. Hātamatari iaxiti, itixi pakini, ininiā himarotapitikari āparaā, kamoī pakini. Kinirepa kona hātamatano nota? Kinirepa kona hīkenakotari nisākire Teoso kamaenetakiti himarotini ĩkapani? —itxa Xesosi sākire.

Pimisiritiko Mereēkarimoni Pimasikani ĩkapani
(Mateo 5.25-26)

⁵⁷ —Kinirepa hīteka na xinikari atāo inakari hīkamini tīkane? ⁵⁸ Maerekati pikamakasaaki, āti nirekari anikinii pimisiritiko mereēkarimoni. Iua anikinii apisapanika, pisākirauata iuakata atāo pikamini ĩkapani, ininiā iua !anikaikai pimisiritiko mereēkarimoni. Pimamisākiretakaniāri, iua anikaiko pimisiritiko mereēkarimoni. Eereka pimisiritiko mereēkari sikaiko sotatomoni. Eereka sotato takai kateia āki. ⁵⁹ Atāo nisāpiretai, kona posipikari kateia ikinika pimisiritiko mereēkari paniātakiti pimiīkitxitakanisaaki —itxa Xesosi.

13

Himatakanapakanianāri Himaerekani, Hīpinako

¹ Xesosi sākirauatakasaaki, kākiti iuaā auakani sāpiretari iua Karirēia auakani okiko pirena. Ninoa Teoso misākiretiko aikotiā auakasaaki, ninoa okari ipirana imaerekanina Teoso makatxakini ĩkapani. Ininiā iusaaki Pirato sotatone apoka iuaā. Iusaaki ninoa okana. ² Xesosi imarotari kākiti ākixinire xiniākiti. Ininiā ia atoko itxa:

—Hīte uākatari ninoa Karirēia auakani maerekani apiata. Ininiā, “Ikara atoko inapeēkana ninoani,” hītxa. ³ Konapitini. Nota sāpiretai hīte, himaerekani himatakana-pakanisaaki, hīpinako ninoa atokokana hinaākako —itxa Xesosi.

⁴ Ininiā Xesosi sāpiretana ninoa apanakini ipinini pirena:

—Xerosareē aua Siroee inakori aapokotxiti. Iua aapokotxi ĩtanori irika. Irikasaaki, tesoitō kikiakorini ipīpe. Hīte uākatana iuaā auakani apia maerekani itxauana?

⁵ Konapitini. Hītekanera himaerekani himatakanapakanisaaki, ninoa atokokanera hīpina —itxa Xesosi.

Piko Mina Mariti Pirena

⁶ Ininiā Xesosi sāpiretari āti sāpirenatxi atāo inakari oerekiko:

—Aua kiki. Initirikata isari ikikiote atini ĩkapani. Iuaātaā aua amātiiri piko inakori mina. Iuaā apokasaaki, maritoka otxa itakare. ⁷ Ininiā itxari: “Ipikanani ātikanani pakini ninapiima. !Kariro. Ininiā erekari otokiko, kotxi kona oīriuata. Ininiā kona erekari uai okaikotini, kotxi oxipokari takari kiena kipatxi āki auakari,” itxari initiri. ⁸ Ininiā initiri: “Kona pitokapero. Nota oeretariko opatapi. Āti kipatxi erekari patari tikakata nitakapatapitaroko. ⁹ Ātikanani inakasaakiaua karipeka oniniā, ereē oāua. Erekari okaikotini. Omiriuatakanisaaki, iusaaki erekapekari otokiko,” itxa initiri —itxa Xesosi.

Tomatiko Ōtisaaki Xesosi Makananitiniro Sito

¹⁰ Tomatiko òtisaaki Xesosi auari aiko Xoteo apotiitiniãtaãua. ¹¹ Iuasaaki sito apoka. Tesoito anokananipeka ina amianaretakaro. Ia atoko otxa amianareta. Okomíkaãpota, kotxi maerekati matamatakoti amianari kamakari ìroaítotaro. Kona oposota oòkitikaítotiniãua. ¹² Xesosi atamatakasaakiro, itxaro:

—Sito, erekapitikaiko uatxa —itxaro.

¹³ Ininiã itakari iuako onopini. Iuasaakipeka oòkitikaítotaua. Ininiã iuasaaki otxa:

—Peerekari Teoso. Erekarì imakinika ikamakiti —otxa.

¹⁴ Iuasaakipeka Xoteo apotiitiniãtaãua aikotiã auakani auíte naiataua, kotxi tomatiko òtisaaki Xesosi makananitaro amianatakaro. Ininiã iua txitari kãkiti:

—Auari seisi pakini òti kãkiti paríkautini ìkapani. Ininiã ìkora seisi òti hina iua makananitinii ìkapani. Kona hinape tomatiko òti erekapeka hìtxìkitakiko ìkapani —itxana.

¹⁵ Ininiã Xesosi txari iua:

—Hìsãkire atxiíti erekari, txamari kona hìkamari hìsãkire iaòka. Tomatiko òtisaaki hìte tiretari hìpiraaakori, kotxi hanikari hìpiraaakori, kema auíte iaãmoni àparaã iãtinina ìkapani. ¹⁶ Oia sito Apraãoni apika mekaniro otxaua. Satanasi kamaamianaretaro oa tesoito anokananipeka. Iaõpe. Apakatapitika tomatiko òtisaaki nitiretiniro oa, nimakananitiniro oa —itxa Xesosi.

¹⁷ Xesosi apakapapiretakasaakina, imokaiakariakori pètauata. Iuasaaki apanakini iuaã auakani poxokoniua, kotxi imarotarina erekari Xesosi kamakiti.

Mostata Pirena

(*Mateo 13.31-32; Marko 4.30-32*)

¹⁸ Ininiã Xesosi pimaãna:

—Natokopa itxa Teoso auítetxi ininiãua? Kiãtokopa itxa axinikiniri? ¹⁹ Teoso auítetxi ininiãua mostata iki atoko itxa. Kiki takaro mostata ikikioteë. Oa aneë. Mítape onakasaaki kotipiriki kamari ikoa okatiã. Ikara atoko itxa Teoso auítetxi ininiua —itxa Xesosi.

Merepanika poião kãkiti auítetari Teoso. Eereka kaiãopokori kãkiti auítetari iua. Txamari iuasaaki Satanasi apoka ninoamoni kotipiriki apokini atokokana.

Pão Tirekakari Pirena

(*Mateo 13.33*)

²⁰ Iuaíkana Xesosi pimaãna:

—Natokopa itxa ìkorapokoriti Teoso auítetxi ininiãua? ²¹ Ia atokokana itxa: Sito kosekari pão tirekakari pani. Okoketari axapiti pão tirekakari pani kaiãopokori triko panikata, àparaãkata. Eereka ikinika ipe tirekaãpota otxa.

Axapitiri Ironakikoãtaã

(*Mateo 7.13-14, 21-23*)

²² Ikara inaka atoko Xesosi potorika Xerosareë sitatxiti isini ìkapani. Isaãpotakasaaki, isãpiretari Teoso sãkire. Isãpiretari ãti sitatxitiã, ãti aapokotxitiã, ãti sitatxitiã, itxaãpota isãpiretiniri Teoso sãkire kãkitimoni. ²³ Oerekarauanãtakasaaki, kiki pimaãri:

—Niauíte, poiãokani satako Teoso auiniãtaã?

²⁴ Ininiã Xesosi apakapapiretari:

—Teoso tixine ìronakikoãtaã axapitiri. Hinirekariko iuaã hiiroini. Kaiãopokori kãkiti nirekari ìroinina. Txamari, !iposotarina. ²⁵ Kaapokori totiniri aapoko tore atoko itxa. Itotakasaakiri, kãkiti iporikiti aritari itore: “Pimataakariko itore ate ìkapani.” Iuasaaki iua kaapokori txako: “Kona nimarotai hìte,” itxanako ninoamoni. ²⁶ Ininiã ninoa: “Ate nipokota pitekata. Sitatxi ate auiniãtaã pauakasaaki, pitekara oerekaua,” itxanako ninoa. ²⁷ Ininiã iuaíkana itxako ninoamoni: “!Nimarotai hìte. Namonipa hãua hìte? Hìsipiniikaua. Imakinika hìkamakiti !erekari.”

²⁸ —Hãtamatakasaakina Apraã, Isaki, Xakoo, ikinimane Teoso sãkire sãpiretakani pakini Teoso auítetxi ininiãtaãua, iuasaaki hìtxiapatapitikako. Apanakini ìroãpeka. Txama hìtenoka kaikotape iporikiti himaerekani xika. ²⁹ Teoso auítetxi ininiãtaãua apokako kaiãopokori kãkiti, ikini itixiti ìkani. Atokatxi pokìkinimoni ìkani, atokatxi

ereëkokinimoni ìkani, atokatxi pokìkini sanaremoni ìkani, atokatxi pokìkini kikomoni ìkani pakini apokako Teoso kiiniritimoni. ³⁰ Merepitipanika Xoteoakori kenakotari Teoso sàkire, txamari !imaãkatari. Eereka Xoteo minakaniua kenakotari Teoso sàkire, ininiã auikarina. Ininiã Xoteo minakaniua apokako Teoso auítetxi ininiãtaãua Xoteoakori apokini apisa —itxa Xesosi sàkire.

Xesosi Tiretari Xerosareë Auakani
(Mateo 23.37-39)

³¹ Ikarasaakipeka àtikaka pariseoakori apoka. Itxarina Xesosi:
—Pisipiniikaua, kotxi Erotxi okaenetai —itxarina.

³² Ininiã Xesosi apakapapiretana:

—Hìsa iuamoni. Hìtxariko iua aripa kamisirienereri: “Nota omitikari maerekati matamatakoti, apaka amianatakani erekapeka nitxìkitaka. Uatxa, katana pakini ni-parìkauatako. Ipi àti òtisaaki nixipokariko nìparìka ìkorapokoriti.” Ikara atoko hìtxariko iua. ³³ Ininiã uatxa nìparìkauatako. Katana nìparìkauatako. Ininiã katana eereka nisa Xerosareëmoni, kotxi àtiãtaã Teoso sàkire sàpiretakani okikoãtaã !uari. Xerosareënanira ninoa ipina. Ininiã nota sako iuaã.

³⁴ —Xerosareë auakanii, Xerosareë auakanii, hìte okapekana Teoso sàkire sàpiretakani. Kai soroã hìkiporonakana ninoa hìtemoni Teoso iokanatakini. Kaiãokatani ninirekamari ninìkatinii, patari oimiakori omìkita patapi otakini atokokana nitxanaka-maiko hìte. Txamari !hàuiritano nota nìkatinii. ³⁵ Ikara atoko inakari xika haãpoko asikaãkako. Teoso !auaika hìtekata. Nisàpiretai. Ia òti hãtamatanano, eereka !hãtamataikano. “Teoso takari erekari uaimoni ìkarimoni, Apiananiri posotiireë ìkarimoni,” hinakasaaki, iusaakinanirako hãtamatanoko nota —itxa Xesosi.

14

Xesosi Erekapeka Txìkitakari Amianatakari

¹ Tomatiko òtisaaki Xesosi sari pariseoakori auítimoni, iuakata inipokotini ìkapani. Iuaã auakani mixinitari iua apoítinirina ìkapani. ² Iuusaakipeka apoka kiki amianatakari. Ikanoke, itapike, imakinika ananaítota. Iua apoka Xesosimoni. ³ Ininiã Xesosi pimaãna Moisesini sàkire oerekakani, pariseoakori pakini. Ipimaãna:

—Erekari atxiíti tomatiko òtisaaki amianatakari erekapeka nitxìkitakini? —itxa Xesosi.

⁴ Ininiã ninoa tsorìkaãnãta. !Apakapapiretarina. Ininiã iusaaki Xesosi erekapeka txìkitakari iua amianatakari.

—Pisipeka paapokomoni —itxa Xesosi.

⁵ Eereka ipimaãna pariseoakori:

—Hìpira kema auíte, hìpira poho apaka aariko àki irikiniã tomatiko òtisaaki, iusaaki himakatzakatarì? Ari, himakatzakapitikari hìpira tomatiko òtisaaki. Ininiã kinirepa kona hinirekatari erekari nikamini tomatiko òtisaaki? —itxa Xesosi.

⁶ Txamari kona ninoa apakapapiretari, kotxi atão Xesosi sàkire.

Kiiniri Kamakari Pirena

⁷ Iusaaki Xesosi itikana kãkiti. Apanakini mereëri kãkiti apiatakari takote iitopãkini. Ininiã isàpiretari ia sàpirenatxi atão inakari oerekiko.

⁸ Kãkiti ìtaniriuatini kiiniriti pirena isàpireta:

—Kiiniriã hìsikasaaki, kona himereëpiri kãkiti apiatakari topãkiniãtaã hìitopãkini, kotxi atxiíti eereka kemaítxitakori apiatakari apoka. ⁹ Ininiã iua apiatakari apokasaaki, kakiiniriteri txaike pite: “Ikiraã piitopãka. Ia kiki topãka nota takote.” Iusaaki pipëtauata. Ininiã pitakanapari iuaã. Maparapeka apanakinikata topãka pitxa. ¹⁰ Kiiniriã hìsikasaaki, apanakinikata hìitopãka. Ikara atoko ininiã, kakiiniriteri akiritai: “Nitari uaimoni pina. Piitopãka uai. Uaira erekari.” Ikara atoko pininiã, apanakini iuaã auakani imarotariko pite apiatakari pininiãua. ¹¹ Àtikaka kãkiti txari: “Nota apiari nitxaua.”

Txamari Teoso txariko: “Poiãori itxaua.” Ātipekana txari: “Nota poiãori nitxaua.”
Txamari Teoso txariko: “Iua apiari itxaua.”

¹² Xesosi txari ikemaïtxitakiri:

—Kiiniri pikamakasaaki, kona pikemaïtxitapiri pinirimane, pitariakori, paõkimaneri, paapoko takote auakani, katxineiroteni pakini, ninoa iuaïkana kemaïtxitinii pite ïkapani. Ininiã ikara atoko ninoa ïkitxitai. ¹³ Apiaerekata kiiniri pikamakasaaki, pikemaïtxitari kãkiti minakati mauakiniti, mokirini, matïpokotakati pakini. ¹⁴ Ikara atoko pininiã, Teoso sikari erekari pitemoni, kotxi ninoa liposotari kiiniri ikaminina, iuaritika kãkiti erekarini iuaïkana õkitikasaakiaua, iusaaki Teoso ïkitxitaiko pite —itxa Xesosi sãkire.

Kiiniri Mitari Pirena
(Mateo 22.1-14)

¹⁵ Ininiã äti Xesosikata nipokotakari kenakotari ikara Xesosi sãkire. Ininiã iua txari:

—Teoso auïtetxi ininiãtaãua sikani nipokotako iuaã. Ininiã iusaaki Teoso sikapox-
okonitana —itxari.

¹⁶ Ininiã Xesosi apakapapireta. Ia atoko itxa:

—Kiki kiiniri kamakari kemaïtxitari itomaneri kãkiti. ¹⁷ Nipokori iposopeka in-
akasaaki, iokanatarari initiri ikemaïtxitakinimoni: “Masa kiinirimoni. Iposopekari
imakinika nipokori,” itxa.

¹⁸ —Txamari ikemaïtxitakini kamari äti sãkiretxi kiinirimoni imasikanina ïkapani.
Ininiã kemaïtxitakori txari: “Nota amotari itixi. Iua ninireka natini. Ininiã !niposotari
nisini kiiniriã,” itxa.

¹⁹ —Ininiã äti: “Nota amotari tesi kema auïte parïkauatakani. Ininiã nota sari
ninoamoni. Ninireka nimarotiniri ninoa parïka. Pauiritano nisini ninoamoni,” itxa.

²⁰ —Ātipekana: “Nota ïtanorouatape. Nïtanoro auano nota. Ininiã kona niposota nisini
pikiiniritemoni,” itxa.

²¹ —Ininiã initiri kanapiriã iauïtemoni. Ikinipoko ikemaïtxitakini sãkire isãpireta
iuamoni. Ininiã iusaaki iua auïtetxi naiataua. Ininiã ipaniãtari initiri: “Sitatxi auakari
kimaporitiã pisa. Katima pitxako. Piminana kãkiti minakati mauakini, matïpokotakani,
mokirini pakini pimina,” itxari. ²² Ininiã katimaritika ikamari ikinika auïtetxi paniãtak-
iti. “Nikamapekari ikinika pipaniãtakiti, txamari auapanika nipokori. Apakatapanika
kãkiti nikini ïkapani,” itxa.

²³ —Ininiã iuaïkana, iua auïtetxi paniãtari sitatxi mapara õtako isini. “Iuaã pakiritana
kãkiti inini, naapoko kãkiti xãpokini ïkapani. ²⁴ Atãopitikara nitxai: ‘Mitxi nikemaïtxi-
takini !inikapaniri nikiena,’ ” itxa.

Xesosi Moianari Pininiua
(Mateo 10.37-39)

²⁵ Äti õti itomaneri kãkiti moianatarari Xesosi. Ininiã ikirioka sãpireta itxana ia
sãkiretxiti:

²⁶ —Nota kinirão moianataka hinakasaaki, apiata hïtiretanoko nota. Merepanika
hïtiretanoko nota, eereka hïtiretanoko hïri, hinoro, hïtaniri, hïtanoro, hïtari, hïtaro,
hamarite pakini. Hïteka apaka poião hïtiretauako. ²⁷ Nota kinirão moianataka hi-
nakasaaki, notakata hïsa. Himamïteenekakanisaakiri himisiritiko nota ïkapani, ininiã
!apakata himoianatinino.

²⁸ —Hinirekiniãri aapokotxi mitari sitatxi auakari atoko hïkamini, merepanika hïx-
inikaroko txineiro aapokotxi kamiko karone. Atxiïti !apakata hïtxineirote. Atxiïti
apakata. Ikara atoko hïxinika merepanika. ²⁹ Ikara maxinikati merepanika !ixinikari,
ininiã atxiïti itakari itsota, ininiã eereka txineiro !luaika, ininiã kona apakata imakinika
ikamini. Ininiã apanakini napetari iua. ³⁰ Ininiã ninoa txari: “Hãtamatariko ikamakiti.
Iua kiki potorikamari ïkora aapoko, txamari liposotari imakinika ikamini.” Ikara atoko
itxanako. Ininiã pikamakiti apisapanika iteene hïxinikariko.

³¹ Ininiã eereka Xesosi sãpiretari äti sãkiretxi:

—Auïtetxi auari tesi mio sotato. Iua nirekari neenamatzxi ikamini äti auïtetxikata.
Txamari äti auïtetxi auari vïtxi mio sotato. Iua tesi mio sotato auakiti merepanika

xinikari, atxiĩti iposota ineenamauatini vĩtxi mio sotatokata? Atxiĩti auĩtetxi vĩtxi mio sotato auakiti xipokari iua? Ininiã apisapanika ixinikari. ³² Imaposotakaniãri, vĩtxi mio sotato õtakopanika auakasaaki, iua auĩtetxi tesi mio auakiti iokanapireta ãti auĩtetximoni isãkirauatinina ĩkapani, neenamtxi xipokini ĩkapani.

³³ —Erekari iua auĩtetxi neenamtxi takanapakari atoko hinini. Ininiã merepanika hãkixinireẽ hĩxinikariko: “Nota nirekatari nimoianatiniri Xesosi, kotxi pasãpaniri?” hĩtxa. Atão hinirekiniãri himoianatinino, ininiã imakinika hĩtakanapako notakata hĩsini ĩkapani. Himanirekakaniãri hĩtakanapiniri imakinika, ininiã !apakata himoianatinino. Ininiã hĩxinikariko merepanika —itxa Xesosi.

Iõkira Matxoato Pirena
(Mateo 5.13; Marko 9.50)

³⁴ —Iõkira peerekaro. Omatxoaniã, lotxaika. Aua kãkiti iõkira potxoaro atoko inakani, ininiã erekapitikana ninoa. Apanakini kãkiti iõkira matxoato atoko itxana. !Kakamarena ninoa. ³⁵ Iõkira matxoato ininiã, !apakata takari sikakienatiko ĩkapani. !Apakata hĩkoketiniri kipatxikata, pirãtxi tikakata takari sikakienatiko ĩkapani. Kona erekaro. Maparamoni oõkapeẽkaika. Ikara atoko itxa apanakini, kotxi ninoa !kakamarena.

—Kakenakokii hĩte, ininiã hĩkenakotariko ia nisãkire.

15

Soti Auĩte Ereẽkokakari
(Mateo 18.10-14)

¹ ãti õti auĩtetxiakori txineirote apakapakani, apanakini maerekati kamakani apaka apotiitaua Xesosi sãkire ikenakotinina ĩkapani. Ninoa kaiãopoko. ² Iusaaki pariseoakori, kaiõkatsopareriakori pakini misãkirepiretari Xesosi. Itxana:

—Iua apakapari maerekani. Maerekanikata inipokota —itxana.

³ Ikara isãkirena xika Xesosi sãpiretari ipi, ãti pakini sãpirenatxi atão inakari oerekiko. ⁴ Ia atoko itxa Xesosi:

—Atxiĩti pite aua seĩ soti auĩte. ãti pĩpinanakiniã, kipa pikama? Pitakanapari apanakini mapara inipokotiniãtaã apanakini nĩkatini ĩkapani. Ininiã eereka pisari pĩpinanakakari pinitini ĩkapani. ⁵ Papokasaakiri iua pĩpinanakakari, pipoxokoniua. Piporikiãpotari pipira paapokomoni. ⁶ Papokaãka atoko pakiritana paõkimaneriakori, apanakini kãkiti pakini. Pitxana ninoa: “Hĩpoxokoniuatoko notakata, kotxi napokapekari nipira pĩpinanakakari,” itxa soti auĩte pitikiri.

⁷ —Nisãpiretai hĩte, ãtika maerekati kamakari takanapakasaakiri imaerekani, iaxiti Teoso auiniãtaã auakani poxokoniuatapitikako. Atxiĩti novẽta novi kãkiti iuikakanuia txari: “Peerekaua ate. !Akamari maerekati,” itxana. Txama kona atão isãkirena. Ninoa sãkire kona kamari iaxitikini poxokoniuatini —itxa Xesosi.

Ota Pirata Kamakoro Ereẽkokakaro

⁸ Apikomoni Xesosi txari:

—Sito aua tesi ota pirata kamakoro. Pakaronero. ãto ereẽkokiniã, ininiã onitakasaakiro oiopotokakari tirikapi. Oiatĩkaãpotari oaãpoko ota onitaãpotini ĩkapani. ⁹ Oa apokasaakiro, apanakini oãkirita: “Hĩpoxokonauatako notakata. Napokapekaro ota ereẽkokakaro,” otxa.

¹⁰ —Kãkiti poxokoniua ota pirata kamakoro apokikosaaki. Nisãpiretai, iaxiti Teoso nitiriakori apiapoxokoniua, ãti maerekati kamakari imaerekani itakanapakasaaki —itxa Xesosi.

Imi Ereẽkokakari Pirena

¹¹ Apikomoni Xesosi txari:

—Aua kiki. Ipi imiakori. ¹² Maneri takari amanaãri iri. Itxari: “Ninirekari pitakanapakito pipikasaaki pisikini notamoni uatxa,” itxa. Ininiã iri xanakari inakiti imiakorimoni. ¹³ Eereka mapaõti inaka atoko, iua ãtokori apotiitari iri sikakiti. Ininiã eereka isipeka. Õtakoxiti ãti tixini isa. Iuaã maerekati ikama. Iuaã xipoka itxari iri sakiniri.

¹⁴ —Ikinika ixipoka iuaã. Iuasaaki ãparaã likipa. Natxipokoni auari. Nipokori !auari. Ininiã iuasaaki iua minakati !auari. Imakinika xipope. ¹⁵ Ininiã iuaxiti auakarimoni isa, parikatxi amanaini ikapani. Ininiã ipatrãote paniãtari irariakori isikakienatini. ¹⁶ Irariakori isikakienatakasaaki, natxinoka itxa. Iuasaaki iua nirekari irariakori kiena inikini, kotxi iua sikakienatakari !auari.

¹⁷ —Iuasaakiika ixinikari iri aapoko: “Niri nitiriakori aua nipokori. Nipokori itetakori auapitika. Uai natxinoka txapeno nota. ¹⁸ Nikanapiriãko niri aapokomoni. Nitxariko niri: ‘Maerekati nikamapeka Teosomoni, pitemoni apaka. ¹⁹ Kona pamarite na pitxaikanoko, kotxi !erekano. Pitxikitakano pinitiri nininiua.’ Ikara atoko nitxariko niri,” itxa. ²⁰ Ininiã iua aiamata, kanapiriã itxa iri aapokomoni. Iuasaaki iri iãtapanãtari iua ikiniõtika.

—Ininiã iua apokaãpotakasaaki, õtakopanika, iri atapari iua. Ininiã iri miteẽkata iuamoni. Ininiã iteene ipoxokoniua. ²¹ Iuasaaki imi txari iri: “Niri, maerekati nikamapeka Teosomoni, pitemoni apaka. Kona pamarite na pitxaikanoko, kotxi !erekano.”

²² —Iuasaakipeka iri akiritari initiriakori: “Katima hĩtxako, mãkatxi ereri himinini. Aneo ereri hĩtakako iuakokimoni. Ikiti mata hĩtakako ikitiã. ²³ Kema auĩte kiĩri hõkako. Kiĩniri makamako. Manipokota. Mapoxokoniua, ²⁴ kotxi ia namarite ipĩkari atokopeka, uatxa iuaĩkana ikanapiripeka. Mitxi pĩpinanakakari atoko itxa, uatxa apokapeẽkaika,” itxa.

—Ininiã iuasaaki ninoamoni ipoxokoniuatini apopeka.

²⁵ Ninoa kiĩniritauatakasaaki, imi aneẽkari tokoriã iparĩkauanãta. Ikanapiriãkasaaki aapokomoni, ikenakotari xikari, serẽkatxi ene pakini. ²⁶ Ininiã akiritari iri nitiri: “Kiripa ikara?” itxari. ²⁷ Iri nitiri apakapapireta: “Pitari apoka. Ininiã piri paniãtari kema auĩte okiko, kotxi erekapanikari pitari. Kona monõkori apoka iuamoni. Erekari ikanapiriini,” itxari.

²⁸ —Ininiã ikara ikenakotakasaaki, inaiataua. Kona inirekari ãroini kiĩniriã. Ininiã iri iuamoni sa itxa. Akiritari: “Pĩĩroã,” itxari. ²⁹ Ininiã iua apakapapiretari: “Itori mitaãti niparĩkauatinapekai. Txama kona nota sipikapiretari pisãkire. Iuaritika kona pisikano potxi ãkiri nimoianariakorikata kiĩniri nikamini ikapani. ³⁰ Iua pamarite xipokari pitxineirote. Sitokata isirĩka. Txama ikanapiriãkasaaki, pokari kema auĩte. Kiĩniri pikama iua ikapani.” Ikara atoko itxitari iri.

³¹ —Iri apakapapireta: “Namarite, ãtipirika pauapika notakata. Ikinika nota nakiti pite nakiti txaua. ³² Erekapitikari kiĩniri nikamini apoxokoniuatini ikapani, kotxi pitari ipĩkari atokopeka itxa. Uatxa auapanika. Pĩpinanakakari uatxa apokapeka,” itxari.

16

Nitiritxi Kamisirienereri

¹ Xesosi sãpiretana imoianariakori:

—Kiki ito tiitxi aua. Iua nitiri nĩkatari ikinika ipatrãote nakiti. Apanakini sãpiretari iua kiki, initiri iouanatiniri itxineirote. ² Ikara atoko ininiã, iua akiritari initiri: “Nikenakopiretari pite misirienetinino nota. Ininiã piminari tiitxi piamotiitini tsopa. Ikara pisikasaakino, niokanatai pisini. Kona apikomoni piparĩkauataika nota ikapani,” itxa.

³ —Ininiã initiri ãkixinireẽ: “Kipa nikama uatxa, kotxi nipatrãote paĩtiki iokanatano. !Kataparano nota, ininiã !niposotari atokatxi patapi niparĩkauatini. Nipẽtauata txineiro maxikatĩika namanainiri kãkiti. ⁴ Uatxaika nimarotari nikamakiti tĩkane. Ininiã niparĩka xipokasaaki uai, kãkiti apakapapanikano nota ninoa aapokoã,” itxa.

⁵ —Ininiã akiritana kãkiti ipatrãote maĩkitxitakani. Ininiã ipimaãri ãti: “Kipakinipa ! pĩkitxitapanika nipatrãotemoni?”

⁶ —“Seĩ kopiti iĩtxi auakiti kona niĩkitxitapanika,” itxari.

—Ininiã iua nitiritxi txari: “Pikosekari pimaĩkitxitakiniti tsopa. Pitakari sĩkoẽta kopitinoka,” itxari.

⁷ —Ininiã äti ipatrãote maïkitxitakari ipimaã: “Kipakinipa kona piïkitxitapanika nipatrãote?”

—Iua apakapapiretari: “Seï atarokiri kotarina,” itxa.

—Itxari iua: “Pimaïkitxitakiniti tsopa pikoseka. Oitêta kotarinoka pitaka,” itxa. Ikara atoko ikama ninoa ïkapani, ininiã iparïka itakanapaka atoko, ninoa apakapari iua ninoa aapokoã.

⁸ —Ininiã iua patrãote ikara imarotakasaaki, itsorïkaãta: “Ari, ninitiri paimatireri. Maerekati ikama, iuaritika ikamakasaakiri, paimatireri iua,” itxa.

—Teoso säkire mauïäkani imarotapitikari ixinikinirina parïkatxi katana ikamakitina. Atxiïti Teoso säkire auïäkani !imarotari ixinikinirina parïkatxi katana ikamakitina.

⁹ Nisãpiretai hïte, ïkorapokoriti häuakasaaki, hïxinikari ikara nitiritxi. Hïsikari hïtiti, hïtxineirote pakini Teoso parïka ïkapani, Teoso mimarotakani atão inakari imarotina ïkapani. Eereka atxiïti Teoso mimarotakani moianatai. Eereka ninoa apaka imarotari aïri iaxitikiri. Eereka äti õti haõkitana ninoa iaxiti.

¹⁰ —Axapitiki parïkatxi atão pikaminiã, ininiã kãkiti auikariko piposotiniri parïkatxi apiatakari pikamini apaka. Axapitiki piïtiriuata mitxi, ininiã eereka kaiãori piïtiriuata.

¹¹ Txineiro uaimonipokoriti auakari himimarotakaniãri hinïkatini, ininiã kona hïposotari hinïkatiniri erekari Teoso sikakiti. ¹² Apanakini tii pimanïkatakaniã, ininiã kona kãkiti sikai tiitxi pinakiti inini ïkapani.

¹³ —!Apakata kãkiti parïkauatini ipi iauïtena ïkapani, kotxi atxiïti äti omanata, äti itireta. Atxiïti äti apokaerekata, äti inorita. Iua atokokana kãkiti kona posotari iparïkauatini tiitxi ikinipoko iamotini ïkapani, Teoso ïkapani iparïkauatakasaaki. !Apakata piauïtetiniri Teoso, txineiro piauïtetakasaaki —itxa Xesosi.

Teoso Säkire Maxipokakani

(Mateo 11.12-13; 5.31-32; Marko 10.11-12)

¹⁴ Pariseoakori ikara ikenakotakasaakina, inapetarina Xesosi, kotxi ninoa iteene potxitaro txineiro. ¹⁵ Ininiã Xesosi säkirauata ninoamoni:

—Hïte txa apanakinimoni: “Ate !ikeroka. Peerekaua ate,” hïtxa hïsäkire. Txama Teoso imarotari häkixinire. Kãkiti uãkatari erekari hïkamini, txama Teoso omanatari hïkamakiti.

¹⁶ —Kitxakapirïka kãkiti auikari Teoso säkire Moisesimoni sikakori, Teoso säkire säpiretakani säkire pakini. Xoão kapatxisareri apoka. Iuasaaki Teoso iokanapirena erekari auïtetxi ininiãua säpiretaãka. Itomaneri iteene nirekari isini Teoso auïtetxi ininiãtaãua ïroini.

¹⁷ —Teoso säkire !ixipoka. !Ixipoka axapiti. Auapika imakinika isãkire. Itixi, iaxiti pakini xipokapitikako, iuaritika Teoso säkire lixipoka.

¹⁸ —Teoso säkire iõkatakori kitxakapirïkari auapanika uatxa. Ininiã ïtanorotxi asikakari äto itakini ïkapani inakari, maerekati ikama. Apaka sito takanapakoro takakari maerekatikanera ikama. Ikara Teoso säkire auapanika. Kona ixipoka ikara —itxa Xesosi.

Katiiri, Arásaro Pakini

¹⁹ Xesosi säkirauatapanika. Ia atoko itxa:

—Aua kiki katiiri. Peereri imãka. Põkamarari imãka. Apiaerekata imãka. Ikiniõtika peerekari ikiena. Imakinika iua auakiti peerekari. Iua aapoko ikiniõtika kiinirisaaki auakari atoko itxapika ikiena.

²⁰ —Äti kiki Arásaro inakori. Pamatinaniri. Minakati !auinari iua. Iua sirïka katiiri aapoko patapi koa. Amianari aua iuamoni. Ininiã iïto imakinika kakaro. ²¹ Kinirão nika inakasaaki, ixiti okakorinoka inika. Iuaã anãpa amerokari ikaro.

²² —Ikara atoko ininiã, eereka ipïpe. Ininiã eereka Teoso nitiriakori iaxitikini anikari iua Teoso auinimoni. Kitxakapirïka Apraão sari iuaã. Iuaã iua Arásaro aõkitari Apraão.

—Eereka iua katiiri apaka ipïpe. Ikataãka. Isari maerekani misiritikoãtaã. ²³ Iuaã maerekani misiritikoãtaã auakasaaki, õtakoxiti atamatari Apraão, Arásaro pakini.

²⁴ Ininiã akiritari Apraão: “Toti Apraão, piamonïkano. Pipaniãtariko Arásaro iãkiniri iuakoki iaã, tapikaka itxa ninamamoni. Ia xamina sikatsiitapitipono,” itxa.

²⁵—Apraão apakapapireta: “Pixinikariko kãkitikata pauakasaaki, kaiãori pitii aua pitemoni. Arásaro auakasaaki, kona minakati auari iua. Arásaro auakasaaki, amianarinani, natxinani pakini auari. Uatxa iua poxokoniuanãtakasaaki, pite atatsiitari pimisiritiko. ²⁶Patamata ereẽ sauana auĩte. Kona ate posotari hĩtemoni asini. Hĩte apaka kona posota uaimoni hãpokini,” itxa Apraão.

²⁷—Iuaĩkana katiiri: “Toti, pikenakotano. Pipaniãtariko Arásaro niri aapokomoni isini. ²⁸Iuaã aua siko nitariakori maneripanika inakanuia. Isãpiretanako: ‘Kona erekari uai. Erekari ia misirikaretxi auiniãtaã imĩkanina. Ininiã uatxa ikamarinako Teoso sãkire paniãtakiti,’” itxa katiiri.

²⁹—Ininiã Apraão: “Ninoamoni auape Teoso sãkire, Moisesini sãpiretakiti, apanakini Teoso sãkire sãpiretakani sãpiretakiti apaka. Ininiã pitariakori posotari ikenakotinirina ninoa sãkire,” itxa Apraão.

³⁰—Ininiã katiiri txari: “Toti Apraão, ikara atokonani !apakata. Ipĩkari kanapiriiniã ninoamoni, iusaakiikarako itakanaparina imaerekanina.”

³¹—Ininiã Apraão: “Pitariakori !auikari Moisesini sãkire, apanakini Teoso sãkire sãpiretakani sãkire pakini. Ipĩkari kanapiriiniã ninoamoni, iuaritika ninoa !auikari Teoso sãkire. Ikara atoko ininiã, kona nipaniãtari Arásaro isini ninoamoni,” itxa Apraão.

Ikara atoko itxa Xesosi sãpiretakiti.

17

Maerekati Oerekakari

(Mateo 18.6-7, 21-35; Marko 9.42)

¹Xesosi txari imoianariakorimoni:

—Aua maerekati oerekakani. Ninoa kãkiti kamari maerekati. Ikara atoko inakani apokapitikako. Ninoa xika kãkiti kamari maerekati. Maerekati oerekakari misiritaãkapitikako. ²Teoso omanatari kãkiti maerekati oerekakani. Kãkiti txĩkitakiniãri amarini nota sãkire auĩãkari maerekati ikamini !apakata. Erekamariko iua kãkiti maerekati oerekakari kai mitariã iaxirikanokitaãkamako, ipoa apanĩkakiã okaãkamako ipinini ãkapani. ³Erepaniko. !Pikamapiriko maerekati. Pitari Xesosi sãkire auĩãkari kaminiãri maerekati pitemoni, põtãkikariko, imaerekani itakanapini ãkapani. Itakanapiniãri, !pixinikapinikari ikara maerekati ikamakiti. ⁴Atxiĩti ãti õti iua kamari maerekati pitemoni. Eereka iua pitemoni apoka. “!Erekari nikamakiti pitemoni. Pimaxinĩkaretariko maerekati nikamakiti. !Nikamaikari,” itxa. Ininiã ãkora õti iuaĩkana maerekati ikama pitemoni. Iuaĩkana amanaãi imaerekani pimaxinĩkaretini tĩkane. Atxiĩti ãkora õti setxikata ikara atoko ikama pitemoni, ininiã pimaxinĩkaretariko ikinika maerekati ikamakiti —itxa Xesosi.

Xesosi Sãkire Auikiko

⁵Xesosi iokanatakini txari Xesosi:

—Pitxĩkitakaua ate apikomoni aãuikiniri Teoso sãkire —itxana.

⁶Ininiã Xesosi txana:

—Mostata iki axapitiki. Mostata iki atokokana nisãkire poião hãuikiniã, iuaritika hĩposotapitikari hĩpaniãtiniri ia uasini aamina: “Pikotsakatika pimaporokauako. Ipoamoni pitakauako.” Ininiã ikamapitikariko pisãkire iaõka —itxa Xesosi.

Nitiritxi Parĩka Pirena

⁷Xesosi txari:

—Pinitiri tokoriã parĩkauatakari, pipiraakori inĩkatakari, apokasaaki paapoko, kona pitxa: “Pinipokota, pitomata.” Kona ikaraatoko pitxa. ⁸Pitxari: “Auapanika parĩkatxi. Nipokori pikaminano. Xipoka atoko psikakienatano. Piãtapari nota nipokotini, ininiã eereka pite nipokota.” Ikara atoko pitxa pinitiriakorimoni. ⁹Pipaniãtakitinanira ikama, ininiã kona pitxa: “Erekapitikari piparĩka,” kotxi pipaniãtakitinani ikama.

¹⁰—Ininiã iua atokokanera itxa ikinipoko Teoso paniãtakiti pikamakasaaki. Kona apakata: “Erekapitikano nota,” pinini. Ia atoko atão pinini: “Nitiritxinani nitxaua. Poiãori nitxaua, kotxi niauĩte paniãtakitinani nikama.”

Xesosi Makananitinina Paiaka Matatakani

¹¹ Xerosareëmoni Xesosi sikasaaki, inapari Samaria tōpa. Ipinimoni auari Kariréia tōpa. ¹² Āti aapokotxi apokaāpotakasaaki, aōkitana tési kikiakori amianatakani paiaka matatakani. ¹³ Ikira atoko akiritarina:

—Xesosi, koerekareri, piamonīkaua ate —itxana.

¹⁴ Xesosi atamatakasaakina, ipaniātana ninoa Moisesini paniātakiti iaōka ikaminina, sasetotximoni isinina, iūtona oerekinina īkapani.

—Sasetotximoni hīsako. Hōerekariko hīto iuamoni —itxa Xesosi.

Iuamoni isaāpotakasaakina, ikinipoko ninoa erekapeka itxana. ¹⁵ Ninoa amianatakani erekapeka, txamari ātinani kanapiriā Xesosimoni. Itapararitika akirita:

—Peerekari Teoso —itxa iua paiaka matatakari.

¹⁶ Ininiā ikapotoreēkaua Xesosi apisatoō.

—Notamoni pikamakiti peerekari —itxa.

Samaria tōpakiri iua kiki. ¹⁷ Ininiā Xesosi txari:

—Nota makananitana tési kikiakori. Ītapari apanakini? Auapanika novi kikiakori nimakananitikini. ¹⁸ Ia kiki Samariakiri. Ianokara kanapiriā, “Peerekari Teoso,” inini īkapani. Ninoa Xoteo iua atoko litxana —itxa Xesosi sākire.

¹⁹ Ininiā itxari iua Samariakiri:

—Pōkitikauako. Pisako. Pite auikari nisākire, ininiākara erekapekai —itxa Xesosi.

Kanatokopa Itxa Teoso Auītetxi Ininiātaāua?

(Mateo 24.23-28, 35-44)

²⁰ Āti ōti pariseoakori pimaāri Xesosi:

—Kirisaaakipa Teoso ikinimane auīte inini ōti apokatako? —itxana.

Ininiā Xesosi apakapapiretana:

—Teoso auītetxi inakasaakia, kākiti !atamataru iua apokini. Teoso kākiti auīte inakasaaki, iua kākiti ākixinireē apoka. ²¹ Iuasaaki kākiti !akiritari: “Uaikarari Teoso auītetxi ininiātaāua. Ikiraārari Teoso auītetxi ininiātaāua.” Ikara atoko !itxana, kotxi hīxinire ākirari Teoso auītetxi ininiātaāua —itxa Xesosi.

²² Ininiā itxa imoianariakorimoni:

—Apokako āti ōti nota hītari iaxitikiri iteene kinirāo hātamardini. Txamari !hātamano. ²³ Apanakini sāpiretaiko hīte: “Ikiraārari iua.” Āti sāpiretari: “Uaikarari iua.” Iuasaaki kona himaākatapiri ikara atoko inakari sākiretxiti. !Hāuikapiri ikara atoko inakari. ²⁴ Hītari iaxitikiri kanapiriākasaaki, mēkokari ātiātaā potorikini, ātiātaā apokini, iua atokokana nikanapiriini. Katimaritika napokako. Mēkokari atoko nitxako napokini. Iuasaakiika ikinimane kākiti atamano. ²⁵ Nikanapiriini apisapanika, nota hītari iaxitikiri iteene ninikoriāriko nimisiritiko, kotxi kākiti uatxa auakani kona nirekano. ²⁶ —Nota hītari iaxitikiri kanapiriākasaaki, Noe auakasaaki atokokana itxapaniko. ²⁷ Noe auakasaaki, ikinimane nipokota. Iāta. Ītanorouata. Ikara atoko itxapikana. Āti ōti Noe, inirimanekata maporo āki iiroāna. Eereka imaiātapakinitipanika āparaā kipakata. Xāpoākata. Ininiā xirataātxi xipopena ikinimane. Ikara atokotxikana itxako nota kanapiriākasaaki.

²⁸ —Aroo inakori auakasaaki atokokana itxako nota kanapiriākasaaki. Iuasaaki ikinimane nipokota. Iātana. Iamotiitana. Isikatiitana. Itakarauatana. Aapokona ikamana. ²⁹ Sotoma sitatxiti Aroo potorikini ōti, iuasaakipeka xamina āparaā kipini atoko itxa ikatxakini. Xamina miniki katxaka. Ininiā ikinipoko iuaātaā ariākata.

³⁰ —Iuasaaki kākiti !imarotari xamina katxakini ōti. Iua atokokana kākiti !imarotari nota hītari iaxitikiri apokini ōti. ³¹ Napokini ōti haāpoko mapara hāuiniā, kona hīkanapiripe haāpokomoni hīti hāpini īkapani. Tokoriā hāuiniā, kona !hīkanapiripe haāpokomoni. !Apakata hīkanapiriini iuaā. ³² Hīxinikaroko Aroo ĩtanoro. Kona oa atoko hītxape, kotxi oa ipina, kotxi !onirekari otakanapiniri sitatxi maerekani auiniātaā.

³³ —Pite ātipirika kaminiāri piteka nireēkitinoka, ininiā pinireēkiti xipokapitikako pitekata. Pite nireēkiti xipokiniā, nota sākire pauikini xika, pite auapininiika txako Teosokata.

³⁴ —Nikanapiriākasaaki, ia atoko itxako. Nikanapiriini iñanōkati atxiīti ipi kākiti imakanāta imakiniātaāna. Iuasaaki Teoso sākire auiākari sari notakata. Teoso sākire mauīākati kaikota.

³⁵ —Iuasaakiko atxiīti ipi sito kamanātari atarokiri. Teoso sākire auiākaro sari notakata. Teoso sākire mauīākato kaikota.

³⁶ —Iuasaakiko atxiīti ipi kiki kikio parīkauata. Āti sa notakata, āti kaikota —itxa Xesosi.

³⁷ Ininiā imoianariakori pimaāri:

—Namoniparako? —itxana.

Ininiā iua apakapapiretana:

—Aātamatakasaakiri maiori apotiitiniātaāua, ikinimane imarotari ipīkari iuaātaā auini. Iua atokokana ikinimane atamatariko kākiti apotiitiniua notakata nikanapiriākasaaki —itxa Xesosi.

18

Sito, Kākiti Misiritiko Mereēkari Pakini

¹ Xesosi misākiretari imoianariakori āti sāpirenatxi atāo inakari oerekiko, Teoso misākiretiko pirena. Ikara inakari oerekari kākiti ātipirika imisākiretiniri Teoso, Teoso misākiretiko imatakanapakani iñapani. ² Xesosi sāpiretari ia sākiretxiti:

—Sitatxi auari kākiti misiritiko mereēkari. Iua kona paxitari Teoso. Kona ipaxitari kākiti apaka. ³ Iuaā sito apaka aua. Ōtaniri ipīpe. Tikinitakoro otxaua. Oa nirekari iua atāo ikamini oa misiritakarimoni. Txamari iua kākiti misiritiko mereēkari !ipotxitari omokaiakari pirena ikenakotini. Osāpiretapikari iuamoni: “Pikenakotariko nisākire. Pikamariko atāo nota misiritakarimoni. !Nimīteenekaikari nota misiritakari apikomoni misiritinino,” otxa.

⁴ —Isāpakapekari ātipirika osākire ikenakotini. Ininiā eereka ixinikari: “Atāopitikara, kona nota paxitari Teoso, kākiti pakini. Iuaritika nikamariko onirekakiti, kotxi ⁵ ātipirika oa tikinitakoro amanaānātano, ininiā nikamaākaretxitaro. Ininiā nikamariko onirekakiti, kotxi nisāpakapekaro osākire. Ātipirika ikara atoko otxanātapikano. ! Nimīteenekaikari,” itxa kākiti misiritiko mereēkari.

⁶ Ininiā Xesosi txana imoianariakori:

—Ikara kākiti misiritiko mereēkari kona erekari, iuaritika ikamari osākire iaōka.

⁷ Teoso apiaerekata. Ininiā ikenakotapitikari imereēkini sākire pokamara, iñanōka. Ninoa amanaāri Teoso imoianatinina. Ininiā apiata Teoso kenakotari isākirena. Patimari Teoso kenakotiniri imereēkini amanaākiti. ⁸ Nisāpiretai, patimari Teoso misiritinina ninoa misiritakani. Ia nipimaāi. Nota hītari iaxitiki iuaīkana nikanapiriākasaaki, atxiīti napokari nisākire auiākani iñapani? —itxa Xesosi.

Pariseo, Txineiro Apotiitakari Pakini

⁹ Iuikakaniua !apokaerekatari apanakini. Ninoamoni, ninoanokara kamari atāo. Āti ōti Xesosi sāpiretari ia sāpirenatxi atāo inakari oerekiko, kākiti ikara atoko inakanimoni atāo imarotinina iñapani:

¹⁰ —Ipi kiki sari Teoso misākiretiko aivotimoni. Āti kiki pariseo itxaua. Āti kiki auītetxiakori txineirote apakapakari itxaua. Iteene iua misiritari kākiti, kotxi kākitimoni imakatzakaro apikomoni txineiro. Kona atāo imakatzaka. Imisiritari kākiti. ¹¹ Iuaā pariseo tima Teoso imisākiretini iñapani. Txama iuaka imisākiretaua. Ia atoko itxa isākire: “Teoso, nota poxokopitikano, kotxi nota apanakini atoko kona nitxa. Kiītiriri !nitxaua. Kākiti misiritakari kona nitxaua. Kona nota sirīka āti iñanorokata. Kona nota ia txineiro apakapakari atoko na nitxa. Konapitini. ¹² Ikini semanati, ipi ōti nitakanapari ninikini pite nimisākiretini iñapani. Txineiro nisikai. Tesi txineirota auiniāno, ātoka nisikai, ininiā pipaniātakiti iaōka nikama,” itxa iua pariseo.

¹³ —Iuasaaki txineiro apakapakari ikira atoko itima. Kona ionakaāta iaxiti. Iaritari itorota imaerekani oerekini iñapani, kotxi maerekati ikamapeka. Itxari Teosomoni: “Teoso, piamonīkano. Kona erekano nota, kotxi maerekati kamakarino nota,” itxa txineiro apakapakari.

¹⁴ Ininiã Xesosi txari:

—Atãopitikara nisãkire. Ikara inakari kiki Teoso kamaerekata. Isikasaaki iua apokomoni, erekari itxapekaua. Iua pariseopekana, Teoso likamaerekatari iua.

—Iuikakariua, poiãori itxauako. Poiãoripekana, apiatakari itxauako —itxa Xesosi.

Amarini Apokini Xesosimoni

(Mateo 19.13-15; Marko 10.13-16)

¹⁵ Æti õti kãkiti minari amarini Xesosimoni erekari ninoamoni itakini ïkapani. Txamari Xesosi moianariakori atapakasaakiri kãkiti imiakori mïkani, isipikapana.

—Hïkanapiripeka. Hïsipeka —itxana.

¹⁶ Txamari Xesosi txari imoianariakori:

—Hãuiritanako amarini notamoni apokini. !Hïsipikapapena amarini, kotxi nitiretapitkana ninoa. Nisãkire auïãkani auikari nisãkire amarini auikini atoko. Kãkiti nisãkire amarini auikini atoko inakaninokara apoka Teoso auïtetxi ininiãtaãua. ¹⁷ Amarini auikari iri sãkire. Ininiã hïxinikariko ia: Amarini atoko himinakaniã, Teoso sãkire iteene himauikakaniã, ininiã Teoso auïtetxi ininiãtaãua !hïroã —itxa Xesosi.

Kiki Katiiri Pirena

(Mateo 19.16-30; Marko 10.17-31)

¹⁸ Xoteo auïte pimaãri Xesosi:

—Koerekareri erekari, kiripa nikama Teosokata ãtipirika nauini ïkapani? —itxa.

¹⁹ Xesosi txari iua:

—Kininiãpa “erekari,” pitxano? Kãkiti erekari !auari. Teosonanira erekari. ²⁰ Pite imarotapitikari Teoso paniãtakiti: “!Pisiriãkape ãti ïtanorokata. !Pokaniuatape. !Piïtiriuatape. Apanakini !pimisirienetape. Piri, pinoro pakini pipaxitako.” Ikara atoko pimarotapeka —itxa Xesosi sãkire.

²¹ Ininiã iua kiki apakapapiretari:

—Nota axapitipanika ninakasaaki, nikïpitari ikara atoko inakari sãkiretxiti Teoso paniãtakiti —itxa.

²² Xesosi kenakotakasaakiri iua kiki sãkire, itxari:

—Auapanika ãtinoka pikamini tikane. Ikinika pitii pivëtxitako, eereka oa txineiro pisikanako minakati mauakinimoni. Eereka pisa notakata. Ikara atoko inakari pikaminiã, Teoso tixine papokasaaki ikinipoko erekari auiniiko pite —itxa Xesosi sãkire.

²³ Iua kiki ikara ikenakotakasaaki, imatinaniuata, kotxi iua iteene katiiri itxaua.

²⁴ Xesosi atamatakasaakiri iua matinaniuatini, itxari:

—Pamimari katxineiroteri auïtetiniri Teoso. ²⁵ Atauako kamero napatari ãkorike sonakiã? Apia mimari kãkiti katxineiroterini auïtetiniri Teoso —itxa Xesosi.

²⁶ Ikara inakari kenakotakani txari:

—Pamimari pisãkire. Ininiã kiripa apoka Teoso auiniãtaã? —itxana.

²⁷ Ininiã Xesosi txana:

—Kãkiti maposotakiniti Teoso posota ikamini —itxa Xesosi.

²⁸ Ininiã Petro txari:

—Ate takanapapekari ikinipoko pitekata asini ïkapani —itxa.

²⁹ Ininiã Xesosi txari:

—Atãopitikara, ininiã ia atoko nitxai hïte. Pauini pitakanapiniã, pïtanoro, pitariakori, piri, pinoro, pamariteakori pakini pitakanapiniã, Teoso auïtetxi ininiãua pirena pisãpiretini ïkapani, ³⁰ ininiã ïkorasaaki apiata erekari papakapa. Ininiã ãti õti pipïkasaaki iaxiti papokasaaki, pauapininiika pitxako —itxa Xesosi.

Iuaïkana Xesosi Sãpiretari Ipinini

(Mateo 20.17-19; Marko 10.32-34)

³¹ Æti õti Xesosi anikari imoianariakori ikira atoko, misãkireta itxana:

—Uatxa Xerosareëmoni asa. Kitxakapiriã Teoso sãkire sãpiretakani sãpiretapekari nota hïtari iaxitikiri pirena. Ninoa sãkire iõkatsopatakinitina païtiki apokapitikako,

³² kotxi nisikaãkako Xoteo minakonimoni. Ninapetaãkako. Nimisãkirepiretaãkako. Nikiisokaãkako. ³³ Niaritaãkako. Eereka nokaãkako. Ipi, ãti pakini õtisaaki iuaïkana nõkitikaua —itxa Xesosi.

³⁴ Xesosi moianariakori limarotari isäkire. Ikara sãkiretxi kipatakori atoko itxa. Ininiã kona ninoa imarotari isäkire.

*Mõsiãreti Xesosi Makananitini
(Mateo 20.29-34; Marko 10.46-52)*

³⁵ Xesosi apokaãpota Xerikoo sitatxiti takote. Mõsiãreti kimapori tiniãpo iitopãkanãta. Amanaãnãtaro txineiro. ³⁶ Ikenakotari kãkiti kimaporiã napakani, ininiã: —Kiripa ikara? —itxa.

³⁷ —Xesosi Nasaree sitatxitikiri, iuara napaãpota —itxana apanakini.

³⁸ Ininiã iua mõsiãreti akirikata:

—Xesosi, Taviini apika mekanirii, piamonĩkanoko —itxa.

³⁹ Ninoa ìkiikakani txitari iua:

—!Pakiripoatape —itxana.

Txama iteene iua akirikata iuaĩkana:

—Taviini apika mekaniri, piamonĩkano —itxari.

⁴⁰ Ininiã Xesosi iotoka. Amanaãna kãkiti:

—Ere kiki himina notamoni —itxa Xesosi.

⁴¹ Xesosi takote apokasaaki, Xesosi pimaãri:

—Kipa pinireka nikaminii pitemoni?

—Kõsiãrepeka ninini ninireka —itxari.

⁴² Ininiã Xesosi txari:

—Kõsiãrepekai uatxa, kotxi pauikari nisäkire —itxa.

⁴³ Iuasaakipeka iua kiki kõsiãrepeka itxa. Ininiã iua saãpota Xesosi tikini. Teoso ereka inini pirena isãpireãpota. Ikinimane kãkiti itikasaakiri Xesosi kamakiti iuamoni.

—Peerekari Teoso —itxana.

19

Sakeo Pirena

¹ Xesosi Xerosareẽmoni isikasaaki, Xerikoo sitatxiti apanĩkaki inapaãpota. ² Iuaã aua kiki, Sakeo inakori. Iua katiiri. Iua kãkiti txineirote apotiitakari auĩtetxiakori ìkapani. Apanakini txineiro apotiitakani auĩte itxaua. Iua misirienetari kãkiti. Imakatzakari txineiro auĩtetxiakori ìkapani. Txamari apikomoni imakatzaka. Kona atão ikamakiti. !Erekari iua.

³ Xesosi apokasaaki Xerikoo, iua Sakeo nirekari Xesosi atamatini. !Apakata atamatiniri, kotxi paĩtiri iua. Itomaneri kãkiti Xesosi ìtinikata auanãta. Ininiã !apakata mõtãnoti atamatiniri iua. ⁴ Ininiã imiteka Xesosi apisa, aaminaã kanĩka itxa. Xesosi iuaã napakasaaki, iposotari itikiniri. ⁵ Xesosi apoka iua aamina patapi. Ionakaãta itxa. Itxari: —Sakeo pikatzaka, katima pitxa. Uatxa, paapokomoni nisako, nianapokotini ìkapani —itxa Xesosi.

⁶ Ininiã katxaka katimapeka itxa. Ipoxononiritika iua apakapari Xesosi. ⁷ Ikinimane iuaã auakani misãkirepiretari Xesosi. Itxana:

—Xesosi sari maerekati kamakari aapokomoni. Kininiãpa iua sa iua aapokomoni? —itxana.

⁸ Ininiã iua aapoko apoãka atoko, Sakeo tima isãkirauatini ìkapani. Ininiã itxari Xesosi: —Ipixini ninakiti nisika matiinimoni. Niĩtirĩkakiti iuaĩkana nisikanako kãkiti. Txineiro niĩtirĩkiniã, ininiã iuaĩkana ipi ipi pakinikata nisikariko nimisiritakinimoni —itxa Sakeo.

⁹ Ininiã Xesosi:

—Ia kiki Apraão apika mekaniri apaka. Uatxa imaerekani makatzakaãka, kotxi itakanapari maerekati ikamakiti. ¹⁰ Kãkiti itari iaxitikiri apoka ìkorapokoriti kãkiti pĩpinanaãkani inisini, imaerekani imakatzakini ìkapani —itxa Xesosi.

*Nitiritxi Erekari, Nitiritxi Maerekati Pakini
(Mateo 25.14-30)*

¹¹ Eereka Xesosi sãpiretari ia sãpirenatxi atão inakari oerekiko. Oerekari ia sãpirenatxi, kotxi Xerosareẽ ninoa apokaãpota. Kãkiti uãkatari paĩtiki Teoso ikinimane auĩte ininiua. ¹² Ia atoko itxa:

—Kiki aiamatapeka õtakoxiti isini, auĩtetxi ininiua ãkapani. Iua nirekari isini, ininiã eereka inirekari ikanapiriini. ¹³ Ininiã isini apisapanika akiritari tesi initiriakori. Isikanapana txineiro tesi ota oro kamakoro. Ætoka isikaãpotana initiriakori. Itxa: “Nota ãtiãtaã nauakasaaki, hiamotari tiitxi. Eereka pivẽtxitari apikomoni txineiro hãpakapini ãkapani. Ikara atoko hĩtxako,” itxa.

¹⁴ —Ispeka atoko kãkiti iuaã auakani linirekari iua auĩtetxi ininiua, kotxi omanatarina. Ininiã ninoa iokanapireta iuamoni: “Ate !nirekai pite aãũte pininiua,” itxana ninoa.

¹⁵ —Iuasaaki iua ãtiãtaã auĩtetxipeka itxaua. Ikanapiriãkasaaki akiritana initiriakori, txineiro isikanapakini. Ininiã iua txana ninoa: “Hõerekano txineiro apikomoni hãpakapakito,” itxa. ¹⁶ Æti initiri apoka iuamoni. “Nĩpatrãote, pite sikanapano ãtoka ota. Uatxa tesipeka ota aua notamoni,” itxa.

¹⁷ —Iuasaaki auĩtetxi txari iua: “Pite kamakiti peerekari. Pite ninitiri erekari. Ætonoka ota nisikapekai, iuaritika piparĩka peerekari. Uatxa tesi pakini sitatxiti auakani auĩte pitxauako,” itxa.

¹⁸ —Ãtipekana apoka auĩtetximoni: “Æti ota pisikanapano nota. Uatxa sĩkopeka ota aua notamoni,” itxa initiri.

¹⁹ —Ininiã auĩtetxi txari: “Erekapitikari. Ininiã sĩko pakini sitatxiti auakani auĩte pitxauako,” itxari.

²⁰ —Ãtipekana apoka auĩtetximoni: “Oniã pinakito txineiro. Mãkatxi mataã niapirikaro, poteta nitxaro pitxineirote. ²¹ Nota pĩkai pite. Pataparaxinirei. Nimarotari pite amotari ãti kamakiti. Piamotari pikiena ãti kãkiti kiena,” itxa.

²² —Ininiã iua auĩtetxi apakapapiretari: “Pite ninitiri maerekati pitxaua. Pite txano nota kiki kataparaxinireri nitxaua. Pimarotari niamotiniri ãti kamakiti. Pimarotari niamotiniri ãti kãkiti kiena. ²³ Ikara atoko ininiã, pimanirekakaniãri piparĩkauatini, kinirepa kona pisikataro nitxineirote pãkomoni? Pisikaãkamaroko, napakapamaroko apikomoni nitxineirote nikanapiriãkasaaki,” itxa auĩtetxi.

²⁴ —Ininiã iua paniãtana iuaã auakani: “Himakatxakaroko nitxineirote iuamoni nisikakito. Hĩsikaro tesi ota auakitimoni,” itxa.

²⁵ —“Auapeka tesi ota iuamoni,” itxarina.

²⁶ —Ininiã auĩtetxi apakapapiretana: “Piparĩkauatiniã, ininiã pinakiti itori aua, ininiã apikomoni papakapa. Pite iarinouatiniã, ininiã ikara xika pinakito poião. Æti õti piarini xika ikara poiãori makatxakaãkako apaka. ²⁷ Uatxa himinana notamoni nimokaiakariakori, kotxi ninoa !nirekano nota iauĩtena nininiua. Hõkana ninoa nota apisatoõ,” itxa auĩtetxi.

Xesosi Xerosareẽ Apokaãpotini

(Mateo 21.1-11; Marko 11.1-11; Xoão 12.12-19)

²⁸ Ikara inaãka atoko, Xesosi sari imoianariakori apisa Xerosareẽmoni. ²⁹ Xerosareẽmoni isikasaakina, apokaãpotana Petxipaxee, Petãnia pakini aapokotxiti. Ninoa ipi aapokotxi Oriva inakori xirata takote. Iuaã auakasaaki, Xesosi iokanatanana ipi imoianariakori aapokotximoni.

³⁰ —Ikira aapokotximoni hĩsa. Iuaã hãpokariko xomẽta ãkiri, iaxiriãkori. Iua xomẽta ãkiri kãkiti maitopãkakotipanika inakori. Hĩkoxiripatakariko iua. Himinari notamoni. ³¹ Ipitikiri akiritiniãi: “Kinirepa hĩte koxiripatakari nipira?” inakasaakii, ia atoko hĩtxariko: “Apiananiri nirekari iua,” hĩtxako —itxana.

³² Iuaã apokasaakina, ikinika Xesosi sãkire iaõka auapeka. ³³ Ninoa koxiripatakasaakiri xomẽta ãkiri, ipitikiri apoka.

—Kinirepa nipira hĩkoxirika? —itxa.

³⁴ Ininiã ninoa:

—Apiananiri nirekari iua —itxana.

³⁵ Ininiã anikarina xomêta âkiri Xesosimoni. Imoianariakori takari imâkana xomêta nopini. Imoianatarina Xesosi xomêta nopini iitopâkini îkapani.

³⁶ Xesosi saãpotakasaaki Xerosareêmoni, apanakini kâkiti matameêkari imâkana kimaporiãpo Xesosi napini îkapani. ³⁷ Ôtanoxiratari Oriva inakori iokiriîtakasaaki, ninoa imakinika ipoxokoniritikana akiripoakatana, kotxi itikapekarina itori Teoso posotiire.

³⁸ —Peerekari auîtetxi, Apiananiri iokanatakiti kâkitimoni. Teoso takari erekari iuamoni. Ininiã Teoso !omanataikari kâkiti. Peerekari Teoso, iaxiti apiko nopinixiti auakari. Apiananiri itxaua —itxanâtana ninoa iuasaaki.

³⁹ Iuaã kâkiti itomaneri sauaki aua pariseoakori apaka. Ninoa txari Xesosi:

—Koerekareri, piotokakana pimoianariakori ikara isâkirena.

⁴⁰ Ininiã Xesosi:

—Atão ninoa akiritakiti. Ininiã !nipinitana iotokakiniri. Nimauiritakaniãna isâkirena nota Apiananiri nininiãua, ininiã Teoso txîkitakari kai soro sâkirusatini ikara sâkire isâpiretini —itxa Xesosi.

Xesosi Txiapata Xerosareêkini Itiretini

⁴¹ Ninoa apokaãpotakasaaki Xerosareê, Xesosi Xerosareê atamatakasaaki, iua txiapata, kotxi iuaã aua mirikiniti kâkiti isâkire mauikakani. ⁴² Ixinikasaakina Xerosareê auakani itxa:

—!Himarotari hîkamakiti tîkane hãuini ereka inini îkapani, neenamtxi mauakani îkapani. Ninirekari himarotini, txamari uatxa ikara himarotini kipataãka himimaro-takaniri îkapani. ⁴³ Âti ôti himokaiakarini âkitai hîte. Ininiã kona kâkiti pokîka sitatxi, kona îroã. Iuasaaki himitekini lauari. Hâkitapeêkaikako. ⁴⁴ Himokaiakarini xipokariko ia sitatxi. Ikinimaneko okaãkako. Kai âti kai nopini auakari !ikaikotaika. Imakinika xipope. Iua atoko inakari auako, kotxi hîte !apakapari Teoso hîtemoni apokasaaki.

Pirãtxi Vêtxitakani Omitikiko

(Mateo 21.12-17; Marko 11.15-19; Xoão 2.13-22)

⁴⁵ Xesosi apokasaaki Xerosareê, isari Teoso misâkiretiko aikotiã. Iuaã auari kâkiti tiitxi vêtxitakani, ininiã Xesosi omitikana. ⁴⁶ Xesosi txana ninoa:

—Teoso sâkire iõkatsopatakori txari:

Ia naapoko, “Teoso misâkiretiko aikoti” akiritaãkako, itxa. Txamari hîte txîkitakari ia aiko kiîtiririni iomaãtiniãtaã ininiua —itxa Xesosi.

⁴⁷ Teoso misâkiretiko aikoti âki ikiniõtika oerekarauata. Iuasaaki sasetotxi auîteakori, kaiõkatsopareriakori, kâkiti auîteakori pakini kinirão okaka txari Xesosi. ⁴⁸ Txamari itomaneri kâkiti potxitari Xesosi oerekakiti sâkiretxiti. Ininiã ninoa kaikotapika Xesosikata ikinika isâkire imarotiniãna îkapani. Ikara xika !iposotarina okiniri iua iuasaaki.

20

Xesosi Paniãtakari Moerekakoni

(Mateo 21.23-27; Marko 11.27-33)

¹ Xesosi Teoso iokanapirena erekari isâpiretakasaaki Teoso misâkiretiko aikoti âki, iuasaaki sasetotxi auîteakori, kaiõkatsopareriakori, kâkiti auîteakori pakini apoka.

² Ninoa pimaãri Xesosi:

—Pite omitikana tiitxi sikakani Teoso misâkiretiko aikotiã auakani. Kipaniãpa pikamari îkora pikamakiti? Kipa paniãtai? —itxana.

³ Ininiã Xesosi txana:

—Nota apaka pimarauatako hîtemoni. Âtinoka nipimaãiko hîte. Ininiã hãpakapapiretano. ⁴ “Kipa paniãtari Xoãoni ipatxisarauatini? Teosokani paniãtari Xoão? Kâkitikani paniãtari Xoão?” —itxa Xesosi.

⁵ Eereka ninoakakariniãna isâkirauatana:

—Kanatokopa atxa? “Teosora,” aniniã, ininiã ipaniãtamaua eereka: “Kinirepa kona hãuikatari Xoão sâkire?” itxamaua ate. ⁶ “Kâkitira paniãtari Xoão,” aniniã, ininiã kâkiti kiporonakauako ate kai soroã, kotxi ninoamoni Xoão Teoso sâkire sâpiretakari itxaua. Ininiã kanatokopa atxa? —itxakakauana.

⁷ Ininiã eereka ninoa apakapapiretari Xesosi:

—Kona ate imarotari —itxana.

⁸ Eereka Xesosi txana:

—Ininiã nota apaka kona nisãpiretai nipaniãtakiri uãka —itxa Xesosi.

Parĩkauatakani Maerekani

(Mateo 21.33-46; Marko 12.1-12)

⁹ Eereka Xesosi sãpiretari kãkiti ia sãpirenatxi atão inakari oerekiko. Ia atoko itxa:

—Aua kiki. Itakari amãtiiri ova inakoro. Ovanoka itaka ikikioteẽ. Eereka iĩkitxitana kãkiti itakare nĩkatakani. Eereka isari ãti tixini. Iuaã mapakanani ikaikota. ¹⁰ Oamiko manapi iokanatarari initiri apakapiniri ipixini amãtiiri. Txamari amãtiiri nĩkatakani noropatarari iua nitiri. Ininiã eereka iokanatarina iua. Kona axapiti amãtiiri anika ipatrãotemoni. ¹¹ Ininiã iuaĩkana ãti initiri iokanata. Iuaĩkana ninoa noropatarari iua initiri. Imisiritarina. Eereka iokanatarari iua. Kona axapiti amãtiiri anika ipatrãotemoni. ¹² Iuaĩkana ãti initiri iokanata ikikiotemoni. Iuaĩkana ikarotarina, iokanata itxarina. Kona anikari axapiti amãtiiri iuamoni. ¹³ Iua katakareri txari: “Kipa nikamaã? Ari, uatxa nimarotapekari. Namarite nitiretakiti niokanatako ninoamoni. Ninoa paxitapitikariko iua,” itxama.

¹⁴ —Amãtiiri nĩkatakani atapari amãtiiri takakari ãkiri apokaãpotini. Ininiã itxana: “Katakareri ãkiri ina. Katakareri ipĩkasaaki, iua ãkiri apakapari ikinika. Ininiã maõkari iua. Ininiã ikinika itakare aua atemoni,” itxana.

¹⁵ —Ininiã ninoa kosekaĩtotari katakareri ãkiri, mapara okaĩtota itxarina. Ininiã okapirina.

Ininiã Xesosi pimaãri kãkiti iuaã auakani:

—Kiripa iua katakareri kamaã? ¹⁶ Iua okanako ikinipoko ninoa. Itakare apanakinimoni sika itxako —itxa Xesosi.

Kãkiti kenakotakasaakiri ikara pirena itxana:

—Ikara atoko inakari !anireka —itxana ninoa.

¹⁷ Ininiã Xesosi iteene atamatana.

—Ininiãkara natokopa itxa Teoso sãkire iõkatsopatakorari oerekiniua?

Aapokotxi kamakani kona nirekari ãtika kai soro. Iua kai imanirekakiniti kai apiari itxapekaua. Apanakini kai soro maĩkakari itxaua.

Itxa Teoso sãkire iõkatsopatakorari. ¹⁸ Kãkiti mãkititiniã ikora kai xika, ikarotaãka. Ìkora kai irikiniã kãkiti nopini, pomoĩpeka itxana. Ininiã eereka aãpani itxaua —itxa Xesosi.

Homano Auĩte Ìkitxitiko

(Mateo 22.15-22; Marko 12.13-17)

¹⁹ Iuasaaki Xesosi sãkirauatakasaaki, sasetotxi auĩteakori, kaiõkatsopareriakori pakini, nirekari maĩkiniri Xesosi, okinirina ìkapani, kotxi ninoamoni ikara Xesosi sãpiretakiti oerekari kãkiti ninoa nirekiniri okiniri Xesosi. Txamari !imaĩkarina, kotxi ipĩkarina apanakini kãkiti. ²⁰ Ikiniõtika ninoa itikapikarina Xesosi sinimoni imarotinina ìkapani. Ininiã ninoa iĩkitxitari kamĩkapirirerini Xesosi imisãkiretinina ìkapani. Ninoa nirekari Xesosi kerokiniri isãkire. Ikerokiniãri, iposotarina anikiniri auĩtetxiakorimoni okinirina ìkapani. ²¹ Ininiã ninoa kamĩkapirirerini apoka Xesosimoni.

—Koerekareri, ate imarotari atãopitikara pisãkire. Pite oerekari ikinipoko kãkiti atão Teoso nireẽkiti kamiko. Poerekakiti sãkiretxiti kãkiti apiarinimoni, iuatxikana poerekari kãkiti poiãorini. ²² Atãokani txineiro asikini Homanoakori auĩtemoni, Sesa inakorimoni? Apakata amasikakaniro iuamoni? —itxana ninoa.

²³ Xesosi imarotari ninoa nirekari ikerokiniri isãkire, ininiã iua txana:

—Kinirepa hãtamakaerekatano nota? ²⁴ Poerekano txineiro ota. Kisanõkapa ia? Kiuãkapa aua uai? —itxa.

Ininiã ninoa:

—Sesa sanõka, iuãka apaka aua —itxana.

²⁵ Ininiã Xesosi:

—Hĩsikariko Sesamoni iua nakiti. Hĩsikariko Teosomoni iua nakiti —itxa Xesosi.

²⁶ Ninoa nirekari Xesosi kerokiniri isäkire kākiti apisatoō, txamari !ikerokari. Ininiã ninoa tsorīkaãta Xesosi apakapapiretakiti ikenakotakasaakina. Apikomoni !isäkirau-ataikana.

Ipīkari Ōkitikiniua Mauikakoni
(Mateo 22.23-33; Marko 12.18-27)

²⁷ Ikara inaãka atoko, apoka satoseoakori inakoni. Satoseo kona auikari ipīkari iuaĩkana ōkitikiniua. Ninoa misäkiretari Xesosi. ²⁸ Itxana:

—Koerekareri, kitxakapirīka Moisesini iōkatsopataria atoko inakari: “Kiki meenetipanika ipininiã, iua itari takaroko tikinitakoro. Iua itari keene ininiã, itakauãkatari amarini iua itarini ipīpekarini uãka,” itxa Moisesini. ²⁹ Setxi itaritxiakori aua mitxi ĩkorapokoriti. Apia kiomanetakari ĩtaniriuata. Meenetipanika ipina. ³⁰ Itari takaro iuani tikinitakito. Iua apaka ipina meenetipanika. ³¹ Iuaĩkana ãti itari takaro oa. Iuaĩkana ipina meenetipanika. Iua atokotxikana itxana imakinikana itariakori. ³² Eereka oanipekana opīpe apaka. ³³ Ipīkani ōkitikasaakiua, kiripa oĩtaniri? Kotxi ikinikana takapekaro oa —itxana.

³⁴ Ininiã Xesosi:

—Uatxa ĩkorasaaki kākiti ĩtaniriuata. ³⁵ Teoso nakitiakori iuaĩkana ōkitikasaakiua, ! ĩtaniriuataikana. ³⁶ Ninoa lipinaika, kotxi Teoso nitiriakori iaxitikini atoko itxauanako. Iuasaaki Teoso anaakori atoko itxauana, kotxi Teoso ōkitikapekana ninoa. ³⁷ Hīte kerokari hīsäkire. Hīte säkire txari: “Ipīkani !ōkitikaikaua.” Moisesini oerekaua ipīkani iuaĩkana ōkitikapanikaua. Iua iōkatsopatakasaakiri aamina tirinakari pirena, isāpiretari Teoso sāpiretakiti. Ia atoko itxa Teoso iuasaaki: “Nota Apraão Teosone, Isaki Teosone, Xakoo Teosone pakini nitxaua,” itxa Teoso. ³⁸ Ininiã ninoa Apraão, Isaki, Xakoo auapanika, kotxi Teoso !ipīkani Teosoneni. Auãki inakani Teosonera iua, kotxi iuamoni ikinimane auãkipanika —itxa Xesosi.

³⁹ Eereka ãtikaka kaiōkatsopareriakori txari:

—Koerekareri, atãopitikara pisäkire —itxana.

⁴⁰ Ikara inaãka atoko kākiti pīkarauata apikomoni ipimarauatini.

Teoso Mereēkiti Tavii Apika Mekaniri Itxaua
(Mateo 22.41-46; Marko 12.35-37)

⁴¹ Ininiã Xesosi pimaãna:

—Kinirepa isāpiretaãka Teoso mereēkiti Taviini apika mekaniri ininiua? ⁴² Kotxi Taviini iōkatsopata Xikari aãtsopateē. Itxari:

Apiananiri txari niauĩtemoni: “Nota kikomoni piitopãka.

⁴³ Piitopãkiniritika nixipokariko pimokaiakariakori. Nikamariko ninoa pikiti pitakiniã-taã atoko ininiua.”

Itxa Taviini xikare. ⁴⁴ Taviini akiritari Teoso Mereēkiti “Niauĩte.” Ininiãkara kanatokopa iua Tavii apika mekaniri? —itxa Xesosi.

Kaiōkatsoparerini Maerekani
(Mateo 23.1-36; Marko 12.38-40)

⁴⁵ Eereka kākiti apisatoō Xesosi ōtãkikana imoianariakori. ⁴⁶ Ia atoko itxa:

—Erepaniko, kaiōkatsoparerini misirienetini. Ninoa ieretakari mākaxi ĩtanori, peereri, apanakini atamatinina ĩkapani. Tiitxi amotikoãtaã ninoa potxitari kākiti ninoakata sãkirauatini apanakini atamatinina ĩkapani. Ninoa potxitari iitopãkinina auĩtetxi topãkiniãtaã aiko ãki Xoteo apotiitiniãtaãua. Kiinirisaaki ninoa nirekari apiari topãkiniãtaã iitopãkinina. ⁴⁷ Kiki ipīkasaaki, ninoa misiritaro tikinitakoro. Ninoa mixirikari oaãpoko, iuaritika imisäkiretarina Teoso. Teoso imisäkiretakasaakina, kaiãori sãkiretxi isäkiretana. Ininiã apanakini kenakotakasaakiri, ninoa xinikari: “Atão iua imarotari Teosokata isãkirauatini,” itxana. Txamari Teoso kamaãkaretxitana, ininiã apiata imisiritaãkanako.

21

Tikinitakoro Matxineiroto Sikakito
(Marko 12.41-44)

¹ Xesosi sākirauatakasaaki Teoso misākiretiko aikoti āki, itikari katiirini takiniro itxineirotena kaixa āki Teoso ĭkapani. ² Iuasaaki oāua tikinitakoro matiito. Ōtaniri ! auai. Oa sikaro ipi txineiro ota okinika oamoni auakaro. ³ Ininiā Xesosi txa:

—Atāopitikara, okira sito sikari apiata. ⁴ Kotxi apanakini sikaro itxineirotena itetakito. Okira sikari okinika onakito —itxa Xesosi.

Teoso Misākiretiko Aikoti Irikiko
(Mateo 24.1-2; Marko 13.1-2)

⁵ Āti ōti Teoso misākiretiko aikoti āki aua Xesosi imoianariakorikata. Aiko ereri pirena isākirenātana.

—Uai peereri. Ere kai sorokiniri paretxiā auakari pakaronepokori. Patamatari kākiti sikakiti Teosomoni —itxana.

⁶ Ininiā Xesosi txana:

—Ari atāopitikara peerekari. Txamari apokapitikako āti ōti ia aiko irikiko ĭkapani. Iuasaaki kai āti kai nopini auakari !auaika. Ikinipoko irikaākako —itxa Xesosi.

Misirikaretxi Apokaenetini
(Mateo 24.3-14; Marko 13.3-13)

⁷ Ininiā ninoa pimaāri:

—Koerekareri, kirisaakipa ikara atoko inakari auapani? Kiātokopa itxa ia aiko Teoso misākiretiko irikini ōti manapi aimarotini ĭkapani —itxana.

⁸ Ininiā Xesosi apakapiretana:

—Erepaniko, xipokatxi ōti apokaāpotakasaaki, kākiti nirekari imisirienetini hīte. Ito aāpirena auako. Kaiāopokori kiki sākire: “Teoso mereēkitikarano nota. Nota apokapeka uai,” itxamana. Paxirari ninoa sākire. !Himaākatapena ninoa. !Himoianatapena ninoa. ⁹ Neenamatiene hīkenakoenetakasaaki, !hīpīkarauatape. Iua atoko inakari merepanika auako. Iuasaaki xipokatxi ōti !apokapanika —itxa Xesosi.

¹⁰—Āti uāka kamari neenamati āti uākakata. Āti auītetxi sotatoneakori neenamauata āti auītetxi sotatoneakorikata. ¹¹ Iuasaaki xipokatxi ōti apisa, nota apokini apisa, itixi iakeēkatakato. Natxi auako. Itori amianari auako. Apaka kākiti amatakiti iaxiti kamapīkaretana.

¹²—Ikara inakari apisa, apanakini maīkaiko hīte. Himisiritaākako. Xoteoakori anikaiko aiko Xoteo apotiitiniātaāua Xoteoakori auīte apisatoō apoītiniina ĭkapani. Hītakaāka kateia āki. Ninoa anikaiko hīte itixi auakani auīteakorimoni hīte apoītinina ĭkapani. Iua atokokanerako hinaākako nisākire hāuikini xika. ¹³ Iuasaaki auītetxiakori apisatoō hāuakasaaki, hīsāpiretariko Teoso iokanapirena erekari. ¹⁴ Ninoa himisākiretini apisa, maerekaxiniretika !hītxape. Kona hīpīkarauatape, ¹⁵ kotxi ninoa apisatoō hāuakasaaki, nota sikaimaroretai hīte, ininiā himokaiakariakori !iposotari apakapiretiniina hīte. !Iposotarina isāpiretiniina: “Kona atāo pisākire,” !itxana. ¹⁶ Hinoroma, hīrima, hītariakorima, apanakini hinirimanema, haōkimanerema pakini sikaiko hīte himokaiakariakorimoni. Ātikaka hīte okaākako iuasaaki. ¹⁷ Ikinimane omanataiko hīte nisākire hāuikini xika. ¹⁸ Iuaritika Teoso !auritari ātika hiāko maporokiko, kotxi Teoso iteene nīkatapitikaiko hīte. ¹⁹ Himīteenekiniāri ikinika himisiritiko, ininiā Teoso txīkitakaiko ātipirika iuakata hāuapiniika hinini ĭkapani —itxa Xesosi.

Xerosareē Xipokiko Pirena
(Mateo 24.15-28; Marko 13.14-23)

²⁰ Apikomoni Xesosi txari:

—Hātamatakasaakiri sotatoakori ākitiniri Xerosareē, iuasaaki himarotariko pakotapaniri sitatxi xipokini. ²¹ Iuasaaki hīte Xotēia tōpa auakani himitekako oxiratarimoni. Sitatxi hāuiniā, ininiā himitekako. Mapara hāuiniā, kona hīkanapiripe sitatximoni, ²² kotxi iuasaaki kākiti misiritiko ōti apoka. Teoso sākire iōkatsopatakori sāpiretapekari

ikara òti apokini. ²³ Iuasaaki !erekapaniri sito kamixiro ìkapani, kaxitakarero ìkapani, kotxi omitekini !apakata. Xoteo auiniãtaã auapitikako iteene imisiritikona tìkane, kotxi iuasaaki Teoso oerekari iua omanãkare Xoteoakorimoni. ²⁴ Itomaneri kãkiti okaãkako saasara atoko inakaroã. Apanakini anikaãkako ikini uãka tixinemoni. Xoteo minakaniuua xipokariko sitatxi Xerosareẽ. Teoso auiritana ninoa kaikotini iuaã. Eereka Teoso xipokariko ninoa tapara. Eereka !auaikana —itxa Xesosi.

Kãkiti Itari Iaxitikiri Kanapiriini

(Mateo 24.29-31; Marko 13.24-27)

²⁵ Apikomoni Xesosi txari:

—Nota uai apokini apisa, atokatxi, kasiri, iõriki pakini oerekariko kãkiti nota iposope uai napokini. Apaka potxoari uiniti auari tsakati mitari. Iua tsakati miramaneri iene. Ikara xika itixi auakani kamaxirexinirepeka itxanako. ²⁶ Kãkiti ãkipa iotokako ipìkare xika. Itixi misiritiko xika ipìkarauata, kotxi iõriki, ikinika iaxiti auakani iakeëkatakato. ²⁷ Iuasaaki nota, hõtari iaxitikiri katxakaãpota katxiãrikata. Iuasaaki ikinimane atapanoko nota. Iuasaaki kaposotiireno nota. Niotximerekata napoka uai. ²⁸ Ikara itixi misiritiko apokaãpotakasaaki, haiamatakato. Hionakaãtako, kotxi paõtiki nota kanapiriã hite napini ìkapani. Iuasaaki nimakatzakai hite ikinika maerekati auiniãtaã —itxa Xesosi.

Piko Mina Pirena

(Mateo 24.32-35; Marko 13.28-31)

²⁹ Xesosi sãpiretari ãti sãpirenatxi atão inakari oerekiko. Itxari:

—Hìxinikari aamina piko inakori. Apanakini ãtião aamina apaka hìxinika. ³⁰ Pooïoporipeka onakasaaki, otomorekasaaki, “Kamoï apokanapanoka,” hìtxa. ³¹ Iua atokokana ikara misirikaretxi mixikanani nisãpiretakiti hìtikasaaki, iuasaaki himarotariko paõtiki Teoso ikinimane auite itxauako.

³² —Ia nisãkire atão. Itixi auakani lixipoka ikinipoko nisãpiretakiti mapokakani apisa.

³³ Iaxiti xipokapitikako. Ìkoraxiti apaka xipokapitikako. Iuaritika nota sãkire !ixipoka.

Iãtapakori Òti Pirena

³⁴ —Erepaniko, maerekaxiniretika kona hìtxape. !Hìsarauatape. !Hìpoãtape. Hìparìkanoka !hìxinikapeko, kotxi hìsarauatiniã, hìpoãtiniã, hìparìkanoka hìxinikiniã, !hìxinikari nikanapiriini òti, kotxi ìkora òti himimarotakani òtisaaki, napokako. Erepaniko, kotxi txikatoro atoko itxa napokini. Kãkiti !imarotapaniri napokini òti. ³⁵ Imakinika kãkiti itixi auakani imarotariko napokini iuasaaki. ³⁶ Hiãtapariko nikanapiriini. ãtipirika himisãkiretariko Teoso. Hamanaãriko Teoso ikara inakari mamisiritakanii hite. Hamanaãriko Teoso himapëtauatakani ìkapani hõtari iaxitikiri apokasaaki iua apisatoõ hìtimakasaaki —itxa Xesosi.

³⁷ Ikiniõtika Xesosi sari Teoso misãkiretiko aikotimoni Teoso sãkire oerekini ìkapani. Ikiniõtika mapiãnikata Xesosi sari òtanoxiratarimoni, Oriva inakorimoni.

³⁸ Ìkanõkapanika kãkiti apoka Teoso misãkiretiko aikotiã Xesosi sãkire ikenakotinina ìkapani.

22

Satanasi Ìroã Xotasi Xinireẽ

(Mateo 26.1-5, 14-16; Marko 14.1-2, 10-11; Xoão 11.45-54)

¹ Kaiamapeka Pãskoa inakori kiiniriti apokini. Iua kiiniriti Xoteoakori nikari pão matireëkati. ² Iuasaaki sasetotxi auiteakori, kaiõkatsopareriakori pakini nirekari Xesosi okinina, txamari, ninoa pìkari apanakini kãkiti, kotxi ninoa apokaerekatari Xesosi.

³ Iuasaaki Satanasi ìroãtotari Xotasi Isikariotxi inakori. Iua Xotasi Xesosi moianarika-mara, apanakinikata. ⁴ Iuasaaki iua sari sasetotxi auiteakorimoni, Teoso misãkiretiko aikoti nìkatakani auiteakorimoni. Iuasaaki isãkirauata ninoakata Xesosi imìkapiritini ìkapani. Iuasaaki ninoa xinikaxitita:

—Kiãtokopa itxatari Xesosi isikini atemoni?

⁵ Sasetotxi auñteakori enenika. Ninoa txari Xotasimoni:
—Pisikasaakiri Xesosi atemoni, aikitxitaiko pite —itxana Xotasimoni.

⁶ —Ateeneka —itxa Xotasi.
Ikara atoko inaãka atoko Xotasi iãtapari isikiniri õti manapi. Inirekari kãkiti mauakanisaaki, Xesosi imãkapiritini.

Pãskoa Kiiniriti Kamiko
(Mateo 26.17-25; Marko 14.12-21)

⁷ Iuasaaki kãkiti parĩkauata Pãskoa kiiniriti ikaminina ïkapani. Iua kiiniriti auakasaaki, itotarina pão matireẽkati inikinina. Iuasaaki okarina soti auñte ãkiri kiinirisaaki iniãkitina ïkapani. ⁸ Xesosi paniãtana Xoão, Petro pakini:

—Hĩsako. Hãpotiitariko nipokori Pãskoa kiiniriti ïkapani —itxa.

⁹ Ininiã ninoa:
—Namonipa akamatari kiiniri? —itxana.

¹⁰ Ininiã Xesosi:
—Xerosareẽmoni hĩsa. Iuaã hĩtikari kiki kaminiri sito parĩka. Iua apaãnãtari ãparaã. Kopiti ikiã anikanãta. Iua aõkitaiko hĩte. Iuakata sa hĩtxako. Hĩiroã aapokotxi iua ïroiniãtaã. ¹¹ Himisãkiretari kauiniri. Hĩtxariko iua: “Koerekareri nirekari imarotiniiri: ‘Namonipa ianapokotakani kaikotiniãtaã iriko? Iuaã inirekari inapiniri Pãskoa õti imoianariakorikata,’ hĩtxariko iua.” ¹² Iuasaaki kauiniri oerekai itanokiri koa mitari iuaã kiiniri ïkapani. Imakinika tiitxi iposope. Iuaãrako hãpotiitari imakinika Pãskoa kiiniriti ïkapani —itxa Xesosi.

¹³ Ininiã sa itxana. Apoka itxarina ikinika Xesosi sãkire iaõka. Ininiã iuaã ninoa maiamatari kiiniri.

Xesosi ïto, Iarẽka Pakini
(Mateo 26.26-30; Marko 14.22-26; 1 Korĩto 11.23-25)

¹⁴ Ininiã Pãskoa kiiniriti potorikasaaki, Xesosi imoianariakorikata topãka. ¹⁵ Ininiã Xesosi txana:

—Iteene ninirekari hĩtekata ninikiniri ia nipokori Pãskoa kiiniritisaaki, natatsiirauatini apisa. ¹⁶ Ia atoko inakari nipokori !ninikaikariko hĩtekata. Teoso ikinimane auñte inakasaakiaua, iuasaakiikarako ninikapitkariko iuaĩkana.

¹⁷ Eereka iua kosekari iãtatxi koana ovaã iãriãti. Ininiã itxa:

—Niri, erekapitikari ia pisikakiti —itxari Teoso.

Eereka itxana imoianariakori:

—Ia iãriã hãpakapako. Hĩkinika hiãtariko. ¹⁸ Atão nisãpiretai. !Niãtaikaroko ovaã, Teoso ikinimane auñte iminakanisaakiaua. Teoso ikinimane auñte inakasaakiaua, iuasaakiikarako iuaĩkana niãtariko ovaã —itxa Xesosi.

¹⁹ Eereka ikosekari komiri:

—Erekapitikari ia komiri pisikakiti atemoni —itxari Teoso.

Eereka imapixinikaãpotari, sikaãpota itxana imoianariakori:

—Ia niĩto okaãka hĩte ïkapani. Ia komiri hinikasaaki, hĩxinikanoko nota. Hĩxinikari nipinini hĩte ïkapani.

²⁰ Inikaãkarina atoko, ikosekaro ovaã. Isikana imoianariakori. Ininiã itxa:

—Ia niarẽka xiketakariko makatxakariko hĩte maerekani. Teoso sãpiretapekari kãkiti ikamaenetakiti amaneri kãkiti ïkapani. Ia niarẽka oerekari kãkiti, Teoso kamapekari ikamaenetakiti. ²¹ Iua nimãkapiritakiri uatxa uai topãka notakata. ²² Nota hĩtari iaxitikiri okaãkako. Teoso sãkire iõkatsopatakoriko sãpiretapekari nipinini tĩkane. Nota hĩtari iaxitikiri mĩkapiritakari iteene misiritaãkako —itxa Xesosi.

²³ Xesosi moianariakori ninoakakarika isãkirauatana:

—Kipa sikatari Xesosi imokaiakariakorimoni? —itxanãtana.

Kiripa Apiatakari?

²⁴ Ikara atoko inaãka atoko Xesosi moianariakori misãkiretakakaua.

—Kiripa apiatakari txatapaniuako ate sauaki? —itxana.

²⁵ Ininiã Xesosi:

—Xoteo minakaniua auíteakori itapasākireritika ipaniātana Xoteo minakaniua iauītena nireēkiti ikaminina ikapani, iuaritika ninoa sākire, “Peerekaua ate. Ate moianatari kākiti,” itxana. ²⁶ Hīte kona ninoa atoko kona hītxape. Atxiīti apiari pitxaua hīte sauaki, ininiā amarini atoko pitxauako. Auītetxi pininiāua, nitiritxi atoko pitxauako. ²⁷ Kiripa apiatakari txataua? Auītetxi nipokori nikakarikani, apiatakari txatauako? Initiri nipokori kamakarikani apiatakari txatauako? Ikinimane kākiti imarotari nipokori nikakari apiatakari itxaua. Txamari nota auakasaaki kākiti sauaki, nitiritxi atoko nitxaua, kotxi kākiti nimoianata.

²⁸ —Xoteoakori misiritakasaakino nota, kona hīte takanapano. Atāo nimoianariakori hītxaua. ²⁹ Niri, auītetxi txīkitakapekano nota. Ininiā iua atokokana nota txīkitakai hīte auītetxi hininiua. ³⁰ Nota auītetxi ninakasaaki, hinipokota, hiāta hītxako notakata. Auako auītetxi topākini hīte ikapani. Ininiā iusaaki hīpaniātana tosi nirimanetxi Isaeo auakani ikamakitina tīkane —itxa Xesosi.

Xesosi Sāpiretari Petro Kipatiniri Iua
(Mateo 26.31-35; Marko 14.27-31; Xoão 13.36-38)

³¹ Xesosi sākirauata Simão Petromoni:

—Simão, Simão, Satanasi amanaāpekari Teoso pite, apanakini apaka atamakaerekatini ikapani. Ahoisi misiritiko atoko inirekari imisiritinii pite. ³² Iuaritika, nota misākiretapekari Teoso isikataparatiniri pixinire Simão, nisākire atāo pauikini ikapani. Pikerokariko pikamakiti, iuaritika pikanapiriāpitika nota sākire iteene iuaīkana pauikini ikapani. Eereka pisikataparaxiniretanako pitariakori nota sākire auīākani —itxa Xesosi sākire.

³³ Petro txari Xesosi:

—Niauīte, nota iposope nitxa kateiamoni nisini pitekata. Pitekata iposope nitxa nipinini —itxa.

³⁴ Xesosi txari:

—Atāo nisāpiretai. Ia ikanōkati patari sākirauatini apisapanikako, ipi āti pakinikata, “!Nimarotari iua,” pitxanoko —itxa Xesosi.

Xesosi Ōtākikana Imoianariakori

³⁵ Eereka iuaīkana Xesosi sākirauata imoianariakorikata:

—Mītxi nota iokanatai kākitimoni. Iusaaki kona nisikai txineiro. Kona nisikai sako mata. Kona nisikai sapato, iuaritika minakati auinii atxiīti? Erekari hīsini ikinika hinirekakiti mauakanisaaki? —itxa Xesosi

—Minakati !auinua ate —itxana.

³⁶ Ininiā Xesosi txana:

—Txamari uatxa pitxineirote, sakora pakini auiniāi, panika. Iouata mitaro mauakanisaakii, pimāka inopinikiri pivētxitako iouata piamotini ikapani. ³⁷ Teoso sākire iōkatsopatakori kitxakapirīka txari:

Imaīkaāka, kokaniri maīkiko atoko inaākako.

Ininiā ikara nimaīkiko apokapitikako. Ikara nota pirena kitxakapirīka atāopitika —itxa.

³⁸ Imoianariakori txari:

—Apiananiri, patamata. Uai aua ipi iouata aneenamauatini ikapani.

Xesosi txari:

—!Apakata ikara atoko inakari hīsākire —itxa Xesosi.

Xesosi Misākiretiniri Teoso Xetsémani Inakoriātaā
(Mateo 26.36-46; Marko 14.32-42)

³⁹ Eereka ixirata auīte Oriva inakorimoni isa, kotxi itotapekari iuaā isini. Imoianariakori sari iuakata. ⁴⁰ Iuaā apokasaakina, Xesosi txana:

—Satanasi nirekari maerekati hīkamini. Ininiā himisākiretariko Teoso, iua sikataparatinii, Satanasi nirekakiti himakamakani ikapani —itxa Xesosi.

⁴¹ Ininiā iuaā itakanapana imoianariakori. Apikoxāki axapiti sa itxa. Iuaā ikapoto-reēkaua, misākireta itxari Teoso. ⁴² Itxari:

—Niri, !pauiritapeno paītiki natatsirauatini, iuaritika kona pikamapiri nota nirekaākiti. Pite nirekaākiti ninireka nikamini —itxa Xesosi.

⁴³ Iuasaaki Teoso nitiri iaxitikiri apoka iuamoni isikataparaxiniretiniri ìkapani.

⁴⁴ Iuasaaki Xesosi xinire kamaxirepeka. Ìkixinireë apokapeka itsii. Ininiã iteene imisãkiretari Teoso. Ininiã iinìkakare arëkatxikata tapika ixitimoni.

⁴⁵ Teoso imisãkiretaka atoko, òkitikaua, imoianariakorimoni isa. Iua apoka ninoamoni. Imakapoanãtana, kotxi isãpakapekana imatinaniuatinina xika. ⁴⁶ Ininiã akiritana: —Kinirepa himakanãta? Hòkitikaua. Himisãkiretari Teoso, Satanasi nireëkiti himakamani tikane —itxa Xesosi.

Xesosi Maìkiko Pirena
(Mateo 26.47-56; Marko 14.43-52; Xoão 18.1-11)

⁴⁷ Xesosi sãkirauatakasaaki imoianariakorikata, itomaneri kãkiti Xotasikata apoka. Xotasi mikiikana ninoa Xesosi oerekini ìkapani. Iua Xotasi Xesosi moianarikamara, apanakinikata. Xotasi apokasaaki apitxokari Xesosi. ⁴⁸ Ininiã Xesosi txari iua:

—Xotasi, pimìkapiritatari pitari iaxitikiri papitxokasaaki? —itxa Xesosi.

⁴⁹ Xesosi moianariakori imarotakasaakiri kãkiti nirekiniri Xesosi imaìkini, itxana: —Apiananiri, erekari atxiiti uatxa aneenamauatini, aiouataneë —itxana.

⁵⁰ Ininiã ãti Xesosi moianari sauakari sasetotxi auite apiatakari nitiri kìpita ikikomoni.

⁵¹ Ininiã Xesosi:

—Hiiitoka ikara. Iaõpe.

Eereka Xesosi takapiotaua ikìpitaã. Iuasaaki kakìpitapeka itxa iuaìkana. ⁵² Sasetotxi auiteakori, kiomãtxiakori pakini ina Xesosi imaìkinina ìkapani. Xesosi txari ninoamoni:

—Kinirepa himinari iouata, piriri pakini himaìkinino ìkapani? ⁵³ Ikiniõtika hìtekata naua aiko Teoso misãkiretikoã. Iuasaaki kona hìte maìkano. Ìkanõka hina, kotxi ipiaã hìkamari maerekati —itxa Xesosi.

Petro Kipatari Xesosi Imarotini
(Mateo 26.69-75; Marko 14.54, 66-72; Xoão 18.15-18, 25-27)

⁵⁴ Ininiã ninoa maìkari Xesosi, anika itxarina sasetotxi auite apiatakari aapokomoni. Ìroãna aapoko ãki. Ininiã Petro sari ninoa tikini. ⁵⁵ Sasetotxi aapoko takote apoka. Iuasaaki mapara xamina pokitakori aua. Kãkiti topãkanãta xamina takote. Irokanãtana. Ininiã Petro topãka ninoa takote. ⁵⁶ Iuasaaki ãtokoro atamatari iua xamina kamaraã. Ininiã itakote oãpoka. Omixinitari iua:

—Ia kiki Xesosikata auakari —otxa.

⁵⁷ Txamari Petro txari:

—Ãtokoro, kona nimarotari iua —itxa.

⁵⁸ Eereka ãti atamatari iua. Itxari iua:

—Pite Xesosi moianarikarai? —itxari.

Txamari Petro:

—Konapitini —itxa.

⁵⁹ ãti oara napa atoko ãti txari:

—Atãopitikara, ikira kiki Xesosi moianaripitikara, kotxi Kariréiakiri itxaua iua —itxa.

⁶⁰ Petro txari:

—Kona nimarotari ikara pisãpiretakiti.

Iuasaaki, isãkirauatakasaaki, patari sãkirauata. ⁶¹ Iuasaaki Xesosi sapotorika, atamata itxari Petro. Iuasaaki, Petro xinikari mitxi Xesosi sãpiretakiti: “Patari sãkirauatini apisapanikako, ipi ãti pakinikata, ‘Nimarotari iua,’ pitxanoko” ininiri iaõka aua. ⁶² Ininiã eereka Petro sipe. Iteene txiapata itxa.

Sotatoakori Napetiniri Xesosi
(Mateo 26.67-68; Marko 14.65)

⁶³ Xesosi nìkatakani napetari, noropata itxarina Xesosi. ⁶⁴ Iuasaaki iaxirikaokitarina iua, ninoa imatamatakani ìkapani. Iuasaaki noropata itxarina.

—Kimarorei pite. Kiripa noropatai? —itxana.

⁶⁵ Itomaneri maerekati sãkiretxitiã itxitarina Xesosi. Inapetiniri liotoka.

*Xesosi Xoteo Auíteakori Apisatoõ**(Mateo 26.57-68; Marko 14.53-65; Xoão 18.19-24)*

⁶⁶ İkanõkapanika kiomãtxiakori, sasetotxi auíteakori, kaiõkatsopareriakori pakini apotiitaua. Iuasaaki Xesosi minaãka ninoamoni.

⁶⁷ —Pisãpiretaua ate, Teoso mereëkitikai pite? —itxarina.

Ininiã Xesosi apakapapiretana:

—Nisãpiretiniã, !hãuikari nisãkire. ⁶⁸ Nipimarauatiniã, hıte !apakapapiretano. Apaka !hãuiritari nisakakiko. ⁶⁹ Paıtiki hıtari iaxitikiri topãkako Teoso kaposotiireri kikomoni —itxa Xesosi.

⁷⁰ Ininiã iuaıkana ninoa pimaãri:

—Teoso ãkirikai pite? —itxarina.

Ininiã Xesosi apakapapireta:

—Atãopitikara hısãkire. Iuapitikarano nota —itxa.

⁷¹ —Iaõpekara. Akenakotapekari isãkire. Ininiã apikomoni isãkire kenakotakani ! anirekaika, kotxi ateka kenakotapekari iua sãkire maerekati —itxana.

23

*Xesosi Pirato Apisatoõ**(Mateo 27.1-2, 11-14; Marko 15.1-5; Xoão 18.28-38)*

¹ Ininiã imakinika ninoa anikari Xesosi Piratomoni. ² Ininiã iuaã ikamarina aãpirena. Apoıtarina Xesosi:

—Ate kenakopiretari oerekiniri kãkiti maerekati ikamini, kotxi iua õtãkikari kãkiti, kãkiti miıkitxitakaniri Sesa, Homano auıte apiari. Apaka itxa: “Teoso mereëkitino nota. Auıtetxi apiatakari nitxaua,” itxa iua sãkire.

Txamari na atãoni ikara atoko itxana ninoa. Ikara atoko ninoa apoıtari Xesosi. Kona atão ninoa sãpiretakiti. ³ Ininiã Pirato pimaãri Xesosi:

—Pitekani Xoteoakori auıte txataua? —itxari Xesosi.

—Iuapitikarano nota —itxa Xesosi.

⁴ Ininiã Pirato txana sasetotxi auíteakori, kãkiti pakini:

—!Napokari maerekati ikamakiti —itxa.

⁵ Iuaıkana apoıtarina:

—Iua oerekana kãkiti maerekati ikamini auıtetxiakorimoni. Kariréia tõpamonira ipotorika. Uatxa uaipekarari iua —itxana.

Xesosi Erotxi Apisatoõ

⁶ Pirato kenakotakasaakiri isãkirena, ipimaãna:

—Ia kiki Kariréiakirikani?

⁷ —Ari iuapitikara —itxana.

Ikara Pirato imarotakasaaki, iokanatarı Xesosi Erotximoni, kotxi Kariréia tõpa auakani auıte itxaua Erotxi. Iuasaaki iua ianapokota Xerosareë. Ininiã Pirato iokanatarı Xesosi Erotximoni, kotxi Xesosi Kariréiakiri.

⁸ Erotxi kenakopiretapekari Xesosi pirena. Ininiã iua aõkitakasaakiri Xesosi, poxokope itxakata, kotxi inirekari Xesosi oerekiniri iposotiire. ⁹ Ininiã iteene ipimaãri Xesosi, ikamakiti imarotini ikapani. Txamari Xesosi !apakapapiretari iua. ¹⁰ Iuasaaki sasetotxi auíteakori, kaiõkatsoparerini pakini iteene apoıtari Xesosi. İkinika ninoa sãkire aãpirenanoka. ¹¹ Eereka Erotxi, isostatoneakori pakini napetari Xesosi. İeretakarına auıtetxi mãka maparakiri apiata inapetinirına ikapani.

—Hãtamatarı ere. Auıtetxi itxaua —itxana.

Eereka iuaıkana iokanatarına Piratomoni. ¹² Mitxi Erotxi, Piratokata omanatakakaua. İkara õti ninoa apokaerekatakakaua.

*Xesosi Okiko Nirekiko**(Mateo 27.15-26, 11-14; Marko 15.6-15; Xoão 18.39-19.16)*

¹³ Ininiã eereka Pirato apotiitari sasetotxi auíteakori, Xoteo auíteakori, apanakini kãkiti pakini. ¹⁴ Ininiã itxa:

—Hīte minari ia kiki notamoni. Hīte apoītari iua imisirienetiniri kākiti. Hīte apisatoō nipimaāpekari ikamakiti pirena. Notamoni kona maerekati !ikama. ¹⁵ Erotxipekana ! apokari maerekati ikamakiti, ininiā iokanatarari iua notamoni iuaīkana. Inipitikara iua erekari, txamari hīte nirekari okiko maxikatīka. ¹⁶ Ininiā nota paniātari inoropatiko aāpitsa aamata kamakoriā. Eereka niokanatarari isini.

¹⁷ Iuasaaki Páskoa kiiniritisaaki, auītetxiakori itotari isikakiniri ātika kateia āki auakari.

¹⁸ Ikara Pirato sākire ikenakotakasaakina, ninoa akirikata:

—Hōkariko ere kiki. Hīsikakariko Pahapasi —itxana.

¹⁹ Pahapasi kateia āki aua, kotxi iua apanakinikata naiatarari auītetxiakori. Kokaniri apaka itxaua.

²⁰ Pirato nirekari Xesosi isikakini, ininiā iuaīkana isākirauata kākitemoni. ²¹ Txamari ninoa akiripoakata:

—Aamina ĩpiriāmitakari nopini hītokakitariko. Hōkariko aamina ĩpiriāmitakari nopini —itxakatana.

²² Pirato mitxi isākirauata ipikata. Iuaīkana isākirauata:

—Kixikapa? Maerekati !ikama. Ixika !auari ipinini ĩkapani. Nipaniātariko inoropatiko, eereka nisikakariko —itxari.

²³ Txamari iuaīkana akiripoakatana:

—Hōkariko aamina ĩpiriāmitakari nopini.

Ninoa akiripoakatini xika Pirato kamari ninoa nirekakiti. ²⁴ Ininiā Pirato:

—Xesosi ipinako hinirekakiti iaōka —itxa Pirato.

²⁵ Iuasaaki isikakari Pahapasi kateia āki auakari. Neenamatchi kamakari, kokaniri apaka itxaua Pahapasi. Eereka isikari Xesosi sotatoakorimoni aamina ĩpiriāmitakari nopini okiko ĩkapani.

Xesosi Tokakitaāka Aamina ĩpiriāmitakari Nopini

(Mateo 27.32-44, 11-14; Marko 15.21-32; Xoāo 19.17-27)

²⁶ Ininiā sotatoakori anikari Xesosi okiko ĩkapanimoni. Iuasaaki kimaporiāpo aōkita-rina Simāo, Sireni sitatxitikiri. Iuasaaki iua apoka sitatximoni. Sotatoakori maīkari iua. Aamina ĩpiriāmitakari itakana Simāo tsotere nopini:

—Panika ia aamina ĩpiriāmitakari —itxarina.

Xesosi tikini sa itxa Simāo. ²⁷ Xesosi tikini isa mirikiniti kākiti. Ātokaka sitoakoro sari apaka. Imatinaniuatana, itxiapatana, kotxi imarotarina Xesosi paītiki ipinini. ²⁸ Xesosi kirioka ninoa sitoakoromoni. Itxana:

—Sitoākini Xerosareē auakani anaakoro. Kona notani !himariaka. Hīte kara himari-akaua. Hamariteni ĩkapani hītxiapata, ²⁹ kotxi āti ōti apokasaaki, kākiti sākire: “Api-aerekata sito meeneto oniniua,” kotxi iuasaaki misirikaretxi apokasaaki, pamonōkoniri.

³⁰ Iuasaakiikarako kākiti akiripoakatako ixirata auītemoni: “Ate nopini pirika. Pipataua,” itxanako, kotxi iuasaaki ninoa mokaiakariakori apokaāpota ninoa xipokini ĩkapani.

³¹ Nota aamina amaneri atoko nitxa. Hīte aamina ĩsasaka atoko hītxa. Nota !ikamari maerekati, iuaritika ia atoko nota ipina. Erepaniko aamina ĩsasaka atoko hītxa, ininiā āti ōtirako apiata himisiritiko —itxa Xesosi sākire.

³² Ninoa anikari ipi maerekati kamakani Xesosikata ipininina ĩkapani. ³³ Apokasaakina “Kiitātatxi” inakoriātaā, itokakitarina Xesosi aamina ĩpiriāmitakari nopini. Iua atokokanera itxana maerekati kamakani. Āti maerekati kamakari itakana Xesosi kikomoni, āti isanaremoni.

³⁴ Iuasaaki Xesosi txari:

—Niri !pimisiritapena ninoa, maerekati ikamakitina xika, kotxi !imarotarina ikamak-itina —itxa Xesosi.

Iuasaaki sotatoakori kamari sarauatxi. Eereka imakatzakarina Xesosi māka. Sarauatxi káiatakari apakapari imāka. ³⁵ Kākiti iuaā auakani itikari Xesosi. Sasetotxi auīteakori napetari iua. Itxana:

—Iua makatzakapekari apanakini imapinakanina ĩkapani. Teoso mereēkiti ininiāua, kinirepa iuaka !imakatzakaua? —itxana.

³⁶ Iuasaaki sotatoakori apaka napetari iua. Katxioári isikarina Xesosi iätini ìkapani, txamari liätari. ³⁷ Itxana:

—Pite Xoteo auíte pininiãua, ininiã aamina ìpiriãmitakariã pimakatxakaua. Piteka pimakatxakauako —itxarina.

³⁸ Iuasaaki iökatakori takaãka ikii tanomoni:

—Xoteoakori Auíte —itxa iua iökatakori. Homano säkireë aua. Kreko säkireë aua. Xoteo säkireë pakini aua iuaã iökatakori.

³⁹ Maerekati kamakari Xesosi takote tokakitakori akiritari iua. Itxitari. Inapetari:

—Pite Teoso mereëkiti pininiãua, ìteroa piposotiire? Piteka pimakatxakaua. Ate apaka pimakatxaka —itxa.

⁴⁰ Ìti maerekati kamakari iuaã tokakitakori òtãkikari iua:

—Kona pite pìkatari Teoso? Ate apaka apinako. ⁴¹ Atãopitikara ate misiritiko, kotxi maerekati akamapeka. Ere kiki likamari maerekati —itxa.

⁴² Eereka itxari Xesosi:

—Xesosi, auítetxi pininiãtaãua papokasaaki, pixinikano nota, kotxi ninirekari nisini pitekata iuaxiti —itxari.

⁴³ Xesosi apakapapiretari:

—Atãopitikara nitxai, uatxa ia òti, pite sariko notakata iaxiti Erekaritàã.

Xesosi Ipinini Pirena

(Mateo 27.45-56; Marko 15.33-41; Xoão 19.28-30)

⁴⁴ Ininiã apaniãxiti takote atokatxi piãkapeka. Ipi ãti pakini oara ipiãka. ⁴⁵ Atokatxi !iponikaika. Iuasaaki mãkatxi mata mitari Teoso misãkiretiko aikotiã arökakari matso-rakitaãka. Ipi matapeka itxa. ⁴⁶ Iuasaaki Xesosi akirikata:

—Niri, nisikai nixinire pinìkatini ìkapani.

Ikara atoko inaãka atoko, ipina. ⁴⁷ Sotato auíte itikasaakiri, ikenakotakasaakiri, itxa:

—Atãopitikara ikira kiki atão inakarinoka kamakari iua. Maerekati !ikama —itxa sotato auíte.

⁴⁸ Kãkiti iuaã apotiitakaniua ikara atamatakasaakina, itorotana iaritana ipìkarauatini xika. Ininiã isipekana. ⁴⁹ Ikinika Xesosi aökimanere, sitoakoro Kariréiakini, iua tikini sikani pakini aua iuaã. Ikira atoko itikanãtarina Xesosi okiko.

Xesosi Katiko Pirena

(Mateo 27.57-61; Marko 15.42-47; Xoão 19.38-42)

⁵⁰ Iuasaaki iuaã aua Xosee inakori. Xoteo auíteakori òtãkikakari iua. Erekarì iua. Erekarinoka ikama. ⁵¹ Arimateia sitatxitikiri iua. Arimateia sitatxiti, Xotéia tōpa aua. Iãtapapikari Teoso ikinimane auíte ininiua. Mitxipe apanakini Xoteo auíteakori òtãkikakani nirekasaakiri Xesosi okinina, iuasaaki iua Xosee txari:

—Konapitini. !Apakata ikara atoko akamini —itxa.

⁵² Xesosi ipinaka atoko, Xosee sari Piratomoni. Amanaãri Xesosi ìto akauarimoni itakini ìkapani. Ininiã Pirato sikari Xesosi ìto iuamoni. ⁵³ Ininiã iua makatxakari Xesosi ìto itokakitikoãtaã. Iapirikari mãkatxi mataã, kai iriko ãki taka itxari. Mitxi ipìkari ! auapanika iua iriko ãki. ⁵⁴ Ikara òti sesta veira. Ikinika sesta veira, Xoteoakori tomatini òti apisa, Xoteoakori aiamata tomatiko òti ìkapani.

⁵⁵ Sitoakoro Kariréiakini Xesosikata ìkani sari Xosee tikini kai irikomoni. Ninoa nirekari imarotiniri Xesosi ìto takikoãtaã. ⁵⁶ Eereka ninoa kanapiriã aapokomonina. Kamariãro, aãtsopa ãtião pakini apotiitana Xesosi ìtoã itakinina ìkapani. Ininiã tomatiko òti tomata itxana, kotxi Teoso paniãtakiti iaõka ikamana.

24

Xesosi Iuaikana Auãki Inini

(Mateo 28.1-10; Marko 16.1-10; Xoão 20.1-10)

¹ Tomìkosaaki ìkanõkapanika, sitoakoro sari kai irikomoni, kamariãro Xesosi ìtoã itakinina ìkapani. ² Ninoa apokasaaki iuaã, atamatarina. !Katoreikari kai iriko. Kai tore makatxakapeëkaika. ³ Ininiã ninoa ìroã, txama kona apokarina Xesosi ìto. ⁴ Ininiã sitoakoro:

—Ítapari Xesosi ïto? Kanatokopa itxa? —itxanātana.

Iuasaakipeka ipi kiki tokiā. Itimana sitoakoro apisatoō. Pomēkori mākarini ninoa. Mēkokari iotximere atoko itxa ninoa māka. ⁵ Sitoakoro pīkarauata, ininiā iākana. Ixitipeka auakiitana. Ininiā ninoa kiki txana:

—Kinirepa hinitanātari auāki inakari ipīkani sauaki? ⁶ !Uaiikari iua. Ōkitikapekava. Hīxinikari isākire Kariréia hītekata auakasaaki. ⁷ Ia atoko itxa isākire: “Hītari iaxitikiri sikaākako maerekanimoni. Eereka nipinako aamina ipiriāmitakari nopini. Eereka ipi āti ōtisaaki iuaīkana nōkitikauako,” itxa Xesosi. Hīxinikariko isākire —itxana.

⁸ Ininiā ninoa sitoakoro:

—Ari ikara atokopitikara itxapeka isākire —itxana.

⁹ Eereka ninoa sipeka. Ōsi Xesosi moianariakorimoni isana. Apanakini kākiti iuaā aua apaka. Iuaā ninoa sāpiretana ikinipoko itikakitina. ¹⁰ Maria Matarena, Xoanama, Maria Txiako inoroma, apanakini pakini sāpiretari Xesosi moianariakori itikakitina.

¹¹ Txamari Xesosi moianariakori kona auikari ninoa sākire.

—Paxirari hīsākire —itxana.

¹² Petronoka auikari ninoa sākire, ininiā imiteēkata kai irikomoni. Iāka, iriko āki atamatini ikapani. Mākatxi matanoka, Xesosi ïtoā Xosee iapirikakitinoka atamata. Eereka aapokomoni ikanapiriā. Isikasaaki, itsorīkaānāta, Atamatakiti ixinikanāta.

Emaoso Kimaporiti Sikani

(Marko 16.12-13)

¹³ Ikara ōti ipi Xesosi sākire auīākani iāpota Emaoso inakori aapokotxitimoni. Xerosareē pipotorikasaaki, ipi oara napa atoko papoka Emaoso. ¹⁴ Ninoa ipi sākirauanāta isaāpotakasaakina. Isākiretarina, ixinikarina Xesosi ipinini pirena.

¹⁵ Isākirauanātakasaakina, iuasaaki Xesosi ina ninoa tikini, ininiā iua sa ninoakata.

¹⁶ Txamari ninoa kona imarotari iua Xesosi ininiua. ¹⁷ Ininiā Xesosi:

—Kipa hīte sākirenāta? —itxa Xesosi.

Ininiā ninoa iotoka. Iuasaaki ninoa toō oerekari imatinaniuatinina. ¹⁸ Kiropasi inakori apakapapiretari:

—Ikinimane Xerosareē auakani imarotari Xesosi okiko pirena. Atxiīti pite ātiātaā ikarikai? —itxari.

¹⁹ Ininiā Xesosi txari:

—Natokopa itxa iua? —itxa.

Ininiā ninoa:

—Xesosi Nasaree sitatxitikiri iua. Teoso sākire sāpiretakari itxaua. Teoso, kākiti apaka apokaerekatari isākire, ikamakiti pakini, kotxi paposotiireri isākire, ikamakiti pakini. ²⁰ Sasetotxi auīteakori, aūīteakori apaka sikari iua okiko ikapani, aamina ipiriāmitakari nopini ipinini ikapani. ²¹ Ate uākatari iua kākiti Isaeo auakani maerekani makatxaākari ininiua. Kita mitxi iua ipina. ²² Mixikanani sitoakoro iua sākire auīākani sākirauata atekata. Ininiā atsorīkaāta. Isāpiretauana ikanōkapanika akauarimoni isinina. ²³ Txamari ninoa kona apokaikari Xesosi ïto. Ninoa sākire, aōkitana Teoso nitiriakori iaxitikini iuaā. Ninoa sāpiretana sitoakoro Xesosi iuaīkana ōkitikapekava. ²⁴ Eereka ātikaka imoianariakori sari iuaā atamatinirina ikapani. Sitoākini sākire atāopitikara. Txamari !aōkitari Xesosi iuasaaki —itxa Kiropasi.

²⁵ Ininiā Xesosi txana ninoa:

—Miīkiteni hītxaua. !Hinirekari hāuikiniri Teoso sākire sāpiretakani sāpiretakiti imakinika Teoso sākire, ²⁶ kotxi ninoa txari: “Teoso nirekari imereēkiti atatsiirauatini, Teoso tixine ikanapiriini apisapanika,” itxa Teoso sākire —itxa Xesosi.

²⁷ Iāpotakasaakina, Xesosi sāpiretana ninoa Teoso sākire iuaka pirena. Merepanika iuaka oerekava Moisesi iōkatsopatakitiā, eereka Teoso sākire sāpiretakani iōkatsopatakitiā. Iuaka oerekava imakinika Teoso sākire iōkatsopatakoriā auakariā.

²⁸ Iuasaaki ninoa apokaāpota Emaoso takote. Ninoamoni Xesosi nirekari apikomoni isini. ²⁹ Ininiā itxana:

—Kona pisipe apikomoni. Mapiānikata, ininiā atekata pikaikota —itxarina.

Ininiã Xesosi ïroã aapokotxiã ninoakata ikaikotini ïkapani. ³⁰ Iitopãka ninoakata inipokotini ïkapani. Iuasaaki Xesosi kosekari komiri.

—Teoso, erekapitikari pisikakiti atemoni —itxa.

Iuasaaki imapixinikari komiri, sika itxana ninoamoni. ³¹ Iuasaakipeka ninoa imarotari Xesosi ininiua. Iuasaakipeka, ereëkoka itxa. ³² Ininiã ninoa misäkiretakakaua:

—Atãopitikara, kimaporiã isäkirauaãpotakasaaki, Teoso sãkire oereka-rauaãpotakasaaki, axinire poxokoniuata iuasaaki —itxana.

³³ Iuasaakipeka ninoa aiamata. Ikanapiriãna Xerosareëmoni. Iuaã apokana õsi Xesosi moianariakori, apanakinikata. ³⁴ Isãpiretana:

—Xesosi auãki inini pirena atãopitikara. Apiananiri õkitikapekua. Petromoni oerekapekua —itxana ninoa.

³⁵ Ininiã eereka Kirovasi imoianarikata sãpiretana kimapori isinina pirena. Isãpiretana komiri Xesosi mapixinikini pirena, kotxi iuasaakiika ninoa imarotari iua Xesosi ininiua.

Xesosi Oerekaua Imoianariakorimoni

(Mateo 28.6-20; Marko 16.14-18; Xoão 20.19-23; Átosi 1.6-8)

³⁶ Isäkirauatapanikana inakasaakina, Xesosi tokiã ninoa sauaki.

—Erekaxinire hïtxako —itxa.

³⁷ Itikoãkatana. Ipikarauatana. Kamiri iuãkatarina.

³⁸ —Kinirepa hïtikoka? Kinirepa kamaxirepeka hïtxa ïikiteta? ³⁹ Hãtamatariko niuako, nikitiki pakini. Iuapitikarano nota. Himaãtakano. Kamiri !kaxiniri. Kamiri kona kapiri. Hãtamatanano. Niïtokara. Kamiri !nitxaua —itxa Xesosi.

⁴⁰ Ininiã oerekari iuako, ikiti pakini ninoamoni. ⁴¹ Ninoa iteene poxokoniuata, txamari !iteene !auikapanikarina atão Xesosi ininiua. Ininiã iuasaaki Xesosi pimaãna:

—Nipokori aua hïtemoni? —itxa.

⁴² Ininiã ninoa sikari ipixini ximaki kimitakori. Mapaã apaka isikarina. ⁴³ Ininiã iua nikari ninoa apisatoõ. Iuasaaki ninoa imarotari atão Xesosi ininiua, kotxi kamiri !inikari nipokori. ⁴⁴ Eereka iua misäkiretana ninoa:

—Mïtxi hïtekata nauakasaaki, nisãpiretai ikinipoko nota pirena Teoso sãkire iõkatsopatakoriã. Noerekapekai hïte Moisesini iõkatsopatakiti, Teoso sãkire sãpiretakani iõkatsopatakiti. Xikari iõkatsopatakori apaka noerekapekai. Imakinika ninoa sãpiretakiti nota pirena apokapeka.

⁴⁵ Iuasaaki isikaimaroretana ninoa Teoso sãkire iõkatsopatakori imarotinina ïkapani, ininiã iuasaaki ninoa imarotari atão. ⁴⁶ Itxari:

—Kitxakapiriãka iõkatsopatapeëkaika:

Teoso mereëkiti atatsiirauatako. Okaãkako. Ipi äti õtisaaki õkitikauako.

⁴⁷ Kãkiti nisäkire auiãkani iaripiretariko niokanapirena erekari ikini itixiti. Merepanika Xerosareë auakanimoni isãpiretaãkako, eereka ikini itixiti auakanimoni isãpiretaãkako. Ninoa oerekariko kãkiti takanapiniri imaerekanina, ininiã iuasaakipeka Teoso makatxakariko maerekati ikamakitina. ⁴⁸ Hïkinika hïte itikapekari nipinini. Hãtamatanano nota iuaikana auãki ninini. Ininiã iteene himarotari nota pirena apanakini hïspiretini ïkapani. ⁴⁹ Nota iokanatariko niri sikaenetakiti, Erekari Matamatakoti, hïtemoni. Uai sitatxi hïkaikotako. Hïãtapariko iua apokini. Ininiã hãpakapariko Teoso posotiire itano ïkari —itxa Xesosi.

Xesosi Anikaãka Teoso Tixinemoni

(Marko 16.19-20; Átosi 1.9-11)

⁵⁰ Xesosi anikari imoianariakori Petãnia sitatxitimoni. Iuaã apokasaakina, Xesosi õkitikauakotaua. Itxari Teoso:

—Niri, naia pinikata. Pitakari erekari naiamoni —itxa.

⁵¹ Isäkirauatakasaaki, anikaãka Teoso tixinemoni. ⁵² Iuasaaki ninoa:

—Peerekari Xesosi. Iuanoka Apiananiri —itxanãtana.

Eereka Xerosareë ikanapiriãna ipoxokoniritikana. ⁵³ Ikiniõtika isana Teoso misäkiretiko aikotimoni. Iuaã ninoa misäkiretari Teoso:

—Peerekai. Erekapitikari pikamakiti ate ñkapani —itxanātana ikiniõtika.
Ameẽ.

XOÃO

Xesosí, “Teoso Säkire” Inakori

¹ Itixi kamiko apisa iua “Teoso Säkire” inakori auapeka. Iua Teosokata aua. Iua Teoso txaua. ² Ikinipoko potorikikosaaki Teosokata auari iua “Teoso Säkire” inakori.

³ Teoso paniätari iua ikinipoko ikamini. !Auari iua makamakiniti. ⁴ Xesosí, “Teoso Säkire” inakori, kamari itanapokoka auãki inini. Iuanoka sikari ikinipoko auãki inini, kotxi iuanoka auapika. Iua tirikapi atoko itxa, kotxi iopinikari kãkiti xiniremoni Teoso säkire imarotini ïkapani, ätipirika auini ïkapani. ⁵ Iopinikari ipiã. Ipiã kona xipokari iua tirikapi kamara.

⁶ Teoso iokanatarari isäkire säpiretakari tikane kiki Xoão inakori. Iokanatarari iua kãkitimoni, kãkiti xinire iopiniäkari isäpiretini ïkapani. ⁷ Isäpirenauata, Teoso säkire ikinimane imarotini ïkapani, auikapiretinirina ïkapani. ⁸ Kona Xoãoni kãkiti xinire iopiniäkari txaua. Xoão iokanataãka kãkiti xinire iopiniäkari isäpiretini ïkapani. ⁹ Iua atão iopinikari kãkiti xinire. Apoka ïkoraxiti, ikinipoko kãkiti xinire iopinikini ïkapani.

¹⁰ Iua “Teoso Säkire” inakori aua ïkoraxiti. Iua kamari itixi, iuaritika ïkoraxiti auakani kona auikapiretari iua säkire. ¹¹ Iua apoka itixi ikamakitimoni, txamari kãkiti ikamakini kona nirekari iua. ¹² Iuaritika apanakini nirekari iua, ininiã auikarina isäkire. Ininiã iua sikaposotiiretana ninoa Teoso anaakori ininiuana ïkapani. ¹³ Aponaniãkasaaki, Teoso anaakori !atxaua. Ateka Teoso anaakori akaminiua !aposota. Kona kãkitini txïkitakaua Teoso anaakori aniniãua. Teosora kamari iua anaakori aniniua.

¹⁴ Kãkiti itxapekaua iua “Teoso Säkire” inakori. Atekata aua. Ate itikari iua. Peerekari iua. Peerekari iposotiire. Ikinipoko erekari aua iuamoni. Isäkire atãonoka itxa. Ikara atoko itxa, kotxi iri Teoso. Teoso äkiri imatonökari itxaua Xesosí.

¹⁵ Xoão säpiretari Xesosí kãkitimoni. Ia atoko isäpirenauata:

—Iua, hïtemoni nisäpiretakiti: “Nota tikinimoni apokakari, apiatako iua. Nota poiãoka, kotxi nota auini apisapanika auapeka iua.”

¹⁶ Ikinipoko erekari aua iuamoni, ininiã amakinika ate apakapari ikinipoko erekari iuamonikiri. Isikaãpotari erekari atemoni. ¹⁷ Aimarotari Teoso paniätakiti säkiretxiti, kotxi Moisesini oerekapekaua. Apiaerekata Xesosí Kristo oereëkiti, kotxi iua oerekaua Teoso iteene tiretiniua. Ikinipoko erekari isika atemoni. Maerekati kamakani atxaua, iuaritika Teoso tiretaua. Oerekaua atão inakari aimarotini ïkapani. ¹⁸ Teoso atamatakari !auari. Imatonökari Teoso äkiri, irikata auakari, iuara oerekaua Teoso aimarotini ïkapani, kotxi Teosotxikana iua.

Xoão Kapatxisareri Säpiretakiti

(Mateo 3.1-12; Marko 1.1-8; Arókasi 3.1-18)

¹⁹ Xoteo auïteakori Xerosareë sitatxiti auakani iokanatanana kãkiti Xoãomoni. Iokanatanana sasetotxiakori. Iokanatanana sasetotxiakori moianatakani apaka Xoãomoni, ipimainirina ïkapani: “Kinakariparai pite?” ²⁰ Kona Xoão kipatari isäpiretinina. Atão isäpiretana:

—Teoso mereëkiti kãkiti iätapakiti, kona nitxaua nota —itxa.

²¹ Ininiã ipimaärina:

—Ikara atoko ininiã kiriparai? Eríasikani? —itxana.

—Kona iuano —itxa.

—Teoso säkire säpiretakari aiätapakitikani atxiïti? —itxana.

—Kona iuano —itxa.

²² —Ikara atoko ininiã, natokopa inakariparai pite? Ninoa ate iokanatakani nirekari imarotiniina pite. Natokopa inakaripa pite? —itxana.

²³ Ininiã Xoão:

—Teoso säkire säpiretakari Isaía inakori iökatsopatakiti txari:

Auako kiki äparaã makipakaniãtaã. Isäpirenauatako. Itxariko: “Höeretariko kimapori Apiananiri apokini apisapanika. Itikaãpo erekari hïkamako iua napini ïkapani,”

itxa Isaía. Iua kiki āparaā makipakaniātaā kasāpirenari, iuakarano nota. Iua Isaía sāpiretakitikanano nota —itxa Xoão.

²⁴ Pariseoakorira iokanatana ninoa kiki Xoōmoni. ²⁵ Ipimaārina Xoão:

—Iua Teoso mereēkiti aiātapakiti piminakanisaakua, Eríasi inakori piminakanisaakua, Teoso sākire sāpiretakari aiātapakiti piminakanisaakua, kinirepa pite patxisatari kākiti? Kipaniāpa pite patxisarauata? —itxarina.

²⁶ —Āparaañanira nota patxisarauata. Hīte sauaki aua kiki himimarotakinini. ²⁷ Iuara, nota tikini apokakari, apiatakari iua. Minakati nitxaua nota, ininiā kona apakata napokini iua takote. Kona apakata ikiti mata tsapitsa nikoxirikini, kotxi minakati nitxaua —itxa Xoão.

²⁸ Ikara atoko Xoão sāpiretana ninoa Xotāo ipiniā Petánia sitatxiti, ipatxisarauatiniātaā.

Soti Auīte Ākiri, Teoso Nakiti

²⁹ Katimatinīkata Xoão atapari Xesosi, iuamoni inini. Xoão sāpiretana apanakini itakote auakani:

—Hātapari. Erenapani soti auīte ākiri Teoso nakiti, kotxi ikinimane maerekani makatxaākari itxaua. ³⁰ Mitxi nisāpiretakitikara ere. “Kiki apokako nota tikini. Apiananiri iua, kotxi nota mauakanisaakipanika iua aua.” ³¹ Mitxi nota apaka kona nimarotari maerekanitxi makatxaākari uāka. Nota patxisatari kākiti āparaā, kotxi iuasaaki nisāpiretari iua pirena Isaeo tixini auakanimoni —Xoão txana ninoa.

³² Xoão sāpiretana apanakini itikakiti:

—Nota itikari iua Erekaru Matamatakoti Teoso tixinekiri katxakini. Kamo katxakini atoko itxa iua. Isari Xesosimoni, kaikota itxa iuakata. ³³ Ikara apisa kona nota imarotari iuāka. Āparaañ nipatxisarauatini paniātakari sāpiretano: “Pitikariko Erekaru Matamatakoti katxakini. Kikimoni apokini pitikariko. Iua kiki patxisarauatini ātiāo, kotxi isikari Erekaru Matamatakoti patxisatakonimoni,” itxano. ³⁴ Notakara itikari ikara. Nota sāpiretari nitikakiti, ininiā nimarotapitikari ia kiki Teoso ākiri ininiua —itxa Xoão.

Merepitipanika Xesosi Moianariakori

³⁵ Katimatinīkata iuaīkana Xoão auanāta iuaā ipi imoianariakorikata. ³⁶ Iuasaaki itikari Xesosi inapaāpotini, ininiā akiritari imoianariakori:

—Hātapari. Ere kiki, soti auīte ākiri Teoso nakiti itxaua —itxa.

³⁷ Ikara ikenakotakana atoko ninoa ipi imoianariakori sari Xesosi tikini. ³⁸ Ininiā Xesosi sapotorika, atapana iua tikini īkani.

—Kipa hinireka atxīiti? —itxana ninoa.

—Koerekareri, namonipa paua pite? —itxarina.

³⁹ —Masa, hātamata —itxa.

Ininiā isana iuakata, atamata itxarina iua auiniātaā. Iuasaaki kikatapeka. Eereka īkanōkapeka ikanapiriāna.

⁴⁰ Ninoa Xoão moianariakori, Xesosikata sikani, Ātree, Ātree moianari pakini. Simão Petro itari itxaua iua Ātree. ⁴¹ Eereka Ātree sari katimariā itari Simāomoni.

—Ate aōkitari Teoso mereēkiti aiātapakiti —itxa.

⁴² Ininiā Ātree anikari itari Simão Xesosimoni. Xesosi atamatari Simão.

—Pite Simão, Xoão inakori ākiri. Uatxa pite Petro pinaākako —itxa.

Kai sorotxikana iuāka Petro.

Piripi, Natanaeo Pakini Xesosi Akiritini

⁴³ Katimatinīkata Xesosi nirekari Kariréia tōpamoni isini. Iuaā aōkitari Piripi inakori.

—Notakata masa. Nimoianari pitxapekauako —itxari.

⁴⁴ Iua Piripi aapoko Petsáita sitatxiti. Iuaā apaka aua Ātree, Petro pakini aapoko.

⁴⁵ Iuasaaki Piripi nitari Natanaeo inakori. Apokasaakiri isāpiretari:

—Ate aōkitari kiki. Moisesini iōkatsopatakiti sāpiretakiti iua. Teoso sākire sāpiretakani iōkatsopatakiti sāpiretakiti aaōkita. Iuakara Xesosi txaua. Nasaree sitatxitikiri iua. Xosee ākiri iua Xesosi —itxari.

⁴⁶ —Nasaree sitatxitiā !auari erekari —itxa Natanaeo.

—Auapitika. Masa, maãpiãkatari iua —itxa Piripi.

⁴⁷ Xesosi atapari Natanaeo iuamoni inaãpotini.

—Ere kiki atão Xoteopitikara. Atãonoka ikama —itxa Xesosi.

⁴⁸ Ininiã iuasaaki Natanaeo kenakotari Xesosi sãkire. Ipimaãri Xesosi:

—Kiãtokopa ininiãpa pimarotano nota? —itxari.

Xesosi txari iua:

—Piripi akiritinii apisapanikara, nimarotari piko kati patapi piitopãkanãta.

⁴⁹ Ininiã Natanaeo apakapapiretari:

—Koerekareri, Teoso ãkiri pitxaua pite. Kãkiti Isaeo tixini auakani auĩte pitxaua —itxari Xesosi.

⁵⁰ Ininiã Xesosi:

—Pite auikari nisãkire, kotxi nimitikakinitika nimarotari piko kati patapi piitopãkanãtini. Pite imarotapanikariko apia posotiiiretxi. ⁵¹ Pite itikariko Teoso tixine osereẽkiko. Pitikariko Teoso nitiriakori kanĩkini. Pitikariko ninoa katxakini, pitari iaxitikiri nopini apokinina. Atãopitikara ikara atoko nitxai pite —itxari Natanaeo.

2

Xesosi Inoãkari ãparaã, Iãriãpeka Itxĩkitakini

¹ Ipi õti napaka atoko aua kiiniri tanirauatikoko pirena kiiniriti Kanaa sitatxiti Kariréia tõpa. Xesosi inoro aua kiiniriãtaã iuasaaki. ² Kakiiniriteri kemaĩtxitari Xesosi, imoianariakori pakini. ³ Iãriã xipoka atoko Xesosi inoro:

—!Auaika iãriã —otxari Xesosi.

⁴ Ininiã Xesosi:

—Kinirepa ikara atoko pitxano? Niposotiiire manapi lapokapanika —itxaro inoro.

⁵ Ininiã Xesosi inoro txana kaapokori nitiriakori:

—Ipaniãtakiti iaõka hĩkamako —otxa.

⁶ Iuaã kopiti aua, seisi pakini, mitari kopititi, kai kamakori. Naia kopiti ãki aua ãparaã Xoteoakori arokiniua ãkapani. Iuaãtaã ninoa arokaua. Kiomãtxiakorini oerekinina atoko ninoa arokaua Teoso imisãkiretinina apisa, ninoa Teoso apakapini ãkapani. ãtika iua kopiti maĩkari ãparaã seĩ arĩtro.

⁷ Xesosi paniãtana kaapokori nitiriakori:

—Hĩxãpokakari naia kopiti ãki ãparaã —itxana ninoa.

Ininiã ninoa xãpokakari kopiti ãki ãparaã. Isonakatapeka apoka ãparaã. ⁸ Ininiã Xesosi:

—Hĩsorokaãtari ãparaã, sika hĩtxari kakiiniriterimoni iãtini ãkapani.

Ininiã ninoa anikari ãparaã kakiiniriterimoni. ⁹ Iua kakiiniriteri iãtari. Iuasaaki iãriãpeka itxapekaua ãparaã.

—Amonipa ina ia iãriã? —itxa.

!Imarotari. Ninoa nitiritxi ãparaã anikakani imarotari iua iãriã. Ininiã kakiiniriteri txari ãtanorouatakari:

¹⁰ —Kinirepa mixikanani ia iãriã apia erekari na pisikaua? Apanakini sikari iãriã apia erekari kiiniri potarikasaaki. Kãkiti kamitope inakasaakiika apanakini sikari iãriã poião erekari. Txamari uatxaika pite sikari apia erekari —itxari.

¹¹ Iuasaaki Xesosi mipotorikari iposotiiire Kanaa sitatxiti Kariréia tõpa iua auakasaaki. Iposotiiire oerekari Apiananiri ininiua. Ikara atoko ininiã, Xesosi moianariakori auikari Xesosi Teoso mereẽkiti kãkiti iãtapakiti ininiua, kotxi ninoa itikari iposotiiire.

¹² Ikara atoko inaãka atoko Xesosi, inoro, itariakori, imoianariakori pakini sari Kapanaoõ sitatxitimoni. Iuaã ikaikotana mapaõtipeka.

Pirãtxi Omitikiko Pirena

(Mateo 21.12-13; Marko 11.15-17; Arókasi 19.45-46)

¹³ Xoteoakori kiinirite Pãskoa inakori apisapanika, Xesosi sari Xerosareẽmoni. ¹⁴ Isa Teoso misãkiretiko aikotimoni. Iuaã pirikeri ãki itikari pirãtxi vëtxitakani, kema auĩte, soti auĩte, kamao pakini vëtxitakani. Itikari txineirota sikakani apaka. Amesa takote ninoa topãkanãta. Ivëtxitarona txineirota. Apakaparona ãti uãka txineirote, kotxi oa

ãtoião, ininiã Xoteo txineirote isikana. ¹⁵ Ininiã Xesosi kosekari aãpitsa. Īpatari. Aãpitsaã omitikenatana ninoa pirãtxi vëtxitakani. Omitikenatana kema auïte, soti auïte Teoso misãkiretiko aikoti takote auakani. Ikakanapiriãri amesa txineirota apakapikoãtaã. Txineirota xikepoakatani. ¹⁶ Ipaniãtana kamoã vëtxitakani:

—Himakatxakariko kamoã. Hanikariko mapara. Niri aapoko ãki hïvëtxirauatini ! apakata. Kona uaini pirãtxi vëtxitiko —itxana ninoa.

¹⁷ Iuasaakipeka imoianariakori xinikari Teoso sãkire iõkatsopatakori: Nota iteene turetari paapoko pite misãkiretiko aikoti. Iua xika nokaãkako, itxa Teoso sãkire iõkatsopatakori.

¹⁸ Eereka Xoteo auïteakori misãkiretari Xesosi:

—Teoso paniãtiniãi ninoa kãkiti iua misãkiretiko aikotiã auakani pomitikenatini, poerekauã posotiiretxi Teoso paniãtiniãi aãuikini ĩkapani —itxana ninoa.

¹⁹ Xesosi apakapapiretari:

—Hïrikariko ia Teoso aapoko. Ipi ãti pakini õtisaaki iuaïkana nõkitikariko ia Teoso aapoko —itxa Xesosi.

²⁰ Ininiã ninoa:

—Anekani. Koarëta seisi anokanani iua aiko kamiko. Kiãtokopa pitxari ipi ãti pakini õtisaaki põkitikiniri iuaïkana? Kona kiïkitei pite pisãkire ikara atoko pinini —itxarina Xesosi.

²¹ Txamari Xesosi sãkire “Teoso aapoko” ixinikari iïto. !Ixinikari Teoso misãkiretiko aikoti. ²² Xesosi ipinaãka atoko, õkitikaãkauã atoko, iuasaakipeka imoianariakori xinikari ikara Xesosi sãkire. Iuasaaki ninoa auikari Xesosi sãkire. Auikarina Teoso sãkire iõkatsopatakori sãpiretiniri Xesosi atão Teoso ãkiri ininiua.

²³ Xesosi Xerosareë auakasaaki, Pãskoã kiiniriti auakasaaki, itomaneri kãkiti auikari Xesosi Teoso mereëkiti ninoa iãtapakiti ininiua. Ninoa itikari posotiiretxi ikamakiti, ininiã auikarina Xesosi sãkire. ²⁴ Txamari Xesosi !auikari kãkiti sãkire, kotxi imarotari ikinimane ãkixinire sãkire. ²⁵ Kãkiti ãkixinire sãkire !ipimaãri xatiki, kotxi imarotapekari kãkiti ãkixinire sãkire.

3

Nikotemo Pirena

¹ ãti ĩkanõkati Nikotemo inakori motika Xesosimoni. Iua Xoteoakori auïte itxauã. Pariseo itxauã apaka. ² Iua misãkiretari Xesosi:

—Koerekareri, ate imarotari koerekareri, Teoso iokanatakiti pininiua. Teoso pitekata mauakaniã, kona piposotari posotiiretxi pikamini, ininiã ate imarotari Teoso iokanatai pite kãkitimoni —itxa.

³ Ininiã Xesosi:

—Iuaïkana iponaniãkarira sari Teoso auïtetxi ininiãtaãua. Iuananira sari iuaxiti. Atãopitikara ikara atoko nitxai pite —itxa.

⁴ —Kiãtokopa pitxa auapekarikai iuaïkana piponaniini? Kona piposotari pinoro ãko ãki iuaïkana piïroini. Kona piposotari iuaïkana piponaniini —itxa Nikotemo.

⁵⁻⁶ Ininiã Xesosi:

—Atãopitikara ikara atoko nitxai. Piponaniãkasaaki, piri, pinorokata ãkirinanira pitxauã. Iua Erekari Matamatakoti iponaniãkitakiniãi, Teoso ãkiri pitxauã. Kãkiti, iua Erekari Matamatakoti iuaïkana iponaniãkitaãkitinanira, sari Teoso auïtetxi ininiãtaãua.

⁷ Koniko pitsorïkaãtapeko. Piponaniãko ipikata. Ipikata pimiponaniãkaniã, kona pisari Teoso auïtetxi ininiãtaãua. ⁸ ïtima xõkarauata inirekiniãtaã. Pikenakotari ixõkarauatini, iuaritika na pimarotari ïtima sinimoni. Na pimarotari ïtima ininimoni. Iua atokokana !kimarotikori Erekari Matamatakoti iuaïkana iponaniãkitaãkiniri kãkiti —Xesosi txari Nikotemo.

⁹ Nikotemo apakapapiretari:

—Nota !imarotari ikara pisãkire —itxa.

¹⁰ Ininiã Xesosi:

—Koerekareri apiari pitxauã. Kãkiti Isaeo tixini auakani poereka. Txamari pite ! imarotari ikara atoko nininiã pite. ¹¹ Atãopitikara ikara atoko nitxanãtai pite. Ate

sāpiretari aimarotakiti, aītiākiti pakini. Txamari !hinirekari hāuikapiretiniri asāpiretakiti. ¹² Īkorapokoriti pirena nisāpiretakasaakii, !pauikari nisākire. Atauako pauikatari nisākire Teoso tixine pirena nisāpiretakasaakii? ¹³ Kona kākiti sapanika Teoso tixine. Ātinoka sari iuaā, Teoso tixine potorikakarinoa, kākiti itari iaxitikirinoka sari iuaā.

¹⁴ —Kitxakapirīka āparaā makipakaniātaā Moisesini ōkitikari imini metao kamakori aāke mapotōkireē. Itano itakari. Kākiti Teoso sākire auiākani imini akatsatakini atamatari Moisesini ōkitikakiti, ininiā kona ipinana. Iua atokokana kākiti itari iaxitikiri ōkitikaākako. ¹⁵ Ininiākara iua sākire auiākari kona ipinaika. Auapikako.

¹⁶ —Teoso iteene tiretari ikini itixiti auakani, ininiā iokanataru imatonōkari imi kākitimoni. Ininiā iua sākire auiākanirako kona ipinaikako. Ātipirika auapikako. ¹⁷ Teoso iokanataru imi kākitimoni ikini itixiti auakanimoni kona imisiritinina ĩkapanini. Iua iokanataru imi kākiti maerekani imaktxakini ĩkapani, ninoa imapinakanu ĩkapani.

¹⁸ —Teoso ākiri sākire auiākari kona iokanataāka kākiti misiritikomoni. Iua Teoso ākiri sākire mauīākati, iuarako sako kākiti misiritikomoni. Teoso ākiri sākire imauīākani xikara ikara atoko inaākanako. ¹⁹ Teoso ākiri sākire mauīākani misiritaākako, kotxi atāo inakari oerekakari kākiti xinire iopiniākari apokapeka ĩkoraxiti. Iua oerekari atāo aimarotini ĩkapani. Tirikapi atoko itxa, kotxi oerekaua atāo. Ninoa mauikareni kona nirekari tirikapi. Inirekarina ipiā, kotxi maerekati ikamanātana. ²⁰ Maerekati kamakari kona nirekari tirikapi. Kona tirikapi takote kona aua, kotxi ipīkari ikamara. Ipīkari kākiti itikiniri maerekati ikamini. ²¹ Teoso sākire iaōka kamakarira sari ikamaraā, kotxi ikamara oerekari apanakini iua kamakiti atāo inini Teoso nireēkiti iaōka inini —Xesosi txari Nikotemo.

Xesosi Apiari, Xoão Poiāori Inini

²² Ikara atoko inaka atoko Xesosi imoianariakorikata sari Xotēia tōpamoni. Mapaōti ikaikota imoianariakorikata iuaātaā. Imoianariakori patxisataru kākiti iuaā. ²³ Xoão apaka patxisataru kākiti Enō inakoriātaā, Sarī inakoriātaā takote. Ipatxisarauata iuaātaā, kotxi iuaātaā āparaā kaiāopokori. Ikiniōtika kākiti sari iuamoni iuaātaā, ininiā Xoão patxisatana. ²⁴ Iuasaaki Xoão kona takaākapanika kateia āki.

²⁵ Iuasaaki Xoão moianariakori sākirauata apanakinikata kākiti arokiniaua pirena, Teoso misākiretiko aikoti āki ĩiroinina apisa pirena. ²⁶ Apokana Xoōmoni.

—Koerekareri, Xotāo ipiniā iua kiki pite patxisatakiti, atemoni pisāpiretakiti, uatxa iua patxisarauatapeka. Ikinipoko kākiti sari iuamoni. Atemoni !erekari ipatxisarauatini —itxana.

²⁷ Xoão apakapapiretana ninoa:

—Erekapitikari ipatxisarauatini, kotxi Teoso paniātari iua. Teoso masakaniāri posotiiretxi kākitimoni, kona xatiki iposotari iparīkauatini Teoso ĩkapani. ²⁸ Nota kona Teoso mereēkitino. Kākiti iātapakiti kona nitxaua nota. Teoso iokanatanu nota Teoso mereēkiti apokini apisa. Ikara hīte imarotapeka. Ikara atoko nitxapekai hīte. Hīsāpiretari ikara apanakinimoni.

²⁹ —Maxinikari kiki ĩtanorouatakasaaki. Sito amanaākito iua nakiti otxaua. Imoianari topāka iua takote. Ipoxononiuaata ĩtanorouatakari sākire ikenakotakasaaki. Iua atokokana nota poxononiuaata. Nota iua moianari atoko nitxaua. Xesosi iua ĩtanorouatakari atoko itxaua. Kākiti iua nakiti itxaua. ³⁰ Xesosi apiaāpotako. Nota poiāōpotako.

³¹ —Iaxiti ĩkari Apiananiri. Itixi auakani imarore poiāonoka, kotxi itixinoka imarotana. Teoso tixine ĩkari Apiananiri itxaua. ³² Iua sāpiretari itiākiti. Ikenakotakiti isāpireta. Txamari kākiti !auikari isāpirena. ³³ Kākiti Apiananiri sāpirena auiākani, imarotari Teoso sākire atāo inini, ininiā apanakini apaka imarotari Teoso sākire atāo inini. ³⁴ Iua Teoso iokanatakiti sāpiretari Teoso sākire, kotxi Teoso sikari Erekari Matamatakoti iuamoni, ininiā ikinipoko Erekari Matamatakoti posotiire aua iua Teoso iokanatakitimoni. ³⁵ Aīri Teoso tiretari imi. Isikari imi ikinipoko imoiaini ĩkapani. ³⁶ Teoso ākiri sākire auiākani auapikako Teosokata. Teoso ākiri sākire mauīākani kona auapanina Teosokata. Teoso omanatapikanako ninoa ātipirika —itxa Xoão ninoamoni.

4

Xesosí Misäkiretaro Samariakero

¹ Käkiti säpiretari pariseoakori:

—Xesosí säkire auiäkani, iua patxisatakini, itomaneri. Xoão patxisatakini poiäoka — itxana.

² (Ari, kona Xesosini patxisarauata. Imoianariakorira patxisatari käkiti.) ³ Xesosí imarotakasaakiri pariseoakori kenakopiretiniri iua, iusaaki iua osipikari Xotéia tōpa. Kinirāo kanapirikari Kariréia tōpamoni. ⁴ Inirekari Samaria tōpa ipirixititini Kariréia tōpa apokini ikapani.

⁵ Samaria tōpa ipirixititakasaaki, apoka Sikaa sitatxiti takote. Iuaā aua itixi Xoseeni nakiti, iri Xakooni sikakiti kitxakapirika. ⁶ Iuaā aua aariko Xakooni kisakakiti āparaā apaātiko. Iuaā Xesosí apokasaaki, iotoka, kotxi isāpakapeka ōtakori ipirixititini xika. Ininiā itopāka aariko takote. Iusaaki apaniāxitipeka.

⁷ Iusaaki sito Samaria auakaro apoka iuaā, āparaā apaātakaro. Oāpokasaaki, Xesosí amanaāro āparaā:

—Āparaā pisikano —itxaro.

⁸ Oa apokini apisapanika Xesosí moianariakori sari sitatximoni nipokori iamotinina ikapani.

⁹ Oa sito apakapapiretari:

—Xoteo pitxaua pite. Samaria auakaro nitxaua nota. Kinirepa nāparaāte pamanaāno? —otxa.

Ikara atoko otxa, kotxi Xoteoakori kona säkirauata Samaria auakanikata.

¹⁰ Ininiā Xesosí:

—Teoso sikakiti pimarotaākamako, pitemoni āparaā amanaākari pimarotaākamako, notamonimarako pamanaāri āparaā, kotxi piätiniāri āparaā nota sikakiti, pauapika ātipirika —itxaro.

¹¹ —Kona katiui pite. Kiriāpa papaātari āparaā, kotxi paitanoirikori. Namonipa papokatarī āparaā käkiti ātipirika auini inikitaākari? ¹² Kitxakapirika aātokirini Xakoo sikaua ate ia aariko. Iua, imiakori, ipiraakori pakini iātari ia āparaā ia aarikoākiri. Pite apiata atxiīti? —otxa.

¹³ Ininiā Xesosí:

—Käkiti ia irikoākiri āparaā iātakari iuaikana iposonatapanika. ¹⁴ Käkiti nota siäkiti āparaā iātakari apikomoni !iposonataika. Ākixinire amomo atoko itxa āparaā nota siäkiti. Iua āparaā txikitakari iua ātipirika auini Teosokata —itxaro.

¹⁵ —Iua āparaā pisikano nimaposonatakani tikane, ininiā uai kona ninaika āparaā napaātini —otxa.

¹⁶ —Pakiritari pītaniri. Uai piminari —itxa.

¹⁷ —Kona kītanirino —otxa.

—Atāopitikara, “Kona kītanirino,” pinini. ¹⁸ Siko pakinipekara pītaniri. Kiki uatxa pitekata auakari na atāo pītanirini. Inipitikara pisäkire —itxaro.

¹⁹ Ininiā oa:

—Teoso säkire säpiretakari pitxaua pite, kotxi pimarotari ikinipoko nikamakiti. ²⁰ Kitxakapirika ate kiomaneakorini apotiitaua Teoso imisäkiretinina ikapani ia oxiratari nopini. Txamari hīte Xoteoakori txari: “Xerosareēnanira aāpotiitauako Teosokata” —otxa.

²¹ Ininiā Xesosí:

—Pauikariko nisäkire. Āti ōti apokako. Iusaaki kona uai oxiratariāni, kona Xerosareēni käkiti apotiitaua aīri Teoso imisäkiretinina ikapani. ²² Hīte Samaria tōpa auakani apotiitaua Teoso himisäkiretini ikapani. Txamari, kona atāo himarotari iua. Ate Xoteoakori aimarotapitikari Teoso, kotxi Teoso sikakiti käkiti maerekani makatxakakari Xoteo itxaua. ²³ Teoso keto apokapanika, ari apopeka, ininiā aīri Teoso misäkiretakani atāo inakani misäkiretari iua ākixinireēna. Ninoa säpiretari atāo inakarinoka iuamoni. Aīri nirekari käkiti ikara atoko inakani misäkiretiniri iua. ²⁴ Teoso nirekari amisäkiretiniri iua aākixinireē, kotxi Teoso ito lauari. Inirekari käkiti säpiretiniri atāo inakarinoka iuamoni —itxa Xesosí.

²⁵ Ininiã oa:

—Nimarotapitikari iua Teoso mereëkiti aiãtapakiti, Kristo inakori, apokapitikako ïkorapokoriti. Iua apokasaaki ikini sereti isãpiretauako —otxari.

²⁶ —Nota pimisãkiretakiti Teoso mereëkiti hiãtapakitikarano nota —itxaro.

Ãti Takarauata, Ãti Amarauata Inini Pirena

²⁷ Iuasaakipeka Xesosi moianariakori kanapiriã. Ãkixinireëna ninoa tsoriãkãñãta:

—Kinirepa Xesosi sãkirauata oa sitokata?

Kotxi oa Samaria auakaro. Iuaritika lipimaãrona: “Kiripa ïkai?” kona itxarona. Kona ipimaãrina Xesosi: “Kinirepa pimisãkiretataro oa?” kona itxarina.

²⁸ Iuasaaki oa sito takanapari otii, sitatximoni kanapiriã otxa. Oãkiritari kãkiti iuaã auakani,

²⁹ —Masa. Maãpiãkatari kiki ikinipoko nikamakiti imarotakari. Iua Teoso mereëkiti aiãtapakiti atxiiti? —oa txana ninoa.

³⁰ Ininiã iua sitatxi auakani sari Xesosimoni. ³¹ Ninoa apokini apisapanika imoianariakori akiritari Xesosi:

—Koerekareri, pinipokota —itxarina Xesosi.

³² —Nipokori auape nota niãkiti tãkane hïte mimarotakiniti —itxa Xesosi.

³³ Ininiã imoianariakori imisãkiretakakana:

—Kiripa sikatari nipokori Xesosi nikakiti? —itxana.

³⁴ Ininiã Xesosi:

—Nota kamari iua niokanatakiri nirekaãkiti. Ninirekari nikaminiri ikinipoko iua paniãtakiti. Ia nipariãka. Nipariãka nikiena atoko itxa, kotxi niokanatakiri paniãtakiti nikamini sikataparitano, nipokori sikataparatinino atokotxikana. ³⁵ Kãkiti txari: “Ipi ipi pakini kasiriti auapanika takari iposope inini tãkane, ininiã uatxa kona nipariãkauata.” Ia atoko kona hïtxape hisãkire. Himereka. Hãtamatariko takari. Nisãpiretai hïte hïtakare iposope haãpoko hanikini tãkane. ³⁶ Iua atokotxikana Teoso sãkire takaãka kãkiti ãkixinireë. Katakari mipariãkatakari apakapari ipariãka ïki. Iua anikari kãkiti Teoso aapokomoni, ãtipirika Teosokata auini ïkapani. Ininiãkara katakareri, iua mipariãkatakari apaka poxokoniuatoko. ³⁷ Aãtokirini txari: “Ãti takarauata, ãtipekana apotiitari takari.” ³⁸ Ia sãkiretxiti atão, kotxi nota paniãtai hïte mitxi himapariãkauatakaniãtaã hamarauatini. Apanakini pariãkauatapeka iuaã. Ninoa takapekari Teoso sãkire kãkiti ãkixinireë. Pasãpaniri ninoa pariãka. Ninoa pariãkauata mitxi, ininiã uatxa hïte pariãka poião kãkiti Teosomoni hanikini —itxa Xesosi.

Samaria Auakani Auikiniri Xesosi Sãkire

³⁹ Kaiãopokori Samariakini iua sitatxiti auakani auikari Xesosi sãkire, kotxi oa sito mitxi sãpiretana:

—Nikamakiti ikinika isãpiretano —otxana.

⁴⁰ Ininiã ninoa Samaria auakani apoka Xesosimoni.

—Atekata paua —itxarina Xesosi.

Ininiã Xesosi kaikota ipi õti ninoakata. ⁴¹ Xesosi sãkire ikenakotakasaakina, apikomoni ninoa auikapiretari.

⁴² Ninoa misãkiretaro oa sito:

—Uatxa ate auikapiretari Xesosi sãkire, kona pite sãpirenaãnanini, ate auikapiretari. Ateka kenakotapekari iua sãkire, ininiãkara ate auikapiretari iua sãkire. Uatxa ate imarotari atão inini Teoso mereëkiti ininiua Xesosi. Kãkiti itixi auakani maerekani makatxaãkari itxaua iua —itxarona.

Auïtetxi ãkiri Xesosi Makananitini

⁴³ Iuaã ipi õti inapaka atoko Xesosi sipeka. Karirãia tãpa isa. ⁴⁴ Mitxi Xesosi sãkire: “Teoso sãkire sãpiretakari paxitaãka, txamari Teoso sãkire sãpiretakari itixineë auakasaaki, kãkiti iuaãtaã kona auikari iua sãkire,” itxapeka Xesosi. ⁴⁵ Iuaritika Karirãia tãpa apokasaaki, kãkiti iuaã auakani ipoxokoniritika apakapari Xesosi, kotxi ninoa apaka sari iua Pãskoã kiiniriti Xerosareë sitatxitiã. Iuaãtaã itikarina Xesosi posotiere. Ininiãkara ipoxokoniritikana apakaparina Xesosi.

⁴⁶ Xesosi iuaĩkana sari Kanaa sitatxitimoni, Kariréia tōpa. Mitxi Xesosi inoãkapekari āparaã iãriã ininiua iuaã. Xesosi apokasaaki Kanaa, auĩtetxi ākiri amianata Kapanaoõ sitatxitikiri. ⁴⁷ Iua auĩtetxi kenakopiretari Xesosi Kariréia tōpa apokini, Xotéia tōpa osipikini. Inakasaaki Xesosimoni isa, aõkita itxari Xesosi. Aiatari:

—Masa Kapanaoõmoni, naapokomoni. Namarite amianata. Pimakananitari iua. Ipinanapanoka —itxari Xesosi.

⁴⁸ Ininiã Xesosi:

—Nimakamakaniãri posotiiretxi, kona hĩte nirekari auikiniri nisãkire. Posotiiretxi hĩtikasaakinani, hĩte nirekari nisãkire hãuikini. Teoso takaõtxikare hĩtikasaakinani, hinirekari nisãkire hãuikini —itxa Xesosi iuamoni.

⁴⁹ —Masapoka naapoko. Pimasikanisaaki, namarite ipinapitikako —itxari.

⁵⁰ —Pisa paapokomoni. Pamarite kona ipina —Xesosi txari iua.

Iua kiki auikari Xesosi sãkire, ininiã isipeka. ⁵¹ Ipixinipokoriti aõkitana initiriakori.

—Pamarite auapitikako —itxarina.

⁵² —Namonikitapa akananita? —itxana.

—Kita apaniãxiti apoomari iotoka —itxana.

⁵³ Iuasaaki iua kiki imarotari kita Xesosi sãkire manapikara: “Pamarite kona ipina,” ininiri manapikara iotoka apoomari. Ikara atoko ininiã, ikinimane iua aapoko auakani, iua pakini auikari Xesosi sãkire.

⁵⁴ Ininiã ipikatapeka Xesosi kamari posotiiretxi Kariréia tōpa auakasaaki, Xotéia tōpa osipikasaaki.

5

Matĩpokotakati Xesosi Erekapeka Inĩkitakini

¹ Ikara atoko inaãka atoko Xesosi sari Xerosareẽ sitatxitimoni, kotxi Xoteo kiinirite Teoso ĩkapani aua iuasaaki. ² Xerosareẽ sitatxiti apanĩkaki, soti auĩte vẽtxitikoãtaã takote aua ipoa xapitikiri. Siko ĩronakiko aua iuaãtaã. Xoteo sãkire Epiráiko. Epiráiko sãkireẽ iua ipoa uãka “Petésita.” ³ Ironakikoãtaã amianatakanipokoni sirĩkanãta. Mõsiãreni, motĩkakani, matĩpokotakani pakini iuaã auanãta. Iãtapanãtarina āparaã tokĩkaãtini. ⁴ Teoso nitiri apokanaka iuaãtaã. Iua apokasaaki itokĩkaãtakari āparaã. Āparaã tokĩkaãtakasaaki, ãtika amianatakari ĩkiika komokaãtakari erekapeka itxa. ⁵ Matĩpokotakati iuaã auanãtakari amiananãtakari trĩta oito pakini anokanani amianata. ⁶ Xesosi atamatarari iua iuaã isirĩkanãtini. Imarotari iua uatxakapokoni amiananãta. Ininiã Xesosi pimaãri:

—Ereka pinini pinireka? —itxari.

⁷ Amianatakari apakapapiretari:

—Ari, ninirekapitikamari, txamari kona kanikikono kãuaãriã āparaã tokĩkaãtakasaaki. Nikomokaaritakasaaki, ãti komokape napisapanika —itxari Xesosi.

⁸ —Põkitikaua. Pisirimata pikoseka, sipeka pitxa —Xesosi txari.

⁹ Iuasaakipeka erekapeka itxa iua amianatakari. Isirimata ikoseka, tĩpokota itxapeka. Iua õti kãkiti tomatini õti. ¹⁰ Ininiãkara Xoteo auĩteakori txitari amianatakari erekapeka inakari:

—Uatxa kãkiti tomatini õtisaaki pite anikanãtari pisirimata. ĩkora atoko ininiã, kãkiti lauiritaãka —itxarina, kotxi ninoamoni iparĩkauata isirimata anikasaaki.

¹¹ Ininiã iua kiki:

—Erekape ninĩkitaãkirira paniãtano: “Pisirimata pikoseka, sipeka pitxa,” itxano.

¹² Ininiã ninoa:

—Kiripa kiki paniãtai pisirimata pikosekini pisini ĩkapani?

¹³ —!Nimarotari iuãka —itxa.

Iuaãtaã ipoa xapitikiri takote kaiãopokori kãkiti auanãta, ininiã patimari Xesosi sipeka ninoa sauaki.

¹⁴ Eereka Xesosi aõkitari iua kiki Teoso misãkiretiko aikotiã.

—Uatxa pitĩpokotapeka, ininiã maerekati pitakanapako. Iuaĩkana maerekati pikamakasaaki, atxiĩti amianari apiatakari inokai —Xesosi txari iua.

¹⁵ Eereka iua kiki sari Xoteo auĩteakorimoni.
—Xesosira erekapeka txĩkitakano nota —itxari.

Xoteo Omanatiniri Xesosi

¹⁶ Tomatiko õtisaaki Xesosi makananitari iua amianatakari. Ikara xika Xoteo auĩteakori kinirão okaka txari Xesosi. ¹⁷ Xesosi imarotari Xoteo auĩteakori sãkire, ininiã itxana:

—Niri Teoso kamari erekari ikiniõtika. Iua atokotxikana nota. Kona niotoka erekari nikamini tomatiko õtisaaki —itxa Xesosi.

¹⁸ Ikara Xesosi sãkire xika Xoteo auĩteakori apiata omanatari Xesosi. Ninoamoni Xesosi kamari maerekati tomatiko õtisaaki amianatakari imakananitini. Xesosi sãkire: “Niri Teoso,” inini xika, apiata omanatarina iua, kotxi iua: “Teosotxikana nota” itxanãta iua Xesosi.

Xesosi Irikata

¹⁹ Ininiãkara Xesosi misãkiretana Xoteo auĩteakori:

—Atãopitikara nitxai hĩte. Nota Teoso ãkiri nitxaua. Notanani !kakamareno. Nitikari niri kamanãtakiti, ininiã niri kamakiti iaõka nikama. Iuanokara nikama nota. Niri kamakititxikana nota kama apaka. ²⁰ Niri tiretano nota, ininiã ikini sereti ikamanãtakiti oerekano. Oerekapanikariko posotiiretxi apiatapanikako nota kamini ĩkapani, ininiãkara hĩte tsorĩkaãtako hĩtikasaakiri. ²¹ Niri õkitikari ipĩkani, iuaĩkana aua inini tĩkane. Iua atokotxikana nota txĩkitakana kãkiti ninirekaãkini, iuaĩkana auini ĩkapani. ²² Teoso kona txari kãkitimoni: “Kona erekai pite, ininiã kãkiti misiritikomoni pisa,” kona itxa Teoso. Apanakinimoni kona Teoso txari: “Erekai pite, ininiã uai pina notakata pauini ĩkapani,” kona itxa Teoso. Notakara iua ãkirikara txari ikara atoko inakari kãkitimoni, kotxi Teoso sikaposotiiretano nota ikara atoko inakari nisãpiretini kãkitimoni. ²³ Ikara atoko ininiãkara, kãkiti paxitano nota. Niri nirekari nota paxitiko, iua paxitiko atokotxikana. Nota mapaxitakani kona paxitari niri nota iokanatakari.

²⁴ —Atãoenepitikara nitxai hĩte. Nisãkire kĩpitakari, nota iokanatakari sãkire auiãkari, auapika Teosokata. Kona Teoso misiritapaniriko iua. Kona ipinaika. Auapika Teosokata.

²⁵ Atãoene nitxai hĩte. Kãkiti xinire ipĩkari atoko itxa maerekati ikamakiti xika. Teoso ãkiri sãkire kãkiti kĩpitini õti apokapanikako. Ari iketo apokapeka. Nota sãkire kĩpitakani auapikako. ²⁶ Aĩri Teosonoka posotari itxĩkitakiniri ikinipoko auãki inini, kotxi iuanoka auapika. Isikaposotiiretano nota apaka ikinipoko nitxĩkitakini auãki inini.

²⁷ —Aĩri Teoso txano nota: “Kãkiti itari iaxitikiri pitxaua, ininiãkara pitxariko nisãkire mauĩakani: ‘Kona hĩte kĩpitari Teoso sãkire, ininiã kãkiti misiritikomoni hĩsa,’ pitxako. Pitxariko nisãkire auiãkani: ‘Hĩte kĩpitari Teoso sãkire ininiã uai hina Teosokata hãuini ĩkapani.’ Ikara atoko pitxariko kãkitimoni,” Teoso txano nota.

²⁸ —Kona hĩtsorĩkaãtapeko, ikara sãkiretxiti hĩkenakotakasaaki. ãti õti ipĩkani, katakoni, kenakotariko Teoso ãkiri akiritinina. ²⁹ Iuasaaki õkitikauanako. Ninoa erekari kamakani auapikako Teosokata. Ninoa maerekati kamakani misiritaãkako.

³⁰ —Notanani kona nitxari kãkiti: “Pite sari kãkiti misiritikomoni. Pitepekana inari uai Teosokata pauini ĩkapani.” Notanani kona ikara atoko nitxari kãkiti. Teoso sãpiretakitinokara nitxa kãkitimoni, ininiãkara nisãkire kãkitimoni atãonoka, kotxi kona nota nirekaãkitini nikama. Niri nipanĩatakiri nirekaãkitinanira nikama —itxa Xesosi.

Xesosi Sãkire Atãoene Sãpiretakani

³¹ Apikomoni Xesosi sãpirenauata:

—Notaka sãpiretiniãua hĩtemoni, atxiĩti kona kauikikono. ³² ãtipekana nota sãpiretakari aua. Nimarotari atão inini iua sãpiretakiti. ³³ Hĩte iokanatapekari himoianariakori Xoãomoni nota himarotini ĩkapani. Iua sãpiretipekana ninoa atãoene nota sãkire.

³⁴ Kona ninitanãtari kãkiti nisãkire atão inini sãpiretakani. Nota sãpiretai hĩte Xoão sãpiretakiti sãkiretxiti, himaerekani Teoso makatxakini ĩkapani, himapinakani tĩkane.

³⁵ —Xoão tirikapi tirinakari poniãkari atoko itxa. Tirikapi iopinikari ikinipoko, tirikapi takote auakari aãtamatiini ĩkapani. Iua atokokana Xoão oerekari kãkiti atão inakari. Mapaõtinokara hĩte poxokiniuata iua sãkire hĩkenakotakasaaki.

³⁶—Aua āti nota sãpiretakari. Iua Xoão poiãoka. Ātipekana apiata. Nota kamakitikara apiata. Nikamakiti sãpiretari nota sãkire atão inini. Nikamakiti, niri paniātakiti kãkiti itikasaaki, imarotari niri uaimoni iokanatinino nota.

³⁷—Niri, nota iokanatakari kãkitimoni, iua apaka nota sãpiretakari. Kona hĩte kenakotari Teoso sãkirauatini. Kona hĩte atamatari itoõ. ³⁸ Isãkire !auari hãkixinireẽ, kotxi kona hãuikari nota sãkire iua iokanatakiti sãkire.

³⁹—Hĩte atatsopatapikari Teoso sãkire iõkatsopatakori, hãuini ātipirika Teosokata himarotini ĩkapani. Ia Teoso sãkire iõkatsopatakori nota sãpiretakari apaka itxaua. ⁴⁰ Txamari kona hinirekari nisãkire hãuikini. Kona hinirekari notamoni hinini, ātipirika Teosokata hãuini ĩkapani.

⁴¹—! Ninitari niuikiko. ⁴² Iteene nimarotai hĩte. Kona xapiti hĩtoretari Teoso hãkixinireẽ. ⁴³ Niri iokanatanano nota uaimoni. Txamari kona hĩte apakapano nota Teoso iokanatakino. Teoso maiokanatakinitira hĩte apakapa. ⁴⁴ Hĩte potxitari āti iuikini. Txamari kona hĩkamari erekari Teosonoka iuikini ĩkapani, ininiã kona hãuikari iua sãkire.

⁴⁵—Kona notani sãpiretapaniri niri hĩte maerekani. Moisesira sãpiretariko himaerekani Teosomoni. Hĩte uãkatari iua sãpiretari hĩte ereka hinini, txamari iua sãpiretariko niri himaerekani. ⁴⁶ Moisesini sãkire iõkatsopatakiti hãuikaãkamako, nota sãkire apaka hãuikamako, kotxi Moisesini nota sãpiretakari apaka. Iua iõkatsopatapekari nota sãkire. ⁴⁷ Hĩte kona auikapiretari Moisesini iõkatsopatakiti. Isãkire iõkatsopatakiti himauikakaniã, kiãtokopa hĩtxa nota sãkire hãuikini? —itxa Xesosi.

6

Sĩko Mio Kãkiti Xesosi Sikakienatini (Mateo 14.13-21; Marko 6.30-44; Arõkasi 9.10-17)

¹ Eereka āti õti Xesosi ĩpiriātari Kariréia poa. Ia ipoa uãka apaka Txiperiatxi poa inaãka. ² Kaiãopokori kãkiti sari iua tikini, kotxi ninoa itikapekari Xesosi makananirauatini. ³ Xesosi kanĩka mitaxiratarimoni. Iuaã iitopãka imoianariakorikata. ⁴ Xoteoakori kiinirite, Pãskoa inakori kiinirite apisapanika Xesosi sari iuaãtaã. ⁵ Iitopãkasaaki, Xesosi atapari itomaneri kãkiti apokaãpotini uamoni. Ininiã ĩpimaãri Piripi:

—Amonipa aiamotatariko komiri nakira kãkiti asikakienatini ĩkapani?

⁶ Xesosi ikara atoko txari Piripi, kotxi inirekari imarotini: “Atauako atxiĩti Piripi auikari niposotiire?” Xesosi imarotapekari iuaka ikamakiti tĩkane. ⁷ Ininiã Piripi apakapapireta:

—Txineiropokoni, tosẽtosi txineiro ota, kona apakata komiri aamotini, nakira kãkiti asikakienatini ĩkapani. !Apakata —itxari.

⁸ Iuasaaki āti Xesosi moianari Simão Petro itari, Ātree inakori, txari Xesosi:

⁹—Uai aua amarini. Auari ikiena. Sĩko komiri sevata inakori kamakori auari iua. Ipi ximaki axapitiri apaka auari uamoni. Txamari kãkiti itomaneri sikakienatiko !apakata. Ia nipokori poiãoka —itxari.

¹⁰ Xesosi paniātari imoianariakori:

—Nakira hĩpaniãta iitopãkinina —itxana.

Sotonaiakiperi auari iuaãtaã. Iua nopini iitopãkana. Sĩko mio apikomoni kikiakori aua.

¹¹ Xesosi kosekari komiri amarini nakiti. Iuasaakipeka imisãkiretari Teoso:

—Erekapitikari ia komiri auiniua ate.

Iua sikari imoianariakori. Eereka ninoa xanakari kãkiti topãkakanimoni. Iua atokokanera itxarina ximaki. Ikinikana inirekaka iaõka auana ninoa.

¹² Ikinimane kamitopeka inakasaaki, ĩpaniātari imoianariakori:

—Itetakori komiri, ximaki pakini hãpotiita. Kona hiomatapiriko —itxa.

¹³ Ininiã apotiitarina komiri itetakori. Tosi kotarina ixãpokakana komiri itetakori.

¹⁴ Xesosi posotiire ninoa kãkiti itikasaaki, ninoakakarika isãkirauatana:

—Atãopitikara Xesosi aiãtapanãtakitikara, Teoso sãkire sãpiretakari inakorikara ere Xesosi —itxana.

¹⁵ Xesosi imarotapekari ninoa nirekiniri iauitetinirina iua. Iua kona nirekari ninoa auitetiniri iua. Ninoa mamaikakaniri apisapanika, Xesosi sipeka iuanoka. Apikoxiti oxiratarimoni ikanika.

Xesosi Ipoa Nopini Inaãpotini
(Mateo 14.22-23; Marko 6.45-52)

¹⁶ Kikatapeka imoianariakori iokiriita ipoa tiniã. ¹⁷ Iereëtauana kanaua äki. İpiri-aãpotarina ipoa Kapanaoõ sitatxiti manapi. İkanõkapeka inakasaaki kona Xesosi apokapanika ninoamoni. ¹⁸ Kataparari itimati apoka, ininiã tsakatipokoni. ¹⁹ Iuasaaki imekoãpotana. İpixiniãpeka apokasaakina, ataparina Xesosi ipoa nopini itipokotini. Kanauamoni isaãpota. Ninoa pıkarauata, kotxi ninoa uãkatari kamiri.

²⁰ Xesosi akiritana:

—Notakara. Kona hıpıkarauatape —itxana.

²¹ Ininiã apakaparina Xesosi ipoxokoniritikana. Iua morõkokaua kanauaã. İereëtakasaakıua, iuasaakıpeka kanaua apoka imiriıpe Kapanaoõ manapi.

Kãkiti Nitiniri Xesosi

²² Katimatiniãkata ipiniãmoni kaikotakani nitamari Xesosi. Ninoa imarotari ätoka kanaua mitxi iuaã auini. Oa kanaua Xesosi moianariakori anıkapeka. Ninoa imarotari Xesosi kona sari imoianariakorikata. İmarotarina ninoanani sini. ²³ Iuasaaki kanauaniri Txiperiatxi sitatxitikini apokita Xesosi merepani Teoso misãkiretiniãtaã takote merepani komiri nikikoãtaã. ²⁴ Iuasaaki kona ninoa apokari Xesosi, imoianariakori apaka. Ininiã ninoa iereëtaua kanaua äki. Iuaikana ikanapiriãna. İpoa İpiriãtana Kapanaoõ sitatxitimoni, Xesosi initinina İkapani.

Komiri Kãkiti Auapininiika İnini Tikane

²⁵ Ninoa apokari Xesosi ipoa ipiniã.

—Koerekareri, namonikitapa papoka uai? —itxarina.

²⁶ İniniã Xesosi:

—Atão nisãpiretai hıte. Hıte nikari komiri nisıkakiti. Kamitopeka hıtxa, ininiã nipokori İkapaninokara hinitanãtano nota. Kona hãuikari Teoso posotiireë nikaminiri iua posotiiretxi.

²⁷ Xesosi pinitana:

—Nipokorinoka !hıxinıkape, kotxi nipokori okanani mauakati itxaua. Hıxinıkariko ätião nipokori, nota hıtari iaxitikiri siãkiti, kotxi nota sikari kãkiti, kãkiti auapininiika inini tıkane. Teoso sikari ikinika iposotiire notamoni ninirekaãkiti nikamini İkapani —Xesosi txana ninoa.

²⁸ —Kiãtokopa atxatari Teoso nireëkiti akamini? —itxana ninoa.

²⁹ —İanoka Teoso nirekari hıkamini. Iua nirekari hãuikiniri iua iokanatakiti sãkire —Xesosi txana ninoa.

³⁰ —İuaikana posotiiretxi apiari pikaminiã, ininiãra aãuikari Teoso iokanatakiti pininiãua. Kinakaripa posotiiretxi pikamapanika? ³¹ Anirimaneni kitxakapiriãkarini äparaã makıpakaniãtaã auakasaakina, inıkarina komiri iaxiti katxakakari. Teoso sãkire iõkatsopatakori txari:

İsikari komiri Teoso tixinekiri ninoamoni,

—itxarina Xesosi.

³² İniniã Xesosi:

—Atão nisãpiretaiko hıte. Kona Moisesini sikari komiri Teoso tixinekiri. Nirikara sikaãtari atão komiri iua tixinekiri kãkitimoni. ³³ Teoso tixine İkari, iua äkiri, komiri atoko itxa, ikini itixiti auakani İkapani, kotxi iua sãkire auiãkani auapininiika Teosokata —itxana.

³⁴ —İkiniõtika pisıkaua ia komiri —itxarina.

³⁵ —Notakara iua komiri Teoso iokanatakiti nitxaua. Notakara sikari kãkiti auini İkapani. Iua nisãkire auiãkari !inatxitaika. !İposonataika.

³⁶ —Hıte aõkitapekano nota, txamari kona hıte auıkapanıkarı nisãkire. İkara atoko nitxapekai hıte. ³⁷ İmakinika kãkiti notamoni Teoso siãkini inapitikako notamoni.

“Hīsipeka,” kona nitxana notamoni apoākani. ³⁸ Nitakanapari Teoso tixine. Īkorapokoriti napoka, nipaniātakiri nirekaākitinoka nikamini ĩkapani. Notaka nirekaākiti na nikama. ³⁹ Niri nipaniātakiri !nirekari ātika kākiti notamoni isiākini ereēkokini. Itixi xipokini ōtisaaki, inirekari nota ōkitikinina ninoa auapininiika inini tĭkane. ⁴⁰ Iua nipaniātakiri nirekari nota imarotakani, nisākire auiaākani, auapininiika inini. Itixi xipokini ōtisaaki nōkitikana ninoa iuaĭkana auāki inini —itxa Xesosi.

⁴¹ Ninoa Xoteoakori kona apokaerekatari Xesosi sākire, kotxi iua txari: “Nota iua komiri Teoso tixine ĩkari komiriti nitxaua,” ininiā ninoa tsoata. ⁴² Ininiā ninoa:

—Iua kiki Xesosi Xosee ākiri. Aaōkitapekari iri, inoro pakini. Kinirepa “Teoso tixine ĩkarirano” itxape iua? —itxana, itsoatinina.

⁴³ Ininiā Xesosi txana:

—Kona himaxirauatape. Kona hĭtsoatape. ⁴⁴ Niri nipaniātakiri akiritakitinanira posotari inini notamoni. Niri makiritakinini kona posota inini notamoni. Itixi xipokini ōtisaaki nōkitikana notamoni apoākani iuaĭkana auinina ĩkapani. ⁴⁵ Kitxakapirĭka Teoso sākire sāpiretakani iōkatsopatari ia Teoso sākire:

Teosorako oerekariko ikinipoko kākiti.

Niri sākire kĭpitakani, niri oereēkini, apoka notamoni. ⁴⁶ Kona aua kākiti niri atamatakari. Nota Teoso tixine ĩkari, notanokara atamatapekari niri.

⁴⁷ —Nota sākire auiaākari, iuara auapininiika Teosokata. Ia nisākire atāo. ⁴⁸ Nota iua komiri nitxaua kākiti auapininiika inĭkitakakarino. ⁴⁹ Hinirimane kitxakapirĭkarini nikari komiri iaxiti katxaākari āparaā makipakaniātaā. Iaxiti katxaākari inikanimana, txanima ipĭpena. ⁵⁰ Kākiti nikiniāri atāo komiri Teoso tixine ĩkari kona ipina. ⁵¹ Iua komiri, Teoso tixine ĩkari nitxaua nota. Kākiti auapininiika inĭkitakakarino nota. Ia komiri niākari auapininiika itxako. Ia komiri nisikakiti ia niĭtokara. Niĭto nisika kākiti ĩkini itixiti auakani auapininiika inini tĭkane —itxa Xesosi.

⁵² Ikara atoko ininiā ninoa Xoteoakori taparakienatakakaua:

—Natokopa itxa ia kiki iĭto isikiniua ate, anikiniri ĩkapani? —itxana.

⁵³ Ininiā Xesosi:

—Atāoenepitikara ikara atoko nitxai hĭte. Hĭtari iaxitikiri ĭto himanikakanisaaki, iarēka himiātakanisaaki, kona hĭxinire auapani ātipirika. ⁵⁴ Iua niĭto niākari, niarēka iātakari, auapikako Teosokata. Xipokatxi ōtisaaki nōkitikariko iua iuaĭkana auini ĩkapani. ⁵⁵ Niĭto atāo komiri itxaua. Niarēka atāo iāriā itxaua. ⁵⁶ Niĭto niākari, niarēka iātakari, aua nākixinireē. Nota aua iua ākixinireē. ⁵⁷ Niri, ātipirika auapika inakari, iokanatanota nota ĩkorapokoriti. Iuara sikano nota ātipirika nauini ĩkapani. Iua atokotxikana nota sikari nota niākari ātipirika auini ĩkapani. ⁵⁸ Nota iua komiri Teoso tixine ĩkari nitxaua. Komiri hĭkiomaneakorini nikakiti ātiāo. Iua komiri nikakari ipĭpe. Nota siākiti komiriti niākani, nisākire auiaākani auapininiika Teosokata itxanako.

⁵⁹ Ikara atoko itxa Xesosi sākire aiko āki Xoteo apotiitiniātaāua Kapanaoō sitatxiti oerekarauatakasaaki.

Apanakini Takanapiniri Xesosi

⁶⁰ Xesosikata sikani isākire potxitakani, ikara isākire ikenakotakasaakina, ipimarauatakakana:

—Pamimari ikara isākire. Kipa imarotari ikara atoko inakari sākiretxiti? —itxana.

⁶¹ Masāpiretakotika Xesosi imarotari ikara atoko itsoatinina. Ininiā iua:

—Hinirekatari hĭtakanapinino nota ia nisākire xika? ⁶² Kiātokopa hĭxinikakiti hĭtikiniāno nota hĭtari iaxitikirino kanĭkini mitxi nauiniātaā? Atxiĭti iuasaaki hāuikatari nisākire? ⁶³ Iua Erekar Matamatakotinokara sikari kākiti auini tĭkane. Kākiti ĭto tapara ! auari. Ikara sākiretxi hĭtemoni nisāpiretakiti, iua Erekar Matamatakoti sākiretxikana. Nisākire auikiko auākitakari kākiti, ātipirika Teosokata auini ĩkapani. ⁶⁴ Txamari auapitika hĭte sauaki nisākire mauiaākani —itxa Xesosi.

Merepitipanika Xesosi imarotapekari iua sākire mauiaākani tĭkane. Xesosi imarotari apaka imĭkapiritakiri tĭkane.

⁶⁵ —Niri Teoso masakaposotiiretakinini kona iposota apokini notamoni —itxa Xesosi.

⁶⁶ Ikara isãkire xika itori Xesosikata sikani takanapari iua. Kona inirekaikarina iuakata isinina. ⁶⁷ Ininiã Xesosi pimaãna imoianariakori tosi:

—Hĩtepekana, hĩte apaka nirekatari hĩtakanapinino? —itxa Xesosi.

⁶⁸ Ininiã Simão Petro apakapapiretari:

—Apiananiri, kirimonipa asa atxiĩti? Pitenanira sãpiretari kãkiti auapininiika inini.

⁶⁹ Ate imarotari Teoso mereẽkiti pininiua. Teoso ãkiri, auapika inakari ãkiri pitxaua pite —Petro txari Xesosi.

⁷⁰ Ininiã Xesosi:

—Nota mereẽi hĩte tosi kikiakori. Txamari hĩte sauaki aua Satanasi nitiri —itxa Xesosi.

⁷¹ Iuasaaki Xesosi xinikari Xotasi Isikariotxi inakori, Simão inakori ãkiri. Xesosi moianarikamara iua, txamari imikapiritariko Xesosi.

7

Xesosi Itariakori Mauikakaniri Isãkire

¹ Eereka Xesosi kaikotapanika Kariréia tōpa. Kona Xotéia tōpa !ikaikota iuasaaki, kotxi iuaã Xoteo auĩteakori nirekari okiniri. ² Iuasaaki Xoteo kiinirite Papiri inakori kaiama atokopekari. ³ Ininiã Xesosi itariakori misãkiretari iua:

—Posipika uai. Pisãkire auĩãkanimoni Xotéia auakanimoni pisa. Ninoa apaka nirekari itikiniri pikamakiti. ⁴ Kãkiti nirekiniãri iteene imarotaãka, !ikipatari ikamakiti. Pite kamanãtari posotiiretxi uai Kariréia tōpa. Pisa Xotéiamoni. Iuaã poerekari piposotiire ikinimane imarotiniĩ ikapani —itxana.

⁵ Ikara atoko itxarina Xesosi, kotxi itariakori apaka iuasaaki kona auikapanikari isãkire.

⁶ Ininiã Xesosi apakapapiretana:

—Iuaã nisini keto kona apokapanika. Apakata ikiniõtika Xotéia tōpamoni hĩte sini,

⁷ kotxi kãkiti !omanatai hĩte. Notananira omanataãka, kotxi nisãpiretari maerekati kãkiti kamakiti. ⁸ Erekarĩ hĩte sini kiinirimoni. Kona nota sapani uatxa. Nisini manapi apokasaaki nisa —itxa Xesosi.

⁹ Itariakorimoni ikara inaka atoko, ikaikotapanika Kariréia tōpa.

Xesosi Sari Papiri Kiiniritimoni

¹⁰ Itariakori kiinirimoni ãkiikapeka. Ninoa tikinimoni isa Xesosi. Iuasaaki !kasãpirenari kiinirimoni isini tĩkane. Ininiã kãkiti mimarotakinĩtika isa.

¹¹ Xoteo auĩteakori nitapiimari Xesosi kiinirisaaki. Ipimaãri kãkiti:

—Itapari Xesosi?

¹² Kãkiti iuaã auakani sãkirauata Xesosi pirena. Apanakini txari:

—Peerekari Xesosi.

Apanakinipekana:

—Kona erekari. Imisirienetari kãkiti —itxana.

¹³ Kona kãkiti sãkirauata Xesosi uãka Xoteo auĩteakori takote, kotxi ipĩkana.

¹⁴ Mapaõtinoka kiiniri xipokini apisapanika, Xesosi sari Xotéia tōpamoni. Isari Teoso misãkiretiko aikotimoni. Iuaã oerekarauata. ¹⁵ Xoteoakori tsorĩkaãnãta Xesosi sãkire ikenakotakasaakina:

—Kininiãpa ere kiki paimatireri. Kona apaiaõkarauata —itxanãtana.

¹⁶ Ininiã Xesosi apakapapiretana:

—Na nota imaroreni noerekai hĩte. Iua niokanatakiri imarorera noerekai hĩte.

¹⁷ Kãkiti Teoso nirekaãkiti nirekaãkani imarotari noerekiniri Teoso imarorenoka. Ninoa imarotari nimoerekakaniri notaka nimarore. ¹⁸ Kãkiti iuaka isãkire sãpiretakari nirekari apanakini iuikiniri iua. Kãkiti Teoso sãkirenoka sãpiretakari nirekari iuikiniri Teoso ipaniãtakiri. Ikara atoko inakari kãkiti sãkire atãonoka. !Ikamari maerekati. ¹⁹ Moisesini oerekai hĩte Teoso sãkire, ipaniãtakiti iõkatsopatakori. Txamari kona hĩte kamari Teoso paniãtakiti. Kona ãtika hĩte kamari ipaniãtakiti, kotxi hinirekari hõkinino nota —itxana ninoa.

²⁰ Ininiã ninoa apakapapiretari:

—Maerekati matamatakoti auaitotai pite. Kiripa kinirão okaka txai pite? Iua maerekati matamatakoti xika ikara atoko pitxa pisãkire —itxarina.

²¹ Ininiã Xesosi:

—Nota kamari posotiiretxi tomatikoõtxitisaaki, iua kiki matipokotakati nimakanani-takasaaki, ininiãkara hite tsorikaãta. Hiuãkatari nipařikauatini. ²² Txamari hite apaka pařikauata tomatiko õtisaaki, kotxi hikamari Teoso takaõtxikare hamarite itoã tomatiko õtisaaki. Moisesini paniãtai Teoso takaõtxikare hikamini hamarite itoã oito õti iua auakasaaki. Ari hinirimane kitxakapirařikarini, Moisesini apisapanika, oerekepekari ikara atoko inakari hikamini. ²³ Ininiã hite kamari Moisesi paniãtakiti tomatikoõtxitisaaki. Ikara atoko ininiã, kinirepa hite omanatano nota, iua kiki erekepeka nitxikitakini xika tomatikoõtxitisaaki? ²⁴ Iteene pimimarotakanisaakiri aři kamakiti, kona pakiritapiri: “Iua kamari maerekati,” kona pitxape. !Papořtapiri aři. Atão inakarínoka pinita, atão pimarotini ikapani —itxa Xesosi.

Xesosikani Teoso Mereẽkiti Txataua?

²⁵ Apanakini kãkiti Xerosareẽ auakani txanãtari:

—Ere kikikani ninoa kinirão okaenetakitikani? ²⁶ Hãtamatarari. Iua sãkiruanãta kãkiti apisatoõ. Kona kapikareri iua. Auřtetxiakori lkasãkirena. Atauako aãuřteakori auikatarari isãkire atxiřti? Atxiřti auikatarina Xesosi Teoso mereẽkiti aiãtapanãtakiti ininiãua? ²⁷ Atão Teoso mereẽkiti aiãtapanãtakiti apokasaaki, kona kimarotikori iua ininimoni. Ate amakinika imarotapitikari iua Xesosi ininimoni. Karirãiakiri iua, ininiã Xesosi Teoso mereẽkiti aiãtapakiti litxaua —itxanãtana.

²⁸ Teoso misãkiretiko aikotiã Xesosi oerekaruanãtakasaaki, itapasãkireritika ipi-maãna kãkiti iuaã auakani:

—Atauako hite imarotatano nota? Atauako himarotatarari nota ininimoni? Kona notaka iokanataua kãkitimoni. Niokanataãka. Nota paniãtakari atãonoka isãkire. Kona hite imarotarari iua. ²⁹ Nota imarotarari iua, kotxi iua auiniãtaãkirikarano nota. Iuara iokanatanõ kãkitimoni —itxa Xesosi.

³⁰ Iuasaaki auřtetxiakori nirekamari imařkinirina. Kona kamařkikori, kotxi imařkiko manapi kona apokapanika. ³¹ Ninoa auřtetxiakori kona auikari Xesosi sãkire, iuaritika itomaneri kãkiti auikari Xesosi Teoso mereẽkiti kãkiti iãtapakiti ininiua.

—Iua kiki inipitikara Teoso mereẽkiti aiãtapakiti itxaua, kotxi aři posotiiretxi apiari kamakari !auari —itxanãtana.

Sotatoakori Iokanatiko Xesosimoni

³² Pariseoakori kenakotakasaakiri kãkiti sãkire ikara atoko inakari, ninoa, sasetotxi auřteakori pakini iokanatarari sotatoakori Xesosi imařkinina ikapani.

³³ Sotatoakori apokasaaki iuamoni, Xesosi txari kãkiti iuaãtaã:

—Mapaõřtinoka hitekata nauako. Eereka nisa nipařiakirimoni. ³⁴ Hinitapiikamano, !hãpokapanino. Nisinimoni kona hite posotarari hĩsini —itxa Xesosi.

³⁵ Auřtetxiakori ninoakakarika isãkirauatana:

—Amonipa isa atxiřti, ate mapokakaniãri iua? Atauako õtakoxiti isatako Xoteoakori iarikakanimoni, aři uãka sauaki Xoteoakorimoni? Atauako oerekatari Xoteo minakanuia? ³⁶ Kotxi iua sãkire: “Hinitanoko. !Hãpokano nota. Kona hite posotarari nota sinimoni hĩsini,” itxa sãkireta. Ate limarotarari isãkire —itxanãtakakana.

ãparaã Kãkiti Auãkitaãkari

³⁷ Kiiniri mapotõkire õti apiapoxokonita. Iua õti Xesosi tima kãkiti sauaki. Itapasãkireritika isãpirenauata ikinimane kenakotiniri ikapani:

—Piposonatakasaaki, notamoni pinako piãtini ikapani. ³⁸ Teoso sãkire iõkatsopatakori txari:

Nota sãkire auiařkari ãkixinireẽ aua amomo atoko inakari. Iua ãparaã txikitakari kãkiti auãki inini.

—itxa Xesosi.

³⁹ Iua Erekarari Matamatakoti amomo atoko itxa. Xesosi sãkire auiařkari apakapariko iua Erekarari Matamatakoti. Iuasaaki Xesosi sãkirauatakasaaki, iua Erekarari Matamatakoti kona siãkapanika kãkitimoni, kotxi Xesosi kona kanapiriãpanika Teoso tixinemoni.

⁴⁰ Ikara Xesosi sãkire ikenakotakasaaki itori kãkiti txari:

—Atãopitikara ikira kiki Teoso sãkire sãpiretakari aiãtapakiti itxaua.

⁴¹ Apanakini txari:

—Iua Teoso mereẽkiti aiãtapakiti itxaua.

Apanakinipekana:

—Teoso mereẽkiti aiãtapakiti, Kariréiakiri !itxaua. ⁴² Teoso sãkire iõkatsopatakori sãpiretari Teoso mereẽkiti aiãtapakiti, Taviini apika mekaniri itxaua. Iua iponaniãko Pereẽ sitatxiti Taviini auiniãtaã —itxana.

Ikara atoko itxanãtana, kotxi kona imarotarina Xesosi iponaniiniãtaã Pereẽ sitatxiti.

⁴³ Iuasaaki apanakini auikari Xesosi sãkire. Apanakinipekana !auikari Xesosi sãkire.

⁴⁴ Apanakini nirekamari imaĩkiniri Xesosi iuasaaki, iuaritika iua maĩkakari !auari.

Sotatoakori Kanapiriã Xoteo Auĩteakorimoni

⁴⁵ Ininiã sotatoakori kanapiriã sasetotxi auĩteakorimoni, pariseoakori pakinimoni. Ininiã ipimaãna:

—Kinirepa kona himinari Xesosi uaimoni?

⁴⁶ —Apia imatiresãkireta iua. !Auari kãkiti iua atoko ina sãkiretakari, ininiãkara !apakata amaĩkiniri iua —itxana sotatoakori.

⁴⁷ Ininiã pariseoakori omanãkarauata.

—Atauako iua misirienetai hĩte apaka? Iua txĩkitakai hĩte isãkire hãuikini. ⁴⁸ !Auari auĩtetxi iua sãkire auĩãkari. !Auari pariseo iua sãkire auĩãkari. ⁴⁹ Kãkiti miĩkitetinanira auikari Xesosi sãkire. Xesosi sãkire auĩãkari kona imarotari Moisesini paniãtakiti. Ininiãkara Teoso misiritanako ninoa —itxa pariseoakori sãkire.

⁵⁰ Iuasaaki Nikotemo inakori iuaãtaã aua. Pariseo itxaua. Iua õti apisapanika iuara sari Xesosimoni iãkanõka imisãkiretiniri iãapani. Ninoa ikara atoko isãkirauatakasaaki, Nikotemo misãkiretana ninoa:

⁵¹ —Kãkiti kamakiti isãpiretini apisapanika, “maerekati ikamakiti,” kona hĩtxape. Ikara atoko itxa Moisesini oerekasaakia ate —itxana.

⁵² Ininiã ninoa pariseoakori:

—Atxiĩti pite Kariréiakirikai apaka, Xesosi atoko? Iteene patatsopatariko Teoso sãkire iõkatsopatakori. Iua iteene patatsopatakasaaki, iuasaakiikarako pimarotariko !auari Teoso sãkire sãpiretakari, Kariréia tõpakiri —itxarina iua.

⁵³ Eereka ikinimane sari aapokomonina.

8

Sito Õtaniri Minakotikatika Sirĩkakaro

¹ Iuasaaki Xesosi sari Orivanape Xiratamoni. Oriva txipokori. ² Katimatinĩkata ikanapiriã Teoso misãkiretiko aikotimoni. Iuasaaki ikinipoko kãkiti apotiitaua iuamoni. Ininiã Xesosi topãka, Teoso sãkire isãpiretini iãapani. ³ Iuasaaki kaiõkatsopareriakori, pariseoakori pakini minaro sito iuamoni. Ninoa apokaro oa sito õtaniri minakotikatika osirĩkini. Itakaronã oa ikinimane apisatoõ.

⁴ —Koerekareri, aãpokaro oia sito õtaniri minakotikatika osirĩkini. ⁵ Moisesini sãkire iõkatsopatakori paniãtaua ikara atoko inakaro kai soroã oõkaãka. Pitepekana, kiãtokopa atxataro oa? —itxana Xesosimoni.

⁶ Ikara atoko ipimaãrina Xesosi, kotxi inirekarina Xesosi kerokiniri isãkire. Inirekarina Moisesini paniãtakiti iaõka imakamakaniã, ininiã maerekati ikamapeka. Txamari !kasãkireri Xesosi. Iokirita, iõkata itxari kipatxi iuakokiã. Imakenakotakinini atoko itxa.

⁷ Ipimarauatapanikana, ininiã Xesosi õkaõkitaua.

—Maerekati makamakaturako iikiika kiporonakiniro aroa kai soroã —itxa Xesosi.

⁸ Eereka Xesosi iuaĩkana iokirita, iõkata itxari kipatxi. ⁹ Ninoa ikaraene ikenakotakasaakina, iua apiata kiomãtxi inakariua sipeka. Eereka iua tikini auakari apaka sipeka. Ikara atoko itxaãpotana ikinikana isinina. Eereka Xesosinoka kaikota oa sitokata.

¹⁰ Xesosi õkaõkitaua, atamata itxaro oa sito. Oanoka kaikota iuaã.

—Itapari pimaerekani sãpiretakani? —itxaro.

¹¹ —Apiananiri, isipekana nimaerekani sãpiretakani —otxari.

—Nota apaka kona sãpiretari pimaerekani. Pisipeka. Maerekati kona pikamapinikako —itxaro.

Kãkiti Xinire Iopiniãkari

¹² Eereka Xesosi iuaĩkana oerekari kãkiti.

—Nota ikini itixiti auakani tirikapite atoko nitxaua, kotxi noerekari Teoso sãkire notakata sikani. Teoso mimarotakani ipiaã sikani itxauana. Notakata sikanipekana ! itĩpokota ipiaã. Nota sikana ninoa ãtipirika auinina ĩkapani —itxa Xesosi.

¹³ Ininiã pariseoakori misãkiretari Xesosi:

—Kona ate auikapiretari pisãkire, kotxi pitenani sãpiretari pisãkire. Ikara atoko ininiã, kona aimarotari atãoene inini pisãkire. Āti sãpiretiniãri pite sãkire iaõka, aãuikari atxiĩti —itxarina Xesosi.

¹⁴ Ininiã Xesosi:

—Nota sãkirekara ikara atoko nitxai hĩte, iuaritika atãoenekara ikara atoko nitxai hĩte, kotxi nota imarotari nininimoni, nimarotari nisinimoni. Kona hĩte imarotari nota ininimoni. Kona hĩte imarotari nota sinimoni. ¹⁵ Kãkiti hĩtxaua, ininiã hãpoĩrauata, kotxi !himarotari atão. Kona nota txari kãkitimoni: “Pite, peerekai pite. Pitepekana, !erekai pite.” !Ikara atoko !nitxari kãkiti. ¹⁶ Iuaritika nisãpiretakasaakiri kãkiti kamakiti, atãonoka nitxa nisãkire, kotxi kona notananini sãpirenauata. Niri niokanatakiri sãpiretakitixikana nisãpireta. ¹⁷ Kitxakapirĩka hĩteka kiomanekorini sãkire iõkatsopatakori txari:

Kãkiti itikakitixikana ãti itikakiti. Ninoa ipi sãkire ãtinoka auiniã, ininiã ninoa sãkire atãonoka itxa,

itxa hĩkiomane sãkire. ¹⁸ Nota sãpiretari nota pirena. Niri niokanatakiri apaka sãpiretari nota pirena nisãkiretxikana, ininiã ipi auape —itxa.

¹⁹ —Naniparari piri? —itxarina.

—Kona himarotano nota. Niri apaka kona himarota. Nota himarotaãkamako, niri apaka himarotamako.

²⁰ Ikara atoko Xesosi sãkirauata. Txineiro Teoso ĩkapani sikikoãtaã takote Xesosi oerekarauata Teoso misãkiretiko aikotiã. Xesosi ikara atoko isãpirenauata, iuaritika kona kamaĩkikori, kotxi imaĩkiko manapi kona apokapanika.

Xesosi Sinimoni Kãkiti Masikani

²¹ Iuaĩkana Xesosi misãkiretari kãkiti:

—Nisipiriko. Eereka hinitapiimano. Nota sinimoni !hãuiritaãka hĩsini. Hĩpinakasaaki, himaerekanikatika hĩpinako —itxa Xesosi.

²² Xoteo auĩteakori napetari:

—Atauako iuaka okatauako? Kotxi iua txari: “Nota sinimoni kona hãuiritaãka hĩsini” —itxana ninoa.

²³ Iuaĩkana Xesosi sãkirauata ninoamoni:

—Īkoraxitikinirai hĩte. Nota itanokiri. Hĩte ĩkora itixikinirai hĩte. !Īkoraxitikirino nota. ²⁴ Ikara atoko ininiãkara, nota txai hĩte: “Hĩpinakasaaki himaerekanikatika hĩpinako,” nitxai. Himauikakanisaakiri nisãkire nota pirena, hĩpinakasaaki himaerekanikatika hĩpinako. Kona Teoso makatxakinii himaerekani —Xesosi txana ninoa.

²⁵ —Kiriparai pite? —itxarina Xesosi.

—Merepitipanika nisãpiretakitikara iuakarano nota. ²⁶ Nisãpiretakiti tĩkane hĩte maerekani nisãpiretini tĩkane kaiãopokori. Nota iokanatakari atãoenekara isãkire. Iua sãpiretakitinokara nisãpiretari kãkiti itixi auakani —itxa Xesosi.

²⁷ Ninoa !imarotari Xesosi iokanatakari aĩri Teoso. ²⁸ Ininiã Xesosi txana:

—Nota hitari iaxitikiri hõkasaaki, niĩto itano hõkitikasaaki, iuasaakiikarako himarotano kinakaripa nota. Iuasaaki himarotariko notaka sãkire !nisãpireta. Niri oereẽkitinokara nisãpireta. ²⁹ Iua niokanatakiri notakata aua. Niri !itapanano nota, kotxi inireẽkitinoka nikama —itxa Xesosi sãkire.

³⁰ Xesosi ikara atoko ina sãkiretakasaaki, itomaneri kãkiti auikari isãkire.

Õpoĩkakoni Pirena

³¹ Ininiã Xesosi sãkirauata Xoteoakorimoni iua sãkire auiãkanimoni.

—Nisãkire iaõka hĩkamakasaaki, atão nimoianariakori hĩtxauako. ³² Atão nimoianariakori hinakasaakia, himarotari atãonoka inakari. Atãonoka inakari himarotakasaaki, õpoĩkakoni atoko hĩtxaua.

³³ Ninoa apakapapireta:

—Apraõoni apika mekanirireua ate, ininiã anirekinimoni asa. Nitiritxi iamotakoni ! atxaua. Kinirepa õpoĩkakoni atoko pitxĩkitakaua? —itxana.

³⁴ Ininiã Xesosi:

—Atãonoka nitxai hĩte. Maerekanitxi nitiri atoko itxa kãkiti maerekati kamakari.

³⁵ Nitiritxi iamotakori ãtipirika lauari ipatrãote aapoko. Patrão ãkiri auapika ãtipirika iri aapoko. ³⁶ Nota Teoso ãkiri txĩkitakasaakiri kãkiti õpoĩkakori atoko ininiua, maerekanitxi nitiri litxaikauako. Iuasaaki iposotari erekari ikamini.

Apraõoni Apika Mekaniriakori

³⁷ —Nimarotari Apraõoni apika mekaniriakori hininiua, txamari hinirekari hõkinino. Nisãkire himauĩãkani xika hinirekari hõkinino. ³⁸ Nota sãpiretai hĩte nota iri oerekakiti. Hĩte kamari hĩte iri paniãtakiti —itxa Xesosi.

³⁹ —Apraõoni ate iri —itxana ninoa.

Ininiã Xesosi:

—Apraõoni apika mekaniriakori hininiãua, Apraõoni kamakiti atoko hĩkamamako.

⁴⁰ Atãonoka nisãpiretai hĩte. Teoso sãpiretakitinokara nisãpiretai, iuaritika hinirekari hõkinino. Apraõoni likamari ikara atoko inakari. ⁴¹ Hĩte kamari hĩte iri kamakiti atoko inakari —itxa Xesosi.

—Teosonanira ate iri. Ate atãopitika iua anaakori atxaua —itxana.

⁴² —Teoso atão hĩri ininiãua, nota hĩtoretamako, kotxi Teoso auiniãtaã nota ina uaimoni. Kona notaka iokanataua. Teosora iokanatano nota uaimoni. ⁴³ Kininiãpa !hĩkitetataru ikara atoko nininii? !Himarotari nisãkire, kotxi kona xatiki hinirekari nisãkire iaõka hĩkamini. ⁴⁴ Satanasira hĩri. Hĩte nirekari maerekati, Satanasira nirekiti iaõka hĩkamini. Kitxakapirika itixi kamiko atokopanika kokaniri itxaua Satanasira. Iua ! inirekari atãoene isãpiretini. Iposotari atãoene isãpiretini. Aãpirenanokara iua imarota, kotxi aãpirenaãri itxaua iua. Aãpirenaãri iri itxaua iua Satanasira. ⁴⁵ Nisãkire atão, ininiãkara hĩte !auikari nisãkire. ⁴⁶ Hĩte ãtika itikatari maerekati nikamini? ãtika !itikari maerekati nikamini, kotxi kona maerekati kona nikama. Ininiã kinirepa kona hĩte auikari nisãkire? ⁴⁷ Teoso anaakori kĩpitari iua sãkire. Hĩte kona kĩpitari iua sãkire, kotxi iua anaakori !hĩtxaua hĩte —Xesosi txana ninoa.

Xesosi Apraõo Apisapanika Auini

⁴⁸ Ininiã Xoteoakori txari Xesosi:

—Ate sãkire atão. Samariakiri pitxaua pite. Maerekati Matamatakoti auãitotai pite —itxana.

Ninoa akiriuãkatari Xesosi “Samariakiri,” kotxi Xoteoakori omanatana Samariakini.

⁴⁹ Ininiã Xesosi:

—Maerekati Matamatakoti kona auãitotano nota. Nota paxitari niri, txamari hĩte kona paxitano nota. ⁵⁰ Kona notani nitari kãkiti nota iuikakani tĩkane. Nirira nirekari kãkiti iuikinino nota. Nirira imarotari nisãkire atãonoka inini. ⁵¹ Nota sãkire iaõka kamakari ! ipina. Ikara atãoene.

⁵² Xoteoakori apakapapiretari:

—Uatxa aimarotari maerekati matamatakoti auãitotai pite, kotxi Apraõoni ipĩpe. Teoso sãkire sãpiretakanini apaka ipĩpe. Kinirepa pite sãkire: “Nota sãkire iaõka kamakari !ipina,” pitxa? ⁵³ Aĩrini Apraõoni ipĩpe. Pite apiata atxiĩti? Teoso sãkire sãpiretakanini apaka ipĩpe. Kiriparai pite? —itxarina Xesosi.

⁵⁴ Ininiã Xesosi:

—Notaka niuikiniua lapakata. Nirira iuikano nota. Hĩte sãkire: “Ateosone iua,” txamari nota irira iua. ⁵⁵ Kona himarotari Teoso. Notananira imarotari Teoso. Nota “kona Teoso nimarota,” nininiã, hĩte atokokamarako nitxamako. Aãpirenaãri nitxamauako. Nota imarotapitikari iua. Nota kĩpitari isãkire. ⁵⁶ Hĩri Apraõo poxokoniua, nota uai apokini ikenakoenetakasaaki. Iua itikari nota uai apokini, ininiã iua poxokoniua.

⁵⁷ Ininiã ninoa Xoteoakori: —Pite sīkoēta anokanani !apokapanika, iuaritika paōki-tatari Apraão? Paxirari pisākire —itxarina.

⁵⁸ —Apraão apisapanikara nota aua. Ikara atāoene nitxai hīte —itxa Xesosi.

⁵⁹ Ikara isākire ikenakotakasaakina, ikosekarina kai soro Xesosi ikiporonakinina ĩkapani, okinina ĩkapani. Xesosi kipataua. Osipikari Teoso misākiretiko aikoti. Inapaāpota ninoa sauaki.

9

Mōsiāreti Xesosi Erekapeka Inīkitakini

¹ Xesosi tīpokotakasaaki, itikari mōsiāreti. Iua ponaniākasaaki, mōsiāreti itxapekaua.

² Xesosi moianariakori pimaāri iua:

—Koerekareri, kiripa kamari maerekati iua mōsiāreti inini? Iuakani? Irikani? Inorokani?

³ Ininiã Xesosi:

—Kona iua maerekani xikani mōsiāreti itxaua. Kona iri maerekani xikani, kona inoro maerekani xikani mōsiāreti itxaua. Kona maerekanitxi xikani mōsiāreti itxaua. Iua mōsiāreti Teoso posotiire kākiti imarotini ĩkapanira. ⁴ Kākiti parīkauata pokamara. Mapiāpeka inakasaaki, kona kākiti posotaikari iparīkauatini. Iua atokokana akamariko niokanatakiri paniātakiti aūapanika anakasaaki. Apinaka atoko kona akamaikari Teoso paniātakiti ĩkorapokoriti. ⁵ ĩkorapokoriti nauakasaaki, niopinikana ikinimane ākixinire Teoso imarotinina ĩkapani —itxa Xesosi.

⁶ Ikara inaāka atoko ienemaā ixiti oakaka Xesosi. Ikamari ākape, minapa itxari mōsiāreti oki nopini. ⁷ Iokanatarari:

—Parokari poki Siroee poamoni —itxari mōsiāreti.

Iuaā auari ipoa xapitikiri kākiti kamakiti. Iua ipoa uāka “Siroee.” Iua uākatxikana “Iokanatakori” itxaua. Iua sari Siroeemoni. Arokatoōtaua. Iuasaakipeka kōsiārepeka itxa.

⁸ Aapoko takote auakani, kākiti mitxi mōsiāreti itikakani pakini, ninoa misākire-takakaua:

—Ikira kiki mitxi iitopākanātapika inakarikani, kākiti txineirote amanaānātapika inakarikani, ikira kiki? —itxana.

⁹ Apanakini apakapapiretari:

—Ari, iuapitikara.

Apanakinipekana apakapapiretari:

—Kona. Kona iuani. Āti kiki iua mōsiāreti atoko inakarira.

Iua mitxi mōsiāreti apakapapiretari:

—Ari, iuapitikanano nota —itxa.

¹⁰ Ininiã ninoa:

—Kiātokopa pitxa uatxa kōsiārepeka pitxapeka? —itxarina.

¹¹ —Iua Xesosi inakori kamari ākape, nokiā minapa itxari. Ipaniātano: “Āparaā Siroee inakorimoni pisa. Iuaā parokatoōtaua,” itxano nota. Ininiã nisa. Narokatoōtaua. Iuasaakipeka nota kōsiārepekano —itxa.

¹² —Namoniparari iua? —itxarina.

—A, meta —itxa iua mitxi mōsiāreti.

Pariseoakori Mitxi Mōsiāreti Inakarikata

¹³ Ninoa anikari iua mitxi mōsiāreti pariseoakorimoni. ¹⁴ Iua ōti Xesosi kamakasaakiri ākape mōsiāreti kōsiārepeka inīkitakini ĩkapani tomatiko ōtisaaki iuasaaki. ¹⁵ Ninoa anikasaakiri iua mitxi mōsiāreti inakari pariseoakorimoni, pariseoakori apaka pimaāri iua:

—Kininiāpa uatxa kōsiārepeka pitxa? —itxana.

—Ākapeēra noki nopini iminapa. Eereka narokatoōtaua. Uatxa kōsiārepeka nitxa —itxa.

¹⁶ Pariseoakori ātikaka txari:

—Iua kiki, ākape mōsiāreti oki nopini minapakari, kona iua kamari Teoso paniātakiti, kotxi iparīkauata tomatiko ōtisaaki. !Apakata ikamakiti.

Pariseoakori ãtikakapekana sãkirauata:

—Maerekati kamakari kona kamari ikara atoko inakari posotiiiretxi, mõiããreteti kõiããrepeka inĩkitakini.

Ininiã pariseoakori taparakienatakakaua ikara xika. ¹⁷Iuaĩkana pariseoakori misãkiretari iua kiki:

—Kiãtokopa inakaripa iua kiki pite makananitakari? —itxarina iua.

—Teoso sãkire sãpiretakari itxaua iua.

¹⁸Xoteo auĩteakori kona auikari isãkire, mitxi mõiããreteti eereka kõiããrepeka inakari sãkire. Ininiã ninoa akiritari iri, inoro pakini.

¹⁹—Hĩte sãkire hamarite auakasaaki mõiããreteti itxapekaua. Hamaritekani ere? Kiãtokopa uatxa kõiããrepeka itxa? —itxana.

²⁰—Ari, ate ãkiripitikara. Iponaniãkasaaki, mõiããretipeka itxaua. ²¹Kona ate imarotari kiriãpareuako uatxa kõiããrepeka itxa. Kona ate imarotari kiriuako kamari kõiããrepeka inini. Hĩpimaãri iua, kotxi mitapekari iua. Iuaka apakapapiretai hĩte —iri, inoro pakini txana ninoa.

²²Iri, inoro pakini ikara atoko itxana Xoteo auĩteakori ipĩkinina xika. Xoteo auĩteakori sãpiretakekari kãkiti: “Kãkiti Xesosi sãkire auĩãkani, Teoso mereẽkiti ininiua auĩãkani, kãkiti iãtapakiti ininiua auĩãkani, kona auiritaãkaikana ĩroinina aiko Xoteo apotiitiniãtaãua.” ²³Ininiã pĩkaretxi xika iri, inoro pakini txari: “Hĩpimaãri iua. Mitapekari iua,” itxana ninoa.

²⁴Ininiã iuaĩkana pariseoakori akiritari iua kiki mitxi mõiããreteti inakari.

—Atãonanira pisãpiretako Teoso apisatoõ. Ate imarotari maerekatinoka ikamini Xesosi, kotxi imakananirauata tomatiko õtisaaki —itxarina.

²⁵Ininiã iua:

—Kona nimarotari maerekati ikamini. Kona nimarotari erekari ikamini. Mitxipeka mõiããreteti nitxaua. Uatxa kõiããrepeka nitxaua. Ikaranoka nimarota —itxana ninoa.

²⁶—Kiãtokopa itxai kõiããrepeka inĩkitakiniãi?

²⁷Iua mitxi mõiããreteti inakari apakapapiretari:

—Nisãpiretakekai hĩte mixikanani, txamari !hãuikari nisãkire. Kinirepa hinirekatari iuaĩkana nisãpiretiniĩ? Atauako hĩte apaka nirekari iua sãkire hãuikini? —itxana.

²⁸Ininiã itxitarina:

—Pĩtera auikari iua sãkire. Ate auikari Moisesini sãkire. ²⁹Aimarotari Teoso misãkiretari Moisesini. Iua Xesosi kamari maerekati. !Aimarotari amonikiripa iua ina —itxana.

³⁰Iua kiki apakapapiretari:

—Anekani. Kona hĩte imarotari amonikiriũako iua ina. Iuara kamaõsiãretano nota. ³¹Teoso kona maãkatari maerekati kamakari amanaãkiti. Teoso teosonetakani amanaãkiti imaãkatapĩtika. Iua nirekaãkiti kamakari amanaãkiti imaãkatapĩtika.

³²Mitxipeka mõiããreteti kõiããrepeka inĩkitaãkari kona auari. Itixi kamikosaakipanika ! auari kõiããrepeka inĩkitaãkari. Uatxaikara auape. ³³Xesosi Teoso iokanatakiti iminakanimauako, !kamamariko posotiiiretxi —itxa iua.

³⁴Ininiã pariseoakori:

—Pite maerekatipeka auakarikai. ãtipirika pite kamari maerekati. Maerekatinoka pĩkiteta. Iuaritika pinirekatari ate poerekini? Konapĩtini. Kona ate nirekari ikara pisãkire. Pisipiniĩkaua. Kona uai pikanapiripinika. Ate kona nirekari pite uai kãkiti apotiitiniãtaãua aikoti pinini —ninoa txari iua.

Ininiã aiko porikiti iokanatarina.

Mitxi Mõiããreteti Inakari Auikiniri Xesosi Sãkire

³⁵Xesosi kenakopiretari iporikiti iokanatikito mitxi mõiããreteti inakari, ininiã Xesosi nitari iua. Apokasaakiri, itxari:

—Atauako pauikatari Teoso ãkiri sãkire? —itxari.

³⁶—Kipa iua? Nimarotiniãri, nauikapitkariko —itxa.

³⁷—Pite aõkitapekari Teoso ãkiri. Iuapitikara misãkirenãtai pite uatxa —itxa.

³⁸—Apiananiri, nota auikari pite Teoso ãkiri pininiua.

Ininiã iua kapotoreẽkaua Xesosi apisatoõ.

³⁹—Ïkorapokoriti napoka Teoso sãkire auiaãkani ipinimoni nitakinina ïkapani. Isãkire mauiaãkani ipinimoni nitakinina ïkapani napoka ïkorapokoriti. Apanakini nisikaposoti-ireta, Teoso sãkire auikinina ïkapani. Mítxi ninoa mõiãreti atoko itxauana, kotxi mitxi !imarotarina Teoso. Ninoa auikapiretakasaakiri Teoso sãkire, kõiãreri atoko itxapekauana. Apanakinipekana atão minakati isãkirena: “Nimarotapitikari Teoso.” Ninoa uãkatari kõiãreri atoko ininiuana. Txamari kona atão ninoa nirekari imarotiniiri Teoso. !Nisikari posotiiretxi ninoamoni, Teoso sãkire auikinina ïkapani. Kãkiti iua atoko inakari mõiãreti atoko itxaua —itxa Xesosi.

⁴⁰ Ætikaka pariseoakori Xesosi takote auakani kenakotari.

—Atauako atekani apaka mõiãreti atoko atxaua? —itxana.

⁴¹—“Mõiãreni atoko atxaua,” hininiã hĩsãkire, ininiã atão hĩsãkire. Txamari hĩte txari: “Kõiãreua ate,” hĩtxama. Iua atoko hininiã hĩkamapitikari maerekati, kotxi kona hãuikari Teoso sãkire —Xesosi txana ninoa.

10

Soti Auĩte Pitikiri

¹ Xesosi sãkirauatakasaaki, ia atoko itxa isãpirena:

—Atãopitikara ia atoko nitxapaniiko hĩte. Soti auĩte ïroã pirikeri itoremoni. Itoremoni mĩiroãkani kiĩtiriri itxauana, kotxi ãtiãtaã ikanĩka ïroini ïkapani. ² Pirikeri toremoni ïroãkari soti auĩte pitikiri. ³ Initiri osereẽri pirikeri tore iua ïkapani. Soti auĩte kenakotari ipitikiri sãkire. Ipitikiri imarotari ikinipoko ipiraakori uãka akiritinina ïkapani. Iuara anikana inipokotinina ïkapani. ⁴ Porikiti auakasaakina, iua saãpota ninoa apisa. Iua tikini isana ninoa. Ninoa imarotari iua sãkire ene. ⁵ Ninoa kona sari kãkiti imimarotakinina tikini. Ipitikiri minakotika akiritakasaakina, imitekana. Kona imarotarina imapitikiritakinina sãkire.

⁶ Ikara sãpirenatxi atão inakari oerekiko Xesosi sãpiretari pariseoakori. Txamari ninoa kona imarotari Xesosi ikara atoko inakari isãpirena.

Xesosi Soti Auĩte Pitikiri Erekarĩ Itxaua

⁷ Xesosi iuaĩkana sãkirauata.

—Inipitikara nota pirikeri tore nitxaua, soti auĩte ïroini ïkapani. ⁸ Nota apisa apoãkani, atão minasãkiretakani kiĩtiririni itxauana. Soti auĩte kona maãkatari ninoa sãkire. ⁹ Nota itore nitxaua. Kãkiti ïroiniãtaã tore nitxaua. Nota makatxakari uai ïroãkari maerekani, auapininiika inini ïkapani. Æroã, ipokĩka itxapika. Kona kapĩkareri. Natxi !auari. ¹⁰ Kiĩtiriri apoka iĩtiriuatini ïkapani, okaniuatini ïkapani, imisirikarauatini ïkapani. Notapekana apoka kãkiti auapininiika inini ïkapani, kãkiti auini ereka inini ïkapani.

¹¹ Pitikiritxi erekari nitxaua nota. Pitikiritxi erekari ipina ipiraakori mapinakani ïkapani. ¹² Nitiritxi soti auĩteakori pitikiri !itxaua. Anãpa auĩte kaneenamari apokasaaki, iua miteka. Itakanapanako soti auĩteakori. Ininiã anãpa maĩkari soti auĩte, oxikepoata itxana. ¹³ Iua nitiritxi mitekako, kotxi txineiro ïkapaninokara iparĩkauata. Kona atão itiretari soti auĩte.

¹⁴—Soti auĩte pitikiri erekari nitxaua nota. Atão nimarotari nipiraakori. Ninoa apaka atão imarotano nota. ¹⁵ Iua atokokana niri imarotano nota. Nota apaka imarotari niri. Nota ipinako soti auĩteakori nota nakiti mapinakani ïkapani. ¹⁶ Nota aua apanakini soti auĩteakori apaka. Uatxa ia pirikeri ãki !auapanikana. Niminanako ninoa apaka ia pirikeri ãki auinina ïkapani. Ninoa auikariko nisãkire. Ininiã ninoa imakinika aua ãtika pirikeri ãki. Ætikarako ninoa pitikiri.

¹⁷—Niri tiretano, kotxi nauiritari nipinini, iuaĩkana nõkitikiniua ïkapani. ¹⁸ Kãkiti ! iposotari okinino nota nimanirekasaakiri nokiko. Nota sikariko niĩto nokiko ïkapani. Ninirekasaaki manapi nipina. Ninirekasaaki manapi nõkitikaua. Ikara atoko niri paniãtano nota —itxa Xesosi.

¹⁹ Ikara Xesosi sãkire Xoteoakori kenakotakasaaki, itaparakienatakakauana. Apanakini potxitari Xesosi sãkire. Apanakini kona potxitari.

²⁰ Apanakini txari:

—Satanasi nitiri auaĩtotari iua.

Ātipekana txari:

—Imapitxirita. Kinirepa hĩkenakotatari mapitxiritakari sãkire? —itxana ninoa.

²¹ Apanakini txari:

—Satanasi nitiri auaĩtotakiti ! ikara atoko itxa sãkireta. Satanasi nitiri kona kōsiãrepeka txĩkitakari mōsiãreti —itxana.

Xoteoakori !Auikari Xesosi Sãkire

²² Mitaãsaaki Xoteoakori kamari kiiniri Xerosareẽ. Iusaaki ixinikarina Teoso misãkiretiko aikoti merepaniko kamiko. ²³ Iusaaki Xesosi tĩpokota aiko Teoso misãkiretikoãtaã, Saromãoni inakoriãtaã. ²⁴ Iuaã Xoteoakori apotiitaua iuamoni. Iusaaki ninoa txari iua:

—Pite Teoso mereẽkiti pininiãua, pisãpiretaua. Akokaxiti anirekari aimarotiniri ikara —itxarina.

²⁵ Xesosi apakapapiretana:

—Nisãpiretapekai hĩte. Kona hãuikari nota sãkire. Niposotiire nikamakiti niri uãkaã oerekepekai hĩte. ²⁶ Nisãpiretapekai hĩte, txamari kona hãuikari nota sãkire, kotxi nisoti auĩtene kona hĩtxaua. ²⁷ Nisoti auĩtene imarotari nisãkire. Nota imarotana ninoa. Ninoa kapokitano nota. ²⁸ Nitxĩkitakana ninoa ātipirika auinina. Nota kamari ninoa imipĩkanina tĩkane. Kona kamakaxakikona nota nĩkatakini. ²⁹ Niri sikana ninoa notamoni. Apiatakari itxaua iua. Ininiã āti kona posotari imakaxakinina niri nĩkatakini. ³⁰ Niri, nota pakini ātika atxaua.

³¹ Ikara atoko Xesosi inakasaaki, Xoteoakori morõkari kai soro ikiporonakinirina ĩkapani. ³² Xesosi sãkirauata ninoamoni:

—Kaiãopokori erekari niri nakiti noerekepekai hĩte. Kinakarixikapa hinireka hĩkiporonakinino nota? —itxa Xesosi.

³³ Xoteoakori apakapapireta:

—Kona akiporonakai erekari pikaminiã. Akiporonakai, “Teosorano nota” pinini xikara. Pite kiki, iuaritika “Teosorano,” pitxa. Ininiã maerekati pikamapeka Teosomonikari.

³⁴ Xesosi apakapapiretana:

—Kitxakapirĩka Teoso sãkire iõkatsopatakori txari:

Nitxai: “Teosoakori hĩtxaua hĩte.”

³⁵ Aimarotari Teoso sãkire iõkatsopatakori ātipirika atão inini. Teoso akiriũkatana ninoa isãkire apakapakani “teosoakori.” ³⁶ Ininiã kinirepa hĩte kamaãkaretxitano. Niri mereẽno nota inireẽkiti nikamini ĩkapani. Iokanatano ĩkorapokoritimoni. Ininiã kinirepa hãpoĩtano Teoso nimisãkirepiretini, “Teoso ākirirano” ninakasaaki?

³⁷ Nimakamakaniãri niri nirekaãkiti, iusaaki kona hãuikari nota sãkire. ³⁸ Nikaminiãri inirekaãkiti, iuaritika himauikakaniãri nisãkire, hãuikariko niposotiire. Hĩtikakiti hãuika. Ininiã himarotariko, hãuikariko, niri, nota pakini ātika aniniua —itxa Xesosi.

³⁹ Iusaakipeka pariseoakori omanãkarauata. Iuaĩkana inirekarina imaĩkinirina Xesosi. Txamari iusaakipe isipe.

⁴⁰ Iuaĩkana Xesosi kanapiriã Xotão ipiniãmoni. Iuaã ikaikota Xoão kapatxisarerini patxisarauatiniãtaã. ⁴¹ Itomaneri kãkiti sari iuamoni. Ininiã ninoa txa:

—Xoão kona kamari posotiiretxi, iuaritika ikinika isãpiretakiti Xesosi pirena atão inakarinoka isãpireta.

⁴² Ininiã itori kãkiti iuaãtaã auikari Xesosi sãkire.

11

Arásaro Ipinini

¹ Kiki Arásaro inakori aua ipi itaro, Maria, Mata pakini. Ninoa aua Petãnia aapokotxiti. Iusaaki Arásaro amianata. ² Xesosi ipinini apisa, oa Maria arokari Xesosi kiti kamarĩãroã, oiãkoã kaxipota otxari. Oa Maria itari Arásaro amianata. ³ Iua amianatakasaaki, Maria, Mata pakini iokanapireta Xesosimoni:

—Apiananiri, pitiretakiti amianata —otxari.

⁴ Ninoa iokanapirena ikenakotakasaaki, iua txa:

—Amianari inokari Arásaro kona ipinini ìkapanini. Teoso posotiire oerekini ìkapanira iua amianari inokari iua. Kãkiti: “Teoso ãkiri peerekari” iniko ìkapanira iua amianata.

⁵ Xesosi tiretari Mata, oĩtaro Maria, Arásaro pakini. ⁶ Ikenakotakasaakiri Arásaro amianatini, iua napapanikari ipi õti iuaxiti. ⁷ Eereka itxana imoianariakori:

—Iuaĩkana Xotéia tōpa masa.

⁸ Ininiã imoianariakori:

—Koerekareri, kitapani iuaã Xoteoakori nirekari kai soroã ikiporonakinii pite. Iuaritika pisatapanikako iuaãtaã? —itxarina.

⁹ Ininiã Xesosi:

—Pokamara tosi oara aua kãkiti parĩkauatini ìkapani. Pokamara tĩpokotakari kona mãkitita, kotxi atokatxi iopinikari ikinipoko. ¹⁰ Txamari ìkanõka tĩpokotakari mãkitita, kotxi atokatxi kamara lauari.

¹¹ Ininiã Xesosi:

—Amoianari Arásaro imakanãta. Nota õpirĩkariko iua —itxa Xesosi.

¹² Ininiã Xesosi moianariakori txa:

—Imakanãtiniã, erekaãpopekari uatxa —itxana.

¹³ Xesosi imarotari Arásaro ipinini, txamari imoianariakori uãkatari Arásaro atão imakini.

¹⁴ Ininiã Xesosi txana ninoa atão imarotinina ìkapani:

—Arásaro ipĩpe. ¹⁵ Erekapitikari iuaã nimauakani, kotxi eereka hĩte auikariko nota sãkire. Masa iuaxiti. Maõkitari iua —itxa Xesosi.

¹⁶ Tomee Txítximo inakori misãkiretana apanakini Xesosi moianariakori:

—Masa iuakata apinini tĩkane.

Ikara atoko itxa isãkire, kotxi iuaxiti Xoteoakori nirekari okiniri Xesosi.

Kãkiti Auãki Inĩkitaãkari

¹⁷ Xesosi apokasaaki iuaxiti ipi ipi pakini õti napapeka. Ininiã iusaaki Arásaroni katapeẽkaika. ¹⁸ Petãnia Xerosareẽ takote. ¹⁹ Apanakini kãkiti apoka Mata, Maria pakinimoni. Ninoa moianatana, kotxi itarina !auaika.

²⁰ Mata kenakopiretari Xesosi apokaãpotini. Ininiã oa sari oaõkitiniri ìkapani. Maria kaikota oaãpoko ãki.

²¹ Xesosimoni Mata apokasaaki, otxari iua:

—Apiananiri, pite uai auaãkamako, kona nitari ipinamako. ²² Iuaritika nimarotapitikari, pamanaãkiti Teoso sikapitikai —otxa.

²³ Ininiã Xesosi txaro:

—Pitari iuaĩkana auapanikako.

²⁴ Ininiã Mata:

—Nimarotari itixi xipokini õti nitari iuaĩkana auapanikako. Ipĩkani õkitikiniua õti, iua õkitikaua —otxa Mata.

²⁵ Ininiã Xesosi sãkirauata:

—Nota ipĩkari õkitikakarirano nota. Kãkiti auãki inĩkitaãkarirano nota. Nota sãkire auiãkari ipininiã, iuaritika iuaĩkana auapanikako. Kona ipinaika. ²⁶ Nota sãkire auiãkari auapanikako iuaĩkana. !Ipinaikako. Pauikatari ikara atoko nininii? —itxa Xesosi.

²⁷ Ininiã Mata:

—Apiananiri, nauikapitikari. Teoso mereẽkiti pitxaua. Teoso ãkiri pitxaua. Teoso iokanatakiti itiximoni ìkari pitxaua. Ikara nauikapitika —oa txari iua.

Xesosi TxiaPATINI

²⁸ Eereka Mata sari oĩtaromoni. Oãkiritaro oa, mapara omisãkiretini ìkapani.

—Koerekareri apope. Iua akiritai —otxa Mata.

²⁹ Maria kenakotari ikara inakasaaki, katimariã õkitikaua, iuamoni sa otxa oa.

³⁰ Iusaaki Xesosi !apokapanika aapokotxiãtaã. Ikaikotapanika mitxi Mata apokiniãtaã.

³¹ Maria katimaritika õkitikasaakiua, Xesosimoni osini ìkapani, Xoteoakori, oaãpoko ãki auakani, oa mĩkapiritakani, sari oa tikini. Ninoa uãkatari akauarimoni osini otxiaPATINI ìkapani.

³² Maria apoka Xesosimoni. Oãtamatakasaakiri iua, iua apisatoõ okapotoreëkua. Otxari:

—Uai pauaãkamako, kona nitari ipinamako —otxa.

³³ Xesosi atamataro otxiapatini. Xoteoakori oakata apokakani txiapata apaka, ininiã Xesosi iteene matinaniuata ãkixinireë. ³⁴ Iua pimaãna:

—Nanipa hĩkatatari? —itxa.

Ininiã ninoa:

—Apiananiri, masa. Patariko iuaã —itxana.

³⁵ Iuusaaki Xesosi txiapata.

³⁶ —Hãtamataro Xesosi. Iua tiretapitikari Arásaroni —itxa Xoteoakori.

³⁷ ãtikaka Xoteoakori txa:

—Mõsiãreti kõsiãrepeka itxĩkitakapeka. Atxiĩti iua uai apokaãkamako, kona Arásaro ipinamako —itxana.

Xesosi Õkitikiniri Arásaroni

³⁸ Ininiã Xesosi iteene matinaniuata ãkixinireë. Iuusaaki isa akauarimoni. Ninoa takari ipĩkari kai auĩte ãki. Kai auĩte itotaãka.

³⁹ Ininiã Xesosi txari:

—Himakatxakari akauari tore —itxa.

Mata, Arásaroni itaro txari Xesosi:

—Apiananiri, ipaiakapeka. Ipi ipi õti pakinipeka ikatiko, ininiã patapasakari —otxari Xesosi.

⁴⁰ Ininiã Xesosi:

—Nota sãpiretepekai: “Nota sãkire pauikiniã, pitikariko Teoso posotiire” —itxaro.

⁴¹ Ininiã imaktxakarina kai. Iuusaakipeka Xesosi ionakaãta iaxiti.

—Niri. Erekai, kotxi pikenakotari nisãkire. ⁴² Nimarotari ãtipirika pikenakotiniri nisãkire. Ikara atoko nitxa sãkireta kãkiti uai auakani kenakotiniri ĩkapani, kotxi ninirekari ninoa auikiniri pite iokanatinino nota uaimoni —itxa.

⁴³ Ikara atoko inaãka atoko akirikatari:

—Arásaro, põkitikaua. Pipokĩka.

⁴⁴ Ininiã iuusaakipeka Arásaro pokĩka. Imakinika iĩto mãkatxi mataã iapirikaãka. Itoõ apaka iapirikaãka mãkatxi mataã.

Ininiã Xesosi:

—Himakatxakari iapirikiko.

Xesosi Okaenetiko Pirena

(Mateo 26.1-5; Marko 14.1-2; Arókasi 22.1-2)

⁴⁵ Xoteoakori Mariamoni ĩkani itikari ikara atoko inakari, ininiã auikarina Xesosi Teoso ãkiri ininiua. ⁴⁶ ãtikaka Xesosi kamakiti itikakani kanapiriã pariseoakorimoni. Isãpiretana Xesosi õkitikiniri Arásaro. ⁴⁷ Ininiã pariseoakori, sasetotxi auĩteakori pakini apotiitaua. Imisãkiretakakana:

—Kiripa ate kama? Ia kiki kamari itori posotiiretxi. ⁴⁸ Aãuiritiniãri iua ikara atoko ikamini, ikinipoko kãkiti auikari iua sãkire. Ininiã iua tikini isana. Ikara atoko ininiã, Homanoakori xipokari Teoso misãkiretiko aikoti ate nakiti, ate tixine apaka —itxana.

⁴⁹ Iuusaaki Kaipasi inakori sasetotxiakori auĩte apiatakari inakari iua. Itxana:

—Hĩte kona kimarorepanikai. ⁵⁰ Erekari ãti kiki ipinini ikinimane mapinakani ĩkapani. Ikara atoko ininiã, kona ikinipoko anirimane ipinako —itxa Kaipasi.

⁵¹ ĩkorakanani sasetotxi auĩte apiatakari itxaua Kaipasi. Ia atoko itxa: “Xesosi ipinako Xoteoakori mapinakani ĩkapani. ⁵² Kona ninoa ĩkapaninanini ipinako. Teoso anaakori iarikakani ĩkapani apaka ipinako. Ininiã iuusaakirako iua apotiitari ikinipoko ninoa. Ininiã Teoso anaakori itxauanako,” itxa Kaipasi sãkire.

⁵³ Iuusaaki eereka imapapiretarina Xesosi okinina tĩkane. ⁵⁴ Ikara atoko ininiã, Xesosi kona saika Xotéia tõpamoni. Isari Eparaiĩ sitatxitimoni, ãparaã makipakaniãtaã takote. Iuaã ikaikota imoianariakorikata.

⁵⁵ Iuusaaki imatokoãpotarina Páskoa kiiniriti. Iuusaaki itomaneri Xoteoakori Xerosareë tõpa auakani sari Xerosareë sitatxitimoni. Iua kiiniri apisapanika, isana

iuuã oerexiniretiniuana ïkapani. Iuusaaki amanaãrina Teoso imakatzakiniri maerekati ikamakitina. ⁵⁶ Iuuã Xoteoakori nitari Xesosi. Ninoakakarika ipimaãkakana:

—Atauako kiinirimoni inapani atxiïti?

⁵⁷ Sasetotxi auïteakori, pariseoakori pakini paniãtapekari kãkiti:

—Himarotakasaakiri Xesosi auiniãtaã, hïsãpiretauako ate, ininiã amaïkariko iua.

12

Maria Takari Kamariãro Xesosi Kitiã

(Mateo 26.6-13; Marko 14.3-9)

¹ Seisi õti Pãskoã kiiniriti apisa, Xesosi sari Petãnia sitatxitimoni. Iuuã aua Arãsarõ, Xesosi õkitikakiti Arãsarõ ipikasaaki. ² Iuuã ikamaãka nipokori Xesosi ïkapani. Mata sikari nipokori kãkitimoni. Iuusaaki Arãsarõ apanakinikata topãka Xesosikata. ³ Iuusaaki Maria kosekaro kamariãro koana. Oia atãõ nato kamakoro. Ipixini kiro ominani aua. Kona koketakoroni. Natonokara. Pakaronero, iuaritika okitakaro Xesosi kitimoni. Oiãkoã okaxipokari. Iuusaaki aapokotxi ãki omarinokara itxaua.

⁴ Txamari Xotasi Isikariotxi inakori !apokaerekatari kamariãro Xesosi kitiã okitakini. Iua Xotasi Simãõ ãkiri. Xesosi moianari itxaua, txamari imïkapiritariko Xesosi.

⁵ Ininiã Xotasi txari:

—Kãkiti parïkauata tresëtosi pakini õti oia atoko inakaro kamariãro iamotiko ïkapani. Kinirepa kona ovëtixitaãka? Kinirepa txineiro mauakinimoni !osika? —itxa Xotasi.

⁶ Ikara atoko itxa, kotxi kiïtiriri itxaua. Iua nïkataro ninoa txineirote. Iua itotapekari txineiro iïtirïkini. Iua !imaãkatana txineiro mauakinimoni.

⁷ Xesosi apakapapiretari:

—Kona hïtxitapero Mariapani. Onïkataro kamariãro ia õti notamoni otakini ïkapani, kotxi oxinikari nikatiko õti ïkapani. ⁸ Minakati mauinakini auapikako hïtekata. Txama nota !auaikako hïtekata —itxa Xesosi.

Xoteo Auïteakori Nirekari Okiniri Arãsarõ

⁹ Itomaneri Xoteoakori kenakopiretakasaakiri Xesosi Petãnia sitatxitiã auini, ininiã iuuã isana Xesosi aõkitinina ïkapani. Kona iuananini ninoa nireka aõkitinina. Arãsarõ Xesosi õkitikakiti apaka ninoa nirekari atamatinina. ¹⁰ Ininiã sasetotxi auïteakori nirekari Arãsarõ apaka okinina, kotxi kaiãopokori kãkiti auikari Xesosi sãkire Arãsarõ sãpiretakiti ikenakotakasaakina. Itakanaparina sasetotxiakori sãkire auikinina. ¹¹ Arãsarõ iuaïkana auiniã, ininiã itomaneri Xoteoakori asikaãpotari iauïtena, Xesosi sãkire auikinina ïkapani.

Xesosi Xerosareẽ Apokaãpotini

(Mateo 21.1-11; Marko 11.1-11; Arókasi 19.28-40)

¹² Katimatiniãkata, itomaneri kãkiti Pãskoã kiiniritimoni sikani, kenakopiretari Xesosi apokaãpotini Xerosareẽmoni. ¹³ Ininiã Xerosareẽkini sari aõkitinirina iua. Kinari tape anikana, Xesosi apiãkatakasaakina. Akirikatana:

—Peerekari Teoso. Teoso takari erekari Isaeo auakani auïtemoni, Apiananiri uãkaã ïkarimoni —itxana.

¹⁴ Mitxipe Xesosi iokanataro imoianariakori xomëta ãkiri initinina. Ninoa apokasaakiri, iminarina Xesosimoni. Ininiã Xesosi topãka iua nopini. Iua nopini Xesosi sari Xerosareẽmonikari. Kitxakapirïka Teoso sãkire iõkatsopatakori txari:

¹⁵ Kãkiti Xerosareẽkini kona hïpïkarauatape. Erepani hïauïte. Xomëta nopini iitopãkako, itxa Teoso sãkire kitxakapirïka. Ikara iaõka apokapeka, kotxi Xesosi apoka xomëta nopini.

¹⁶ Iuusaaki imoianariakori kona xinikari Teoso sãpiretakiti kitxakapirïka auakari. Xesosi ipinaka atoko, õkitikaãkaua atoko, iuusaakiika ninoa xinikari ikara Teoso sãkire. Ininiã iuusaakiika imarotarina Teoso sãpiretakiti.

¹⁷ Mitxi kãkiti akauari takote auakani, ninoa itikari Xesosi õkitikiniri Arãsarõ. Ninoa iaripiretari Xesosi kamakiti. ¹⁸ Ininiã kãkiti apiãkatari Xesosi, kotxi ninoa kenakoentapekari Arãsarõ õkitikini. ¹⁹ Ininiã pariseoakori misãkiretakakaua:

—Hātamata. Kiripa aposota akamini? Ikinimane kākiti nirekari iua.
Ininiā pariseoakori xikotari Xesosi.

Ātikaka Krekoakori Nitari Xesosi

²⁰ Ātikaka Krekoakori apoka Xerosareēmoni Páskoa kiiniriti ĩkapani, kotxi ninoa nirekari Teoso imisākiretinina. ²¹ Apokasaakina iuaātaā, isana Piripimoni. Iua Petsáita aapokotxitikiri, Kariréia tōpa auakari. Ininiā apokasaakina Piripimoni, ipimaārina:

—Ate nirekari Xesosi aaōkitini.

²² Ininiā Piripi sari Ātreemoni, isāpiretiniri ĩkapani. Eereka isana Xesosimoni. ²³ Ininiā apokasaakina, Xesosi txana ninoa:

—Kaiamapekari nota hītari iaxitikiri sini niri tixinemoni ikinipoko erekari napakapini ĩkapani. ²⁴ Atāo nisāpiretai. Nota kimi oki atoko. Kākiti matakakaniāro oa, ātika okinoka auapika. Pitakiniāro, opitxaka. Ininiā kaiāori oki aua. Ikara atoko nota. Nimapĩkaniā, ininiā notanokara auari. Nipininiā, ininiā itomaneri kākiti sari niri tixinemoni. ²⁵ Pite ātipirika kaminiāri piteka nireēkitinoka, ininiā pinireēkiti xipokapitikako pitekata. Pite nireēkiti xipokiniā, nota sākire pauikini xika, pite auapininiika txako Teosokata. ²⁶ Kākiti nirekiniāri iparĩkauatini nota ĩkapani, imoianatanoko. Iua atoko ininiā, nota auiniātaā iua apaka auako. Kākiti parĩkauatiniā nota ĩkapani, ininiā niri paxitariko iua.

Xesosi Sāpiretari Ipinini

²⁷ Xesosi misākiretari Teoso:

—Uatxa kona erekaxinireno, ininiā kiātokopa nitxa nisākire pitemoni? Atxiīti nipaniātai: “Niri, pimakatxakinanoko nimapinakani ĩkapani.” Ikara atoko !nipaniātai, kotxi nipinini ĩkapanira napoka ĩkorapokoritimoni. ²⁸ Ininiā niri, poerekari kākiti ikinimane auīte pininiāua —itxa Xesosi.

Iuasaakipeka iaxitikiri txari:

—Noerekapekari kākiti ikinimane auīte nininiāua. Eereka iuaĩkana noerekapanikariko ikara —itxa Teoso.

²⁹ Kākiti iuaātaā auakani kenakotari iaxitikiri sākire. Txamari itxana:

—Ikarokirauata.

Apanakini txari:

—Teoso nitirira sākirauata iuakata —itxana.

³⁰ Xesosi txana ninoa:

—Ikara sākirauata kona nota ĩkapanini. Hīte ĩkapanira isākirauata. ³¹ Iposope ikini itixiti auakani misiritiko imaerekanina xika. Iposope ikini itixiti auakani auīte Satanasi inakori xipokiko. ³² Nota aamina ĩpiriāmitakari nopini nōkitikikosaaki, iuasaaki nikosekanako kākiti notamonikari.

³³ Ikara atoko itxa, kākiti imarotiniri aamina ĩpiriāmitakari nopini ipinini.

³⁴ Apanakini kākiti apakapapiretari:

—Teoso sākire kitxakapirĩka iōkatsopatakori oerekaua Teoso mereēkiti ātipirika auini. !Ipinina. Txamari pite sāpiretaua ipinini aamina ĩpiriāmitakari nopini? Kipa iua aītari iaxitikiri pisāpiretakiti? —itxana ninoa.

³⁵ Ininiā Xesosi:

—Tirikapi kamara atoko nitxa. Hītekata nauakasaaki, noerekai hīte atāo inakari. Uatxa tirikapi kamara hītekata auapanika. Paītiki nota sipe. Tirikapi auakasaaki, pauapikako tirikapi kamaraā. Ininiā ipiā kona apoka hītemoni. Kākiti mauikakaniāri nota sākire, ĩkanōka tĩpokotakani atoko itxana. !Imarotarina isinimonina. ³⁶ Tirikapi hītemoni auakasaaki, hāuikariko iua sākire. Ikara atoko ininiā, “pokamarari anaakori” hītxaua —itxa Xesosi.

Ikara atoko inaka atoko isipeka. !Isāpiretari isinimoni.

Xoteoakori Kona Auikari Xesosi Sākire

³⁷ Xoteoakori itikari ikinipoko posotiiretxi Xesosi kamakiti. Iuaritika kona ninoa auikari iua sākire. ³⁸ Ikara atoko ininiā, kitxakapirĩka Teoso sākire sāpiretakari Isaía inakori iōkatsopatakiti, iuasaaki apopeka. Isaía txari:

Apiananiri, kãkiti !auikapiretari asãkire ninoamoni asãpiretakiti. !Auikari piposotiire poereẽkiti ninoamoni,

itxa Isaía. ³⁹ Iua atoko ininiã, Xoteoakori kona posotari auikiniri Xesosi sãkire, kotxi iuaĩkana Isaía txari:

⁴⁰ Teoso mõiãretakana ninoa. Kaikokii itxĩkitakana. Itikakitina kona iĩkitetana ninoa. Ikiĩãna kona limarotarina. Ininiã ninoa kona apokapaniko notamoni erekapeka ininina nitxĩkitakini ĩkapani,

itxa Teoso Isaía iõkatsopatakitiã.

⁴¹ Kitxakapirĩka Xesosi uai apokini apisa Isaía iõkatsopatari ia sãkiretxiti. Iuasaaki Teoso oerekari Isaía Xesosi posotiire, apaka ikinika Xesosi kamakiti tĩkane.

⁴² Iuaritika itomaneri Xoteo auĩteakori auikari Xesosi sãkire. Txamari !isãpiretarina apanakini, kotxi ninoa pĩkari pariseoakori. Pariseoakori imarotakasaakiri Xesosi sãkire auĩãkani ininiuana, !auiritaikana ninoa ĩroini aiko Xoteoakori apotiitiniãtaãua. ⁴³ Iua atoko ininiã, ninoa apia nirekari kãkiti iuikinina. Poiãoka ninoa nirekari Teoso iuikinina.

Xesosi Iuaĩkana Sãkirauata Xoteoakorimoni

⁴⁴ Xesosi itaparasãkireritika txari:

—Kãkiti auikiniãri nota sãkire, kona nota sãkirenanini ninoa auika. Niri sãkire apaka auikana, kotxi iua iokanatano nota uaimoni. ⁴⁵ Natamatakiri apaka atamatari niri. ⁴⁶ Tirikapi atoko nitxa nĩkasaaki kãkitimoni. Nota sãkire auĩãkani kona kaikota ipiaã. ⁴⁷ Kãkiti nisãkire kenakotakani mauikakaniãri nisãkire, kona nimisiritari iua imaerekani xika. Kona kãkiti nimisiritini ĩkapanini nina uaimoni. Nina kãkiti maerekani nimaktxakini ĩkapanira.

⁴⁸ —Nota manirekakati, nisãkire manirekakati apaka, auapeka imisiritiko mereẽkari. Nisãpiretakiti, iuarako itixi xipokini õtisaaki sãpiretari imisiritiko.

⁴⁹ —Notaka sãkire !nisãpiretai. Niri sãkirera nisãpiretai. Niri iokanatano nota uaimoni. Iua paniãtakiti isãpiretakiti nisãpiretai hĩte. ⁵⁰ Nimarotari kãkiti auikiniãri niri paniãtakiti auapininiika itxako. Nota sãpiretari niri sikapiretinino iaõka.

13

Xesosi Arokari Imoianariakori Kiti

¹ Pãskoa inakori kiiniriti apisapanika, Xesosi imarotari paĩtiki itixi itakanapini irimoni isini ĩkapani. Iua tiretapikana kãkiti iua nakiti. Ninoa itiretiniritika ipinako Xesosi.

² Xesosi imoianariakorikata inipokotini apisapanika Satanasi sikanireõtapekari Xotasi Isikariotxi Xesosi imĩkapiritini ĩkapani. Iua Xotasi, Simão ãkiri. Eereka inirekari isikiniri Xesosi imokaiakarimoni. ³ Xesosi imarotapekari iri sikiniri ikinipoko posotiiretxi Xesosimoni. Imarotapekari Teosomoni ipotorikini. Imarotapekari iuamoni ikanapiriini.

⁴ Iuaritika inipokotaka atoko, õkitikaua. Imaktxakari imãka inopini auakari. Eereka ipomakitari mãkatxi mata nitiritxi parĩka atoko ikamini ĩkapani. ⁵ Eereka itakari ãparaã tiitxi ãki. Ininiã arokana imoianariakori kiti. Eereka mãkatxi mataã ikaxipokaãpotana.

⁶ Simão Petro takote apokasaaki, Petro txari:

—Konapitini, Apiananiri. Ninitiri !pitxaua. Ininiã kona parokapiri nikiti —itxari.

⁷ Ininiã Xesosi:

—Uatxa kona pimarotari nikamakiti. Pimarotariko ãti õti.

⁸ —Koniko pite arokapaniri nota kiti —itxa Petro.

Ininiã Xesosi:

—Pimauiritakaniãno pikiti narokini, ininiã kona nimoianari pitxaikauako —itxa Xesosi.

⁹ —Ikara atoko ininiã, kona nikitinani paroka. Niuako, nikii, imakinika paroka —itxa Petro.

¹⁰ Ininiã Xesosi:

—Kãkiti kipaãtakaniua poirepe itxana. Itĩpokotakasaaki, iuaĩkana itxiko apoka iuamoni. Iuasaaki ikitinokara arokaãka. Hĩte himakinika poirepeka, kotxi nimaktxakapekari himaerekani. ãtinokara kona poireri, kotxi imaerekani auapanika.

¹¹ Xesosi imarotapekari iua mīkapiritakari, ininiã itxa: “Himakinika poirepeka. Ātinokara kona poireri,” itxana.

¹² Ninoa kiti arokaāka atoko, ieretakari imāka inopinikiri. Ikanapiriã amesamoni. Ipimaāna:

—Kinirepa narokatari hīkiti? ¹³ Hīte akiriuākatano nota “koerekareri.” Apaka hākir-iuākatano “Apiananiri.” Atāopitikara hīsākire, kotxi ikara inakari nitxaua. ¹⁴ Hīauīte, hōereēkiri nitxaua. Iuaritika narokari hīkiti. Hinitiri atoko nīparīkauata. Ininiã hārokak-ititakakauako, kākiti nitiri atoko hininiua. ¹⁵ Noerekapekai hīte erekari hīkamini. Uatxa hīkamariko nota kamakiti atokokana. ¹⁶ Atāo inakari nitxai. Nitiritxi iamotakori poiāori. Iauīte apiari. Apaka kākiti iokanatakari apiata. Iokanatakiti poiāori. ¹⁷ Uatxa hīte imarotari atāo inakari hīkamini. Hīkaminiāri, hīpoxokoniua.

¹⁸ —Kona himakinikani ikara atoko nitxai. Nimarotari nimereēkini, txamari ia Teoso sākire iōkatsopatakori iaōka apokapitikako. Itxari:

Notakata komiri nikakari, iuakarako kamari maerekati notamoni. ¹⁹ Uatxa iua himarotini apisapanika nisāpiretai hīte. Ininiã nisākire iaōka apokasaaki, himarotariko Teoso ākiri nininiua nota. ²⁰ Atāo inakari nisāpiretai. Kākiti nota iokanatakiti hītemoni hāpakapiniã, nota apaka hāpakapa. Hāpakapiniãno nota, hāpakapari apaka nota iokanatakari hītemoni —itxa Xesosi.

Xotasi Mīkapiritiniri Xesosi

(Mateo 26.20-25; Marko 14.17-21; Arókasi 22.21-23)

²¹ Xesosi ikara isāpiretaāka atoko, ākixinireē imatinaniuata. Itxana:

—Ari, ātikara hīte sauaki mīkapiritano nota.

²² Ininiã imoianariakori atamatakakaua.

—Kiripa ikara atoko txatako? —itxana.

²³ Iuasaaki Xesosi moianari itiretakiti papīkaītota iuamoni. ²⁴ Ininiã iuasaaki Simão Petro ieki itxa isona iuamoni. Ininiã Petro:

—Pipimaāri iua: “Īkiripa ikara atoko txatariko iua?” —itxari.

²⁵ Ininiã Xesosi tiretakiti pimaāri Xesosi:

—Kiripa ikara atoko txatai? —itxari.

²⁶ Ininiã Xesosi:

—Komiri niākakiti nisikakitikarako ikara atoko txanoko.

Ininiã iuasaaki iākari komiri. Eereka isikari Xotasi Isikariotximoni. Iua Xotasi Simão ākiri. ²⁷ Xotasi komiri inikasaaki, Satanasi iroā ixiniremoni. Ininiã Xesosi txari Xotasi:

—Kinirāo kamaka pinakiti pikamapoka —itxari.

²⁸ Iuaā auakani ākixinireē:

—Kinirepa ikara atoko itxatari Xotasi?

²⁹ Xotasi nīkataro ninoa txineirote. Ininiã ninoa ākixinireē:

—Atxiīti iokanataro iua komiri iamotini ĩkapani.

Ātipekana:

—Atxiīti iokanataro iua matiinimoni txineiro isikini ĩkapani —itxanātana ākixinireēna.

³⁰ Komiri apakapaāka atoko, inikaāka atoko isipe Xotasi. Mapiāpe inakasaaki.

³¹ Xotasi sipeka inaāka atoko, Xesosi txana ninoa:

—Uatxa kākiti itikariko kākiti itari iaxitikiri posotiire. ³² Kākiti amatariko Teoso posotiire imimoni auakari. Ininiã Teoso txari: “Erekapitikari namarite.” Iuasaaki Teoso oerekari kākiti iua apokaerekatiniri imi. Ikara atoko ininiã, oerekari imi ereka inini.

³³ —Nitiretakini, paītikinoka nauini hītekata. Eereka hinitapiimano nota, txamari nota sinimoni kona hīposotari hīsini. Ikara atoko nitxapekana Xoteoakori. Iuatxikana uatxa nisāpiretai hīte. ³⁴ Ininiã uatxa nisāpiretaiko hīte Teoso paniātakiti amaneri: “Hītiretakakaua, nota hīte nitiretini atokokana.” ³⁵ Ikara atoko hīkaminiã, ikinimane imarotariko nota moianariakori atāo hininiāua.

Xesosi Sāpiretari Petro Kīpatiniri Iua

(Mateo 26.31-35; Marko 14.27-31; Arókasi 22.31-34)

³⁶ Simão Petro pimaāri:

—Koerekareri, nanipa pisatako?

Xesosi apakapapiretari:

—Nota sinimoni kona uatxa apakata hīsini. Āti ōtirako hīsa hīte.

³⁷ Iuaīkana Petro:

—Apiananiri, kinirepa kona pitekata nisa uatxa? Nipinapitikamako pitekata —itxa Petro.

³⁸ —Atāopitikani notakata pipinini pinirekaka? —itxari.

—Atāo nisāpiretai. Ia īkanōkati patari sākirauatini apisapanikako, “!Nimarotari iua,” pitxanoko ipi āti pakinikata —itxa Xesosi.

14

Xesosi Pinitari Imoianariakori

¹ —Kona himatinaniuatape. Kona himaākapeua. Hāuikariko Teoso sākire. Apaka hāuikariko nota sākire. ² Niri auiniātaā auā kaiāopokori aapokotxi. Ikara atoko iminakanimako, nisāpiretapiimaiko hīte. Iuaā nisa hāuiniātaā nikamini īkapani. ³ Iuaā nisa hāapoko nikamini īkapani. Eereka nikanapiriā. Nanikai hīte notakata hāuini īkapani. Ininiā hīte apaka auā nota auiniātaā. ⁴ Hīte imarotari nota sini kimaporiti —itxa Xesosi.

Teoso Kimapore Itxaua Xesosi

⁵ —Kona aimarotari pisinimoni. Natokopa ininiāpa aimarotatari pite sini kimaporiti? —itxa Tomee.

⁶ Ininiā Xesosi txari:

—Teosomoni sikari kimaporiti nitxaua. Atāonoka nisākire. Atāonoka nikamakiti. Nitxikitakari kākiti auapininiika inini. Notamoni apokakarinanira sari nirimoni. ⁷ Atāo nota himarotiniā, ininiā himarotariko niri apaka. Uatxa himarotapekari iua. Hātamatapekari iua —itxa Xesosi.

⁸ —Apiananiri, poerekari piri atemoni. Ikaranoka anireka —itxa Piripi.

⁹ Ininiā Xesosi:

—Piripi, kona mixaikani hītekata nauama nota, uaritika kona himarotapanikano nota? Nota aōkitakari, aōkitapekari niri. Kinirepa, “Piri poerekaua,” pitxa? ¹⁰ Kona pite auikaparikari niri auini nota āki? Nota apaka auā niri āki.

—Hītemoni nisāpiretakiti kona nota sākirenanini. Niri paniātakitira. Niri nota āki auakari iuara kamari ikinipoko nikamakiti. ¹¹ Hāuikariko nisākire niri āki nauini. Niri nota āki auini apaka hāuika. Himauikakaniāri nisākire, ininiā hāuikari nikamakiti. ¹² Atāo nisāpiretai. Nota sākire auīākani kamariko nota kamakiti atokokana. Apaka ninoa kamakiti apiata, kotxi nirimoni nisako. ¹³ Nota uākaā hamanaākiti nota sikai hīte. Ikara atoko ininiā, oerekaāka niri ereka ininiua. ¹⁴ Ikinipoko nota uākaā hamanaākiti, nota sikipitikai hīte. ¹⁵ Nota hītiretiniā, hīkamariko nipaniātakititi —itxa Xesosi.

Erekari Matamatakoti Apokaenetini

¹⁶ —Namanaāriko niri āti kōtākikareri iokanatinini hītemoni. Iuakara auapininiika txako hītekata. ¹⁷ Iua Erekari Matamatakoti atāonani ina sākiretakari. Kākiti Teoso sākire mauīākani kona apakapari iua, kotxi kona atamatarina iua. Apaka kona imarotarina iua. Hītepekana imarotari iua, kotxi hītekata auā. Iua auā hīte ākixinireē.

¹⁸ —Ininiā kona nitakanapai hīte. Nikanapiriāpanikako hītekata nauini īkapani. ¹⁹ Paītiki atoko kākiti īkoraxiti auakani kona atamataikanoko nota. Hīte atamatanoko. Hīte auapanikako, kotxi nota apaka auapanikako. ²⁰ Iuaīkana auapanika ninakasaaki, himarotariko niri āki nauini. Hīte apaka auako nota ākixinireē. Nota auā hīte ākixinireē apaka. Txapaniko.

²¹ —Iua nisākire auīākarira nipaniātakititi kamakarira taretano nota. Nota taretakari niri tireta. Nota apaka taretari iua nitiretakiri. Ikara atoko ininiā, noerekariko apikomoni nisākire iuamoni.

²² Āti Xotasi, kona Xotasi Isikariotxi inakorini, txari Xesosi:

—Kinirepa atenani poerekari Teoso ākiri pininiua? Kinirepa kona poerekari ikara apanakinimoni? —itxa.

²³ Xesosi apakapapiretari:

—Kãkiti tìretiniãno, ikamari nisãkire iaõka. Niri tìretariko iua. Niri, nota pakini apokako iuamoni. Iuakata aãuako. ²⁴ Nota matìretakani kona nĩkatari nisãkire. Nisãkire hĩkenakotakiti kona nota sãkireni. Niri niokanatakiri sãkirera.

²⁵ —Hĩtekata nauakasaaki, ikara sãkiretxi nisãpiretai. ²⁶ Niri iokanatariko kõtãkikareri, Erekarì Matamatakoti inakori hĩtemoni. Erekarì Matamatakoti oerekaiko hĩte ikinipoko niuãkaã. Himaxinĩkaretakiti iuaĩkanako iua oerekaiko. Ikinipoko nisãpiretakiti oerekaiko.

²⁷ —Nisini apisapanika nikamaerekaxiniretai. Nota xinire ereka inini atokotxikana nikamaerekaxiniretai. Nisãkire mauiãkani kona posotari kamaerekaxiniretiniri ãti nota kamaerekaxiniretini atoko. Kona himaãkapeua. Kona hĩpĩkarauatape. ²⁸ Hĩte kenakotapekari nisãkire ia atoko nininii hĩte: “Nisapitakako, iuaritika nikanapiriãpanikako hĩtekata nauini ìkapani.” Hĩtìretiniãno, hĩpoxokoniuata nirimoni nisini ìkapani, kotxi poiãori nitxaua nota. Apiatakari itxaua niri. ²⁹ Ikara nisãpiretakiti apokini apisa nisãpiretai hĩte. Ikara nisãpiretakiti iaõka apokasaaki, hĩte auikari nisãkire. ³⁰ Apikomoni iteene nisãpiretinii !apakata. Ìkorapokoriti auakani auĩte Satanasi inakori paĩtiki apokako notamoni, iuaritika !liposotari itxĩkitakinino ipaniãtakiti nikamini. ³¹ Iteene ninirekarì imakinika kãkiti imarotiniri nitìretiniri niri. Apaka nikamari ikinipoko niri paniãtakiti —itxa Xesosi.

Eereka Xesosi txari:

—Maõkitikaua. Masipeka.

15

Xesosi Atão Itĩkaretsa Itxaua

¹ Ininiã eereka Xesosi txari:

—Atão itĩkaretsa nitxaua nota. Itĩkaretsa nĩkatakari itxaua niri. ² Isauakaro otsa marito, kotxi kona kariro oa. Otsa iriuatakaropekana iua kisauakaro omapotõkìrenoka, iteene oriuatini ìkapani. ³ Hĩte poirepeka hĩtxa. Nisãkìrenanira oeretai hĩte. ⁴ Okanotsa atokokana hĩtxaua. Nota itĩkaretsa atoko nitxaua. Ininiã hĩpitxaka notamoni. Ikara atoko hininiã, hĩkaikota notakata. Ininiã nota kaikotapika hĩtekata. Ikara atoko hininiã, hĩriuatapitika. Ikara atoko hininiã, erekarinaniã hĩkama. Hĩriuatiniã, ininiã erekarì hĩkama. Notamoni himapitxakaniã, kona hĩposotari hĩkaminiri erekarì. Kona hĩriuata, kotxi nota tapara !apokari hĩtemoni. !Kari hĩte. Okanotsanoka auiniã, kona kariro. Notakata hãuapininiika hininiã, amãtiiri auapitika.

⁵ —Nota itĩkaretsa nitxaua. Hĩte nikanotsa hĩtxaua. Notamoni pitakakari ãtipaniriko oripaniko. Notakata himauakaniã, kona xapitiki kona hĩposota hĩkamini. ⁶ Nota sãkire mauiãkati okanotsa ipinakari atoko itxa. Txiarokakari atoko itxa. Kãkiti apotiitari okanotsa ipinakari. Eereka okari xaminaã arikini ìkapani. Iua atokokana aĩri Teoso misiritari isãkire mauiãkani. ⁷ Notamoni hĩpitxakiniã, hĩkenakotiniãri nipaniãtakiti, hinirekaãkiti hamanainiãno, ininiã nisikapitikai hĩte. ⁸ Ito hĩriuatiniã, kãkiti txariko niri: “Peerekai.” Hĩte iriuatiniã, ininiã hĩte atão oerekariko apanakinimoni atão nimoianariakori hininiua.

Hĩtìretakiniua Pirena

⁹ —Niri tìretinino atokotxikana, nitìretai hĩte. Kona hĩtakanapapiri nitiraõki. ¹⁰ Hĩkĩpitiniãri nisãkire, ininiã nitiraõki kaikotapika hĩtekata. Nota atokokanerako hĩtxako. Nota kĩpitari niri sãkire, ininiã niri tiraõki kaikotapika notakata.

¹¹ —Ikara atoko nitxai hĩte, nipoxokoni hĩtemoni kaikotini ìkapani. Ikara atoko ininiã, poxokonitxi xãpokako hĩxiniremoni. ¹² Ia nipaniãtakiti: “Nota tìretinii atokotxikana, hĩtìretakauako.” ¹³ Pipininiã pimoianariakori mapinakani ìkapani, ininiãkara iteene pitiretana ninoa. Ikara tiraõkitxi apiatakari. ¹⁴ Nipaniãtakiti hĩkaminiã, atão nimoianariakori hĩtxaua. ¹⁵ Uatxa !nixnikaikari nitiritxi hininiua, kotxi nitiritxi kona imarotari iauĩte xinikakiti. Uatxa atão nimoianariakori hĩtxaua, kotxi ikinipoko niri oerekakiti nisãpiretapekai hĩte. ¹⁶ Kona hĩteni mereẽno nota. Notara mereẽi hĩte hĩriuatini ìkapani. Ninirekarì hĩriuatini. Ninirekarì kãkiti nota sãkire hĩsãpiretakini txipokori maxipokakati

atoko ininina. Ikara atoko ininiã, hamanaãriko niri hinirekakiti nota uãkaã, ininiã niri sikapitikai hïte. ¹⁷ Ia nipaniãtai hïte hïtiretakakiniua.

Xesosi Moianariakori Omanatakani

¹⁸ Iuaïkana Xesosi pinitari imoianariakori:

—Apanakini omanataiko hïte. Ininiã hïxinikariko ia nisãkire. Merepitipanika ninoa omanatano nota. ¹⁹ Teoso sãkire himauikakaniã, Teoso sãkire mauiaïkani tiretapitikai hïte, kotxi ninoa atoko hïtxa. Txamari ninoa nakiti !hïtxaua. Hïte kona ïkoraxiti auakani !hïtxaikaua. Nimerẽpepekai hïte. Nimaktxakapekai ãtião parïkatxi hïkamini ïkapani. Iua xika Teoso sãkire mauiaïkani omanatai. ²⁰ Hïxinikariko ia nisãpiretakiti. Nitiritxi poiãoka itxaua. Iauïte apiatakari itxaua. Kãkiti misiritiniãno nota, nota atokokanerako imisiritai hïte apaka. Nisãpiretapekai hïte. Nota sãkire apamonïkiniãna, ininiã hïte sãkirekanera ninoa apamonïka apaka. ²¹ Imisiritaina, kotxi hïte auikari nota sãkire. Himisiritaãkako, kotxi kona imarotarina niokanatakiri. ²² Nota uai mapokakaniã, nimasãkirauatakaniã, kona imarotarina maerekati ikamakitina. ²³ Nota omanatakani apaka omanatari niri. ²⁴ Niposotiire nikamakiti apanakini kona posotari ikamini. Noerekari ninoa niposotiire, ininiã uatxa maerekati auari ninoamoni, kotxi !auikari nota sãkire. Ikinika itikapekari posotiiretxi nikamakiti, iuaritika ninoa omanatano nota, niri apaka.

²⁵ —Uatxa apopeka Teoso sãkire iaõka. Teoso sãkire iõkatsopatakori txari:

Maxikatiïka ninoa omanatano.

²⁶ Kõtãkikarereri kona apokapanika. Niokanatariko nirikata auakari, Erekari Matamatakoti. Iua potorika niri auiniãtaã. Atão ene sãkiretakari itxaua. Isãpiretariko nota sãpiretakiti, nikamakiti pakini. ²⁷ Ininiã hïte apaka sãpiretariko nota kamakiti, nisãpiretakiti pakini apanakinimoni, kotxi merepitipanika nipotorikasaaki hïte auapika notakata. Ininiã himarotapitikano nota.

16

¹ Xesosi sãkirauatapanika:

—Ikara atoko nitxai hïte atão himarotini ïkapani, ininiã kona hïtakanapari nisãkire.

² ãti õti Xoteo auïteakori omitikenataiko hïte aiko Xoteo apotiitiniãtaãua. ãti õti apokapanikako ia nisãpiretakiti. Iuasaaki ninoa xinikariko hïte okiko ereka inini. Ninoamoni hïte okiko Teoso paniãtakiti iaõka. Txamari kona Teoso paniãtari ikara atoko inakari. ³ Ikara atoko inakari ikamanako, kotxi kona imarotano nota, niri pakini.

⁴ Ikara atoko nitxai hïte, kotxi ikara atoko inakari apokasaaki, hïxinikariko nisãkire. Merepanika nimoianatakasaakii, kona ikara atokoni !nitxai hïte, kotxi nota auapanika hïtekata —itxa Xesosi.

Erekari Matamatakoti Parïka

⁵ Xesosi sãkirauatapanika:

—Païtiki nisipekako niokanatakirimoni. Kona hïpimaãpeno: “Nanipa pisa?” Kona hïtxapeno. ⁶ Ikara atoko nisãpiretapekai, ininiã uatxa kona erekaxinirei hïte. ⁷ Iuaritika nitxai hïte atão nisãkire. Apiaerekata nota sini. Nota masikaniã, iua Kõtãkikarereri kona apoka hïtemoni. Nisiniã, niokanatariko iua hïtemoni. ⁸ Iua Kõtãkikarereri apokasaaki, oerekariko ïkorapokoriti auakani maerekani. Oerekariko Teosonoka txïkitakiniri kãkiti atão inakari ikamini. Oerekariko kãkiti misiritiko imaerekani xika. Iua Erekari Matamatakoti oerekariko ikara atoko inakari. ⁹ Iua oerekariko maerekati kãkiti kamakiti, kotxi ninoa !auikarina nisãkire. ¹⁰ Iua oerekariko Teosonoka txïkitakiniri kãkiti atão inakarinoka ikamini, kotxi nota sipekako nirimoni. Nota !auaika uai noerekarauatini ïkapani. Païtiki kona hïte amataikanoko nota. ¹¹ Iua Erekari Matamatakoti oerekariko maerekati kamakani misiritiko, kotxi ïkorapokoriti auakani auïte Satanasi inakori misiritiko mereeëkapeka.

¹² —Auapanika apikomoni nisãpiretakiti tïkane hïtemoni. Txamari !apakata apikomoni nisãpiretinii, kotxi !himïteenekari apikomoni nisãpiretinii. ¹³ Iua Erekari Matamatakoti, atãoene sãpiretakari, iua ïkasaaki, iua oerekaiko ikinipoko atão sãkiretxiti. Kona iua sãkireni isãpiretaiko hïte. Iaxiti auakari sãkirera, niri sãkirera, isãpiretaiko.

Isãpiretaiko hīte katana Teoso kamakiti tīkane apaka. ¹⁴ Erekari Matamatakoti oerekaiko ereka ninini, kotxi iua apakapariko nisākire, eereka isãpiretaiko hītemoni. ¹⁵ Ikini sereti niri nakiti nota nakiti apaka. Ininiã nota txai hīte, “Erekari Matamatakoti apakapariko nota nakiti. Ininiã eereka isikai hītemoni himarotini ĩkapani.”

Matinanitxi, Eereka Poxokonitxi Apoka Inini

¹⁶ —Paītiki kona hātamataikanoko nota. Eereka iuaīkana hātamatanoko, kotxi niri-moni nisako —itxa Xesosi.

¹⁷ Imoianariakori txanāta:

—Kiripa itxanāta Xesosi? “Paītiki kona hātamatanoko. Eereka iuaīkana hātamatanoko nota, kotxi nirimoni nisako.” Kiripitipa itxanāta Xesosi? —itxana imoianariakori.

¹⁸ —Kirisaakipa apokatako ikara inaātakiti? Kiripa ikara isākire: “Paītiki,” Xesosi sākire atemoni? Ikara isākire kona ate imarotari xatiki —itxanātana.

¹⁹ Xesosi imarotari ninoa nirekari ĩpimainiri iua. Ininiã Xesosi txana:

—Hīte nirekari hīpimainino nota, kotxi nisãpiretai paītiki kona hātaminino, eereka iuaīkana hātamatano. ²⁰ Atãopitikara ia atoko nitxai hīte. Hītxiapatako. Himatinaniu-atako. Iuasaaki apanakini kākiti ĩkorapokoriti auakani poxokoniuatato. Himatinaniu-atako, eereka hīpoxokoni apokapitikako.

²¹ —Hīte sito atoko hītchauako. Sito oãuaenetanapanoka onakasaaki, oa omaãkapekaua. Imi auaka atoko, kona oxinikaikari otsii. Poxokope otxa, kotxi auapeka amarini. ²² Ikara atoko itxako hītemoni apaka. Uatxa kona erekaxinirei hīte. Iuaīkana naõkitapanikaiko hīte. Iuasaakirako hīpoxokoniuatato. Iuasaaki kākiti kona posotari ixipokiniri hīpoxokoni. ²³ ĩkora õti apokasaaki, kona hīpimaãikano nota. Iuasaaki hamanaãri niri hinirekakiti nota uãkaã, ininiã iua sikai hamanaãkiti. ²⁴ Uatxapiima kona hamanaãpanikari hinirekakiti nota uãkaã. Hamanainiãri, hãpakapapitikariko. Ininiã hīpoxokoni apokapitikako hītemoni.

Imoianariakori Auikari Xesosi Sākire

²⁵ —Mĩtxi niomaãtari ĩpixini nisākire, kākiti mimarotakaniri ĩkapani. Āti õti kona niomaãtaikari atão. Nisãpiretaiko niri iteene himarotini ĩkapani. ²⁶ Iuasaaki hinirekakiti hamanaãno nota uãkaã. Kona nota amanaãri niri hinirekakiti isikinii. Hīte amanainiãri, isikapitikai. ²⁷ Niri tiretai hīte, kotxi hīte taretano nota. Hīte auikari iua iokanatinino nota uaimoni. Ininiã iua taretapitikai hīte. ²⁸ Niri iokanatanano ĩkorapokoriti. Paītiki nitakanapari ĩkorapokoriti nirimoni nisini ĩkapani —itxa Xesosi.

²⁹ Imoianariakori txari:

—Uatxa pisākire atãoenepitika. Sãkiretxi piomaãtakiti kona auaika, kotxi uatxa aimarotari pisākire. ³⁰ Uatxa aimarotari pite imarotini imakinika. Kona apakata apikomoni apimarauatini, kotxi uatxa aãuikari Teoso auinimoni ĩkari pininiua pite —itxarina Xesosi.

³¹ Xesosi apakapapiretana:

—Uatxa hãuikari nisākire —itxa Xesosi.

³² —Uatxa Teoso ketotiniri manapi apope hīarikini ĩkapani. Imakinika hīte takanapanoko. Notanani kaikota. Iuaritika kona notananini kaikota, kotxi niri aua notakata. ³³ Ikara atoko nisãpiretai, kotxi ninirekari erekaxinirepeka hinini. ĩkorapokoriti hãuakasaaki, kākiti misiritapitikai hīte. Iuaritika hīpoxokoniuatato, kotxi nota tapara apiata. Maerekanitxi tapara poiãoka —itxa Xesosi.

17

Xesosi Misãkiretari Teoso Iuaka ĩkapani

¹ Xesosi ionakaãta iaxiti. Iuasaaki isãpiretari ia isākire Teosomoni:

—Niri, piketotini manapi apopeka. Pisikariko piotximere iuaīkana nota pamarite-moni, ininiãkara nota oerekari kākiti pite iotximere, ² kotxi pite sikano nota piposotiire ikinimane auĩte nininiua ĩkapani. Ininiã nikamari ikinimane kākiti pite sikakini auapininiika ininina ĩkapani. ³ Kākiti imarotiniãri pite, imarotiniãno nota Xesosi Kristo piokanatakiti, ninoa auapininiika, kotxi pite atão Teoso pitxaua. Pitenanira atão Teoso

pitxaua. ⁴ Noerekari ïkorapokoriti auakani pite Apiananiri pininiua, kotxi nikamapekari parïkatxi pipaniätakiti. ⁵ Ininiã niri, uatxa piotximere pisikano, pitemoni napokasaaki. Itixi kamiko apisapanika pitekata nauakasaaki, niotximere aua. Iua niotximeretxikana pisikano iuaïkana —itxa Xesosi.

Xesosi Misäkiretari Teoso Imoianariakori ïkapani

⁶ Xesosi säkirauatapanika irimoni:

—Nota säpiretari piuäka käkitimoni, ninoa itixi auakani notamoni pisikakini. Mitxi pite nakitiakori itxauana. Pite sikana ninoa notamoni, ininiã ninoa kamari pisäkire iaöka. ⁷ Uatxa imarotarina ikinika napakapakiti pite sikinino. ⁸ Nisäpiretapekana ninoa pisäkire, ininiã auikarina pisäkire. Imarotapitikarina pitemoni nipotorikini. Ininiã auikarina pite iokanatinino nota käkitimoni.

⁹ —Nimisäkiretai pite ninoa ïkapani. Kona nimisäkiretai nota säkire mauïäkani ïkapani. Nimisäkiretai ninoa notamoni pisikakini ïkapaninoka, kotxi pite nakitiakori itxauana. ¹⁰ Ikinika nota nakiti pite nakiti itxaua apaka. Ikinika pite nakiti nota nakiti itxaua. Ninoa pisikakini oerekari apanakini Apiananiri nininiua. Ininiã iusaaki apanakini txari: “Peerekari Xesosi.” ¹¹ Uatxa !nikaikotaikako ïkorapokoriti. Txamari ninoa kaikotapanika uai. Nota sipekako pitemoni, ininiäkara pinïkatana ninoa notamoni pisikakini, kotxi pite niri pitxaua, erekarinoka kamakarii pite, kaposotiirei pite. Pite sikaposotiiretano nota. Ninirekari ninoa ätika atoko ininiuana, nota pitekata ätika atoko aniniua atokokana. ¹² Itixi ninoakata nauakasaaki, ninïkatana ninoa pite uäkaã, piposotiireë. Ninoa notamoni pisikakini ninïkatapitika. Kona ätika nomaiäta. Xotasinoka pïpinanaka, kotxi pïpinanakakani äkiri itxaua iua. Ipïpinanaka, kotxi kitxakapirïka Teoso säkire iökatsopatakori säpiretapekari ikara apokini apisapanika.

¹³ —Uatxa nota sipeka pitemoni. Ikara atoko itxa nisäkire käkitikata nauapanika ninakasaaki, nota poxokoni ninoa äkixinire auini ïkapani. ¹⁴ Nisikapekari pisäkire ninoamoni, ininiäkara nisäkire mauïäkani omanatana ninoa, kotxi nisäkire auïäkani ïkorapokoriti auakani !itxaikauana ninoa. Iua atokotxikana kona ïkorapokoriti auakarino nota. ¹⁵ Nimisäkiretai pinïkatinina ninoa, Satanasi mamaïkakanina ïkapani. Kona ninirekari mauikareni sauaki auakasaakina pimakatxakinina. ¹⁶ ïkorapokoriti auakani !itxauana. Nota iua atokotxikana. ¹⁷ Pimakatxakana ninoa pite nakitiakori ïkapani. Pisäkireë pimakatxakana, kotxi pisäkire atão. ¹⁸ Nota pisäkire mauïäkanimoni piokanatinini atokokana, niokanatanana ninoa pisäkire mauïäkanimoni. ¹⁹ Ninoa ïkapani notaka nisikaua pitemoni pinirekakiti nikamini ïkapani. Ininiäkara ninoaka apaka sikaua pitemoni pinirekakiti ikaminina ïkapani.

Xesosi Misäkiretari Teoso Isäkire Auiäkani ïkapani.

²⁰ —Kona nimoianariakorinani ïkapanini nimisäkiretai pite. Apaka nimisäkiretai imakinika nisäkire auïäkani ïkapani, katana nimoianariakori säkire auïäkani ïkapani apaka. ²¹ Nota amanaãi ninoa xinire ätika atoko ininina ïkapani. Nota aua pite äkixinireë. Pitepekana aua nota äkixinireë. Iua atokotxikana ate aua ninoa äkixinireë. Ikara atoko ininiã, nota säkire mauïäkani ïkorapokoriti auikapanikariko pite iokanatinino nota. ²² Ininiã erekari notamoni pisikakiti, piotximere, nisikapekana ninoa. Ininiã ninoa xinire ätika atoko itxauana, ate ätika aniniua atokokana itxana ninoa. ²³ Nota aua ninoa äkixinireë. Pite aua nota äkixinireë. Ikara atoko ininiã peerekari, kotxi ätika itxaua ixinirena. Ikara atoko ininiã nisäkire mauïäkani imarotariko pite iokanatinino nota. Apaka ninoa imarotari nota pitiretini atokotxikana, pitiretinina ninoa apaka.

²⁴ —Niri, ninirekari ninoa notamoni pisikakini notakata auini ïkapani. Ninirekari ninoa atamatiniri ikinipoko erekari notamoni pisikakiti, niotximere pisikakiti, kotxi pite tiretano nota itixi kamiko apisa. ²⁵ Niri, atão inakarinnoka kamakarii pite. Käkiti ïkorapokoriti auakani kona imarotai pite. Iuaritika nota imarotai pite. Ninoa imarotari pite iokanatinino nota käkitimoni. ²⁶ Nisäpiretapekai pite käkitimoni. Apikomoni nisäpiretapanikariko pisäkire. Ininiã pitiraöki notamoni auakari ninoamoni auako. Ininiäkara nota aua ninoa äkixinireë.

18

*Xesosi Maïkiko Pirena**(Mateo 26.47-56; Marko 14.43-50; Arókasi 22.47-53)*

¹ Teoso imisäkiretaka atoko, Xesosi ïpiriätari sôtoãri Setorõ inakori. Iuaã aua amãtiirinape. Ininiã Xesosi sari iuaã imoianariakorikata. ² Xotasi, Xesosi mïkapiritakari, imarotari Xesosi imoianariakorikata itotiniri iuaãtaã isinina. ³ Ininiã Xotasi sari amãtiirinapemoni ätikaka sotatoakorikata, Teoso misäkiretiko aikoti nïkatakanikata. Sasetotxi auïteakori, pariseoakorikata sari iuaãtaã apaka. Ikeekotxi, tirikapi pakini anikana. ⁴ Xesosi imarotari ikinika iuamoni ikamakitina tïkane. Imarotapekari ninoan nirekakari okinirina iua. Iuaritika isari ninoamoni. Ipimaãna:

—Kiripa hinitanãta?

⁵ Ininiã ninoa:

—Xesosi Nasareekirira anita —itxana.

Ininiã Xesosi:

—Iuakarano nota.

Iuasaaki Xotasi, Xesosi mïkapiritakari, aua ninoakata. ⁶ Xesosi “iuakarano nota” inakasaaki, osipikana, ixitipe irika itxana.

⁷ Iuaïkana Xesosi pimaãna:

—Kipa hinitanãta?

—Xesosi Nasareekirira —itxana.

⁸ —Nitxapekai, iuakarano nota. Nota hinitiniã, hãuiritana nimoianariakori sini —itxa Xesosi.

⁹ Ikara atoko itxa, mitxi isäkire apokini ïkapani. Mitxi itxari Teosomoni: “Kona nomaiätana nimoianariakori notamoni psikakini. Kona ätika Inomaiäta.”

¹⁰ Eereka Simão Petro inakori kosekari iouata auïte. Isauakari Maoko inakori ikikomoni ikïpita. Iua sasetotxi auïte apiatakari nitiri.

¹¹ Xesosi txari Petro:

—Pitakaro iouata auïte omata äki. Apakatapitika nota kaminiri niri paniätakiti. Niri nirekapitikari natatsiitiniri nipinini kãkiti ïkapani —itxa Xesosi.

Xesosi Anasi Apisatoõ

¹² Eereka sotatoakori, apaka sotatoakori auïte, Teoso aikote nïkatakani pakini maïkari Xesosi. Iaxirika itxarina. ¹³ Merepanika anikarina Xesosi Anasi inakorimoni. Iua Anasi Kaipasi imatikiri. Iuasaaki iua Kaipasi sasetotxi auïte apiatakari itxaua. ¹⁴ Iua Kaipasi õtäkikapekana Xoteo auïteakori. Ia atoko itxa isäkire: “A piaerekata äti kiki ipinini ikinimane mapïkani ïkapani,” itxa Kaipasi õtäkikare.

*Petro Kipatari Xesosi Imarotini**(Mateo 26.69-75; Marko 14.54, 66-72; Arókasi 22.54-62)*

¹⁵ Simão Petro, äti Xesosi moianari pakini asikatikinitari Xesosi Anasi aapokomoni anikikosaaki. Mitxipeka sasetotxiakori auïte apiatakari aõkitapekari iua äti Xesosi moianari. Ininiã iua ïroã sasetotxiakori auïte apiatakari aapoko Xesosikata. ¹⁶ Petro kaikota iporikiti itore takote. Eereka imoianari sari iporikiti. Imisäkiretaro ïronakikoãtaã tore nïkatakaro. Ininiã oãuiritari Petro ïroini.

¹⁷ Oa txari Petro:

—Pite ikira Xesosi moianarikai? —otxari.

—Kona —itxaro.

¹⁸ Iuasaaki katxïkareri aua, ininiã nitiritxiakori, Teoso misäkiretiko aikoti nïkatakani pakini kamari xamina. Xamina ïtinipoki irokanãtauana. Petro ninoakata aua iuasaaki.

*Xesosi Sasetotxiakori Auïte Apisatoõ**(Mateo 26.57-68; Marko 14.53-65; Arókasi 22.54, 66-71)*

¹⁹ Iroko äki Xesosi sasetotxi auïteakorikata aua. Ininiã sasetotxiakori auïte apiatakari misäkiretari Xesosi:

—Pisãpiretano pimoianariakori, pisäkire poerekakiti pakini —itxari.

²⁰ Xesosi apakapapiretari:

—Ātipirika nisāpiretapikai hīte. Nitotari noerekaruatini aiko Xoteo apotiitiniātaāua, Teoso misākiretiko aikotiā apaka. Kona nikipatari nisākire. Ikinipoko kenakotari noereēkiti. ²¹ Ininiā kinirepa hīpimaāno? Hīpimaāna nisākire kenakotakani. Ninoara imarotari noereēkiti —itxa Xesosi.

²² Xesosi ikara atoko isākirauatakasaaki, Teoso misākiretiko aikoti nīkatakari aritoō-tari Xesosi.

—Atokope. Kona ikara atoko pitxape sasetotxi auīte apiatakarimoni —itxari.

²³ Ininiā Xesosi:

—Nikerokiniāri nisākire, pisāpiretano nikerokakiti, txamari kona nikerokari. Atāo nisākire, ininiā kinirepa piaritano? —itxa Xesosi.

²⁴ Eereka Anasi iokanatarari Xesosi iaxirikiko. Eereka anikarina sasetotxi auīte apiatakari-rimoni, Kaipasi inakorimoni.

Iuaīkana Petro Kipatari Xesosi Imarotini

(Mateo 26.71-75; Marko 14.69-72; Arókasi 22.58-62)

²⁵ Petro iporikiti aua iuasaaki. Ininiā apanakini pimaāri:

—Ikira kiki moianarikai pite? —itxarina.

Ininiā iua:

—Kona —itxa.

²⁶ Āti sasetotxi auīte apiatakari nitiri, Petro kisauakakīpitatakiti nirimane iua. Iua pimaāri Petro:

—Pitekani amātiirinapeātaā nitika iuakata? —itxari.

Iuaīkana Petro txari:

—Kona notani.

²⁷ Iuasaakipeka patari sākirauata. Iuasaakipeka mitxi Xesosi sāpiretakiti iaōka auape.

Xesosi Pirato Apisatoō

(Mateo 27.1-2; Marko 15.1-5; Arókasi 23.1-5)

²⁸ Īkanōkapanika ninoa takanapari Kaipasi aapoko, Anikarina Xesosi Homano auīte auinimoni, kākiti misiritiko imarotiko pakitamoni. Xoteo auīteakori kona nirekari aiko āki ĩroinina. Kona inirekarina āti uāka takote iitopākinina. Āti uāka takote iitopākinina, kona apakata nipokori inikinina Páskoa kiiniritiā. ²⁹ Ininiā Pirato pokīka porikiti Xoteo imisākiretini ĩkapani. Ininiā Pirato txana ninoa:

—Kixikapa himinatari ikira kiki notamoni? —itxana.

³⁰ Ininiā ninoa txari:

—Maerekati imakamakaniā, kona ate minari iua pitemoni.

³¹ Ininiā Pirato:

—Hīteka xinikari maerekati ikamakiti, ininiā ixika auiniā hīteka misiritari iua. Hīkiomaneakorini sākire iaōka himisiritari iua —itxa Pirato.

Xoteoakori apakapapiretari:

—Kona apakata aōkiniri iua, kotxi hīte Homanoakori ! auiritaua aōkiniri kākiti. Pitenokara apakata okiniri iua —itxana.

³² Ikara atoko inaāka, mitxi Xesosi sākire iaōka apokini ĩkapani, kotxi mitxi isāpire-tapekari aamina ĩpiriāmitakari nopini ipinini.

³³ Pirato ĩroā kākiti misiritiko imarotiko pakita āki iuaīkana. Ipīkapiretari Xesosi. Ipimaāri:

—Pitekani Xoteoakori auīte txataua? —itxari.

³⁴ Ininiā Xesosi txari: —Piteka sākirekani ikara? Atxiīti apanakini sākire atokotxikana pipimaāno atxiīti? —itxa Xesosi.

³⁵ Pirato apakapapiretari:

—Xoteokani nitxataua? Konapitini. Piteka nirimane, pinirimane auīteakori pakini sikai pite notamoni pimisiritiko tīkane. Kixikapa? Kipa maerekati pikamakiti? —itxa Pirato.

³⁶ Ininiā Xesosi:

—Auītetxi nininiātaāua kona ĩkorapokoritini. Nitixine ĩkorapokoriti inaākamako, ninitiriakori neenamauatamako, ininiā Xoteoakori kona maīkamanoko. Auītetxi nininiātaāua ātiātaāra —itxa Xesosi.

³⁷ Pirato txari Xesosi:
—Ininiã auñtetxikani pitxataua?

Ininiã Xesosi: —Atãopitikara pisãkire auñtetxi nininiua. Niponaniã ñkorapokoriti auñtetxi nininiua ñkapani. Itixi napoka atãoene nisãpiretini ñkapani. Atãoene nirekakani auikari nisãkire —itxa Xesosi.

³⁸ Ininiã Pirato:
—Kiripa atãoene txaua?

Xesosi Okiko Nirekiko
(Mateo 27.15-31; Marko 15.6-20; Arókasi 23.13-25)

Eereka Pirato iuañkana mapara isa Xoteoakori imisãkiretini ñkapani. Itxari:
—Kona nota apokari maerekati ikamakiti. ³⁹ Hñte itotari maerekati kamakari kateia ñki auakari nisikakini Páskoa kiiniritisaaki. Hñte nirekatari nisikakiniri ikira Xoteoakori auñte? —itxa Pirato.

⁴⁰ Ikinimanekana akiripoakatana:

—Kona iuani. Pahapasira anireka.

Txamari iua Pahapasi kokaniri. Iua naiatapekari Homanoakori.

19

¹ Ininiã Pirato paniãtari sotatoakori noropatiniri Xesosi. ² Ininiã sotatoakori kamari saporieña atoko inakari, kotipiaro kamakori. Ieretakari Xesosi kiiã. Auñtetxi mãka poporeri itakana Xesosi nopini. Ikara atoko ininiã, inapetarina Xesosi. ³ Ikara atoko itxana inapetinirina:

—Añuñte —itxarina Xesosi inapetinina.

—Xoteo auñtekai pite —itxarina.

Ininiã iusaaki iaritarina itoõ.

⁴ Iuañkana Pirato sari mapara iuañkana Xoteoakori imisãkiretini ñkapani.

—Hñtakaõtxikari. Hñtemoni nimirari iua, kotxi ninirekari himarotiniri, !napokari maerekati ikamakiti. ⁵ Ininiã Xesosi apoka mapara. Saporieña kotipiaro kamakori ikiiã, auñtetxi mãka pakini aua iuamoni. Ininiã Pirato txari:

—Hãtamatarari iua.

⁶ Sasetotxi auñteakori, Teoso misãkiretiko aikoti nñkatakani pakini atamatakasaakiri, ninoa akiripoakata:

—Hõkariko iua. Hõkariko iua. Aamina ñpiriãmitakari nopini hñtokakitariko —itxana.

Ininiã Pirato:

—Hñteka anikari. Hñteka okari iua aamina ñpiriãmitakari nopini, kotxi kona napokari maerekati ikamakiti.

⁷ Ininiã Xoteoakori:

—Akiomane sãkire paniãtari kãkiti iua atoko inakari okiko, kotxi iua sãkire: “Teoso ñkirirano nota,” itxa —itxana Xoteoakori Piratomoni.

⁸ Xoteoakori sãkire ikenakotakasaaki, apia pikareta Pirato. ⁹ Ininiã iuañkana ñroã kãkiti misiritiko imarotiko pakita ñki. Ipimaãri Xesosi:

—Nanipa pina?

Txamari !kasãkireri Xesosi.

¹⁰ Ininiã Pirato:

—Kona pinirekatari pimisãkiretinino? Pixinikariko ia nisãkire. Nota posotari nisikakinii. Apaka nota posotari nokinii aamina ñpiriãmitakari nopini —itxa Pirato sãkire.

¹¹ Xesosi apakapapiretari:

—Kona pite auari posotiiretxi pokininino ñkapani. Ikara inakari piposotiire auiniã, Teosonaira sikai ikara posotiiretxi. Nota sikanapakani pitemoni kamari apiata maerekati.

¹² Pirato ikara atoko inakari ene ikenakotakasaaki, iua ñkixinireñ ixinikari:

—Kiatokopa atxiñti nisikakari Xesosi?

Inirekari Xesosi isikakini. Txamari Xoteoakori akiripoakata:

—Pisikakiniãri ikira kiki, kona Sesa moianari !pitxaikauako. Iua sãkire: “Auñtetxi apiananiri nitxaua.” Sesanoka auñtetxi apiananiri —itxana Xoteoakori.

¹³ Pirato ikara atoko inakariene ikenakotakasaaki, iminari Xesosi iporikitimoni. Ininiã Pirato topãka. Iuaã kãkiti misiritiko isãpiretiniãtaã. Kãkiti takauãkatari iuaã “Kimapori kai kamakori” inaãka. Xoteo sãkireẽ “Kapataa.” Iuaã auĩtetxi iokanataro maerekati kamakari imisiritikomoni. ¹⁴ Iuasaaki apaniãxiti takote. Iua õti Pãskoã kiiniriti potorikini õti apisa. Iuasaaki Pirato txari Xoteoakorimoni:

—Hãtamata, hãauĩte.

¹⁵ Ininiã iuaĩkana ninoã akiripoakata:

—Piokanatariko ere. Piokanatariko ere. Hõkariko aamina ipiriãmitakari nopini — itxana sasetotxi auĩteakori.

Ininiã Pirato:

—Hinirekatari nokiniri hãauĩte aamina ipiriãmitakari nopini?

Ininiã ninoã:

—Ãtikara ate auĩte. Sesanokara ate auĩte —itxana ninoã.

¹⁶ Ininiã Pirato sikari Xesosi sotatoakorimoni aamina ipiriãmitakari nopini okiko tĩkane.

Xesosi Tokakitaãka Aamina Ipiriãmitakari Nopini

(Mateo 27.32-44; Marko 15.21-32; Arõkasi 23.26-43)

Ininiã anikarina Xesosi. ¹⁷ Xesosi anikari aamina ipiriãmitakari iuaka okiko ãkapani. Isana ixirata “Kiitãtatxi” inakorimoni. Xoteo sãkireẽ, “Kõokota,” inakori.

¹⁸ Iuaã aamina ipiriãmitakari nopini itokakitaãka Xesosi. Apaka ipi kiki tokakitaãka iua takote. Ãti Xesosi kikomoni. Ãti isanaremoni. ¹⁹ Pirato paniãtari iõkatsopari aamina ipiriãmitakari nopini tokakitiko. Ia atoko itxa iõkatakiti: “Xesosi Nasareekiri, Xoteoakori Auĩte.” ²⁰ Itomaneri Xoteoakori atatsopataro iua, kotxi Xesosi okikoãtaã sitatxi takote. Sitatxi sikani napaãpotakasaaki, atamatarina iua iõkatsopari. Ia iõkataãka Xoteo sãkireẽ, Kreko sãkireẽ, Homano sãkireẽ pakini ikinimane imarotiniri ãkapani. ²¹ Ininiã sasetotxi auĩteakori txari Pirato:

—Kona piõkatsopataro, “Xoteoakori auĩte.” Piõkatsopatariko iuanoka uãkatari Xoteoakori auĩte ininiã —itxana.

²² Ininiã Pirato:

—Auape niõkatsopatakiti. Kona iuaĩkana niõkatsopataro —itxa Pirato.

²³ Xesosi itokakitakana atoko, sotatoakori kosekari Xesosi mãka. Imatsorakitarina. Imãka mata imatsorakitana ninoã ipi ipi pakini apakapini ãkapani. Ãti sotato apakapari ipixini, õti sotato apakapari ipixini, itxaãpota. Xesosi mãka, õti imãka patapi auakari, ! imatsorakitana, kotxi iotsare lauari. Peerekari. ²⁴ Sotatoakori itxakakana:

—Kona amatsorakitari ia. Sarauatxi atoko makama, imãka anikakari aimarotini ãkapani.

Ininiã iuasaaki Teoso sãkire iõkatsopatakori kitxakapirĩka iaõka apoka. Iua txari:

Ninoã xanakari nimãka. Isarauatana nimãka anikakari imarotinina ãkapani.

Teoso sãkire iaõka sotatoakori kama.

²⁵ Iuasaaki aamina ipiriãmitakari takote oãua Maria, Xesosi inoro õitarokata. Iuaã apaka oãua Maria Matarena inakoro. Iuaã apaka oãua ãto Maria, Krõpasi inakori ãtanoro.

²⁶ Xesosi atamatakasaakiro inoro iua takote, atamatakasaakiri imoianari itiretakiti apaka, itxaro inoro:

—Nitiretakito, ere Xoã, pamarite itxaua.

²⁷ Imoianaripekana itxa:

—Aroã pinoro otxaua.

Ininiã eereka iua anikaro oa aapokomoni iuakata oãuini tĩkane.

Xesosi Ipinini Pirena

(Mateo 27.45-56; Marko 15.33-41; Arõkasi 23.44-49)

²⁸ Eereka Xesosi imarotari iparĩka xipope. Ikinika Teoso sãkire iõkatsopatakori iaõka apokini ãkapani, itxari:

—Niposonata.

²⁹ Iuaãtaã aua tiitxi. Iua tiitxi äki aua iãriã katxioãri. Ininiã iuasaaki iokomokarina mapoa atoko inakari iãriãmoni. Aãkeẽ itakarina, Xesosi namaã taka itxarina. Iua aãke isopo inakorike. ³⁰ Iãtaka atoko itxari:

—Ikinika niparĩka uatxapeka ixipopeka.

Inaãka atoko iokirikiita, iokanata itxari ixinire irimoni. Iuasaakipeka ipina itxa.

Sotato Iorotari Xesosi Iomĩtiã

³¹ Iua õti sesta veira, kãkiti tomatiko õti apisa. Xoteo auĩteakori paniãtari Pirato aamina ipiriãmitakariã auakani tapike kapatakiko, katima ipĩka ininina ikapani, iitona makatxakiko ikapani apaka. Tomatiko õtisaaki kona ninoa nirekari ipĩkari ãto kaikotini iuaã. ³² Ininiã sotatoakori sari iuaã. Ikapatakarina Xesosi takote auakani tapike. ³³ Txamari sotato atamatakasaakiri Xesosi, !auaika. Ipĩpeka. Ininiãkara kona ikapatakari itapike. ³⁴ Sotato iorotari Xesosi itanapitaã iomĩtiã. Iuasaaki iarẽka, ãparaã pakini xiketa.

³⁵ Notara itikari Xesosi ipinini, ininiã atãopitikara nisãpiretakiti. Nisãpiretari ikinika nitikakiti. Nimarotari nisãkire atão inini, ininiã nisãpiretai ia atatsopatakani, hĩte apaka auikiniri ikapani. ³⁶ Teoso sãkire iõkatsopatakori kitxakapirĩka txari:

Kona ãtika iua api !kapatakaãka.

Ininiãkara kona Xesosi api kapatakaãka, Teoso sãkire iõkatsopatakori iaõka apokini ikapani. ³⁷ ãti Teoso sãkire iõkatsopatakori txari:

Ninoa atamatariko iorotakitina.

Xesosi Katiko Pirena

(Mateo 27.57-61; Marko 15.42-47; Arókasi 23.50-56)

³⁸ Eereka Xosee, Arimateia sitatxitikiri, amanaãri Xesosi ãto Piratomoni. Iua Xosee auikari Xesosi sãkire, txamari ikipatari Xesosi sãkire auikini, kotxi ipĩkari Xoteo auĩteakori. Amanaãkasaakiri Xesosi ãto, Pirato txari:

—Ari, panikari iua.

Ininiã Xosee anikari Xesosi ãto. ³⁹ Iuasaaki imoianari Nikotemo inakori. Iua Nikotemo mitxipeka sari Xesosimoni ikanõka imisãkiretiniri ikapani. Iua moianatari Xosee, Xesosi ãto apakapakasaaki. Nikotemo anikari aãtsopa aroesi inakori, miha inakori pakini ikoke Xesosi ãtoã taãkori tĩkane. Trĩta sĩko kiro pakini iua ikoke anika. ⁴⁰ Ninoa ipi iapirikari Xesosi ãto mãkatxi mataã ikokekata. Ikara atoko Xoteo kamari ipĩkari ãtoã ikatiko apisa.

⁴¹ Xesosi aamina ipiriãmitakari nopini takikoãtaã, iuaã takote aua amãtiirinape. Amãtiirinapeãtaã aua akauari amanepanika inakari. Kona ipĩkari ãto takaãkapanika iuaã. ⁴² Iua akauari kona õtakori, ininiã itakarina Xesosi ãto iuaã, kotxi Xoteo tomatini õti apokanapanoka.

20

Akauariã Xesosi ãto Mauakani

(Mateo 28.1-8; Marko 16.1-8; Arókasi 24.1-12)

¹ Tomĩko ikanõkapanika, Maria Matarena sari akauarimoni. Oãpokasaaki, oãtamataru akauari tore kai auĩte kamakori makatxakapeẽkaika. ² Ininiã omiteka Simão Petromoni. Xesosi moianari itiretakitimoni apaka osa. Oãkiritana:

—Apiananiri ãto makatxakaãka akauariã. Kona aimarotari namonireuako itakapirina —otxana.

³ Ininiã Petro, ãti Xesosi moianarikata sari akauarimoni. ⁴ Imitekana. Iua ãti Xesosi moianari miteka katimaritika, ininiã inapari Petro. Ininiã iua apoka Petro apisa. ⁵ Iãka aariko äki atamatini ikapani. Atamatari mãkatxi mata, ipĩkari iapirikiko. Kona iĩroã. ⁶ Iuasaaki Petro apoka iua tikini. Iĩroã aariko äki. Atamatari mãkatxi mata. ⁷ Atamatari mãkatxi mata, mitxi Xesosi kiiã iapirikiko. Iporiĩmatataãka. Ikikomoni aua ãti mãkatxi mata. Isanaremoni aua ãti mata. ⁸ Ininiã iua mitxi apoãkari iĩroã, atamata itxari. Ininiã auikari Maria sãkire. Iuasaakiika auikari Xesosi õkitikiniua. ⁹ Iuasaaki ninoa kona iteene imarotapanikari Teoso sãkire iõkatsopatakori kitxakapirĩkari, kotxi Teoso sãkire sãpiretapekari Xesosi ipinini, eereka õkitikiniua. ¹⁰ Eereka Petro ãti Xesosi moianarikata kanapiriã aapokomonina.

Xesosi Oerekaua Maria Matarenamoni
(Mateo 28.9-10; Marko 16.9-11)

¹¹ Maria Matarena kaikota aariko iriko takote. Otxiapanātakasaaki, amaātiki opa-pīkakiita oiākakiita aariko iriko āki oātamatani ikapani. ¹² Oātamatana ipi Teoso nitiriakori iaxitikini. Imākana kasarori. Iitopākana mitxi Xesosi ĩto auiniātaā. Āti mitxi Xesosi kii auiniātaā, āti mitxi ikiti auiniātaā. ¹³ Itxarona:

—Kinirepa pitxiapanāta? —itxana.

Ininiā oa:

—Imakaxakaāka niauīte ĩto. Kona nimarotari ĩto takikoātaā —otxana.

¹⁴ Iuasaaki oporikimoni osapotorika. Oātamatari Xesosi, txamari !oimarotari.

¹⁵ Ininiā Xesosi:

—Kinirepa pitxiapanāta? Kiripa pinita? —itxaro.

Ouākatari Xesosi amātiirinape nīkatakari ininiua. Ininiā otxari:

—Pite makaxakiniāri iua ĩto, ininiā pisāpiretano ĩto pitakiniātaā. Ininiā nanikariko ātiātaā —otxari.

¹⁶ Ininiā Xesosi txaro:

—Maria.

Ininiā okirioka iuamoni. Otxari osākireē:

—Haponii.

Popīkari sākireē, “Noereēkiri,” otxa.

¹⁷ Ininiā Xesosi txaro:

—Kona pimaātakapeno, kotxi nirimoni kona nisapanika. Pisa nitariakorimoni. Pitxanako: “Nota sariko nirimoni, hīte iritxikana apaka. Nisariko niTeosonemoni, hīTeosonetxikana apaka,” itxa.

¹⁸ Ininiā Maria Matarena sari Xesosi moianariakorimoni:

—Natamatapekari aāuīte —otxana.

Ininiā osāpiretana ikinika Xesosi sākire.

Xesosi Oerekaua Imoianariakorimoni
(Mateo 28.16-20; Marko 16.14-18; Arókasi 24.36-49)

¹⁹ Iua Tomīko ĩkanōkati Xesosi moianariakori apotiitaua. Iuasaaki itotarina ikinika aapokotxi tore, kotxi ipīkana Xoteo auīteakori. Iuasaaki Xesosi tokiā aapokotxi āki ninoa sauaki.

—Erekaxinire hītxako —itxana ninoa.

²⁰ Ikara inaka atoko oerekari iuako karo. Oerekari itanapita karo. Ininiā Xesosi atamatakasaakina, imoianariakori iteene poxokoniuata. ²¹ Iuaīkana Xesosi txana:

—Erekaxinire hītxako. Niri iokanatinino atokotxikana, niokanatai hīte niri nireēkiti hīkamini ikapani.

²² Iuasaaki ixōkana. Itxana:

—Hāpakapariko Erekari Matamatakoti. ²³ Apakata pisāpiretiniri nota sākire auiākari, imaerekani makaxakaākapeka. Apakata pisāpiretiniri nota sākire mauīākani, imaerekani !imakaxakaāka —itxa Xesosi.

Xesosi Oerekaua Tomeemoni

²⁴ Xesosi imoianariakorimoni oerekasaakia, Tomee Txītximo inakori kona aua ninoakata. ²⁵ Ininiā apanakini sāpiretari Tomee:

—Ate aōkitari Xesosi —itxana.

Ininiā iua:

—Iuako karo nimatamatakaniā, iuako karo nimakaaiakakaniā niuakokiā, kona nauikari hīte sākire. Itanapita karo nimakaaiakakaniā, kona nauikari hīsākire —itxa Tomee.

²⁶ Āti semanati napaka atoko, Xesosi moianariakori apotiitaua iuaīkana aapokotxi āki. Iuasaaki Tomee aua ninoakata. Aapokotxi tore itotaāka, iuaritika Xesosi tokiā ninoamoni:

—Erekaxinire hītxako —itxana ninoa.

²⁷ Iuasaaki itxari Tomee:

—Patamata niuako. Pikaaiakariko piuakokiā nitokakitiko karoā. Nitapanita iorotikomoni pitakari piuakoki. Kona mauikaretika !pitxape. Pauikariko nisākire —itxari.

²⁸ Ininiã:

—Niauïte, niTeosone —itxa Tomee.

²⁹ Ininiã Xesosi:

—Uatxa pite aukari auãki ninini, kotxi patamatano. Kãkiti nota maõkitakani aukiniãri nisãkire, apakapariko apiata erekari Teoso sikakiti —itxa Xesosi.

³⁰ Xesosi kamari apikomoni iposotiire imoianariakori sauaki. Iposotiire ikamakiti imakinika kona iõkatsopataãka ia iõkatsopariã. ³¹ Ia niõkatsopata Xesosi Teoso mereëkiti, Teoso ãkiri ininiua hãuikini ïkapani. Ikara atoko hãuikiniã, hãuapininiika hïtxako Xesosi posotiireẽ.

21

Xesosi Oerekaua Setxi Imoianariakorimoni

¹ Æti õti Xesosi oerekaua iuaïkana imoianariakorimoni ipoa Txiperiatxi inakori tiniã. Ia atoko iua oerekaua:

² Iuaã aua Simão Petro. Iuakata aua Tomee Txítximo inakori. Natanaeo, Kanaa aapokotxitikiri, Kariréia tõpa auakari apaka aua iuakata. Sepeteo anaakori apaka aua iuakata. Apikomoni ipi Xesosi moianariakori apaka aua iuaã. ³ Simão Petro txana:

—Nota okatsaãtako —itxa.

Ininiã apanakini:

—Ari, ate apaka okatsaãtako pitekata —itxana. Ininiã isana. Kanauaã iereëtauana. Ìkanõka okatsaãtana, txamari !imaïkarina ximaki. ⁴ Ìkanõkapanika Xesosi ikipatxite-moni tïpokonãta, txamari limarotarina Xesosi iuaã auini.

⁵ Xesosi akiritana:

—Namariteakori, kaiomaãi ereẽ? —itxana.

—Kona kaiomaãua —itxarina.

⁶ Ininiã Xesosi paniãtana:

—Hïtakariko hetxi hïkikomoni. Ereẽ hãpokariko ximaki —itxa Xesosi.

Ininiã ninoa okari hetxi ikikomona. Eereka kona iposotaikarina ikosekinirina hetxi kanaua ãki, ximaki itori imaïkinina xika. ⁷ Xesosi moianari itiretakiti txari Petromoni:

—Aãuïtekara.

Ikara inakari sãkiretxiti ikenakotakasaaki, Petro ieretakari imãka, mitxi imaktx-akakiti, oka itxaua ipoamoni Xesosimoni isini ïkapani. ⁸ Apanakini kanauaã ina. Ikosekaãpotarina hetxi. Iuasaaki ximaki xãpoka hetxiã. Itakoã !itakori, atxiiti seï metronoka. ⁹ Ikanïkiitakasaakina, atamatarina xamina. Ximaki iropike nopini auape. Apaka auari komiri.

¹⁰ Xesosi txana:

—Himinari ximaki himaïkakiti mapake.

¹¹ Ininiã Petro kosekari hetxi imiriï. Xãpoãkata ximaki. Sëtosïkoëta tres ximaki mitapoakari aua. Kaiãopokori ximaki, iuaritika hetxi kona tsorakita. ¹² Xesosi akiritana:

—Uai hina. Manipokota.

Kona ãtika imoianari kona kataparaxinire ipimainiri iua: “Kiriparai” ininiri iua, kotxi ninoa imarotari iua Apiananiri ininiua. ¹³ Ininiã Xesosi apoka ninoamoni. Ixanakari komiri, ximaki pakini, sika itxana ninoamoni.

¹⁴ Ikara õti apisapanika, Xesosi ipinaka atoko, õkitikaua atoko, oerekapekaua ipikata imoianariakorimoni.

Xesosi Misãkiretari Petro

¹⁵ Inipokotaka atoko Xesosi pimaãri Simão Petro:

—Simão, Xonasi ãkiri, kipa apiata tiretano nota, pitekani, nakirakani? —itxa Xesosi.

Ininiã Petro txari:

—Ari, Apiananiri, pimarotari nota apokaerekatini —itxa Petro.

Ininiã Xesosi:

—Poerekari nisãkire soti auïte anaakorimoni, ninakitiakorimoni.

¹⁶ Iuaïkana ipimaãri:

—Simão, Xonasi ãkiri, atão pitiretatano nota? —itxa Xesosi.

—Ari, Apiananiri, pimarotari napokaerekatini —itxa Petro.

Ininiã Xesosi:

—Pinĩkatana soti auĩte, ninakitiakori —itxa Xesosi.

¹⁷ Iuaĩkana ipimaãri:

—Simão, Xonasi ãkiri, pitiretatano nota?

Ininiã Petro matinaniuata ixinireẽ, kotxi Xesosi pimaãri ipi ãti pakinikata “Pitiretatano nota.”

Ininiã Petro:

—Apiananiri, pite imarotari ikinipoko. Pimarotapitikari nitiretinii pite.

Ininiã Xesosi:

—Poerekari nisãkire soti auĩte ninakitiakorimoni. ¹⁸ Atão nitxai. ãtokoripanika pinakasaaki, piteka pieremãkataua. Pisari pinirekinimoni. Kiomãtxi pinakasaaki, pitamẽkakanoketauako, ininiã ãti ieremãkatai. Eereka anikai pimanirekakanimoni — itxa Xesosi.

¹⁹ Ikara atoko Xesosi sãkire, kotxi ikara atoko itxako Petro ipinini. Petro ipinini iteene paxitariko Teoso, ininiã kãkiti txariko: “Peerekari Teoso.” Ininiã Xesosi:

—Pikapokitano nota. Ninireẽkiti pikamako —itxa Xesosi Petromoni.

Xesosi Iteene Tiretakiti

²⁰ Petro kirioka. Atapari Xesosi moianari, itiretakiti ninoa tikini inini. Iuakara mitxi Xesosikata iitopãka Pãskoia kiiniritisaaki. Iuasaaki ipimaãri Xesosi: “Niauĩte, kiripa mĩkapiritai?” ²¹ Petro atapakasaakiri Xesosi tiretakiti ninoa tikini inini, ipimaãri Xesosi:

—Natokopa itxatako ere ipinini?

²² Ininiã Xesosi:

—Nota nirekiniãri iua auapanika inini nikanapiriãkasaaki, kona nisãpiretai pite. Kona pixinikapiri iua. Pixinikari piteka kaminiri nota nireẽkiti —itxa Xesosi.

²³ Ininiã iaripireta Xesosi sãkire auĩãkanimoni, iua imoianari itiretakiti imapinakani Xesosi kanapiriini apisa. Txamari Xesosi !isãpiretari imapinakani. Iua txari: “Nota nirekiniãri iua auapanika inini nikanapiriãkasaaki, kona nisãpiretai,” itxa Xesosi.

²⁴ Nota ikara Xesosi moianari itiretakiti nitxaua. Nota itikari imakinika Xesosi kamakiti. Ininiã nota iõkatsopatarari ikamakiti, isãkire pakini. Ininiã aimarotari atão nisãpiretakiti.

²⁵ Auapanika itori Xesosi kamakiti. Ikinika ikamakiti !kaiõkatikopanikari. Ikinika niõkatsopatiniã, !apakata, kotxi itixi kona apakata kaiãopokori aãtsopa auini.

ÁTOSI Xesosi Iokanatakini Kamakiti Pirena

Xesosi Kanapiriini Iaxiti

¹ Erečkai Teópiro, Teoso tiretakari. Merepitipanika niökatsopatakiti aätsopaã txari ikinipoko Xesosi kamakiti, isäpiretakiti pakini. ² Niökatsopatakiti mapotökire auari Xesosi iaxiti sini pirena. Isini apisa isäpiretana iokanatakini Erekarí Matamatakoti paniätakiti.

³ Ipinaäka atoko iuaíkana iuaka oerekaua ninoamoni, ininiã imarotarina atäopitika iua ökitikapekaua. Koarëta pakini öti iua auanãta ninoakata. Iuasaaki isäpiretana Teoso auütetxi ininiãua pirena. ⁴ Imakinika apotiitakasaakiua itxana ninoa:

—Kona hítakanapapiri Xerosareë sitatxiti. Aïri iaxitikiri iokanaenetakiti hiätapako. Iua mitxi hitemoni nisäpiretakiti. ⁵ Atäopitikara Xoãoni patxisatai hite äparaaã. Mapaöti napaka atoko, Erekarí Matamatakoti apokako hitemoni. Iuasaaki hïpatxisataãkako Erekarí Matamatakotiã —itxa Xesosi säkire.

⁶ Ininiã imoianariakori apotiitakasaakiua Xesosikata, ipimaärina iua:

—Aäuïte, uatxa iuaíkana pisikatari atixine atemoni, Isaeo apika mekaniriakorimoni? —itxarina.

⁷ Ininiã Xesosi txana ninoa:

—Kona hite imarotiniiri íkapanini. Aïrinanira imarotapaniri hite tixine hitemoni isikini öti. ⁸ Erekarí Matamatakoti apokasaakirako hitemoni, häpakapariko posotiiretxi. Ininiã hite nota kamakiti atamatakani hïtxauako. Hïsäpiretariko hïtiäkiti, himarotakiti pakini Xerosareë sitatxiti auakanimoni, imakinika Xotéia tōpa auakanimoni, Samaria tōpa auakanimoni, ikini itixiti auakanimoni pakini hïsäpireäpotariko —itxa Xesosi ninoamoni.

⁹ Ikara atoko inaäka atoko, ninoa okiã atamatarí iua anikiko iaxiti. Katxiäri äki isa, ininiã kona ninoa itikaikari. ¹⁰ Iaxiti ionakaätakasaakina, apoka ipi kiki katsopiri mäkatani ninoa takote. ¹¹ Ninoa txana:

—Kiki Kariréiakini, kinirepa hionakanãta iaxiti? Íkora Xesosi iaxiti sikari, isini atoktxikana ikanapiriini —itxana ninoa.

Itanokiri Koaã Apotiitakaniua

¹² Ininiã Oriva xirataãtaã ipotorikana. Ikanapiriãna. Xerosareëmoni isana. Oriva kona ötakori. Käkiti Oriva xirata potoricakani sini Xerosareëmoni tako atokokanera Xoteo kiomaneakorini auritari käkiti sini tomatiko ötisaaki.

¹³ Xerosareë sitatxiti apokasaakina, iïroãna aapokotxi äki. Ininiã isana itanokiri koaã. Petroma, Xoãoma, Txiakoma, Ätreema, Piripima, Tomeema, Patoromeoma, Mateoma, Txiakoma (Aopeo äkiri), Simãoma (Homano omanatakari), Xotasima (äti Txiako itari) pakini aua iuaãtaã. ¹⁴ Ätipirika ninoa apotiitaua Teoso imisäkiretinina íkapani. Apaka sitoakoro Xesosi säkire auiäkani, Maria Xesosi inoro, Xesosi itariakori pakini apotiitaua ninoakata. Ninoa misäkiretakasaakiri Teoso, ätika käkiti xinirenoka atoko itxana. Ininiã erekarinoka auana ninoamoni. Kona omanatakakauana.

Matxia Mereïko Pirena

¹⁵ Iuasaaki sëtovïtxi pakini Xesosi säkire auiäkani aua. Petro ökitikaua ninoa sauaki.

¹⁶ Ininiã itxa:

—Nitariakori, hítakaötxikari Teoso säkire kitxakapiríka Taviimoni isäpiretakiti. Tavii iökatsopatari Xotasini pirena, Xesosi mäkkakani oerekakari pirena, kotxi Erekarí Matamatakoti kamaimaroretari iua Tavii. Atão ikara Teoso säkire kitxakapiríkarí apokapeka uatxa. ¹⁷ Iua Xotasini atekata auakari iua. Ate paríka atoko ikama.

¹⁸ —Iuaritika isikari Xesosi imokaiakariakorimoni. Txineiro apakapakitoã iamotaäka itixi. Iuaã ipïpe. Itano okaua. Ixiti apokasaaki, iokirikiita. Ixoreka itikako. Iuasaaki

itikapitsa poãpekatani. ¹⁹ Imakinika Xerosareë auakani kenakopiretari Xotasini ipinini. Ininiã ninoa akiritari iuaãtaã itixi uãka “Aseotama.” Popĩkari akiritari “Arëkatxi Tixini.”

²⁰ —Xikari iõkatsopatakoriã iõkatsopatapeëkaika ia Xotasi pirena: Iua aapoko takanapaãkako. Kona auiritaãka kãkiti auini iuaãtaã. Iparĩka sikaãkako ãtimoni, itxa Teoso sãkire.

²¹ —Ininiã amereëriko ãti kiki atekata sikari tĩkane. Amereëriko kiki mitxi Xesosikata sikari, mitxi amoianari ikiniõtika Xesosikata aãuakasaaki. ²² Amereëriko kiki Xoãoni patxisarauatini itiãkari, imakinika Xesosi kamakiti itiãkari, iaxiti isini itiãkari, kotxi anirekari iua amereëkiti Xesosi õkitikiniua imarotakari ate atoko inakari —itxa Petro.

²³ Ininiã imereërina ipi kiki, Xosee Pasapasi inakori. Apanakini akiritari iua Xósite. ãti kiki uãka Matxia inakori. ²⁴ Iposo atoko imisãkiretarina Teoso:

—Pite imarotari ikinimane kãkiti ãkixinire. Poerekaua ĩkiripa naia kiki pimereëkiti ²⁵ atekata parĩkauatakari tĩkane, Xesosi iokanatakiti tĩkane, kotxi Xotasini takanapari ikara parĩkatxi imaerekani xika, maerekani misiritikoãtaã isini ĩkapani —itxana Teosomoni.

²⁶ Iposo atoko ikamarina sarauatxi atoko inakari imoianarina imarotinina ĩkapani. Ikara atoko ininiã, imereërina Matxia. Ininiã Xesosi iokanatakiti itxaua. Ikara õti atoko, iua moianatari apanakini õsi Xesosi iokanatakini.

2

Pëtekósitxi Kiiniriti Õti

¹ Pëtekósitxi kiiniriti õti (takari merepitipanika nikiko õti) apokasaaki, Xesosi sãkire auiaãkani ãtika kãkiti xinire atoko itxauana. Imakinika apotiitauana. ² Katimaritika iaxiti ĩkari kataparari ĩtimati atoko inakari xãpoka aapokotxi ãki Xesosi moianariakori topãkiniãtaã. ³ Ininiã iuasaaki xamina tirika atoko inakari tokiã. Imakinikana ikiiãna apoka. ⁴ Erekar Matamatakoti ĩroã ikinika ãkixinireë. Iuasaakipeka ninoa sãkirauata ãti uãka sãkireë, kotxi Erekar Matamatakoti kamaimaroretana.

⁵ Iuasaaki Xerosareë sitatxitiã auanãta ikini uãkati kãkiti Xoteoakori. Ninoa Teoso sãkire kĩpitakani. ⁶ Ikenakotakasaakirina iaxiti ĩkari ĩtima atoko inakari, apotiitauana mirikiniti kãkiti. Ininiã itikokitatana, kotxi ikenakotarina apanakini sãkirauatini isãkireëna. ⁷ Itsorĩkaãtana:

—Kiãtokopa ininiãpa imarotatarina ate sãkire. Hãtamata, Kariréiakinikara sãkirauanãta ateka sãkireë. ⁸ Kiãtokopa itxa akenakotiniri ateka sãkire? —itxana ninoa.

⁹ Iuaãtaã auari kaiãopokori kãkiti ãti uãka. Auari Patxiakinima, Métxiakinima, Erãokinima, Mesopotámiakinima, Xotéiakinima, Kapatósiakinima, Põtokinima, Ásiakinima, ¹⁰ Piríxiakinima, Pãpíriakinima, Exitokinima, Arípiakinima, Sireni takotekinima, Homakinima pakini aua. Apanakini Homakini atão Xoteoakori. Apanakini mamakaua, ininiã Xoteo itxapekauana. ¹¹ Kretakinima, Arápiakinima pakini aua iuaã.

Ininiã ninoa txa:

—Ate kenakotari Kariréiakini sãkirauatini ateka sãkireë. Isãpiretarina ikinipoko erekari Teoso Apiananiri kamakiti —itxana.

¹² Ininiã ninoa tsorĩkaãta. !Imarotarina.

—Natokopa itxana imarotinarina ate sãkire? —itxana.

¹³ Apanakini kãkiti napetana:

—Poãtakanira ninoa —itxana.

Petro Apakapapiretakiti Kãkitimoni

¹⁴ Iuasaaki Petro, õsi Xesosi iokanatakinikata misãkiretana iuaã apotiitakaniua. Itxari: —Xotéia auakanii, ikinika Xerosareë sitatxiti auakanii, hĩtakaõtxikariko nisãkire himarotini ĩkapani. ¹⁵ Hĩuãkatana naia kikiakori poãtini. Kona ipoãtana, kotxi atokatxi inaãpotapanika. ¹⁶ Ia uatxa hãtamatakiti kitxakapirĩka Teoso sãpiretapekari Xoeomoni. Iua Xoeo Teoso sãkire sãpiretakari sãpiretapekaua. Iua txari:

¹⁷ Teoso txari: “Xipokatxi òti iatokopeka inakasaaki, niokanatari Erekarì Matamatakoti ikini kãkitimoni. Pamariteakori sãpiretariko nisãkire apanakinimoni. Átokoriakori atamatariko itapone atoko inakari Teoso sikakiti pokamarasaaki. Iuasaaki nisãkire nisãpiretana. Kiomãtxiakori taponetariko nota oerekakiti. Iuasaaki nisãpiretariko nisãkire ninoamoni.

¹⁸ Ìkora òtisaaki ninitiriakori, niniteroakoro pakinimoni niokanatari Erekarì Matamatakoti. Ninoa sãpiretariko nisãkire.

¹⁹ Iaxiti noerekariko niposotiire kãkiti mimarotakinìti. Ìkorapokoriti apaka noerekariko niposotiire Apiananiri nininiua imarotinina ìkapani. Arëkatxi, xamina, katxiãri pakini apokako.

²⁰ Atokatxi piãkako. Kasiri arëkatxi atoko itxako. Apiananiri apokini apisapanikarako auako ikara atoko inakari. Peerekapaniri Apiananiri apokini òti. Ìkora òti apiatakari, kotxi iuasaaki Apiananiri oerekauako kãkitimoni.

²¹ Ininiã Apiananiri akiritakani makatxakaãkako imapinakani ìkapani,” itxa Apiananiri Xoeomoni.

²² Petro sãkirauatapanika:

—Kãkiti, Isaeokini, hìkenakotariko nisãkire. Hìte apisatoõ Teoso oerekepekari Xesosi, Nasaree sitatxitikiri. Teoso mereëkiti itxaua, kotxi ikamari Teoso posotiire kãkiti mimarotakinìti Teoso himarotini ìkapani. Himarotapekari ikara. ²³ Xesosi sikaãka imokaiakariakorimoni, kotxi Teoso nirekari ikara atoko iniko. Teoso imarotapekari ikara atoko inakari apokini òti. Hìtekara, apanakini maerekati kamakanikata maìkari Xesosi. Aamina ìpiriãmitakari nopini hìtokakitari, oka hìtxapiri iuani. ²⁴ Iuaritika ipinaka atoko, iuaìkana Teoso òkitikari iua. Teoso sikakari iua ipìkitxi mamisiritakaniri ìkapani. Ipìkitxi ìposotari ixipokiniri iua, kotxi Apiananiri itxaua.

²⁵ —Kitxakapirìka Tavii sãpiretari Xesosi pirena. Itxari:

Nota itikapikari Apiananiri nota apisatoõ. Iua aua nìkikomoni. Ininiã !nimakatxaãka.

²⁶ Ininiã nixinire poxokoniuatapeka itxa. Nisãkire poxokoni apaka aua. Nìito auãki inakasaaki, iãtapari Teoso sikaenetakiti.

²⁷ Apiananiri kona takanapano nota ipìkani auiniãtaã. Apiananiri !auiritano Erekarì Kamakari paiakini.

²⁸ Apiananiri oerekepekano mapìkani kimaporite. Iua notakata aua, ininiã nipoxokoniuata,

itxa Xesosi Taviiimoni kitxakapirìka.

²⁹ Ininiã Petro sãkirauatapanika:

—Kikiakori, hãuiritano nisãpiretiniri Tavii pirena. Tavii anirimane kitxakapirìka auakari. Iuani ipìpe, ikatapeëka. Uatxa atemoni auapanika iua akauare. ³⁰ Iua Teoso sãkire sãpiretakari. Atão iua imarotari Teoso sãkire. Teoso sãpiretapekari iua apika mekani Teoso mereëkiti itxauako. Tavii imarotari Teoso mereëkiti òkitikaãkapanikako auìtetxi ininiua tìkane. Teoso sãpiretari imereëkiti topãka auìtetxi itopanere nopini. Ininiã atão auìtetxi itxaua.

³¹ —Tavii imarotari ikara atoko inakari Xesosi apokini apisapanika, kotxi iòkatsopatari Xesosi ipinini pirena, iuaìkana òkitikiniua pirena apaka. Iua txari:

Ipìkani auiniãtaã !ikaikota. Iìto lipaiaka, itxa Tavii kitxakapirìka.

³² —Iua Xesosi ipinaka atoko, Teoso òkitikari iua. Ate amakinika Xesosi òkitikiniua itikakani atxaua. ³³ Ininiã uatxaika Xesosi topãka Teoso kikomoni. Ikara atoko Xesosi Apiananiri itxaua. Apakapari Erekarì Matamatakoti, Teoso sikaenetakiti. Iposo atoko, iokanatari Erekarì Matamatakoti atemoni. Iuakara uatxa hãtamata ikamakiti. Hìkenakotari iua sãkire uatxa.

³⁴ —Tavii lisari iaxiti auìtetxi ininiua ìkapani, iuaritika iòkatsopatari:

Apiananiri misãkiretari niauìte: “Nota kikomoni piitopãkiniritika ³⁵ nixipokariko pimokaiakariakori. Nikamariko ninoa pikiti pitakiniãtaã atoko ininiua,” Apiananiri txari niauìte.

³⁶ —Ininiã Isaeo auakanii, himarotariko ia. Hĩte okari Xesosi, iuaritika Teoso kamari iua auĩtetxi ininiua. Teoso mereẽkiti itxaua —itxa Petro.

³⁷ Iuasaaki Petro sãkire ikenakotakasaakina, ãkixinireẽna tsiĩtxi apoka iouata iorotiniiri tsii atoko itxa. Maerekaxiniretinoka itxana. Eereka itxana ninoa:

—Kiripa akama? —itxana.

³⁸ Petro apakapapiretana:

—Himaerekani hĩtakanapa. Hĩte imakinika hĩpatxisataãkako Xesosi Kristo uãkaã, ininiã Teoso makatxakari himaerekani. Iuasaakiko hãpakapari Erekari Matamatakoti Teoso sikakiti. ³⁹ Kotxi ikara Teoso sikaenetakiti hĩte ĩkapani, hamarite ĩkapani, apanakini õtako auakani apaka ĩkapani. Ikara Teoso sikaenetakiti ikinimane kãkiti Teoso akiritakini ĩkapani —itxa Petro.

⁴⁰ Petro iteene õtãkikana ninoa, kotxi inirekari atão ikaminina, ininiã itokata õtãkikana ia atoko:

—Īkorapokoriti auakani maerekati kamakani itxauana. Himakatxakaua. Hĩtakana-pariko himaerekani. Hãuikariko Xesosi sãkire —Petro txana ninoa.

⁴¹ Īkora õti, tres mio kãkiti ipoxokoniritikana auikari Petro sãpiretakiti. Iuasaaki ipatxisataãkana.

Xesosi Sãkire Auiãkani Moianatakiniua

⁴² Eereka ikiniõtika apaiaõkarina Xesosi iokanatakini oerekakiti. Ātipirika itiretakauana. Ātipirika ikamarina kiiniri komiri imapixinikinina Xesosi ipinini ixinikinina ĩkapani. Ātipirika imisãkiretarina Teoso. ⁴³ Ikinimane tsorĩkaãnãta, kotxi Xesosi iokanatakini kamari ito posotiiretxi kãkiti mimarotakiniti, apanakini Teoso imarotini ĩkapani.

⁴⁴ Teoso sãkire auiãkani apotiitapikaua. Ninoa xanakari ikinika inakitina. ⁴⁵ Ivẽtxitarina itiina, ininiã tiitxi ĩki isikana matxineirotenimoni. ⁴⁶ Ikinĩõtika aiko ãki Teoso misãkiretikoãtaã apotiitapikauana. Ninoa aapoko ãki ikamarina komiri mapixinikiko kiiniriti. Ātipirika ninoa apotiitaua ipoxokoniritikana nipokori inikinina ĩkapani. Ākixinirena erekapitikari. ⁴⁷ Ixikarauatana Teoso ĩkapani. Imakinika kãkiti apokaerekatana ninoa. Ininiã ikiniõtika Teoso makatxakari kãkiti maerekani. Ininiã Teoso sãkire auiãkani apiaãpota.

3

Petro, Matĩpokotakati Pakini

¹ Āti õti mapiãtiki Petro, Xoão pakini sari Teoso misãkiretiko aikotimoni Teoso imisãkiretinina ĩkapani. ² Iuasaaki ikiniõtika kãkiti anikari matĩpokotakati Teoso misãkiretiko aikoti toremoni. Itore uãka “Peereri.” Iuaã matĩpokotakati amanaãri txineiro iuaã napakanimoni. Iponaniãkasaaki matĩpokotakati itxaua iua. ³ Ininiã Petro, Xoão pakini ĩroãkasaaki, iua amanaãri txineiro:

—Txineiro hĩsikano —itxa.

⁴ Ininiã Petro, Xoão apaka atamatari iua. Ininiã Petro txari:

—Patamataua.

⁵ Ininiã iua matĩkati atamatana ninoa. Iuãkatari txineiro isikinina iuamoni. ⁶ Ininiã Petro:

—Kona auari txineiro atemoni. Kona pirata aua atemoni. Oro apaka !auari. Iuaritika nota auakiti nisikapitikai. Xesosi, Teoso mereẽkiti, Nasareekiri, iua uãkaã põkitikauako. Pitĩpokotako —Petro txari iuamoni.

⁷ Ininiã Petro maĩkari iuako ikikomoni ĩkitikiniua ĩkapani. Iuasaakipeka ikiti, ikitinota pakini kataparapeka itxa. ⁸ Ininiã okakataua, tĩpokota itxa. Īroã Petro, Xoão pakinikata Teoso misãkiretiko aikoti ãki. Īroãkasaaki, okaãpokataua. Itĩpokoãpokata.

—Ari, peerekari Teoso —itxanãta.

⁹ Ikinimane itikari iua tĩpokotini. Ikenakotari ixikarauatini Teosomoni. ¹⁰ Ikinimane imarotari iua kiki aiko ĩronakikoãtaã “Peereri” inakoriãtaã topãkanãtakari, txineiro amanaãntakari iua. Ininiã ninoa:

—Anekani. Kiripa atxiiti? Mitxi matīpokotakati. Uatxa itīpokotape. Kanatokopa itxa? —itxana.

Petro Sāpiretakiti Kākitimoni

¹¹ Apanakini kenakopiretana ninoa, ininiā imitekana ninoamoni matīpokotakati pirena imarotinina īkapani. Iuasaaki ninoa auiniātaā akiritaāka “Saromāo pakita.” Iuaā Petro, Xoāo pakini aua mitxi matīpokotakatikata. Iua maīkakanokeāpotana Petro, Xoāo pakini. ¹² Iua Petro atapana kākiti ninoamoni īkani. Itxana:

—Isaero auakanii, kinirepa hīte tikoka ere kiki tīpokotini hātamatakasaaki? Kinirepa hīte itikaua ate? Na ate posotiireēni kamari iua tīpokotini. Ate ereka anini kona kamari iua tīpokotini. ¹³ Apraōni, Isakini, Xakooni pakini Teosone, aīriakorini kitxakapirīkarini Teosone, iuara oerekapekaua imi Xesosi ereka inini. Teoso ākiripitikara itxaua. Iua posotiire auapitika. Iuakara hīsika okiko īkapani. Eereka Pirato inakori nirekasaakiri isikakiniri. Hīte !inirekari iua sikakiniri Xesosi. ¹⁴ Iuasaaki hīte kona nirekari erekarinoka kamakari. !Hinirekari iua atāo inakarinoka kamakari. Hīte amanaāri Pirato isikakiniri kokaniri hītemoni. ¹⁵ Ininiākara hīte okapiri kākiti auāki inini kamakari. Iuaritika ipīkani sauaki Teoso ōkitikari iua. Ate itikari atāopitikara iua ōkitikiniri.

¹⁶ —Ia kiki hītikakiti himarotakiti kataparapeka itxa, kotxi iua auikari Xesosi posotiire. Iua auikari Xesosi sākire erekapeka inini īkapani. Hātamatari hīte apisatoō iua ereka inini.

¹⁷ —Ininiā uatxa nitariakori, nimarotari hīte, hīte auīteakori pakini okapiri Xesosi atāo himimarotakani xika. ¹⁸ Kitxakapirīka Teoso sākire sāpiretakani oerekapekaua Kristo misiritiko. Ikara imisiritiko auapeka. ¹⁹ Ikara atoko ininiā, hītakanapariko himaerekani. Erekarī kimaporiti hinitako, ininiā Teoso makatxakari himaerekani. ²⁰ Iuasaaki Apiananiri kamapoxokonitai. Isikataparatai. Iuasaaki iua iokanatarī Xesosi imereēkiti hītemoni. ²¹ Merepanika iua Xesosi kaikota iaxiti. Teoso kamariko imakinika amaneri. Iuasaaki Xesosi apoka iuaīkana. Iua atokokana itxana Teoso sākire sāpiretakani kitxakapirīka. ²² Kitxakapirīka Moisesi txari:

Apiananiri hīTeosone iokanatariko isākire sāpiretakari hītemoni nota iokanatinī atokokana. Hinirimane itxaua iua. Hīkenakotariko ikinika isāpiretakiti hītemoni.

²³ Ikinimane iua sākire makenakotakati xipokaākako.

²⁴ —Teoso sākire sāpiretakari Samoeo inakori, eereka ikinikana Teoso sākire sāpiretakani pakini sāpiretāpekari Teoso iokanatiniri imereēkiti kākitimoni īkorasaaki.

²⁵ Teoso sākire sāpiretakani anaakorirai hīte, ininiākara isākire ninoamoni, iuatxikana isākire hītemoni uatxa. Itxari Apraōni:

Āti pimekaniri sikariko erekarī ikini itixiti auakanimoni,

itxa Teoso. Ininiā ikara Teoso sikaenetakiti hīkiomaneakorinimoni, hītemoni apaka isikaeneta. ²⁶ Ininiā Teoso iokanatarī iua ākiri Xesosi hītemoni merepitipanika.

Iokanatarī iua hītemoni erekarī hītemoni isikini īkapani, himaerekani hītakanapini īkapani —itxa Petro.

4

Petro, Xoāo Pakini Xoteo Auīteakori Apisatoō

¹ Petro, Xoāo pakini sākirauatapanika kākitimoni inakasaaki, sasetotxiakori, Teoso misākiretiko aikoti nīkatakari, satoseoakori pakini apoka ninoamoni. ² Ininiā ninoa naiataua, kotxi Petro, Xoāo pakini sāpiretari kākiti ipīkani ōkitikiniua pirena, kotxi ninoa txari:

—Xesosi ipinaka atoko, iuaīkana iua ōkitikaua, ininiā ipīkani ōkitikauako.

³ Ininiākara ninoa maīkana Xoāo, Petro pakini. Iuasaaki mapiānikata, ininiā itakana kateia āki īkanōka iuaā inapinina īkapani. ⁴ Iuaritika itomaneri Petro sākire kenakotakani auikapiretari iua sākire. Sīko mio kikiakori auikari Teoso sākire Petro sāpiretakiti.

⁵ Katimatinīkata Xoteo auīteakori, kiomātxiakori, kaiōkatsopareriakori pakini apotimanetaua Xerosareē. ⁶ Sasetotxiakori auīte apiatakari Anasi inakori iuaā aua. Inirimane

Kaipasi inakori, Xoão inakori, Arexãtri inakori pakini aua iuaã apanakini sasetotxiakori auíte nirimaneakata. ⁷ Xoão, Petro pakini minaãka ninoa apisatoõ. Ipimaãrina:

—Kiposotiireëpa hõkitikari matîpokotakati? —itxana.

⁸ Erekar Matamatakoti moianatari Petro. Ininiã iua txana ninoa:

—Aãuîteakori, akiomaneakori, ⁹ hinirekari asãpiretinii uatxa erekari akamakiti matîkatimoni. Hinirekari himarotini erekapeka inini. ¹⁰ Ininiã ikinika hîte, ikinika Isao tixini auakani apaka, himarotariko ia. Xesosi Nasareekiri posotiireëra ia kiki hîte apisatoõ timakari makananitaãka. Iuara hîte oka aamina îpiriãmitakari nopini. Iuara Teoso õkitika iuaikana ipikani sauaki. ¹¹ Kitxakapirîka Teoso sãkire iõkatsopatakori sãpiretari Xesosi hîte manirekakani, kotxi itxari:

Kai aapokotxi kamakanii, !hinirekari âti kai soro. Iua kai himanirekakiniti apiari itxapekaua. Apanakini kai soro maikakari itxaua.

¹² —Xesosinokara makatxakari kãkiti maerekani. Kona âti maerekanitxi makatxakakari !auari ikini itixiti. Teoso sikari iuanokara kãkitimoni imaerekani imakatxakini îkapani —itxa Petro.

¹³ Ninoa tsorîkaãnãtana Petro sãkire ikenakotakasaakina, kotxi Petro, Xoão pakini sãkirauata itaparaxinireritika. Mitxi kona ninoa apaiaõkarauata, uaritika ninoa imarotari atão isãkirauatini. Ninoa xinikari:

—Ixî. Ninoa minakani. Iuaritika kiikitenana, kotxi Xesosi moianariakori itxauana —itxana.

¹⁴ Ininiã !kasãkirena, kotxi matîkati tîpokotapeka ninoa apisatoõ. ¹⁵ Ininiã ipaniãtana Petro, Xoão pakini mapara isinina, ninoa auítetxiakori ininimoniuana isãkirauatinina îkapani. ¹⁶ Ininiã auítetxiakori txari:

—Kanatokopa atxatana ninoa? Kotxi ikinimane Xerosareë auakani imarotari itxîkitakinirina matîkati erekape inini. Atãopitikara ninoa kamari posotiiretxi. !Aposotari akipatiniri ia sãkiretxiti, kotxi ikinipoko imarotapekari matîkati tîpokotini. ¹⁷ Kona anirekari ikara pirena apikomoni iaripiretini kãkiti sauaki. Ininiã atxanako ninoa: “Na apikomoni Xesosi pirena hîsãpiretapinikariko.”

¹⁸ Ininiã iuaikana akiritana. Eereka itxana:

—Kona hîsãpiretapinikariko apikomoni Xesosi pirena. Kona hõerekapiriko iuaikana Xesosi pirena —itxana.

¹⁹ Ininiã Petro, Xoão pakini apakapapiretana:

—Kiripa atão akîpitini? Hîtekani? Teosokani? Kipa erekari? Hîte mereëri. ²⁰ Kona aposotari atakanapiniri asãpiretiniri aîtikakiti, akenakotakiti pakini —itxana.

²¹ Ininiã iuaikana auítetxiakori txitana. Iposo atoko auiritana isinina, kotxi maerekati !kamana. !Imisiritana, kotxi ipikarina kãkiti. Ikinimane kãkiti txari:

—Peerekari Teoso kamakiti matîkati îkapani —itxana.

²² Îkora kiki makananitakori koarêta anope iuasaaki.

Xesosi Sãkire Auiãkani Misãkiretiniri Teoso

²³ Xoão, Petro pakini sikakikosaaki, ninoa kanapiriã imoianariakorimoni. Ikinika sasetotxi auíteakori sãkire, kiomãtxiakori sãkire pakini ikinika isãpiretana. ²⁴ Ikara ikenakotakasaakina, ikinikana misãkiretari Teoso. Ininiã itxana:

—Apiananiri, ikinika posotiiretxi auari pitemoni. Pitenanira Teoso pitxaua. Pite kamari iaxiti, itixi, potxoari uiniti pakini. Imakinika iaxiti auakani, itixi auakani, potxoari uiniti auakani pakini pikama. ²⁵ Kitxakapirîka Erekar Matamatakoti kamaimaroretari pinitiri aãtokiri Tavii. Ininiã itxari:

Kinirepa kãkiti Teoso manirekaãkani omanãkarauata? Kinirepa kãkiti maxikatîika xinikari maerekati ikamini âtimoni?

²⁶ Auítetxiakori apotiitaua neenamati ikaminina îkapani. Ninoa apotiitaua Apiananiri inaiatinina îkapani, imereëkiti apaka inaiatinina îkapani, itxa Tavii.

²⁷ —Atãopitikara Erotxi, Põsio Pirato pakini apotiitaua Xoteo minakonikata, Xoteoakori pakinikata. Ninoa apotiitaua uai ia sitatxitiã. Isãkirauatana pamarite Xesosi okinina îkapani. Txamari pite mereëri iua erekarinoka kamakari. ²⁸ Mitxi pite imarotari

imakinika ninoa kamakiti tĩkane. Kãkiti kamari pinirekakiti, kotxi kaposotiirei. ²⁹ Ininiã aãũite, pixinikariko ikara maerekapirenati. Pisikataparaxiniretaua ate pinitiriakoriaua pisãkire asãpiretini ĩkapani. ³⁰ Pamarite erekari kamakari Xesosi posotiireẽ pimakananitanako amianatakani. Kãkiti maposotakiniti pikamako. Posotiiretxi pikamako pisãkire aõerekini ĩkapani. Ikara pikamako pamarite Xesosi posotiireẽ —itxana ninoa Teosomoni.

³¹ Teoso imisãkiretaãkana atoko, ninoa apotiitiniãtaãua iakeka. Erekari Matamatakoti apoka ikinimanemoni. Ininiã itaparaxinireritikana isãpiretarina Teoso sãkire kãkitimoni.

Teoso Sãkire Auiãkani Moianatari Itariakori

³² Ikinika Teoso sãkire auiãkani ãtika kãkiti xinire atoko itxauana. Kona itxana: “Nota nakitira ia,” kona itxana. Kapotxinaniri !auari. Ninoa xanakari ikinika itiina. ³³ Xesosi iokanatakini itaparaxinireritikana txari ikinimanemoni:

—Xesosi Apiananiri iuaĩkana õkitikaua ipinaka atoko. Ate imarotari, kotxi ate aõkitari iua ipinaka atoko —itxana kãkitimoni.

Ininiãkara Teoso sikari ikinika erekari ninoamoni. ³⁴ Ninoa sauaki tiitxi amonitakari !auari. Kikio ipi auiniãri, kakikioteri vëtxitari ãtika. Aapokotxi ipi auiniãri, kaapokori vëtxitari ãtika. Oa txineiro ninoa sika ³⁵ Xesosi iokanatakinimoni. Eereka ninoa xanako o txineiro matiitinimoni.

³⁶ Iuusaaki aua Xosee. Sasetotxi, Arevii apika mekaniri itxaua. Xipri inakori pokomiri itikiri iua. Xesosi iokanatakini takauãkatari iua Panapee inaãka. Popĩkari sãkireẽ iuãka: “Kasikapoxokoniri,” kotxi ãtipirika isikapoxokonitari kãkiti. ³⁷ Iua vëtxitari ãtika ikikiote. Iua kikio ĩki isika Xesosi iokanatakinimoni.

5

Ananíasi, Sapira Pakini

¹ Iuusaaki auari Ananíasi inakori, ĩtanoro Sapira inakoro pakini. Iua vëtxitari kikio. ² Ikaikotakaro ipixini kikio ĩki. Ipixininoka isika Xesosi iokanatakinimoni. Sapira imarotari õtaniri kamakiti. Txamari iua sikasaakiro oa txineiro Xesosi iokanatakinimoni, itxari:

—Ikinika kikio ĩki asika Teosomoni —itxa.

³ Iuusaaki Petro txari:

—Ananíasi, kinirepa paunitari Satanasi misirienetini maerekati pikamini ĩkapani? Erekari Matamatakotira pimisirieneta, kotxi ipixini kikio ĩki kaikota pitekata. Kinirepa pisãpiretari ikinika txineiro pisikini Teosomoni? ⁴ Kikio pivëtxitini apisapanika, ĩkora kikio pite nakiti. Eereka pivëtxitakasaakiri, õkora txineiro pite nakito. Ininiã kinirepa pitxari: “Ikinika nisika Teosomoni?” Kona kãkitini pimisirieneta. Teosora pimisirieneta —Petro txari.

⁵ Iuusaakipeka Ananíasi iripe. Ipĩpe. Ininiã ikara kenakotakani pĩkarauakata. ⁶ Iuusaaki ãtokoriakori iapirikari Ananíasini ĩto mãkatxi mataã ikatinirina ĩkapani. Eereka anikarina, kata itxarina iuani.

⁷ Ipi oara, ãti oara pakini napaka atoko iua ĩtanoro apoka. Kona oimarotapanikari õtanirini ipinini. ⁸ Ininiã Petro txaro:

—Pisãpiretano. Oia txineironokani hĩkikiote ĩki hãpakapakito aua? Atão pisãpiretano? —itxaro.

Ininiã oa:

—Ari aroanokara ate apakapakito aua —otxari.

⁹ Ininiã Petro:

—Hĩte uãkatatari Erekari Matamatakoti aunitari himisirienetiniri iua? Uatxaika ĩronakikoãtaã pĩtanirini katakani apokapeka. Ininiã ninoa anikapitikai pite apaka —itxaro.

¹⁰ Iuusaakipeka oĩripe, pĩpe otxa. Iuaĩkana ninoa ãtokoriakori ĩroã. Apokarona oani, ininiã anikarona. Ikatarona õtanirini takote. ¹¹ Ininiã ikinipoko Xesosi sãkire auiãkani, apanakini ikara kenakoenetakani pakini pĩkarauata.

Amianatakani Makananitiko

¹² Iuasaaki Xesosi iokanatakini kamanātari posotiiiretxi, kākiti mimarotakiniti pakini kākiti sauaki. Ikiniōtika Xesosi sākire auĩākani apotiitaua Teoso misākiretikoātaā, “Saromāo pakita” akiritakori. ¹³ Xesosi sākire mauĩākani apokaerekatana ninoa, txamari ipĩkarena xika !inirekarina imoianatinina. ¹⁴ Iuaritika apikomoni kākiti apotiĩapotaua ninoakata, kotxi kikiakori, sitoakoro pakini auikari Apiananiri sākire. ¹⁵ Iuasaaki Xesosi iokanatakini makananitana amianatakani, ininiākara kākiti anikana amianatakani kimaporimoni. Sirimatatxi nopini itakana ninoa kimaporiātaā. Ininiā kākiti xinikari: “Petro napakasaaki, isanōka amianatanimoni apokiniā, imakananitaākana.” ¹⁶ Ininiā kaiāopokori kākiti Xerosareē takotekini apoka. Ninoa minana amianatakani, apaka kākiti maerekani matamatakoni misiritakini pakini. Ininiā Xesosi iokanatakini makananitanana imakinikana.

Xesosi Iokanatakini Misiritiko

¹⁷ Iuasaaki sasetotxi auĩte apiatakari, imoianariakorikata, satoseoakorikata xikotana Xesosi iokanatakini. ¹⁸ Ininiā ninoa maĩkana. Eereka kateia āki taka itxapena ninoa. ¹⁹ Iua ikanōkati Teoso nitiri iaxitikiri matakakari kateia tore. Eereka anika itxana iporikiti. Itxana:

²⁰ —Hĩsa Teoso misākiretiko aikotimoni. Iuaā hĩsāpiretariko Teoso sākire kākitimoni kākiti auini amaneri inini iƙapani —itxa Teoso nitiri.

²¹ Ininiā ikanōkapanika ninoa sari Teoso misākiretiko aikotimoni. Teoso nitiri sākire iaōka ikamana. Iuaā isāpiretarina Teoso sākire kākitimoni.

Iuasaaki sasetotxi auĩte apiatakari, imoianariakorikata pĩkapiretana Xoteoakori kōtākikarerini, Xoteo kiomanekakori pakini, ininiā imakinika ninoa apakĩtakana Xesosi iokanatakini. ²² Ininiā apanakini sari kateiamoni apinina iƙapani. Txamari apokasaakina iuaā, !auaikana Xesosi iokanatakini. Ininiā ikanapiriāna auĩtetxiakorimoni isāpiretinina iƙapani. ²³ Ininiā itxana:

—Ate apokasaaki kateia tore, itotaākapanika. Kateia nĩkatakani auanāta itore takote. Txamari itore amatakakasaaki, kākiti !auaika iriko āki —itxana.

²⁴ Ininiā sasetotxi auĩte apiatakari, Teoso aikote nĩkatakani auĩte, sasetotxiakori pakini kenakoenetakasaakiri ikara sākiretxiti:

—Anekani? Nāpa ninoa atxiĩti? Kiripa apikomoni auatako? —itxana.

²⁵ Iuasaakipeka kiki apoka. Isāpiretana:

—Hĩkenakotariko nisākire. Ninoa kikiakori kateia āki hĩtakakini Teoso misākiretiko aikoti āki aua. Oerekanātarina Teoso sākire kākitimoni —itxana.

²⁶ Ininiā Teoso misākiretiko aikoti nĩkatakani auĩte, initiriakorikata sari iuaā. Ninoa minana Xesosi iokanatakini iuaĩkana auĩtetxiakorimoni. Imaĩkasaakina, kona iaritatana, kotxi ipĩkarina kākiti kai soroā kiporonakinina. ²⁷ Ninoa apokasaaki, ipaniātana Xesosi iokanatakini Xoteoakori kōtākikarerini apisatoō itiminina. Sasetotxi auĩte apiatakari txana:

²⁸ —Mitxi ate paniātai Xesosi sākire himasāpiretakani kākitimoni. Txamari hōerekapanikari iua sākire ikinimane Xerosareē auakanimoni. Ate xika Xesosi ipina, hĩtxanāta ikinimanemoni —itxa sasetotxi auĩte.

²⁹ Ininiā Petro, apanakini Xesosi iokanatakinikata apakapapiretari:

—Ate kĩpitari Teoso paniātakiti. Kona kākiti paniātakitini akĩpita. ³⁰ Teoso, akiomanekakorini Teosone, ōkitikari Xesosi iuaĩkana auini iƙapani. Hĩtera okari iua Xesosi aamina ipiriāmitakari nopini. ³¹ Iuaritika Teoso takari Xesosi ikikomoni. Itxĩk-itakari iua auĩtetxi ininiua. Kākiti maerekani makatxaākari itxaua. Ininiā Isaeo auakani takanapiniāri imaerekani, Xesosi makatxakari ninoa maerekani. ³² Ikara ate imarota. Apaka Erekar Matamatakoti imarotari ikara. Teoso sikari iua Erekar Matamatakoti isākire kĩpitakanimoni —itxa Petro ninoamoni.

³³ Ikara ikenakotakasaakina, itene omanākarauatana. Ininiā ninoa:

—Māokana —itxana.

³⁴ Iuasaaki Kamarieo inakori ōkitikaua kōtākikarerini sauaki. Pariseo itxaua. Teoso paniātakiti oerekakari itxaua. Ikinimane paxitari iua. Ininiā iua txari:

—Hanikana naia mapara atenoka asākirauatini iƙapani —itxa.

³⁵ Ininiã eereka itxana:

—Isaero tixini auakanii, hiikitetariko hīkamakiti ninoa Xesosi moianariakorimoni.
³⁶ Akokaxiti auari Teota inakori. Iua txari: “Auñtetxi apiatakari nitxaua nota,” itxa. Iuasaaki koatrosētosi kikiakori moianatari iua. Auikarina iua sākire. Txamari okapeēka iuani. Eereka iuakata sikani iarikape. Iua auñtetxi ininiua xipope. Isākire lauikaākaika.

³⁷ —Teotani ipinaka atoko Xotasi Kariréiakiri apoka. Iuasaaki auñtetxiakori iaōtari ikinimane kākiti. Kaiāopokori kākiti auikari iua Xotasi sākire, ininiã ninoa moianatari iua. Iua Xotasi imoianariakorikata nirekari ixipokinina auñtetxiakori. Txamari iua apaka okapeēka, ininiã imoianariakori iarikape.

³⁸ —Ininiã uatxaikara nōtākikai hīte: “Hītakanapanako ninoa Xesosi iokanatakini. Hīsikanakano ninoa, kotxi atxiīti ninoa !ikamari Teoso paniātakiti, ininiã pañtiki ninoa sākire apaka !auaika. ³⁹ Txamari, ninoa kaminiāri Teoso paniātakiti, erepaniko, kotxi atxiīti hinaiatari Teoso” —itxa Kamarieo.

Iuasaaki ninoa Xoteo oñākikakani kīpitari Kamarieo sākire. ⁴⁰ Akiritana Xesosi iokanatakini iuañkana iñroinina. Ipaniātari ninoa xirokitatiko. Ininiã ninoa:

—Xesosi sākire kona hīsāpiretapinikako —itxana.

Eereka sikaka itxana isinina ñkapani. ⁴¹ Isikasaakina, ipoxokoniuatana.

—Teoso apokaerekataua ate, kotxi auiritari amisiritiko Xesosi sākire añuikini xika —itxana.

⁴² Ininiã ikiniōtika oerekarauatana Teoso misākiretiko aikoti āki, kākiti aapoko āki apaka. Isāpiretarina erekari pirena Xesosi Teoso mereēkiti ininiua pirena.

6

Setxi Kikiakori Mereño

¹ Xesosi sākire auñākani apiaāpota. Iuasaaki Xoteoakori Kreko sākire imarotakani taparakienatana apanakini Xoteoakori. Itxana:

—Atekata auakani sitoakoro tikinitakoni kona apakapari nipokori ikiniōtika apanakini tikinitakoni apakapiniri atoko —itxana ninoa.

² Ininiã Xesosi iokanatakini tosi pakini pīkapiretana ikinimane Xesosi sākire auñākani. Itxana:

—Kona erekari ate takanapiniri Teoso sākire aōerekini asikakienarauatini ñkapani.

³ Ininiã setxi kikiakori himereēko, ikara parñkatxi ikaminina ñkapani. Himereēna Erekar Matamatakoti paniātakinokara kamakani. Himereēna kimarorerini. Ininiã asikana ia parñkatxi ikaminina, sitoakoro tikinitakoni isikakienatinina ñkapani. ⁴ Ininiã atepékana, Teoso amisākireta. Isākire aōereka. Ikaranoka akamako ikiniōtika —itxana.

⁵ Ikinimane Xesosi sākire auñākani apokaerekatari Xesosi iokanatakini sākire, ininiã ninoa mereēri Estevão. Iua iteene auikari Teoso sākire. Erekar Matamatakoti paniātakinokara ikama. Apaka imereēna Piripima, Porókoroma, Nikanooma, Tximoma, Pamenama, Nikoraoma pakini. Iua Nikoraó Átxiokiakiri itxaua. Mitxi Xoteo minakatiaua iua, eereka imamakaua. Xoteopeka itxapekaua. ⁶ Xesosi sākire auñākani minana ninoa Xesosi iokanakinimoni. Ininiã Xesosi iokanatakini misākiretari Teoso. Iuakona itakana ninoa nopini, ikara Teoso parñka ikaminina tīkane.

⁷ Ikara atoko ininiã, Teoso sākire iaripireta apikoxiti. Ininiã mokatanitika kaiāori Xerosareē auakani auikari Xesosi sākire. Ito sasetotxiakori apaka kīpitari Xesosi sākire.

Estevão Mañkiko

⁸ Estevão iteene auikari Xesosi sākire. Teoso posotiire aua iuamoni. Kaposotiireri iua, ininiã ikamari kākiti mimarotakiniti. Ikamari posotiiretxi, Teoso posotiire oerekini ñkapani. ⁹ Txamari ātikaka kikiakori !inirekari iua. Ninoa āti Xoteo apotiñtiñtañta aikoti sikani. Ninoa “Ninoaka nireēkiti kamakani” akiritaākana. Ninoa Sireni sitatxitikini, Arexātria sitatxitikini, Sirísia tixinikini, Ásia tixinikini pakini. Ninoa iteene misākiretakakaua Estevãoakata, kotxi !auikarina iua sākire. ¹⁰ Txamari Estevão sākirauataka atoko, !kasākireikana, kotxi Erekar Matamatakoti sikaimaroretari iua Estevão. ¹¹ Ininiã ninoa sikari txineiro apanakini kikiakorimoni Estevão apoñtinina ñkapani. Ininiã ninoa txineiro apakapakani txari:

—Ate kenakotari iua, Moisesini imisäkirepiretini, Teoso apaka imisäkirepiretini — itxana.

Txamari na atãoni isäkirena. ¹² Ikara isäkirena xika, kiomãtxiakori, kaiõkatsopareriakori, apanakini kãkiti pakini naiataua, ininiãkara imaïkarina Estevão, kõtãkikarerinimoni anika itxarina iua.

¹³ Eereka iminana apanakini, Estevão imisäkirepiretinina ïkapani. Ninoa txari:

—Ia kiki misäkirepiretapikari Teoso misäkiretiko aikoti. Apaka kona inirekari Moisesi paniãtakiti. ¹⁴ Ate kenakotari iua sãkire: “Xesosi Nasareekiri xipokariko Teoso misäkiretiko aikoti. Ixipokariko akiomaneakorini sãkire Moisesini paniãtakiti.”

Ikara atoko aãpirena ikamana ninoa. ¹⁵ Ikinimane ninoa kãkiti õtãkikakani atamatari Estevão toõ. Teoso nitiri iaxitikiri toõ atokokana itxa Estevão toõ.

7

Estevão Sãkirauata Kõtãkikarerimoni

¹ Ininiã sasetotxiakori auïte apiatakari txari Estevão:

—Atãokani ninoa sãkire?

² Estevão txari:

—Nikiomaneakori, nitariakori pakini, hïkenakotanoko. Teoso iaxitikiri oerekaua aãtokirini Apraõnimoni. Mesopotãmia tixini auakasaaki, Araã tixini auini apisapanika, Teoso motika iuamoni. ³ Iuasaaki Teoso txari iua: “Pitakanapariko pitixine, pinirimane pakini. ãti tixinimoni pisako. Noerekinimoni pisako,” itxa Teoso. ⁴ Ininiã sipe itxa Apraõ. Itakanapari Kaotãia inakori tixini. Araã tixinimoni iua sipe. Araã auakasaaki irini ipïpe. Irini ipinaka atoko, Teoso mïpiri iua uaimoni uatxa aãuiniãtaã. ⁵ Apraõ auakasaaki, Teoso !isikari uai tõpa iuamoni iua nakiti inini ïkapani. Kona ipixini metro isika iuamoni inakiti inini ïkapani. Isikaenetari uai tõpa iua, imekaniriakori pakinimoni. Txamari !keeneri iua iuasaaki. ⁶ Teoso txari Apraõmoni: “Pamariteni, pimekaniriakori, papika mekaniriakori auako ãti kãkiti tixine. Iuaãrako imisiritapeëkanako koatrosëtosi anokanani. Iparïkauatana apanakini ïkapani maxikatïka. Ininiã iteene imisiritiko aua.”

⁷ —“Ininiãkara nimisiritariko ninoa misiritakani. Eereka Apraõ apika mekaniriakori takanapariko iuaã, uaimoni kanapiriã itxanako. Ininiã ïkorapokoriti ninoa parïkauatako nota ïkapani,” itxa Teoso. ⁸ Ininiã Teoso txari: “Hïte kitsotakariko ikini hamariteni tsiki mata. Ikara nitakaõtxikare hãtamatakasaaki, hïxinikariko nisikaenetakiti,” itxa Teoso. Eereka Apraõ ãkiri aua, Isaki inakori. Oito õtipeka auini õti inakasaaki, Apraõ kitsotakari itsiki mata. Isaki aneëkasaaki, imi Xakoo inakori aua. Eereka Xakoo anaakori auapeka tosi pakini. Ikara tosi imiakori aãtokiriakorini iriakori itxauana.

Xosee Pirena

⁹ —Xakoo anaakori xikotari itarina Xosee inakori. Ininiã itariakori vëtxitari iua Exito sikanimoni. Iuaritika Teoso auapika iuakata. ¹⁰ Imisiritiko auakasaaki, Teoso moianatari iua imapinakani ïkapani. Iuasaaki Exito auakani auïte Paraoo inakori. Teoso sikaimaroretari Xosee, ininiã Paraoo potxitari iua, ininiã Paraoo txari iua: “Exito auakani auïte pitxauako. Naapoko auakani pinïkata apaka,” itxa Paraoo Xoseemoni.

¹¹ —Eereka makienanitxi aua Exito tixiniã, Kanaã tixiniã apaka, ininiã ikinimane natxita. Aãtokiriakorini apaka !auari nipokori. !Apokari nipokori. ¹² Ininiã Xakoo kenakoenetari triko auini Exito tixini. Ininiã ipaniãtana tesi imiakori Exito tixinimoni isinina. Mïtxi !isana Exitomoni.

¹³ —Ininiã iuaïkana ãti õti isana Exitomoni, kienatxi iamotinina ïkapani. Iuasaaki Xosee oerekaua ninoamoni. Iuasaaki Paraoo imarotari Xosee nirimane. ¹⁴ Ininiã Xosee pïkapiretari iri Xakoo, itariakorikata, inirimanekata. Setãta sïko pakini kãkiti sari Exito tixinimoni, kotxi aua ikinipoko nipokori iuaã.

¹⁵ —Ininiã Xakoo apanakinikata sari Exitomoni. Iuaã mapakanani atoko Xakooni ipïpe. Eereka aãtokiriakorini ipina iuaãtaã apaka. ¹⁶ Ninoa ipïkasaakina, iïtona anikapeëka Sikeë tixinimoni. Iuaãkiri akauaritiã ikata inapeëkana. Apraõni auapanika inakasaaki, iamotari iua akauari Emoo ãkiriakorimoni.

Moisesi Pirena

¹⁷ —Itixi Teoso sikaenetakiti Apraãomoni kaiamapeka Xoteoakorimoni inakasaaki, kãkiti Isaeokini kaiãopokoikana Exito tixiniã. ¹⁸ Itokanani napaka atoko, ãti Exito auakani auíte Xoseeni mimarotakati aua. ¹⁹ Iua auítetxi misiritari anirimaneakorini. Ininiã sotatoakori mixirika itxapena amarini xapitiri. Eereka oka itxapena.

²⁰ —Iuasaakiikara Moisesi iponaniã. Moisesi amarinipanika inakasaakia peerepatikiri. Ipi, ãti pakini kasiriti iri, inoro pakini nĩkatari iua ninoa aapoko. ²¹ Eereka ninoa takanapari iua Paraoo ãkero kipaãtiniãtaãua takote. Ininiã oa apokari iua amarini. Oanikari oaãpokomoni. ²² Exito auakani imarore ikinipoko oerekaãka iuamoni. Kasãkireri iua. Kakamareri iua.

²³ —Koarẽta anokanani inakasaaki, inirekari inirimane Isaeokini aõkitini. ²⁴ Inirmanemoni isikasaaki, itikari Exito auakari xirokitatiniri kiki Isaeokiri, ininiã ixikatxitari. Iua aritapiri Exito auakari, oka itxapiri iuani. ²⁵ Iuasaaki Moisesi uãkatari inirimane Isaeokini imarotiniri Teoso nirekari Moisesi makatxakinina ninoa, Exito auakani mamisiritakanina ãkapani. Txamari ninoa !imarotari ikara. ²⁶ Apikomoni ãti õti, iua sari inirmanemoni. Iuaã iua apokana ninoa neenamauanãtini, inaiapoatakakauana. Ininiã Moisesi õtãkikana ninoa. Itxana: “Kikiakori hĩtaritakakaua. Kinirepa himisiritakakaua?”

²⁷ —Inirimane misiritakari katika txari Moisesi: “Kipa txai pite ate auíte pininiua? Kipa txai pite ate õtãkikakari pininiua? ²⁸ Kita Exitokirini pokini atokokana pokatanoko nota?” itxa. ²⁹ Ikara sãkiretxiti ikenakotakasaaki, Moisesi takanapari Exito tixini. Mitxiaã tixinimoni isa. Iuaã ãtanorouata. Ipi imiakori aua iuamoni.

³⁰ —Koarẽta anokanani ãparaã makipakaniãtaã iua aua iuasaaki. Teoso nitiri iax-itikiri motika Moisesimoni ixirata Sinai inakoriãtaã. Iuasaaki iua atamatari aanaia tirinini, txama !arika. !Ixipoka. ³¹ Ikara itikasaaki, Moisesi tsorĩkaãta, ininiã aanaia takote isa iteene atamatini ãkapani. Iuasaakipeka ikenakotari Apiananiri sãkirauatini: ³² “Pikiomaneakori Teosonekarano nota. Apraão, Isaki, Xakoo pakini Teosonekarano nota,” itxa Teoso. Iuasaaki Moisesi kikinana ipĩkare xika. Ipĩkari Teoso sãkirauatini manapi atamatini.

³³ —Ininiã Apiananiri txari iua: “Pikitimata pimakatxaka, kotxi uai pitiminiãtaã nota auanãta. ³⁴ Nitikana ninakitiakori Exito tixiniã. Exito auakani misiritapena ninoani. Nikenakotari oõkinina. Nota inari nisikakinina ãkapani. Ininiãkarako Exito tixinimoni niokanatai pite,” Apiananiri txari Moisesi.

³⁵ —Iua Moisesi Isaeokini manirekakiniti, kotxi ninoa txari: “Kipa txai pite ate auíte pininiua? Kipa txai pite ate õtãkikakari pininiua?” itxarina. Iuakara Teoso iokanatakiti ninoamoni ninoa auíte ininiua ãkapani, ninoa imakatxakini ãkapani, kotxi Teoso nitiri aanaiaã tirinakariã auakari iokanataru iua ninoamoni.

³⁶ —Eereka iua makatxakana ninoa Exito tixini. Oerekari Teoso posotiire kãkiti maposotakinini Exito tixiniã. Oerekari Teoso posotiire potxoari uiniti, Põkamarari inakoriã. ãparaã makipakaniãtaã apaka oerekari Teoso posotiire koarẽta anokanani iuaãtaã.

³⁷ —Ia Moisesikara sãpiretana Isaeokini: “Teoso iokanatariko isãkire sãpiretakari hĩtemoni nota iokanatinini atokokana. Hĩte nirimaneakara iua. Hĩkenakotariko iua sãkire,” itxa Moisesi. ³⁸ Moisesi aua Teoso nakitiakorikata ãparaã makipakaniãtaã. Aãtokiriakorini aua iuakata. Apaka Teoso nitiri iaxitikiri aua iuakata. Iua Teoso nitiri misãkiretari Moisesi ixirata Sinai inakoriãtaã auakasaaki. Iua apakapari Teoso sãkire, atemoni isikini ãkapani. Iua Teoso sãkire txĩkitakari iua sãkire auiãkani ãtipirika auini Teosokata.

³⁹ —Aãtokiriakorini kona nirekari inĩkaenetinirina Moisesi sãkire. !Inirekarina iua. Inirekarina Exitomoni ikanapiriinina. ⁴⁰ Iuasaaki ninoa paniãtari Arão: “Teosoakori kamakoni pikaminaua, ate mĩkiiakani tĩkane. ãkora Moisesi Exito tixini amakatxakakiri, ãtapari iua? !Aimarotari iua auiniãtaã,” itxarina Arãomoni. ⁴¹ Ininiã ninoa kamari kema auíte ãkiri atoko inakari oro kamakori iteasonetinina ãkapani. Eereka okarina soti auíte teoso ikamakitinina isikinina ãkapani. Kiiniri ikamana. Ipoxononiatana, kotxi ninoaka kamari iteasonena. ⁴² Txamari Teoso atão inakari takanapana ninoa. Ininiã

iteosonetarina iaxiti auakani iōriki, kasiri, atokatxi pakini. Teoso sākire sāpiretakani kitxakapirīka iōkatsopatari ia sākiretxiti:

Hīte Isaeokini, koarēta anokanani āparaā makipakaniātaā hāuakasaaki, !hōkari pirātxi nota īkapani.

⁴³ Iuasaaki hīte anikari papiri aamata kamakori hīteosone Moroki inakori īkapani. Apaka iōriki atoko inakari hīteosone Hēpaā inakori hīkamakiti hanika hītekata iuasaaki. Hīte kamari Moroki, Hēpaā pakini hīteosonetini īkapani. Ikara xika nota iokanataiko hīte āti kākiti tixinemoni. Papirónia sitatxiti apikoxiti niokanatai hīte.

Teoso Papire Pirena

⁴⁴ —Aātokiriakorini auari papiri aamata kamakori Teoso misākiretiko papire āparaā makipakaniātaā auakasaakina. Moisesi kamari iua papiri Teoso paniātakiti iaōka, kotxi Teoso oerekari Moisesi iua papiri kamiko. ⁴⁵ Moisesi ipinaka atoko apanakini aātokiriakorini apakapari iua papiri irina sikakiti. Ininiā iuasaaki ninoa anikari iua papiri, Xosoeekata isikasaakina, āti uāka tixine imixirikasaakina, kotxi Teoso omitikana ninoa āti uāka, aātokiriakorini apokasaaki iuaā. Iua papiri kaikota iuaā. Auapanika iuaā Tavii aātokiriakorini auīte inakasaakia. ⁴⁶ Teoso apokaerekatari Tavii, ininiā Tavii nirekari Xakoo Teosone misākiretiko aikoti ikamini. ⁴⁷ Txama Teoso !auiritari Tavii kaminiri. Ininiā Saromão, iua ākiri kamari Teoso misākiretiko aikoti.

⁴⁸ —Teoso Apiananiri kona aua aapokotxi kākiti kamakiti āki, kotxi Teoso sākire sāpiretakari kitxakapirīka txari:

⁴⁹ Apiananiri txari: “Niitopākiniātaā iaxiti itxa. Itixi nikititi nitakiniātaā. Ininiā kanatokopa itxa aapokotxi hīkamini nota īkapani? Namonipa nauiniātaā?”

⁵⁰ Kotxi notakara kamari ikinipoko,” itxa.

Erekari Matamatakoti Manirekakani

⁵¹ Estevão sākirauatapanika:

—Hīte kona kinirāo kenakotaka txari Teoso sākire. Hītsiki mata kisauakaākapitika, txamari kona hīkenakotari Teoso sākire hākixinireē. Ātipirika kona hinirekari Erekari Matamatakoti paniātakiti hīkamini. Hātokiriakorini kitxakapirīka atokotxikana hīte.

⁵² Hātokiriakorini misiritana ikinimane Teoso sākire sāpiretakani. Ninoa okana iua sākire sāpiretakani, Erekarinoka Kamakari sāpiretakani. Ninoa Teoso sākire sāpiretakani sāpiretari Erekarinoka Kamakari āti ōti uai apokini. Īkorsaaki hītera mīkapiritari iua. Hītera okari iua Erekarinoka Kamakari. ⁵³ Hītekara apakapapekari Teoso sākire Teoso nitiriakori mīkiti. Iuaritika !hīkamari ipaniātakiti —itxa Estevão.

Estevão Kiporonakiko

⁵⁴ Xoteoakori kenakotakasaakiri Estevão sākire, omanākarauatana. Akatsakatsiriī-tauana omanākarena xika. ⁵⁵ Iuaritika Erekari Matamatakoti iteene sikataparaxiniretari Estevão. Iuasaaki iua ionakaāta iaxiti. Atamatari Teoso iotximere. Atamatari Xesosi timini Teoso kikomoni. ⁵⁶ Ininiā itxa:

—Hātamata. Natamatari iaxiti xorekini. Aītari iaxitikiri tima Teoso kikomoni —itxa Estevão.

⁵⁷ Iuasaaki Xoteoakori totari ikenakokina iuakoāna. Iteene ninoa akiripoakata. Eereka ninoa ikinika miteka iuamoni. ⁵⁸ Imaīkarina. Ikosekaāpotarina sitatxi mapotōkire. Iuaātaā ipotorikana ikiporonakinirina iua kai soroā. Iuasaaki itikarauatakani takari imākana Saoro inakori kiti takote inīkatini īkapani. ⁵⁹ Ikiporonakasaakirina, Estevão akiritari Teoso. Itxari:

—Apiananiri Xesosi, papakapariko nixinire.

⁶⁰ Iuasaaki ikapotoreēkaua. Itapasākireritika akiritari Teoso:

—Apiananiri, pimaxinīkaretariko ia maerekati ninoa kamakiti —itxa.

Iuasaakipeka ipīpe.

8

Xesosi Sãkire Auiãkani Misiritiko

¹ Estevão ipíkasaaki Saoro aua iuaã.

—Ari erekapitikari ipinini —itxa Saoro.

Estevãoni ipinini õtisaakipeka ipotorika Xesosi sãkire auiãkani misiritiko Xerosareẽ. Ninoa iteene misiritaãka, ininiã ikinimane Xesosi sãkire auiãkani Xerosareẽ auakani iarika itxapena. Xotéia tõpamoni, Samaria tõpamoni pakini iarikana. Xesosi iokanatakininoka kaikota Xerosareẽ. ² Estevão ipinaka atoko kikiakori Teoso sãkire auiãkani katari iuani. Iteene itxiapatana. ³ Iuasaaki Saoro potorika ixipokinina Xesosi sãkire auiãkani. Ninoa aapokomoni isaãpota. Kikiãkini, sitoakoro apaka ikosekaĩtota, taka itxana kateia ãki.

Piripi Samariamoni Sini

⁴ Teoso sãkire auiãkani iarikasaaki, isãpiretarina Teoso sãkire ikini aapokotxitiã.

⁵ Piripi sari Samaria sitatxitimoni. Iuaã iua sãpiretari kãkiti Xesosi Teoso mereẽkiti ininiua. ⁶ Isãkire ikenakotakasaakina, posotiiiretxi ikamakiti itikasaakina, iteene ikenakotarina isãkire. Imixinikarina isãpiretakiti. ⁷ Maerekani matamatakoni kãkiti auaĩtotakini takanapari kãkiti. Akiripoakatana ipokíkasaakina. Kaiãopokori matĩpokotakani apaka makananitaãka. ⁸ Ininiã Samaria auakani iteene poxokoniuaata.

Miiti Simão Inakori

⁹ Iuasaaki Samaria sitatxitiã aua kiki Simão inakori. Miiti itxaua iua. Imisirienetana kãkiti Samaria auakani. Ininiã ikinimane tsoriãkaata, ikamakiti atamatakasaaki. Iua iuikaua.

—Kimaroreno nota —itxa.

¹⁰ Ininiã ikinimane kĩpitari iua sãkire. Auĩtetxiakori, poiãorini pakini kĩpitari isãkire. Ininiã itxana:

—Iua Simão auari Teoso posotiiire. Kaposotiiireri iua —itxana.

¹¹ Ininiã ikĩpitarina isãkire, kotxi itokatapeka itikarina ikamakiti kãkiti mimarotakiniti. ¹² Ninoa auikasaakiri Piripi sãpiretakiti erekari pirena, Teoso auĩtetxi ininiãua pirena, Xesosi Kristo posotiiire pirena pakini, kikiakori, sitoakoro apaka patxisataãka. ¹³ Iuasaaki Simão apaka auikari. Ipatxisataãka. Ininiã isari Piripi sinimoni, kotxi itsoriãkaata, posotiiiretxi kãkiti mimarotakiniti itikasaaki.

¹⁴ Xesosi iokanatakini Xerosareẽ auakani kenakopiretari Samaria auakani auikiniri Teoso sãkire. Ininiã ninoa iokanatarari Petro, Xoão pakini Samariamoni. ¹⁵ Iuaã apokasaakina, imisãkiretarina Teoso, Erekari Matamatakoti isãkire auiãkani apakapini ãkapani. ¹⁶ Erekari Matamatakoti kona apokapanika ninoamoni iuasaaki. Apiananiri Xesosi uãkaãnánira ipatxisataãkana. ¹⁷ Ininiã Petro, Xoão pakini takari iuakona ninoa nopini. Iuasaakipeka apakaparina Erekari Matamatakoti.

¹⁸ Simão itikasaakiri Erekari Matamatakoti apokini kãkitimoni, kinirão sikaka itxaro txineiro Petro, Xoão pakinimoni. ¹⁹ Ininiã itxa:

—Ìkora hĩposotiiire hĩsikano, niuako kãkiti nopini nitakasaaki, Erekari Matamatakoti ninoamoni apokini ãkapani —itxa.

²⁰ Txamari Petro txari:

—Pite, pitxineirotekata samakauako, kotxi pite uãkatari pitxineirote iamotiniri Teoso posotiiire. ²¹ Kona xapiti pitemoni auapani ia parĩkatxi, kotxi pãkixinire na atão Teoso apisatoõ. ²² Ininiã pitakanapariko ikara pimaerekani. Pamanaãri Apiananiri pimaerekani imakatzakini ãkapani. Atxiĩti iua maxinĩkaretari pixinikakiti pãkixinireẽ. ²³ Nota imarotai pite. Pãkixinireẽ xãpoãkata maerekatinoka. Pimaerekani maĩkai. ! Auiritai pisini pinirekinimoni —itxa Petro.

²⁴ Ininiã Simão apakapapiretari:

—Pimisãkiretariko Teoso nota ãkapani. Ikara atoko pisãpiretakiti na ninireka —itxa Simão.

²⁵ Petro, Xoão pakini sãpiretari Xesosi kamakiti ninoa ìkapani. Isãpiretarina Api-ananiri sãkire. Eereka ikanapiriãna Xerosareẽmoni. Ikanapiriaãpotakasaakina, isãpiretarina Teoso iokanapirena erekari kaiãopokori aapokotxi auakanimoni Samaria tõpa.

Piripi Etxiõpiakirikata

²⁶ Eereka Apiananiri nitiri iaxitikiri misãkiretari Piripi:

—Paiamatako. Atokatxi pokikinimoni pikikomoni pisako. Pisa kimaporimoni, ãparaã makipakaniãtaã. Iua kimapori Xerosareẽ Kasa tixinimoni sikari.

²⁷ Ininiã aiamata, sipe itxari. Ipixinipokoriti aõkitari Etxiõpia tixinikiri. Etxiõpia auakani auite õtãkikakari itxaua. Paimatireri iua. Ikinimane kamari iua paniãtakiti. Etxiõpia auakani auite sito Kãtasi inakoro. Kaiãopokoro otxineirote, otii pakini. Iua kiki parika ikinipoko oa nakiti inikata oa ìkapani. Mitxi iua sari Xerosareẽmoni Teoso imisãkiretini ìkapani. ²⁸ Ikanapiriãkasaaki, mitekaĩ ãki iitopãkasaaki, atatsopatarari Isaía iõkatsopatakiti. Isaía Teoso sãkire sãpiretakari kitxakapirika. ²⁹ Iuasaaki Erekari Matamatakoti txari Piripi:

—Pisa okira mitekaĩmoni. Pikaikota oa takote.

³⁰ Ininiã Piripi miteka iuamoni. Ikenakotakasaakiri Isaía iõkatsopatakiti atatsopatinari, Piripi pimaãri:

—Pimarotatarari ere patatsopatakiti? —itxari.

³¹ Ininiã iua:

—Natokopa ininiãpa nimarotari? Kipa oerekano? —itxari.

Ininiã aiatarari Piripi mitekaĩ ãki iuakata iitopãkini ìkapani. ³² Iua iõkatsopatarari ia Teoso sãkire:

Soti auite okikomoni anikiko atoko itxa iua. Soti auite ãkiri piti kisauakikosaaki, ! kasãkireri iua. Iua soti auite ãkiri atoko itxa iua, kotxi iua apaka !kasãkireri.

³³ Inapetaãka iua. !Atãoni kãkiti kama iuamoni. Okaãkape. !Auari iua ãkiri.

Ikara atoko itxa Teoso sãkire, Isaía iõkatsopatakiti.

³⁴ Ininiã iua Etxiõpiakiri pimaãri Piripi:

—Pisãpiretano, natokopa itxa Teoso sãkire sãpiretakari sãkire? Kipa soti auite atoko inakari? Kipa okaãka? Iuakani? Átikani?

³⁵ Ininiã Piripi oerekari ikara Teoso sãkire iõkatsopatakori.

—Xesosira ikara atoko inaãka —itxa.

Ininiã apikomoni isãpiretari Teoso iokanapirena erekari, Xesosi pirena.

³⁶ Isaãpotakasaakina, apokana ãparaã auiniãtaã. Ininiã iua kiki txari:

—Uai aua ãparaã. Apakata nipatxisatiko?

³⁷ Ininiã Piripi txari iua:

—Apakatapitika pipatxisatiko iteene pauikiniãri Xesosi sãkire pãkixinireẽ.

Ininiã iua apakapapireta:

—Nota auikapitikari Xesosi Teoso mereẽkiti, Teoso ãkiri ininiãua.

³⁸ Ininiã iua Etxiõpiakiri paniãtari mitekaĩ anikakari iotokini. Iuasaaki Piripi, iua Etxiõpiakiri apaka katxaka, imaãta itxana. Ininiã Piripi patxisatarari iua kiki.

³⁹ Ikanikiitakasaakina, Erekari Matamatakoti anikari Piripi. Ininiã iua kiki kona atamataikari Piripi. Ininiã iãpotapitipo. Ipoxononinoka itxa. ⁴⁰ Iuasaaki Asoto sitatxitipeka itokiã Piripi. Isaãpotakasaaki, ikinika aapokotxitiã isãpiretari Teoso sãkire. Teoso sãkire isãpiretiniritika Sesaréia sitatxitimoni apokako.

9

Saoro Auikiniri Xesosi Sãkire
(Átosi 22.6-16; 26.12-18)

¹ Iuasaaki Saoro okaenetapikana Apiananiri sãkire auiaãkani. Ininiã iua sari sasetotxi auite apiatakarimoni. ² Amanaãri aãtsopa Saoro parika sãpiretiko aãtsopati. Iua nirekari sasetotxi auite iõkatsopatiniri ikara, Saoro anikini ìkapani. Inirekari isikiniri iua aãtsopa ikinika aiko Xoteo apotiitiniãtaãua nĩkatakanimoni Tamásiko sitatxiti, kotxi

Saoro nirekari imaĩkinina Xesosi sãkire auiãkani, kikiakori, sitoakoro pakini, Tamásiko sitatxitiã apokakini. Inirekari anikinina Xerosareẽmoni.

³ Iua apokaãpotakasaaki Tamásiko sitatxitimoni, katimaritika iotximeretxi iaxitikiri ãkitari. ⁴ Irika xitipe. Ininiã ikenakotari sãkiretxi:

—Saoro, Saoro, kinirepa pimisiritano? —itxa ikenakotakiti.

⁵ Ininiã iua:

—Kiriparai Apiananiri?

Ininiã:

—Xesosira nota. Pimisiritakitikarano —itxa Xesosi.

⁶ Ikikinana, iteene ipĩkarauatiniã.

—Apiananiri, kipa pinireka nikaminii? —itxa.

Ininiã Apiananiri:

—Põkitikaua, sitatxi pisa. Iuaã ãti sãpiretai pikamakiti tĩkane —itxa Xesosi.

⁷ Imoianariakori iotoka. Ipĩkarauatana. Masãkireninoka itxana. Ninoa kenakotari iaxitikiri sãkire, txamari !atamatarina.

⁸ Eereka Saoro õkitikaua, xorekaãta itxa, txamari imosiãretapeka iua. Ininiã imoianariakori anikari iua. Ikanõpiãpotarina Tamásikomoni. ⁹ Ipi, ãti pakini õti mõiãretika itxa. Iuasaaki !inipokota. !lãta.

Ananíasi Makananitiniri Saoro

¹⁰ Tamásiko sitatxiti aua kiki Xesosi sãkire auiãkari, Ananíasi inakori. Iuasaaki Teoso sãkirauata Ananíasikata itaponemoni. Itaponeẽ Apiananiri akiritari iua:

—Ereẽkai Ananíasi —itxa.

Ininiã:

—Uaĩkarano nota, Apiananiri —itxari Teoso.

¹¹ Apiananiri txari:

—Paiamatako. Kimapori Eretĩka ãpori kimaporitimoni pisako. Xotasi aapokomoni pisa. Iuaã pinitari Taaso sitatxitikiri Saoro inakori. Uatxiikara isãkirauanãta notakata.

¹² Saoro taponetai pite. Iua atamatai pite apokini iuamoni, piuko inopini pitakini ãkapani iuaĩkana kõiãrepeka inini ãkapani —itxa Teoso.

¹³ Ininiã Ananíasi:

—Apiananiri, kãkitipokoni sãpiretano ikara kiki pirena. Pamonõkoniri iua. Imisiritapekana pite nakitiakori Xerosareẽ sitatxiti auakani. ¹⁴ Sasetotxiakori auĩte paniãtari iua imaĩkinina piuaãka akiritakani uai Tamásiko sitatxiti auakani —itxa Ananíasi.

¹⁵ Ininiã Apiananiri txari:

—Pisako iuamoni. Nota mereẽpekari iua kiki, nota parĩka ikamini ãkapani. Iua sãpiretariko nota sãkire Xoteo minakonimoni, auĩtetxiakorimoni, Isaeo tixini auakanimoni pakini. ¹⁶ Noerekariko Saoro iteene atatsĩrauatini nota sãkire auikini xika —itxa Teoso.

¹⁷ Ininiã Ananíasi sari Xotasi aapokomoni. Iĩroã. Eereka iuako itaka Saoro nopini.

—Nitari Saoro, Apiananiri Xesosi, paõkitakitira kimaporiã, iuara iokanatano nota pitemoni kõiãrepeka iuaĩkana pinini ãkapani. Iokanatano nota pitemoni Erekari Matamatakoti papakapini ãkapani —itxa.

¹⁸ Iuasaakipeka oki nopini auakari katxaka. Ximaki tãta atoko itxa. Kõiãrepeka itxa. Eereka õkitikaua. Iuasaaki ipatxisataãka. ¹⁹ Inipokotaka atoko, itapara auapeka.

Saoro Tamásiko Sitatxiti Auakasaaki

Saoro kaikota Tamásiko mapaõti Xesosi sãkire auiãkanikata. ²⁰ Iua sari aiko Xoteo apotiitiniãtaãua. Iuaã oerekarauata. Oerekari Xesosi Teoso ãkiri ininiãua. ²¹ Isãkire kenakotakani tsorĩkaãta.

—Iua Saoro okana Xesosi uãka akiritakani Xerosareẽ auakani. Iua ina uaimoni Xesosi uãka akiritakani imaĩkini ãkapani, sasetotxi auĩteakorimoni anikinina ãkapani —itxana.

²² Saoro oerekarauatakasaaki, imaroãpotari Teoso imarore. Teoso sikaposoti-ireãpotari iua. Ininiã iteene imarotari Teoso sãkire, apanakini oerekini ãkapani. Iua atoko ininiã, itaparaxinireritika oerekari Xoteoakori Tamásiko sitatxiti auakani Xesosi Teoso Mereẽkiti ininiãua. Ininiã ninoa !imarotari apakapipiretinirina iua.

²³ Mapaõti atoko Xoteoakori sãkirauatakaka Saoro okinina ïkapani. ²⁴ Saoro sãpiretaãka Xoteo aiamatapeka okinirina iua. Ninoa iãtapapikari sitatxi ïronakikoãtaã okinirina tïkane. ïkanõka, pokamara iãtaparina iua.

²⁵ Iuasaaki ïkanõka Xesosi sãkire auiãkani anikari iua sitatxi pirikeremoni. Iuaã Saoro ieretakaua kotari ãki. Pirikeri sonaã iokatxakarina Saoro kotari ãki sitatxi mapara. Iposo atoko imiteka Xerosareẽmoni.

Saoro Xerosareẽ Apokini

²⁶ Saoro apokasaaki Xerosareẽ, inirekari Xesosi moianariakori imoianatini. Txama ikinikana pikari iua. Kona !auiritarina iua moianatinina ninoa, kotxi !auikarina iua atão auikiniri Xesosi sãkire. ²⁷ Iuaritika Panapee anikari iua Xesosi iokanatakinimoni. Isãpiretana ninoa:

—Kimaporiã isikasaaki, Saoro aõkitari Apiananiri. Apiananiri misãkiretari iua. Tamásiko sitatxiti auakasaaki, itaparaxinireritika isãpiretari Xesosi sãkire kãkitimoni — itxa Panapee.

²⁸ Panapee sãkire ikenakotakasaakina, auikarina Saoro sãpiretakiti. Ininiã Saoro kaikota Xerosareẽ Xesosi sãkire auiãkanikata. Inirekinimoni isa Xerosareẽ. Isinimoni itaparaxinireritika isãpiretari Apiananiri Xesosi sãkire. ²⁹ Isãkirauata Xoteoakorikata, Kreko sãkire imarotakanikata. Inirekarina ninoa imarotiniri Xesosi sãkire. Txamari inirekarina okinirina iua. ³⁰ Iuasaaki Xesosi sãkire auiãkani imaropiretari ninoa okaenetiniri Saoro, ininiã anikarina sitatxi Sesaréia inakorimoni. Eereka iokanatarina iua Taaso inakori sitatxitimoni.

³¹ Iuasaaki Xesosi sãkire auiãkani !imisiritaãkaika. Xotéia tõpa, Kariréia tõpa, Samaria tõpa pakini !auaika Xesosi sãkire auiãkani misiritiko iuasaaki. Erekari Matamatakoti sikataparaxiniretana ninoa. Kãkiti itoãpotari auikiniri Xesosi sãkire. !Ikamarina maerekati, kotxi iteene ipïkarina Apiananiri.

Enéiasi, Tókasi Pakini

³² Petro ianaxititakasaaki, iua sari Teoso sãkire auiãkanimoni Arita sitatxiti auakanimoni. ³³ Iuaã aõkitari kiki Enéiasi inakori. Iua matïpokotakati itxaua. Oito anokananipeka !õkitikaua. ³⁴ Petro txari iua:

—Enéiasi, Xesosi Kristo makananitai. Põkitikaua. Piapirikari pisirimata —itxari matïpokotakati.

Iuasaakipeka õkitikaua. ³⁵ Ikinipoko Arita sitatxiti auakani, Sarõ sitatxiti auakani pakini atamatari iua Enéiasi, ininiã itakanaparina imaerekanina. Inïkapiretarina Apiananiri sãkire.

³⁶ Æti sitatxiti Xopi inakoriã oãua sito Teoso sãkire auiãkaro, Tapita inakoro. Kreko sãkireẽ ouãka Tókasi otxaua. Oa kamapikari erekari. Omoianatana matxineiroteni.

³⁷ Arita auakani auikasaakiri Apiananiri sãkire, oa Tókasi amianata. Eereka oani opïpe. Opïpeka atoko, arokaïtotarona, taka itxarina oïto itanokiri koaã. ³⁸ Xopi sitatxiti Arita sitatxiti takote, ininiã Xesosi sãkire auiãkani Xopi sitatxiti auakani kenakoenetari Petro Arita sitatxiti auiniã, iokanatanana ipi kiki Petromoni, apinirina ïkapani. Iokanapiretana:

—Pinapokako uai. Katima pitxako —itxana.

³⁹ Ininiã Petro aiamata. Ninoakata isa. Iua apokasaaki, anikarina itanokiri koaã. Ikinipoko tikinitakoni txiapanãta Petro takote. Ninoa oerekari Petro mãkatxi Tókasini kamakiti ninoa ïkapani oãuakasaaki. ⁴⁰ Ininiã Petro iokanatanana ninoa mapara. Eereka ikapotoreẽkaua. Isãkirauata Teosokata. Eereka oamoni ikirioka. Itxaro:

—Tapita põkitikaua.

Iuasaakipeka xorekaãta otxa. Oãtamatakasaakiri Petro, oitopãka. ⁴¹ Ininiã imaïkaro ouako oõkitikiniua ïkapani. Eereka iua akiritana Xesosi sãkire auiãkani, tikinitakoni pakini, oa auãki onini oerekini ïkapani.

⁴² Ikini Xopi auakani imaropiretari Tókasi iuaïkana auãki onini, ininiãra itomaneri kãkiti auikari Apiananiri sãkire. ⁴³ Petro kaikota iuaã Xopi sitatxiti mapaõti. Iua kaikota Simão inakorikata. Iua Simão aamata kamakari.

10

Konério Tapone Pirena

¹ Iuasaaki Sesaréia sitatxiti aua kiki Konério inakori. Áti uãka iua. Homano itxaua. Seĩ pakini sotato auĩte iua. Kãkiti akiritana ninoa sotatoakori Itáriakini. ² Iua Konério kamari Teoso sãkire iaõka. Iua, ikinipoko aapoko auakanikata paxitari Teoso. Imisãkiretapikari Teoso. Isikana matiitimoni inirekakitina. ³ Áti õti kikatapeka inakasaaki itaponeuata. Itaponeẽ itikari Teoso nitiri apokini iuamoni. Itxari:

—Konério —itxa.

⁴ Teoso nitiri atamatakasaaki, ipĩkarauata.

—Apiananiri, kipa pinireka? —itxa Konério.

Ininiã Teoso nitiri txari:

—Teoso kenakotapekari pisãkire iuamoni. Itikapekari pisikarauatini matiinimoni. Teoso xinikapitikai. ⁵ Ininiãkara átikaka kikiakori piokanata Xopimoni Simão Petro uaimoni imininina ïkapani. ⁶ Iua kaikota áti Simãokata, aamata kamakarikata. Iua aapoko potxoari uiniti takote aua. Iua Simão Petro sãpiretaiko pikamakiti tĩkane —itxa Teoso nitiri.

⁷ Eureka iua Teoso nitiri sipe. Iposo atoko Konério akiritana ipi initiriakori, átika isotatone pakini. Iua sotato kamari Teoso sãkire iaõka. Iua auapika Konériokata, inireẽkiti ikamini tĩkane. ⁸ Ininiã Konério sãpiretana ninoa ikinipoko Teoso nitiri sãpiretakiti. Iposo atoko iokanatanata Xopimoni.

Petro Tapone Pirena

⁹ Katimatinĩkata Konério iokanatakini potorika. Apaniãxiti inakasaaki ninoa apokaãpota sitatxi Petro auiniãtaã. Iuasaaki Petro kanikauata aapokotxi nopini Teoso imisãkiretini ïkapani.

¹⁰ Iuasaaki Petro natxita. Inirekari inipokotini. Nipokori kamikosaaki, itaponeuata.

¹¹ Itaponeẽ atamatari iaxiti xorekini. Aamata mitamatari katxakaãpota iuamoni. Imapotomatatare ipi ipi pakini iaxirikaãka. Iua aamata katxaka xitimoni. ¹² Iua aamata ãki aua ikini sereti kaxipirini. Aua pirãtxi. Aua ïtopa auakani. Aua imini. Aua araãkani.

¹³ Ininiã Petro kenakotari itanokiri sãkirauatini:

—Petro, põkitikaua. Pokari ia, pinikini ïkapani —itxari Petro.

¹⁴ Petro Xoteo itxaua, ininiã kona ikinika linika. Ininiã Petro txari:

—Konapitini Apiananiri. Kona ninikari ikinipoko naia kaxipirini. Manaiatini. Pamininiri —itxa.

¹⁵ Iuaĩkana itanokiri sãkirauata:

—Nota oeretakiti kona kamininiri kona pitxape —itxa.

¹⁶ Ipi, áti pakinikata iua aamata katxaka ikara atoko. Iposo atoko ikanĩkaxitita Teoso tixinemoni.

¹⁷ Ininiã Petro ãkixinireẽ ixinikaxitita:

—Kanatokopa itxa ikara nitapone?

Iuasaakipeka Konério iokanatakini apokapekari Simão aapoko. Apokana Simão aapoko toremoni. ¹⁸ Akiritana:

—Ereẽkai. Simão Petro uai aua atxiĩti? —itxana.

¹⁹ Iuasaaki Petro xinikapanikari itapone. Erekar Matamatakoti txari:

—Ikiraãkarana ipi, áti pakini kãkiti nitanãtai. ²⁰ Põkitikaua. Pikatxaka xitimoni. Pisa ninoakata, kotxi niokanatanata ninoa uaimoni —itxa Erekar Matamatakoti.

²¹ Ininiã Petro sari Konério iokanakinimoni:

—Notakara hĩte nitanãta. Kipa ïkai hĩte?

²² Ninoa apakapapiretari iua:

—Konério, aãuĩte iokanataua ate. Erekar iua. Ikamari Teoso sãkire iaõka. Ikinipoko Xoteo apokaerekatari iua. Teoso nitiri iaxitiki paniãtari iua pite akiritini, pisãkire ikenakotini ïkapani —itxana.

²³ Ininiã Petro:

—Hĩroã. Uai himaka —itxa.

Konério Aapoko Auakasaakina

Katimatinĩkata Petro sari ninoakata. Apanakini Xesosi sãkire auiãkani Xopikini sari apaka. ²⁴ Katimatinĩkata apokana Sesaréia sitatxiti, Konério auiniãtaã. Iua Konério apotiitapekana inirimane, aõkimanere pakini Petro iãtapinina ĩkapani. ²⁵ Petro ĩroãkasaaki Konério aapoko, iua aõkitari Konério. Iuusaaki Konério kapotoreẽkaua Petro apisatoõ. ²⁶ Txamari Petro txari iua:

—Põkitikaua. Kiki pite atoko inakarikarano nota.

²⁷ Isãkirauatakasaakina, Petro ĩroã. Aõkitari ito kãkiti apotiitakaniua. ²⁸ Ininiã itxana:

—Hĩte imarotari ate kiomaneakorini lauiritari Xoteo moianatiniri ãti uãka. !Auiritaãka ate ĩroni hĩte atoko inakari aapoko. Iuaritika Teoso txano nota: “Na pakiritapiri ãti uãka kanairi,” itxano. ²⁹ Ininiã hĩte pĩkapiretakasaakino nota, nimarotari atão nisini hĩtemoni. Ininiã, kinirepa hĩte apakĩtakano nota? —Petro txari Konériomoni.

³⁰ Konério apakapapiretari:

—Ipi, ipi pakini õti apisapanika nuanãta naapoko. Iuusaaki kona ninikari nipokori, Teoso nimisãkiretini ĩkapani. Kikatapeka inakasaaki, nimisãkiretakasaakiri Teoso, katimaritika kiki tokiã nota apisatoõ. Pomẽkoriri imãka. ³¹ Itxano: “Konério, Teoso kenakotapekari pamanaãkiti. Ixinikari pisikarauatini matiinimoni. ³² ãtikaka kiki piokanata Xopi sitatxitimoni Simão Petro inakori uaimoni imininina ĩkapani. Iua aua ãti Simãokata, aamata kamakarikata. Simão aapoko potxoari uiniti takote.” ³³ Iuusaaki nota apakĩtakai pite. Peerekari papokini atemoni. Uatxa ate uai aua Teoso apisatoõ Teoso paniãtakiti pitemonikiri akenakotini ĩkapani. Ininiã pisãpiretauako —itxa Petromoni.

³⁴ Ininiã Petro txari:

—Uatxa nimarotari atão inakari. Teoso sikari erekari ikininapemoni. Inirekari ikini uãka apokini iuamoni, inakitiakori ininiuana ĩkapani. ³⁵ Teoso apakapari ikini itixiti auakani, iua paxitakani, atão inakari kamakani. Apakapari Xoteoakori. Apakapari Xoteo minakaniua apaka. ³⁶ Himarotari Teoso iokanapirena Isaeo auakanimoni. Ikara erekari pirena sãpiretaua Xesosi Kristo xipokari Teoso omanatiniri kãkiti imaerekani xika, kãkiti erekaxinire inini ĩkapani. Ikinimane auĩte itxaua Xesosi. ³⁷ Ikara Teoso iokanapirena himarota, kotxi iaripireta ikini Xotéia tõpa. Merepitipanika iaripireta Kariréia tõpa, Xoão patxisarauataka atoko. ³⁸ Himarotari Xesosi Nasareekiri pirena. Himarotari Teoso sikari Erekari Matamatakoti iuamoni. Iteene isikaposotiiretari iua. Ikini tõpati isa erekari ikamini ĩkapani. Imakananitana Satanasi misiritakini, kotxi Teoso aua iuakata. ³⁹ Ateka itikari ikinipoko ikamakiti Xoteoakori tixine iua auakasaaki, Xerosareẽ sitatxiti auakasaaki apaka. Eereka aamina ĩpiriãmitakari nopini ninoa okari iuani.

⁴⁰ —Iuaritika ipi ãti pakini õtisaaki Teoso õkitikari iua. Iuaka oerekaua kãkitimoni ipĩpekariika iuaĩkana aua inini. ⁴¹ Kona ikinipokoni atamatari iua. Teoso mereẽkininanira atamatari iua. Iuaritika kaiãori iua atamatakani. Ininiã ate atamatari iua. Iua õkitikaua atoko ate nipokota, iãriã aãta iuakata. ⁴² Iokanataua ate Teoso sãkire asãpiretini ikini kãkitimoni. Teoso mereẽri iua, kãkiti misiritiko mereẽkari ininiuua ĩkapani. Auãkipanika inakani, ipĩkani pakini misiritiko mereẽkari itxaua. ⁴³ Ikinipoko Teoso sãkire sãpiretakani sãpiretari iua pirena. Ninoa txari: “Iua sãkire auiãkani maerekani makatxakaãka” —itxa Petro.

Xoteo Minakaniua Patxisatiko

⁴⁴ Petro sãkirauatapanika inakasaaki, Erekari Matamatakoti apoka ikinika Petro sãkire kenakotakanimoni. ⁴⁵ Ininiã Petro moianariakori Xesosi sãkire auiãkani kisauakatsikimatatakoni tsorĩkaãta, kotxi Teoso sikari Erekari Matamatakoti Xoteo minakonimoni apaka. Ninoa tsiki mata !kissauakaãka, iuaritika Erekari Matamatakoti apoka ninoamoni. ⁴⁶ Ikenakotarina Xoteo minakaniua sãkirauanãta ãti uãka sãkireẽ.

—Peerekari Teoso. Apiananiri itxaua —itxanãtana Xoteo minakaniua.

⁴⁷ Ininiã Petro txari:

—Ninoa Xoteo minakaniua apakapapekari Erekari Matamatakoti ate apakapiniri atokokana. Ininiã apakatapitika ninoa patxisatiko ãparaaã. Kona kãkitini iotokakana ipatxisatikona.

⁴⁸ Ininiã iua paniãtana ninoa patxisatiko Xesosi Kristo uãkaã. Iuusaaki ninoa aiataro Petro:

—Atekata mapaõti pikaikota —itxarina.

Ininiã Petro kaikota ninoakata.

11

Petro Sãpiretakiti

¹ Xesosi iokanatakini, Teoso sãkire auiãkani Xotéia tõpa auakani apaka kenakotari Xoteo minakanuia auikinirina Teoso sãkire. ² Ininiã Petro kanapiriãkasaaki Xerosareẽmoni, kisauakatsikimatatakoni apoõtari iua.

³ —Pite imaka itsiki mata makisauakakoni aapoko ãki. Ninoakata pinipokota pitxa. ! Apakata pikamakiti —itxarina.

⁴ Ininiã Petro sãpiretari ikinipoko itiãkiti, ikenakotakiti pakini.

⁵ —Xopi sitatxiti nauakasaaki, Teoso nimisãkiretakasaaki, nitaponemoni natapari mãkatxi mata atoko inakari iaxiti katxakaãpotini. Ipi, ipi pakini imapotomatare iaxirikaãka. Iua apoka nota takote. ⁶ Iteene nimixinitari mãkatxi mata ãki auakani. Natamatari ikini sereti kaxipirini. Aua pirãtxi. Aua itopa auakani. Aua imini, araãkani pakini. ⁷ Iuusaaki nikenakotari sãkiretxi iaxitikiri: “Põkitikaua. Oka, nika pitxako,” itxa. ⁸ Txamari nitxari iua: “Apiananiri, konapitini. !Ninikari nipokori mauiritakoti ia atoko inakari, kotxi pamininiri,” nitxari.

⁹ —Iuaãkana iaxitikiri sãkirauata: “Teoso oeretakiti kona kamininiri kona pitxape.”

¹⁰ Ipi ãti pakinikata iua aamata katxaka ikara atoko. Eereka ikinika kosekaãka iaxiti.

¹¹ —Iuusaakipeka ipi, ãti pakini kikiakori Sesaréiakini apoka aapokotxi nikaikotiniãtaã. Iokanataãkana notamoni. ¹² Ininiã Erekar Matamatakoti paniãtano: “Pisa ninoakata. Kona pipikarauatape,” itxa. Naia seisi aitariakori Xopikini moianatano nota iuusaaki. Ininiã ate itõã Konério aapoko. ¹³ Ininiã iua sãpiretaua ate, Teoso nitiri iaxitikiri apoka iuamoni aapoko ãki. Iua Teoso nitiri txari iua: “Piokanatar kikiakori Xopimoni Simão Petro inakori apinina ikapani. ¹⁴ Iua sãpiretaiko pite maerekani makatxakiko, paapoko auakani maerekani makatxakiko apaka.”

¹⁵ —Nipotorikasaaki nisãkirauatini, Erekar Matamatakoti apoka ninoamoni merepanika atemoni apokini atokotxikana. ¹⁶ Iuusaaki nixinikari Apiananiri sãkire. Iua txari: “Xoão patxisarauata ãparaaã. Hite patxisataãkako Erekar Matamatakotiã.”

¹⁷ Ininiã Teoso sikari Erekar Matamatakoti ninoamoni, atemoni isikini atokotxikana Xesosi Kristo Apiananiri sãkire aãuikasaaki. Ikara atoko ininiã, !apakata Teoso ninaiatini —itxa Petro.

¹⁸ Petro sãkire ikenakotakana atoko, !itsoataikana.

—Peerekari Teoso —itxana.

—Ininiã Teoso auiritari Xoteo minakanuia apaka imaerekanina itakanapinina, Teosokata ãtipirika auinina ikapani —itxana.

Teoso Auiãkani Ætxiokia Sitatxiti Auakani

¹⁹ Estevão ipinaãka atoko, Xesosi sãkire auiãkani misiritaãka, ininiã ninoa iarika. Iar-iãkani sari maioakari. Penísia tixinima, Xipri pokomiriõtima, Ætxiokia sitatxitima pakini-imoni isana. Ninoa oerekari Teoso sãkire Xoteomoninani. ²⁰ Ninoa ãtikaka Xiprikini, Sirenikini pakini sari Ætxiokia sitatxitimoni. Iuaã isãpiretarina Teoso iokanapirena erekari, Xesosi Apiananiri pirena, Xoteo minakonimoni ninoa apaka imarotini ikapani. ²¹ Apiananiri sikaposotiiretana ninoa. Ininiãkara itomaneri kãkiti auikari Apiananiri sãkire. Maerekati itakanapana. Ikamarina Apiananiri nireẽkiti.

²² Ikara apopireta Xesosi sãkire auiãkanimoni Xerosareẽ sitatxitiã. Ininiã ninoa iokanatar Panapee Ætxiokia sitatxitimoni. ²³ Iuaã iua apokasaaki, imarotakasaakiri nino apakapiniri erekari Teoso sikakiti, ipoxokoniuata. Isikataparaxiniretana. Ôtãkikana Apiananiri paniãtakitinoka ikaminina ikini itaparaxinireritikana. ²⁴ Erekar Panapee. Ikinika Erekar Matamatakoti paniãtakiti ikama. Auikari Xesosi sãkire ikini ixinireritika. Ikara atoko ininiã, itomaneri kãkiti auikari Apiananiri sãkire.

²⁵ Eereka Panapee sari Taaso sitatxitimoni, Saoro initini ìkapani. ²⁶ Itaõkitakasaakiri, iminari iua Ætziokia sitatxitimoni. Æti anokanani ikaikotana iuaã Xesosi sãkire auiãkanikata. Oerekarina Teoso sãkire itomaneri kãkitimoni. Xesosi sãkire auiãkani Ætziokia sitatxiti auakani merepitipanika takauãkatakãka, “Kristopiki.”

²⁷ Iuasaaki ãtikaka Teoso sãkire sãpiretakani Xerosareëkini sari Ætziokia sitatxitimoni. ²⁸ Ninoa ãtika Ákapo inakori õkitikaua. Erekaru Matamatakoti sãkire isãpireta:

—Natxinoka auako ikini itixiti —itxa.

Ikara isãkire apokapeka Krãotxiõ Homano auite inakasaaki.

²⁹ Ininiã ikinika Xesosi sãkire auiãkani nirekari txineiro iokanatini itariakorimoni Xotéia tõpa auakanimoni. Ito auinina, ito iokanatana. Poiãonoka auinina, poiãonoka iokanatana. ³⁰ Panapee, Saoro pakini anikari isikakitina. Isikaro oa txineiro Xotéia tõpa auakani õtãkikakanimoni.

12

Xesosi Sãkire Auiãkani Misiritiko Iuaãkana Apokini

¹ Iuasaaki auitetxi, Erotxi inakori, misiritana Xesosi sãkire auiãkani. Ætikaka itaka kateia ãki. ² Iua okapiri Txiako iouata mitaroã. Iua Txiako Xoãõ itari. ³ Erotxi imarotakasaakiri Xoteokori apokaerekatiniri Txiakoni okiko, ipaniãtari Petro maãkiko. Imaãkari Petro Xoteokori kiiniritisaaki, pãõ miãtiãkati kiiniritisaaki. ⁴ Petro imaãka atoko itakari iua kateia ãki. Ipaniãtari tesiseisi sotatoakori nãkatiniri iua. Kiiniri xipoka atoko Erotxi nirekari imereiniri imisiritiko ikinimane apisatoõ. ⁵ Ininiã Petro kateia ãki kaikota. Iuasaaki Xesosi sãkire auiãkani ãtipirika misãkiretari Teoso Petro ìkapani.

Petro Sikakaãka

⁶ Ìkanõka, imisiritiko imarotini õti apisapanika, kateia ãki Petro imakanãta ipi sotato apanãkaki. Iaxirikiko tsapi metao kamakori ipi. Aua apaka apikomoni sotatoakori kateia toreãtaã, Petro mamitekakani ìkapani. ⁷ Patimari Teoso nitiri tokiini. Tirikapi ponika kateia ãki. Iuasaakipeka Teoso nitiri õpirikari Petro.

—Põkitikaua. Katima pitxako —itxari.

Iuasaakipeka itsapi iaxirikiko iuakoãkiri katxaka. ⁸ Teoso nitiri paniãtari:

—Pimãka pieretaka. Pikiti mata pitaka, ininiã Petro takari. Pimãka pinopinikiri apaka pitaka, eereka pisa notakata —itxa.

⁹ Ininiã Petro sari iua tikini. Kateia ipokãkana. Iuasaaki Petro uãkatari itaponeuatini. !Imarotari atãõ Teoso nitiri mipokãkiniri iua. ¹⁰ Eereka inapari ipi sotatoakori auiniãtaã, apoka itxana itore maparakiri metao kamakori. Iuaãtaã napakari sari sitatximoni. Ikara itore iuaka matakakaua. Ininiã ninoa pokika. Iua ahoa mapotõkire apokasaakina, katimaritika Teoso nitiri takanapari iua. ¹¹ Iuasaaki Petro imarotapekari:

—Na nitaponeni itxa. Atãõpitikara Apiananiri iokanatari initiri itixinekiri nota imaktxakini ìkapani. Pataparari Erotxi, iuaritika Apiananiri makatxakano. Xoteokori nirekari okinino, iuaritika Apiananiri makatxakano —itxa.

¹² Ikara ixinika atoko, isari Maria aapokomoni. Xoãõ Marko inakori inoro oa Maria. Iuaã itomaneri kãkiti apotiitapekava, Teoso imisãkiretinina ìkapani. ¹³ Maria aapoko apokasaaki, akirita. Ætokoro Hotxi inakoro sari itoremoni. Okenakotari Petro sãkire. ¹⁴ Oimarotakasaakiri Petro mapara apokini, omiteka iriko ãki aapokotxi ãki auakanimoni. Opoxokoniua, txamari omaxinãkaretari itore omatakakini Petro ìkapani. Ininiã otxari apanakinimoni:

—Aapokotxi toreãtaãpekari Petro —otxa.

¹⁵ Ininiã ninoa:

—Pimapitxirita.

—Atãõpitikara nisãkire —otxa oa.

Ininiã ninoa:

—Petro kamiritekara.

¹⁶ Ninoa ikara atoko inaãtakasaaki, Petro mapara akirinãtapanikana ninoa. Eereka ninoa matakakari itore, atamata itxarina.

—Kanatokopa pitakanapari kateia? —itxarina.

¹⁷ Ininiã iuakoã ipinitana:

—Hikenakotari nisäkire —itxana.

Eereka isãpiretana:

—Apiananiri makatxakano nota kateia äki. Ikinika ikara hīsãpiretariko Txiako, apanakini aītariakori pakini —itxa.

Iuusaaki isipe. Ätiãtaã isa.

¹⁸ Katimatiniãkata sotatoakori kateia nĩkatakani tsoriãkaãta:

—Īteri iua Petro? Kanatokopa itxa Petro pokĩkini? —itxana.

Initapiimarina Petro. ¹⁹ Ininiã Erotxi paniãtana initiko, txamari !apokarina. Erotxi pimaãna sotatoakori Petro nĩkatakani, Petro sinimoni imarotinina ĩkapani, txamari ninoa !imarotari Petro sinimoni. Ininiã eereka ipaniãtari ninoa sotatoakori okiko Petro mitekini xika.

Ikara atoko inaãka atoko Erotxi sipeka. Xotėia tōpa ipotorika. Sesarėia sitatxitimoni isa.

Erotxi Ipinini Pirena

²⁰ Erotxi omanatana Txiro sitatxiti auakani, Sitoõ sitatxiti auakani pakini. Ninoa nirekari iua omanatinina xipokini, kotxi ninoa apakapari nipokori Erotxi tixinekiri. Ininiã ninoa sãkirauata Parásito inakorikata. Iua Parásito nĩkatari Erotxi aapoko, itii pakini. Paimatireri iua. Ninoa sãkirauataksaaki iuakata, iua auikari ninoa sãkire. Eereka Erotximoni isana neenamati xipokini ĩkapani. ²¹ Erotxi ketotari ikinimane kãkiti imisãkiretini ĩkapani. Iketo õti apokasaaki ieretakari imãka ereri inakari, auĩtetxi mãka. Eereka iitopãka auĩtetxi itopanere nopini. Iuaã iua misãkiretana kãkiti. ²² Ininiã kãkiti txari:

—Teosora sãkirauanãta. Na kãkitini —itxana.

²³ Iuusaakipeka Teoso nitiri iaxitikiri okari Erotxi, kotxi iua auiritari kãkiti iteosone-tiniri iua. Ininiã tsoni sotakiperi nika txari iĩto. Ikara atoko inikoã ipĩpe.

²⁴ Iuusaaki Teoso sãkire iaripireta. Ininiã itomaneri kãkiti auikari Teoso sãkire.

²⁵ Panapee, Paoro pakini parĩka Xerosareẽ sitatxitiã xipokaãka atoko, Ätxiokia sitatxitimoni kanapiriã itxana. Anikarina Xoão Marko ninoakata.

13

Panapee, Saoro Pakini Mereĩko

¹ Xesosi sãkire auiãkani sauaki Ätxiokia sitatxitiã aua Teoso sãkire sãpiretakani, Teoso sãkire oerekakani pakini. Aua Panapee. Aua Simão “Pomamari.” Aua Arósio Sirenikiri. Aua Manaeẽ. Auĩtetxi Erotxi inakori xapitipanika inakasaaki, iua Manaeẽ xapitipanika inakasaaki, imakananitaãka Erotxikata. Apaka Saoro aua Ätxiokia sitatxitiã. ² Äti õti Xesosi sãkire auiãkani iuaãtaã takanapari inipokotinina Apiananiri imisãkiretinina ĩkapani. Iuusaaki Erekar Matamatakoti txana ninoa:

—Himakatxakana Panapee, Saoro pakini parĩkatxi ikaminina nota ĩkapani —itxa Erekar Matamatakoti.

³ Ininiã ninoa takanapari inikini Teoso imisãkiretini ĩkapani. Iposo atoko itakarina iuakona Panapee, Saoro pakini nopini. Iokanatana ninoa Erekar Matamatakoti paniã-takiti ikaminina ĩkapani.

Xipri Pokomiriĩti Pirena

⁴ Erekar Matamatakoti iokanatana Panapee, Saoro pakini, ininiã ninoa sari Sereósia sitatxitimoni. Iuaã ninoa iereẽtaua maporo äki. Isana Xipri pokomiriĩtimoni. ⁵ Saramina sitatxitiã apokasaakina, isãpiretarina Teoso sãkire aiko äki Xoteo apotiitiniãtaãua. Xoão Marko inakori mojanatana ninoa iuusaaki.

⁶ Xipri pokomiriĩti ĩpirixititana. Paposi sitatxitimoni isana. Iuaã itaõkitarina kiki Xoteo. Miĩti itxaua. Iuãka Paxesosi. Äti iuãka Erimasĩ.

—Teoso sãkire sãpiretakarikarano nota —itxa iua.

Txamari na atão isãkire. ⁷ Iua moianatari Xipri auakani auíte Séxio Paoro inakori. Paimatireri iua Séxio Paoro. Iua akiritana Panapee, Saoro pakini iuamoni Teoso sãkire ikenakotini íkapani. ⁸ Txamari Erimasi linirekana ninoa. !Nirekari Séxio Paoro auikiniri atão Teoso sãkire.

⁹ Iuasaaki Erekar Matamatakoti iteene sikaimaroretari Saoro (ãti iuãka Paoro,) ininiã iteene atamatari iua miíti. ¹⁰ Itxari iua:

—Pite Satanasi ãkiri pitxaua. Pite atão kamakari mokaiakari pitxaua. Pite kamari ikini sereti maerekati. Ikara atoko ininiã, pimisirienetari kãkiti. Atão inakari Apiananiri sãkire pite nirekari pimamakini. ¹¹ Ikara pimaerekani xika Teoso misiritaiko pite uatxa. Mõsiãreti pitxauako. Kona patamatapaniri atokatxi mapaõti.

Iuasaakipeka katxiãri atoko inakari, ipiã apaka apoka Erimasimoni. Ininiã iua nitari ãti anikakiri íkapani. ¹² Séxio Paoro atamatakasaakiri Erimasi misiritiko, iua auikari Teoso sãkire. Itsoriããta:

—Peerekari Paoro oerekakiti sãkiretxiti Apiananiri pirenã isãpiretakiti —itxa.

Átxiokia Sitatxiti Pisítxia Tixini

¹³ Iposo atoko Paoro imoianariakorikata iereẽtaua maporo ãki. Paposi itakanapana. Pexi sitatxitimoni, Pãpíria tixini isana. Pexi sitatxiti auakasaakina, Xoão Marko takanapana ninoa, Xerosareẽmoni ikanapiriini íkapani. ¹⁴ Eereka iuaãkana maporo ãki iereẽtaua. Isana Átxiokia sitatxitimoni, Pisítxia tixinimoni. Átxiokia sitatxiti auakasaakina tomatiko õtisaaki ãroãna aiko Xoteo apotiitiniãtaãua. Iuaã iitopãkana. ¹⁵ Teoso paniãtakiti aãtsopateẽ, Teoso sãkire sãpiretakani iõkatsopatakiti aãtsopateẽ pakini atatsopataãka atoko auĩtetxiakori iuaãtaã auakani txana ninoa:

—Aĩtariakori, ate nirekari hĩsãkirauatini, hĩsãkire auiniã, naia kãkiti hĩsikataparax-iniretini íkapani —itxana.

¹⁶ Ininiã Paoro õkitikaua. Õkatari iuako ninoa sãkirauatini iotokakinina íkapani. Ininiã itxa:

—Nitariakori Isaeo auakani, apaka hĩte Xoteo minakanuia Teoso paniãtakiti kamakanii, hĩkenakotariko nisãkire. ¹⁷ Isaeo auakani Teosone mereẽna aãtokiriakorini Exito tixini auakasaakina, ãti uãkakata auakasaakina. Itxikitakana ninoa itomane ininina. Iuasaaki Exito auakani misiritana. Ininiã eereka Teoso makatxakana iposotiireẽ, ininiã itakanaparina Exito tixini.

¹⁸ —Eereka, koarẽta ano Teoso mĩteenekana ninoa ãparaã makipakaniãtaã, kotxi ikamapikarina maerekati iuaã. ¹⁹ Eereka ixipokana setxi pakini ãti uãka Kanaã tixini auakani. Eereka isikari iua itixi ninoamoni ãtipirika iuaã auinina íkapani. ²⁰ Eereka Teoso sikana kõtãkikarerini Isaeo auakani auĩteakori tĩkane. ãti kõtãkikarerini aua. Eereka iua ipina. Eereka ãtipekana kõtãkikarerini aua. Eereka iua ipina. Itxaãpotana koatrosẽtosi sikoẽta anokanani. Imapotõkire, Samoeo inakori Teoso sãkire sãpiretakari ninoa õtãkikakari itxaua.

²¹ —Eereka ninoa nirekari auĩtetxi apiatakari ninoa auĩte ininiua íkapani. Ininiã Teoso sikana ninoa Saoo inakori, Kixi ãkiri. Iua atokiri kitxakapirĩka Pẽxamiĩ inakori. Iua Saoo ninoa auĩte apiatakari koarẽta anokanani. ²² Eereka Teoso makatxakari Saoo. Itxikitakari Tavii ninoa auĩte apiatakari ininiua. Teoso sãpiretari Tavii pirenã: “Kãkiti Tavii Xese ãkiri atoko inakari ninireka, kotxi iua kamari ikinika ninireẽkiti,” itxa Teoso.

²³ —Teoso sikaenetari ãti, Tavii apika mekani Isaeo auakanimoni. Isaeo auakani maerekani makatxaãkari itxauako. Iua Xesosikara. Iua kãkiti maerekani makatxaãkari txaua. ²⁴ Xesosi parĩka ipotorikini apisapanika, Xoão sãpiretari ikinimane Isaeokini imaerekanina itakanapinina, eereka ipatxisataãkana. ²⁵ Xoão parĩka ixipokasaaki, ipimaãna ninoa: “Kipa hĩuãkatatano nota? Nota kona iua hiãtapakitini. Iuaritika iua ina nota tikini. Nota poiãori, ininiã !apakata iua takote napokini ikiti mata nimakatxakini íkapani, kotxi iua Apiananiri,” itxa Xoão.

²⁶ Paoro sãkirauatapanika:

—Nitariakori, Apraão apika mekaniriakorii, apaka hĩte Xoteo minakanuia Teoso paniãtakiti kamakanii, hĩkenakota. Hĩtemonikari Teoso iokanitari iokanapirenã kãkiti maerekani makatxakiko pirenã. ²⁷ Xerosareẽ auakani, ninoa auĩteakori pakini kona

imarotari Xesosi Teoso ākiri ininiua. Ninoa atatsopatari Teoso sākire sāpiretakani sākire ikini tomatiko ōti, iuaritika !imarotarina ninoa sākire. ²⁸ Ninoa kona apokari ixika Xesosi okiko ĩkapani, iuaritika ipaniātari Pirato okiniri. ²⁹ Ninoa kamari Xesosimoni ikinipoko mitxi Teoso sākire iōkatsopatakori iaōka. Iposo atoko imaktxakarina iua aamina ĩpiriāmitakariā. Ikata itxarina kai iriko āki. ³⁰ Iuaritika Teoso ōkitikari iua ipĭkitximoniĭpeka auakarĭpeka. ³¹ Ōkitikaāka atoko, ito ōti kākiti atamatari iua. Kariréiakini, iuakata Xerosareēmoni sikani aōkitari iua. Ininiā Xesosi iuaĭkana auini pirena sāpiretakani itxauana ninoa Xesosi aōkitakani. Isāpiretarina apanakini Isaeo auakani.

³² —Ininiā uatxa ate sāpiretari Teoso iokanapirena erekari hĭtemoni. Ikara sākiretxiti Teoso kamaenetakiti aātokiriakorinimoni kitxakapirĭka. ³³ Īkorasaaki Teoso kamapekari ikara ikamaenetakiti ate ĩkapani, ninoani apika mekaniriakori ĩkapani, kotxi iua ōkitikari Xesosi ipĭkasaaki, iuaĭkana auāki inini ĩkapani. Kitxakapirĭka Teoso sākire iōkatsopatakori Xikari ipiātaā sāpiretari Xesosi ōkitikiniua ōti, kotxi itxari:

Pite namarite. Ia ōti noerekari kākiti pite iri nininiua nota.

³⁴ —Kitxakapirĭka Teoso sāpiretāpekari iua ōkitikiniri Xesosi ipĭkasaaki, iuaĭkana imapinakani tĭkane, kotxi isākire iōkatsopatakori txari:

Nikamaenetakiti Taviimoni pitemonikara nikama. Ikara erekari nikamapitĭkako pitemoni.

³⁵ Teoso sākire iōkatsopatakori Xikari tesiseisiātaā txari:

Teoso kona auiritari Erekari Kamakari ĩto paiakini.

³⁶ —Kitxakapirĭka Tavii auakasaaki, ikamari Teoso nireēkiti, kotxi inirimane auĭte itxaua. Eereka ipĭpe. Ikatapeēka. Inirimanekata ikatapeēka, ininiā ĩto paiaka. ³⁷ Xesosipekana, Teoso ōkitikari iua. Iua ĩto kona paiaka. ³⁸ Ininiākara nitariakori himarotariko ia. ³⁹ Xesosi sākire auĭākani maerekani makatxakaāka. Eekarini ninoa. Moisesi paniātakiti kamiko kona makatxakari kākiti maerekani. ⁴⁰ Erepaniko. Kitxakapirĭka Teoso sākire sāpiretakani sākire iaōka atxiĭti apoka hĭtemoni, kotxi ⁴¹ ia atoko itxana:

Hĭkenakota, hĭte Teoso sākire napetakanii. Hātamariko niposotiire, iuaritika hĭpinako, kotxi lhāuikari nĭparĭka hĭte sauaki. Āti sāpiretiniāri nĭparĭka, iuaritika lhāuikari.

Ikara atoko itxa Paoro sākire ninoamoni.

⁴² Xoteoakori pokĭkasaaki Xoteo apotiitiniua aapokotxiti, iusaaki Xoteo minakaniua aiatana Paoro, Panapee pakini iuaĭkana tomatiko ōti ĩkari Teoso sākire isāpiretinina ĩkapani. ⁴³ Kākiti apotiitakaniua potorika atoko, itomaneri Xoteo, Xoteo minakaniua Teoso sākire auĭākani pakini sari Paoro, Panapee pakinikata. Paoro, Panapee pakini misākiretana ninoa. Ōtākikana ninoa, ikiniōtika atāo ikaminina, kotxi Teoso iteene tĭretana ninoa.

⁴⁴ Ininiā āti tomatiko ōtisaaki ikinimane iua sitatxiti auakani apoka Apiananiri sākire ikenakotinina ĩkapani. ⁴⁵ Xoteoakori atapari itomaneri kākiti apokaāpotini Paoro, Panapee pakini sāpiretakiti ikenakotinina ĩkapani. Ininiākara ninoa xikotana Paoro, Panapee pakini. Imisākirepiretana ninoa:

—Na atāo Paoro sākire. !Apakata isākire —itxanātana.

⁴⁶ Iusaaki Paoro, Panapee pakini itaparaxinireritĭkana isākirauatana.

—Ate sāpiretari Teoso sākire hĭte Xoteoakorimoni merepitipanika. Ikara atāo. Txamari hĭte !inirekari. Hĭte atxiĭti !inirekari ātipirika auāki hinini? Ikara atoko ininiā, ate sariko Xoteo minakonimoni, ⁴⁷ kotxi Apiananiri paniātaua ate ia atoko:

Tirikapi atoko inakari hĭtxauako Xoteo minakaniua ĩkapani nisākire atāo ninoa imarotini ĩkapani, ninoa maerekani nimaktxakini ĩkapani, ikini itixiti auakani ikara imarotini ĩkapani,

—itxa Paoro.

⁴⁸ Xoteo minakaniua kenakotakasaakiri ikara Paoro sākire, ipoxokoniatana. Ininiā ninoa:

—Peerekari Apiananiri sākire —itxanātana.

Teoso mereëri kãkiti ãtipirika iuakata auini ïkapani, ininiã iuasaaki kãkiti kenakotakasaakiri Paoro sãkire, ninoa Teoso mereëkini auikari iua sãkire.

⁴⁹ Iuasaaki Teoso sãkire iaripireta ikinipoko iua tixini. ⁵⁰ Txamari Xoteoakori ! apokaerekatari Xoteo minakaniua auikiniri Xesosi sãkire. Ininiã isãpiretarina aãpirena sitoakoro apiatakani Teoso paxitakanimoni, sitatxi auakani auïteakorimoni pakini. Ininiã ikara xika ninoa omanatana Paoro, Panapee pakini. Ininiã iokanatana ãtiãtaã isinina. ⁵¹ Ininiã Paoro, Panapee pakini takanaparì iuaã. Itakanaparina kipatxi ikiti mataã auakari apaka, kotxi kona ninoa nirekaikari Teoso sãkire. Ininiã isana Ikónio sitatxitimoni. ⁵² Átxiokia sitatxiti auakani Xesosi sãkire auiaãkani poxokoniua. Iteene ikamarina Erekarì Matamatakoti nireëkiti.

14

Ikónio Pirena

¹ Paoro, Panapee pakini auakasaaki Ikónio sitatxitiã, isana aiko Xoteo apotiitiniã-taãua. Isãpiretarina Teoso sãkire kãkitimoni, ininiã kaiãopokori Xoteoakori, Xoteo minakaniua pakini auikapiretari Teoso sãkire. ² Txamari apanakini Xoteoakori Teoso sãkire mauiaãkani kamaomanãkaretana Xoteo minakaniua. Ininiã ninoa omanatana Teoso sãkire auiaãkani. ³ Xesosi iokanatakini Paoro, Panapee pakini okanani auana Ikónio sitatxiti. Ninoa sãpiretari Apiananiri pirena itaparaxinireritikana. Isãpiretarina Apiananiri sakiniri ikinipoko erekari maerekanimoni. Apiananiri oerekari isãkirena atão inini, kotxi isikaposotiiretana ninoa, posotiiretxi, kãkiti mimarotakiniti pakini ikaminina. ⁴ Kãkiti sitatxi auakani omanatakakana. Apanakini auikari Xoteoakori sãkire. Apanakini auikari Xesosi iokanatakini sãkire.

⁵ Ininiã Xoteo minakaniua, Xoteoakori pakini, ninoa auïteakorikata imisãkiretakakaua Xesosi iokanatakini imisiritinina ïkapani, kai soroã ikiporonakinina ïkapani. ⁶ Paoro, Panapee pakini kenakotakasaakiri ikiporonakikona pirena, imitekana. Arisitara sitatxitimoni, Tepi sitatxitimoni, Arikaónia tixini isana. ⁷ Iuaã isãpiretarina Teoso iokanapirena erekari kãkitimoni.

Arisitara Pirena

⁸ Arisitara sitatxiti aua kiki petokakititakari iuasaaki. Matïpokotakati. Iponaniãkasaaki, ipetokakititapeka. ⁹ Ikenakotakasaakiri Paoro sãkire, Paoro atamatari iua. Iuasaaki Paoro imarotari iua kiki auikapiretiniri Xesosi sãkire erekape inini ïkapani. Ininiã iteene atamatari iua. ¹⁰ Itapasãkireritika Paoro txari iua:

—Põkitikaua. Pitima —itxari.

Ininiã iuasaakipeka õkitikaua, tïpokota itxa. ¹¹ Iuasaaki kãkiti itikari Paoro kamakiti. Ininiã ninoa akirikata isãkireña, Arikaónia tixini auakani sãkireë:

—Teosoakori apoka atemoni. Kikiakori atoko itxana ninoa.

¹² Ninoa takauãkatari Panapee, Xópite ininiua. Itakauãkatari Paoro Mekório ininiua, kotxi apiata isãkirauata. Panapee poiãoka isãkirauata. Xópite, Mekório pakini teosoakori kamakoni uãka. ¹³ Sitatxi ïronakikoãtaã takote aua Xópite misãkiretiko aikoti. Xópite misãkiretakani auïte iuasaaki minari kema auïteakori, aãui kaiãori pakini sitatxi ïronakikoãtaãmoni. Iuaã iua apanakini kãkitikata nirekari kema auïte okinina Paoro, Panapee pakini ïkapani, iteosone ïkapani okinirina atokotxikana. ¹⁴ Panapee, Paoro pakini imarotakasaakiri ikamakitina tïkane, imatsorakitarina ninoaka mãka, kotxi Teoso ïtxauana.

Ninoa kãkiti itomanerimoni imitekana. Itapasãkireritika itxana:

¹⁵ —Kãkiti, kinirepa ïkora atoko hïtxa? Hïte kikiãkini atokokanera atxa ate. Ate uai apoka teoso kãkiti kamakiti hïtakanapini ïkapani, atão Teoso himarotini ïkapani, kotxi atão Teoso auapininiika inakari itxaua. Iua kamari iaxiti, iaxiti auakani, itixi, itixi auakani, potxoari uiniti, potxoari uiniti ãki auakani pakini. ¹⁶ Kitxakapirïka Teoso auiritana ikinipoko kãkiti inirekaãkitina ikaminina. ¹⁷ Iua Teoso ininiua sãpiretakari kaiãopokori auapika, kotxi erekari Teoso sikakiti kãkitimoni oerekari iua Teoso ininiua. Teoso sikari ãparaã iaxitikiri kãkitimoni. Iua ãparaã oerekari iua Teoso ininiua. Takari

kikio auakari iua sikakiti erekari apaka oerekari kākiti iua Teoso ininiua. Teoso sikari nipokori ikini sereti kākitimoni. Ikara oerekari iua Teoso ininiua. Iua sikapoxokonitari aākixinire. Ikara apaka oerekari iua Teoso ininiua.

¹⁸ Ikara atoko itxana Paoro, Panapee pakini, iuaritika kākiti nirekapanikari okiniri kema auite Paoro, Panapee pakini ikapani. Itapararitika Paoro, Panapee pinitana ninoa, ininiã likamarina. ¹⁹ Eereka Xoteoakori Átxiokia sitatxitikini, Ikónio sitatxitikini pakini apoka Arisitara sitatxitimoni. Ninoa kākiti misākiretana Arisitara auakani. Imisākirepiretana Paoro, Panapee pakini, ininiã Arisitara auakani auikari ninoa sākire. Ininiã ikiporonakarina Paoro kai soroã. Eereka ikosekaïtotarina iua sitatxi mapotökire. Ninoa uãkatari iua ipïpe. ²⁰ Iuaritika Xesosi sākire auiaãkani apotiitakasaakia iuakata, Paoro òkitikaua. Sitatximoni kanapiriã itxa. Katimatinikata Paoro, Panapeekata sari Tepi sitatxitimoni.

Ikanapiriãna Átxiokiamoni, Síria Tixiniã

²¹ Paoro, Panapee pakini sãpiretari Teoso iokanapirena erekari Tepi sitatxiti auakanimoni. Ninoa oerekari kaiãopokori kākiti. Eereka Arisitara, Ikónio, Átxiokia pakini sitatxitimoni ikanapiriãna. ²² Iuaã oerekana kākiti Teoso sākire iteene imarotinina ikapani. Ôtãkikana ninoa Teoso sākire iaõka ätipirika ikaminina. Ia atoko Paoro, Panapee pakini oerekana ninoa: “Teoso aãuïtetakasaaki, amisiritiko kaiãopokori amïteenekako.”

²³ Ikinipoko Xesosi sākire auiaãkani apotiitiniãtaãua Paoro, Panapee pakini mereëna ninoa ôtãkikakani. Ninoa kõtãkikarerini iteene auikari Apiananiri sākire. Paoro, Panapee pakini misākiretari Teoso ninoa ikapani. Nipokori itakanapa Teosokata isãkirauatini ikapani iuasaaki.

²⁴ Eereka isipekana. Ïpirixitarina Pisítxia tixini. Eereka Pãpírïa tixinimoni isana. ²⁵ Isãpiretarina Teoso iokanapirena erekari Pexi sitatxiti auakanimoni. Eereka isana Atária tixinimoni. ²⁶ Iuaã iereëtaua maporo ãki Átxiokia sitatxitimoni isinina ikapani. Iuaã Átxiokia sitatxitiã mitxipeka ninoa iokanataãka Teoso parïka ikaminina ikapani. Iuaãtaã Xesosi sākire auiaãkani misākiretari Teoso ninoa ikapani, Teoso iteene nïkatinina ikapani. Ikara parïkatxi iposope ninoa kamini.

²⁷ Átxiokia sitatxiti apokasaakina, Xesosi sākire auiaãkani imakinika apotiitaua ni-noakata. Ininiã Paoro, Panapee pakini sãpiretari ikinika Teoso kamakiti. Isãpiretarina Teoso auiritinina Xoteo minakaniua apaka auikiniri Xesosi sākire. ²⁸ Paoro, Panapee pakini auapokota iuaã Átxiokia sitatxitiã Xesosi sākire auiaãkanikata.

15

Teoso Takaõtxikare Pirena

¹ Átikaka kikiakori Xotéïa tãpakini apoka Átxiokia sitatxitimoni. Ninoa oerekana Xesosi sākire auiaãkani:

—Moisesini paniãtaua Teoso takaõtxikare aïtoã atakini. Txamari hïte !hïtakari, ininiã Teoso !imakatxakari himaerekani —itxana ninoa.

² Paoro, Panapee pakini txana ninoa:

—Na atão hïte sākire. Teoso takaõtxikare ninoa ïtoã !auari, iuaritika Teoso makatxakapekari ninoa maerekani —itxana.

Ininiã itaparakienatakakauana ikara sãkiretxiti xika, ininiã ninoa mereëna Paoro, Panapee, ätikaka Xesosi sākire auiaãkani Átxiokia auakani apaka Xerosareëmoni isinina ikapani.

—Iuaã hïsãpiretariko ikara sãkiretxiti Xesosi iokanatakinimoni, kiomãtxiakori pakinimoni. Ninoa sãpiretaua atão —itxana.

³ Iuasaaki Xesosi sākire auiaãkani takapiretanapana ninoa, ininiã Paoro, Panapee, apanakini pakini potorika. Ninoa ïpirixititakasaakiri Penísia tixini, Samaria tãpa pakini, Paoro sãpiretana ikinimanemoni:

—Xoteo minakaniua takanapapekari imaerekani. Inirekarina Teoso paniãtakinoka ikaminina.

Ininiã Xesosi sākire auiaãkani poxokoniuata ikara pirena ikenakotakasaakina.

⁴ Eereka Paoro apanakinikata apoka Xerosareēmoni. Xesosi iokanatakini, kiomātxiakori, apanakini Xesosi sākire auiākani pakini apakapana ninoa. Paoro, Panapee pakini sāpiretari Teoso kamakiti Xoteo minakonimoni. ⁵ Iuusaakipeka ātikaka pariseokori, Xesosi sākire auiākani, apakapapiretana:

—Ninoa Xoteo minakaniua apakapapitikariko Teoso takaōtxikare. Ninoa kamapitikariko Moisesini paniātakiti. Hīsāpiretanako —itxana.

Xesosi Iokanatakini Kiomātxiakorikata

⁶ Ininiā ninoa Xesosi iokanatakini, kiomātxiakorikata apotiitaua, Xoteo minakaniua iñoā Teoso takaōtxikare takiko pirena isākiretinina iġapani. ⁷ Ninoa iteene sākirauataka atoko, iua Petro ōkitikaua, misākireta itxana ninoa:

—Nitariakori hīte imarotari Teoso mereēno nota. Hīte sauaki uatxakapokoikani iua mereēno nota, iua iokanapirena erekari nisāpiretini iġapani Xoteo minakonimoni, ikenakotinina iġapani, auikinirina iġapani. ⁸ Teoso imarotari kākiti ākixinire sākire. Iua sikari Erekari Matamatakoti Xoteo minakonimoni. Ininiākara aimarotari Teoso apakapari Xoteo minakaniua, kotxi isikari Erekari Matamatakoti ninoamoni, atemoni isikini atokotxikana. ⁹ Amaerekani ate ākixinireē Teoso makatxakini atokokanera, Teoso makatxakari imaerekani ākixinireēna, kotxi ninoa auikari Xesosi sākire. ¹⁰ Hīte txīkitakari Teoso omanākaruatini. !Erekari hīkamakiti. Hīte nirekari Xesosi sākire auiākani kaminiri ikinika Moisesi paniātakiti, txamari akiomaneakorini kitxakapirīka ! iposotari ikaminirina Moisesi paniātakiti. Ate apaka !aposotari. ¹¹ Moisesini paniātakiti kamiko !imakatxakari kākiti maerekani. Amaerekani makatxakaāka, kotxi Xesosi Apiananiri iteene tiretaua ate, ininiā aūikari isākire. Ikara atokokana Xoteo minakaniua maerekani makatxakaāka apaka —itxa Petro.

¹² Panapee, Paoro pakini sāpiretana ninoa Teoso kamakiti Xoteo minakonikata auakasaakina, Teoso kamakiti kākiti maposotakinini, posotiiretxi. Ikara isāpiretakasaakina, ikinimane iuaā apotiitakaniua tsorīkaānāta. Masākireninoka itxana. ¹³ Panapee, Paoro pakini sākirauataka atoko, Txiako txari:

—Nitariakori hīkenakotari nota sākire. ¹⁴ Simāo Petro uatxananira isāpiretaua Teoso tiretinina Xoteo minakaniua, kotxi ninoa sauaki imereēna kākiti inakitiakori iġapani. ¹⁵ Teoso sākire sāpiretakani kitxakapirīkarini iōkatsopatapekari ikara atoko inakari sākiretxiti. Ninoa iōkatsopatapekari:

¹⁶ Apiananiri txari: “Eereka nikanapiriā. Noerekai nisāpirena amaneri, notamoni hāpokini iġapani. Hīauīte Taviini auakasaaki, pamimari hāpokini notamoni. Ikara atoko inakari uatxa xipope, aapokotxi irikakari xipokakari atoko itxa. Aapokotxi amaneri atoko nikamako, ininiā apakatapitika kākiti apokini notamoni.

¹⁷ Ininiā ikini uākati nitanoko nota. Xoteo minakaniua nota akiritakini ninakitiakori nitanoko nota.”

¹⁸ Ikara atoko itxa Apiananiri kitxakapirīka kākiti imarotini iġapani, itxa Teoso sākire iōkatsopatakori.

¹⁹ —Ininiā notamoni, !erekari apaniātinina ninoa Xoteo minakaniua, Teoso sākire auiākani, ate kiomaneakorini paniātakiti ikaminina. Ikara atoko inakari pamimari.

²⁰ Maōtākikana ninoa. Maiōkatsopata ninoamoni: “!Hinikapiri nipokori teoso kamakori-moni siākori. Hītanoro minakotokatika !hīsirīkape. Hītaniri minakotikatika hīsirīkape. !Hinikapiri nipokori manotsaātakori xini. Arēkatxi !hiātape, !hinikape.” Ikaranokara maiōkatsopata ninoamoni. ²¹ Ikaranoka aiōkatsopata, kotxi apikomoni Moisesini paniātakiti atatsopataāka aiko āki Xoteoakori apotiitiniātaāua ikini ōti tomatiko ōtisaaki. Moisesini sākire sāpiretaāka ātipirika ikininape sitatxiti, ninoa iteene imarotini iġapani —itxa Txiako ninoamoni.

Iokanatsopatakitina Xoteo Minakonimoni

²² Ninoa Xesosi iokanatakini, kiomātxiakori apaka, ikinimane Xesosi sākire auiākani apaka, ninoa apokaerekatari ātikaka kiki imereinina Ātxiokia sitatxitimoni Paoro, Panapee pakinikata isinina iġapani. Ninoa mereēri Xotasi inakori, Sírasi inakori pakini.

Iua Xotasi uãka Pasapasi inaãka. Xesosi sãkire auiãkani iteene paxitana ninoa ipi.
²³ Xesosi iokanatakini, apanakini pakini iokanataru aãtsopa iõkatsopatakítina Xotasi, Sírsi pakini anikiniri. Ia atoko itxa iua iõkatsopari:

Ate hĩtariakori, Xesosi iokanatakini, kiomãtxiakori apaka, aiokanatsopata hĩte aĩtariakorimoni Xoteo minakonimoni, Ætxiokia sitatxiti auakanimoni, Síria tixini auakanimoni, Sírsia tixini auakani pakinimoni aiokanatsopata. Ereẽkai hĩte.

²⁴ Ate kenakoenetari Xesosi sãkire auiãkani uai auakani sari hĩtemoni. Ninoa txai hĩte: “Hĩtakariko Teoso takaõtxikare hĩitoã. Hĩkamariko Moisesini paniãtakiti. Ikara himakamakanisaaki, Teoso !imakatxakapaniri himaerekani.” Ikara atokora itxaina hĩte. Ininiã hĩte kamaxirexinirenoka hĩtxa. Uatxa kona hĩte imarotari atão hĩkamini. Kona ateni paniãtana ninoa ikara atoko inakari isãpiretiniina hĩte. ²⁵ Ininiãkara ate apotiitaua. Akinika ate apokaerekataru kikiakori amereẽkini hĩtemoni aiokanatinu Panapee, Paoro pakinikata. Panapee, Paoro pakini ate turetakinu. ²⁶ Ninoa kikiakori amereẽkini sipeka monõkoriãtaã Apiananiri Xesosi Kristo paniãtakiti ikaminina ĩkapani.

²⁷ Ate iokanataru Xotasi, Sírsi pakini ninoakata hĩtemoni. Hãpisatoõ ninoa sãpiretaiko ate iokanatsopatakítitxikana. ²⁸ Erekaru Matamatakoti apokaerekatakiti sãkiretxiti, ate apokaerekatakiti sãkiretxiti apaka asãpiretai hĩte uatxa. Paniãtakori apia mimari !apaniãtai hĩte. Ianokara apaniãtakiti sãkiretxiti hĩkamako: ²⁹ “!Hinikapiri nipokori teoso kamakorimoni sikakori. Arẽkatxi !hiãtape, !hinikape. !Hinikapiri nipokori manotsãtakori xini. !Hĩsirĩkape sitokata pĩtanoro minakotokatika. !Hĩsirĩkape kikikata pĩtaniri minakotikatika.” Iuanokara himakamaniã, peerekari. Ereẽpiko, itxa ninoa iõkatsopatakiti.

³⁰ Paoroma, Panapeema, Xotasima, Sírsasima pakini iokanataãka Ætxiokia sitatxiti-moni. Ninoa iuaã apokana. Apotiitana ikinimane Xesosi sãkire auiãkani, ninoamoni sika itxarina iua iõkatsopari. ³¹ Atatsopatakana atoko ipoxokoniuatana, kotxi erekapirenari ninoa iokanapirena. ³² Xotasi, Sírsi pakini Teoso sãkire sãpiretakani itxauana. Ninoa iteene sãkirauata ninoa Xoteo minakaniua isikataparaxiniretinina ĩkapani. Ininiã ninoa Xoteo minakaniua apikomoni auikarina Xesosi sãkire. ³³ Xotasi, Sírsi pakini kaikota iuaãtaã mapaõti. Eereka Xesosi sãkire auiãkani takanapapiretana, Xesosi iokanatakini-moni ikanapiriinina ĩkapani.

—Hĩsipiniikaua erekaxinire hinini —itxana.

³⁴ Iuaritika Sírsi apokaerekataru iuaã ikaikotini. ³⁵ Paoro, Panapee pakini kaikotapanika Ætxiokia sitatxiti. Ninoa apanakinikata oerekari Apiananiri sãkire iua sãkire auiãkanimoni. Isãpiretarina iua sãkire isãkire mimarotakanimoni apaka.

Paoro, Panapee Pakini Iarikini

³⁶ Eereka mapaõtipecta inapaka atoko, Paoro misãkiretari Panapee:

—Makanapiriã ikininape aapokotxitimoni mitxi Apiananiri sãkire asãpiretinimoni. Mamotikaẽtana aĩtariakori atauako erekana atxiiti —itxari Panapee.

³⁷ Panapee nirekaru Xoão Marko inakori anikini ninoakata. ³⁸ Txamaru Paoro ĩnirekaru anikiniri iua.

—Pãpĩria tixini aãuakasaaki, iua Xoão Marko asikaua. !Nirekaikaru atekata iparĩkauatini —itxa.

³⁹ Ikara xika itaparakienatakakauana. Eereka iarikana. Panapee anikaru Xoão Marko. Maporo ãki iereẽtauana Xipri inakori pokomiriĩtimoni isinina ĩkapani. ⁴⁰ Paoro mereẽri Sírsi, iuakata isini ĩkapani. Iuaãtaã Xesosi sãkire auiãkani misãkiretari Teoso, Paoro, Sírsi pakini ĩkapani, Teoso inĩkatinina ĩkapani. Eereka Paoro potorika Sírsikata. ⁴¹ ĩpirixititarina Síria tixini, Sírsia tixini pakini. Aapokotxi apokasaakina, isãpiretari Xesosi sãkire iuaãtaã auakanimoni. Isikataparaxiniretana Xesosi sãkire auiãkani. Ininiã ninoa apia auikaru Xesosi sãkire.

16

Tximótxio Moianatana Paoro, Sírsi Pakini

¹ Paoro sari Tepi sitatxiti. Eereka Arisitara sitatxiti isa. Iuaã aua kiki, Xesosi sãkire auiãkari, Tximótxio inakori. Inoro Xoteo otxaua. Oa apaka auikari Xesosi sãkire. Iri kona Xoteoni. Áti uãka Kreko itxaua. ² Xesosi sãkire auiãkani, Arisitara auakani, Ikónio auakani apaka sãkire: “Peerekari Tximótxio.” ³ Paoro nirekari anikiniri Tximótxio iuakata imoianari íkapani. Ininiã iua takari Teoso takaõtxikare Tximótxio ítoã, kotxi Xoteoakori iuaãtaã auakani imarotari Tximótxio iri Kreko ininiua. ⁴ Paoro imoianariakorikata saãpota ikininape sitatxitimoni. Kãkiti aapoko apokaãpotakasaakina, isãpiretarina ninoa Xesosi iokanatakini sãkire, kiomãtxiakori sãkire pakini. Isãpiretarina ikinimane kãkitimoni. Ninoa sãkire aãtsopaã iókatsopatakori sãkiretxiti isãpiretana ninoa. Paoro imoianariakorikata õtãkikana ninoa ikara isãkirena auikinina íkapani. ⁵ Ininiã ikiniõtika kãkiti apiaãpotape auikiniri Xesosi sãkire. Itomanepaka auikari Xesosi sãkire.

Paoro Taponetari Masetónia Auakari

⁶ Paoro imoianariakorikata ípirixitiãpotari Piríxia tixini, Karásia tixini pakini. Iuasaaki Erekari Matamatakoti !auiritana ninoa Xesosi sãkire isãpiretinina Ásia tixiniã. ⁷ Ninoa apokasaaki Mísia tixini takote, inirekamarina Pitxínia tixini isinina. Erekari Matamatakoti !auiritana isinina Pitxínia tixinimoni. ⁸ Ininiã ninoa ípirixititari Mísia tixini. Apokana Tóatxi sitatxiti.

⁹ Iua íkanõkati Paoro taponeuata. Itaponetari kiki Masetónia tixini auakari. Itimanãta. Amanããnãtari:

—Uaimoni pina Masetónia tixini. Pimoianataua ate —itxari.

¹⁰ Ininiã Paoro taponeuataka atoko, ate xinikari:

—Masapoka Masetónia tixinimoni, kotxi atãoka Apiananiri akiritaua ate Teoso iokanapirena erekari kãkiti ikiraãkinimoni asãpiretini íkapani.

Ininiã aiamata Masetóniamoni asini íkapani.

Arítxia Auikari Xesosi Sãkire

¹¹ Tóatxi ioporokote ate iereẽtaua maporo ãki. Asapitipo Samotirásia ipokomiriíti. Pokatimari õti ate sari Niápori sitatxiti. ¹² Iuaã apotorika. Asari Piriposi sitatxitimoni, Masetónia tixiniã. Masetónia tixiniã iua sitatxi mitari. Piriposi atoko inakari !auari. Iuaã auana kaiãopokori kãkiti Homa sitatxitikini. Ate napari mapaõti iuaã.

¹³ Tomatiko õtisaaki sitatxi ítinikata ate sari uini ítinikata. Ate uãkatari uini ítinikata Xoteoakori apotiitiniãua Teoso imisãkiretinina íkapani. Ininiã ate apoka iuaã. Atãopitika ate uãkatakiti. Aãpokaro Xoteoakoro. Iuaã apotiitauana Teoso imisãkiretinina íkapani, ininiã aítópãka, ninoakata asãkirauatini íkapani. ¹⁴ Sito Arítxia inakoro aua ninoa sitokata. Oa txíta poporeri vëtxitakaro otxaua oa. Txiatxira sitatxitikero oa. Teoso misãkiretakaro oa. Iuasaakipekara okenakotari asãkire. Iuasaaki Apiananiri iteene kamaimaroretaro oa Paoro sãpiretakiti, ininiã oa auikari isãpiretakiti. ¹⁵ Ininiãkara oa, oaãpoko auakani apaka, patxisataãka. Eereka oa aiataua oaãpoko ãki akaikotini:

—Masa naapoko, hĩkaikotini íkapani. Hitemoni atão nauikiniãri Apiananiri sãkire, ininiã notakata hĩkaikota —otxa.

Ikara atoko oa aiataua oakata akaikotini, ininiãkara akaikota oaãpoko.

Paoro, Sírsi Pakini Kateia Áki Auini

¹⁶ Áti õti Teoso misãkiretiko aikotimoni asikasaaki, ataõkitaro ãtokoro iamotakoro. Maerekati matamatakoti auaítotaro oa. Iua maerekati matamatakoti imarotari kãkiti kamakiti apisapanika. Oa amotakani apakaparo ito txineiro oimarore íki. ¹⁷ Oa ãtokoro osapika Paoro tikini, ate tikini apaka. Oãkiritapika:

—Naia kikiakori Teoso nitiriakori. Apiananiri nitiriakori itxauana naia. Oerekauana amaerekani makatxakiko, Teosomoni asini íkapani —otxaãpokata.

¹⁸ Itanaõtika ikara atoko oãkirinãta. Ininiã Paoro maerekaxiniretinoka itxa oãkiritakiti xika. Áti õti isapotorika, paniãta itxari maerekati matamatakoti:

—Xesosi Kristo uãkaã nota paniãtai, pitakanapiniro aroa ãtokoro —itxa.

Iuasaakipeka maerekati matamatakoti takanaparo. ¹⁹ Oa amotakani ikara imarotakasaaki, otsopa imapakapapekaniika oimarore ìki, ininiã imaïkarina Paoro, Sírsasi pakini. Ikosekaïtotana, anikana sitatxi apanïkaki auïtetxiakorimoni. ²⁰ Iuaã apokana. Isãpiretarina Homanoakori:

—Naia kikiakori Xoteo itxauana. !Erekari ninoa oerekapiretakiti, ininiã sitatxi auakani omanãkarauata ninoa sãpiretakiti xika. ²¹ Ate amakinika Homano atxaua. Aimarotapekari aãuiãkiti aãuïte paniãtakiti. Txamari naia oerekaua ipinimonipo inakari akamini ìkapani. Naia oerekaua ãti uãka auiãkiti sãkiretxiti. !Auiritaãka aãuikiniãri naia oerekapiretakiti. !Auiritaãka akaminiri —itxana.

²² Iuasaaki kãkitipokoni iuaã apotiitakaniua nirekari Paoro, Sírsasi pakini iãsokinina. Ninoa auïtetxiakori matsorakitari Paoro mãka, Sírsasi mãka apaka, imakatzakinina ìkapani. Ipaniãtarina apanakini aãpitsaã ixirokitatiko. ²³ Ixirokitatapeëkana atoko, kateia ãki okaãkana Paoroni, Sírsasi pakini. Auïtetxiakori paniãtari iua kateia nïkatakari, inapokopiretiniri imasikakakoni tïkane. ²⁴ Ininiãkara kateia nïkatakari okaraïtotana Paoro, Sírsasi pakini kateia irikoãkixiti. Ieretakari ninoa kiti isikatatxi taopata kamapakotatakori ãki, imakatzakakanina ìkapani.

²⁵ Ìkanõka Paoro, Sírsasi pakini misãkirenãtari Teoso. Ixikaruanãtana Teoso ìkapani. Apanakini kateia ãki auakani kenakonãtari. ²⁶ Iuasaaki katimaritika itixi iakeëkata iteene. Kateia patapi apaka iakeëkata. Iuasaakipeka kateia tore takaka. Iïtxikikona metao kamakori, pirikeri ãki auakani ìtxikikona, karakitakata, katxaka itxa metao. ²⁷ Iuasaaki kateia nïkatakari meraka. Iua atamatariki kateia tore takapeka, ininiã iuãkatari ikinimane kãkiti inïkatakini mitekapeka. Ninoa mitekaãkamako, iua auïte okamariko iua, iparïka imakamakani xika. Ininiã ikosekaro iouata mitaro iuaka iorotiniua ìkapani. ²⁸ Okaaritakasaakiua, Paoro akirikata:

—Kona pokapeua. Uaikareua ate amakinika —itxa.

²⁹ Iua kateia nïkatakari amanaãri tirikapi. Katimaritika ïroã. Ipamaka Paoro, Sírsasi pakini apisatoõ. Ikikinanaãkata. ³⁰ Eereka imipokïkana ninoa. Iua:

—Kiatokopa nikama, nimaerekani Teoso makatzakini ìkapani? —itxana ninoa.

³¹ Ninoa:

—Pauikariko Apiananiri Xesosi sãkire, ininiãkara Teoso makatzakari pimaerekani, paapoko auakani maerekani apaka —itxari.

³² Eereka Paoro, Sírsasi pakini sãpiretari Apiananiri sãkire iuamoni, iua aapoko ãki auakanimoni apaka. ³³ Iuasaaki imaropirïkata kateia nïkatakari arokari ninoa karo. Eereka iua imiakorikata, ìtanorokata patxisataãka. ³⁴ Eereka anikana Paoro, Sírsasi pakini aapoko ãki. Isikakienatana. Iua imiakorikata, ìtanorokata poxokoniuata, kotxi iuasaaki ninoa auikari Teoso sãkire.

³⁵ Katimatinïkata auïtetxiakori iokanatana initiriakori kateiamoni, Paoro, Sírsasi pakini isikakini ìkapani. Ninoa apokasaaki, itxana kateia nïkatakaroni:

—Pauiritana Paoro, Sírsasi pakini isinina.

³⁶ Ininiã iua kateia nïkatakari sãpiretari Paoro:

—Niauïteakori iokanapireta notamoni hïte nisikakini ìkapani. Ininiãkara hïsipiniikaua erekaxinirepeka hinini —itxana.

³⁷ Txamari Paoro txari auïtetxiakori nitiriakorimoni:

—Ari, Homanoakorikareua ate, iuaritika auïtetxiakori Homanoakori iaritataua ate ikinimane apisatoõ. Maxikatïka ninoa iaritataua ate. !Akamari maerekati. Eereka kateia ãki ninoa okaua ateni. Uatxa ninoa nirekari iokanatinuua ate ikinimane mimarotakinipatika. Konapitini. Ninoapitikarako inari uai. Ninoa makatzakaua ate uai —itxa Paoro ninoamoni.

³⁸ Ninoa kikiakori kanapiriã iauïteakorimoni. Isãpiretarina Paoro iokanapirena. Ninoa auïteakori imaropiretakasaakiri Paoro, Sírsasi pakini Homano ininiuana, ninoa pïkarauata, kotxi ninoa maxikatïka misiritana Paoro, Sírsasi pakini. ³⁹ Ininiãkara ninoa sari Paoromoni, Sírsasi pakinimoni. Ninoa:

—Ate limarotari hīte Homano hininiua. Aimarotaākamariko !amisiritamaiko —itxana. Eereka ninoa auītetxiakori mipokīkana Paoro, Sírası pakini.

—Sitatxi hītakanapako —itxana.

⁴⁰ Ininiã Paoro, Sírası pakini takanapari kateia. Arítxia inakoro aapokomoni isana. Iuaã aōkitana kākiti Xesosi sākire auĩākani. Paoro, Sírası pakini sikataparaxiniretana ninoa. Eereka isipekana, iua sitatxiti itakanapinina.

17

Tesarónika Sitatxiti Pirena

¹ Paoro, Sírası pakini napari Āpípori sitatxiti. Apikomoni inaparina Aporónia sitatxiti. Eereka apokana Tesarónika sitatxiti. Iuaã aua aiko Xoteo apotiitiniãtaãua. ² Paoro itotapekari Xoteo apotiitiniãtaãua aikotimoni isini. Ininiãkara iua sari iuaã. Ipi āti pakini ōti tomatiko ōti, isari iuamoni. Iuasaaki Teoso sākire iōkatsopatakori isāpireta kākitimoni iuaãtaã auakanimoni. Ninoa pimarauata, ininiã iua sāpirenauata. ³ Ininiã Paoro txari:

—Teoso sākire iōkatsopatakori oerekaua ate: Teoso mereēkiti misiritaākapitikako, okaākapitikako. Eereka ōkitikapitikauako, iuaīkana auāki inini īkapani. Ia Xesosi hītemoni uatxa nisāpirenātakiti Teoso mereēkitipitikara iua —Paoro txana ninoa.

⁴ Ātikaka Xoteoakori auikari Paoro sākire, ininiã Paoro, Sírası pakini moianariakori itxapekauana. Kaiāopokori Akaia tixini auakani Teoso sākire auĩākani, auikari Paoro sākire apaka. Kaiāopokoro sitoakoro, auītetxiakori ĩtanoroakoro, auikari Paoro sākire apaka.

⁵ Xoteoakori, Paoro sākire mauĩākani, xikotari Paoro. Ininiã ninoa apotiitana kākiti kaneenamarini, maparīkauatakani ahoaãtaã auakani. Apotiitana kākutipokoni. Ininiã ninoa akiripoakata, imiteēkatana. Ikinimane sitatxi auakani kenakotari. Neenamtxi atoko itxakatana. Imitekana Xasão inakori aapokomoni. Īroākatana itapararitikana, Paoro, Sírası pakini initinina. Inirekarina imipokīkinirina ninoa kākiti apotiitakanimoni apisatoō. ⁶ Txamari Paoro, Sírası pakini !auari iuaã. Ininiã ikosekaītotarina Xasão. Apanakini Xesosi sākire auĩākani apaka ikosekaītotana. Iauĩteakorimoni anikana. Isāpiretarina iauĩteakorimoni:

—Paoro, Sírası pakini kamari maerekati. Ikini itixiti ikamarina maerekati. Ininiã ninoa uai ate sitatxineēpekarana uatxa. ⁷ Ia Xasão apakapana ninoa. Iua aapoko ikaikotana ninoa. !Ikamarina aauĩte Sesa inakori paniātakiti, kotxi ninoa oerekari kākiti āti auītetxi ininiãua, Xesosi inakori —itxana iauĩteakorimoni.

⁸ Ikara sākiretxiti ikenakotakasaakina, kākiti apotiitakaniua akiripoakata. Auītetxiakori !imarotari ikamakitina tīkane. ⁹ Eereka auītetxiakori misākiretana Xasão, apanakinikata:

—Hīikitxitana hīsikakiko īkapani. Eereka auiritaina hīsini.

Ininiã eereka auiritana isinina.

Peréia Sitatxiti Pirena

¹⁰ Kikatapeka inakasaaki, Xesosi sākire auĩākani iokanatana Paoro, Sírası pakini Peréia sitatxitimoni. Iuaã Peréia sitatxiti ninoa apoka atoko, ĩroãna aikoã Xoteo apotiitiniãtaãua. ¹¹ Kākiti iuaã auakani iteene nirekari Paoro sāpirena ikenakotinina. Tesarónika auakani !atokoni itxana ninoa. Ikiniōtika ninoa atatsopatarari Teoso sākire iōkatsopatakori, kotxi inirekarina imarotininirina:

—Paoro sākire atão atxiīti? —itxana.

¹² Ininiã kaiāopokori Xoteoakori auikari Xesosi sākire. Kaiāopokoro sitoakoro Akaia tixini auakani apaka auikari Xesosi sākire. Naia sitoakoro auītetxiakori ĩtanoroakorokara. Kaiāopokori kikiakori Akaia tixini auakani apaka auikari Xesosi sākire. ¹³ Eereka Xoteoakori Tesarónika sitatxiti auakani kenakopiretari Paoro sāpiretiniri Xesosi sākire Peréia sitatxitiã. Ininiã ninoa sari Peréia sitatxitimoni. Apokaākana atoko, itxīkitakarina kākiti ahoaãtaã apotiitakaniua Paoro omanatinina īkapani. ¹⁴ Ikara atoko ininiã, Xesosi

sáikire auiáikani iokanatari Paoro potxoari uunitimoni. Síراسي, Tximótxio pakini kaikotapanika Peréia sitatxiti. ¹⁵ Paoro moianatakani anikari iua Atena sitatxitimoni. Eereka ninoa kanapiriá Peréia sitatxitimoni. Paoro iokanapireta Síراسي, Tximótxio pakinimoni: —Katimariá hinako —itxa.

Atena Sitatxiti Pirena

¹⁶ Ininiá Atena sitatxitiá Paoro iátapari Síراسي, Tximótxio pakini apokini. Iusaaki Paoro itikari kaiáopokori teoso kákiti kamakiti. Sitatxi xápoka kákiti teosonenoka. Ia xika Paoro matinaniuata. ¹⁷ Ininiákara Paoro oerekari Teoso sáikire Xoteoakorimoni aiko áki Xoteo apotiitiniátaáua. Xoteo minakaniua, Teoso sáikire auiáikani apaka, Paoro oerekari Teoso sáikire iuaátaá. Ninoa pimarauata, ininiá imisáki-retakakana Teoso sáikire ixinikinina íkapani. Ikiniótika Paoro oerekari Teoso sáikire kákitimoni, nipokori iamotikoátaá sikanimoni. ¹⁸ Kákiti kaxinikaxitirerini, Epikoreo inakoni, Esitóiko inakoni apaka sákirauata Paorokata. Paoro sápiretana ninoa Xesosi pirena. Isápiretana Xesosi ipinini, eereka ókitikiniua, iuaíkana auáki inini pirena. Ininiá átikaka:

—Natokopa itxa ikara inakari sáki-retxiti? Uauato sáikire atoko itxa. !Kiíkiteri iua —itxana.

Apanakinipekana txari:

—Isápiretari áti itixiti auakani teosone pirena.

Paoro Sápirenauata Ariópako Inakoriátaá

¹⁹ Eereka ninoa kaxinikaxitirerini anikari Paoro aiko kákiti apotiitiniátaáua, imirií nopini Ariópako inakoriátaá. Iuaá ninoa txari:

—Ate nirekari aimarotiniiri poerekakiti sáki-retxiti. Mitxi kona ate kenakotari ikara atoko inakari sáki-retxiti. ²⁰ Ipixini poerekakiti sáki-retxiti laimarotapanika. Ipinimonipo itxa poerekakiti. Ininiá pisápiretaua. Poerekaua, aimarotini íkapani —itxarina Paoro.

²¹ Ikara atoko itxana, kotxi ikiniótika Atena sitatxiti auakani, apaka áti itixiti íkani Atena kaikotakani nirekari átiátaákiriri sápiretakiti imarotiniina íkapani, ininiá ikiniótika amaneri sáki-retxiti ikenakonátana.

²² Paoro ikinimane apisatoó itima, imirií Ariópako inakoriátaá. Iua txana ninoa:

—Kikiakori, Atena sitatxiti auakanii, nitikapekari híteosone kaiáopokori, ininiá nimarotari iteene hípaxitiniri híteosone. ²³ Ahoaátaá ninapaápotakasaaki, natamatari kaiáopokori híteosone misáki-retikoátaá. Iusaaki natamatari áti híteosonemoni sikakori takikoátaá. Iuaá natatsopatari iókatakori: “Uai Teoso mimarotakoti misáki-retikoátaá.” Iua híteosonetakiti, himimarotakiniti, iuapitikara uatxa nota sápiretai híte.

²⁴ —Iua Teoso kamari itixi. Ikinipoko itixi nopini auakari apaka ikama. Iua Apiananiri. Iua itixi auakani auíte itxaua iua. Iaxiti auakani auíte apaka itxaua iua. !Ikaikota kákiti kamakiti aikotiá. ²⁵ Ikinipokokara auapeka Teosomoni, ininiá !nirekari kákiti kamakiti iua auini íkapani. Teosopitikara txíkitakari kákiti auáki inini. Iuakara sikaxiniretari kákiti. Teosokara sikari ikinipoko kákiti auakiti. ²⁶ Merepitipanika kákiti !auari, eereka Teoso kamari kiki Atáo inakori. Ikini uákati kákititi atokiri itxaua iua Atáo. Teoso iokanatanana ninoa ikini itixitiá auinina. Kákiti mauakani apisapanikara, imereéri kákiti iponaniini óti tíkane. Iaótari kákiti auiniátaá tíkane. ²⁷ Ikara atokora itxa Teoso kamakiti. Teoso txíkitakari kákiti nitiniri Teoso. Initaápotakasaakirina, atxiíti ninoa apokari Teoso, kotxi kona ótakoni aua Teoso. ²⁸ Áti txapekari: “Teoso txíkitakaua auáki anini, atípokotini íkapani. Iua matxíkitakakaniáua auáki anini, !aáuari.” Kaxikarerini híte sauaki auakani txapekari: “Teoso anaakori ate apaka txaua.” ²⁹ Teoso anaakori aniniáua, ininiákara aimarotari kona kákiti kamakiti atoko inakarini !itxaua Teoso. Kona oro kamakorini !itxaua. Kona pirata kamakorini !itxaua. Kona kai kamakorini !itxaua Teoso. Konapitini. ³⁰ Mitxipe kákiti limarotari atáo inakari. Iusaaki Teoso !imisiritana kákiti imimarotakanisaakina. Txamari uatxaika ipaniátari ikininape kákiti ikini itixiti auakani imaerekanina itakanapinina íkapani. ³¹ Ikara atoko Teoso txari ikinimane kákiti, kotxi iua ketotapekari áti óti kákiti misiritiko óti. Xesosi Teoso mereékiti iuakarako sápiretariko kákiti misiritiko ikara óti apokasaaki, kotxi iua imarotari atáo inakari.

Aimarotari Xesosi Teoso mereēkiti ininiāua, kotxi Teoso ōkitikari iua, iuaīkana auāki inini īkapani —Paoro txana ninoa.

³² Xesosi iuaīkana auāki inini pirena ikenakotakasaakina, ātikaka napetari Paoro. Apanakini:

—Ate nirekari pisāpirena iuaīkana akenakotini —itxarina Paoro.

³³ Ininiā Paoro sipe. ³⁴ Apanakinipekana auikapitikari Paoro sākire. Txionísio inakori, Atena sitatxiti auakani auīte, auikari isākire. Apaka sito Tamari inakoro auikari isākire.

18

Korīto Sitatxiti Pirena

¹ Eereka Paoro takanapari Atena sitatxiti. Korīto sitatxitimoni isa. Iuamoni apoka.

² Iuaā aōkitari kiki Ákira inakori. Iua Xoteo. Pōto inakoriātaā iua iponaniā. Itária tixini īkari. !Okanani apoka Korīto sitatxiti. Apoka ītanorokata, Pirisira inakorokata. Ninoa takanapari Itária tixini, kotxi Itária auakani auīte Kráotxio inakori paniātana ikinimane Xoteoakori, Homa sitatxiti itakanapinina. Paoro ianapokota Ákira, Pirisira pakinimoni.

³ Eereka ikaikota ninoakata, kotxi ninoa parīka iua Paoro parīkatxikana. Papiri aamata kamakori kamakani ninoa. Ininiā Paoro kaikota Ákirakata, iuakata iparīkauatini īkapani.

⁴ Ikiniōtika tomatiko ōti, Paoro sari aiko Xoteo apotiitiniātaāua. Iuaā Xoteoakori, Krekoakori pakini apotiitaua. Paoro oerepiretana ninoa Xesosi sākire, isākire auikinina īkapani.

⁵ Síراسi, Tximótxio pakini takanapari Masetónia tixini. Korīto sitatxiti apoākana atoko, Paoro takanapari iparīka papiri aamata kamakori ikamini, Teoso sākire kākitimoni ikiniōtika isāpiretini īkapani. Iua oerekana Xoteoakori Teoso mereēkitipitikara iua Xesosi. ⁶ Txamari ninoa Xoteoakori omanatari Paoro. Ninoa misākirepiretari Xesosi, ininiā Paoro kamaākaretxitana ninoa Xesosi imisākirepiretinina xika. Iōkokari imāka ninoa apisatoō aāpani katxakini īkapani, omanākare oerekini īkapani. Ininiā Paoro txana:

—Teoso !apakapai hīte Xesosi sākire himauikakani xika. Kona nota xikani, kotxi nisāpiretapekamai hīte. Ininiā uatxaika nisāpiretariko Xesosi sākire Xoteo minakoni-moni. Xoteoakorimoni !nisāpiretaikariko —itxa Paoro.

⁷ Ininiākara Paoro takanapana ninoa. Isari Txísio Xósito inakorimoni iua aapoko ikaikotini īkapani. Xoteo minakatiua iua. Teoso misākiretakari iua. Iua aapoko aiko Xoteo apotiitiniātaāua takote aua. ⁸ Aiko Xoteo apotiitiniātaāua sikani auīte Krispo inakori auikari Apiananiri Xesosi sākire. Ītanoro, imiakori apaka, auikari Xesosi sākire. Kaiāopokori kākiti Korīto auakani kenakotari Paoro sāpirena, ininiā eereka ninoa auikapiretari. Ipatxisataākana.

⁹ Āti īkanōkati Teoso txīkitakari Paoro itaponeuatini. Itaponemoni Apiananiri misākiretari iua:

—!Pipīkarauatape. Nisākire pisāpiretapitipo kākitimoni. !Piotokape. ¹⁰ Kotxi nota auapika pitekata. Pikarotakiri !auari, kotxi kaiāopokori kākiti nota nakitiakori īkorapokoriti auari —itxa Paoromoni.

¹¹ Ininiā Paoro kaikota iuaā āti ano, ipixini ano pakinikanani Teoso sākire oerekini īkapani.

Xoteoakori Anikari Paoro Káriomoni

¹² Eereka iuaā Akaia tixini auakani auīte āti ĩroā, Kário inakori. Iua Homano itxaua. Homanoakori auītetari iua. Iuasaaki Xoteoakori apotiitaua. Ninoa maīkari Paoro. Anikarina aiko kākiti misiritiko sāpiretikoātaā. ¹³ Iuaā ninoa txari Káriomoni:

—Ia kiki na atāo oerekari kākiti Teoso paniātakiti kamiko. Ipinimonipo itxa iua oerekakiti. Na aātokiriakorini oerekakiti atokoni itxa. !Auritaāka Paoro oerekapiretakiti —itxana.

¹⁴ Paoro sākirauatini apisapanika, Kário txana Xoteoakori:

—Nisāpiretai hīte Xoteoakori. Paoro kamaākamariko maerekati, nota kenakotamariko apikomoni hīsākiremako. ¹⁵ Txamari !ikamari maerekati. Hīte taparakienatakakaua

hãuikapiretakiti xika, hãtokiriakorini oerekapiretakiti xika. Hïte Xoteoakori. Nota ãti uãka nitxaua, ininiã hïtekara xinikari atão inakari. Kona notani sãpiretai hïte auiãkiti —itxa Kãrio.

¹⁶ Ininiã omitikana ninoa, aiko kãkiti misiritiko sãpiretikoãtaã õpõkikinina ïkapani. ¹⁷ Iuasaaki Krekoakori maïkari Sóseni inakori. Iuani Xoteoakori apotiitiniãtaãua sikani auïte. Krekoakori xirokitatari aãkeẽ aiko kãkiti misiritiko sãpiretikoãtaã apisatoõ. Txamari Kãrio !imaãkatari.

Paoro Kanapiriã Ãtxiokia Sitatxitimoni

¹⁸ Eereka Paoro kaikotapanika mapaõti iuaã Korïto sitatxiti Xesosi sãkire auiãkanikata. Eereka iua takapiretanapana ninoa. Isipe Pisisira, Ákira pakinikata. Iereẽtauana maporo ãki, Síria tixinimoni isinina ïkapani. Sẽkireia sitatxiti apokana. Iuaã Paoro sãpiretari Teoso ikamaenetakiti Teoso ïkapani. Eereka ikixatari ikii ikamaenetakiti ixinikini ïkapani. ¹⁹ Ninoa apoka Épeso sitatxiti. Iuaã Paoro takanapana Pisisira, Ákira pakini. Paoro ïroã aiko ãki Xoteo apotiitiniãtaãua. Iuaã apakapapiretakakaua Xoteoakorikata Teoso sãkire isãpiretinina. ²⁰ Ninoa misãkiretari Paoro ninoakata apikomoni ikaikotini ïkapani. Txamari Paoro linirekari ikaikotini.

²¹ —Nisariko kiiniri Teoso misãkiretiko aikotiã Xerosareẽ. Eereka Teoso nirekiniãri, uai nikanapiriã hïtemoni —itxa Paoro.

Eereka isipe. Iereẽtaua maporo ãki. Épeso sitatxiti itakanapa. ²² Sesaréia sitatxiti apoka Paoro. Eereka isa Xerosareẽmoni. Iuaã apokasaaki, ianapokota Xesosi sãkire auiãkanimoni. Eereka isa Ãtxiokia sitatxitimoni. ²³ Iuaã ikaikota mapaõti. Eereka isipe. Karásia tixini, Piríxia tixini apaka ïpirixitiãpota. Aapokotxi apokaãpotakasaaki, isikapoxokonitana ikinimane Xesosi sãkire auiãkani.

Aporo Pirena

²⁴ Iuasaaki Xoteo Aporo inakori sari Épeso sitatxitimoni. Iua iponaniã Arexãtria sitatxitiã. Paimatireri iua. Imarotari Teoso sãkire iõkatsopatakori imakinika. ²⁵ Iua oerekapeẽkaika Xesosi sãkire, ininiã atão Xesosi sãkire isãpireta kãkitimoni. Ipoxonir-itika isãpirenauata. Txamari kãkiti patxisatiko pirena !iteene imarotapanika. Xoão kapatxisarereri oerekapiretakitinanira imarota. ²⁶ Iua Aporo sãpirenauata itaparaxinireritika aiko ãki Xoteo apotiitiniãtaãua. Iuasaaki Pisisira, Ákira pakini kenakotari isãkire. Eereka anikarina aapokomonina. Oerekarina apikomoni Teoso sãkire imarotini ïkapani. ²⁷ Eereka Aporo:

—Ninirekari Akaia tixinimoni nisini —itxa.

Ininiã Xesosi sãkire auiãkani:

—Ari, erekapitikari pisini.

Ininiã Xesosi sãkire auiãkani, Épeso auakani, iokanatsopatarari itariakorimoni Akaia tixini auakanimoni. Itxana iõkatsopariã: “Hãpakapariko aïtari Aporo inakori.” Aporo apokasaaki Akaia tixini, iteene imoianatana Xesosi sãkire auiãkani. Ninoa auikari Xesosi sãkire, kotxi Teoso iteene turetana ninoa. ²⁸ Ikinimane apisatoõ Aporo oerekana Xoteoakori, Xesosi sãkire mauãkani, Xesosi atãopitika Teoso mereẽkiti ininiua. Teoso sãkire iõkatsopatakoriã iua oerekana Xesosi Teoso mereẽkiti ininiãua. Ininiã Xoteoakori !kasãkirena.

19

Paoro Épeso Sitatxiti Auakasaaki

¹ Aporo Korïto sitatxiti auakasaaki, Paoro ïpirixititari Épeso tõpa Épeso sitatxiti apokini ïkapani. Iuaã aõkitana kãkiti Xesosi sãkire auiãkani. ² Paoro pimaãna ninoa:

—Xesosi sãkire hãuikasaaki, hãpakapatari Erekarari Matamatakoti? —Paoro txana ninoa.

Ininiã ninoa:

—Kiripitipa iua Erekarari Matamatakoti? !Aimarotari —itxana.

³ Ininiã Paoro:

—Kanatokopa inakariãpa hïte patxisataãka, Erekarari Matamatakoti himimarotakani?

Ininiã ninoa:

—Ari, Xoão patxisarauatini atoko inakarikanera ate patxisataãka —itxarina Paoro.

⁴ Ininiã Paoro:

—Xoão patxisatana kãkiti maerekati takanapakani. Itxana ninoa: “Hĩteko iteene aukapiretariko nitikini apokakari, Kristo Xesosi inakori,” Xoão txari kãkiti —itxa Paoro.

⁵ Ikara ikenakotaãkana atoko, ninoa patxisataãka Xesosi Apiananiri uãkaã. ⁶ Iuasaaki Paoro takari imakinika iuako ninoa nopini. Iuasaakipeka ninoa apakapari Erekar Matamatakoti. Iuasaaki ninoa sãkirauata kãkiti ãti uãka sãkireẽ. Isãpiretarina Teoso sãkire kãkitimoni. ⁷ Ninoa kikiakori atxiĩti tosi pakini.

⁸ Ipi ãti pakini kasiriti ikiniõtika aiko Xoteo apotiitiniãtaãua Paoro sãpirenauata itaparaxinireritika. Apanakinikata imisãkirenãtakauana. Paoro nirekana ninoa aukinirina Teoso sãkire, Teoso auĩtetxi ininiãua pirena. ⁹ Txamari ãtikaka ninoa ! inirekari aukapiretinirina, kotxi ! inirekarina ikara atoko inakari sãkiretxiti. Ninoa misãkirepiretari Xesosi sãkire ikinimane kãkiti apisatoõ. Ininiãkara Paoro takanapana ninoa. Anikana Xesosi sãkire auiãkani iuakata. Ikiniõtika Txirano inakori oerekarauatiniãtaã Paoro oerekari Teoso sãkire kãkitimoni. Ninoa pimaaãpotakakaua Teoso sãkire imarotina ãkapani. Apakapapireãpotakakauana. ¹⁰ Iuaã Paoro oerekarauata ipikanani, ininiã ikinimane kãkiti Ásia tixini auakani kenakotari Xesosi Apiananiri sãkire. Xoteoakori, Krekoakori pakini kenakotari.

Sepa Anaakori Pirena

¹¹ Teoso sikaposotiiretari Paoro posotiiretxi ipinimonipo inakari ikamini. ¹² Ikara atoko ininiã ikii mata, imãka iparĩkauatini ãkapani apaka anikaãka amianatakanimoni, ininiã Teoso txĩkitakana amianatakanini erekape ininina. Maerekani matamatakoni auãĩtotiniãri kãkiti, Paoro mãka ninoa kãkiti apakapakasaaki, maerekani matamatakoni sipe.

¹³ Iuasaaki apanakini Xoteoakori, miĩtiakori, maerekani matamatakoni omitiãkani, sari kãkitimoni maerekani matamatakoni omitikinina ãkapani. Xesosi pirena ikenakotana. Ininiã eereka ninoa txari maerekani matamatakoni:

—Apaniãtai hĩsipiniikaua Xesosi uãkaã, Paoro sãpiretakiti Xesosi uãkaã —itxana ninoa.

¹⁴ Iuasaaki aua kiki Xoteo, Sepa inakori. Sasetotxiakori auĩte itxaua. Iua anaakori kiki setxi pakini. Sepa anaakori paniãtana maerekani matamatakoni sini Xesosi uãkaã.

¹⁵ Txamari ãti õti maerekati matamatakoti apakapapiretana ninoa:

—Nota imarotari Xesosi. Nimarotari Paoro. Hĩte !nimarota. Kiniparai hĩte? —itxa maerekati matamatakoti.

¹⁶ Iuasaakipeka kiki maerekati auãĩtotakiti okakataua ninoa nopini. Apataparata iua maerekati. Iuasaaki iua ãsokitakatapena ninoani. Ininiã ninoa miteẽkata, kasarapekana, kakaropekana itxapena.

¹⁷ Ikinimane kãkiti Épeso sitatxiti auakani kenakopiretari ikara ene. Xoteoakori, Krekoakori apaka kenakopiretari ikara ene, ininiãkara ipĩkarauatana. Ikara atoko ininiãkara Xesosi uãka apiata ipaxitaãka. ¹⁸ Kaiãopokori Xesosi sãkire auiãkani apotiitaua. Ikinimane apisatoõ isãpiretarina maerekati mitxi ikamakitina. ¹⁹ Apanakini kasikapõererini apaka apoka iuaã. Iminarina sipapõeretxi apaiaõkiko tsopa. Ikinimane apisatoõ iotikarina. !Inirekaikarina maerekati ikaminina. Iaõtarina ikara aãtsopa ãki. Iki sĩkoẽta mio txineiro ota pirata kamakoro. Kaiãopokoro txineiro. ²⁰ Ikara atoko ininiãpanirako Apiananiri sãkire iaripiretako ikini itixiti. Kaiãopokori kãkiti apiata aukaãpotari Apiananiri sãkire.

²¹ Eereka Paoro ãkixinire txari:

—Nĩpirixititariko Masetõnia tixini, Akaia tixini pakini. Iposo atoko Xerosareẽmoni nisako. Iposo atoko Homa sitatxitimoni nisako —itxa ãkixinireẽ.

²² Iokanatana imoianariakori, Tximótxio, Erásito inakori pakini Masetõnia tixinimoni. Paoro kaikotapanika Ásia tixiniã.

Neenamtxi Épeso Sitatxiti Auini

²³ Iuasaaki Paoro Épeso sitatxiti auakasaaki, kākiti Xesosi oerekapiretakiti manirekakani misākirepireāpotari Paoro, kotxi !inirekarina Xesosi oerekapiretakiti. ²⁴ Iuasaaki kiki Temétxio inakori aua iuaā. Ikamari aiko axapitipikiri inakari. Krekoakori teosone Txiana inakoro misākiretiko aikoti atoko inakari ikama. Kaiāopokori ikama pirata kamakori ivētxitini ikapani. Iua, initiriakori apaka apakaparo txineuropokoni iparíkana iki. ²⁵ Iua Temétxio pīkapiretana ikinimane initiriakori, ninoa kamakitikana kamakani apaka. Temétxio txana:

—Kikiakori, hīte imarotari kaiāopokori txineiro aāpakapa aparīka iki. ²⁶ Hīte kenakotapekari Paoro sāpirenātakiti. Paoro txanāta: “Kākiti kamakiti kona teoso litxaua.” Kona ia tōpananini, kona Épesonanini, ikara atoko itxa. Ikini itixiti Ásia tixini auakanimoni ikara atoko itxa. Kaiāopokori kākiti Paoro sākire auiākani auapeka. Kaiāopokori kākiti !inirekaikari teoso ate kamakiti. ²⁷ Atxiīti kākiti misākirepiretari ate kamakiti. Atxiīti !inirekaikari aparīka. !Ikarananini. Atxiīti kākiti !ipaxitaikari ateosone Txiana misākiretiko aikoti. Ininiā atxiīti kākiti misākirepiretaro oa Txiana. Ikinimane Ásia tixini auakani teosonetaro oa. Ikini itixiti auakani teosonetaro oa —itxa Temétxio ninoamoni.

²⁸ Ninoa kenakotakasaakiri ikara sākiretxiti, omanākarauatana. Ninoa akirikata:

—Txiana, Épeso auakani teosone. Apiananiro oa —itxanātana ninoa.

²⁹ Ikinimane kākiti sitatxi auakani miteēkata, akiriāpokatana. Imaīkarina Paoro moianariakori, Kaio inakori, Arisitako inakori pakini. Ninoa Masetónia tixinikini. Ikosekaītokatana. Imimiteēkatana. Kākiti apotiitiniātaāua aikotimoni anikaākana, miīroā itxana. ³⁰ Ikara Paoro imarotakasaaki, inirekari iroiini kākitekata isākirauatini ikapani, txamari Xesosi sākire auiākani !auritari iua iroiini. ³¹ Átikaka Ásia tixini auakani auīteakori, Paoro tiretakani, iokanapireta Paoromoni:

—Kona piīroāpeko kākiti apotiitiniātaāua aikoti āki —itxarina iokanapirena.

³² Aiko āki ikinimane akiripoananikata. Apanakini akirikatakiti ipinimonipo. Apanakinipekana akirikatakiti ipinimonipo itxanātana, kotxi kaiāopokori kākiti txari:

—Kixikapa aāpotiitaua?

!Imarotarina ixika. ³³ Xoteoakori iuaā apotiitakaniua katikari Arexātri inakori ikinimane apisatoō, isākirauatini ikapani. Iuasaaki ōkitikari iuako kākiti iotokini ikapani, isākire ikenakotinina ikapani. ³⁴ Txamari ninoa imarotakasaakiri Arexātri Xoteo ininiāua, akiripoakatana ipi oara:

—Txiana, Épeso auakani teosone, Apiananiro —itxanātapikana.

³⁵ Eereka auītetxi inakariua apoka ninoa apisatoō. Iua posotari ninoa iotokakini. Itxarina:

—Ikini itixiti auakani imarotari atenokara Épeso auakaninokara nīkatiniri ateosone Txiana misākiretiko aikoti. Apiananiro oa. Ninoa imarotari atenokara nīkatiniri kai oa iito atoko inakari iaxiti katxakakaro. ³⁶ Ikinimane imarotapekari ikara inakari, ininiākara hīotokako. Iteene hīxinikariko hīkamakiti tīkane. Maxikatiīka !hākirinātape. ³⁷ Kotxi hīte minana naia kikiakori uaimoni, txamari !iītirīkarina tiitxi ateosone misākiretiko aikoti āki auakari. !Imisākirepiretarona ateosone. ³⁸ Temétxio, iuakata parīkauatakani pakini, nirekiniāri naia kateiamoni isinina, auapitika aiko kākiti misiritiko sāpiretikoātaā. Auapitika aāuīteakori. Iuaā erekari isāpiretinirina maerekati naia kamakiti. ³⁹ Iuaīkana hītsoatiniā, sitatxi auakani auīteakori apotiitakasaakiaua, hīsāpiretana ninoa himapokaerekatakiniti ninoa ōtākikinii ikapani. ⁴⁰ !Apakata mixikanani himitekini, hākiripoakatini atoko hīkamini. Maxikatiīka hākiripoanāta. Ixika !auari. Atxiīti Homanoakori auīte txitaua maerekati akamakiti xika —itxana ninoamoni.

⁴¹ Eereka ipaniātana ninoa sini.

20

Masetónia Tixini, Akaia Tixini Pakini

¹ Ninoa kākiti apotiitakaniua aapokomonina ikanapiriāka atoko, Paoro pīkapiretana Xesosi sākire auiākani. Imisākiretana. Ikamapoxokonitana. Iposo atoko itakana-papiretana. Isipe Masetónia tixinimoni. ² Īpirixititari Masetónia tixini. Aapokotxi

apokaãpotakasaaki, isãpireãpotari Xesosi sãkire kãkitimoni. Isikataparaxiniretana. Eereka Akaia tixinimoni apoka. ³ Iuaã ikaikota ipi ãti pakini kasiriti. Eereka Paoro ka-iamapeka maporo ãki iereẽtiniua Síria tixinimoni isini ìkapani. Iuasaaki, ikenakopiretari Xoteoakori okaenetiniri iua. Ininiãkara Paoro:

—Masetónia tixinimonikanerako nikanapiriãko —itxa Paoro.

⁴ Sópato inakori Peréia sitatxitikiri sari iuakata. Piho inakori ãkiri itxaua. Arisitako inakori, Sekõto inakori, Tesarónika sitatxitikini, ninoa apaka sari Paorokata. Kaio inakori Tepi sitatxitikiri apaka sari Paorokata. Txíkiko inakori, Tópimo inakori Ásia tixinikini, Tximótxio inakori pakini moianatari Paoro.

⁵ Iuasaaki nota Arókasi inakori iuakata naua. Paoro imoianariakorikata ìkiika isinina. Nota, nimoianariakorikata sari Paoro tikini. Tóatxi sitatxiti Paoro iãtapaua ate. ⁶ Pão miãtiãkati nikiko õti napaka atoko, Piriposi sitatxiti aiereẽtaua maporo ãki Tóatxi sitatxiti asini ìkapani. Síko pakini õti napaka atoko Tóatxi aãpoka. Iuaã aaõkitana Paoro imoianariakorikata. Iuaã anapari ãti semanati.

Paoro Txíkitakari Ipíkari Iuaíkana Auãki Inini

⁷ Tomatiko õtisaaki Xesosi sãkire auíãkani apotiitaua komiri ixanakinina ìkapani, Xesosi ipinini ixinikinina ìkapani. Iuasaaki Paoro oerekanãtari Teoso sãkire. Apaíkanõkapeka isãpirenauatapanika, kotxi katimatiníkata isipe. ⁸ Ate apotiitiniãtaãua aiko inopinita auakari iriko ãki. Iuaã auari kaiãopokori tirikapi poniãkari, ininiãkara papatakari. ⁹ Iuasaaki ãtokori Etxiko inakori topãkanãta inopinita auakari sonaã. Paoro sãpirenauanãtapika, ininiãkara itapo inokaãpotari iua Etxiko. Eereka imaka. Iuasaaki ixipotorika. Xitipeka apoãkata. Ninoa miteẽkata iuamoni isinina, txamari !auaika. ¹⁰ Ininiã Paoro katxaka, sa itxa iuamoni. Isiríka iua ipíkari nopini, imaarata itxari.

—!Hípíkarauatape. Auãkipanikari —itxana ninoa.

Ininiã iuaíkana iua ãtokori auãkipeka itxa. ¹¹ Iposo atoko Paoro kaníka iuaíkana inopinita irikomoni. Komiri inika. Iposo atoko iuaíkana ninoakata isãkirauanãtiniritika katimata itxa. Ikatimataãka atoko isipe Paoro. ¹² Eereka anikarina iua ãtokori aapokomoni. Ninoa iteene poxokoniuata iua auãkipanika inini.

Miretomoni Síkiko Pirena

¹³ Iuasaaki Paoro paniãtaua ate:

—Híte sari maporoã Asosi sitatxitimoni. Imiriĩrako nota sari. Iuaã nota iereẽtaua hítekata —itxaua ate.

Ininiã ate sari iua apisa. ¹⁴ Asosi sitatxiti Paoro aõkitaua ate. Iereẽtaua maporo ãki. Iposo atoko asa Mitxireni sitatxitimoni. ¹⁵ Iuaãtaã aãpokasaaki, iuaíkana apotorika. ãti õti napaka atoko, anapari Kio inakori takote pokomiriĩ. ãti õti napaka atoko, Samosi inakori pokomiriĩ aãpoka. Iuaíkana ãti õti napaka atoko, aãpoka Mireto sitatxiti. ¹⁶ Iuasaaki Paoro !inirekari Épeso ioporokoti apokitini, kotxi !inirekari auapokotini Ásia tixiniã. Ikatimaritaua, kotxi iposotiniãri, inirekari Xerosareẽ apokini. Pẽtekósitxi kiiniriti apisapanika apokini inireka.

Xesosi Sãkire Auiãkani Auíteakori Ôtãkikiko

¹⁷ Ininiã Paoro Mireto sitatxiti auakasaaki, iokanapireta Épeso sitatxitimoni. Ipíkapioretana Xesosi sãkire auiãkani auíteakori. ¹⁸ Ninoa apokasaaki, Paoro misãkiretana ninoa:

—Himarotari merepitipanika Ásia tixini napokasaaki, eereka hítekata nauakasaaki, himarotari ikiniõtika nauini hítekata. ¹⁹ Iuasaaki niparíkauata Apiananiri nirekakiti nikamini. Na niuikaua. Iteene nitxiapata. Xoteoakori nirekari okinino, ininiã ni-maxirexinire auapitika iuasaaki, iuaritika nikamari Apiananiri paniãtakiti. ²⁰ Himarotari na nikipatari ipixini Teoso sãkire. Nisãpiretapekai híte imakinika Teoso sãkire híte ereka hinini ìkapani. Kãkiti apotiitiniãtaãua noerekai Teoso sãkire. Apaka nisari ãti haãpokomoni, eereka ãti haãpokomoni, eereka ãti haãpokomoni, nitxaãpota Teoso sãkire noerekini. ²¹ Xoteoakori, Xoteo minakaniua apaka nisãpiretari nimarotakiti

Teoso oerekakiti maerekanitxi itakanapinina íkapani, Teoso paniãtakiti ikaminina íkapani. Nisãpiretari nimarotakiti Teoso oerekakiti, Xesosi Apiananiri sãkire auikinina íkapani.

²² —Ininiã nota sariko Xerosareẽ, kotxi Erekarí Matamatakoti paniãtano nota iuaã nisini. !Nimarotari kiatokouako ninaãkapaniko iuaã. ²³ Ikini sitatxiti nauakasaaki, Erekarí Matamatakoti pinitano: “Piteniko takapeẽkako kateia ãki iuaã. Iuaã pimisiritiko auapitikako,” itxano. Iuananira nimarota Xerosareẽ napokasaaki. ²⁴ Ikara nimsiritiko sãkiretxiti kona mamakari nixinikakiti, kotxi kona nitiretari nauini íkorapokoriti. Xesosi Apiananiri paniãtakiti paríkatxiti ninireka nikamini. Nipoxokoniritika nauini mapotõkirepe nitxako. Xesosi paniãtano Teoso iokanapirena erekarí Teoso tiraõki nisãpiretini kãkiti.

²⁵ —Nisãpiretapekarí Teoso auítetxi ininiãua pirena híte sauaki nauakasaaki. Uatxa nimarotari híte hĩkinika kona hãtamataikanoko nota. ²⁶ Ininiã hĩxinikapikariko nisãkire iaõka uatxa nisãpiretakiti. Kãkiti híte sauaki auakari pĩpinanakinia, Teoso kimapore imimarotakania, kona nota xikani. ²⁷ Kotxi nisãpiretapekai hĩtemoni imakinika Teoso iokanapirena. ²⁸ Erepaniko, katokinani hĩtxako maerekati apokini hĩtemoni. Erekarí Matamatakoti sikapekarí kãkiti hĩtemoni Xesosi sãkire hõerekini íkapani, ininiãkara hinĩkatana ninoa. Soti auíte nĩkatakani atokokana hĩtxauako. Ninoa hĩpiraakori atoko. Ininiã hĩtiretanako ninoa kãkiti, kotxi Teoso nakitiakori itxauana. Teoso ãkiri ipina ninoa íkapani, iua nakitiakori ininiuana íkapani. ²⁹ Nimarotari kãkiti apokapitikako hĩtemoni nota sini tikini. Ninoa nirekarí ixipokinirina hĩparĩka Teoso íkapani. Xapakori patari imaĩkini monõkoni atoko itxako ninoa híte sauaki imonõkoni apokini. Ininiã erepaniko. Katokinani hĩtxako. ³⁰ Áti õti kãkiti híte oereẽkini sãpiretakiti na atãoni. Koketakori sãkiretxiti isãpiretana apanakini Xesosi sãkire auiaãkani. Ikara xika apanakini auikari ninoa sãkire, ininiãkara isanako ninoakata. !Auikaikarina híte sãkire. ³¹ Ininiãkara erepaniko. Hĩxinikariko ipi anokanani ãti anokanani pakini nota õtãkikanãtai híte. Noerekanãtai híte Teoso sãkire íkanõka, pokamara pakini. Ikiniõtika noerekai híte. Nitxiapata nõtãkikasaakii, kotxi nitiretai.

³² —Uatxa nisikai híte Teosomoni, iua nĩkatinii íkapani. Nitakanapari Teoso sãpirena hĩtekata, kotxi iua sãpiretari isikini ikinipoko erekarí. Iuara sikaposotiiretai híte. Iuara sikai híte erekarí inĩkatakiti, inakitiakorimoni isikini íkapani. ³³ !Nixikotari apanakini. !Nimaãkatari itxineirote, imãkana pakini. ³⁴ Híte imarotapitikari notaka parĩkauata imakinika ninireẽkiti, nimoianariakori nireẽkiti apaka niamotini íkapani. ³⁵ Ikara atoko aparĩkauatiniã, atiretana kãkiti maposotakaniua. Nota parĩka oerekepekai híte ikara atoko hĩkamini. Maxinikari Xesosi Apiananiri sãkire. Iua txari: “Teoso takari erekarí kãkitimoni iua amonitakiti apakapakasaaki. Teoso takari apia erekarí sikarauatakaroni,” —Paoro txana ninoa Épesokinimoni, Teoso sãkire auiaãkani auíteakorimoni.

³⁶ Iuasaaki Paoro kapotoreẽkaua ninoakata. Imisãkiretarina Teoso. ³⁷ Ninoa ikinimane txiapakata. Imaarãkarina Paoro, apitxoka itxarina. Itakapiretanaparina. ³⁸ Apiata imatinanina, kotxi Paoro sãpiretana ninoa, !aõkitaikarina iua. Isana iuakata maporomoni.

21

Paoro Sari Xerosareẽmoni

¹ Maporo aãpokasaaki, ate takapiretanapana ninoa Épesokini. Eereka asipeka. Kosi pokomiriĩtimoni asakatapitipo. Iuaã aãpoka. Katimatinĩkata asa Hotxi ioporokotemoni. Eereka Pátara sitatxitimoni asa. ² Iuaã aãpokaro ãto maporo Penísia tixinimoni sikaro, ininiã aiereẽtaua atoko ate potorika asini. ³ Apaniãxiti apokasaaki, aãtamatarí Xipri pokomiriĩti. Anapari Xipri pokomiriĩti asanaremoni. Asari Síria tixinimoni. Aãpokita Txiro sitatxiti, kotxi iuaã tiitxi maporo ãki auakari kaikota. ⁴ Iuaã ate aõkitari kãkiti Xesosi sãkire auiaãkani, ininiã akaikota ninoakata ãti semanati. Ninoa txari Paoro:

—Xerosareẽmoni !pisipe, kotxi Erekarí Matamatakoti sãpiretapekaua ate pimisiritiko tĩkane aua iuaãtaã —itxarina.

⁵ Apotorikini òti apokasaaki, ate sipe iuaíkana maporomoni. Ninoa ikinika, ìtanoroakorokata, imiakorikata, isana atekata sitatxi ìtiniã ioporokomoni. Akinika akapotoreëkuaa ikipatxiteë, misãkireta atxari Teoso. ⁶ Atakapiretanapana iposo atoko, ate iereëtaua maporo ãki. Ninoa kanapiriã aapokomonina.

⁷ Ininiã Txiro sitatxiti atakanapa. Iuaíkana apotorika. Eereka aãpoka Pitoremaita sitatxiti. Iuaã ate misãkiretana kãkiti Xesosi sãkire auiãkani. Akaikota ãti òti ninoakata. ⁸ Katimatiníkata iuaíkana apotorika asini. Eereka aãpoka Sesaréia sitatxiti. Iuaã Piripi inakori aapokomoni asa. Teoso sãkire sãpiretakari itxaua Piripi. Xesosi moianariakori Xerosareë auakasaakina, ninoa mereëri iua Piripi, apikomoni kikiakori seisi pakini, ninoa imoianatinina ìkapani. Ate kaikota Piripi aapoko. ⁹ Piripi auari ipi ipi pakini imiakoro ãtokoropanika. Ninoa apaka sãpiretari Teoso iokanapirena kãkitimoni. ¹⁰ Ate auanapa iuaã mapaõti. Iuasaaki Teoso sãkire sãpiretakari Ákapo inakori Xotéia tõpa potoricakari apoka Piripi aapoko. ¹¹ Ikosekari Paoro makiomatate. Iïtxikari iuako ikitikata. Itxari:

—Erekari Matamatakoti txari: “Xoteoakori Xerosareë auakani iaxirikapiriko ia makiomataretxi nakititakari ia atokokanerako iaxirikiko. Eereka isikarina Xoteo minakonimoni” —Ákapo txaua ate.

¹² Ikara akenakotakasaaki, ate apanakini iuaã auakanikata txari Paoro:

—Paoro koniko !pisipe Xerosareëmoni —atxari.

¹³ Txamari Paoro:

—Kinirepa hitxiapanãta? Hite kamamatinanitano nota. !Nimaãkatari niaxirikiko Xerosareë. !Nimaãkatari nokiko apaka Apiananiri Xesosi nauikini xika —itxaua ate.

¹⁴ !Ikïpitari asãkire. Ininiã ate:

—Iaõpe. Ikara atoko ininiã, ate nirekari Teoso nireëkiti kamiko —atxa.

¹⁵ Mapaõti inapaka atoko, aãiamata Xerosareëmoni asini ìkapani. Eereka apotorika asini. ¹⁶ Apanakini Xesosi sãkire auiãkani Sesaréiakini sari atekata apaka. Menasõ inakori aapoko ninoa anikaua ate, kotxi iuaã anirekari akaikotini. Menasõ Xipri pokomiriitiki. Okananipeka iua auikari Xesosi sãkire.

Paoro Apoka Xerosareë

¹⁷ Xerosareë aãpokasaaki, Xesosi sãkire auiãkani apakapaua ate ipoxokoniritikana.

¹⁸ Katimatiníkata Paoro sari atekata Txiakomoni aianapokotini ìkapani. Ikinimane Xesosi sãkire auiãkani auiteakori aua iuaãtaã. ¹⁹ Paoro misãkiretana. Isãpiretana imakinika Teoso kamakiti Paoro paríkaã Xoteo minakaniua sauaki iparíkauatakasaaki.

²⁰ Ikara ikenakotakana atoko, ninoa txari:

—Peerekari Apiananiri —itxana.

Eereka itxarina Paoro:

—Aítari, pimarotari kaiãopokori Xoteoakori auikini Xesosi sãkire. Ninoa auikari Moisesini oerekakiti sãkiretxiti apaka. ²¹ Apanakini sãpiretapekana ninoa: “Paoro oerekanãtana Xoteoakori, Xoteo minakaniua sauaki auakani, Moisesini oerekakiti itakanapinina ìkapani. Oerekanãtana ninoa Teoso takaõtxikare imiakori ìtoã imatakakani ìkapani. Oerekanãtana ninoa aãtokiriakorini oerekakiti itakanapinina ìkapani.” Ikara atoko itxanãtana ninoa. ²² Ninoa !imarotapanikari pite uai apokini, ininiãkara natokopa atxatari akaminiri, kotxi anirekari ninoa imarotiniri apanakini sãpiretakiti poxiene inini. Anirekari ninoa imarotiniri pite auikapitikari Moisesini oerekakiti. ²³ Ininiãkara ia pikama. Naia ipi ipi pakini kikiakori misãkiretari Teoso. Isãpiretarina Teosomonikari ikamaenetakitina tãkane. ²⁴ Ininiã pisa naiakata Moisesini oerekakiti iaõka hikamini ìkapani, ininiãkara hikipaãtaua Teoso ìkapani. Pite ikitxitari naia kii kixatiko ìkapani. Ikara atoko ininiã, ikinimane imarotariko poxienetapa apanakini sãpiretakiti. Ninoa imarotariko Moisesini paniãtakiti pikamini. ²⁵ Ninoapekana, Xoteo minakaniua Xesosi sãkire auiãkanipekana, ate iokanatsopatapeka ninoamoni. Asãpiretana ate xinikakiti: —!Hinikapiriko nipokori teoso kãkiti kamakiti-moni sikakori. !Hinikapiri arëkatxi. Manotsaãtakori xini !hinikape. !Hísirikape pítanoro minakotokatika. !Hísirikape pítaniri minakotikatika. Ikara atoko atxa ate ninoamoni aiokanatsopatini —itxarina Paoro.

²⁶ Ininiã Paoro anikana ninoa kikiakori. Katimatiníkata ninoa kipaãtaua Teoso ïkapani Moisesini oerekakiti iaõka ikaminina ïkapani. Eereka Paoro ïroã Teoso misãkiretiko aikotiã. Isãpiretari sasetotxi ninoa keto ïttona arokiko xipokini õti, kotxi iusaakiko sasetotxi apakapari ninoa sikakiti Teosomoni.

Paoro Maïkiko

²⁷ Iua semanati kaïamapeka ixipokini inakasaaki, ãtikaka Xoteoakori Ásia tixinikini atamatari Paoro Teoso misãkiretiko aikoti ãki. Ninoa misãkirepiretari Paoro ikinimane kãkiti iuaã apotiitakanimoni, ininiã ninoa sãkire xika ikinimane omanatari Paoro. Eereka imaïkarina Paoroni. ²⁸ Ásia tixinikini akiripoata:

—Hïte Xoteoakori himoianataua ate. Ia kikira oerekari ikini itixitikini omanatinina Xoteoakori. Iara oerekari kãkiti Moisesi paniãtakiti imakamakani. Oerekari kãkiti mapaxitakani ia Teoso misãkiretiko aikoti. ïkorasaaki !ipaxitari ia aiko, kotxi imiïroãna Xoteo minakaniua aiko ãki, ininiãkara itxikotari ia aiko Teoso nakiti —itxanãtana ninoa.

²⁹ Ikara itxana, kotxi mitxi itikarina kiki Xoteo minakatiua Tópimo inakori Épeso sitatxitikiri Paorokata tïpokotini sitatxi apanïkaki. Txamari Paoro !anikari iua aiko ãki. Ininiã iuãkatarina Paoro anikapekari iua aiko ãki. ³⁰ Ininiã iua Paoro maïkiko pirena iaripireta. Ikininape sitatxi auakani kenakoenetakasaakiri ikara, imitekana aikomoni. Imaïkarina Paoro. Ikosekaïtotarina. Teoso misãkiretiko aikotiã imipokiãkatarina Paoro. Iusaakipeka aiko tore totaãkapeka. ³¹ Kãkiti iuaã apotiitakaniua nirekari okiniri Paoro. Sotatoakori Homano inakaniua ninoa auïte kenakoenetari ikinimane Xerosareë auakani neenamauatini. ³² Iusaakipeka sotatoakori auïte anikana sotatoakori. Imitekana Paoromoni. Kãkiti atapakasaakina sotatoakori auïte sotatoakorikata, iusaakiika iotoka Paoro iaritatinina.

³³ Ininiã sotatoakori auïte maïkari Paoro. Ipaniãtana sotatoakori Paoro iaxirikini ipi kohëtxiã. Iposo atoko ipimaãna kãkiti itakote auakani:

—Kiripa ia kiki? Kixikapa ia atoko inaãka? —itxana ninoa.

³⁴ Ininiã ãtikaka iuaã auakani, ia xikara. Apanakinipekana ãti xikara, itxaãponãtana isãkirena. Sãkiretxi kaiãopokori ininiã, iua !imarotari atão ixika. Ikara atoko ininiã, sotatoakori auïte paniãtana sotatoakori, ninoa aapokomoni anikinirina Paoro. ³⁵ Sotato aapokokiri kanikoatxiã apokasaakina, sotatoakori õtanõkari Paoro ïto, kãkiti mamaïkakaniri ïkapani. ³⁶ Kotxi kaiãopokori kãkiti itikini ïkani akiripoakata:

—Hõkariko. Hõkariko —itxanãtana.

³⁷ Paoro sotatoakori aapoko ãki iïroãnapanoka inakasaaki, Paoro txari sotatoakori auïte:

—Apakata pite nimisãkiretini?

Ininiã sotato auïte tikoka.

—Pite imarotari Krekoakori sãkire —itxari Paoro.

³⁸ —Kona piteni Exito tixinikiri pitxataua? Kona piteni kitatiki kamanãtari neenamtxi auïtetxiakori pomanatini? Kona piteni anikatana ipi ipi pakini mio kokanirini ixaminakitekatanã ãparaã makipakaniãtaã? —ipimaãri Paoro.

³⁹ Ininiã Paoro:

—Kona notani. Xoteo nitxaua. Nota Taaso sitatxitikirirano nota. Taaso sitatxiti, sitatxi apiari inakari, Sirísia tixinikiri. Pauiritano nakira kãkiti nimisãkiretini —itxari iua.

⁴⁰ Ininiã sotatoakori auïte:

—Ari, pimisãkiretana.

Inakasaakiri Paoro tima kanikoatxiã. Iusaaki õkitikari iuako kãkiti akiritini iotokini ïkapani, isãkire ikenakotinina ïkapani. Ikinipoko iotokasaaki, iua sãkirauata ninoakata Xoteo sãkireë, Epiráiko sãkireë.

22

Paoro Misãkiretari Xerosareë Auakani

¹ Ininiã Paoro:

—Nítariakori, niriakori, hïkenakotariko nisãkire. Na maerekati na nikama. Erekari-nokara nikama —itxa.

² Ninoa kenakotakasaakiri ninoaka sākireē, Epiráiko sākireē isākirauatini, !akiri-taikana. Itsoríkaātana.

³ Ininiã Paoro:

—Xoteopitikanano nota. Niponaniã Taaso sitatxiti, Sirísia tixiniã. Eereka uai Xerosareē sitatxiti napoka. Uaikara naneē. Iuasaaki koerekareri kimatireri Kamarieo inakori oerekano imakinika. Iua oerekano akiomaneakorini kitxakapiríkarini paniãtakiti imakinika. Nota paríkauata Teoso íkapaninokara, híte paríkauatini atokotxikana.

⁴ Mitxipeka nota kapokotana kãkiti Xesosi sãkire auiãkani, Xesosi kimaporeē sikani. Nimaíkana, kateia ãki oka nitxana. Kiki, sito pakini nimaíka. Nota xika ninoani ipípe. ⁵ Sasetotxiakori auíte apiatakari, Xoteo auíteakori pakini imarotari atãopitika nisãkire. Ninoakara sikano aãtsopa iõkatsopatakitina auítetxiakorimoni Tamásiko sitatxiti auakanimoni nanikini íkapani. Iua aãtsopa auiritano Xesosi sãkire auiãkani nimaíkini. Ininiã nota sari iuaã Xesosi sãkire auiãkani nimaíkini íkapani, Xerosareẽmoni nimikanapiriinina íkapani imisiritikona tíkane.

⁶ —Apaniãxiti Tamásiko sitatxiti takote napokaãpotakasaaki, patimari iotximere iaxitikiri apoka notamoni. ⁷ Xiti nirika. Nikenakotari nakiriuãkatiko: “Saoro, Saoro, kinirepa pite misiritano nota?” itxano.

⁸ —Ininiã nota: “Apiananiri, kiriparai pite?” nitxari.

—Ininiã iua: “Nota Xesosi Nasaree sitatxitikirikanano nota. Pimisiritakitikanano nota,” itxano.

⁹ —Nimoianariakori atamatari iua iotximere, ininiã ipíkarauatana. Na ikenakotarina nota misãkiretakari. ¹⁰ Ininiã nota: “Apiananiri, kipa pinireka pitemoni nikamini?” nitxari.

—Ininiã Apiananiri: “Ereē pitima. Tamásikomoni pisa. Iuaãtaã pisãpiretaãkako imakinika Teoso nireẽkiti pikamini íkapani,” itxa Apiananiri notamoni.

¹¹ —Iua iotximere xika mõiãreti nitxaua. Ininiã nimoianariakori kanõpiãpotano. Anikanona Tamásikomoni. ¹² Iuaãtaã aua kiki Ananíasi inakori. Iua kamapikari akiomaneakorini kitxakapiríkarini paniãtakiti. Ikinimane Xoteoakori Tamásiko auakani iteene paxitari iua. ¹³ Iua ina notamoni. Nota takote apoka itxa. Itxano: “Nitari Saoro, kõiãre pitxako,” itxano nota.

—Iuasaakipeka nota kõiãrepeka nitxa. Natamatari iua. ¹⁴ Iua: “Akiomaneakorini Teosone mereēi pite inirekakiti pimarotini íkapani. Teoso mereēi pite Erekarinoka Kamakari patamatini íkapani. Teoso mereēi pite Erekarinoka Kamakari sãkire pikenakotini íkapani. ¹⁵ Pitekarako sãpiretariko itanapoko kãkitimoni atão Xesosi pirena, patamatakiti, pikenakotakiti pakini. ¹⁶ Ininiã kona okanani pitxape. Põkitikaua. Pipatxisataãkako. Pakiritariko Apiananiri uãka, ininiã iua makatxakari pimaerekani,” Ananíasi txano nota.

¹⁷ Eereka nikanapiriã Xerosareẽmoni. Teoso misãkiretiko aikotimoni nisa. Iuaã Teoso nimisãkirenãtakasaaki, nitaponetari Apiananiri. ¹⁸ Natamatari iua. Itxano nota: “Katima pitxako. Xerosareē posipika uatxapeka. Uai auakani !auikapaniri nota pirena pisãpiretakiti,” itxa.

¹⁹ Ininiã nota: “Apiananiri, nota nitapekana kãkiti pisãkire auiãkani ikini aikoti Xoteo apotiitiniãtaãua. Niãsokapekana. Kateia ãki nitakapekana. Ninoa imarotapitikari ikara nikamakiti. ²⁰ Pite sãkire sãpiretakari Estevão inakori okikosaaki, nota aua iuaã. Iuasaaki niníkatari kokanirini mãka inopinikiri. Nota apokaerekatari okinirina iuani.”

²¹ —Ininiã Apiananiri: “Pisipeka. Õtakoxiti niokanatai Xoteo minakonimoni,” itxano —itxa Paoro kãkitimoni.

Paoro Homano Itxaua

²² Iuasaakipeka Xoteo minakonimoni isini xika, kãkiti iuaã apotiitakaniua !inirekaikarina Paoro sãkire ikenakotinina. Omanãkarauata. Akiripoakatana:

—Hõkariko. !Erekari auapanika inini —itxana.

²³ Akiripoakatana. Iõkokarina imãkana inopinikiri. Kipatxi okarapekatana apaka, kotxi omanãkarauata. ²⁴ Ininiã sotatoakori auíte paniãtana sotatoakori anikiniri Paoro

aiko kaikori āki, sotatoakori aapoko āki. Ipaniātana Paoro ixirokitatiko tīkane, kotxi inirekari imarotini Paoro omanatiko xika. ²⁵ Paoroni iitxikasaakina ixirokitatiko iġapani, Paoro pimaāri sotato itakote timakari:

—Erekari atxiīti hīte xirokitatiniri kiki Homano inakori maxikatiīka? Homano nitxaua. Kixikapa hīte nirekari hīxirokitatinino? —Paoro txari iua.

²⁶ Ininiākara sotato sari iauītemoni.

—Iua kiki amaīkakiti Homano itxaua iua, ininiākara erepaniko iuamoni pikamakiti tīkane —itxari.

²⁷ Ininiā sotatoakori auīte sari Paoromoni.

—Pisāpiretano. Homanokani pitxataua? —itxari Paoro.

Ininiā Paoro:

—Iuapitikanano nota.

²⁸ Sotatoakori auīte txari:

—Nota Homano nitxaua, kotxi niīkitxitari aātsopa īki Homano nininiua iġapani. Pakaroneri.

Ininiā Paoro:

—Niponaniākasaaki Homano nitxapekaua —itxa.

²⁹ Iuasaaki Paoro xirokaaritakani patimari isinina. Sotatoakori auīte pīkarauata, Paoro Homano ininiua imarotakasaaki, kotxi iua paniātana sotatoakori iitxikiniri Paoro.

Paoro Xoteo Auīteakori Apisatoō

³⁰ Katimatiniġkata sotatoakori auīte koxirikari Paoro. Inirekari imarotini Xoteo apoītiniri, ininiā ipīkapiretana sasetotxi auīteakori, Xoteo auīteakorikata. Ipaniātari Paoro itimini ninoa apisatoō.

23

¹ Ininiā Paoro iteene mixinitoōtana Xoteo auīteakori.

—Nitariakori, erekari nikaminiritika, uatxa uai naua. Teoso nireēkitinoka ninireka nikamini. Teoso imarotari ikara, kotxi imarotari nixinikakiti nākixinireē —itxa.

² Sasetotxiakori auīte apiatakari Ananiāsi inakori !ipotxitari Paoro sākire, ininiā ipaniātari Paoro takote auakani aritiniri Paoro sona. ³ Ininiā Paoro:

—Teosokarako aritaiko pite. Aapokotxi tare txitatakori atoko pitxa pite, kotxi mapara peerekai, txamari pākixinireē maerekatinoka. Pite topākanāta ereē nota pikenakotini iġapani akiomaneakorini paniātakiti iaōka pikamini iġapani, txamari pipaniātari niaritiko. Akiomaneakorini na paniātari ikara atoko inakari. Pite kona kamari ninoa paniātakiti —Paoro txari iua auītetxi.

⁴ Paoro takote auakani txitari Paoro:

—!Erekari pimisākirepiretiniri sasetotxi auīte apiatakari Teoso nakiti —itxana.

⁵ Ininiā Paoro:

—Nitariakori, !nimarotari iua sasetotxi auīte apiatakari ininiua, kotxi Teoso sākire iōkatsopatakori txari: “Kona pimisākirepiretapiri hīauīte.”

⁶ Paoro atamatana kākiti iuaā apotiitakaniua. Apanakini satoseoakori itxauana. Apanakini pariseoakori itxauana. Ininiā itapararitika isāpiretana:

—Nitariakori, pariseokarano nota. Pariseo ākirikarano nota. Uai nota minaāka hīte apisatoō, kotxi nota auikari ipīkanipeka ōkitikiniua, iuaīkana auāki ininina iġapani —itxana ninoa.

⁷ Iuasaakipeka pariseoakori, satoseoakori pakini taparakienatakakaua, kotxi pariseoakori auikari Paoro sākire. Satoseoakori !auikari Paoro sākire. ⁸ Kotxi satoseoakori !auikari ipīkari ōkitikiniua, iuaīkana auāki inini iġapani. Kona auikarina Teoso nitiriakori iaxitikini auini. Kona auikarina matamatakoni auini. Pariseoakori auikari ipīkari ōkitikiniua, iuaīkana auāki inini iġapani. Auikarina Teoso nitiriakori auini. Auikarina matamatakoni auini apaka. ⁹ Iuasaaki ikinimane apia akiripoakata. Itaparakienatakakauana. Pariseoakori, kaiōkatsoparerini inakoni, ōkitikaua. Itapararitika itxana:

—Atemoni ia kiki !ikamari maerekati. Atxiīti matamatakoti, atxiīti Teoso nitiri iaxitikiri sākirauata iuakata. Ininiākara !apakata anaiatiniri Teoso —itxana.

¹⁰ Ninoa iteene taparakienatakakauana, ininiã ineenamauaaritana. Sotatoakori auíte pĩkari ninoa okiniri Paoro, ininiã ipaniãtana sotatoakori:

—Hĩsako kãkiti sauaki apanĩkaki. Iuaã himakatzakariko Paoro. Hanikariko sotatoakori aapokomoni —itxana.

Ininiã anikarina iuaã.

¹¹ Áti ĩkanõkati Apiananiri apoka Paoromoni. Paoro takote itima. Itxari:

—Kataparaxinire pitxako. Pisãpiretapekari nota pirena uai Xerosareẽ. Apaka pisãpiretariko nota pirena Homa sitatxiti —itxari.

Xoteoakori Nirekari Okinirina Paoro

¹² Katimatinĩkata apanakini Xoteoakori apotiitaua. Ixinikarina Paoro okini ĩkapani. Ninoa txari:

—!Anipokotapani, !aãtapani, Paoro aõkini apisa —itxana.

¹³ Ninoa Xoteoakori koarẽta apikomoni. ¹⁴ Eereka ninoa sari sasetotxi auíteakorimoni, kiomãtxiakori pakinimoni. Ninoa txana:

—Ate okaenetari Paoro. !Anipokotapani iua aõkini apisa. ¹⁵ Ininiã hĩte aãuĩteakori amanaãriko sotatoakori auíte, imininiri Paoro uai. Hĩsãpiretariko sotato auíte, hinirekari apikomoni hĩpimainiri Paoro. Iuusaaki ate iãtapariko kimaporiã aõkiniri ĩkapani —itxana ninoa.

¹⁶ Paoro itaro ãkiri kenakoenetari Paoro okaenetiko, ininiãkara ĩroã sotatoakori aapoko, sãpireta itxari iritanirimoni. ¹⁷ Ininiã Paoro misãkiretari sotato auíte poiãori.

—Panikari ia ãtokori hĩauĩtemoni. Iminapiretakiti inireka isãpiretiniri iua —itxa.

¹⁸ Ininiã sotato auíte poiãori anikari iua auĩtemoni.

—Ate maĩkakiti Paoro misãkiretano nota, ia ãtokori pitemoni niminini, kotxi inirekari isãkirauatini pitekata —itxari.

¹⁹ Ininiã apiari anikari iuakoã ninoanani auiniãtaã. Ininiã iua:

—Kipa pinireka pisãpiretinino? —itxari.

²⁰ Ininiã iua ãtokori apakapapiretari:

—Xoteo auíteakori nirekari amanainii katana pokamara Paoro panikini ninoamoni. Isãpiretainako pite, inirekapanikarina apikomoni Paoro sãkire ikenakotinina. Txamari paxirari ninoa sãkire. ²¹ !Pauikapena, kotxi koarẽta apikomoni kikiakori kipatauako kimaporiã Paoro iãtapinina, okinirina ĩkapani. Ninoa kikiakori txapeka !inipokotaikana, !iãtaikana, Paoro imokakinina apisa. Ninoa iposopeka kimaporiã iãtapinirina Paoro. Ninoa iãtapari ninoa nirekakiti pikamini —itxari sotato auíte.

²² Ininiã sotato auíte:

—!Pisãpiretapiri notamoni pisãpiretakiti apanakinimoni.

Ininiã iokanatarari ãtokori ikanapiriini aapokomoni.

Paoro Iokanataãka Périsi Inakorimoni

²³ Iposo atoko sotato auíte pĩkapiretana ipi sotatoakori auĩtetxi poiãoni inakanuia. Imisãkiretana:

—Hãpotiitana tosẽtosi sotatoakori ikitiã sikani, setẽta sotatoakori kavaro nopini sikani, tosẽtosi sotatoakori meretaua anikakani pakini. Iposope hĩtxako ia ĩkanõkati novi oara hĩpotorikini Sesaréia sitatxitimoni hĩsini ĩkapani. ²⁴ Kavaroakoro hĩsikari Paoro, oa nopini isini ĩkapani. !Hãuiritapiri Paoro okiko. Hanikari Paoro Homanoakori auĩtemoni Périsi inakorimoni —itxana ninoa.

²⁵ Iposo atoko sotato auíte iõkatsopata:

²⁶ Nota Kráotxio Arisia inakorino iõkatsopata apiarimoni, pite Périsi aãuĩtemoni. Ereẽkai. ²⁷ Ia kiki Paoro inakori Xoteoakori maĩkakiti. Ninoa nirekari okiniri. Nota, nisotatoneakorikata makatzakari iua, kotxi Homano itxaua. ²⁸ Ninirekari nimarotiniri kixikapa ninoa nirekari okiniri Paoro, ininiãkara nanikari iua Xoteoakori auíteakori apotiitiniãtaãua. ²⁹ Iuaã nimarotari ixika !auari kateia ãki ikaikotini ĩkapani. Ixika ! auari ipinini ĩkapani. Ninoa apoĩtari iua ninoa atokiriakorini paniãtakiti imakamakani xika. ³⁰ Nikenakopiretari Xoteoakori okaenetiniri Paoro, ininiã niokanatarari iua

pitemoni. Nipaniātana Paoro apoītakani isāpiretiniina Paoro kamakiti. Iananirako niōkatsopata. Ereēpiko, itxa sotato auīte sākire Périssimoni.

³¹ Sotatoakori auīte paniātiniri atokokana sotatoakori anikari Paoro. Īkanōka anikarina Ātxipatiritxi sitatxitimoni. ³² Katimatinīkata sotatoakori ikitiāna sikani-nanira kanapiriā sotato aapokomoni. Kavaro nopini sikani anikari Paoro apikomoni. ³³ Anikarina Sesaréia sitatxitimoni. Isikarina Paoro iōkatsoparikata auītetximoni, Périssi inakorimoni. ³⁴ Ininiā iua atatsopatari iua iōkatsopari. Iposo atoko ipimaāri Paoro:

—Kitixinepa paua? —itxari iua.

Ininiā Paoro:

—Sirísia tixinikirirano —itxa.

³⁵ Ininiā Périssi txari:

—Pikamapiretakini apokasaaki, nikemariko pisākire —itxa.

Ininiā ipaniātana sotatoakori:

—Erotxini kamakiti aikoti āki hinīkatariko Paoro.

24

Paoro Apoītiko Pirena

¹ Sīko ōti auakasaaki, sasetotxiakori auīte apiatakari Ananíasi inakori sari Sesaréia sitatxitimoni. Apoka iuaā kiomātxiakorikata, kiki Tétoro inakorikata apaka. Iua Tétoro kākiti ĩkapani kasākireri kākiti misiritiko mereēkari apisatoō. Ninoa apoka Périssi apisatoō Paoro apoītinina ĩkapani. ² Ninoa apokasaaki, sotato minari Paoro Périssi apisatoō. Iposo atoko Tétoro akiritaāka isākirauatini ĩkapani. Ininiā Tétoro apoītari Paoro:

—Périssi, apiari pitxaua. Auītetxi kimatireri pitxaua, kotxi mapakanani atixine neenamtxi !auari. Mitxi kaiāopokori maerekati kamakori. Uatxa maerekati poiāōpota, kotxi pite kamari erekari kākiti ĩkapani. ³ Erekapitikari pikamakiti ate ĩkapani. Ate apokaerekatari. ⁴ Kona ninirekari niomakotetini pite, ininiākara nisākire poiōka apikomoni nisāpiretai, ininiā pikenakotari nisākire.

⁵ —Ia kiki !erekari. Pamonoōkoniri. Itxīkitakari Xoteoakori neenamauatini ikini itixiti. Kiki Nasaree sitatxitikiri sākire auīākani auīte itxaua iua Paoro. ⁶ Teoso misākiretiko aikoti imapaxitakanisaaki, ate maīkari iua. Akiomaneakorini oerekini atoko atxamariko Paoro. ⁷ Txamari iusaakipeka sotatoakori auīte Arísia inakori apoka iuaā. Imaktxakari Paoro itapararitika ate sauaki. ⁸ Eereka Arísia paniātaua pitemoni ainini. Pite pimaāriko Paoro, ininiā pimarotari asāpiretakiti inipitika inini —Tétoro txari Périssi.

⁹ Iusaaki Xoteoakori iuaā auakani:

—Ari, inipitikara isākire —itxarina Périssi.

Paoro Sākire Périssi Apisatoō

¹⁰ Iposo atoko Périssi paniātari Paoro isāpirenauatini. Ininiā Paoro: —Nimarotapitikari kona uatxakani ate tixine auakani misiritiko mereēkari pitxaua. Ininiākara nota apokaerekatari pitemoni nisāpiretiniri nikamakiti. ¹¹ Tosi ōti pakini napakari nisa Xerosareēmoni Teoso nimisākiretini ĩkapani. Pipimaāri apanakini atāokani nisākire. ¹² Nanera !ikenakotari nota txitiniri āti Teoso misākiretiko aikoti āki. Ikininape Xoteo apotiitiniātaāua aikoti āki !atamatarina neenamtxi nikamākitakini. Ātiātaā apaka !atamatarina nitxīkitakiniri kākiti neenamtxi ikaminina. ¹³ Nanera maxīkatīka kamapiretano nota. !Itikanona nota maerekati nikamini. ¹⁴ Nota auikari Xesosi sākire. Ia atāo. Naneramoni Xesosi sākire na atāo. Nota parīkauata ate atokiriakorini Teosone ĩkapani Xesosi sākire nikīpitakasaaki. Moisesini paniātakiti apaka nauika. Teoso sākire sāpiretakanini iōkatsopatakiti apaka nauika. ¹⁵ Nanera auikari Teoso ōkitikinina ikininape kākiti ipīkani. Erekarini, maerekani apaka ōkitikauako iuaīkana auāki ininina ĩkapani. Nota apaka auikari ikara. ¹⁶ Ikiniōtika ninirekari atāonoka nikamini Teoso ĩkapani, kākiti ĩkapani apaka.

¹⁷ —Ninapapekari mapakanani átiátaã, eereka nikanapiriã Xerosareẽmoni. Iuaã nisa txineiro ninirmanemoni matxineirotenimoni nanikini íkapani. Apaka iuaã ninirekari nisikaenetakiti Teosomoni nisikini. ¹⁸ Nisikaenetakiti Teosomoni nisikasaaki Teoso misãkiretiko aikoti áki, nikipaãtaua Moisesini oerekakiti iaõka. Iuasaaki Xoteoakori Ásia tixinikini itikano nota. Kãkiti apotiitakaniua !auari notakata iuasaaki. Neenamati ! auari iuasaaki. ¹⁹ Ninoa itikano. Maerekati nikamaãkamako, kinirepa kona ninoa apoka uai uatxa pite isãpiretinina íkapani? ²⁰ Ninoa uai mapokakanisaaki, pipimaãna nanera ikenakotakitina, itikakitina nota Xoteo auíteakori apisatoõ nauakasaaki. Kipa atxiíti nimaerekani iuasaaki? Iuasaaki kona nikamari maerekati. ²¹ Atxiíti iuasaaki nanera ! apokaerekatari nisãkire, kotxi nitxana: “Nota auikari ipíkani õkitikiniua, iuaíkana auãki inini íkapani. Ikara nauikakiti sãkiretxiti xika híte maíkano nota.” Atxiíti nanera ! apokaerekatari ikara nisãkire —itxa Paoro sãkire Pérísomoni.

²² Périsi iteene imarotapekari Xesosi oerekakiti sãkiretxiti. Iua misãkiretana ninoa: —Sotatoakori auíte Arísia inakori apokapanikako uai. Iuasaakiko nisãpiretari kiãtokopa nitxatari Paoro. Uatxa xipope asãkire —itxa Périsi.

²³ Ipaniãtari sotato auíte poiãori inakari Paoro níkatarkari tíkane: —Piníkatarko Paoro. Pauritariko inirekiniãtaã isini. Pauritariko inirimane apokini iuamoni. Pauritariko inirekakiti isikinirina —itxa Périsi.

Paoro Sãkirauata Périsi, Tosira Pakinikata

²⁴ Mapaõti napa atoko Périsi ítanorokata Tosira inakorokata apoka Paoro auiniãtaã. Xoteo oa. Périsi píkapiretari Paoro. Iua apokasaaki, Paoro sãpiretana ninoa Kristo Xesosi sãkire auikiko, ininiã ninoa kenakotari. ²⁵ Paoro sãpiretari Teoso sãkire atão inakari kamiko pirena. Isãpiretari Teoso sãkire ítotxi nireẽkiti amakamakani. Isãpiretari kãkiti misiritiko itixi xipokini õti apokasaaki. Ininiãkara Périsi píkarauata.

—Iaõpe. Pisipe. Áti õti nipařika mauakanisaaki, iuaíkana nipíkapiretai —itxari.

²⁶ Périsi nirekari Paoro sikiniri txineiro iuamoni, isikakiniri íkapani. Ininiãkara itokata ipíkapiretari Paoro iuakata isãkirauatini.

²⁷ Ipikanani napa atoko Póσιο Pésito inakori auítetxi txapekaua, ininiã Périsi sipe. Périsi nirekari Xoteoakori apokaerekatiniri iua, ininiã isini apisa !isikakari Paoro, ininiã Paoro kaikotapanika kateia áki.

25

Paoro Amanaãri Sesakata Isãkirauatini

¹ Pésito aua Sesaréia sitatxiti ipi áti pakini õti, eereka isari Xerosareẽmoni. ² Iuaã sasetotxi auíteakori, Xoteo auíteakori pakini kamapiretari Paoro Pésitomoni. ³ Ninoa iteene amanaãri Pésito:

—Pikamariko ate nireẽkiti. Piminariko Paoro uai Xerosareẽmoni —itxana.

Ikara ninoa nireka, kotxi okaenatarina Paoro ipixinipokoriti. ⁴ Txamari Pésito apakapiretana:

—Kona, Sesaréia sitatxitikarako aua Paoro. Mapaõti napa atoko nota kanapiriã iuamoni. ⁵ Hinirekiniãri, átikaka híte sari iuamoni notakata. Iuaã hísãpiretari Paoro kamakiti maerekati —Pésito txana ninoa.

⁶ Pésito napaři ipi semanati Xerosareẽ. Eereka ikanapiriã Sesaréiamoni. Katimat-iníkata írõã aiko kãkiti misiritiko sãpiretikoãtaã. Iuaã ipíkapiretari Paoro. ⁷ Paoro apokasaaki, Xoteo Xerosareẽkini ákitari iua. Apořtarina iua maerekati kaiãopokori ikamakiti, txamari imaerekani itikakari lauari, kotxi likamari maerekati. ⁸ Eereka Paoro:

—Maerekati na nikama. Xoteoakori aãtokiriakorini paniãtakiti nikamapitika. Teoso misãkiretiko aikoti nipaxitapitika. Homano auíte paniãtakiti, Sesa inakori paniãtakiti nikamapitika —itxa.

⁹ Pésito nirekari Xoteoakori apokaerekatiniri iuaka, ininiã ipimaãri Paoro:

—Pinirekatari Xerosareẽ pisini? Iuaãrako nota kenakotarko nanera sãkire, pite sãkire apaka —itxa.

¹⁰ Txamari Paoro:

—Konapitini. Homano nitxaua. !Apakata Xerosareẽ Xoteoakori apisatoõ nisãkire kenakotiko. Uaikara Homanoakori auĩte Sesa nirekari Homano sãkirauatini kãkiti misiritiko sãpiretakani apisatoõ. Erekaru uai pikenakotiniri nisãkire. Pite iteene imarotari kona xatiki maerekati nikama Xoteoakorimoni. ¹¹ Ixika auiniã nipinini ïkapani, maerekati nikaminiã, ininiã apakata nipinini. Txamari nanera na atão apoĩtano nota, ininiã naneramoni nisikanapakiri !auari. Ninirekari Sesamoni nisini —itxa Paoro sãkire.

¹² Ininiã Pésito sãkirauata iua õtãkikakanikata Paoro Sesamoni isini ïkapani. Eereka apakapapiretari Paoro:

—Pite nirekari Sesamoni pisini, ininiãrako iuamonirako pisa —itxari Paoro.

Pésito Sãkirauata Akiripakata

¹³ Mapaõti napa atoko auĩtetxi Akiripa inakori apoka Sesaréia itaro Perenisi inakorokata. Ninoa ianapokota Pésitomoni. ¹⁴ Mapaõti napa atoko Pésito sãpiretari Paoro Akiripamoni:

—Uai aua kiki kateia ãki Périsi takakiti Paoro inakori. ¹⁵ Xerosareẽ napokasaaki, sasetotxi auĩteakori, Xoteo auĩteakori apaka apoĩtari iua. Inirekarina nota paniãtiniri iua okiko. ¹⁶ Txamari nisãpiretana: “Homanoakori kona okari kãkiti ãti apoĩtakiti, iua apoĩtakiti sãkire imakenakotakani apisa. Merepanika erekari iua apokini iua apoĩtakanikata kãkiti misiritiko mereẽkari apisatoõ, ninoa sãkire kãkiti misiritiko mereẽkari kenakotini ïkapani,” nitxana.

¹⁷ —Paoro omanatakani uai apokasaaki, katimatinĩkata niĩroã kãkiti misiritiko sãpiretikoõtaã. Iuaã nipĩkapiretari Paoro, ininiã iua apoka iua omanatakani apisatoõ. ¹⁸ Ninoa sãkirauata. Apoĩtarina Paoro. Niuãkatari ninoa sãpiretiniri maerekati Paoro kamakiti. ¹⁹ Txamari ninoa auĩãkiti sãkiretxiti xika ninoa omanatari Paoro. Kiki ipĩkari Xesosi inakori xikara apoĩtarina. Paoro auikari Xesosi iuaĩkana auãki inini. Ninoa !auikari Xesosi õkitikiniua.

²⁰ —Iuasaaki na nimarotari nikamakiti tĩkane. Ininiã nipimaãri Paoro: “Na pinirekatari Xerosareẽ pisini? Iuaã pite apoĩtakani, pite pakini kenakotaãkako,” nitxari Paoro. ²¹ Txamari iua apakapapiretano: “Kona. Sesamonira ninireka nisini,” itxano nota. Ininiã notara paniãtari iua kateia ãki ikaikotiniritika niokanatariko Sesamoni —itxa Pésito.

²² Ininiã Akiripa:

—Nota nirekari nikenakotiniri iua kiki sãkire —itxa.

Ininiã Pésito:

—Katanarako pikenakotari iua sãkire —itxa.

Akiripa, Perenisi Pakini Apoka Pésitomoni

²³ Katimatinĩkata Akiripa, Perenisi pakini apoka, itomaneri initiriakorikata. Peeremãkapokona. Iĩroãna kãkiti apotiitiniãtaãua. Sotato auĩteakori, sitatxi auakani auĩteakori pakini iĩroã. Eereka Pésito pĩkapiretari Paoro, ininiã Paoro minaãka. ²⁴ Ininiã Pésito:

—Pite, Akiripa, hĩte atekata apotiitakaniua apaka, hãtamataru ia kiki. Ikinimane Xoteoakori uai auakani, Xerosareẽ auakani apaka !apokaerekataru ia. Isãpiretanona ia maerekati ininiua. Ninoa amanaãno ia okiko. ²⁵ Notamoni maerekati !ikama ia. Notamoni ixika !auari ipinini ïkapani. Eereka ia amanaãno apiaru Sesamoni isini, ininiã nota auiritari isini. ²⁶ Txamari !nimarotari ixika niõkatsopatini Sesamoni. Ininiãkara nimirari Paoro hĩte apisatoõ isãkire hĩkenakotini ïkapani. Akiripa, apiaru pitxaua pite, ininiã ninirekari pite sãpiretinino nota niõkatsopatakiti tĩkane. Ia hĩkenakotaka atoko hĩsãpiretano Sesamoni niõkatsopatini ïkapani. ²⁷ !Apakata kateia ãkikiri Sesamoni niokanatinu ixika nimasãpiretakaniã, kotxi Sesa nirekari imarotiniri ikamakiti xika.

—Nauritai pisāpiretiniua pimaĩkiko xika.

Ininiā Paoro ōkatari iuako isākire isāpiretini ĩkapani. Iposo atoko Paoro sākirauata, maerekati imakamakani ninoa imarotini ĩkapani.

²—Aũĩte Akiripa, notamoni erekari pite apisatoō nisāpiretiniri Xoteoakori apoĩtinino. ³Kotxi pite iteene imarotari ate atokiriakorini oereēkiti, Xoteoakori paniātakiti. Ininiā namanaāi pikenakotiniri nisākire imakinika.

⁴—Xoteoakori imarotano nota ātokoripanika ninakasaakia, nitixine nauakasaaki. Eereka Xerosareē nauakasaaki ninoa imarotano. Imarotarina ikiniōtika nauini. ⁵Mixakapokoni ninoa imarotano nota. Imarotarina pariseo nininiāua. Ikara isāpiretina, inirekiniāna. Kākiti pariseo inakari iteene auikari ate atokiriakorini oereēkiti sākiretxiti.

⁶—Xoteoakori uatxa omanatano nota, kotxi nauikari Teoso sikaenetakiti ate atokiriakorimoni apokapeka uatxa. ⁷Ate nirimane, tosi pakini nirimanetxi, iātapari ikara Teoso sikaenetakiti apokini ōti. Ninoa parĩkauata Teoso ĩkapani ĩkanōka, pokamara pakini. Niauĩte Akiripa, ikara Teoso sikaenetakiti xika Xoteoakori maĩkano nota. ⁸Kinirepa hĩte !auikari Teoso posotiniri ipĩkari ōkitikini, iuaĩkana auāki inini ĩkapani?

⁹—Mĩtxipeka nota omanatari Xesosi Nasareekiri, hĩte omanatiniri atokokana, ininiā nikapokotari isākire auĩakani. ¹⁰Xerosareē nauakasaaki, nikapokotari isākire auĩakani. Sasetotxi auĩteakori auiritano kākiti Teoso nakitiakori kateia āki nitakini. Kaiāopokori nitaka kateia āki. Xoteo auĩteakori nirekasaakiri okinina, nota apaka nirekari. ¹¹Nisari Xoteo apotiitiniua aikotimoni ikininape Xesosi sākire auĩakani nimisiritini ĩkapani. Ninirekari Xesosi sākire auikiko xipokini. Itene nomanatana, ininiākara nisari apanakini sitatxitimoni ninoa nikapokotini ĩkapani.

¹²—Ikara xika nisari Tamásiko sitatxitimoni. Sasetotxi auĩteakori auiritano nisini. Ipaniātanona Xesosi sākire auĩakani nimaĩkini. ¹³Ipixinipokoriti, apaniāxiti iotximere iaxitikiri apoka notamoni. Atokatxi iotximere poiāoka. Ikara iotximere apiata. Iua iotximere āki nota nimoianariakorikata aua. ¹⁴Ate iriākata xitipe. Iusaakipeka nikenakotari nakiritiko: “Saoro, Saoro,” itxano Epiráiko inakori sākiretxitiā. “Kixikapa pimisiritano nota? Piteka pimisiritaua, nota pimisiritakasaaki. Atxiĩti kema auĩteka karotaua ipitikiri aāketeē. Iua kema auĩte atoko pitxa,” itxano.

¹⁵—Ininiā nota: “Apiananiri, kiriparai pite?” nitxari.

—Ininiā iua: “Xesosira nota, pimisiritakitikarano nota. ¹⁶Pitima. Nota oerekaua pitemoni, pite nimereini ĩkapani, ninitiri pininiua ĩkapani. Uatxa pitikakiti pisāpiretako apanakinimoni. Pisāpiretapanikariko ikinimane kākiti apikomoni noerekakiti tĩkane. ¹⁷Ninĩkataiko pite Xoteo sauaki pauakasaaki, Xoteo minakaniua sauaki pauakasaaki apaka. Xoteo minakonimoni niokanatai pisini. ¹⁸Kākiti ipiā sikasi atoko itxana, kotxi !imarotarina Teoso sākire. Mōsiāreni atoko ninoa, kotxi !atamatarina Teoso kimapore. Ininiākara pitekara oerekanako Teoso sākire ikimapore imarotinina ĩkapani, ipiā itakanapinina, ikamaramoni isinina ĩkapani. Ininiākara !ikamaikari Satanasi paniātakiti. Teoso paniātakinoka ikamana eereka. Ininiā ninoa auikariko nisākire, ininiākara nota makatxakariko ninoa maerekani. Ininiā Teoso nakitiakori ninoa apaka txauana,” Xesosi txano nota.

¹⁹—Niauĩte Akiripa, ikara atoko ininiāra, nikamapekari imakinika Xesosi paniātakiti, iaxiti iotximere apokasaaki nikenakotakiti. ²⁰Nisāpiretari Xesosi sākire merepitipanika kākiti Tamásiko sitatxiti auakanimoni, eereka nisāpiretari Xerosareē auakanimoni. Eereka nisāpiretari ikinimane Xotéia tōpa auakanimoni. Eereka nisāpiretari kākiti Xoteo minakonimoni. Nisinimoni nisāpireāpotana ninoa: “Himaerekani hĩtakanapako. Hāuikariko Teoso sākire. Erekarinoka hĩkamako, ininiākara aimarotapitikari maerekati hĩtakanapini,” nitxana. ²¹Ikara atoko nitxana ikinimane nisāpiretini. Ikara nisākire xika Xoteoakori maĩkano nota Teoso misākiretiko aikoti āki nauakasaaki. Kinirāo okaka itxanona. ²²Uatxa nauapanika, kotxi Teoso nĩkatano nota. Ininiā ia ōti Xesosi sākire nisāpireta hĩte apiarinimoni, hĩte poiāorinimoni apaka. Moisesini sāpiretakiti iaōka nisāpireta. Teoso sākire sāpiretakani sāpiretakiti iaōka nisāpireta. Ninoa sāpiretari

Teoso mereëkiti apokini. ²³ Ninoa txari: “Teoso Mereëkiti apokako. Iua misiritaãkako. Iuakarako òkitikaua ipinaka atoko. Iuaikana auãki itxako. Mitxi ipinakari lòkitikaua. Merepanika iua òkitikaua. Iuara sãpiretariko Xoteoakori maerekani makatxakiko, Xoteo minakaniua maerekani makatxakiko apaka,” itxana Teoso sãkire sãpiretakani. Ninoa sãpiretakiti iaòka nota sãpiretai apaka —itxa Paoro.

²⁴ Paoro ikara atoko inakasaaki, Pésito akiritari:

—Paoro, !kiikitei. Pimapitxiriãpota iteene papaiaòkarauatini xika —itxa.

²⁵ Ininiã Paoro:

—Niauïte Pésito, kona nimapitxirita nota. Atãopitikara nisãkire nikama. Erekarì nisãkire. ²⁶ Niauïte Akiripa, pimarotapekari nota sãpiretakiti, ininiã kataparaxinireno nimisãkiretinii. Pimarotari Xesosi pirena, kotxi Xesosi ipikasaaki, kona kipatakoriãtaãni ipina. ²⁷ Niauïte Akiripa, pite auikatari Teoso sãkire sãpiretakani sãkire? Nota imarotari pite auikiniri.

²⁸ Ininiã Akiripa:

—Pite sãkire txikitakaaritano nota Xesosi sãkire nauikini —itxari.

²⁹ Ininiã Paoro:

—Teoso imarotari. Ninirekari pite, hïte hïkinika uatxa nisãkire kenakotakani pakini iteene hãuikiniri Xesosi sãkire nota auikiniri atokotxikana. Txamari kona nota nirekari hïte kateia ãki hãuini nota atoko —itxa Paoro sãkire.

³⁰ Paoro sãkirauataka atoko auïtetxi Akiripa, itaro Perenisi, Pésito, ikinimane ni-noakata ïkani pakini, itimana. ³¹ Iporikiti ipokikasaakina, imisãkiretakakana:

—!Auari ikira kiki okiko xika. !Auari kateia ãki itakiko xika.

³² Ininiã Akiripa txari Pésito:

—Ikira kiki mamanaãkaniãri Sesamoni isini, isikakaãkapiimako.

27

Paoro Potorika Homamoni Isini

¹ Eereka Pésito sãpiretaua ate iketo apope Itária tixinimoni aïpiriãtini. Paoro apanakini maïkakoni apaka sikaãka Xório inakorimoni. Iua Xório seï pakini sotato auïte itxaua. Sesa sotatone itxaua. ² Ate iereëtaua maporo ãki, Ataramítxio sitatxitikero ãki. Ásia tixinimoni sikaro oa maporo. Kiki, Arisitako inakori sari atekata. Iua Tesarónika sitatxitikiri, Masetónia tixinikiri iua Arisitako. Ininiã ate sipe. ³ Katimatinïkata ate apoka Sitoò ioporokoti. Xório tiretari Paoro, ininiã auiritari iua aòkimaneremoni isini iuaã, inirekakiti apakapini ïkapani. ⁴ Eereka ate potorika iuaã. Iuasaaki ïtima inataparata aãpisamoni, ininiã maporo iopiriãri Xipri pokomiriïti ïtima manapakaniãtaã. ⁵ Ate ïpiriãtari potxoari uinïti. Sirísia tixini takote anapa. Pãpírïa tixini takote anapa. Ate apoka Mïha sitatxiti, Arísia tixiniã. ⁶ Iuaã sotato auïte apokaro maporo Arexãtria sitatxitikero, Itária tixinimoni sikaro. Iua iereëtakaua ate oa maporo ãki.

⁷ Iuaikana apotorika. Iuasaaki ïtima inataparata aãpisatoò, ininiã ianaritika asaãpota mapaòtipeka, ininiã eereka aãpoka Sinito sitatxiti apisatoò. ïtima tapara xika ! aposotaika apikomoni asini anirekinimoni, ininiã aiopiriãri Kreta pokomiriïti ïtima manapakaniãtaã. Iuaã anapari Saomona pokomiriïti. ⁸ Ianaritika asaãpota imiriï takote. Aãpoka ioporoko “Ioporoko Erekarì” akiritikoãtaã, Araséa sitatxiti takote.

⁹ Iuaã aãuapokota. Pamonòkoniri apikomoni asini. Kiiniri Teoso ïkapani kãkiti manipokotakani inapapeka, ininiã imarotaãka ïtima kataparari kaïamapeka apokini. Ininiã Paoro òtãkikana ninoa:

¹⁰ —Apikomoni asiniã, pamonòkoniri. ïtima kataparari kasaikamaro maporo atiikata. Kãkiti ipinako —itxa Paoro.

¹¹ Txamari sotatoakori auïte !auikari Paoro sãkire. Iua auikapiretari kamaporoteri sãkire, maporo nïkatakari pakini sãkire. ¹² Kaiãopokori maporo ãki parïkauatakani txari: —Ia ioporoko kona erekarì mitaã anapini. Masa apikomoni. Atxiïti aposota Penisì sitatxitimoni aãpokini. Iuaã manapakakari mitaã —itxana.

Penisì sitatxiti Kreta inakori pokomiriïti ioporokoti. Atokatxi ereëkokini manapi aua Penisì sitatxiti.

Ītima Kataparari Pirena

¹³ Iuasaaki ĭtima poiāoka apokaāpota ate tikinimoni, ininiā ninoa uākatari:

—Uatxaika erekapekari Penisi sitatxitimoni asini —itxana.

Ininiā ōtanōkarina kai, maporo maīkiko, ininiā potorika atxa. Kreta miriīti takote anapaāpota. !Anirekari potxoari uiniti apanīkakiā asini, kotxi pamonōkoniri iuaā. ¹⁴ Txamari patimari ĭtima iteene inataparata Kreta pokomiriītikiri. Ītima uāka “Atokatxi Pokīkinimonikiri.” ¹⁵ Ininiā ĭtima apoka maporomoni. Pataparari. !Aposotari ĭtima ininimoni asini, ininiākara aūiritari ĭtima anikiniro maporo ĭtima sinimoni. ¹⁶ Aiopiriāri Kaota inakori pokomiriīti. Iua pokomiriī xapitiri. Iua pokomiriīti ĭtima kimaporeē aua, ininiā iuasaaki pokomiriī anapakasaaki ĭtima poiāo taparata, ininiākara aōtanōkaro kanaua maporo kapokiāmonikiri. ¹⁷ Akosekaāpotari kanaua maporo āki aeretakini ĭkapani. Ininiā ninoa iapiripoataro maporo aāpitsaā ĭtima katakakitapetiniri monōkoni. Ninoa pīkari ĭtima anikiniro maporo ikipatxite apanīkakiākirimoni. Iua ikipatxite Arīpia tixini takote. Ininiā ikaxitakarina mākatxi mata maporo aniākari. Mākatxi mata kaikotiniā maporo nopini, patimaua ĭtima anikiniua. Ikara atoko ininiā, auiritarina ĭtima anikiniua. ¹⁸ Ītima inataparatanika, ininiā katimatinīkata ninoa okaāpotari tiitxi maporo āki auakari potxoari uinitimoni maporo sakikini monōkoni. ¹⁹ Katimatinīkata okarina maporo tii potxoari uinitimoni.

²⁰ Mapaōti !aātamataikari atokatxi. !Aātamataikari iōriki. Ītima inataparatanika, ininiā auākatari apinini.

²¹ Mapaōtipeka maporo āki parīkauatakani kona inikaikana. Ininiā Paoro misākiretana:

—Kinirepa hīte kona kīpitari nisākire? Kinirepa hīte takanapari Kreta pokomiriīti? Hīkīpitaākamariko nōtākikini, tiitxi kona hōkamako. ²² Iuaritika kataparaxinire hītxako. Nisāpiretai, kona kākiti lipina. Maporonanira sakika. ²³ Nota Teoso nakiti nitxaua. Iua ĭkapani niparīkauata. Minipani iua nitiri iaxitikiri oerekaua notamoni. ²⁴ Teoso nitiri akiritano: “Paoro, !pipīkarauatape. Pite apokapitikako Sesa apisatoō. Peerekari Teoso. Itiretai pite, ininiākara ninoa pitekata sikani !lipinapani,” itxano. ²⁵ Ininiā kataparaxinire hītxako, kotxi nota auikari Teoso sākire. Ikamapitakariko nisāpiretini iāoka. ²⁶ Ītima okaroko maporo ipokomiriī —itxa Paoro sākire ninoamoni.

²⁷ Ipi semanati ĭtima inataparata. Anikaro maporo potxoari uiniti Metxiteháneo inakori ĭpiriātini. Eereka apanīkanōka maporo āki parīkauatakani uākatari imiriī takotepoka aāpokini. ²⁸ Ininiā ninoa okari kai iokaritsaā ĭpanaā imarotinina ĭkapani. Trīta seisi metro ĭpanaā. Eereka apikomoni iaōtarina ĭpanaā, vītxi setxi metronoka. ²⁹ Ininiā ĭpīkarauatana maporo kai mitarimoni oāpokini monōkoni. Ininiā maporo kapokiāmoni ikaxitakarina ipi ipi pakini kai iokaritsaā maporo maīkiko. Eereka imisākiretarina Teoso paītiki ikatimatini ĭkapani. ³⁰ Maporo āki parīkauatakani nirekari maporo itakanapinina. Iokatxakarina kanaua potxoari uinitimoni. Ninoa txaua:

—Iuaīkana kai aiokatxaka uai maporo ĭkiinaā.

Txamari na atāo isākirena. Inirekarina maporo itakanapinina kanaua āki. ³¹ Iuasaaki Paoro txana sotato auīte, sotatoakori pakini:

—Nakira kikiakori maporo āki makaikotakaniā, hīte ipinako —itxa.

³² Ininiā sotatoakori tsotakari aāpitsa kanaua maīkakari, ininiā ĭtima anikari iua kanaua.

³³ Iuasaaki imaropirīkata. Paoro ōtākikana ikinimane inipokotini ĭkapani:

—Ipi semanati hiātapanātari ĭtima napini. Ipi semanati hīteni kona xatiki hinipokota.

³⁴ Ininiā hinipokotako uatxa, hītapara apokini ĭkapani himapinakani ĭkapani. Hīkarotiko !auapani. Hiāko ātika kona katxakapani —itxa.

³⁵ Eereka Paoro kosekari komiri. Ikinimane apisatoō isākirauata Teosokata. Iposo atoko imapixinikari komiri porī, nika itxari. ³⁶ Ininiā ikinimane kataparaxinirepe itxana, ininiā inipokotana. ³⁷ Tosētosi setēta seisi pakini kākiti maporo āki auakani

iuasaaki. ³⁸ Iteene inipokotakana atoko, okarina triko potxoari uinitimoni maporo poana onini íkapani.

Maporo Sakikini Pirena

³⁹ Katimatiníkata maporo áki paríkauatakani atamatarari imirií, txamari !imarotarina itixi uáka. Atamatarina ikipatxite, ininiá ninoa:

—Iuaá kipatxi nopini maanikaro maporo, aposotiniá —itxana.

⁴⁰ Ininiá itsotakarina aábitsa maporo tsapi. Kai kaikota ipatapiá. Ikoxirikarona aábitsa mekotxi maíkiko, maporo oerekaátiko. Iposo atoko ókitikarina mákatxi mata maporo íkiiátinimoni auakari, ikipatxitemoni maporo ítima anikini íkapani. Ininiá ikipatxitemoni asaápota. ⁴¹ Txamari ipixinipokoriti maporo atxapaá ikipatxite nopini. Maporo íkiiátinimoni atxapaá. !Osaika. Tsakati kataparari xika maporo kapokiátinimoni txirakiápota.

⁴² Sotatoakori kiniráo okaka txana ikinimane maíkakoni. !Inirekarina ninoa mitekini imiriímoni anokinina. ⁴³ Sotatoakori auíte !inirekari Paoro okiko, ininiá !auritana. Ipaniátana ikinimane:

—Himarotiniári hanokini, ininiá híte merepanika híkomokako. Hanoka ikipatxitemoni. ⁴⁴ Eereka, híte mimataanoreni híkomokako. Himaíkariko maporo txirata, ininiá hanoka ikipatxitemoni —itxana.

Ikara atoko aniniá, amakinika aápoka ikipatxitemoni.

28

Máota Pokomiriíti Pirena

¹ Imiriípekaua amakinika, eereka aimarotari Máota inakori pokomiriíti aápokini. ² Iuaá auakani apakapaua ipoxokoniritikana. Iuasaaki áparaá potorika ikipini. Áparaá kipini xika patxíkareri, ininiá iuaá auakani kamari xamina, ate irokini íkapani. ³ Iuasaaki Paoro apaka apotiitari xamina. Xamina pokiá itakasaakiri, xamina pataka ópókikari imini xamina iriko áki auakari. Akatsatari Paoro uako. ⁴ Ninoa ipokomirií auakani atamatarari imini Paoro uakoá iarókinini. Ininiá imisákiretakakana:

—Ikira kiki kokaniri atxiíti. !Ipina potxoari uiniti, iuaritika inapakakiniri !auari. Uatxaika ipinapitikako —itxakakana.

⁵ Paoro íkokari imini xamina pokimoni arikini íkapani. !Katsiiri iuamoni. ⁶ Ninoa iátapanátari iuako ananapoatini. Iátaparina iua mokatanitika ipinini. Mapa oara napa atoko !ipina, ininiá ninoa:

—Kona kokaniri ikira. Teoso itxaua —itxanátana.

⁷ Iuaátaá takote aua kikio Pópirio inakori nakiti. Máota pokomiriíti auakani auíte itxaua. Iua apakapaua ate ipoxokoniritika. Akaikota iua aapoko ipi áti pakini óti. ⁸ Iuasaaki iri siríkanáta. Apoomata. Itikanáta. Ininiá Paoro sari iuamoni. Akiritari Teoso iua ereka inini íkapani. Itakari iuako inopini. Iuasaakipeka erekapeka itxa iua. ⁹ Eereka amianatakani iua pokomiriíti auakani sari Paoromoni, ininiá iua makananitana ninoa. ¹⁰ Ninoa sikaua tiitxipokoni. Apotorikasaaki áto maporo áki, isikauana imakinika anireékiti.

Paoro Homa Sitatxiti Isini

¹¹ Ate napari ipi áti pakini kasiriti iuaá. Eereka aiereétaua maporo áki, Arexátria sitatxitikero áki. “Itaritxi Ipi” akiritáka maporo uáka. Mitaásaaki oa maporo kaikota Máota pokomiriíti. ¹² Apotorika iuaá. Eereka aápoka Sirakosa inakori sitatxiti. Iuaá akaikota ipi áti pakini óti.

¹³ Eereka iuaíkana maporo potorika. Aápoka Héxio sitatxiti. Katimatiníkata ítima atikinimonikari ina, ininiá patimari asini. Katimatiníkata aápoka Posoori sitatxiti. ¹⁴ Iuaá aókitana kákiti, Xesosi sákire auiákani. Ninoa amanaáua áti semanati anapini ninoakata. Eereka iuaíkana aiereétaua maporo áki. Iuaíkana apotorika. Homa sitatxiti aápoka.

¹⁵ Xesosi sãkire auiãkani, Homa auakani, kenakoenetari aãpokaenetini, ininiã inana ate aõkitinina ìkapani. Apanakini aõkitaua ate kienatxi amotikoãtaã takote, Ápio inakoriãtaã takote. Apanakini aõkitaua ate kãkiti imakiniãtaã, “Ipi Áti Aapokotxiti” inakoriãtaã. Paoro aõkitakasaakina ninoa, ipoxokoniuata.

—Peerekari Teoso, kotxi naia inari notamoni —itxa Paoro.

Homa Sitatxiti Paoro Apokini

¹⁶ Homa sitatxiti aãpoka atoko, Paoro auiritaãka inirekiniãtaã auini. Átika sotato kaikotapika iuakata isinimoni imarotini ìkapani.

¹⁷ Ipi áti pakini õti napaka atoko, Paoro pìkapiretana Xoteoakori auíteakori. Ninoa apotiitakasaakia, Paoro misãkiretana ninoa.

—Nitariakori, !nikamari maerekati Xoteoakorimoni. Nauikapitikari akiomaneakorini oerekakiti sãkiretxiti. Iuaritika nimaïkaãka Xerosareë. Nisikanapaãka Homanoakorimoni. ¹⁸ Homanoakori pimaãno nimaïkiko xika. Eereka inirekarina isikakinino, kotxi ninoa imarotari ixika !auari nipinini ìkapani. ¹⁹ Txamari Xoteoakori !inirekari Homano sikakinino, ininiãkara nakiritari Sesa nisãkire ikenakotini ìkapani. !Ninirekari nimisãkirepiretiniri ninirimane Xoteoakori. ²⁰ Ikara atoko ininiã, nipìkapiretai hite nimisãkiretini ìkapani. Teoso mereëkiti sãkire, Xoteoakori iãtapakiti sãkire nauikini xika, nota maïkaãka.

²¹ Ininiã ninoa:

—Ate !apakapari iõkatsopari Xotéia tõpakiri pite maerekani pirena. Aítariakori iuaã ìkani !iminapiretari maerekati pikamakiti pirena. ²² Ate nirekari akenakotiniri pite auiãkiti sãkiretxiti, kotxi akenakoenetapekari apanakini sãkire: “Xesosi sãkire na atão” —itxana ninoa.

²³ Ininiã ninoa ketotari áti õti Paorokata aõkitakakiniuana. Iketotiniri manapi ito-maneri kãkiti sari Paoro auinimoni. Paoro ìkanõkapanika sãkirauatapitipo. Ìkanõkapeka auakapanika isãpirenauatini. Isãpiretana Teoso auítetxi ininiãua.

—Atão Teoso ãkiripitikara Xesosi —itxa Paoro sãkire.

Isãpiretana ninoa Moisesi iõkatsopatakiti, Teoso sãkire sãpiretakani iõkatsopatakiti apaka, atão Teoso ãkiripitikara Xesosi ininiãua ninoa imarotini ìkapani. ²⁴ Apanakini auikari Paoro sãkire. Apanakini !inirekari auikinirina Paoro sãkire. ²⁵ Ininiã ninoa taparakienatakakaua Xesosi sãkire auikakani mauikarenikata. Ipotorikinina apisa, iuaïkana Paoro misãkiretana ninoa:

—Erekari Matamatakoti sãkirauata atão hinirimanekata kitxakapirika. Ipaniãtari Teoso sãkire sãpiretakari Isaía inakori isãpiretiniri Teoso sãkire hinirimanemoni.

²⁶ Itxari:

Hisa kãkitimoni. Hisãpiretanako ninoa: “Hikenakotari nisãkire átipirika, txamari !hinirekari himarotiniri nisãkire. Átipirika hítikari nikamakiti, txamari !hinirekari hãuikiniri nota kaminiri ia atoko inakari.”

²⁷ Kotxi kãkiti ãkixinireë !inirekarina imarotinirina nisãkire. !Inirekarina ikenakotinirina nisãkire. !Inirekarina itikinirina nikamakiti. Inirekiniãrina, itikapitakarina nota kamakiti. Inirekiniãrina, atão ikenakotarina nisãkire. Ákixinireëna imarotaãkamariko nota sãkire, inamanako notamoni, ininiã nota txìkitakamanako ninoa ereka ininina,

itxa Teoso sãkire.

²⁸ Paoro sãkirauata iuaïkana ninoakata:

—Ninirekari himarotiniri Teoso iokanapirena erekari kãkiti maerekani makatxakiko pirena iokanapiretaãkapeka Xoteo minakonimoni. Ninoakara auikapitakariko Teoso sãkire.

²⁹ Ikara Paoro sãpiretaãka atoko, ninoa Xoteoakori sipeka. Isikasaakina, itene itaparakienatakakauana Paoro sãkire ikenakotinina xika.

³⁰ Paoro kaikota iuaã ipi anokanani. Ikitxitari kaapokori iua aapoko Paoronoka auini ìkapani. Paoro ipoxokoniritika apakapana ikinimane iuamoni sikani. ³¹ Isãpiretana ninoa Teoso auítetxi ininiãua. Oerekana ninoa Xesosi, Teoso mereëkiti ininiãua,

Apiananiri ininiãua. Isãkirauata itaparaxinireritika kãkitimoni. Auiritaãka ikinipoko imarotakiti isãpiretini.

HOMANO Paoro Iokanatsopatakiti Homa Auakanimoni

¹ Nota Paoro iokanatsopata hitemoni. Xesosi Kristo nitirikarano nota. Teoso mereëno nota iua iokanatakiti kãkitimoni nininiua ïkapani. Iua akiritano nota, Teoso iokanapirena erekari kãkitimoni nisãpiretini ïkapani. Ikara parïkatxinoka inireka nikamini. ² Kitxakapirïka Teoso sãkire sãpiretakani sãpiretaua Teoso sikaenetakiti, iua iokanapirena erekari. Teoso sãkire iökatsopatakoriã ikara atatsopataãka.

³ Ia Teoso iokanapirena erekari sãpiretaua aãuïte Xesosi Kristo Teoso ãkiri ininiua. Kãkiti itxapekaua. Iuusaaki Tavii apika mekaniri itxaua. ⁴ Iuaritika Teoso ãkiri itxaua. Erekari Matamatakoti oerekari kãkiti Teoso ãkiri ininiua Xesosi, kotxi õkitikari Xesosi ipïkaripeka. Iuaïkana aua itxa. Ikara posotiiretxi apiari oerekari kãkiti Xesosi Teoso ãkiri ininiua. ⁵ Xesosi Kristo sikaua ikinipoko erekari. Ininiã iokanataua ikini itixitimoni, kãkiti isãkire asãpiretini ïkapani, isãkire auikinina ïkapani, isãkire iaõka ikaminina ïkapani. Ikara atoko aparïkauata Kristo ïkapani.

⁶ Hitepekana, Teoso akiritai hïte apaka Xesosi Kristo nakitiakori hininiua ïkapani. ⁷ Ininiã nota iokanatsopata hitemoni Teoso tirketakinimoni, Homa sitatxiti auakanimoni. Teoso akiritai hïte iua nakitiakori hininiua ïkapani. Aïri Teoso, Apiananiri Xesosi Kristo apaka sikari ikinipoko erekari hitemoni. Ikamaerekaxiniretai hïte.

Paoro Nirekari Isini Homa Auakanimoni

⁸ Merepanika nitxari niTeosone: “Erekapitikai, kotxi Homa auakani iteene auikari pisãkire. Ikini tõpati auakani kenakopiretari ninoa auikiniri pisãkire,” nitxari Teoso Xesosi Kristo uãkaã. ⁹ Nisãkirauatakasaaki Teosokata, nimisãkiretari Teoso hïte ïkapani. ãtipirika nimisãkiretari Teoso hïte ïkapani. Teoso imarotari ikara nisãkire atão inini. Nota parïkauata Teoso ïkapani. Iuanoka ninireka nikamini. Nisãpiretari iua iokanapirena erekari imi pirena kãkitimoni. ¹⁰ Nimisãkiretakasaakiri Teoso, nitxari: “Pauiritiniãno, ninirekari païtiki Homa auakanimoni nisini. Mïtxi !apakata ninoamoni nisini. Pinirekiniãri iuaã nisini, pimoianatano ninoamoni napokini ïkapani,” nitxari. ¹¹ Iteene ninirekari naõkitinii hïte, kotxi ninirekari Teoso kamataparatiniri hãkixinire nisãkireë. ¹² Ininiã nota kamataparaxiniretaiko hïte, kotxi himarotari nota iteene auikiniri Xesosi sãkire. Apaka hïte kamataparaxiniretano nota, kotxi hïte apaka iteene auikari Xesosi sãkire.

¹³ Nitariakori, ninirekari himarotiniri itokatapiïma naiamatama hitemoni nisini ïkapani, txamari iuusaaki !apakata nisini. Itomaneri kãkiti Xoteo minakanuia ãtiãtaã auakani auikari Xesosi sãkire. Ininiã iua atokotxikana ninirekari kaiãopokori kãkiti hïte sauaki auakani apaka auikiniri Xesosi sãkire. ¹⁴ Nisãpiretari Teoso sãkire ikininapemoni. Nisãpiretari sitatxi auakanimoni. Nisãpiretari ïtopa auakanimoni apaka. Nisãpiretari iökatsopari imarotakanimoni. Nisãpiretari iökatsopari mimarotakanimoni apaka. Ikara niparïka. ¹⁵ Ininiã iposope nitxa nisãpiretiniri Teoso iokanapirena erekari hïte Homa sitatxiti auakanimoni apaka. Ikinika nitaparaã nisãpiretai.

¹⁶ Na nipëtauata Kristo iokanapirena erekari nisãpiretinii, kotxi iua iokanapirena oerekaua Teoso posotiire iua sãkire auiaãkani maerekani imaktxakini ïkapani. Kaposotiireri iua, ininiã imaktxakari ikinimane maerekani, iua sãkire auiaãkani maerekani. Ikara ikaminana Xoteoakori merepanika. Eereka ikaminana Xoteo minakanuia apaka. ¹⁷ Teoso iokanapirena erekari sãpiretaua Teoso txïkitakiniri kãkiti atão inakaranoka ikamini. Teoso sãkire auikikoãnokara, kãkiti txïkitakaãka atão inakaranoka ikamini. Teoso sãkire iökatsopatakori txari:

Kãkiti atão inakaranoka kamakani auini erekari, kotxi ninoa auikari Teoso sãkire.

Kãkiti Kamakiti Maerekati

¹⁸ Teoso iaxiti auakari oerekaua iua omanãkarauatini kãkiti maerekani xika, ininiãkara iua misiritariko kãkiti, kotxi kãkiti !inirekari Teoso paniãtakiti ikamini. Ikamarina

maerekatinoka. Maerekati ikamakasaakina, ikipatarina atão inakari. ¹⁹ Kākiti ikara atoko inakani Teoso misiritanako ninoa, kotxi apakata ninoa atamatiniri iua kamakiti. Teosora oerekapekari ikamakiti kākitemoni iua imarotinina ikapani. ²⁰ Teoso kamari itixi, ininiã kākiti atamatakasaakiri Teoso kamakiti, imarotari kiätokopa itxa Teoso. Matamatakoti itxaua Teoso, iuaritika kākiti atamatakasaakiri ikamakiti, imarotari iua posotiire auapika inini. Imarotari iua Teoso ininiua. Kākiti imarotari ikara atoko inakari itxaua Teoso, iua kamakiti atamatakasaakina. Ininiãkara kākiti imarotapitikari Teoso auini. Ininiãkara na atão kākiti sākire: “Na nimarotari Teoso auini inini.”

²¹ Kākiti imarotari Teoso auini, iuaritika isäpiretarina Teoso: “Atão Teoso pitxaua,” !itxarina. !Isäpiretarina Teoso: “Erekapitikari pikamakiti ate ikapani,” !itxarina. !Kiikitena. !Imarotaikarina atão inakari, kotxi äkixinireëna maerekatinoka aua. ²² Ninoa sākire: “Kimaroreua ate,” txamari !kiikitena. ²³ Teoso mapinakatimoni !itxana: “Pitenokara Teoso txaua,” !itxarina. Kākiti ipinapitika, iuaritika kamakori kākiti atoko inakari imisäkiretana: “Pite ateosone,” itxana. Kamakori kotipiriki atoko inakari, kamakori pirätxi atoko inakari, kamakori imini atoko inakari pakini ninoa misäkireta: “Hite ateosone,” itxana.

²⁴ Ininiãkara Teoso takanapana ninoa. Auiritana maerekati ikaminina äkixinirena nirekaäkiti. Itxiko atoko itxa imaerekanina iitona nireëkiti. Ninoaka na paxitauana iitona, kotxi äti sirika ätikata. ²⁵ !Inirekarina auikininirina atão inakari Teoso sākire. Inirekarina auikininirina atão minakati. Teoso kamakitimoni itxana: “Pite ateosone. Aparikauata pite ikapani,” itxana. Ikinipoko kamakarimoni !itxana: “Pite aTeosone. Aparikauata pite ikapani,” !itxana. Atão inakari kamakani ätipirika txari ikinipoko kamakari: “Peerekai pite.” Ameë.

²⁶ Ikara kākiti maerekani xika, Teoso takanapana ninoa. Auiritana maerekati kākiti kapëta txikitaäkari, iitona nireëkiti ikaminina. Ininiã sito na nirekaikari kikikata osirikini. Sito nirekari äto sitokata osirikini. !Apakata. Ikara maerekati itxaua. ²⁷ Iua atokokana kiki !inirekaikari sitokata isirikini. Kiki nirekari äti kikikata isirikini. !Apakata. Ikara maerekati itxaua. Ininiãkara iitona misiritaäkako imaerekanina xika.

²⁸ Ninoa imaroreë !inirekarina imarotininirina Teoso, ininiã Teoso takanapana. Auiritana ixinikininirina atão minakati. Maerekatinoka ixinikakitina, ininiã ikamarina atão minakati. ²⁹ Äkixinireëna aua ikini sereti maerekati. Iitona nireëkitinoka ikamana. Ätipirika ikamapikarina maerekati. Apanakini nakiti tiitxi atamatakasaakina, inirekarina. Ikamarina maerekati apanakinimoni. Äkixinireëna ixikotarina äti. Kokaniri itxauana. Ineenamauatapikana. Apanakini imisirienetana. Ixinikarina apanakini kamakiti maerekatinoka. Aäpirena ikamana. ³⁰ Imisäkirepiretarina äti. Omanatarina Teoso. !Ipaxitarina apanakini imisäkiretakasaakina. Iuikauana. Ätipirika: “Paimatireua ate,” itxanätana. Ixinikapikarina: “Natokopa itxa apikomoni maerekati akamini.” !Ikipitarina iri paniätakiti, inoro paniätakiti pakini. ³¹ !Kiikitena. !Ikamarina ikamaenetakitina. !Itiretarina inirimane. !Inirekarina neenamtxi ixipokinina. !Iamonikana apanakini. ³² Teoso sākire txari: “Kākiti ikara atoko inakani ipinapitikako. Ninoa ipinini atão.” Ikara Teoso sākire imarotapiikamana, iuaritika ikamapanikarina ikara maerekati. Apaka apokaerekatarina apanakini, maerekati ikamakasaaki.

2

Teoso Misiritari Maerekati Kamakani

¹ Atxiiti hite txari: “!Erekana ninoa, kotxi ninoa kamari maerekati,” hitxa. !Apakata ikara atoko hinini, kotxi hite apaka kamari maerekati ninoa kamakiti atokotxikana. Ininiã !apakata kākiti akiritiniri äti kākiti maerekati kamakari ininiua. ² Apakatapitika Teoso akiritiniri kākiti maerekati kamakari ininiua, kotxi iua imarotari atão. Ininiã maerekati kamakari apakapari atão imisiritiko imaerekani iaõka. ³ “Ninoa maerekati kamakani misiritaäkako,” hinakasaaki, hixinikari hite apaka kamari maerekati ninoa kamakiti atokotxikana. Ininiã hite apaka !hinapakapaniri Teoso misiritinii hite. ⁴ Atxiiti na hite maakatari Teoso, kotxi hite txari: “Teoso katiraökiri itxaua,” hitxa. Atxiiti na himaakatari Teoso, kotxi iusaaki !imisiritapanikai hite. Atxiiti na himaakatari

Teoso, kotxi Teoso ātipirika mīteenekai hīte. Teoso nirekari hītakanapiniri maerekati hīkamakiti, erekarinoka hīkamini ikapani. Ininiā iua tiretai hīte. Ikara hīte imarotamako.

⁵ Txamari hīte paikoxinirei. Na hinirekari himaerekani hītakanapini. Ininiā himisiritiko apiaāpotako. Kākiti misiritiko ōti apokasaaki, Teoso misiritapitikaiko hīte. Iuasaaki kākiti imarotariko Teoso omanākare imaerekani xika, kotxi Teoso atāo imarotari kākiti kamakiti. ⁶ Ikamakiti erekari ininiāua, Teoso sikari erekari iuamoni. Txamari ikamakiti maerekati ininiāua, Teoso misiritariko iua. ⁷ Aua kākiti ātipirika erekari kamakani. !Isāpaka erekari ikamini. Inirekarina Teoso: “Erekapitikai,” ininina. Inirekarina Teoso paxitinina. Inirekarina auinina ātipirika. Kākiti ikara atoko inakani Teoso txīkitakana ātipirika auinina ikapani. ⁸ Apanakinipekana kamari inireēkitinoka. ! Inirekarina atāo imarotinina. Maerekatina inirekana ikaminina. Teoso omanatana kākiti ikara atoko inakani. Teoso misiritanako ninoa. ⁹ Ikinipoko kākiti maerekati kamakani maxikaākako. Atatsiirauatako. Merepanika Xoteo misiritaākako, eereka Xoteo minakaniua apaka misiritaākako. ¹⁰ Teoso txanako kākiti erekari kamakani: “Erekapitikai hīte.” Ikara atoko itxanako merepanika Xoteoakori, eereka Xoteo minakaniua apaka. Teoso paxitanako ninoa. Ikamaerekaxiniretanako. ¹¹ Teoso misiritana ikini kākiti maerekati kamakani. !Auiritari apanakini maerekati kamakani napakakiniri imisiritikona. Apanakini maerekati kamakani imisiritini atokokana, imisiritari ikinipoko maerekati kamakani.

¹² Xoteo minakaniua !auari Moisesi sākire Teoso paniātakiti iōkatsopatakori. Ninoa kamari maerekati, ininiā Teoso paniātakiti imimarotakanisaaki ipinana. Xoteoakori aua Teoso paniātakiti iōkatsopatakori. Ninoa apaka kamari maerekati. Ininiā Teoso misiritana ninoa, isākire iōkatsopatakori iaōka imakamakani xika. ¹³ Teoso kamaerekatari isākire iaōka kamakani. Pikenakotakasaakiri Teoso sākire, txamari !pikamari isākire iaōka, iuasaaki Teoso !ikamaerekatai pite. ¹⁴ Xoteo minakaniua !auari Teoso sākire iōkatsopatakori. Iuaritika atxiīti ikamarina Teoso paniātakiti iōkatsopatakori iaōka, kotxi ikamarina ākixinirena sākire iaōka. !Auari Teoso sākire iōkatsopatakori ninoamoni, iuaritika Teoso paniātakiti auape ākixinireēna. ¹⁵ Teoso paniātakiti iaōka ikamakasaakina, oerekarina imarotininina atāo inakari ākixinireēna. Ākixinirena sākire sāpiretana atāo. Ātikata itxana: “Pite kamari maerekati. !Apakata.” Ātikata erekari ikamakasaakina, “Pite kamari erekari. Erekapitikari.” Itxa ākixinirena sākire. ¹⁶ Kākiti kamakiti imarotiko ōti apokako. Iuasaaki Teoso paniātariko Xesosi Kristo sāpiretiniri kākiti kamakiti. Kākiti kamakiti apanakini mimarotakinini apaka isāpireta. Iuasaaki isāpiretari kākiti misiritiko imaerekani xika. Teoso iokanapirena erekari nisāpiretakiti oerekepekari ikara atoko inakari.

Xoteoakori Auari Teoso Paniātakiti Iōkatsopatakori

¹⁷ Hītepekana, hīte txari: “Ate Xoteo atxaua. Teoso apakapapitikaua ate, kotxi isikari ipaniātakiti iōkatsopatakori atemoni. Atenoka Teoso anaakori atxaua,” hītxa. Ininiā hīteka iuikaua. ¹⁸ Hīte imarotari Teoso nireēkiti hīkamini. Himarotari Teoso paniātakiti iōkatsopatakori, ininiā himarotari erekari apiari hīkamini. ¹⁹ Hītxari: “Atera oerekari Teoso kimapora, ikimapora mimarotakanimoni. Mōsiāreni atoko itxana ninoa,” hītxa. “Ate imarotari Teoso sākire, ininiā ate imarotari apanakini aōerekini. Ininiā ate tirikapi atoko atxaua. Apanakini ipiā sikani atoko itxana ninoa.” Ikara atoko hītxa hīte. ²⁰ Hītxari: “Koerekarerini atxaua. Kākiti miūkiteni oereēkani atxaua. Ate oerekari kākiti poiāo imarotakani. Ate imarotari ikinipoko. Aimarotari atāo, kotxi Teoso sākire iōkatsopatakori aua atemoni.” Ikara atoko hītxa hīte. ²¹ Hīte Xoteo inakaniua oerekari apanakini. Kinirepa kona hīteka oerekaua apaka? Hīte ōtākikari apanakini: “!Piītiriuatape”. Kinirepa hīte na takanapari hīitiriuatini? ²² Hīte ōtākikari apanakini: “!Pisirikape pītanoro minakotokatika.” Kinirepa hīte apaka sirīka hītanoro minakotokatika? Hīte omanatari teoso kamakori, ininiā kinirepa hīitirikari ninoa teosone aikoti tii? ²³ Hīte iuikaua, kotxi Teoso sākire iōkatsopatakori aua hītemoni,

txamari apanakini na paxitari Teoso hīte xika, kotxi kona hīte kamari Teoso sākire iaōka.
²⁴ Teoso sākire iōkatsopatakori txari:

Hīte Xoteo xika, Xoteo minakaniua misākirepiretari Teoso,
 itxa Teoso sākire iōkatsopatakori.

²⁵ Teoso takaōtxikare aua hītoā. Teoso paniātakiti hīkaminiā, erekapitikari Teoso takaōtxikare hītoā auini. Teoso paniātakiti iōkatsopatakori himakamakaniā, Teoso takaōtxikare mauakiniti atoko hītxaua. ²⁶ Xoteo minakatiua, Teoso takaōtxikare iītoā mauakini, Teoso sākire iaōka ikaminiā, Teoso txariko: “Iua Xoteo atokotxikana itxa. Nitakaōtxikare iītoā auakiti atokotxikana itxaua.” ²⁷ Hīte Xoteoakorimoni aua Teoso paniātakiti iōkatsopatakori, iuaritika !hīkīpitari Teoso sākire. Teoso takaōtxikare auapitikama hītoā, iuaritika !hīkīpitari Teoso sākire. Xoteo minakaniua !auari Teoso takaōtxikare iītoāna, iuaritika ninoa kamari Teoso paniātakiti iōkatsopatakori. Ikara atoko ininiā, ninoa oerekai himaerekani.

²⁸ Kiripa atāo Xoteo? Kiripa Teoso nakiti txataua? Kirimonipa aua Teoso takaōtxikare atāo inakari? Teoso takaōtxikare iītoā auakini, na ikinikani atāo Xoteo itxauana. ²⁹ Teoso paniātakiti iōkatsopatakori !oerekaua Teoso nakiti aniniua. Xoteo atāo inakariua, Teoso nakiti itxaua ākixinireē. Teoso takaōtxikare aua iua ākixinireē. Erekari Matamatakoti takari Teoso takaōtxikare iua ākixinireē. !Inirekari kākiti iuikiniri. Inirekari Teoso iuikiniri.

3

Teoso Kamari Ikamaenetakiti

¹ Atxiīti hīte txano nota: “Teoso apakapari Xoteo. Teoso apakapari Xoteo minakaniua apaka, ininiā !apiaerekata Xoteo aniniua. !Apiaerekata Teoso takaōtxikare aītoā auini.” Atxiīti ikara atoko hītxa. Txamari na atāo. ² Apiaerekatapitika Xoteo aniniua, kotxi Teoso merepitipanika sāpiretari iuaka sākire Xoteomoni, ninoa iōkatsopatiniri īkapani, inīkatinirina īkapani. ³ Iuaritika apanakini Xoteo !auikari Teoso sākire. Ikara xika atxiīti Teoso likamari ikamaenetakiti? ⁴ Ikamapitikari. Atxiīti paxirari ikinimane sākire. Iuaritika Teoso sākire atāonoka. Teoso sākire iōkatsopatakori txari:

Teoso sākirauatakasaaki, ikinimane imarotari isākire atāo ininiua. Isāpiretakasaakiri kākiti imisiritiko imaerekani xika, iuasaaki imarotaākako Teoso kamakiti atāo inini.

⁵ Atxiīti kākiti txano nota: “Atāo minakati akamakasaaki, apanakini apia imarotari Teosonoka kaminiri atāo inakari. Ininiā erekari akaminiri atāo minakati apanakini imarotiniiri Teosonoka kaminiri atāo inakari. Ininiā !apakata Teoso misiritiniua ate, maerekati akamini xika.” Atxiīti aua kākiti ikara atoko ina sākiretakani. ⁶ Apakatapitika Teoso misiritiniri maerekati kamakari. Iua kamari atāonoka, ininiā apakatapitika imisiritiniri ikinimane maerekati kamakani.

⁷ Atxiīti kākiti txaua: “Atāo minakati asāpiretakasaaki, apanakini imarotari Teoso sākirenoka atāo ininiua. Atāo aminasākiretakaniā, apanakini kākiti txari: “Teosonoka ereka,’ itxana. Ininiā !apakata Teoso misiritiniua amaerekani xika.” Atxiīti aua kākiti ikara atoko ina sākiretakani. ⁸ Ikara atāo ininiā, maerekati makama erekari apokini īkapani. Txamari ikara sākiretxiti na atāo. Iuaritika apanakini apoītapekaua ate ikara atoko asāpiretini. Ininiā atāopitika ninoa misiritiko, isākirena xika.

!Auari Kākiti Erekari

⁹ Hīxinikariko ikinika ikara nisāpiretakiti. Atauako Xoteo apiaerekata? Atauako Xoteo minakaniua poiāo ereka? Kona ikara atokoni itxa. Noerekapekai hīte, Xoteo minakaniua atokokana itxa Xoteo, kotxi ikinimane kamari maerekati. Akinika !aposotari atakanapiniri maerekati akamini. ¹⁰ Teoso sākire iōkatsopatakori txari:

!Auari atāo inakari kamakari. Ātika !auari.

¹¹ Teoso nirekēkiti imarotakari !auari. Teoso nirekakari !auari.

¹² Ikinimane kaporīkikari Teoso. Ikinimane kerokari ikamakiti. Erekari kamakari !auari. Ātika !auari.

¹³ Kākiti sākire maerekati, itotxi arakakari saka atoko itxa. Itotarina imisirienetininina apanakini. Kākiti sākire imini tsiia atoko itxa.

¹⁴ Ātipirika imisākirepiretarina āti, kotxi inīkatarina omanākaretxi ākixinireēna.

¹⁵ Maxikatīka inirekarina okininina āti.

¹⁶ Isininonina imaxikana apanakini. Maerekaxinireninoka itxīkitakana apanakini.

¹⁷ !Imarotarina neenamatzī itakanapinina.

¹⁸ !Ipaxitarina Teoso. !Ipīkarina iua.

Itxa Teoso sākire iōkatsopatakori.

¹⁹ Aimarotari Teoso sikari ikinika ipaniātakiti iōkatsopatakori atemoni Xoteoakori-moni, inireēkiti aimarotini ikapani. Ininiā !apakata ate, Xoteo minakaniuua pakini: “!Nimarotari Teoso nireēkiti,” anini, kotxi isāpiretapekari inireēkiti akamini tīkane. Ininiā atāopitikara Teoso misiritinina ikinimane maerekati kamakani. ²⁰ Ikinika Teoso paniātakiti iōkatsopatakori !aposota akamini, ininiā Teoso kona kamaerekataua. Teoso paniātakiti iōkatsopatakori oerekaua maerekati kamakani aniniuua.

Natokopa Itxa Teoso Kamaerekatiniri Kākiti?

²¹ Uatxa Teoso oerekapekaua itxīkitakiniri kākiti atāo inakari kamakani ininiuua. Teoso paniātakiti ikinika likama kākiti, iuaritika itxīkitakaākana atāo inakari kamakani ininiuana. Kitxakapirīka Moisesi, Teoso sākire sāpiretakani apaka sāpiretari ikara. ²² Teoso txīkitakari kākiti atāo inakari kamakani ininiuana, Xesosi Kristo sākire auikasaakina. Itxīkitakari Xoteo, Xoteo minakaniuua pakini atāo inakari kamakani ininiuana, Xesosi sākire auikasaakina. Xoteo minakatiua Teosomoni, Xoteotxikana itxaua. ²³ Kotxi ikinimane kamari maerekati, ininiā !aposota aāpokini Teoso iotximeremoni. ²⁴ Maerekati kamakaniuua ate, iuaritika Teoso sikari ikinipoko erekari maxikatīka atemoni, ininiā Teoso kamaerekataua ate, kotxi Kristo Xesosi iikixirauata ate ikapani ipīkasaaki. Ininiā Teoso !imisiritaikaua amaerekani xika. ²⁵ Teoso sikari Xesosi ipinini kākiti ikapani. Xesosi ipīkasaaki, Teoso makatxakari maerekati akamakiti. !Imisiritaikaua ate, kotxi aāuikari Xesosi ipinini ikitxitari Teoso, maerekati akamakiti. Teoso sikari Xesosi ipinini ate ikapani. Ikara oerekaua atāo inakarinoka ikamini. Mitxipitipanika Teoso !imisiritana kākiti imaerekanina xika. Iātapari iketo manapi apokini, kotxi iamoniākari kākiti. ²⁶ Teoso sikari Xesosi, ininiā ipīpe kākiti ikapani, ininiā uatxa Teoso misiritari kākiti maerekati ikamini xika, ininiā aimarotari Teoso atāo inakarinoka kamakari itxaua iua, kotxi !auiritari maerekati kamakari inapakakini. Erekari Teoso, ininiā iua posotari ikamaerekatiniri kākiti Xesosi sākire auīākani.

²⁷ Ininiā !apakata aāuikiniuua, kotxi !auari aparīka akamaerekatakiri, ininiā !apakata aāuikiniuua Teoso paniātakiti iōkatsopatakori akamakasaaki. Teosora kamaerekataua, Xesosi sākire aāuikasaaki. ²⁸ Teoso paniātakiti iōkatsopatakori kamakari atxiiti ! ikamaerekataāka, kotxi !auikari Xesosi sākire. Xesosi sākire auikakarinnoka ikamaerekataāka. ²⁹ Atauako Teoso Xoteo Teosonenanini itxataua? Konapitini. Xoteo minakaniuua Teosonekanera apaka itxaua Teoso. ³⁰ Teoso ātinoka aua. Iua kamaerekatana Xoteo, Xesosi sākire auīākani. Iua kamaerekatana Xoteo minakaniuua apaka, Xesosi sākire auikasaakina. ³¹ Ikara atoko ininiā, atxiiti kākiti txari: “Teoso kamaerekataua ate, kotxi aāuikari Xesosi sākire, ininiā Teoso paniātakiti iōkatsopatakori !itxaika. Ininiā ! akamaikari,” itxa kākiti sākire atxiiti. Konapitini. Xesosi sākire aāuikasaaki, anirekari iteene akaminiri Teoso sākire paniātakiti iōkatsopatakori.

4

Atāo Inakari Kamakari Apraō

¹ Maxinikari Apraō āri kitxakapirīkari. Natokopa itxa iua imarotakiti, Teoso kamaerekatiniri kākiti? ² Apraō kamakiti erekari kamaerekataākamariko iua, ininiā iua iuikamauako. Txamari iua iuikiniuua !auari Teoso apisatoō. ³ Teoso sākire iōkatsopatakori txari:

Apraō auikari Teoso sākire, ininiākara Teoso txīkitakari iua atāo inakari kamakari ininiuua.

⁴ Parīkauatakari ipatrāote sikari iparīka īki iuamoni. Maxikatiīka !iikitxitari iua. Isikari, kotxi iparīkauata. ⁵ Kākiti auikiniāri Teoso kamaerekatini maerekati kamakari, iua kākiti !iuikari iuaka parīka. Imarotari iparīka !ikamaerekatari iua. Teoso txīkitakari ikara atoko inakari kākiti atāo inakari kamakari ininiua, kotxi iua auikari Teoso sākire. ⁶ Kitxakapirīka Tavii txari ikara atoko. Iua sāpiretari kākiti Teoso sikakiti erekari apakapakani. Teoso txīkitakari iua atāo inakari kamakari ininiua. Na iparīkani txīkitakari iua atāo inakari kamakari ininiua. ⁷ Tavii txari: Teoso makatxakasaakiri kākiti maerekani, !atamataikari maerekati ikamakiti. Teoso takari ikinipoko erekari kākiti ikara atoko inakarimoni.

⁸ Teoso !iaōtari iua kamakiti maerekati. Teoso takari ikinipoko erekari iuamoni. Itxa Tavii kitxakapirīka.

⁹ Atxiīti pite txari: “Atauako ia erekari Teoso sikakiti, Tavii sāpiretakiti, kākiti Teoso takaōtxikare auāitotakiti ikapaninanini?” Konapitini. Ia erekari Teoso sikakiti Teoso takaōtxikare mauāitotakini ikapani apaka. Nisāpiretapekai ia Teoso sākire iōkatsopatakori:

Apraāo auikari Teoso sākire, ininiākara Teoso txīkitakari iua atāo inakari kamakari ininiua,

itxa Teoso sākire iōkatsopatakori. ¹⁰ Kirisaakipa Teoso txīkitakari Apraāo atāo inakari kamakari ininiua? Atauako Teoso takaōtxikare Apraāo iōā auakasaakiikani? Konapitini. Takaōtxikari Apraāo iōā takiko apisapanikara, itxīkitakari Apraāo atāo inakari kamakari ininiua. ¹¹ Merepanika Teoso txīkitakari Apraāo atāo inakari kamakari ininiua, eerekaikara itakari itakaōtxikare iōā. Ikara Teoso takaōtxikare oerekari, mitxipeka Teoso txīkitakari Apraāo atāo inakari kamakari ininiua, kotxi iua auikari Teoso sākire. Apraāo auikari Teoso sākire, Teoso takaōtxikare iōā auini apisapanika. Ininiā Apraāo ikini Teoso sākire auīākani iri atoko itxaua. Atxiīti Teoso takaōtxikare iōāna !auari. Iuaritika ninoa iri atoko itxaua Apraāo. Teoso txīkitakari ikinimane iua sākire auīākani atāo inakari kamakani ininiuana. ¹² Apraāo Teoso takaōtxikare auāitotakini iri atoko itxaua, ninoa auikiniāri Apraāo sākire Apraāo auikiniri atokotxikana, kotxi Teoso auikari Teoso sākire Teoso takaōtxikare iōā auini apisapanika.

¹³ Teoso sikaenetari itixi Apraāomoni, imekaniriakori pakinimoni. Ikara atoko Teoso sākire, kotxi Apraāo auikari Teoso sākire. Iua auikari Teoso sākire, ininiā Teoso txīkitakari iua atāo inakari kamakari ininiua. Apraāo kamakiti erekari !itxīkitakari Teoso sikaenetiniri itixi Apraāomoni. ¹⁴ Kākiti erekari kamakari Teoso sākire mauīākati !apakapari Teoso sikaenetakiti, kotxi !auikari Teoso sākire. Teoso sikari isikaenetakiti iua sākire auīākanimoninani. ¹⁵ Teoso paniātakiti iōkatsopatakori makamakati misiritaākako. Teoso paniātakiti iōkatsopatakori mauakaniā, maerekati !auari. Txamari auapitika Teoso paniātakiti iōkatsopatakori.

¹⁶ Ininiā kākiti auikasaakiri Xesosi sākire, apakapari Teoso sikaenetakiti. Maerekati kamakani kākiti, iuaritika apakaparina Teoso sikaenetakiti, kotxi Teoso nirekari ikinipoko erekari isikini kākitemoni. Ininiā ikinimane Apraāo apika mekaniriakori apakapapitikari Teoso sikaenetakiti. Xoteoakori Teoso paniātakiti iōkatsopatakori auakini apakapari. Xoteo minakaniua Teoso sākire Apraāo auikini atoko inakani apaka apakapari. Ate amakinika iri atoko itxaua Apraāo. ¹⁷ Teoso sākire iōkatsopatakori txari:

Teoso txari Apraāo: “Nota txīkitakaiko pite itori āti uāka iri pininiua.”

Ininiā Teosomoni iua aīri atoko itxaua, kotxi Apraāo auikari Teoso sākire. Teoso txīkitakana ipīkani iuaīkana auāki inini. Iua kamari mitxi mauakati auini.

¹⁸ Apraāo kiomātxipeka inakasaaki, kona keeneri. Iuaritika auikari Teoso sākire. Iātapari Teoso sikaenetakiti apokini. Ininiā apanakini āti uāka iri atoko itxapekaua Teoso sākire iaōka. Teoso sākire iōkatsopatakori txari:

Papika mekaniriakori kaiāopokopaniriko.

¹⁹ Apraāo seī anokanani inakasaaki, imarotari iōto ipinanapanoka inini. Imarotari Sara !oposotaikari keene onini. Iuaritika iteene auikari Teoso sākire. ²⁰ !Iotoka auikiniri Teoso sakiniri isikaenetakiti iuamoni. Iua auikari Teoso sākire itaparaxinireritika. “Teoso

posotari ikinipoko ikamini,” itxa. ²¹ Iua iteene imarotari Teoso posotiniri isikiniri isikaenetakiti. ²² Apraão auikari Teoso sãkire, ininiākara Teoso txikitakari iua atão inakari kamakari ininiua. ²³ Na Apraõnanini Teoso txikitaka atão inakari kamakari ininiua. ²⁴ Iua txikitakaua ate apaka atão inakari kamakani aniniua, aãuikiniāri Teoso sãkire. Aãuīte Xesosi ipīkasaaki, Teoso õkitikari iua iuaīkana auini īkapani. ²⁵ Teoso sikari Xesosi kākitimoni ipinini īkapani maerekati akamakiti xika. Teoso õkitikari iua iuaīkana auāki inini īkapani, ate ikamaerekatini īkapani.

5

Teoso !Omanataikaua Ate

¹ Ininiā Teoso kamaerekataua, kotxi aãuikari isãkire, ininiākara aãuīte Xesosi Kristo iotokakari Teoso omanatiniua ate. Teoso !omanataikaua ate. Uatxa apakapaua ate. ² Aãuikasaakiri Xesosi sãkire, iusaaki aimarotari ikinipoko erekari Teoso sikakiti atemoni ikiniõtika. Itene apoxokoniua, kotxi aiātapani Teoso aaõkitini, iua iotximere aātamatini īkapani. ³ Apanakini misiritakasaakia, apoxokoniua apaka, kotxi Teoso oerekaua amīteenekiniri amisiritiko. ⁴ Amisiritiko amīteenekiniā, aimarore apiaāpota. Aimarore apiaāpotakasaaki, aiātapani erekari apokini atemoni. ⁵ Erekari apokini aiātapaniā, aāpakapapitikariko erekari, kotxi aākixinireē aimarotari Teoso iteene tiritiniua. Erekari Matamatakoti Teoso sikakiti atemoni, oerekaua Teoso tiraõki aākixinireē.

⁶ Erekari akamini amaposotakanisaaki, Teoso amanirekakanisaaki, Kristo ipina ate īkapani. Iua ipina iketo õti manapi. ⁷ Atxiīti kākiti ipina atão inakari kamakari īkapani iua mapinakani īkapani? Atxiīti lipina iua īkapani. Atxiīti kākiti ipina āti erekari kamakari īkapani, iua mapinakani īkapani? Atxiīti ipina iua īkapani. ⁸ Teoso oerekaua ate, iua iteene tiritiniua ate, kotxi Kristo ipina ate īkapani maerekati akamapanika anakasaaki.

⁹ Kristo ipinini kamaerekataua ate, ininiā uatxa Teoso apakapaua ate. Apikomoni Kristo kaminua, kotxi Teoso !omanataikaua. !Imisiritakaua. ¹⁰ Ate Teoso omanatakani anakasaakia, Teoso ākiri ipina ate īkapani. Ininiā Teoso mokaiakari !atxakaua. Iua apakapaua. Iua apakapaua, ininiā amaerekani imaktxaka, ininiā aãuapininiika, kotxi iua õkitikaua auapininiika anini īkapani Teosokata, kotxi Kristo auini auapika. ¹¹ Teoso kamari ikara ate īkapani. Apikomoni iua kaminapanikauako ate, kotxi iua kamapoxokonitua, kotxi aãuīte Xesosi Kristo mikanapiriāua ate Teosomoni.

Adão, Kristo Pakini

¹² Maerekanitxi apoka itixi kiki ātika xika, Adão inakori xika. Maerekati ikamakiti xika ipina. Ininiā ikinimane kākiti ipina, kotxi ikinimane kākiti kamari maerekati. ¹³ Teoso paniātakiti iõkatsopatakori apokini apisapanika, kākiti kamari maerekati, iuaritika Teoso !imisiritana ninoa maerekati ikamakitina xika, kotxi iusaaki !isāpiretapanikari ipaniātakiti. ¹⁴ Adão auakasaaki atoko, Moisesi auakasaaki manapi, iusaaki Teoso paniātakiti iõkatsopatakori !apokapanika, iuaritika ikinimane ipina. Atxiīti kākiti ! ikamari maerekati Adão maerekani atoko, kotxi iua !ikamari Teoso paniātakiti, iuaritika ikinimane ipina. Kiki Adão inakori axinikasaaki, aimarotari iua Xesosi atoko ininiua.

¹⁵ Txamari aimarotari iua na Xesosi !atokoni itxaua, kotxi ātika kiki maerekani xika, itori kākiti ipina. Iua sikari ipikitxi kākitimoni. Kiki ātipekana, Xesosi Kristopekana, iua sikari erekari Teoso siākiti itori kākitimoni imapinakanina īkapani. Teoso siākiti iiki !auari. !Erekari Adão siākiti. Peerekari Xesosi Kristo siākiti. ¹⁶ Kiki ātika Adão inakori kamari maerekati. Ātinoka maerekati ikama, ininiā eereka Teoso sãpiretari imaerekani. Eereka Teoso misiritari iua. Teoso siākiti !ikara atokoni itxa. Kākiti maerekati itori ikamakasaaki, kiki ātipekana Xesosi sikari Teoso siākiti kākitimoni, ininiā ikamaerekatana kākiti. Iusaaki imaktxakari ninoa maerekani. ¹⁷ Kiki ātika, Adão inakori maerekani xika, Teoso txikitakari ikinimane ipinini. !Erekari iua kiki kamakiti. Āti kiki, Xesosi Kristo inakori kamakiti peerekari. Iua txikitakari kākiti ākixinire katapara inini maerekati imakamakani īkapani. Kākiti ikara atoko inakari Teoso sikari ikinipoko erekari. Itori isika. Itxikitakari iua atão inakari kamakari ininiua. Ia iparīka iiki !auari.

¹⁸ Adão kamari ātinoka maerekati, iuaritika iua maerekati txīkitakari Teoso misiritinina ikinika kākiti. Iua atokokana Xesosi kamakiti ātika txīkitakari Teoso kamaerekatina kākiti ninoa ātipirika auini ikapani. Iuasaaki atāonoka ikamakiti. ¹⁹ Kiki ātika Adão inakori na kamari Teoso sākire iaōka, ininiā itxīkitakari kākiti itomaneri maerekati ikaminina. Kiki ātipekana Xesosi inakori kamari Teoso sākire iaōka, ininiā itxīkitakari kākiti itomaneri atāo inakari kamakani ininiuana.

²⁰ Teoso sikari ipaniātakiti iōkatsopatakori Moisesimoni. Iuasaaki kākiti imarotari maerekati itori ikamakitina, ininiā maerekanitxi apiaāpota, kotxi Teoso paniātakiti iōkatsopatakori auape. Maerekanitxi apiaāpota, iuaritika erekari Teoso sikakiti kākitemoni apiata. ²¹ Maerekanitxi txīkitakari kākiti ipinini. Erekari Teoso sikakiti kākitemoni txīkitakari kākiti auini ātipirika imaxipokakani tīkane, kotxi aāuīte Xesosi Kristo txīkitakari kākiti atāo inakari kamakari ininiuana. Ininiākara kākiti auapininiika, kotxi Xesosi Kristo kamaerekatana.

6

!Anirekaikari Maerekati Akamini

¹ Ininiā erekari atxiīti apikomoni maerekati akamini, ikinipoko erekari Teoso sikakiti apiata auini ikapani? ² Konapitini. Teoso makatxakapekari amaerekani, kotxi iuasaaki ! anirekaikari apikomoni maerekati akamini. Anireēkiti maerekati akamini xipope, kākiti ipinini atoko itxa ixipokini. Ininiā !apakata apikomoni maerekati akamini. ³ Apatxisatiko oerekari Kristo Xesosi nakitiakori aniniuana. Iuakata apinini atoko itxa apatxisatiko. Himarotapekari ikara. ⁴ Apatxisatiko oerekari Kristokata ikatakoni atoko aniniuana, ininiā ! anirekari apikomoni maerekati akamini. Kristo iri Teoso posotiire ōkitikari imi, iuaīkana auāki inini ikapani. Peerekari iposotiire. Ininiā apatxisatiko oerekari Xesosi ōkitikiko atokokana Teoso ōkitikaua ate aāuini amaneri inini ikapani.

⁵ Aāuapika Kristokata, ininiā ātika atoko atxaua iuakata aāuini, ininiā Kristo ipinini atokokana mitxi aāuini xipope. Kristo iuaīkana auini atokokana, aāuini amaneri. Peerekari, kotxi aāuapika Kristokata, ātika atoko aniniuana iuakata. ⁶ Mitxi anireēkiti xipope, kotxi Kristo makatxakari amaerekani aamina ipiriāmitakari nopini ipīkasaaki ate ikapani. Ininiā mitxi anireēkiti posotiire !auaika. Ixipokaākapeka, kotxi mitxi anireēkiti maerekatina. Ininiā maerekanitxi nitiriakori atoko !atxaikaua. Aimarotari ikara. ⁷ Maerekanitxi na paniātaikari kākiti ipīkari.

⁸ Kristokata ipīkani atoko aniniā, aimarotari iuakata aāuini apaka. ⁹ Ipīkasaaki ōkitikaāka, ininiā !ipinaika. Aimarotari ikara. Ipīkitxi na kaposotiireikari iuaīkana Kristo ipinini ikapani. ¹⁰ Iua ipina maerekanitxi posotiire ixipokini ikapani. Iuasaakipeka maerekanitxi posotiire xipoka. Uatxa Kristo auapininiika Teosokata, iri nireēkitinoka ikamini ikapani. ¹¹ Iua atokotxikana anireēkiti maerekati xipope. Uatxa !anirekaikari maerekati akamini. Uatxa aāuapininiika Teosokata, iua nireēkitinoka akamini ikapani, kotxi Kristo Xesosikata aāuapika.

¹² Ininiā na hāuiritapiri hīto paniātini maerekati hīkamini. Na hīkamapiri maerekati hīto nireēkiti. ¹³ Na hāuiritapiri hīto kaminiri maerekati. Na hāuiritapiri hōki kaminiri maerekati. Na hāuiritapiri hinama kaminiri maerekati. Na hāuiritapiri hūako kaminiri maerekati. Na hīkamapiri maerekati hīto nireēkiti. Hīteka hīsikauako Teosomoni, kotxi mitxi ipīkani atoko hītxaua, eereka Teoso txīkitakai auāki iuaīkana hinini, ininiā hīsikari hīto ikinika Teosomoni. Atāo inakarinoka hīkamako hōkiā, hinamaā, hūakoā, imakinika hītoā. ¹⁴ Uatxa maerekanitxi apatrāote atoko !itxaikauako. Uatxa amisiritiko !auaika, Teoso paniātakiti iōkatsopatakori amakamakaniā, kotxi ikinipoko erekari Teoso sikakiti aāpakapakasaaki, iuasaaki imaktxakari amisiritiko.

Atāo Inakari Nitiriakori

¹⁵ Ininiā atxiīti hītxano nota: “Maerekati makama, kotxi amisiritiko !auaika Teoso paniātakiti iōkatsopatakori amakamakaniā, kotxi ikinipoko erekari Teoso sikakiti aāpakapakasaaki, imaktxakari amisiritiko. Ininiā makamari maerekati,” atxa atxiīti. Konapitini. ¹⁶ Himarotari, hāuiritiniāri kākiti paniātini iua nireēkiti hīkamini, ininiā

iua hīpatrāote atoko itxaua. Iua nitiriakori atoko hītxaua, kotxi hīkamari iua paniātakiti. Maerekanitxi hīpatrāote ininiāua, hīkamari maerekati, ininiā hīpina. Ininiā kona hāua Teosokata ātipirika. Teoso hīpatrāote ininiāua, iua paniātakiti hīkama, ininiā atāo inakarinoa hīkama. ¹⁷ Nitxari Teoso: “Erekapitikari atemoni pikamakiti.” Ikara atoko nitxari Teoso, kotxi mitxi maerekanitxi nitiriakori atoko hītxaua. Uatxa maerekanitxi nitiriakori !hītxaikaua, kotxi iteene hikīpitari hōerekiko. ¹⁸ Teoso makatxakapekai hīte, ininiā uatxa maerekanitxi nitiriakori !hītxaikaua. Uatxa Teoso nitiriakori hītxaua, ininiā atāo inakarinoa hīkama. ¹⁹ Ikara atoko nitxa sākireta hītemoni, kotxi himarotari nitiritxi, patrāo pakini pirena. Himarotakiti poiāoka. Mitxi hāuiritari hīto kaminiri maerekati inireēkiti. Hāuiritari hīto apikomoni maerekati ikamaāpotini. Apiaāpota maerekati hīkamakiti. Iusaaki hīto maerekanitxi nitiri atoko itxaua. Uatxa hīsikari hīto Teosomoni atāo inakari nitiri ininiua īkapani, ininiā hīkamariko atāo inakarinoa. Ininiā Teoso nakitiakorinoa hītxaua.

²⁰ Maerekanitxi nitiriakori hinakasaakiaua, atāo inakari nitiriakori na hītxaua, ininiā atāo inakari na paniātai hīte atāo inakarinoa hīkamini. ²¹ Īkiripa erekari hāpakapa, maerekati mitxi hīkamakasaaki? Kona kapakaparei. Uatxa hīpētauata maerekati mitxi hīkamakiti xika. Maerekati kamiko xika kākiti ipina, ininiā kona aua Teosokata ātipirika. ²² Uatxa maerekanitxi na paniātaikai hīte. Uatxa Teoso nitiriakori hītxapekua, ininiā hīkamari ikinipoko Teoso īkapani. Ininiā hāuapininiika hītxako Teosokata ātipirika. ²³ Maerekanitxi kākiti patrāote atoko itxa. Īkitxitari kākiti parīkatxi īki, txamari ipīkitxi itxaua parīkatxi īki. Teoso sikakiti atemoni ātiāo. !Aparīkauata Teoso sikakiti aāpakapini īkapani, iuaritika isikaua aāuini ātipirika inini īkapani, kotxi aāuīte Xesosi Kristo ipina ate īkapani.

7

Tanirauatakarō Atoko Atxa

¹ Nitiriakori, hīte hīkinika imarotari paniātakori iōkatsopatakori, ininiā himarotari nisākire. Kākiti auapanika inakasaaki, ikīpitariko paniātakori iōkatsopatakori. ² Noerekaiko hīte. Paniātakori iōkatsopatakori paniātaro sito okaikotini oītanirikata iua auapanika inakasaaki. Iua ipininiā, iua paniātakori na paniātaikaro oa. ³ Ōtaniri auapanika inakasaaki, ātikata oāuiniā, kanokarero otxaua. Ōtaniri ipininiā, paniātakori iōkatsopatakori na paniātaikaro oa, ininiā apakata ātikata oītaniriuatini. Ikara atoko oniniā, kanokarero !otxaua.

⁴ Nitiriakori, oa sito atokotxikana ate amakinika. Kristo ipina ate īkapani, ininiā Moisesi paniātakiti iōkatsopatakori kona paniātaikaua, kotxi uatxa Kristo nakitiakori atxaua. Uatxa Teoso ōkitikakiti Kristo nakitiakori atxaua. Iua nakitiakori atxaua, ininiā erekari akama Teoso īkapani. ⁵ Mitxi anireēkiti maerekati paniātaua maerekati akamini. Aīto nirekari maerekatinoa ikamini, kotxi paniātakori iōkatsopatakori txari: “Kona hīkamapiri maerekati.” Ininiā iusaaki apiata anirekari maerekati akamini, kotxi maerekatinoa kamakani atxaua. Ininiā apina, ininiā kona aāuapika Teosokata. ⁶ Mitxi paniātakori iōkatsopatakori nirekari ipaniātiniua. Uatxa paniātakori iōkatsopatakori na paniātaikaua. Ikara kitxakari. Uatxa amaneri, kotxi uatxa aparīkauata Teoso īkapani. Erekari Matamatakoti oerekaua aparīkauatini Teoso īkapani.

Teoso Paniātakiti Iōkatsopatakori

⁷ Ininiā natokopa itxa uatxa axinikakiti? Teoso paniātakiti iōkatsopatakori maerekati itxaua atxiīti? Konapitini. Maerekati !itxaua. Teoso paniātakiti iōkatsopatakori mauakanimako, nota !imarotamariko maerekati nikamini. Teoso paniātakiti iōkatsopatakori txari:

Kona pinirekapiri āti nakiti,

ininiā āti nakiti ninirekiniā, nimarotari nikaminiri maerekati. ⁸ Maerekati xika na nota nirekari ikara Teoso paniātakiti nikamini. Ininiā iteene ninirekari apanakini nakiti. Ninirekari apanakini nakiti, kotxi Teoso paniātakiti iōkatsopatakori txari:

Kona pinirekapiri āti nakiti.

Teoso paniätakiti iökatsopatakori mauakaniã, iusaaki maerekati !auari. ⁹ Teoso paniätakiti iökatsopatakori nimimarotakanisaaki, na nimarotari maerekati nikamini. Niuãkatari nãkixinire auãki inini. Teoso paniätakiti iökatsopatakori nimarotakasaaki, nimarotari maerekati nikamini. Iusaaki nimarotari nipinini nimaerekani xika. ¹⁰ Iusaakipeka nimarotari nãkixinire ipikari atoko inini. Teoso paniätakiti iökatsopatakori oerekari kãkiti erekari ikamini, iua auini ikapani. Txamari Teoso paniätakiti iökatsopatakori oerekano nota nipinini nimaerekani xika. ¹¹ Maerekati ninireëkiti misirienetano. Imisirienetano, ininiã na nikamari Teoso paniätakiti iökatsopatakori iaõka. Ininiã nikamari maerekati. Ininiã maerekati xika nipina.

¹² Teoso paniätakiti iökatsopatakori !auari maerekati, kotxi Teoso kamari. Atãonoka itxa Teoso paniätakiti. Erekari. ¹³ Atxiiti erekari txikitakano nipinini? Konapitini. Maerekanitxi txikitakano nipinini. Maerekanitxi txikitakano Teoso paniätakiti iökatsopatakori erekari nimakamakani, ininiã nikamari maerekati, ininiã iua maerekanitxi txikitakano nipinini. Ininiã aimarotari maerekanitxi kona xatiki apakata. Maerekanitxi, kotxi maerekanitxi txikitakano nipinini. Teoso paniätakiti iökatsopatakori oerekaua ikara atoko inakari.

¹⁴ Aimarotari Teoso paniätakiti iökatsopatakori iaxiti ikari ininiua. Txamari nota uaikirino. Maerekanitximoni vëtxitakori atoko nitxaua, maerekanitxi nitiri atoko nininiua ikapani. ¹⁵ Na nimarotari nikamakiti, kotxi na nikamari notaka nireëkiti. Nikamari nimanirekakiniti, nomanatakiti. ¹⁶ Ininiã maerekati nimanirekakiniti nikamakasaaki, iusaaki nimarotari Teoso paniätakiti iökatsopatakori ereka inini. ¹⁷ Ininiã na notani kamari maerekati. Maerekati nãkixinireë auakarira txikitakari nikaminiri iua maerekati. ¹⁸ Nimarotari erekari !auari nãkixinireë. Maerekanitxi aua nãkixinireë, kotxi ninirekari erekari nikamini, txamari !niposotari. ¹⁹ Na nikamari erekari ninireëkiti. Nikamapikari maerekati nimanirekakiniti. ²⁰ Ininiã nimanirekakiniti nikaminiã, kona notani kamari. Maerekati nãkixinireë auakarira txikitakano iua maerekati nikamini.

²¹ Ininiã ia sãkiretxiti atão: Ninirekasaakiri erekari nikamini, maerekanitxi niposota nikamini. ²² Nãkixinireë iteene ninirekari Teoso paniätakiti iökatsopatakori iaõka nikamini. ²³ Txamari aua ãti ninireëkiti niito ãki. Iua niito nireëkiti nirekari ixipokiniri nãkixinire nireëkiti. Iua niito nireëkiti xika nikamari maerekati nireëkitinoka. !Niposotari erekari nikamini. Kateia ãki iaxirikakoni atoko nitxa. ²⁴ !Erekano nota. Maerekati kamakarino nota. Kipa makatxakano, maerekati niito nireëkiti nimakamakani ikapani? Niito txikitakano nipinini. Kipa moianatano? ²⁵ Aãuïte Xesosi Kristokara moianatano. Iuara makatxakano nimapinakani ikapani. Peerekari Teoso, kotxi iua kamari ikara atoko nota ikapani.

Ininiã uatxa ia atoko inakari nisãpiretai. Nãkixinireë ninirekari Teoso paniätakiti iökatsopatakori nikamini. Txamari niitoã maerekanitxi nireëkitinoka niposota nikamini.

8

Erekari Matamatakoti Txikitakari Aãkixinire Auãki Inini

¹ Ininiã uatxa Teoso !itxaikaua ate: “Maerekati hãkamakiti xika nimisiritaike hïte,” !itxaikaua ate, kotxi Kristo Xesosi nakitiakori atxapekaua. !Akamaikari aïto nireëkiti. Erekari Matamatakoti sikaposotiiretaua iua nireëkiti akamini. ² Erekari Matamatakoti nireëkiti akama, ininiã iua txikitakari aãkixinire auãki inini, kotxi Xesosi Kristo nakitiakori atxaua. Erekari Matamatakoti makatxakano maerekanitxi nireëkiti nikamini, ininiã na nipina. ³ Aïto maerekani xika Teoso paniätakiti iökatsopatakori !iposotari imaktxakiniri amaerekani, kotxi !aposotari akaminiri iua paniätakiti. Iuaritika Teoso makatxakari amaerekani, kotxi iua iokanatarari imi atemoni. Imi ïto ate ïto atoko, maerekati kamakari ïto atoko itxa. Teoso iokanatarari imi atemoni ipinini ikapani, amaerekani imaktxakini ikapani. Ininiã ixipokari maerekati posotiire aïtoã auakari. ⁴ Teoso kamari ikara, ininiã Xesosi kamari ikinika Teoso paniätakiti iökatsopatakori iaõka ate ikapani, kotxi ipaniätakiti atão inakarino. Ininiã !akamaikari maerekati aïto nireëkiti. Akamari Erekari Matamatakoti nireëkiti.

⁵ Ītotxi nireēkiti kamakani xinikapikari iītona nireēkitinoka. Erekarī Matamatakoti nireēkiti kamakani xinikapikari Erekarī Matamatakoti nireēkitinoka. ⁶ Kākiti xinikiniāri iīto nireēkitinoka, ixinikakiti txīkitakari iua ipinini, ininiākara kona auapika Teosokata. Kākiti auiritiniāri Erekarī Matamatakoti txīkitakiniri ixinikiniri Erekarī Matamatakoti nireēkitinoka, iua auapininiika Teosokata. Erekarīnireri iua. ⁷ Kākiti xinikiniāri iīto nireēkitinoka, Teoso mokaiakariakori itxauana, kotxi !inirekarina Teoso paniātakiti iaōka ikaminina. !Iposotarina Teoso paniātakiti iaōka ikaminina. ⁸ Ītotxi nireēkitinoka kamakani !iposotari ikamapoxokonitirinina Teoso.

⁹ Hītepekana, Erekarī Matamatakoti hāxixinire auiniā, hīkamari iua paniātakiti. !Hīkamari maerekati hīto paniātakiti. Erekarī Matamatakoti kākiti āxixinireē mauakanisaaki, na Kristo nakitiakori !itxauana, kotxi Erekarī Matamatakoti Kristo nakiti itxaua. ¹⁰ Hīto ipinapitikako maerekati xika, iuaritika hīxinire auākiri itxaua Kristo hāxixinireē auiniā. Hīxinire auākiri itxaua, kotxi Kristo kamari atāo inakarinoka ate ikapani. ¹¹ Teoso ōkitikari Xesosi, iua ipīkasaaki. Erekarī Matamatakoti Teoso nakiti hāxixinireē auiniā, Teoso Kristo ōkitikakari, txīkitakariko hīto ipinakari iuaīkana auāki inini, kotxi Erekarī Matamatakoti Teoso nakiti aua hāxixinireē.

¹² Ininiā nitariakori, auapitika akamakiti tīkane Teoso ikapani. !Auari akamakiti tīkane aīto nireēkiti akamini ikapani. ¹³ Hīto nireēkiti hīkaminiā, hīxinire ipīkari atoko itxa, ininiā ātipirika kona hāua Teosokata. Hamanainiāri Erekarī Matamatakoti maerekati hīto kamakiti ixipokini, iusaaki hāuapika ātipirika Teosokata.

¹⁴ Erekarī Matamatakoti nireēkiti kamakani, Teoso anaakori itxauana, kotxi Erekarī Matamatakoti Teoso nakiti. ¹⁵ Iua Erekarī Matamatakoti Teoso sikakiti hītemoni. ! Itxīkitakai nitiritxi kapīkareri hininiua. Itxīkitakai Teoso anaakori hininiua. Erekarī Matamatakoti posotiireē aākiritari aīri Teoso: “Papai, niri,” atxari. ¹⁶ Erekarī Matamatakoti sāpiretaua aāxixinireē Teoso anaakori aniniua. ¹⁷ Teoso anaakori aniniāua, aāpakapariko erekarī Teoso nīkatakiti ate ikapani. Kristo apakapari erekarī Teoso nīkatakiti iua ikapani, ininiā ate apakapari iuakata. Kristo misiritaākapeka. Ate misiritiko apaka auiniā Kristo sākire aūikini xika, Kristo ikinimane auīte inakasaakiaua, ate apaka aua iuakata iusaaki. Aātamatari iua iotximere. Peerekari iusaaki iuakata aūini.

Aāpakapariko Ikinipoko Erekarī

¹⁸ Uai itixi aūakasaaki, aātatsiirauata. Eereka !axinikaikari mitxi aātatsiirauatini, kotxi Teoso oerekauako ikinipoko erekarī. Iusaaki peerekari. ¹⁹ Ikinipoko Teoso kamakiti iātapari ipoxokoniritika Teoso keto ōti. Iusaaki aimarotari Teoso anaakori. ²⁰ Kotxi ikinipoko Teoso kamakiti misiritaākapeka, ixipokaāpotini tīkane. Ikinipoko Teoso kamakiti ixinireka !ixipokaāpota. Teoso txīkitakari ikinipoko xipokaāpotini. Iuaritika aimarotari, ipīkitxi xipokini ōti apokapitikako. ²¹ Ikinika Teoso kamakiti iātapari iua ōti. Iusaakiko itixi amaneri itxauako. !Ixipokaika. Iusaaki ikinika amaneri. !Ixipokaika. Teoso anaakori misiritiko !auaika. Peerekari iusaakiko.

²² Aimarotari uatxapiikama ikinika Teoso kamakiti atatsiirauata, amarini tsii sito atatsiitini atokokana. ²³ Na itixi Teoso kamakitananini atatsiirauata. Aāxixinire apaka akiripireta, kotxi anirekarī Teoso keto apokini. Iusaaki iua apakapaua ate iua anaakori. Iusaakiko aīto amaneri isikaua. Iusaakiko aīto !kaxiporeikari. Merepanika Teoso sikakiti auapeka atemoni, kotxi iua sikapekari Erekarī Matamatakoti atemoni. ²⁴ Teoso makatxakapekari amaerekani, aūikasaakiri isākire. Ininiā aiātapari apikomoni isikaenetakiti atemoni. !Aātamatapanikari isikaenetakiti, ininiā aiātapapanikari. Aūikapitikari isikaenetakiti isikiniua, ininiā atāo aūikiniri. ²⁵ Aiātapari aāpakapakiti tīkane. !Aāpakapanikari, iuaritika aiātapari apoxokoniritika, kotxi aimarotapitikari ikara apokini.

²⁶ Erekarī Matamatakoti moianataua, kotxi na kataparaxinireua. !Aimarotari aamanaākiti tīkane, Teoso amisākiretakasaaki. Iuaritika, Erekarī Matamatakoti misākiretari Teoso ate ikapani. Asākireē !aposotari asāpiretiniri Teoso ikinika anireēkiti, ininiā Erekarī Matamatakoti misākiretari Teoso ate ikapani. Ipinimoni itxa isāpiretiniri Teoso.

Kākiti sākireē !isākirauata Teosokata. ²⁷ Teoso imarotari kākiti ākixinire, ininiā iua imarotari Erekar Matamatakoti xinikakiti, kotxi Erekar Matamatakoti misākiretari Teoso, Teoso nakitiakori ĩkapani. Erekar Matamatakoti amanaāri Teoso, Teoso nireēkiti ikaminana inakitiakori.

Teoso Iteene Tiretiniua

²⁸ Aimarotari ikiniōtika erekar ikaminaua ate, kotxi iua tiretakani, iua mereēkini atxaua ate. Iuaritika aātasiirauatini auapitika. Iuaritika iusaaki apaka erekar ikaminaua. Iua mereēua, kotxi inirekar imereiniua. ²⁹ Itixi kamiko apisapanika Teoso imarotapekaua ate. Iua mereēpekaua ate, iua anaakori kaiōpokori aniniua ĩkapani. Imereēpekaua, imi Xesosi atoko aniniua ĩkapani. Ininiā Xesosi aītari apiari. ³⁰ Teoso akiritana imereēkini. Apaka ikamaerekatana iua mereēkini. Apaka itanapoko erekar isika ninoa ikamaerekatakinimoni.

³¹ Teoso kamari ikinipoko ikara erekar ate ĩkapani, ininiā natokopa itxa axinikakiti? Teoso kataparari moianatapitikaua, ininiā ate omanatakani tapara poiāoka. ³² Teoso sikari ikinipoko atemoni. Imi apaka isika atemoni, kotxi ipina ate akinika ĩkapani. Isikari imi atemoni, ininiā aua atxiīti iua masakakiniti atemoni? !Auari. Ikinipoko erekar isikapitikaua atemoni. Ikarone !auari. ³³ Aua atxiīti Teoso mereēkini maerekani sāpiretakari? !Auari. Teosora sāpiretari ninoa maerekani mauakani, kotxi iua kamaerekatapekana ninoa. ³⁴ Aua atxiīti Teoso mereēkini misiritiko sāpiretakari? !Auari. Kotxi Kristora misākiretari Teoso ate ĩkapani, kotxi Teoso ikikomoni auakari itxaua. Iua ipina ate ĩkapani, ininiā eereka Teoso ōkitikari iua, auapika inini ĩkapani. Iuara misākiretari Teoso ate ĩkapani. ³⁵ Ininiā kipa atxiīti iotokakatari Kristo tiretiniua? !Auari, kotxi amaxikikosaaki, Kristo tiretapanikaua. Amauarenisaaki, Kristo tiretapanikaua. Amisiritikosaaki, Kristo tiretapanikaua. Natxi auakasaaki, Kristo tiretapanikaua. Amamākanisaaki, Kristo tiretapanikaua. Monōkori auakasaaki, Kristo tiretapanikaua. Neenamatchi auakasaaki, Kristo tiretapanikaua. ³⁶ Teoso sākire iōkatsopatakor txari:

Pisākire aūuikini xika, pamonōkoniri ikiniōtika. Aōkiko monōkoni auapika. Soti auīte apanakini okini atoko, apanakini nirekar okiniua ate, itxa Teoso sākire iōkatsopatakor. ³⁷ Maerekati ikara atoko aua, iuaritika iteene akāiata, kotxi atiretakiri sikataparataua. ³⁸ Ia nimarota. Kristo tiretiniua iotokakakari !auari. Apīkasaaki, itiretapanikaua. Aūapanika inakasaaki, itiretapanikaua. Teoso nitiriakori iaxitikini !iotokakari itiretiniua. Satanasi nitiriakori !iotokakari itiretiniua. Īkorasaaki auakani, katana auakani apaka !iotokakari Kristo tiretiniua. !Auari posotiiretxi, Kristo tiretiniua iotokakakari. ³⁹ Iaxiti apiko nopinixiti auakani, iaxiti patapi auakani apaka, !iotokakari Kristo tiretiniua. Hinitiniāri Teoso tiretiniua iotokakakari, !hāpokari. Hinitiniāri ikinika Teoso kamakiti auiniātaā, iuaritika kona hāpokari Teoso tiretiniua iotokakakari. !Auari. Aūuīte Kristo Xesosi oerekaua Teoso iteene tiretiniua.

9

Teoso Mereēna Xoteoakori Inakitiakori ĩkapani

¹ Atāo nisākire. Kristo nakiti nitxaua, ininiā na nisāpiretari misirieneretxi. Nākixinireē nimarotari nisākire atāo inini, kotxi Erekar Matamatakoti oerekari nisākire atāo inini. ² Ia nisākire atāo. Iteene nimatinaniuatapika. Nākixinireē maerekaxiniretinoka nitxa, ninirimane Kristo sākire mauikakani xika. ³ Ninirekamari Teoso misiritinino nota, ninoa nitariakori imamisiritakani ĩkapani. Ninirekamari Kristo manirekakanino nota, ninirimane Kristo nakitiakori ininiua ĩkapani. Nipositiniāri ikara atoko nikamini, nikamari ninirimane ĩkapani. Txamari !niposotari. ⁴ Ninirimane Isaeo apika mekaniriakori itxauana. Teoso nirekana ninoa iua anaakori ininiuana. Teoso oerekari iposotiire ninoamoni. Isāpiretana ninoa ikamaenetakiti ninoa ĩkapani. Isikari ipaniātakiti iōkatsopatakor ninoamoni. Oerekana ninoa kiiniri atāo ikaminina, iuakata isākirauatakasaakina. Teoso sāpiretana ninoa ikamakiti tīkane ikinimane kākiti ĩkapani. ⁵ Ninirimane apika atokiriakorini Apraōoma, Isakima, Isaeoma pakini. Kristo uaimoni

iponaniākasaaki, ninoa apiko mekaniri itxaua, iuaritika Teoso itxaua. Ikinimane auite itxaua. “Peerekai,” matxari iua ātipirika. Ameē.

⁶ Atxiiti Teoso kona kamari ikamaenetakiti Isaeo apika mekaniriakori ikapani? Ikamapitikariko. Txamari kona ikinikani Isaeo apika mekaniriakori Teoso nakiti ! itxauana. ⁷ Kona ikinikani Apraão apika mekaniriakori atão Teoso anaakori !itxauana, kotxi Teoso txari Apraão:

Papika mekaniriakori atão inakani Isaki mekaniriakori itxauana.

⁸ Teoso sãpiretari Isaki auini, iua auini apisapanika. !Isãpiretari āti Apraão ākiri Isimaeo inakori auini, iua auini apisapanika. Isimaeo iponaniā, kotxi Apraão sirika Isimaeo inorokata. Ininiā kãkiti Isimaeo atoko, Teoso anaakori !itxauana. Teoso sãpiretari Apraão iua keene inini, ininiā isikaenetakininoka atão Apraão apika mekaniriakori itxauana. ⁹ Teoso sikaenetari Apraão keene inini. Itxari:

Niketo manapi nikanapiriāko. Iuasaaki Sara keeneroko. Kiki oenetako.

¹⁰ Apikomoni nisãpiretai. Hepeka anaakori iri ātika. Aãpika atokirini itxaua Isaki inakori. ¹¹⁻¹² Oa anaakori iponaniā ipipe. Iponaniinina apisapanika, maerekati ikaminina apisapanika, erekari ikaminina apisapanika, Teoso sãpiretaro oa:

Merepanika iponaniākari eereka iponaniākari nitiri itxauako.

Ininiā Teoso mereeri iua eereka iponaniākari Xakoo inakori apiari inini ikapani, iua auini apisapanika. Ininiā na Xakoo kamakitini txikitakari Teoso mereiniri iua. Teoso mereeri iua, kotxi inirekari ikara atoko inini. ¹³ Teoso sãkire iõkatsopatakori txari:

Xakoo nitireta. Isao nomanata.

¹⁴ Ikara atoko ininiā, kanatokopa itxa axinikakiti? Atauako Teoso na kamari erekari? Ikamapitikari erekari. Ātipirika Teoso kamari erekari. ¹⁵ Teoso txari Moisesi:

Ninirekiniāri āti niamonikini, niamonikari. Ninirekiniāri āti nimoianatini, nimoianatari. ¹⁶ Ikara atoko ininiā, anireekiti !itxikitakari Teoso mereiniua. Akamakiti !itxikitakari Teoso mereiniua. Imereēua, kotxi iamoniakaua. ¹⁷ Teoso txari Paraoo isãkire iõkatsopatakoriā:

Nota txikitakai auitetxi pininiua, niposotiire noerekini ikapani, niuāka ikini itixiti auakani imarotini ikapani,

itxa Teoso sãkire iõkatsopatakori. ¹⁸ Ininiā Teoso nirekiniāri iamoniakiniri āti, iua amonikari iua. Apaka inirekiniāri, itxikitakari āti ākixinire kaikoxinire inini, Teoso nireekiti imanirekakani tikane.

Teoso Omanākare, Iamonikare Pakini

¹⁹ Atxiiti hite txano nota: “Teoso ikara atoko ininiā, na ate xikani kaikoxinireua ate. ! Aposotari akaminiri Teoso manirekakiniti,” atxiiti hitxano. ²⁰ Txamari lapakata ia atoko hinini. Kiriparai hite ikara atoko ina sãkiretakani Teosomoni? Kãkiti hitxaua. Teoso kamakiti pitxaua. Atauako kamakori posotatari ikamakirimoni: “Kinirepa pikamano nota ia atoko ninini?” !Apakata ikara atoko hinini hikamakirimoni. ²¹ Hixinikari kiki tiitxi kamakari. Ikamari inireekiti. Atxiiti āti poriã katsariā, ikamari ipi kopiti. Atxiiti ianaka ikamari āti kopiti, peereri inini, kiiniri ikapani. Atxiiti ātipekana ikama patimari poiã ereri, ikiniõtika iãriā iãtiko ikapani.

²² Ikara atoko itxa Teoso kaminiri kãkiti. Teoso kamari apanakini kãkiti Teoso omanākare imarotinina ikapani imaerekanina xika. Iuasaaki oerekana iposotiire imarotininirina ikapani. Teoso omanatana ninoa, iuaritika imiteenekana. Kona uatxa ixipokana ninoa. Txamari iketo manapi ixipokanako ninoa. Uatxa imiteenekapanikari ninoa maerekani. ²³ Apaka ikamari apanakini iua amonikakini. Uatxa imiteenekari iua omanatakini maerekani, kotxi inirekari iua amonikakini imarotininiri iua ereka inini, kotxi peerekari iua. Iteene itiretari iamoniakakini. Ikamana ninoa erekari isikakiti apakapinina ikapani. ²⁴ Hite, ate pakini, iua amonikakini atxaua. Iua akiritakini atxaua. Na Xoteonanini akirita. Akiritana Xoteo minakaniua apaka. ²⁵ Teoso sãkire iõkatsopatakori, Oséia iõkatsopatakitiā, Teoso sãpiretari ikara. Itxari:

Kākiti mitxi nota nakitiakori minakonimoni nitzako: “Uatxa nota nakitiakori hītẁapekauako.” Ninoa mitxi nimatiretakinitimoni nitzako: “Uatxa nota tiretakini hītẁapekauako,” nitzako.

²⁶ Mitxi Teoso txana ninoa: “Na nota nakitiakorini !hītẁaua.” Ikara Teoso sākiretiniātaā, iuaātaātxikana: “Teoso ātipirika auāki inakari anaakori hītẁaua,” inaāka ninoamoni,
itxa Teoso sākire iōkatsopatakori.

²⁷ Apaka Teoso sākire iōkatsopatakoriā, Isaía txari:

Isaeo apika mekaniriakori kaiāopokori, potxoari uiniti kipatẁite atoko itxana, txamari poiāonoka makatẁakaāka imapinakani ikapani.

²⁸ Patimari Teoso xipokiniri iparīka imisiritiniri kākiti imaerekani xika, itxa Isaía. ²⁹ Mitẁipeka Isaía txari:

Apiananiri kaposotiireri nīkatari apanakini aāpika mekaniriakori imapinakani ikapani. Ininiā atenape auapanika. Teoso manīkatakanimauako, axipokapiimako kākiti Sotoma sitatẁiti auakani xipokini atoko, kākiti Komoha sitatẁiti auakani xipokini atoko atẁapiimako,
itxa Isaía sākire.

Xoteo Mauikakaniri Teoso Sākire

³⁰ Ininiākara aimarotari ia: Xoteo minakanuia manītakanisaakiri Teoso txīkitakinina atāo inakari kamakani ininiuana, iuasaaki Teoso txīkitakana atāo inakari kamakani ininiuana, kotxi auikarina Teoso sākire. ³¹ Txamari Xoteoakori nitaāpotari paniātakori ninoa atāo inakari kamakani txīkitakakari, txamari !apokarina. ³² Kinirepa !apokarina ikara? Kinirepa Teoso na txīkitakana ninoa atāo inakari kamakani ininiuana? Kotxi ! auikarina isākire. Inirekarina iparīkana txīkitakinina atāo inakari kamakani ininiuana. !Inirekarina auikininina Xesosi sākire. Ninoamoni Xesosi kai kimapori nopini auakari atoko itxa, kotxi kai xika kākiti mākitita. ³³ Teoso sākire iōkatsopatakori kitẁakapirīkari sāpiretari ia kai pirena. Itxari:

Pikenakotariko ia: Nota iokanatakiti kākitimoni kai atoko itxa. Nitakari iua kai Siāo sitatẁitiā Xoteoakori kimaporeē. Iua kai xika kākiti mākitita. Iua kai xika kākiti irika. Iuaritika iua sākire auīākani !ipētauata nota apisatoō.

10

¹ Nītariakori, nākixinireē iteene ninirekari Teoso makatẁakiniri ninirimane maerekani, Isaeo apika mekaniriakori maerekani. Nimisākiretari Teoso ninoa maerekani makatẁakiko ikapani. ² Nimarotari ninirimane iteene nirekiniri iparīkauatini Teoso ikapani. Txamari ninoa kerokari, kotxi !imarotarina atāo iparīkauatini Teoso ikapani. ³ !Imarotarina Teoso txīkitakiniri kākiti atāo inakari ikamini. Ninoaka nirekamari atāo inakari ikaminina, Teoso apakapinina ikapani. Ininiā !auiritarina Teoso txīkitakinina ninoa atāo inakari ikaminina. ⁴ Kristo kamari ikinipoko Teoso paniātakiti iōkatsopatakori iaōka, ininiā iuanoka txīkitakari ikinimane kākiti iua sākire auīākani atāo inakari ikaminina.

Apiananiri Akiritakani

⁵ Kitẁakapirīka Moisesi sāpiretari atāo inakari akamini Teoso paniātakiti. Iuasaaki itxari:

Ikiniika Teoso paniātakiti iōkatsopatakori ikiniōtika pikaminiā, pauapininiika pitẁako, itxa Moisesi sākire. ⁶ Txamari !aposotari ikara atoko akamini. Aāuikasaakiri Xesosi sākire, iua txīkitakaua atāo inakari akamini. Ininiākara !apakata pākixinireē pixinikiniri: “Kipa atẁiti posotari iaxiti apiko nopinixitimoni isini, Kristo notamoni iminini ikapani?” ⁷ !Apakata pākixinireē pixinikiniri: “Kipa atẁiti posotari ipīkani auiniātaā isini, Kristo notamoni iminini ikapani?” ⁸ Xesosi sākire auape hītemoni. Na hīsa ātiātaā iua sākire himarotini ikapani. Hinamaāpekari. Hākixinireēpekari. Xesosi sākire auikiko asāpiretapikari kākiti. Ia atoko asāpiretari kākiti: ⁹ Pinamaā, “Xesosi niauīte” pininiā, pākixinireē pauikiniāri Xesosi ipinini Teoso ōkitikiniri iua, iuasaaki pimaerekani makatẁakaākako. ¹⁰ Kotxi aākixinireē Xesosi sākire aāuikiniā, ikamaerekataua. Anamaā

“Maerekati kamakarino nota,” aniniã, iua makatxakari amaerekani. ¹¹ Teoso sãkire iõkatsopatakori txari:

Iua sãkire auiãkari pëtauatini lauari.

¹² Iua Kristo sãkire auiãkari atxiïti Xoteo itxaua. Atxiïti Xoteo minakatiua itxaua. Xoteo auïte itxaua Kristo. Xoteo minakaniua auïte apaka itxaua. Ikinimane auïte itxaua Kristo Apiananiri. Isikari itanapoko erekari ikinimane iua akiritakanimoni. ¹³ Teoso sãkire iõkatsopatakori txari:

Ikinimane akiritiniãri Apiananiri uãka imaerekanina imakatxakini ïkapani, iusaaki imakatxakaãkako imaerekanina.

¹⁴ Kiãtokopa itxa ninoa akiritiniri iua, isãkire imauikakanisaaki? Kiãtokopa itxa ninoa auikiniri isãkire, imakenakotakanisaakirina? Kiãtokopa itxa ninoa kenakotiniri isãkire, imasãpiretakonisaakina? ¹⁵ Kiãtokopa itxa Teoso iokanapirena sãpiretiko, ate maiokanatakaniãri iua sãkire sãpiretakani kãkitimoni? Teoso sãkire iõkatsopatakori txari:

Erekapitikari Teoso iokanapirena erekari sãpiretakani apokini kãkitimoni, kotxi isãpiretarina Teoso kamaerekaxiniretiniri kãkiti. Isãpiretarina erekari Teoso sikakiti kãkitimoni. Ikara iminapiretakitina kamapoxokonitari kãkiti.

¹⁶ Txamari na ikinimane kãkitini auikari Teoso iokanapirena erekari. Kotxi kitxakapirïka Isaía txari:

Apiananiri, asãpiretamari piokanapirena kãkitimoni, txamari lauikarina, itxa Isaía. ¹⁷ Kãkiti kenakotakasaakiri Teoso iokanapirena, Teoso txïkitakari kãkiti auikiniri isãkire. Kristo sãkire akenakotakasaaki, akenakotari Teoso iokanapirena.

¹⁸ Txamari nota pimaãï: “Atauako Xoteo kona kenakotari Teoso iokanapirena?” Ikenakotapitikarina, kotxi Teoso sãkire iõkatsopatakori txari:

Iaxiti apiko nopinixiti auakari oerekari Teoso ikini itixiti auakani. Teoso sãkire atoko itxa iaxiti apiko nopinixiti auakari oerekakiti.

¹⁹ Iuaïkana nipimaãï: “Atauako Xoteo ïmarotari Teoso iokanapirena?” ïmarotapitikarina. Moisesi sãpiretapekari Teoso sãkire. Itxari:

Nimakatxakari Xoteo minakaniua maerekani, ininiã nitxïkitakaiko hïte hïxikotinina ninoa mitxi nota nakitiakori minakaniua. Nitxïkitakai hïte homanãkarauatini, ninoa mitxi mimaroreni xika.

²⁰ Isaíapekana sãpiretari Xoteo minakaniua pirena. Isãpiretari Teoso sãkire itaparaxinireritika:

Teoso txari: “Ninoa nota manitakani aõkitano nota. Nimotika nota makiritakanimoni.”

²¹ Apikomoni isãpiretari Teoso sãkire Xoteo kamakiti:

Teoso txari: “Ikiniõtika namanaãri ninoa kanapiriini notamoni, txamari ïkïpitarina nisãkire. ïkamarina nisãkire iaõka. Inireëkitinoka ikamana.”

11

Xoteo, Teoso Sãkire Auiãkani

¹ Ininiã nipimaãï: “Atauako Teoso ïnirekaikari Xoteoakori?” Inirekapitikana. Nota apaka Xoteo nitxaua. Apraão apika mekaniri nitxaua. Pëxamiï apika mekaniri nitxaua.

² Teoso ïitakanapari Xoteoakori. Iua mereëna ninoa itixi kamiko apisapanika. Hïmarotari Teoso sãkire iõkatsopatakori, Erïasi tsoatakasaaki Teosomoni Xoteo maerekani isãpiretakasaaki. ³ Iusaaki Erïasi txari:

Apiananiri, ninoa okapekari kãkiti pisãkire sãpiretakani. Ikapirinikarina amesa pinakiti pitemoni sikakori takikoãtaã. Notanoka pisãkire sãpiretakarino auapanika.

Ninoa asikatikinitano nota okinino ïkapani,

itxa Erïasi. ⁴ Kanatokopa Teoso apakapapiretari Erïasi? Teoso txari:

Kona pitenanini auikari nisãkire. Nota nïkatari setxi mio kikiakori nota nakitiakori.

Ninoa kona teosonetari kãkiti kamakiti Paaoinakori. Kona ikapotoreëkauana iua apisatoõ,

Teoso txari Erïasi. ⁵ Ikara atokotxikana uatxa. Aua apanakini kãkiti Teoso mereëkini. Imereëna ninoa, kotxi iua nirekari ikinipoko erekari ikaminina ninoa. ⁶ Maerekati

kamakani kākiti, iuaritika Teoso mereēua ate. Isikari ikinipoko erekari ate ĩkapani maxikatiika. Aparika !itxikitakari iua sikiniri ikinipoko erekari atemoni. Aparika txikitakiniāri ikinipoko erekari isikiniua, ininiā kona maxikatiika isikarauata atemoni.

⁷ Ininiā kanatokopa atxa asākire apikomoni? Xoteoakori kona apakapari inireēkitina. Inirekarina Teoso apakapinina ninoa erekarini ininiuana. Teoso mereēkininoka apakapari ikara inakari. Apanakinipekana Teoso !auirita atāo imarotinina. Mōsiāreni atoko itxana. ⁸ Teoso sākire iōkatsopatakori txari:

Teoso txikitakari ninoa ākixinire imakakari atoko inini, iua sākire imimarotakanina ĩkapani. Kokipitikamana, iuaritika latamatarina Teoso kimapore. Kakenakokipitikamana, iuaritika !inirekarina Teoso sākire ikīpitinina. Uatxapiima ikara atoko itxapanika,

itxa Teoso sākire iōkatsopatakori. ⁹ Kitxakapirika Tavii txari Teosomoni:

Ninoa kiena kaiāopokori. Inipokotakasaakina, iuākatarina pite apokaerekatinina ninoa, kotxi kaiāopokori ikenana. Ikenana takapiri atoko itxa imaikinina ninoa. Itxikitakana ikerokinina. Ikara xika ninirekari pimisiritinina.

¹⁰ Ninirekari ninoa mōsiāreni atoko ininiuana, ininiā na atāo amatarina pikimapore. Kākiti tiitxi minari porikitakani atoko pitxikitakanako ninoa ātipirika, itxa Tavii sākire.

Xoteo Minakaniua Maerekani Makatxakiko

¹¹ Iuaikana nipimarauata: “Atauako Xoteoakori maerekani xika Teoso xipokana ninoa?” Konapitini. Xoteoakori kamari maerekati, ininiākara Teoso sāpiretari Xoteo minakaniua imaerekanina imakatxakini, Xoteo xikotinina ĩkapani, iuaikana Teosomoni ikanapiriinina ĩkapani. ¹² Xoteoakori kamari maerekati, ininiākara Teoso sikari erekari kīkiri apanakini itixi auakanimoni. Xoteo mapakapakiniti Xoteo minakaniua apakapa erekari kīkiri. Ininiā Xoteo kanapiriākasaaki Teosomoni, iusaaki apiaerekata Teoso sikakiti kākitimoni.

¹³ Uatxa nota misākiretai hīte Xoteo minakaniua, kotxi Teoso iokanatano nota hītemoni isākire nisāpiretini ĩkapani. Niuikari hītemoni niokanatiko. ¹⁴ Ikara atoko ininiā, atxiiti ninirimane Xoteo xikotai hīte, ininiā atxiiti apanakini ninoa kanapiriā Teosomoni, imaerekanina Teoso makatxakini ĩkapani. ¹⁵ Teoso takanapakasaakiri Xoteo, iua apakapari Xoteo minakaniua, ininiā ninoa Xoteo minakaniua kanapiriā Teosomoni. Teoso iuaikana apakapakasaakiri Xoteoakori, iusaakiko peerekari. Ipikani iuaikana auāki inini atoko itxako.

¹⁶ Komiri akamakasaaki, ipixini Teosomoni asikasaaki, aimarotari ikinipoko iua komiri iua nakiti ininiu. Aamina kotsa Teoso nakiti ininiā, imina pori apaka iua nakiti.

¹⁷ Xoteoakori oriva mina takakori atoko itxa, takakori Teoso nakiti. Ātikaka ipori kapatakaāka. Oriva itopakiri pori apaāka. Iapitaka inaāka ikapatakikoātaā. Aneē takari katiā. Takari sikakienatari itopakiri pori. Hīte Xoteo minakaniua iua oriva itopakiri pori atoko hītxaua. Hāpakapari Teoso sikakiti, kotxi hīte apotiitaua Xoteoakorikata, Teoso nakitiakorikata. ¹⁸ Hīte Xoteo minakaniua, kona hīuikapeua Teoso apakapini hīte. “Iua aāpori kapatakiko atoko, Teoso takanapana Xoteoakori, ate apakapini ĩkapani,” kona hītxape, kotxi aāpori atoko hītxaua. Na aāpori sikataparatarari aākotsa. Aākotsa sikataparatarari aāpori. Ininiā hīte apakapari Teoso sikakiti, kotxi hāpotiitaua Xoteokata.

¹⁹ Atxiiti hīte Xoteo minakaniua txano nota: “Iua aāpori kapatakaākori atoko Teoso takanapari Xoteoakori. Āti aāpori iapitakiko atoko, Teoso apakapaua ate,” hītxano atxiiti. ²⁰ Atāopitikara. Teoso takanapari Xoteoakori, kotxi ninoa !auikari isākire. Iua apakapai hīte, kotxi hīte auikari iua sākire. Iuaritika !hīuikapeua ikara atoko hinakasaaki. Erepaniko. ²¹ Teoso takanapari Xoteoakori, takari pori sauakakori atoko. Ininiā erepaniko, kotxi itopakiri aāpori atoko hītxaua. Atxiiti āti ōti okanapai hīte apaka.

²² Aimarotari katiraōkiri ininiu Teoso. Aimarotari apaka kataparaxinireri ininiu. Kataparaxinireri iua, kākiti kamakasaakiri maerekati. Katiraōkiri iua, itiraōki hinirekasaaki. Itiraōki himanirekakaniā, hīte apaka mapara hōkaāka, iua aāpori sauakakori atokokana. ²³ Xoteo takanapiniāri imauikakaniri Xesosi sākire, auikiniāri

iuaiškana isākire, Teoso iuaiškana mikanapiriāna, kotxi Teoso kaposotiireri ikara atoko ikamini. ²⁴ Hīte itopakiri pori sauakakori takarimoni iapitaākori atoko hītxaua. Kona ixinireka aua ikara atoko. Pamimari ikara atoko. Xoteo atāo oriva takakori atoko itxauana. Ininiā na kamimari mitxi auiniātaā iuaiškana Teoso takinina ninoa, iuaiškana imikanapiriinina ninoa iuamoni.

Xoteo Maerekani Makatxakaākapanikako

²⁵ Nitariakori ninirekari himarotiniri apanakini mimarotakiniti, ininiā na hūiukaua. Xoteo linirekari auikiniri Teoso sākire uatxa, iuaritika na ikara atoko litxapani ātipirika. Ikini itixiti auakani Teoso nireēkini Xoteo minakaniua kanapiriākasaaki Teosomoni, iusaakiko Xoteo kanapiriāko Teosomoni. ²⁶ Ininiā iusaaki ikinimane Xoteo kanapiriāko Teosomoni. Iusaaki Teoso makatxakari ninoa maerekani. Teoso sākire iōkatsopatakori kitxakapirika auakari ikara atoko itxa. Itxari:

Xoteo itxauako maerekanitxi makatxakakari. Imakatxakariko ikinika maerekati Xoteoakori kamakiti, Teoso manirekakiniti. Iusaaki Teoso nireēkitinoka inirekanako.

²⁷ Nimakatxakariko maerekati ninoa kamakiti, kotxi kitxakapirika nikamaenetari ikara atoko inakari, itxa Teoso sākire iōkatsopatakori.

²⁸ Xoteoakori linirekari Teoso iokanapirena erekari, ininiā Teoso takanapana ninoa. Ininiā Teoso iokanapirena erekari sāpiretaāka hīte Xoteo minakonimoni. Uatxa Teoso mokaiakariakori atoko itxauana Xoteoakori, iuaritika Teoso mereēna ninoa. Apraāo, Isaki, Xakoo pakini apika mekaniriakori itxauana, ininiākara Teoso tirtapanikana ninoa. ²⁹ Teoso kona mamakari isākire. Kākiti iua mereēkini ātipirika iua mereēkini itxauana. Isiākiti erekari kākitimoni imakatxaka iuaiškana. ³⁰ Hīte Xoteo minakaniua kitxakapirika hīkīpitari Teoso sākire, iuaritika uatxa Teoso amonīkai hīte, kotxi Xoteo kona kīpitari Teoso sākire uatxa. ³¹ Uatxa Xoteoakori kona kīpitari Teoso sākire. Teoso amonīkapekai hīte Xoteo minakaniua, ininiā Teoso iuaiškana amonīkanako Xoteoakori apaka. ³² Ikinimane kākiti na kīpitari Teoso sākire. Kona aposotari akīpitiniri Teoso sākire. Teoso txīkitakaua ikara atoko anini, kotxi inirekari aimarotiniri maerekati kamakani aniniua, iuaritika imisiritaua. Iamonīkaua.

Peerekari Teoso

³³ Peerekari Teoso. Atāonoka ikama. Paimatireri iua. Kākiti imarotari ikamakiti tīkane. Kākiti imarotari inireēkiti tīkane. ³⁴ Kimarotikori Teoso xinikakiti. Kōtākikikori Teoso. ³⁵ Teosomoni ikinipoko aua, ininiā kīpa asika atxiīti iuamoni? Asikiniri auari. Ininiā auari ate nakiti, iuaiškana Teoso sikiniua ikapani. ³⁶ Kotxi Teosokara kamari ikinipoko. Ikinipoko aua Teoso posotiireē. Ikamari ikinipoko iua ikapani. Ātipirika matxariko Teoso: “Peerekai pite.” Ameē.

12

Teosomoni Sikakori Auākiri

¹ Ininiā nitariakori Teoso amonīkapitikaua. Ininiā nota iteene otākikai hīte. Hīteka hīsikaua Teosomoni. Teosomoni sikakori auākiri atoko hītxauako. Ininiā iua nakitinoka hītxaua. Ikara atoko hīkaminiā, Teoso apokaerekatari. Ikara atoko inakari akaminari Teoso, ikara atāo. ² Hīkamapinikariko Teoso sākire mauīškani kamakiti atoko. Hāuiritariko Teoso txīkitakiniri hīxiniākiti ereka inini, ininiākara ipinipo hītxako. Iusaakiko himarotari Teoso nireēkiti. Himarotari Teoso nireēkiti ereka inini. Himarotari hīkamakiti tīkane iua apokaerekatini. Himarotari atāo hīkamini.

³ Teoso sikari ikinipoko erekari notamoni, ininiā nisāpiretari iua sākire hītemoni. Ininiā nota otākikai hīte hīkinika. Na hūiukapeua. Hīteka atāo himarotauako. Hīteka hātamakauako. Teoso txīkitakai hāuikiniri isākire. Iteene hāuikiniāri iua sākire, iteene hīteka himarotaua. ⁴ Kākiti ito ātika, iuaritika itotxiā auakari kaiāopokori. Aua ikanoke, itapike, oki, ikenakoki txaāpota. Ikinika iparīka aua. Ikanoke parīka ātiāo. Oki parīka ātiāo. Itxaāpota. ⁵ Iua atokokana atxa. Itotxi ātika atoko atxa, iuaritika itoua ate. Kanoketxi, tapiketxi, okītxi, kenakokitxi, itotxiā auakari atoko ate. Kristokata

aãpotiitaua. Anakititakakaua. ⁶Nota parîka Teoso îkapani âtião. Âti parîka Teoso îkapani âtião. Âti parîka Teoso îkapani âtião, itxaãpota. Teoso sikari erekari ikininapemoni, ikara iparîka ikamini îkapani. Atxiîti Teoso sikaimaroretai iua sâkire apanakinimoni pisâpiretini îkapani, ininiâkara Teoso sâkire pauikini iaõka pisâpiretari Teoso sâkire kâkitimoni. ⁷Teoso sikaimaroretiniâi apanakini pimiparîkatini, ininiâ pimiparîkatariko apanakini. Teoso sikaimaroretiniâi isâkire poerekini, ininiâ poerekarauatako. ⁸Teoso sikaimaroretiniâi âti pisikataparaxiniretini, ininiâ pisikataparaxiniretariko âti. Teoso nirekiniâri pisikiniri apanakini amonitakiti ninoamoni, ininiâ ito pisikako pipoxokoniritika. Teoso sikaimaroretiniâi auîtetxi pininiua, ininiâ auîtetxi erekari pitxauako. Teoso nirekiniâi apanakini piamonîkini, ininiâ pipoxokoniritika piamonîkanako.

Tiraõkitxi

⁹Atão pitiretariko apanakini pâkixinireë. Pomanatariko maerekanitxi. Na piotokakapiri erekari pikamini. ¹⁰Iteene hîtiretakakauako, kotxi Kristo txîkitakapekaua aîtaritakakiniua. Piteka pipaxitiniua atokokana, apiata pipaxitariko âti. ¹¹Pitaparaxinireritika piparîkauatako. Na piarinouatape. Piparîkauatako Teoso îkapani pipoxokoniritika pâkixinireë. ¹²Pipoxokoniatako, kotxi pimarotari Teoso kaminiri ikamaenetakiti. Pimîteenekariko pimisiritiko. Âtipirika pimisâkiretariko Teoso. ¹³Nipokori kaamatiniâ pitariakorimoni, tiitxi kaamatiniâ pitariakorimoni, auiniâ pitemoni, pisikanako. Papakapanako pipoxokoniritika ikinimane Xesosi sâkire auiâkani paapoko apoâkani, âtiâtaâ îkani.

¹⁴Pamanaâri Teoso erekari ikaminina pite misiritakani. Ari, pamanaâri Teoso erekari ikaminina ninoa. Na pamanaâpiri Teoso maerekati isikinina ninoa. ¹⁵Pipoxokoniatako poxokorinikata. Pitxiapata kamininanirinikata. ¹⁶Âti pitiretini atokotxikana, ikinimane pitiretako. Na piuikapeua. Pisâkirauatako kâkiti matxineirotenikata, katxineiroteni pimisâkiretini atokotxikana. “Kimaroreno nota,” na pitxape.

¹⁷Kâkiti kaminiâri maerekati pitemoni, na pikamapiri maerekati iuamoni. Atâonoka pikama ikinimane îkapani. ¹⁸Pinirekariko pauini kâkiti sauaki ereka inini, ininiâ maxikatîika kona pitxitapiri âti. ¹⁹Nitiretakini, na hîxikatxitapiri âti. Teosora xikatxitariko, kotxi Teoso sâkire iõkatsopatakori txari:

Nota parîka âti nixikatxitini. Notara misiritari maerekati kamakari, itxa Apiananiri sâkire. ²⁰Ari, kona pixikatxitapiri âti. Pikamariko âtimoni ia Teoso sâkire iõkatsopatakori iaõka:

Pomanatakiri natxitiniâ, pisikakienatari iua. Iposonatinia, pisikari iâtini. Ikara atoko pikaminiâ, ipêtauata maerekati pitemoni ikamini, itxa Teoso sâkire iõkatsopatakori. ²¹Na paupiritapiri maerekati piauîte atoko ininiua. Erekari pikamakasaaki, maerekati iokanatapeêkaika.

13

Aãuîteakori Nirekakiti Akîpitini

¹Akîpitariko aãuîteakori nirekakiti, kotxi Teosora auiritana ninoa auîtetxiakori ininiuana. Teosora takari ninoa auîtetxiakori aãuîteakori ininiuana îkapani. ²Aãuîteakori nirekakiti amakamakaniâ, Teoso nirekakiti apaka lakama, kotxi Teoso txîkitakana ninoa aãuîteakori ininiuana. Ninoa paniâtakiti amakamakaniâ, amisiritaâkako. ³Erekari kamakani !ipîkari iauîtena. Maerekati kamakaninani pîkana ninoa. Pinirekatari pimapîkakaniri piauîte? Ininiâ erekari pikamako, ininiâ iua txaiko: “Ereka pite.” ⁴Teoso nitiri itxaua piauîte, erekari pitemoni ikamini îkapani. Txamari maerekati pikaminiâ, erepaniko. Pipîkariko iua, kotxi iposotari imisiritinii. Iua Teoso nitiri itxaua kâkiti maerekati kamakani imisiritini îkapani. ⁵Ininiâkara pikamariko piauîteakori nirekakiti, kotxi pimakamakanisaakiri, pimisiritiko auapitika. Apaka pikamariko ninoa nirekakiti, kotxi pimarotari pâkixinireë ikara atoko atão pikamini.

⁶Piauîteakori Teoso nitiriakori itxauana, ininiâ erekari apaka pisikiniri txineiro ninoamoni iparîkana ikaminina îkapani. ⁷Ininiâkara pîkitxitana ninoa amanaâkiti,

sitatxi pauini ĩkapani, pitii papakapini ĩkapani. Pipaxitanako ninoa. Pikamariko ninoa nirekakiti.

Hĩtiretakiniua ĩkapani

⁸ Pĩikitxitariko ikinika piamotakiti. !Erekari pimaĩkitxitakaniri āti. Ātinoka tēpito erekari. Ia tēpito na txineironi. Ia tēpito atiraōki. Ia atoko inakari tēpito xipokini kona erekari. Ātipirika hĩtiretakakauako. !Erekari pixipokiniri pitiretiniri āti. Āti tiretakari kĩpitapekari Teoso paniātakiti iōkatsopatakori. ⁹ Teoso paniātakiti iōkatsopatakori txari: “!Pisiriĩkape pĩtanoro minakotokatika. Na pokaniuatape. Na piĩtiriuatape. Na pinirekapiri apanakini tii.” Akĩpitari ikara Teoso paniātakiti iōkatsopatakori, apanakini ipaniātakiti apaka, ia Teoso paniātakiti ātika akĩpitiniā. Ia Teoso paniātakiti paniātaua: “Piteka pitiretiniua atokotxikana, pitiretariko āti.” ¹⁰ Pitiretiniāri āti, maerekati ! pikaminiri iua. Ininiā āti pitiretiniā, pikamari Teoso paniātakiti iōkatsopatakori ikinika.

¹¹ Matiretari āti, kotxi aimarotari kaiaapekari Kristo kanapiriini. Ininiā pimerekako. Kona pimakapeko. Pipariĩkauatako Teoso ĩkapani, kotxi itixine Xesosi anikiniua ōti apokaāpotanapanoka. Akokaxiti aũukari Xesosi sãkire. Uatxa paĩtiki ikanapiriā. ¹² ĩkanōkari xipokaāpotanapanoka. Pokamara apokaāpotanapanoka Kristo kanapiriākasaaki. Maerekati ipiākasaaki kamakori atoko itxa, ininiā maiotokakari ikara akamini. Matakanapari maerekati. Makamari erekari, kotxi erekari akamakiti kapakaua, ininiā maerekati !imaĩkaua. Pokamarari atoko itxa erekari akamakiti. ¹³ Pokamara kãkiti kamari atão inakarinoka apanakini apisatoō. Makamari ikara atoko inakari ātipirika. !Erekari kiiniri maerekati akamini. !Erekari apoātini. !Erekari asiriĩkini sito aĩtanoro minakotokatika. !Erekari akaminiri maerekati aĩto nireēkiti. !Erekari aneenamauatini. !Erekari axikotiniri āti. ¹⁴ Ikara atoko inakari akamini !erekari. Makamari ia atoko inakari: Maamanaāri Apiananiri Xesosi Kristo kapakiniua, sotato mãka paikori sotato ĩto kapakini atoko. !Hĩxinikapiri: “Kanatokopa nitxa nikaminiri niĩto nireēkiti?” Kotxi maerekatinaoka aĩto nireēkiti.

14

Kona Hĩtaparakienatakapeua

¹ Hãuiritariko Xesosi sãkire poiãonoka auĩkari hĩtekata apotiitiniua. Na hĩtxitapiri iua, ixinikakiti na hĩte xinikakiti atoko iminakanisaaki. ² Kãkiti iteene auikiniāri Xesosi sãkire, atxiĩti inikari itanapoko nipokori. Āti kãkiti poiãonoka auikiniāri Xesosi sãkire, atxiĩti inikari takarinoka. ³ !Erekari ikinipoko niãkari sãpiretiniri takarinoka niãkarimoni: “Pikerokari” ininiri. Apaka !erekari takarinoka niãkari sãpiretiniri ikinipoko niãkarimoni: “Pikerokari” ininiri, kotxi Teoso apakapapekari iua. ⁴ Kinakariparai pite āti nitiri pinitakarii: “Pikerokari” ātimoni inakarii. Ikerokiniāri, iua patrãote pinitamariko. Maerekati likama, kotxi Apiananiri moianatari iua.

⁵ Atxiĩti āti sãkire: “Ia ōti erekari iteene axinikiniri Teoso.” Atxiĩti ātipekana: “Ikiniōtika erekari iteene axinikiniri Teoso.” Hãkixinireē hĩxinikariko: “Natokopa itxa atão nikamini?” ininiā eereka atão hĩkamini tĩkane himarotape. ⁶ Hĩte: “Ia ōti apiarekata iteene axinikiniri Teoso,” hininiā, ininiā ikara atoko hĩxinika Teoso hĩpaxitini ĩkapani, ininiā erekapitikari. Ikinipoko niãkari nikari ikinipoko, Teoso ipaxitini ĩkapani, kotxi apisapanika itxari Teoso: “Erekapitikai ia nipokori pisikinino niniãkiti ĩkapani,” itxari. Ikinipoko maniãkati apaka aukari Teoso nirekiniri iua nikiniri takarinoka. Iua apaka txari Teoso inipokotini apisapanika: “Erekapitikai ia kienatxi pisikinino niniãkiti ĩkapani,” itxari. Ininiā iua apaka paxitari Apiananiri. ⁷ Kona ateka auĩtetaua. Kona aũua ateka ĩkapaninanini. Kona apina ateka ĩkapaninanini. ⁸ Auapanika anakasaaki, aparĩkauata Apiananiri ĩkapani. Apĩkasaaki, apina Apiananiri ĩkapani. Ininiā auapanika anakasaaki, apĩkasaaki apaka, Apiananiri nakiti atxaua. ⁹ Kristo ipina, eereka ōkitikaua iuaĩkana, auapanika inakani auĩte ininiua ĩkapani, ipĩkani auĩte apaka ininiua ĩkapani. ¹⁰ Ininiā !apakata pitxitiniri pitari. “!Kĩĩkitei,” kona pitxapiri, kotxi akinika aãpokako

Teoso apisatoō. Iuasaaki iua sãpiretariko akamakiti, erekari inini atxiīti, maerekati inini atxiīti. ¹¹ Teoso sãkire iōkatsopatakori txari:

Nota Apiananiri, ātipirika auakari nitxaua. Ikinimane kãkiti kapotoreēkauako nota apisatoō. Ikinimane txanoko nota Teoso nininiua.

¹² Ininiã iuasaakiikarako akinika asãpiretari Teoso ikinika akamakiti ikorapokoriti aãuakasaaki.

Masikataparaxiniretakakaua

¹³ Ininiã hītokakariko hītaparakienatakakiniua. Hãkixinireē hītxako: “!Nitxīkitakapaniri nitari kerokiniri ikamakiti. !Nitxīkitakapaniriko nitari kaminiri maerekati,” hītxako. ¹⁴ Xesosi Apiananiri nakiti nitxaua, ininiãkara nimarotari, apakatapitika Teoso sãkire auiaãkari nikiniri ikinipoko nipokori, kotxi nipokori maerekati !auari. Iuaritika kãkiti auikiniãri iua nipokori maerekati inini, lapakata inikiniri. ¹⁵ Hinikiniãri ikinipoko nipokori, atxiīti hītari ãkixinire maxirauata, ininiã na atão hītiretari iua. Kristo ipina iua hītari iãkapani, ininiã hītakanapariko iua nipokori hinikini, kotxi atxiīti iua !auikaikari Xesosi sãkire, iua nipokori hinikini xika. ¹⁶ Erekari auakasaaki, !hãuiritapiri ãti sãpiretinii ikara erekari maerekati inini. ¹⁷ Teoso aãuīte ininiãua, kona nipokorinanini, kona iãtakorinanini, axinika. Teoso aãuīte ininiãua, axinikari Erekari Matamatakoti sikakiti atemoni. Iua txīkitakaua atãonoka akamini. Ikamaerekaxiniretaua. Isikapoxokonitaua. Teoso aãuīte ininiãua, ikara atoko itxa aãuini. ¹⁸ Ikara atoko aparīkauatiniã Kristo iãkapani, Teoso apokaerekataua. Kãkiti apaka apokaerekataua.

¹⁹ Ininiãkara manirekari kãkiti auini ereka inini, neenamatchi mauakani iãkapani. Masikataparaxiniretakakaua. ²⁰ Na himisiritapiri Teoso parīka nipokori xika. Ikinipoko nipokori erekari hinikini, txamari hīte nikakiti txīkitakiniãri ãti takanapiniri Kristo, hīkerokari. ²¹ Hītari kerokiniãri ikamakiti hīte niãkiti xika, apiaerekata himanikakaniri iua nipokori. Hītari kerokiniãri ikamakiti hīte iãtakiti xika, apiaerekata iua iãriã himiãtakani. Na xatiki hītxīkitakapiri hītari kaminiri maerekati. ²² Hītemoni ikinipoko nipokori nikiko erekari, txamari na hīsãpiretapiri apanakini. Erekari Teosonoka imarotiniri. Hīxinikasaakiri hīkamakiti atão inini, hãkixinireē himarotakasaakiri hīkamakiti atão inini, iuasaaki hīpoxokoniua. Ininiã kona hīteka apoītaua. ²³ Hinikasaakiri nipokori, hãkixinireē: “Erekari atxiīti ia nipokori ninikini?” hinakasaaki, iuasaaki Teoso txai: “Maerekati pikama,” kotxi kona pauikari pikaminiri erekari. Himauikakaniãri hīkamakiti ereka inini, ininiã maerekati itxaua hīkamakiti.

15

Āti Nireēkiti Kamiko Pirena

¹ Atxiīti ikinipoko Teoso sãkire aãuika, ininiã amoiatariko Teoso sãkire poiãonoka auiaãkari, imaposotakinini ikamini iãkapani. !Erekari ateka nireēkitinoka akamini.

² Erekari akaminiri aītari nireēkiti, iua amoiatini iãkapani, Teoso sãkire iteene auikini iãkapani. ³ Kristo apaka !ikamari iuaka nireēkiti. Iua kamari Teoso nireēkiti, kotxi Teoso sãkire iōkatsopatakoriã Kristo txari iri:

Kãkiti misãkirepiretakasaakii pite, notara ninoa misãkirepireta.

⁴ Ikinika Teoso sãkire iōkatsopatakori iōkatsopataãka ate oerekiko iãkapani. Teoso sãkire iōkatsopatakori aãuikasaaki, aiãtapari apoxokoniritika erekari apokini. Aimarotari erekari apokapitikako. Teoso sãkire iōkatsopatakori sikataparaxiniretaua.

⁵ Teoso sikataparataua, ininiã apoxokoniritika aiãtapari erekari apokini. Isikataparaxiniretaua. Ninirekari Teoso txīkitakiniri hīte nireēkiti ãtinoka inini, Kristo Xesosi nireēkiti iaōka hīkamini. ⁶ Erekari hinireēkiti hãkixinireē ãtinoka inini. Erekari hīsãkire ãtinoka inini. Ikara atoko hininiã, hīkinika txari Teoso: “Peerekai pite,” kotxi iua aãuīte Xesosi Kristo iri itxaua.

Xoteo Minakaniua Poxokoniuatini

⁷ Hãpakapariko ãti, Kristo apakapini atokokana, ininiã kãkiti txari Teoso: “Peerekai pite,” txariko. ⁸ Nisãpiretai. Kristo Xoteokori nitiri atoko itxapekaua. Ikara oerekari

Teoso sikiniri isikaenetakiti. Teoso sikaenetakiti Apraãomoni, Isakimoni, Xakoo pakinimoni, isikaenetakiti apokapeka Xesosi ïkorapokoriti apokasaaki. ⁹ Kristo Xoteokori nitiri atoko itxapekaua, ininiã Xoteo minakaniuua txari: “Kaamonïkareri Teoso. Peerekari iua,” itxana. Teoso säkire iökatsopatakori txari:

Xoteo minakaniuua auiniãtaã nitxariko Teoso: “Peerekai pite.” Nixikarauata pite ïkapani, kotxi peerekai pite.

¹⁰ Iuaïkana Teoso säkire iökatsopatakori txari:

Hïte Xoteo minakaniuua hïpoxokoniuatako Xoteoakorikata, Teoso nakitiakorikata.

¹¹ Iuaïkana Teoso säkire iökatsopatakori txari:

Hïte hïkinika Xoteo minakaniuua, “Peerekari Apiananiri” hïtxako. Hïkinika itixi auakanii hïxikarauatako Teoso ïkapani.

¹² Iuaïkana Teoso säkire iökatsopatakoriã Isafa txari:

Auako Xesee apika mekaniri. Xoteo minakaniuua auïte itxauako. Ninoa imarotariko isäkire iaõka ikamini, itxa Teoso säkire iökatsopatakori.

¹³ Teosora txïkitakai himarotniri isäkire iaõka ikamini. Ninirekari iua iteene kamapoxokonitini hïte. Ninirekari ikamaerekaxiniretinii hïte, kotxi häuikari iua säkire. Ininiã himarotari häpakapapitkariko Teoso säkire iaõka. Erekar Matamatakoti posotiireë himarotari ikara.

Paoro Teoso Iokanapirena Erekar Säpiretakari Xoteo Minakonimoni

¹⁴ Nitariakori, nota imarotari ereka hinini. Nimarotari hïte iteene kimarore hinini hõerekakakinuua ïkapani. ¹⁵ Iuaritika ia niökatsopatakitiã nõtäkikapekai hïte nitaparaxiniriritika. Himarotakiti, iuaïkana nisäpiretai, iuaïkana hïxinikiniri ïkapani. Teoso sikari erekari notamoni, ininiã ikara atoko niökatsopata hïtemoni. ¹⁶ Teoso sikari erekari notamoni, kotxi itxïkitakano Xesosi Kristo nitiri nininiuua. Ipaniãtano nipaïkauatini Xoteo minakaniuua ïkapani. Sasetotxi apakapari kãkiti mïkiti, ininiã sika itxari Teosomoni. Ikara atoko itxa sasetotxi païka. Nota sasetotxi atoko nitxaua. Nisäpiretari Teoso iokanapirena erekari Xoteo minakonimoni, ininiã ninoaka sikaua Teosomoni inireëkiti ikaminina ïkapani. Teoso apakapari ikara atoko inakari ninoaka iuamoni sikakanuua. Erekar Matamatakoti kamaerekatari kãkiti Teoso apakapinina ïkapani.

¹⁷ Ininiã Teoso ïkapani nipaïkauatakasaaki, niuikari Xesosi Kristo. ¹⁸ Nota kona iuikaua, kotxi Kristo posotiireë Xoteo minakaniuua kamari Teoso nireëkiti. Kristo paniãtano nota iua säkire nisäpiretinina Xoteo minakaniuua. Ipaniãtano inireëkiti nikamini Xoteo minakonikata nauakasaaki, ininiãkara ninoa auikari nisäkire. Ininiã ikamarina Teoso nireëkiti. ¹⁹ Erekar Matamatakoti posotiireë noerekari Teoso takaõtxikare ninoamoni. Noerekari posotiiretxi kãkiti maposotakinini ninoamoni. Ininiãkara ninoa kamari Teoso säkire iaõka. Kristo iokanapirena erekari ikinika nisäpiretapekari kãkiti Xerosareë sitatxiti auakani. Eereka kãkiti apikoxiti auakani nisäpireta. Eereka kãkiti apikoxiti auakani nisäpireta. Nitxaãpota kãkiti nisäpiretini. Imapotõkire Irïria tixinipeka napoka, Kristo iokanapirena erekari nisäpiretini ïkapani. ²⁰ Ätipirika ninirekari nisäpiretiniri Kristo iokanapirena erekari Kristo mimarotakoniãtaã. Ininiã kona nipaïkauata Teoso ïkapani äti païkauatiniãtaã, kotxi äti säpiretapekari Kristo iokanapirena kãkiti iuaãtaã.

²¹ Kotxi Teoso säkire iökatsopatakori txari:

Mitxi iua masäpiretakoni imarotariko iua säkire. Mitxi iua säkire makenakotakani imarotariko iua säkire, itxa Teoso säkire iökatsopatakori.

²² Kaiãokataikani ninirekamari nisini hïtemoni, txamari kona apakata, kotxi iusaaki nisäpiretari Kristo säkire Kristo säkire mimarotakanimoni.

Paoro Seenetini Homamoni

²³ Itokanani ninirekamari naõkitinini hïte. Uatxaika apakata nisini hïtemoni, kotxi nixipokapekari nipaïka ïkorapokoriti. ²⁴ Nirekari Espãnia tixinimoni nisini. Iuaã nisikasaaki, ninirekari naõkitinini hïte. Ninirekari mapaõti nikaikotini hïtekata, kotxi

nipotxitari hĭtekata nauini. Ninirekari hĭte moianatinino Espániamoni nisini ĭkapani, ininiã eereka Espánia tixinimoni nisa. ²⁵ Uatxa hĭtemoni nisini apisapanika, nisa Xerosareĕmoni, kotxi ninirekari nanikiniro txineiro kãkiti Teoso nakitiakori iuaã auakani nisikini ĭkapani. ²⁶ Kristo sãkire auiãkani, Xoteo minakaniua Masetónia tixini auakani, Akaia tixini auakani pakini sikaro oa txineiro. Inirekarina nisikiniro Teoso nakitiakorimoni, matxineirotenimoni, Xerosareĕ sitatxitiã. ²⁷ Ninoa poxokoniuata oa txineiro isikinina Xerosareĕ auakanimoni. Erekarĭ oa txineiro isikinina, kotxi Xoteoakori Kristo sãkire auiãkani sikari Teoso sikakiti Teoso iokanapirena erekari Xoteo minakonimoni. Ininiã erekari Xoteo minakaniua sikiniri ipixini itxineirotena Teoso sikakito, Xoteoakorimoni. ²⁸ Ininiã oa txineiro nanika Xerosareĕ auakanimoni. Ninoamoni txineiro nisika atoko, ininiã eereka nipotorika Espániamoni nisini. Espánia napokini apisapanika nisako hĭtemoni. ²⁹ Ereĕ napokasaaki, nisãpiretai ikini sereti erekari Kristo sikakiti hĭtemoni.

³⁰ Nitariakori nota amanaãĭ hĭte, himisãkiretiniri Teoso nota ĭkapani. Hĭkenakotatari namanaãkiti? Himisãkiretariko Teoso nota ĭkapani. Xesosi Kristo aãũte itxaua, ininiã namanaãĭ himisãkiretiniri Teoso nota ĭkapani. Erekarĭ Matamatakoti txĭkitakaua atiraõkiuatini, ininiã himisãkiretari Teoso nota ĭkapani. Ikara atoko hĭkaminiã, Teoso sikataparatanano nimisiritiko auakasaaki. ³¹ Kristo sãkire mauiãkani Xotéia tōpa auakani nirekari imisiritinino nota. Himisãkiretari Teoso ninoa mamisiritakanino ĭkapani. Himisãkiretari Teoso, Teoso nakitiakori Xerosareĕ auakani apokaerekatiniro txineiro Xoteo minakaniua iokanatakito. ³² Ininiã Teoso nirekiniãri, napoka hĭtemoni nipoxokoniritika. Ininiã asikapoxokonitakakaua. ³³ Teoso akamaerekaxiniretakiri aua hĭtekata. Ameĕ.

16

Paoro Akiriuãkaãpotana Ixinikakini

¹ Niokanataro aĭtaro Pepi inakoro hĭtemoni. Peerekaro oa. Omoianatana Xesosi sãkire auiãkani Sĕkireia sitatxiti auakani. ² Apiananiri nakito otxaua, ininiã hãpakaparoko hĭpoxokoniritika, kotxi iua nakitiakori apaka hĭtxaua. Onirekiniãri himoianatiniro, himoianataroko, kotxi omoianatapekana itomaneri kãkiti. Omoianatapekano nota apaka.

³ Hĭsãpiretanako Pirisira, oĭtaniri Ákira pakini nixinikamanapitinina ninoa. Ninoa parĭkauatapeka Kristo Xesosi ĭkapani notakata. ⁴ Okaãkanapanokana nota imoianatinina xika. Peerekana, kotxi erekari ikaminanona. Xoteo minakaniua, ikini Teoso misãkiretikoãtaã apotiitakaniua apaka imarotari erekari Pirisira, Ákira pakini kamakiti nota ĭkapani. ⁵ Xesosi sãkire auiãkani apotiitaua ninoa aapoko Teoso imisãkiretinina ĭkapani, ininiã hĭsãpiretanako nixinikamanapitinina ninoa.

Hĭsãpiretariko nitiretakiti Epeneto inakori nixinikamanapitiniri iua. Ásia tixiniã iua merepitipanika auikari Kristo sãkire. ⁶ Hĭsãpiretaroko Maria nixinikamanapitiniro oa. Oa iteene parĭkauata ate ĭkapani. ⁷ Hĭsãpiretanako ninirimane Ātoróniko, Xónia pakini nixinikamanapitinina ninoa. Mĭtxipe ninoa aua notakata kateia ãki. Teoso kãkitimoni iokanatakini iteene imarotana Ātoróniko, Xónia pakini. Ninoa ipi auikari Kristo sãkire, iua sãkire nauikini apisapanika.

⁸ Hĭsãpiretariko Āpirato nixinikamanapitiniri iua. Nitiretari iua. Nitari itxaua, kotxi Apiananiri anaakori atxaua. ⁹ Hĭsãpiretariko Opano nixinikamanapitiniri iua. Iua parĭkauata Kristo ĭkapani atekata. Hĭsãpiretariko nitiretakiti Esitaki nixinikamanapitiniri iua. ¹⁰ Hĭsãpiretariko Aperi nixinikamanapitiniri iua. Imisiritiko sauaki iua ! ikipatari Kristo sãkire auikini. Hĭsãpiretanako Arisitóporo aapoko auakani nixinikamanapitinina ninoa. ¹¹ Hĭsãpiretariko ninirimane Erotxião nixinikamanapitiniri iua. Hĭsãpiretanako Apiananiri nakitiakori Nasiso aapoko auakani nixinikamanapitinina ninoa.

¹² Hīsāpiretanako sitoakoro Tipena, Tiposa pakini nixinikamanapitinina ninoa. Ninoa parīkauatapitipo Apiananiri īkapani. Hīsāpiretaroko nitiretakito Pesitxi nixinikamanapitiniro oa. Oa apaka parīkauatapitipo Apiananiri īkapani. ¹³ Hīsāpiretanako Hopo, inoro pakini nixinikamanapitinina ninoa. Apiananiri mereēri iua. Iua inoro turetano nota, ninoro tiritinino atokotxikana. ¹⁴ Hīsāpiretanako Asīkiritō, Pirekōtxi, Émisi, Pataropa, Émasi, ikinika aītariakori ninoakata apotiitakaniua pakini nixinikamanapitinina ninoa. ¹⁵ Hīsāpiretanako Piróroko, Xória, Nereo, Nereo itaro, Orīpa, ikinika Teoso nakitiakori ninoakata apotiitakaniua pakini nixinikamanapitinina ninoa.

¹⁶ Himaaratakakauako, kotxi aītaritakakaua. Kristo nakitiakori ikini Teoso misākiretikoātaā apotiitakaniua xinikamanapitai hīte.

Paoro Ōtākikare Mapotōkire

¹⁷ Nitariakori iteene nōtākikai hīte. Erepaniko kākiti neenamtxi nireēkani. Ninoa nirekari Kristo sākire auīākani omanatinina apanakini Kristo sākire auīākani. Na atāo ninoa oerekakiti sākiretxiti, ininiā atxiīti kākiti takanapari Kristo sākire auīkani ninoa oerekakiti xika. Kristo sākire nota oerekakiti hītemoni atāo. Ninoa oerekakiti koketakori sākiretxiti. Ninoa moianariakori kona hītxapeua. ¹⁸ Kākiti ikara atoko inakani kona parīkauata aāuīte Kristo īkapani. Ninoa parīkauata iītona nireēkiti īkapani. Imisirienetarina kākiti sākire auīākani. Imisirienetarina kākiti ikara atoko inakani, kotxi kākiti potxitari isākirena. Kākitimoni peerekari ninoa sākire. ¹⁹ Ikinika kākiti imarotari hīte kaminiri Kristo sākire iaōka, ininiā nota iteene poxokoniuata hīte ikara atoko hininiā. Ninirekari kiikite hinini erekari hīkamini īkapani. Ninirekari himimarotakaniri maerekati hīkamini. ²⁰ Teoso akamaerekaxiniretakiri, pāitiki xipokariko Satanasi posotiire, ininiā hīposotari hīokanatiniri Satanasi isini.

Aāuīte Xesosi Kristo ātipirika sikari ikinipoko erekari hītemoni.

²¹ Tximótxio, notakata parīkauatakari, xinikamanapitai hīte. Ninirimane Arósio, Xasão, Sosipato pakini xinikamanapitai hīte apaka.

²² Nota Tésio inakori iōkatsopatari ia iōkatsopari Paoro īkapani. Nota apaka xinikamanapitai hīte, kotxi Apiananiri nakiti nitxaua.

²³ Nota Paoro aua Kaio aapoko. Kristo sākire auīākani apotiitaua iua aapoko Teosokata isākirauatinina īkapani. Iua nirekari himarotini iua xinikamanapitini hīte. Erásito inakori apaka xinikamanapitai. Txineiro nīkatakari iua. Sitatxi auakani sikakito inīkata iua. Aītari Koato inakori xinikamanapitai hīte apaka.

²⁴ Aāuīte Xesosi Kristo ātipirika sikari ikinipoko erekari hītemoni. Ameē.

²⁵ “Peerekari Teoso,” matxako. Iua posotari ikamataparaxiniretinii hīte, ininiā kona hīotokakari hāuikiniri Kristo sākire. Teoso iokanapirena erekari nota sāpiretakiti, Xesosi Kristo sākire pakini sāpiretari ikara atoko inakari. Ikara Teoso sākire kitxakapirīka !kimarotikori. Uatxa imarotapeēkaika. ²⁶ Īkorasaaki asāpiretapekari ikara Teoso sākire, Teoso sākire sāpiretakani iōkatsopatakiti kitxakapirīka. Uatxa aimarotari ninoa sāpiretakiti. Teoso auapika inakari paniātari isākire sāpiretiko ikini itixiti auakanimoni. Ininiā apakata ikinimane auīkiniri isākire. Apakata ikinimane kaminiri inireēkiti iaōka.

²⁷ Iuanani Teoso txaua. Iuanokara imarotari atāo ikinipoko. Ātipirika matxariko iua: “Peerekai pite, kotxi peerekari Xesosi Kristo.” Ameē.

1 KORĪTO

Merepanika Paoro Iokanatsopatakiti Korīto Auakanimoni

¹ Nota Paoro, Xesosi Kristo iokanatakitino. Teoso akiritano iua iokanatakiti nininiua ĩkapani, kotxi inirekari iokanatinino kăkitimoni isăkire nisăpiretini ĩkapani. Aĭtari Sŏseni inakori aua notakata uai. ² Niokanatsopata hĭtemoni, kăkiti Xesosi săkire auĭăkani Korĭto sitatxiti auakanimoni. Kristo Xesosi makatxakakini hĭtxaua Teoso ĩkapani. Teoso akiritai hĭte iua nakitiakori hininiua ĩkapani. Apaka niokanatsopata ikini tŏpati auakanimoni, aăuĭte Xesosi Kristo uăka akiritakanimoni. Ate auĭte Xesosi, ninoa auĭte apaka itxaua. ³ Aĭri Teoso, Apiananiri Xesosi Kristo pakini sikari ikinipoko erekari hĭtemoni. Ninoa kamaerekaxiniretai hĭte.

Paoro Misăkiretari Teoso Korĭto Auakani ĩkapani

⁴ Ătipirika nimisăkiretari Teoso ia atoko: “Peerekai pite, kotxi Xesosi Kristo sikari ikinipoko erekari Korĭto auakanimoni. Ikara erekari pite sikakiti. ⁵ Peerekai pite, kotxi pite kamaerekatari ninoa auini. Pite oerekana ninoa săkire atăo inini ĩkapani. Pite kamaimaroretana. Ininiă ninoa săkire apiaerekata. Ninoa imarore apiaăpota.” Ia atoko nimisăkiretari Teoso.

⁶ Hĭtemoni asăpiretakiti Kristo pirena auapeka hăkixinireė. Ininiă iteene hăuikari Kristo săkire. ⁷ Ininiă hiătapakasaakiri aăuĭte Xesosi Kristo kanapiriini, ikini sereti erekari Teoso sikakiti aua hĭtemoni iua parĭka hĭkamini ĩkapani. ⁸ Hĭte isikataparaxiniretiniritika ikanapiriini ōti apokako. Ininiă maerekati hĭtemoni !auari aăuĭte Xesosi Kristo apokasaaki. ⁹ Teoso kamariko ikara hĭtemoni, kotxi ikinika isăkire iaŏka ikamako. Iuakara akiritai hĭte, himoianatiniri imi aăuĭte Xesosi Kristo.

!Homanatakakapeua

¹⁰ Nitariakori, aăuĭte Xesosi Kristo posotiireė nŏtăkikai. Hĭsăkire Ătinoka hĭtxako. !Ninirekari homanatakakiniua. Ninirekari Ătika hĭxinikakiti auini. Ninirekari Ătika hinirekakiti auini. ¹¹ Nitariakori, Kroe aapoko auakani săpiretano hĭtekarika hinaiatakakiniua. ¹² Kotxi apanakini hĭte txari: “Paoro săkirera nota kĭpita.” Ătipekana: “Aporo săkirera nota kĭpita.” Ătipekana: “Petro săkirera nota kĭpita.” Ătipekana: “Kristo săkirera nota kĭpita.” ¹³ !Apakata ikara atoko hĭkamini. Kristo !ikaiarikaăka. Kona Paoro ipina aamina ĩpiriămitakari nopini hĭte ĩkapani. Kona Paoro uăkaă hĭpatxisataăka.

¹⁴ Nisăpiretari Teoso ereka inini, kotxi kona notani patxisatai hĭte. Krispo, Kaio pakininanira nipatxisata. Apikomoni !nipatxisatari kăkiti. ¹⁵ Ininiă kona kăkiti săpiretari nipatxisatiniri kăkiti nota uăkaă. ¹⁶ Ii. Nimaxinĭkaretari. Nipatxisatari Esitėpana, iua aapoko auakani pakini. Apikomoni nipatxisatakini !nixinikaika. ¹⁷ Kristo kona iokanatano nipatxisarauatini ĩkapani. Iokanatano Teoso iokanapirena erekari nisăpiretini ĩkapani. !Inirekari kăkiti săkireė, kăkiti imaroreė nisăpirenauatini, kotxi kăkiti imarore !isăpiretari Kristo ipinini aamina ĩpiriămitakari nopini amaerekani imatxakini ĩkapani.

Teoso Imarore

¹⁸ Teoso săkire mauĭăkani uăkatari !kiĭkiteri kăkiti Kristo ipinini aamina ĩpiriămitakari nopini săpiretakani. Atepekana, Kristo ipinini săpiretiko oerekari Teoso posotiire, kotxi Kristo ipinini makatxakari amaerekani. ¹⁹ Teoso săkire iŏkatsopatakori kitxakapirĭka txari:

Nixipokariko ĩkorapokoriti kimarorerini imarore. Nixipokariko kiĭkiterini iĭkite. Itxa Teoso kitxakapirĭka. ²⁰ Ĩtapari kimaroreri? Ĩtapari apaiaŏkarauatakari? Naniparari kaxinikareri ĩkorapokoritikiri? Teoso oerekepekari ĩkorapokoritikiri imarore miĭkiteti imarore atokotxikana inini. ²¹ Paimatireri Teoso, kotxi !auiritari ĩkorapokoriti auakani imarotini iua ninoaka imaroreė. Apanakinimoni Kristo săkire săpiretiko !kiĭkiteri,

iuaritika Teoso apokaerekatari imakatsakiniri kākiti maerekani, Kristo sākire sāpiretiko aukasaakina.

²² Xoteoakori nirekari atamatiniri Teoso takaōtxikare, isākire auikinina ĩkapani. Krekoakoripekana nirekari imaroretxi apiari imarotini. ²³ Iuaritika ate sāpiretari Kristo ipinini ĩpiriāmitakari nopini amaerekani imakatsakini ĩkapani. Xoteoakori ĩnirekari ĩkara asākire auikinina. Krekoakoripekana uākatari ĩkara asākire miikiteti sākire inini. ²⁴ Iuaritika Teoso akiritakini aua Xoteoakori, Krekoakori pakini. Ninoamoni Kristo parĩka oerekari Teoso posotiire. Iua parĩka oerekari Teoso imarore. ²⁵ Kākiti uākatari Teoso imarore !kiikiteri, iuaritika axapitiki Teoso imarore apiata. ĩkinipoko kākiti imarore poiāoka. Axapitiki Teoso tapara apiata. ĩkinipoko kākiti tapara poiāoka.

²⁶ Nitariakori, Teoso akiritakasaakii, hĩxinikari kākiti xinikakiti atokokana. Natokopa itxa hĩte iuasaaki? Iuasaaki !kimarorei. !Kaposotiirei iuasaaki. Auĩtetxi !hĩtxaua iuasaaki. Itori hĩte ĩkara atoko inakani iuasaaki. ²⁷ Teoso mereēri kākiti. ĩkorapokoriti auakani uākatari ninoa kākiti Teoso mereēkini miikiteni ininiua. Imereēna ninoa, kimaroreni ĩkorapokoriti auakani pētauatini ĩkapani. ĩkorapokoriti auakani uākatari ninoa kākiti Teoso mereēkini iōkapetakani ininiua. Imereēna ninoa, katapararini ĩkorapokoriti auakani pētauatini ĩkapani. ²⁸ Iua mereēri kākiti. ĩkorapokoriti auakani uākatana ninoa Teoso mereēkini minakani ininiuana. Imereēri apanakini manirekakini. Imereēri kākiti omanatakoni. Kinirepa Teoso mereēri kākiti ĩkara atoko inakani? Teoso oerekari kākiti, kākiti uākatakiti apiari inini na atāo. ²⁹ ĩkara atoko ininiā, kākiti !iposotari iuikiniua Teoso apisatoō. ³⁰ Teosora txĩkitakaua Xesosi Kristo nakitiakori aniniua. Kristo nakiti aniniāua, aimarotari imaroretxi atāo inakari. Kristo txĩkitakaua atāo inakari akamini Teoso apakapiniua ĩkapani. Iua txĩkitakaua Teoso nakitiakori aniniua ĩkapani. ĩkitxirauata ate ĩkapani ĩpĩkasaaki.

³¹ Teoso sākire iōkatsopatakori txari:

!Apakata piuikiniua. Apakatapitika piuikiniri Apiananiri.

2

Xesosi ĩpinini ĩpiriāmitakari Nopini

¹ Nitariakori, napokasaaki hĩtemoni, nisāpiretai Teoso sāpiretakiti. Kona nisāpiretai notaka sākire nimatire. Iuasaaki kona noerekai notaka imarore. Teoso sākirenoka nisāpiretai hĩte. ² Hĩtekata nauakasaaki, na ninirekari āti imaroretxi nimarotini. Ninirekari Xesosi Kristonoka nisāpiretinii. Apiata ninirekari nisāpiretinii iua ipinini kākiti ĩkapani ĩpiriāmitakari nopini. ³ Hĩtekata nauakasaaki kona kataparaxinireno. Nikikinanaka niĩkarauatini xika. ⁴ Iuasaaki kona kākiti imaroreēni nisākirauata. Kona kākiti imaroreēni ninirekari hāuikiniri Teoso iokanapirena nisāpiretakiti iuasaaki. Teoso iokanapirena nisāpiretakasaaki, kākiti imarotari Erekari Matamatakoti posotiireē nisākirauata. ⁵ Ininiā kona kākiti imaroreēni hāuikari Teoso iokanapirena. Hāuikari Teoso iokanapirena Teoso posotiireē.

Erekari Matamatakoti Imarore

⁶ Teoso sākire auĩākani iteene ākixinireē aneēkani imarotari Teoso iokanapirena asāpiretakiti kimatireri inini. ĩkara imaroretxi kona ĩkorapokoriti auakani imaroreni. Kona auĩtetxiakori imaroreni ĩkara imaroretxi. Kotxi ninoa imarore paĩtiki !auaika. ⁷ Asāpiretari Teoso imarore mitxi kākiti mimarotakiniti, kotxi Teoso kipatari. Itixi kamiko apisa Teoso nirekaua asāpiretiniri ĩkara imarore kākitimoni ate iotximere aā-pakapini ĩkapani. ⁸ Auĩtetxiakori ĩkorapokoriti auakani ĩmarotari ĩkara Teoso imarore. Ninoa imarotaākamariiko, ininiā !okamarinako Apiananiri kaiotximereri aamina ĩpiriāmitakari nopini. ⁹ Kitxakapirĩka Teoso sākire iōkatsopatakori txari: Kākiti oki !atamatapanikari Teoso kamakiti tĩkane iua tĩretakani ĩkapani. Kākiti kenakoki !ikenakotapanikari Teoso kamakiti tĩkane iua tĩretakani ĩkapani. Kākiti !ixinikapanikari Teoso kamakiti tĩkane iua tĩretakani ĩkapani.

¹⁰ Iuaritika Teoso oerekapekaua Erekarī Matamatakotiā. Ikinipoko imarotakarī itxaua Erekarī Matamatakoti. Ikinipoko kipatakori Teoso imarore imarota. ¹¹ Kākiti ākix-inirenoka imarotari iuaka ixiniākiti. Āti !imarotari iua xiniākiti. Iua atokokanera Erekarī Matamatakotinoka imarotari Teoso xiniākiti, kotxi Teoso itxaua iua. ¹² Kona ate apakapari ātiāo matamatakoti ikorapokoritikiri. Ate apakapari Erekarī Matamatakoti, Teoso iokanatakiti atemoni, ininiākara aposotari aimarotiniri Teoso sikakiti atemoni. Itori isikakiti.

¹³ Atemoni isikakiti asāpireta. Kona kākiti imaroreēni asāpiretari kākiti. Erekarī Matamatakoti oerekaua asāpirenauatini. Ate atamatari Teoso oerekakiti isākire iōkatsopatakoriā, eereka ātiātaā isākire iōkatsopatakoriā aātamatarī iua oerekakiti, ininiā iuasaaki aimarotari atāo. Ikara atoko aōerekai hīte. ¹⁴ Erekarī Matamatakoti mauakinīti !apakapari Erekarī Matamatakoti oerekakiti, kotxi iuamoni ikara sākiretxi miikiteti sākire. !Iposotari imarotiniri Erekarī Matamatakoti sāpiretakiti, kotxi Erekarī Matamatakoti !uari iuamoni. ¹⁵ Erekarī Matamatakoti auakasaakiri kākiti, iuasaaki iposotari ataerekatiniri imakinika, ininiā kākiti Erekarī Matamatakoti mauakinīti !iposotari apoītiniri iua.

¹⁶ Teoso sākire iōkatsopatakori txari:

Kiripa imarotatarī Apiananiri xiniākiti iua oerekini iġapani?

Iuaritika Kristo oerekaua iuaka xiniākiti.

3

Teoso Nitiriakori Atxaua

¹ Nitiriakori, hīte likamari ikinipoko Erekarī Matamatakoti nireēkiti. Hīkamari hīteka nireēkiti ikorapokoriti auakani kamini atokokana. Ininiākara nisākirauata hīteka amarīnikata nisākirauatini atoko, kotxi poiāonoka hāuikari Kristo sākire. ² Tinitxiā atoko inakarī nisākire nisikai. Xinitxi atoko inakarī nisākire kona nisikai, kotxi !himīteenekari nisākire kamimari. Uatxapiima hīte !iposopanika noerekakiti kamimari himarotini. ³ Ikorapokoriti auakani xinikini atoko hīxinikapanika. Ikara xika hīxikotakakaua. Hinaiatakakaua. Homanatakakaua. Hīteka nireēkiti hīkama, ikorapokoriti auakani kamini atokokana. ⁴ Kotxi ātikaka hīte txari: “Paoro sākire nikīpita.” Apanakini txari: “Aporo sākire nikīpita.” Ikara atoko hininiā, kākiti ikorapokoritikini sākire atoko hīsākirauata. !Kiikitepanikai.

⁵ Kiripa Paoro? Kiripa Aporo? Kristo nitiriakorinoka atxaua. Iua sākire sāpiretakininoka atxaua. Hīte auikapekari Kristo sākire asāpiretakasaakii. Apiananiri sikari parīkatxi ikininapemoni akamini iġapani. ⁶ Ia atoko itxa parīkatxi Teoso sikakiti: Merepanika nota sāpiretari Teoso sākire kākitimoni, takariki nitakini atokokana. Eereka Aporo oerekari ninoā kākiti apikomoni Teoso sākire. Āparaā takari nireēkiti atoko itxa apikomoni Teoso sākire isāpiretakiti. Nota, Aporo pakini parīkauata ikara atoko, iuaritika Teosonoka aneēkakari takari. Iuanokara txīkitakari kākiti auikiniri isākire. ⁷ Takariki taākari, āparaā siākari pakini minakati ninoā, kotxi Teosonoka aneēkakari takari. ⁸ Teoso sākire merepanika sāpiretakari nirekari iparīkauatini Teoso iġapani. Teoso sākire apikomoni sāpiretakari apaka nirekari iparīkauatini Teoso iġapani. Ininiā Teoso sikariko ninoā parīka iġi ninoamoni iparīkana iaōka. ⁹ Teosokata parīkauatakani atxaua. Teoso kikiote atoko hītxaua. Apaka Teoso aapoko atoko hītxaua.

¹⁰ Teoso sikapekano ikinipoko erekarī niparīka iua iġapani nikamini. Aapokotxi kamiko apisa aapokotxi kamakari kimaroreri takari kaikori, inopini aapokotxi ikamini iġapani. Iua aapokotxi kamakari kimaroreri atoko nitxaua. Merepanika nota parīkauata Kristo sākire nisāpiretini. Kaikori aapokotxi kamakari takakiti atoko itxa ikara iua sākire. Eereka apanakini oerekarauata apikomoni. Ninoā parīka aapokotxi kamiko kaikori nopini atokokana itxa. Erepaniko akamakasaakiri ikara parīkatxi. ¹¹ Kaikori, aapokotxi kamakari takakiti atoko itxa Xesosi Kristo sākire. Āti kaikori kākiti sākire !uari. Auape kaikori Xesosi Kristo sākire, kotxi kataparari. ¹² Xesosi Kristo sākire aāuikasaaki, kaikori aāuini iġapani iposope. Aapokotxi iua kaikori nopini atoko itxa aparīka. Aparīka atxiīti

oro atoko itxa. Atxiīti pirata atoko itxa. Atxiīti kai erekari atoko itxa. Atxiīti aamina atoko itxa. Atxiīti aātsopa atoko itxa. Atxiīti katsotati atoko itxa aparīka.

¹³ Itixi xipokini ōti kākiti imarotariko natokopa itxa iparīka, kotxi iuasaakiko arikatxi ataerekatari iparīka. ¹⁴ Iparīka marikakaniā, apakapari iparīka īki. ¹⁵ Iparīka arikiniā, ! apakapari iparīka īki. Iuaritika Teoso auiritari iua auini ātipirika Teosokata, txamari iua xipokaarita.

¹⁶ Kona hīte imarotapanikari Teoso misākiretiko aikoti hininiua? Kona hīte imarotapanikari Erekari Matamatakoti auini hīito āki? ¹⁷ Kākiti xipokiniāri Teoso misākiretiko aikoti, Teoso xipokariko iua. Teoso misākiretiko aikoti iua nakiti. Hītera Teoso misākiretiko aikoti hītxaua.

¹⁸ Kona hīteka misirienetapeuako. Atxiīti ātikaka kākiti hīte sauaki uākatari kimaroreni ininiua, kotxi imarotarina īkorapokoriti auakani imarore. Īkorapokoriti auakani uākatari Kristo sākire auīākari mīkiteti ininiua. Ininiā erekape kākiti īkorapokoriti auakani akiritinii mīkiteti hininiua, kotxi iuasaaki kimaroreri atāo inakari hītxaua. ¹⁹ Teosomoni !kiikiteri īkorapokoriti auakani imarore. Teoso sākire iōkatsopatakori txari:

Teoso maīkari kimarorerini īkorapokoriti auakani ninoaka imaroreē.

²⁰ Apaka Teoso sākire iōkatsopatakori txari:

Apiananiri imarotari īkorapokoriti kimarorerini imarore litxapō.

²¹ Ininiā !apakata kākiti iuikiniua imarore xika. Ikinika aua hītemoni. ²² Paoro aua hītemoni. Aporo aua hītemoni. Petro aua hītemoni. Itixi aua hītemoni. Hāuini, hīpinini apaka aua hītemoni. Uatxa auakari, katana auakari apaka aua hītemoni. Ikinipoko aua hītemoni. ²³ Kotxi hīte Kristo nakiti hītxaua. Kristo, Teoso nakiti itxaua.

4

Kristo Iokanatakini Kākitimoni

¹ Erekari kākiti imarotiniari auītetxiakori aminakanua. Kristo nitiriakori atxaua. Teoso iokanapirena nīkatakani atxaua. Iua sikari iokanapirena atemoni apanakini asāpiretini īkapani. Iua Teoso iokanapirena !imarotaāka mitxi. ² Nitiritxi atāo inakari ātipirika kamari iauīte paniātakiti. ³ !Nimaākatari hīte ataerekatini nota. !Nimaākatari apanakini ataerekatini apaka. Kona notaka ataerekataua apaka. ⁴ Nākixinireē maerekati !auari, iuaritika nikamapekari maerekati. Apiananirinokara ataerekatano. ⁵ Ininiā !hīsāpiretapiri: “Kona erekari iua parīka. Peerekari ikara parīka,” kona hītxape Apiananiri apokini apisa. Apiananiri apokini hiātapako. Iua oerekariko ipiāmoni iomaātakori. Oerekariko kākiti nirekakiti ākixinireēna iparīkauatakasaakina. Iuasaaki Teoso txariko kākiti: “Erekapitikari pikamakiti,” itxa.

⁶ Nitiriakori, ikara nota pirena, Aporo pirena pakini nisāpiretai atāo inakari himarotini īkapani, āti apiata himiuiakani īkapani. Ininiā hīkamariko Teoso sākire iōkatsopatakori iaōka, kotxi !apakata kākiti iteene iuikiniri āti, ātipekana imanirekakani inini. ⁷ Pite apiananitakari !auari. Himapakapakinini !auari. Kapakapare hininiā, kinirepa mapakapareni sākirauatini atoko hītxa? ⁸ Ikinipoko hinireēkiti auapeka hītemoni atxiīti? Katiipekai hīte. Ate ereē mauakanisaaki, atxiīti hīteka kamari auītetxi hininiua. Ninirekari auītetxi atāo hininiua, ininiā ate auītetxi atxaua hītekata. ⁹ Īkorasaaki neenamtxi xipoka atoko, auītetxi kāiatakari kanapiriā isotatonekata. Ninoa mapotōkire kākiti auītetxi maīkakini minaāka apanakini atamatinina īkapani, inapetinina īkapani. Eereka okaākana ninoa kākiti. Nota xinikari Teoso nirekari ate iua iokanatakini ikara kākiti maīkakoni atoko aniniua. Ikinimane atamataua. Kākiti, Teoso nitiriakori iaxitikini apaka atamataua apininimoni asini. ¹⁰ Hītemoni, mīkiteni ate txaua, Kristo īkapani aparīkauatakasaaki. Hītemoni, kimarorei hīte, Kristo īkapani hīparīkauatakasaaki. Hītemoni, !kaposotiireua ate. Hītemoni kaposotiirei hīte. Hīte paxitaāka, txamari ate omanataāka. ¹¹ Uatxapiima Kristo sākire ate auikini xika anatxita. Aposonata. ! Kamākaua. Amisiritaāka. !Kaapokoua. ¹² Iteene aparīkauata anireēkiti aamotini īkapani. Kākiti takasaakiri maerekati atemoni, ate amanaāri Teoso erekari ninoamoni itakini īkapani. Amisiritikosaaki, iuasaaki amīteenekari. ¹³ Apanakini misākirepiretakasaakia,

erekari ate apakapapiretana ninoa. Uatxapiima apanakinimoni iġorapokoriti txiko atoko atxaua. Kasakari atoko atxaua ninoamoni.

¹⁴ Kona niōkatsopata ikara hīpētatauātini iġapani. Niōkatsopata ikara nipinitinii iġapani monōkori apokini apisa, kotxi namariteni nota turetakinini atoko hīttxaua. ¹⁵ Hītemoni tesi mio Teoso sākire oereēkani auaākamako, iuaritika poiāo hīri atoko inakari aua. Notara hīri atoko nitxapekua, kotxi hāuikari Teoso iokanapirena erekari noerekasaakii Kristo Xesosi posotiireē. ¹⁶ Ininiā nōtākikai: Nota kamakiti atokotxikana hīkamako. ¹⁷ Ikara iġapani niokanatarini Tximōtxio hītemoni. Iua namarite nituretakitini atoko. Iua kamari Apiananirini paniātakitini iaōka. Iua txīkitakini hīxinikinirini nikamakiti ikiniōtika Kristo posotiireē. Ikini tōpati Kristo sākire auiākanini apotiitiniātaāua, noerekari kākiti erekari ikaminini ikiniōtika, erekari nota kamini atokotxikana.

¹⁸ Ātikaka hīte iuikaua, kotxi hīuākatari nota mapokakani hītemoni. ¹⁹ Txamari Teoso auiritiniāno, paītiki napokako hītemoni. Iuasaakiko !ninierekari nimarotinirini ninoa iuikakanina sākire. Napokasaaki ereē, ninirekari nimarotinirini Teoso posotiire. ²⁰ Teoso auītetxi ininiātaāua kona sākiretxinani aua. Iposotiire apaka aua. ²¹ Kiripa hīte nireka? Hinirekatari ninoropatini aiġkeē, ereē napokasaaki? Hinirekatari nitiretinini, nimatxitakanini, ereē napokasaaki?

5

Maerekati Xesosi Sākire Auiākanini Sauaki

¹ Isāpiretaāka kākiti ereē kaminirini maerekati iġtotxi nireēkitini āti kākitekata. Iua kākiti maerekani apiari, kotxi iua sirīka iri iġtanorokata. Teoso sākire mauīākanini kamari maerekati, iuaritika ninoa !ikamari ikara atoko inakari maerekati, kiki hīte sauaki auakari kamakiti atoko. Ninoa !ninierekari isākiretinirini ikara atoko inakari maerekati. ² Iuaritika hīte iuikaua. !Himatinaninauata himaerekani xika. Apiaerekata iġkora iri iġtanorokata sirīkakari hīokanatinini itakanapini. ³ Nīito kona ereē aua, iuaritika nixinikakiti auapitika ereē hītekata, ininiā nota ereē hītekata nauini atokokana, nimerēpekari iua maerekati kamakari misiritiko. ⁴ Aāuīte Xesosi Kristo uākaā hāpoti-itakasaakia, nota aua hītekata nixinikakitiā. Iuasaaki himarotakasaakirini Xesosi Kristo posotiire, ⁵ hīsikariko iua Satanasimoni iua iġto ipinini iġapani, ixinire ereka inini Xesosi kanapiriākasaaki.

⁶ !Apakata hīuikiniua. Himarotari axapiti pāo tireēkari tirekakari itori pāo. Iua atokokana ātika maerekati kamakari txīkitakari kaiāopokori kākiti kaminirini maerekati. ⁷ Ininiā hōkanapariko maerekati mitxi hīkamakiti, amanerini hinini iġapani. Ininiā pāo miātiākatini atoko hīttxaua, kotxi ikoke !auari. Kitxakapirīka kākiti okari ipira soti auīte, ininiā Teoso nitirini napaāpotakasaaki ninoa nopini, kona okana ninoa. Kristo, apira soti auīte atoko itxa. Iua ipina ate mapinakanini iġapani. ⁸ Pāscoa kiiniriti-saaki, Teoso !auiritari pāo ātikakari nikiko, kotxi maerekati pāo tirekakari atoko itxa. Ininiā maōkanaparini maerekati mitxi akamakiti. Pāo miātiākatini atoko matxaua, ininiā makamari erekari. Masākiretari atāo inakarinnoka. ⁹ Niokanatsopatapeka hītemoni himapotiitakanina maerekati kamakanikata, iġtotxi nireēkitini kamakanikata. ¹⁰ Na nixinikari iġorapokoriti maerekati kamakani. Maerekati iġtotxi nireēkitini kamakani, kamanarerini, kamisirienrerini, kamakari teosonetakani pakini iġorapokoriti auakani na nixinikanāta. !Hīposota hītakanapinina ninoa, kotxi auapikana. Hīpīkasaakinokara, hītakanapana ninoa. ¹¹ Uatxa niokanatsopata hītemoni, himapotiitakanina maerekati kamakanikata, “Xesosi sākire auiākarirano” inakanikata. Iġtanoro minakotokatika sirīkakani, kamanarerini, kamakari teosonetakani, āti misākirepiretakani, ipoātakani, kamisirienrerini pakini hītakanapako. Kona hinipokotape ikara atoko inakanikata.

¹² Kona nota parīkanini Xesosi sākire mauīākanini misiritiko nisāpiretinini. Hīte parīkakara Xesosi sākire auiākanini misiritiko hīsāpiretinini. ¹³ Teosokara sāpiretariko Xesosi sākire mauīākanini misiritiko. Hīte iokanatariko maerekati kamakari hīte sauaki auakari isini.

6

Āti Naiatakasaakiri Āti

¹ Xesosi sākire auiākari naiatiniāri āti Xesosi sākire auiākari, !apakata Xesosi sākire mauiākani apisatoō anikiko. Hanikana ninoa Xesosi sākire auiākanimoni maerekati kamakari misiritiko himarotini ĭkapani. ² Kona himarotapanikari Xesosi sākire auiākani mereēriko Xesosi sākire mauiākani misiritiko āti ōti? Hīkamariko ikara atoko inakari xipokatxi ōtisaaki, ininiā hīposotapitikari uatxa himereiniri kākiti misiritiko, āti naiatakasaakiri āti. ³ Atxiīti hīte kona imarotapanikari himereiniri Satanasi nitiriakori misiritiko āti ōti? Ininiā hīposotapitikari himereiniri kākiti misiritiko ĭkorapokoriti uatxa. ⁴ Txamari neenamtxi hīte sauaki auiniā, hanikatari kākiti Teoso sākire auiākani mapaxitakanimoni? !Apakata, kotxi ninoa !imarotari Teoso paniātakiti. ⁵ Ikara atoko nitxai nikamapētatinii ĭkapani. Atxiīti kona hīposotatari hāpokiniri kimaroreri hīte sauaki neenamtxi xipokini ĭkapani? Atxiīti kona ātika aua? ⁶ Txamari āti Xesosi sākire auiākari anikari āti Xesosi sākire auiākari Xesosi sākire mauiākani apisatoō maerekati kamakari misiritiko himarotini ĭkapani. Ikara atoko !apakata.

⁷ Ininiā iteene hīkerokari, kotxi hanikari hītari kākiti misiritiko mereēkarimoni. Erekafe hāuiritiniri hītari kaminiri maerekati hītemoni. Erekafe hāuiritiniri hītari ĭtirīkiniri hīti. ⁸ Txamari hiītiriua. Hīkamari maerekati. Hītariakorimonira hīkamari ikara. !Apakata. ⁹ Kona himarotapanikari atāo minakati kamakani !isari Teoso auītetxi ininiātaāua? Kona hīteka himisirienetapeua. Ia atoko inakari kākiti !isari Teoso auītetxi ininiātaāua: maerekati ĭtotxi nireēkiti kamakani, kamakori teosonetakani, ĭtanoro minakotokatika sirīkakari, kiki sito ininiua nirekakari, kiki āti kikikata sirīkakari. Ninoa !isari Teoso auītetxi ininiātaāua. ¹⁰ Kiītiririni, kamanarerini, poātakani, āti misākirepiretakani, kamisirienenerini pakini !isari Teoso auītetxi ininiātaāua. ¹¹ Ikara atoko mitxi hītxaua hīte apanakini. Iuaritika himaerekani makatxakaākapeka. Teoso kamai hīte inakitiakori hinini. Apiananiri Xesosi kamaerekatai. Erekar Matamatakoti, aTeosone nakiti, iua apaka txīkitakai hīte atāo inakari kamakani hininiua.

Maerekati ĭtotxi Nireēkiti

¹² Nota posotari ikinipoko nikamini, txamari kona erekari ikinipoko nikamini. Nota posotari ikinipoko nikamini, txamari kona ninirekari nikamakiti niauīte ininiua. ¹³ Nipokori kamaāka tikakotxi ĭkapani. Tikakotxi nirekari nipokori. Txamari Teoso xipokariko nipokori, tikakotxi pakini. Teoso !nirekari akaminiri maerekati aīto nireēkiti āti kākiti ĭtokata. Apiananiri kamari aīto iua nireēkiti akamini ĭkapani. Aīto Apiananiri nakiti.

¹⁴ Teoso ōkitikari Apiananiri ipīkani sauaki. Iua atokokana iua ōkitikaua ate iposotireē.

¹⁵ Ininiā !apakata Kristo ĭto hīsikini sito kanokareromoni. !Apakata. ¹⁶ Kiki sirīkasaaki kanokarerokata, iusaaki ātinoka ĭtotxi atoko itxauana ninoa. Teoso sākire iōkatsopatakori sāpiretaua:

Kiki sirīkini sitokata, ātika ĭtotxi atoko itxauana.

¹⁷ Kākiti moianatakasaakiri Apiananiri, ātika xiniretxi atoko itxauana ninoa xinire.

¹⁸ Ātokata hīsirīkini hinirekasaaki, himitekako. Kona hīkaikotape iuaā. Apanakini maerekati kākiti kamakiti !imisiritari hīto. Imisiritari hākixinire. Hīkamakasaakiri maerekati hīto nireēkiti sitokata, himisiritari hīto, hākixinire pakini. ¹⁹ Kona himarotapanikari hīto Erekar Matamatakoti misākiretiko aikoti atoko ininiua? Hīte ĭtoākarari iua. Teoso sikari iua hītemoni, ininiā hīto kona hīte nakiti. ²⁰ Teoso iamotapekai hīte Xesosi ipīkasaaki, ininiā hīto ĭki auapitika. Ininiā uatxa iua nakiti hītxaua. Ininiā uatxa hītoā hīpaxitariko Teoso.

7

ĭtanorouatiko Sākiretxiti

¹ Uatxa napakapapiretariko mitxi hiōkatsopatakiti notamoni. !Erekar kiki kaxiro-tiniro sito. ² Txamari inirekasaakiri sitokata isirīkini, erekari kiki auini iuaka ĭtanorokata. Erekar sito auini oaka ōtanirikata. ³ Ininiā erekari kiki sakiniri ĭto ĭtanoromoni. Erekar

sito sikiniri oīto oītanirimoni. ⁴ Ītanorotxi īto kona oa nakitinanini. Ōtaniri nakiti apaka oīto. Apaka ītaniritxi īto kona iua nakitinanini. Ītanoro nakiti apaka iīto. ⁵ Kona hītxape: “Kona ninirekari nisirīkini pitekata,” kona hītxape. Hinirekasaakiri nipokori himanikakani Teoso himisākiretini īkapani, atxiīti iusaaki !hinirekari hīsirīkini hītanorokata. Hītanoro apaka kona nirekari osirīkini hītekata iusaaki, Teosonoka hīxinikini īkapani. Ininiā ikara atoko hīkaminiā erekari, txamari paītiki eereka iuaīkana hīsirīkako hītanorokata. Ininiā ikara atoko Satanasī kona sikanireōtai maerekati hīto nireēkiti hīkamini āto sitokata hīsirīkini. ⁶ Ikara nota oītākikai hīte. Kona nipaniātai ikara hīkamini. ⁷ Notamoni erekari nota atoko hinini. Iuaritika ikinimane aua Teoso siākiti iparīka kamini īkapani. Teoso sikari āti isikakiti ātimoni. Ātiāo isikakiti isika ātimoni.

⁸ Uatxa nimisākiretanako mītanirini, mītanoroni, tikinitakoni pakini. Erekari himītaniriuatakani, himītanorouatakani nota atoko hinini. ⁹ Txamari himaposotakaniāri hītakanapiniri hīto nireēkiti, erekari hītanorouatini, erekari hītaniriuatini, kotxi kapatakari atoko itxa hīto nireēkiti.

Hīkamari Atāo Hītaniriuatakasaaki

¹⁰ Ia nipaniātana kākiti ītaniriuatakani: !Apakata sito takanapiniri oītaniri. Kona notani paniātai. Apiananirira paniātai. ¹¹ Otakanapiniāri oītaniri, !apakata iuaīkana oītaniriuatini. Erekari oītanirimoni iuaīkana okanapiriini. Iua atokotxikana !apakata kiki takanapiniro ītanoro. ¹² Nōtākikari apanakini. Apiananiri paniātakiti apanakini īkapani !auari, ininiā nota oītākikana ninoa ia atoko: Xesosi sākire auiākari auiniā ītanoro Xesosi sākire mauīākato, oa nirekiniāri okaikotini iuakata, !apakata iua iokanatiniro oa otakanapiniri iua. ¹³ Iua atokotxikana, Xesosi sākire auiākaro auiniā oītaniri Xesosi sākire mauīākati, iua nirekiniāri ikaikotini oakata, !apakata otakanapiniri iua. ¹⁴ Iusaaki ītaniritxi Xesosi sākire mauīākati apakapari Teoso sākire ītanoro kamakiti ereka atamatakasaaki. Iua atokotxikana, ītanorotxi Xesosi sākire mauīākato apakapari Teoso sākire oītaniri kamakiti ereka oātamatakasaaki. Imakamakaniārīna ikara atoko, !erekana imiakori. Irītxi, inorotxi pakini kaminiāri nōtākikakiti iaōka, erekana imiakori. ¹⁵ Xesosi sākire mauīākati nirekiniāri itakanapiniri ītanoro, oa auiritariko isini. Xesosi sākire mauīākato nirekiniāri otakanapiniri oītaniri, iua auiritaroko osini. Ikara atoko ininiā, ninoa sikakapeēkaika. Ikara atoko ininiā erekari, kotxi Teoso !inirekari aneenamauatini ikara xika. ¹⁶ Pite ītanorotxi, pimarotatari? Atxiīti pītaniri auikari Xesosi sākire imaerekani makatxakiko īkapani, Xesosi sākire pisāpiretakasaakiri iua. Pite ītaniritxi, pimarotatari? Atxiīti pītanoro auikari Xesosi sākire omaerekani makatxakiko, Xesosi sākire pisāpiretakasaakiro oa.

Teoso Akiritakasaakiri Kākiti

¹⁷ Ininiā ikininape kamariko iparīka Teoso sikakiti iuamoni, kotxi Apiananiri akiritaua ikara parīkatxi akamini. Ikara nipaniātari ikinimane Teoso mereēkini apotiitiniātaāua. ¹⁸ Teoso akiritakasaakiri kiki, Teoso takaōtxikare iītoā auiniā, !apakata Teoso takaōtxikare makatxakiko. Teoso akiritakasaakiri kiki, Teoso takaōtxikare iītoā mauakaniā, !apakata Teoso takaōtxikare iītoā takiko. ¹⁹ Teoso takaōtxikare hītoā auiniā, ikara kona txīkitakai Teoso anaakori hininiua. Teoso takaōtxikare hītoā mauakaniā, ikara apaka kona txīkitakai Teoso anaakori hininiua. Teoso nireēkiti iaōka kamiko txīkitakai Teoso anaakori hininiua. ²⁰ Teoso akiritakasaakii, iusaaki mitxi hīparīka hīkamapanikako. ²¹ Teoso akiritakasaakii, nitiritxi amotakori hininiāua, ininiā kona maerekaxinireti hītxapeua nitiritxi hininiua xika. Iuaritika hīauīte sikakiniāi, ininiā hīsako. ²² Apiananiri akiritiniāri nitiritxi amotakori, Apiananiri sikakakiti itxaua iua. Apiananiri akiritiniāri nitiritxi minakatiua, Apiananiri nitiri iamotakiti itxaua iua. ²³ Xesosi amotakini hītxaua, ininiā iuaīkana kākiti nitiri iamotakoni !hītxapeuako. ²⁴ Nitariakori, Teoso akiritakasaakii, iusaaki mitxi hīparīka hīkamapanikako.

Mitxitakani, Tikinitakoni Pakini

²⁵ Uatxa nōtākikai hīte mitxitakani. Apiananiri kona sāpiretano ipaniātakiti hīte īkapani, iuaritika nisāpiretai nixinikakiti, kotxi Apiananiri amonīkapekano, ininiā kākiti

posota auikiniri nisākire. ²⁶ Īkorasaaki pamonōkoniri Xesosi sākire auiākanimoni, ininiā notamoni apiaerekata kākiti mītanorouatakani. ²⁷ Hītanorouatapeka hininiā, kona hītakanapapero hītanoro. Mītanorouatakatipanika hininiā, kona hinitapero hītanoro. ²⁸ Iuaritika hītanorouatiniā, maerekati !hīkama. Kākiti ĩtanorouatiniā, apokapitikako ninoa maxikiko. Kona ninirekari ikara atoko hīte ĩkapani.

²⁹ Nitariakori, poiāo ōtinoka aua aparīkauatini Apiananiri ĩkapani. Ininiā hīte kītanororini parīkauatako Teoso ĩkapani mītanoroni parīkauatini atokotxikana.

³⁰ Txiapatakari parīkauatako Teoso ĩkapani, kākiti matxiapatakati parīkauatini atokokana. Poxokori parīkauatako mapoxokoniti parīkauatini atokokana. Tiitxi amotakari parīkauatako Teoso ĩkapani, tiitxi mauakiniti parīkauatini atokokana.

³¹ Īkorapokoriti tiitxi auakini !ixinikapiriko itiina, kotxi ĩkorapokoriti kākiti potxitakiti xipokaāpota.

³² Ninirekari erekaxinire hinini. Kiki mītanoroti posotari ixinikiniri kanatokopa iparīkauatini Apiananiri ikamapoxokonitini ĩkapani. ³³ Txamari kiki kītanorori xinikari parīkatxi ĩkorapokoritikiri, kotxi inirekari ikamapoxokonitiniro ĩtanoro. ³⁴ Mītanirito, mitxitakaro pakini nirekari oparīkauatini Apiananiri ĩkapani, kotxi onirekari oīto, oxinire pakini osikini iuamoni. Txamari sito kītaniriro xinikari parīkatxi ĩkorapokoriti auakari, kotxi onirekari ōtaniri okamapoxokonitini. ³⁵ Ikara atoko nisāpiretai hīte, hīte ereka hinini ĩkapani. Kona ninirekari nimauiritakanii erekari hāpakapini. Ninirekari atāonoka hīkamini. Ninirekari hīparīkauatini Apiananirinoka ĩkapani.

³⁶ Ātokoro iri atxiīti !auiritapanikaro oa ĩtaniriuatini, txamari oaneēpeka. Ātokori nirekiniāri itakiniro oa, erekari iua auiritiniri iua. !Ikamari maerekati. Erekari iua auiritinina ninoa ĩtaniriuatini. ³⁷ Atxiīti ātokoro iri ākixinireē !inirekaro oa ĩtaniriuatini. Atxiīti !isikaenetaro oa ātimoni. Iua xinikakiti omītaniriuatakani ĩkapani pataparari ininiā, ākixinireē imarotiniāri inireēkiti oa mītaniriuatakani, ininiā iua kiki kamari erekari. ³⁸ Oa sikakari oītaniriuatini ĩkapani kamari erekari. Iuaritika oa masikakati oītaniriuatini ĩkapani kamari apiaerekata.

³⁹ Teoso paniātakiti iōkatsopatakori paniātaro sito kaikotini oītanirikata iua auapanika inakasaaki. Iua ipininiā, apakata oītaniriuatini onirekakitikata. Txamari Apiananiri sākire auiākarikatanoka apakata oītaniriuatini. ⁴⁰ Notamoni oa apia poxokoniuata omītaniriuatakaniā iuaīkana. Ikara atoko inakari nōtākikaro sito, kotxi nimarotari Erekari Matamatakoti Teoso nakiti aua notamoni.

8

Nipokori Teoso Kamakori Sikiko

¹ Uatxa nisāpiretai nipokori sikiko teoso kākiti kamakitimoni. Amakinika aimarotari ikara. Ikara inakari aimarotapeka ate. Kākiti imaroretxi auiniā iuikaua. Apiaerekata kākiti auini tiraōkitxi, kotxi isikataparatarari kākiti xinire. ² “Kimaroreno nota” inakari !auari imaroretxi. Kaiāopokori imaroretxi imimarotakinini aua. ³ Iuaritika kākiti tiritiniāri Teoso, Teoso imarotari iua.

⁴ Maxinikari nipokori teoso kamakorimoni sikakori. Aimarotari teoso kākiti kamakiti !kakamareri. Aimarotari ātika Teoso atāo inakari aua. ⁵ Aua kākiti kamakiti. Kākiti takauākatari “teoso” itxaua. Kākiti takauākatari teoso iaxiti auakani, ĩkorapokoriti auakani apaka. Kaiāopokori ikara atoko inakari teosoakori aua. Kaiāopokori ikara atoko inakari auītetxiakori aua. ⁶ Atemoni ātika Teoso aua. Iua aīri iaxitikiri. Iua kamari ĩkinipoko. Aparīkauata iuanoka ĩkapani. Ātika aūiūte aua, Xesosi Kristo. Ikini sereti kamakari iua. Iua posotiireē aūiini aua.

⁷ Apanakini !imarotapanikari kākiti kamakiti teoso minakanuia, kotxi mitxi iteene itotarina teoso kākiti kamakiti. Ininiā inikasaakirina nipokori teoso kamakorimoni siākori, iuākatarina ikara nipokori teoso atāo inakarimoni siākori. Iuasaaki ninoa uākatari maerekati ikaminina, kotxi ākixinireēna !iteene imarotarina atāo inakari.

⁸ Txamari nipokori !itxikitakaua Teosomoni asini. Ikara nipokori anikini !imisiritaua. Apaka likamari ereka anini.

⁹ Iuaritika erepaniko. Hinirekiniāri ikara nipokori hinikini, hīxinikariko apanakini Teoso sākire poiāonoka auiākani. Ninoa imarotiniāri hīte nikiniri ikara nipokori, ininiā ninoa apaka nikari, txamari uasaaki ninoa kamari ākixinirena manirekakiniti. ¹⁰ Teoso sākire poiāonoka auiākari atamatiniāi Teoso sākire iteene imarotakari nikiniri nipokori teoso kamakori misākiretiko aikotiā, isikataparaxiniretari iua apaka nikiniri nipokori teoso kamakorimoni siākori. ¹¹ Ininiā pimarore xika, atxiīti pitari Teoso sākire poiāonoka auiākari sari imisiritikomoni. Kristo ipina iua ikapani apaka. ¹² Ikara maerekati hītarimoni hīkaminiā, hīkarotari ākixinire. Hītari ākixinire hīkarotakasaaki, hīkamari maerekati Kristomoni. ¹³ Ininiā nipokori ninikini txikitakiniāri nitari kaminiri maerekati, itixi auapanika inakasaaki kona ninikaikari iua nipokori, kotxi kona ninirekari nitari kaminiri maerekati.

9

Teoso Iokanatakini Kākitimoni

¹ Teoso iokanatakiti nitxaua. Ninireēkiti niposota nikamini. Naōkitapekari Xesosi Kristo aūite. Iparīka nikamakasaaki, hīte auikari Apiananiri sākire. ² Atxiīti apanakini !auikari Teoso iokanatakiti nininiua. Hītera auikari Teoso iokanatakiti nininiua. Hītera oerekari Apiananiri iokanatakiti nininiua, kotxi hīte auikari Apiananiri sākire, nota sāpiretakasaakii hīte.

³ Kākiti mauikakaniāri Teoso iokanatakiti nininiua, napakapapiretana ninoa ia atoko: ⁴ Apakata atxiīti aāpakapiniri nipokori, iāriā pakini aparīkauatini ikapani? ⁵ Apakata atxiīti ate anikiniro ātanoro Teoso sākire auiākaro atekata, apanakini Teoso iokanatakini, Apiananiri itariakori, Petro pakini anikinina ninoa itanoro atokotxikana? ⁶ Atxiīti apakata Panapee, nota pakininoka parīkauatini anikakiti aāpakapini ikapani?

⁷ Sotato sikasaaki ineenamauatini ikapani, iuaka liamotari anikakitina. Aua atxiīti ova takakari. Ova itakakiti matximakati aua? !Auari. Kona auari kema aūite piratakari ipira tiniā miātakati.

⁸ Ikara nisākire kona kākiti sākirenanini. Iua atokotxikana Teoso sākire. ⁹ Moisesi iōkatsopatapekari Teoso paniātakiti. Ia atoko itxa:

Kona hīitxikari kema aūite nama trikopani ikamakasaaki. Hāuiritariko inikini.

Teoso turetari kema aūite? Itiretapitikari. ¹⁰ Apiata isāpiretari ikara kākiti parīkauatakani ikapani. Ininiā takarauatakari takarauata, kotxi inirekari ikiena inikini. Kienatxi apakari apari ikiena, kotxi inirekari ikiena inikini. ¹¹ Katarereri takarauatini atokokana, ate takari Teoso sākire hākixinireē. Katarereri nikari ikiena itakakiti, ininiā atxiīti apakata ate apakapiniri kienatxi hīte sikakiti? Kotxi ate parīkauata hīte ikapani.

¹² Apakatinīā apanakini apakapiniri iparīkana īki hīte sikakiti, ininiā apiata apakata ate apakapiniri ate parīka īki, iuaritika kona aamanaāri hīsikiniāua ate parīka īki. Amīteenekari ikinipoko, kotxi !anirekari aiotokakiniri Kristo iokanapirena erekari hīkenakotini. ¹³ Himarotari Teoso misākiretiko aikoti āki parīkauatakani iuaātaā apakapari ikiena. Teosomoni sikakori takikoātaā parīkauatakani apaka apakapari ipixini iuaātaā siākori inikinina ikapani. ¹⁴ Iua atokotxikana Apiananiri paniātari iua iokanapirena erekari sāpiretakani apaka apakapiniri iparīkana īki.

¹⁵ Ikara atāopitikara, iuaritika kona nipaniātai ikara atoko hīkamini. Kona niōkatsopatarī ikara, niparīka īki notamoni hīsikini ikapani. Niparīka īki namanainii apisa erekape nipinini. Niuikari niparīkauatini hīte ikapani hītxineirote nimapakapakanisaaki. ¹⁶ Teoso iokanapirena erekari noereka, iuaritika !apakata niuikinīua, kotxi Teoso sikari ia parīkatxi notamoni. Nimisiritiko auapitika, Teoso iokanapirena erekari nimasāpiretakaniā. ¹⁷ Teoso iokanapirena erekari nisāpiretiniāri kākiti, nākixinireē iteene ninirekiniāri ikara nikamini, ininiā napakapapitīkariko niparīka īki. Nimanirekakaniāri ikara nikamini, iuaritika nikamari, kotxi Teoso sikari ikara parīkatxi notamoni nikamini ikapani. ¹⁸ Ia atoko niīkitxitiko: Teoso iokanapirena erekari nisāpiretakasaaki, kona minakati napakapa. Ikara atoko kamapoxokonitari nākixinire, kotxi maīkitika nisāpiretai Teoso sākire. Teoso iokanapirena erekari sāpiretakari nitxaua,

ininiā niposotiire auapitika hiikitxitinino nota nipaniātiniāi hīte, iuaritika !ninierekari ikara atoko nikamini nota nireēkiti napakapini ikapani.

Parīkatxi Ikinimane Ikapani

¹⁹ Ninireēkiti nikama. Kākiti nitiri iamotakori !nitxaua. Iuaritika notaka nitxīkitakaua ikinimane nitiri nininiua, Teoso sākire apikomoni kākiti auikini ikapani. ²⁰ Xoteoakori sauaki nīparīkauatakasaaki, Xoteo auini atoko nitxa nota auini. Ikara atoko ininiā, Xoteoakori auikari Xesosi sākire. Moisesi paniātakiti iaōka kamakani sauaki nauakasaaki, ninoā auini atokokana nitxa nota auini, kotxi ninirekari Moisesi sākire auīākani auikiniri Xesosi sākire. ²¹ Xoteo minakaniua !imarotari Moisesi paniātakiti. Ininiā ninoakata nauakasaaki, kona nipaniātari Moisesi paniātakiti ikaminina, Xesosi sākire auikinina ikapani. Iuaritika nikamari Teoso paniātakiti, kotxi iuatxikana Kristo paniātakiti nikamini. ²² Kākiti mataparaxinirenikata nauakasaaki, nota apaka kona kataparaxinireno, Xesosi sākire auikinina ikapani. Ikini kākiti sauaki nauakasaaki, nikamari kākiti auini atoko nitxa nota auini, ininiā ikinipoko niposotakiti nikama apanakini maerekani makatxakiko ikapani. ²³ Ikara atoko nikama Teoso iokanapirena erekari nisāpiretini ikapani. Nikamari ikinipoko, Teoso iokanapirena erekari nisāpiretini ikapani. Ikara atoko ininiā, nota apaka apakapari Teoso iokanapirena erekari hītekata.

Saporiēta Apakapakari

²⁴ Himarotari mitekatxi. Kākiti miteēkani miteka, iuaritika ātinoka apakapari imitekini iki. Merepitipanika mitekatxi mapotōkire apokakarimoka apakapari imitekini iki. Ininiā miteēkari atoko hītxako. Hīsapitipo. Teoso parīka hīkamapitipo hīparīka iki hāpakapini ikapani. ²⁵ Ikini miteēkari parīkauatapitipo iito tapara iteene auini ikapani. !Auiritari iito misiritakari. Ikara atoko ikama, saporīēta imitekini iki apakapini ikapani. Ikara saporīēta kona okanani aua. Oxipokapitikako. Ate parīkauatapitipo ātiāo aāpakapakiti aāpakapini ikapani. Ikara aāpakapakiti !ixipoka. ²⁶ Miteēkari isinimoni mimarotakati atoko !nitxaua. Nimarotari nisinimoni. Nisapitipo mitekatxi mapotōkiremoni. Maxikatīka !nineenamauata. Na neenamauata nisanōkakata. ²⁷ Nitxīkitakari niito ninitiri ininiua, nota nireēkiti ikamini ikapani, kotxi nisāpiretapekari ikara apanakinimoni, ininiākara kona ninirekari nimapakapaniri notaka parīka iki.

10

Kākiti Isaekini Aōerekini Pirena

¹ Nota nirekari hīxinikiniri kitxakapirīka, aātokiriakorini takanapakasaakiri Exito tixini, ikinika ninoā aua katxiāri patapi. Iua katxiāri oerekana isinimonina. Apaka ikinika ninoā napari potxoari uiniti āki. ² Ninoā sari Moisesikata, ininiā katxiāri patapi auakasaakina, potxoari uiniti patapi auakasaakina, iuasaaki ninoā patxisatiko atoko aua iuasaaki. ³ Ninoā ikinikana nikari xinitxi Teoso iokanatakiti. ⁴ Ninoā ikinikana iātari āparaā Teoso sikakiti. Ninoā iātari āparaā kai auīteākiriā. Kristo iua kai auīte āparaā potorikiniātaā atokokana. Iua sari ninoakata. ⁵ Txamari Teoso !apokaerekatari kaiāopokori ninoā, ininiā ipinana. Iitona iarika āparaā makipakaniātaā.

⁶ Uatxa axinikana ninoā, ininiā aimarotari amanirekakaniri maerekati ninoā nirekiniri atoko. ⁷ !Hīteosonetapiri kākiti kamakiti, ninoā apanakini teosonetiniri atokokana, kotxi Teoso sākire iōkatsopatakori txari:

Ninoā topāka inipokotinina ikapani, iātinina ikapani, eereka ōkitikauana isarauatinina ikapani teoso ikamakitina apisatoō.

⁸ !Apakata aanokarauatini ninoā apanakini anokarauatini atoko, kotxi āti ōtinokara vītxi tres mio ninoā okaāka ikora maerekati xika. ⁹ !Apakata aātamakaerekatiniri Kristo ninoā apanakini kitxakapirīka atamakaerekatiniri atoko, kotxi iua xika imini okana ninoā. ¹⁰ ! Hītsoatape, ninoā apanakini kitxakapirīka tsoatini atokokana, kotxi eereka Teoso nitiri xipokana ninoā.

¹¹ Ikara imisiritikona apoka ninoamoni apanakini pinitiko ikapani. Ikara imisiritikona iōkatsopataāka ate pinitiko ikapani, kotxi itixi mapotōkire ōti apokaāpota.

¹² Hītemoni ereka hinini, ininiā erepaniko, kotxi atxiīti pāitiki hīkamari maerekati. ¹³ Hīte atamakaerekataāka ikinimane atamakaerekataāka atokotxikana. Iuaritika Teoso !itakanapai hīte. Kona iua auiritari hātamakaerekatiko himamīteenekakiniti. Iuasaaki oerekai himitekini, ininiā hīposotari himīteenekiniri.

Teoso Kākiti Kamakiti

¹⁴ Ininiā nitariakori nota tirketakini, himiteka teoso kākiti kamakiti hītakanapini. ¹⁵ Hīte kākiti kimarorerini, ininiā iteene himixinikariko nisākire. ¹⁶ Iāriā aātakasaaki, akinika aāpotiitakasaakiua, axinikari Xesosi ipinini. Iuasaaki atxari Teoso: “Erekapitikai, kotxi Xesosi arēka xiketa ate ikapani.” Amaxiōpekitakasaakiri komiri, anikasaakiri, aāpitiitakasaakiua, axinikari Kristo īto noropatiko ate ikapani. ¹⁷ Iuasaaki itomanēua ate, iuaritika ātika komiri atokokana atxaua. Ātika ītotxi atokokana atxaua, kotxi amakinika anikari ātika komiri. Ikara komiri Kristo īto atokokana itxaua.

¹⁸ Hīxinikanako kākiti Isaeokini īkorapokoritikini. Ninoa sikari Teoso xinitxi. Eereka ninoa nikari ikara xinitxi. Inikasaakirina ikara xinitxi, iuasaaki ninoa oerekari iTeosone-tinirina iua. ¹⁹ Kiripa ninireka nisāpiretini? Nisāpiretari teoso kākiti kamakiti kona kakamareri. Iua teoso siākori kona itxa. ²⁰ Iuaritika erepaniko. Ikara atāo maerekati. Xoteo minakaniua sikakiti teoso kākiti kamakitimoni ninoa sika Satanasi nitiriakori-moni. Kona Teoso atāo inakari isikana isiākitina. Ininiā na ninirekari hīte moianatiniri Satanasi nitiriakori. ²¹ Kona hīposotari Apiananiri iākoanaā hiātini, apaka Satanasi nitirini iākoanaā hiātini. Kona hīposotari Apiananiri kiena hinikini, apaka Satanasi nitirini kiena hinikini. ²² Atauako anirekatari akaminiri Teoso naiatiniua? Ate tapara apiata atxiīti?

Xesosi Auiākani Kamakiti

²³ Nota posotari ikinipoko ninireēkiti nikamini, txamari kona ikinika erekari nikamini. Ikinipoko ninireēkiti niposotapitika nikamini, txamari kona ikinipoko kamari nākixinire aneini. ²⁴ !Hinitapiriko hīteka nireēkiti hāpakapini. Himoianatariko āti iua nireēkiti apakapini.

²⁵ Hīposotari hinikiniri nipokori amotakoriātaā auakari. Iuasaaki kona hīpimaāpiri: “Ia nipokori sikaākapeka teoso kākiti kamakitimoni?” !hītxapeko. Kotxi himarotakasaakiri hinikiniri nipokori teoso kākiti kamakitimoni sikiko, hākixinire karotaāka atxiīti. ²⁶ Teoso sākire sāpiretaua:

Itixi Apiananiri nakiti itxaua, ikinika itixi auakani pakini.

²⁷ Xesosi mauīkani aiatakasaakii hīte hinipokotini ninoakata, hinirekiniāri hīsa. Hinikariko isikakitina. Kona hīpimaāpiri: “Ia nipokori teoso kākiti kamakiti sikaākapeka?” kona hītxape, hākixinire himakarotakaniri ikapani. ²⁸ Txamari apanakini kākiti iuaā sāpiretakasaakii: “Ia nipokori sikaākapeka teoso kākiti kamakitimoni,” itxa. Iuasaaki kona hinikapiri, kotxi atxiīti hīkaroxiniretari ikara kākiti mataparaxinireti, kotxi:

Itixi Apiananiri nakiti itxaua, ikinika itixi auakani pakini.

²⁹ Na nitxai: “Kona hinikapiri ikara, hīteka ākixinire himakarotakani ikapani,” !nitxai. Nitxai: “!Hinikapiri ikara, āti kākiti ākixinire himakarotakani ikapani.” Nota ākixinireē nota nireēkiti nikamini ikapani erekari. Āti kākiti ākixinireē nota nirekakiti nikamini ikapani !erekari, ininiā iuamoni ikara nikamakasaaki, nikamari maerekati. Kinirepa !apakata nikaminiri nota ākixinire auiritakiti? ³⁰ Napakapakasaakiri nipokori, ininiā iuasaaki nimisākiretari Teoso erekari isikakiti. Ininiā kinirepa nimisākirepiretaāka?

³¹ Nisāpiretai hīte. Hinikasaaki, hiātakasaaki, ikinipoko hīkamakasaaki, hīkamariko ikinika Teoso ereka inini imarotiko ikapani. ³² Kona hītxīkitakapiri, Xoteoakori, Xoteo minakaniua, kākiti Xesosi sākire auiākani pakini kaminiri maerekati. ³³ Ninirekari ikinimane kākiti nireēkiti nikamini, ikinika nikamakasaaki. !Ninirekari erekari notanani ikapani. Ninirekari erekari itomaneri ikapani, imaerekanina Xesosi makatxakini ikapani.

11

Sitoākini Xesosi Sākire Auiākani

¹ Hīkamariko nota kamakiti atoko inakari. Kristo kamakiti atoko nota kamini atokotxikana hīkamako. ² Nitariakori, peerekai hīte, kotxi iteene hīxinikano nota. Peerekai hīte, kotxi hīkamapanikari noereēkiti nisāpiretakiti iaōka.

³ Ninirekari himarotiniri ia: Kiki auīte Kristo itxaua. Sito auīte kiki itxaua. Kristo auīte Teoso itxaua. ⁴ Ininiā kiki ikii māka imamakatzakakaniā Teoso imisākiretakasaaki, apaka Teoso sākire oerekasaaki, kona ipaxitari iauīte Kristo.

⁵ Sito okii māka mauakaniā Teoso omisākiretakasaaki, apaka Teoso sākire oerekasaaki, kona opaxitari oāuīte oītaniri. Okii māka omatakakaniā, oa kii kixākakori atoko itxa.

⁶ Okii māka omanirekakaniā, ininiā okisauakaiākotaākako. Opētauatiniā, okii kixākiko xika, oiāko kisauakiko xika, ininiā iusaaki okii māka otaka. ⁷ Kiki misākiretakasaakiri Teoso, kona erekari itakiniri ikii māka, kotxi Teoso atoko itxa iua. Ikamaāka Teoso ereka oerekini īkapani. Sito kamaāka oītaniri ereka oerekini īkapani. ⁸ Merepitipanika Teoso kona kamari kiki sito iōā. Teoso kamaro sito kiki iōā. ⁹ Kiki kona kamaāka sito īkapani. Sito kamaāka kiki īkapani. ¹⁰ Ininiā oa takari okii māka. Ikara atoko ininiā, oerekari oauītetiniri oītaniri. Iusaaki Teoso nitiriakori iaxitikini apaka imarotari oauītetiniri oītaniri.

¹¹ Kiki, sito pakini Apiananiri sākire auikasaaki, sito nirekari kiki. Kiki nirekaro sito. !Apakata sitonoka auiniā. !Apakata kikinoka auiniā. ¹² Kotxi sito ina kiki iōā. Eereka ikinipoko kiki iponaniā sito iōā. Ikara atoko itxapitikama, Teoso kamari ikinipoko. ¹³ Hīteka hīxinikapiretari ia: Sito kii māka mauakaniā, iusaaki atāokani Teoso omisākiretini? ¹⁴ Kākiti itotakiti oerekaua kiki itanoiākori pētatico. ¹⁵ Sito auiniā oiāko paītanori, oōuikari oiāko, kotxi oiāko sikaāka okii ipatakari īkapani. ¹⁶ Kākiti nirekiniāri ineenamauatini iākotxi pirena xika, ininiā kona ate, ikinika Teoso sākire auiākani pakini !uari ikara. Ininiā !apaniātai ikara atoko inakari hīkamini.

Xesosi Ipinini Xinikiko Kiiniriti

¹⁷ Uatxa niōkatsopatakitiā kona niuikai, kotxi hāpotiitakasaakia, apia erekari kona hīkama. Apiata maerekati hīkama. ¹⁸ Merepanika nikenakopiretari hāpotiitakasaakia Teoso misākiretiko aikotiā hītaparakienatakakiniua. Nixinikari ipixini ikara nikenakopiretakiti atāo inini. ¹⁹ Apanakini oerekakiti atāo minakati auapitika hīte sauaki. Akenakotakasaakiri ninoa oerekakiti, aimarotari Teoso !apokaerekatana ninoa. Iua apokaerekatana iua sākire atāo inakari oerekakani. ²⁰ Hāpotiitakasaakia, kona atāo hīkamari kiiniri, Apiananiri ipinini xinikiko kiiniriti. ²¹ Kotxi hinikasaaki, himixirikari hīkiena apanakini nikiniri apisapanika. Ininiā apanakini natxita, apanakini poāta iusaaki. ²² Auapitika haāpoko hinikini īkapani, hiātini īkapani. Hāpotiitakasaakia, homanataro apanakini Xesosi sākire auiākani. Hīkamapētataro aītariakori matiini. Kiripa nitxai hīte? Atxiīti hinirekari niuikinii? Kona xatiki niuikai hīte.

²³ Apiananiri sāpiretakiti notamoni, iua atokotxikana nisāpiretpekai hīte. Ia nisāpiretai: Īkanōka Apiananiri Xesosi mīkapiritiko oīsaaki, iua kosekari komiri. ²⁴ Iusaaki imisākiretari Teoso: “Erekapitikari ia komiri pisikakiti atemoni,” itxa. Iposo atoko imaxiōpekari iua komiri, sika itxari imoianariakorimoni. Itxana: “Apakapa, nika hītxako. Ia niīto okaāka hīte īkapani. Ia komiri hinikasaaki, hīxinikanoko nota. Hīxinikari nipinini hīte īkapani,” itxa. ²⁵ Ninoa nipokotaka atoko, mitxi komiri ikosekini atokokana, ikosekari iākoanaxi. Iusaaki itxana: “Ia iākoanaxi oerekari Teoso kamapekari ikamaenetakiti amaneri, kotxi niarēka xiketa hīte īkapani. Ia iāriā hiātakasaaki, hīxinikanoko nota. Hīxinikariko nipinini hīte īkapani,” itxa Xesosi.

²⁶ Ia komiri hinikasaaki, ia iākoanaxiākiri hiātakasaaki, hōerekari Apiananiri ipinini kākiti īkapani. Ikara hōerekiniritika iua ikorapokoriti kanapiriāko.

²⁷ Maxikatiīka kākiti nikiniāri ia komiri, maxikatiīka iātiniāri Apiananiri iākoanaākiri, ikamari maerekati, kotxi !ipaxitari Apiananiri iō, iarēka pakini. ²⁸ Ia komiri hinikini apisapanika, ia iākoanaxiākiri hiātini apisapanika, erekari hīxinikiniri hāxixinireē auakari. Maerekati auakasaaki, hamanaāri Teoso imakatzakiniri īkapani. Eereka ia

komiri hinika, ia iāriā hiāta. ²⁹ Maxikatiika hinikiniāri, hiātiniāri, ininiā hīteka akiritari himisiritiko apokini, kotxi kona hīpaxitari Apiananiri īto. ³⁰ Ikara xika itomaneri hīte sauaki iōkapeta. Ikara xika apanakini amianata. Ikara xika apanakini ipīpeka.

³¹ Amaerekani anitiniā, aamanainiāri Teoso makatxakiniri amaerekani, ininiā amisir-itiko kona apoka. ³² Txamari Apiananiri apokiniāri amaerekani, imisiritaua ate uatxa, amaerekani atakanapini īkapani, ininiā eereka !imisiritaua iua sākire mauīākanikata.

³³ Ininiā nitariakori, hāpotiitakasaakia Xesosi ipinini xinikiko kiiniriti īkapani, hiātapana apanakini. ³⁴ Hinatxitiniā, hinipokotako hāapoko. Ininiā hāpotiitakasaakia ! hīkamari maerekati, ininiā Teoso !imisiritai. Apikomoni nōtākikai ereē napokasaaki.

12

Erekari Matamatakoti Sikakiti Kākitimoni

¹ Nitariakori, ninirekari himarotiniiri Erekari Matamatakoti sikakiti. !Apakata him-imarotakaniri. ² Mitxi Xesosi sākire mauīākanini hinakasaakia, himisirienetaāka, ininiā hāuikari teoso kamakori masākireti teoso atāo inakari ininiua. Ikara himarotape. ³ Kākiti sāpiretiniāi hīte: “Maerekati kamakari itxaua Xesosi,” ininiā iuasaaki himarotari Erekari Matamatakoti !uari iuamoni. Kākiti sāpiretiniāi hīte: “Apiananiri itxaua Xesosi,” ininiā iuasaaki himarotari Erekari Matamatakoti auapitika iuamoni, kotxi ikara iua oerekakiti.

⁴ Erekari Matamatakoti siākiti ikini sereti aua, iuaritika Erekari Matamatakoti ātinoka aua. ⁵ Ikini sereti parīkatxi Teoso īkapani aua, iuaritika Apiananiri ātinoka aua. ⁶ Ikini sereti Teoso kamakiti aua kākiti īkapani, iuaritika Teoso ātinoka aua.

⁷ Erekari Matamatakoti iuaka oerekaua kākitimoni, ikinimane ereka inini īkapani. ⁸ Iua Erekari Matamatakoti sikari apanakinimoni isākire kīkiterini ininiuana īkapani. Iua Erekari Matamatakoti sikari apanakinimoni isākire kimarorerini ininiuana īkapani. ⁹ Iua sikari apanakinimoni Teoso sākire iteene auikinina īkapani. Isikari apanakinimoni amianatakani imakananitinina īkapani. Erekari Matamatakoti ātinoka aua, iuaritika ikini sereti isika kākitimoni. ¹⁰ Apanakini isikaposotiireta posotiiretxi ikaminina īkapani. Apanakini isikaimaroreta Teoso sākire isāpiretinina īkapani. Apanakini isikaimaroreta Erekari Matamatakoti sākirauatakasaaki imarotiniina īkapani, maerekati matamatakoti sākirauatakasaaki imarotiniina īkapani apaka. Apanakini isikaimaroreta ikini sereti kākiti sākire isākiretinina. Apanakini isikaimaroreta ikara sākiretxi mimarotakoti ikenakotakasaakina, isāpiretinirina iua kenakotakani ninoa sākireē ninoa apaka imarotiniiri īkapani. ¹¹ Ātinoka Erekari Matamatakoti aua. Iuanokara parīkauata ikara atoko. Isikari ikara isikakiti kākitimoni inireēkiti iaōka.

Kristo Īto Pirena

¹² Kākiti īto ātinoka aua, iuaritika aua ikii, ikanoke, iuako, itapike, ikiti, txaāpota. Itori ikara atoko inakari aua ītotxiā, iuaritika ātinoka ītotxi aua. Iua atokokana itxa Kristo īto. Xesosi sākire auīākanini Kristo īto atoko itxauana. ¹³ Atxiīti Xoteoakori atxaua. Atxiīti Xoteo minakanua atxaua. Atxiīti nitiritxi amotakoni atxaua. Atxiīti nitiritxi minakatiua atxaua. Iuaritika ātika ītotxi atoko atxaua, kotxi Erekari Matamatakoti ātinoka inakari apoka atemoni. Iua apotiitaua ātika ītotxi atoko anini īkapani. Iua aua aākixinireē.

¹⁴ Kākiti īto ātinoka aua, iuaritika aua ikii, ikanoke, iuako, itapike, ikiti, txaāpota. Ītotxiā kaiāopokori aua. ¹⁵ Ininiā !apakata kitītxi sāpiretiniā: “Uakōtxi !nitxaua, ininiā ītotxiā auakari !nitxaua.” Ikara atoko isāpiretiniā, iuaritika ītotxiā auakaripitikara kitītxi. ¹⁶ Kenakokitxi sāpiretiniāri: “Okītxi !nitxaua, ininiā ītotxiā auakari !nitxaua.” Ikara atoko isāpiretiniā, iuaritika ītotxiā auakaripitikara kenakokitxi. ¹⁷ Ītotxi okītxinoka auiniā, kanatokopa itxa kākiti kenakorauatini? Ītotxi kenakokitxinoka auiniā, kanatokopa itxa kākiti imixikarauatini? ¹⁸ Teoso kamari ikinika ītotxiā auakari. Iua inireēkiti iaōka ikaminana ninoa. ¹⁹ Ātinoka ītotxi auakiti auiniā, ītotxi !uari. ²⁰ Ītotxiā auakani itori aua, iuaritika ītotxi ātinoka aua.

²¹ Okītxi kona posotari isāpiretiniri uakōtxi: “Kona nota nirekai pite.” Apaka kiūtxi kona posotari isāpiretiniri kitītxi: “Kona nota nirekai pite.” ²² Kona ikara atoko itxa. Atxiīti auākatari āti aīto auakari !itxa, kotxi !kataparari, iuaritika ikara mauakaniā, aīto liparīkauata atāo. ²³ Kākiti tiretari iītoā auakari poiāori kākiti atamatakiti. Ipatari

apanakini iītoā auakari kākiti matamatakani īkapani. ²⁴ Aītoā auakari apiata apotxitakiti aua apaka. Kona apatari ikara. Apanakini aītoā auakari Teoso takari aītoā iteene apaxitini īkapani. ²⁵ Ininiā Teoso kamari ītotxi ātinoka inini. Ikamari ītotxiā auakani itiretakiniuana īkapani. Apanakini ītotxiā auakari naiatiniāri apanakini iītoā auakari, lapakata. ²⁶ Āti ītotxiā auakari tsiika. Iuasaaki ikinika kākiti iīto atatsiirauata. Āti ītotxiā auakari iuikaāka, ininiā ikinika ītotxi auakini poxokoniua.

²⁷ Kristo iīto atoko hītxaua hīte. Ītotxiā auakani atoko hītxaua Kristo iītoā. ²⁸ Teoso sākire auīākani ītotxiā auakani atoko itxauana. Ikini sereti parīkatxi aua ītotxi īkapani akamini īkapani. Merepanika Teoso mereēri iua iokanatakani. Eereka imereēri kākiti Teoso sākire sāpiretakani. Eereka imereēri kākiti Teoso sākire oereēkani. Eereka imereēri kākiti Teoso posotiire oereēkani, amianatakani makananitakani, kākiti moianatakani, auītetxiakori, kākiti sākire apanakini mimarotakiniti sākiretakani pakini. Teoso takari ikara atoko inakani parīkauatakani iua sākire auīākani imoianatinina īkapani. ²⁹ Kona ikinimaneni Teoso iokanatakani txaua. Kona ikinimaneni Teoso sākire sāpiretakani txaua. Kona ikinimaneni Teoso posotiire oereēkani txaua. ³⁰ Kona ikinimaneni amianatakani makananitakani txaua. Kona ikinimaneni imarotari isākiretiniri kākiti sākire apanakini mimarotakiniti. Ikinimane liposotari isāpiretiniri ikara sākiretxi iua kenakotakanimoni ninoa sākireē ninoa apaka imarotini īkapani. ³¹ Auapitika ikara Erekarī Matamatakoti sikakiti aparīkauatini īkapani. Iuaritika hinirekariko isikakiti apiaerekatakari. Uatxa noerekaiko isikakiti apiaerekatakari.

13

Tiraōkitxi Pirena

¹ Atxiīti nimarotari ikini uāka sākire nisākiretini. Atxiīti nimarotari Teoso nitiriakori iaxitikini sākire nisākiretini, txamari iuasaaki nitiraōkiuatini !auari, ininiā !apakata nimarore. Metao āsokiko ene atoko nitxa. Ipi panera tore āsokiko ene atoko nitxa.

² Atxiīti nimarotari Teoso sākire nisāpiretini. Atxiīti nimarotari ikinipoko apanakini mimarotakiniti. Atxiīti ikinipoko imaroretxi aua notamoni. Atxiīti iteene nauikari Teoso posotiire, ininiā niposotari ōtanoxiratarī nipaniātini ātiātaā isini. Txamari iuasaaki nitiraōkiuatini !auari, ininiā minakati nitxaua. ³ Atxiīti nisikari ikinipoko nitii, nitxineirote pakini matxineirotenimoni. Atxiīti nauiritari niīto arikiko. Txamari iuasaaki nitiraōkiuatini lauari, ininiā lapakata.

⁴ Pitiraōkiuatakasaaki, piposotari piātapiniri pinirekakiti apokini. Pitiraōkiuatakasaaki, pikamari erekari ātimoni. Pitiraōkiuatakasaaki, kona pixikotarī āti. Pitiraōkiuatakasaaki, kona pisāpiretari apanakini piuikiniri pikamakiti. Pitiraōkiuatakasaaki, !piuikaua. ⁵ Pitiraōkiuatakasaaki, kona pitxīkitakarī āti pētauatini. Pitiraōkiuatakasaaki, kona pinirekari piteka nireēkitinani. Pitiraōkiuatakasaaki, !katimari pomanākarauatini. Pitiraōkiuatakasaaki, !pixinikapinikari maerekati apanakini kamakiti pitemoni.

⁶ Pitiraōkiuatakasaaki, kona pipoxokoniua āti kamakasaakiri maerekati. Pitiraōkiuatakasaaki, pipoxokoniua atāo inakarī pikenakotakasaaki. ⁷ Pitiraōkiuatakasaaki, pimīteenekari ikinipoko. Pitiraōkiuatakasaaki, pauikari kākiti sākire. Pitiraōkiuatakasaaki, pauikari kākiti kamaenetakiti ikamini. Pitiraōkiuatakasaaki, !katimari pitakanapiniri piparīka pikamini. ⁸ Tiraōkitxi !ixipoka. Txamari kākiti sāpiretakiti xipokapitikako. Kākiti sākiretiniri āti uāka sākire xipokapitikako. Kākiti imarore ereēkokapitikako. ⁹ Kotxi poiāonoka aimarore. Poiāonoka Teoso sākire aimarota asāpiretini. ¹⁰ Āti ōti aimarotari ikinipoko atāo inakarī. Iuasaaki atāo minakati !auaika. ¹¹ Amarini ninakasaakia, nisākirauata amarini sākirauatini atokokana. Iuasaaki nimarotakiti amarini imarotakiti atoko itxa. Nixinikakiti amarini xinikakiti atoko itxa iuasaaki. Txamari kikipe ninakasaakia, !ninarekaikari amarini atokokana nininia.

¹² Uatxa aātamatakiti Teoso oerekakiti !aposota iteene aātamatinī. Ātakaāri katxikoroā atamatakori atoko itxa aātamatakiti, Teoso oerekakiti. Āti ōti Teoso apisatoō aāpoka. Uatxa poiāonoka nimarota. Āti ōti Teoso apisatoō aāpokasaaki, nimarotari ikinipoko, Teoso imarotinino atokokana.

¹³ Ininiā aua ipi āti pakini erekari aākixinireē auakari. Aua Teoso sākire auikiko. Aua Teoso kamaenetakiti ikamini auikiko. Aua tiraōkitxi. Ikara tiraōkitxi apiaerekatakari.

14

Erekari Matamatakoti Siākiti

¹ Ininiā ikiniōtika hītiraōkiuatako. Hinirekariko Erekari Matamatakoti siākiti. Apiata hinirekariko iua sikinii Teoso iokanapirena hīsāpiretini. ² Kākiti sākire mimarotakoti sākiretakari misākiretari Teoso. !Imisākiretari kākiti, kotxi kākiti !imarotari isākire. Erekari Matamatakoti posotiireē isāpiretari atāo inakari Teoso oerekakiti. ³ Teoso sākire sāpiretakaripekana misākiretari kākiti. Iua txīkitakari kākiti apiata auikiniri Teoso sākire. Isikataparaxiniretana ninoa. Imīkapiritari ninoa ākixinire. ⁴ Kākiti sākire mimarotakoti sākiretakari, iuaka txīkitakaua apiata auikiniri Teoso sākire. Teoso sākire sāpiretakaripekana, txīkitakari ikinika Xesosi sākire auīākani apiata auikinirina Teoso sākire. ⁵ Erekari hīte hīkinika sākiretiniri kākiti sākire mimarotakoti. Iuaritika apiaerekata hīsāpiretiniri Teoso sākire, kotxi Teoso sākire sāpiretakari apiari itxaua. Kākiti sākire mimarotakoti sākiretakari poiāori itxaua. Iua sāpiretiniāri isākire kenakotakani ninoa sākireē ninoa apaka imarotiniiri ikapani, iuasaaki erekari, kotxi iuasaaki itxīkitakari Xesosi sākire auīākani apiata auikiniri Teoso sākire. ⁶ Hītemoni napokasaaki, nisākiretiniāri kākiti sākire mimarotakoti, nitxīkitakatai hīte apiata hāuikiniri Teoso sākire? Konapitini. Ininiā kona itxa. Noerekiniāi Teoso oereēkiti notamoni, nisāpiretiniāi Teoso imarore, nisāpiretiniāi Teoso sākire, noerekiniāi Teoso sākire atāo hāuikini ikapani, iuasaaki nitxīkitakai hīte apiata hāuikiniri Teoso sākire. ⁷ Maxinikari xikari moianatakari atxiīti viorāo, atxiīti xōkakori pakini. Kākiti mimatireni kaminiāri ikara, iuasaaki xikari atāo inakari limarotaāka. Ienenoka aua.

⁸ Ātipekana noerekai. Trōpetā ene atāo ininiā, sotatoakori kenakotakasaakiri, aiamatana ineenamauatini ikapani. Trōpetā ene na atāo ininiā, sotatoakori !imarotari neenamati manapipe inini.

⁹ Iua atokokana kākiti sākire imarotakiti himasākiretakaniā, kiriāpa ninoa imarotari hīsāpiretakiti? Ikara atoko hīsākirauatiniā, maxikatīka hīsākirauata. ¹⁰ Itori uākati sākire aua ikini itixiti. Apakata ikinika imarotiko. ¹¹ Kākiti sākire nimimarotakaniā, ininiā notamoni iua āti tixinikiri atoko itxa. Apaka iuamoni nota āti tixinikiri atoko nitxa. ¹² Hīte iteene nirekari Erekari Matamatakoti siākiti hāpakapini, ininiā apiata hinirekariko isikinii isikakiti Teoso sākire auīākani iua sākire iteene auikinina ikapani.

¹³ Ikara atoko ininiā, erekari kākiti sākire mimarotakoti sākiretakari amanainiri Teoso isikaimaroretiniri iua sāpiretiniri isākire kenakotakani ninoa sākireē ninoa apaka imarotiniiri ikapani. ¹⁴ Teoso nimisākiretiniā kākiti sākire mimarotakotiā, nixinire misākiretari Teoso, txamari !imarotari notaka sākire. ¹⁵ Ininiā kipa atāo nikamini? Ia atāo: Nimisākiretari Teoso nixinireē. Apaka nimisākiretari Teoso niīkiteē. Nixikarauata nixinireē. Apaka nixikarauata niīkiteē. ¹⁶ Kākiti sākire mimarotakotiā hīsāpiretiniāri Teoso ereka inini, kākiti ereē pisākire mimarotakani sauaki, !iposotari “atāopitikara” inini, kotxi !imarotari pisāpiretakiti. ¹⁷ Atxiīti atāo hīsāpiretiniri Teoso ereka inini, txamari iuasaaki kona pitxīkitakari iua kākiti apiata auikiniri Teoso sākire.

¹⁸ Peerekari Teoso, kotxi apiata isikaimaroretano nota nimisākiretiniri iua kākiti sākire mimarotakotiā. Poiāonoka hīte imarotari kākiti sākire mimarotakotiā himisākiretiniri iua. ¹⁹ Iuaritika, Xesosi sākire auīākanikata nauakasaaki, apiaerekata nisāpiretinina sikonoka sākiretxi ninoaka sākireē, kotxi apakata ninoa imarotiniiri nisākire. Niposotiniāri siko mio sākiretxi kākiti sākire mimarotakotiā nisāpiretiniri kākiti, itori nisākire, iuaritika maxikatīka nisākirauata, kotxi kākiti !imarotari.

²⁰ Nitariakori, lapakata himarore amarini xapitikiri imarore atokokana inini. Iuaritika amarini xapitikiri makamakaniri maerekati ātimoni, iua atoktxikana amarini xapitikiri atoko !hīkamapiri maerekati ātimoni. Aneēkari imarore atoko itxako hīte imarore.

²¹ Teoso sākire iōkatsopatakori txari:

Niokanatari āti uāka hītemoni, hīte nimisākiretini īkapani. Āti tixinikini sākireē nimisākiretai hīte. Iuaritika kona hīkīpitari nisākire, itxa Apiananiri.

²² Ininiā Teoso sākire auīākari sākiretiniāri Teoso sākire mauīākani sākire, iua mimarotakinīti, Teoso sākire mauīākani iusaaki imarotari Teoso posotiire. Teoso sākire auīākari sāpiretiniāri Teoso sākire apanakini Teoso sākire auīākanimoni, ninoa iusaaki imarotari Teoso posotiire. ²³ Teoso sākire auīākani apotiitiniāua, ikinimane sākiretiniāri kākiti sākire mimarotakinani, iusaaki kākiti Teoso sākire poiāopanika imarotakari īroiniā, Teoso sākire mauīākati atxiīti īroiniā, ininiā iua uākatai hīte mapitxiritakani hininiua.

²⁴ Txamari ikinimane sāpiretiniāri Teoso sākire iusaaki, Teoso sākire mauīākati īroiniā, kākiti Teoso sākire poiāopanika imarotakari īroiniā, ininiā iua imarotari maerekati kamakari ininiua. Iusaaki imarotari imisiritiko auapitika āti ōti. ²⁵ Iusaaki ikinimane imarotari iua xinikakiti ākixinireē. Ininiā iusaaki ikapotoreēkaua Teoso apisatoō. Itxari: “Atāopitikara Teoso aua hīte sauaki,” itxa.

Kākiti Apotiitakasaakiua Teoso Apisatoō

²⁶ Nitariakori, kanatokopa itxa Teoso sākire auīākani apotiitakasaakiua? Aāpotiitakasaakiua, akinika aminari xikari Teoso īkapani. Akinika iposope Teoso sākire aōerekini atāo aimarotini īkapani. Akinika iposope Teoso oerekakiti asāpiretini. Akinika iposope kākiti sākire mimarotakoti asākiretini. Akinika iposope iua sāpiretakiti asāpiretini ikinimane imarotini īkapani. Ikara atoko itxa aāpotiitakasaakiua Teoso apisatoō. Iusaaki makamari ikinika, Teoso sākire Teoso nakitiakori apiata auikini īkapani. ²⁷ Iusaaki kākiti sākiretiniāri kākiti sākire mimarotakoti, ipinoka kākiti kamari ikara atoko inakari, atxiīti ipi āti pakini kamari ikara atoko inakari. !Apakata apikomoni kākiti sākiretini kākiti sākire mimarotakoti iusaaki. Āti sākirauataksaaki, apanakini kenakotari. Ātinoka sākirauata iusaaki. Isākirauataka atoko, āti sāpiretari isāpiretakiti isākire mimarotakani sākireē, isāpiretakiti imarotini īkapani. ²⁸ Iusaaki isākire sāpiretakari mauakaniā, !apakata kākiti sākire mimarotakoti sākiretakari sākirauatini. Erekarī ākixinireē isākirauatini Teosokata.

²⁹ Kākiti apotiitakasaakiua Teoso apisatoō, iusaaki ipi, atxiīti ipi āti pakini Teoso sākire sāpiretakani sāpiretariko Teoso sākire. Iusaaki apanakini xinikariko iua sāpiretakiti, atāo inini imarotini īkapani. ³⁰ Topākakari xinikasaakiri apikomoni Teoso oerekakiti, ininiā iusaaki sākirauatakarī iotoka, Teoso oerekakiti topākakari sāpiretini īkapani. ³¹ Ikara atoko ininiā ikinimane posotari Teoso sākire isāpiretinina. Teoso sākire sāpiretakani āti sākirauata, eereka āti sākirauata. Ikara atoko itxaāpotana. Ininiā ikinimane oerekaākako. Ikinimane sikataparaxiniretaākako. ³² Teoso sākire sāpiretakani posotari iātapiniri Teoso oerekakiti isāpiretini īkapani. ³³ Kotxi Teoso kona potxitari ienenoka auini. !Apakata kaiāopokori sākirauatini, kotxi apanakini !imarotari ninoa sāpiretakiti. Neenamati atoko itxa. Teoso nirekarī inakitiakori kamakiti atāo inini apotiitakasaakiuana iua apisatoō.

³⁴ !Apakata sito sākirauatini hāpotiitakasaakiua Teoso apisatoō. !Auiritaāka osākirauatini iusaaki, kotxi Teoso sākire iōkatsopatakarī paniātaro sito kaminiri kiki paniātakiti. ³⁵ Ninoa nirekiniāri ipimarauatinina imimarotakiniti imarotini īkapani, ininiā ninoa pimaāna itanirina aapokona apokasaakina. Sito sākirauatiniā kākiti apotiitakasaakiua Teoso apisatoō, kākiti pētauata oa sākirauatini xika.

³⁶ Hīte kona apokaerekatatarī nisāpiretakiti? Atxiīti hīte kamari Teoso sākire? Konapitini. Atxiīti Teoso sākire iokanataāka hītenanimoni? Konapitini.

³⁷ Teoso sākire sāpiretakani hininiāua, Erekarī Matamatakoti siākiti auiniāi, ininiā iusaaki himarotari ikara nisākire niōkatsopatakiti Apiananiri paniātakiti inini. Hīsāpiretariko hāuikiniri ikara. ³⁸ Himamaākatakaniāri ikara nisākire, apanakini ! imaākatari hīte sākire.

³⁹ Ininiā nitariakori, iteene hinirekariko Teoso sākire hīsāpiretini. Apaka hāuiritariko kākiti sākire mimarotakoti sākiretiko. ⁴⁰ Ininiā hīkamariko ikinika atāo hāpotiitakasaak-
iua Teoso apisatoō, Teoso sākire ikinimane kenakotini ikapani.

15

Xesosi Ōkitikiniua Pirena

¹ Nitariakori, uatxa iuaīkana ninirekari hīte xinikiniri Teoso iokanapirena erekari hītemoni nisāpiretakiti. Hīte apakapapekari ikara nisāpiretakiti. Hīte iteene auikari ikara. ² Ikara Teoso iokanapirena erekari oerekai himaerekani makatxakiko. Ininiā atāo hīxinikariko ikara nisāpiretakiti. Iteene hāuikiniāri Teoso iokanapirena erekari, himaerekani makatxakaāka. Atāo minakati hāuikiniā, ininiā maxikatīika hāuikari.

³ Nisāpiretapekai mitxi nota apakapakiti, kotxi ia himimarotakaniā !apakata. Ia napakapakiti: Kristo ipina amaerekani imakatxakini ikapani. Teoso sākire iōkatsopatakori sāpiretaua ikara. ⁴ Eereka ikataāka. Ipi ōti, āti ōtisaaki iuaīkana ōkitikaua. Teoso sākire iōkatsopatakori sāpiretaua ikara. ⁵ Eereka Petro atamataru iua. Eereka ikinika Kristo moianariakori atamataru iua. ⁶ Eereka kiētosi aītariakori atamataru iua āti ōti apotiitakasaakiuana. Kaiāopanikani ninoa auapanika. Ātikaka ipipe. ⁷ Eereka Txiako atamataru iua. Eereka ikinika Xesosi iokanatakini atamataru iua. ⁸ Imapotōkire nota apaka atamataru iua. !Natamataru Xesosi ikorapokoriti itīpokotakasaaki. Eereka iua apoka notamoni.

⁹ Xesosi iokanatakiti poiāori nitxaua. Apanakini iua iokanatakini apiata. Mitxi ! erekari nikamakiti, kotxi nimisiritana Xesosi sākire auīākani Teoso nakitiakori, iuaritika Xesosi akiritano iua iokanatakiti nininiua. ¹⁰ Teoso sikari ikinipoko erekari notamoni, ininiākara iua iokanatakiti kākitimoni nitxaua. Kona maxikatīikani isikari ikinipoko erekari notamoni, kotxi iteene nīparīkauata Teoso ikapani. Apanakini Xesosi iokanatakini iteene parīkauata, iuaritika nota parīkauata apiata. Kona nota posotiireēni nīparīkauata. Ikinipoko erekari Teoso sikakiti notamoni sikaposotiiretano nota nīparīkauatini ikapani. ¹¹ Atxiīti nota sāpiretai ikara Kristo sāpiretakiti. Atxiīti apanakini iua iokanatakini sāpiretai. Ikara Kristo sāpiretakiti ate sāpiretai. Ikara Kristo sāpiretakiti hīte auika.

Ipīkani Ōkitikiko Pirena

¹² Ate sāpiretai Kristo iuaīkana ōkitikiniua. Ininiā kinirepa ātikaka hīte txari ia? “! Auari ipīkani iuaīkana ōkitikiniua,” hītxa. ¹³ Ipīkani iuaīkana ōkitikiniua mauakaniā, ininiā Kristo apaka kona ōkitikaua. ¹⁴ Kristo mōkitikakaniāua, ininiā maxikatīika asāpiretai iua sākire. Kristo mōkitikakaniāua, maxikatīika hāuikari iua sākire. ¹⁵ Kristo mōkitikakaniāua, na atāo asāpiretai Teoso kamakiti, kotxi ate sāpiretapekai iua ōkitikiniri Kristo. Ipīkani iuaīkana ōkitikiko mauakaniā, Teoso kona ōkitikari Kristo. ¹⁶ Kotxi ipīkani iuaīkana mōkitikakaniāua, Kristo apaka kona ōkitikaua. ¹⁷ Kristo iuaīkana mōkitikakaniāua, maxikatīika hāuikari iua sākire, kotxi !imakatxakari himaerekani. ¹⁸ Kristo iuaīkana mōkitikakaniāua, ipīkani iua sākire auīākani pīpinanaka. ¹⁹ Xesosi mōkitikakaniāua, iuaritika ikiniōtika ate auikari iua sākire ikorapokoriti aūakasaaki, ininiā miīkiteni apiarini atxaua ate.

²⁰ Ikara na atāo. Uatxa maxinikari atāo inakari. Kristo ipīkaripeka ōkitikapeēkaika. Iua amātiiri merepitipanika auakari atoko itxa. Iua merepanika ōkitikaua, ininiākara aimarotari apīkasaaki ate apaka ōkitikaua. ²¹ Āti kiki kamakitiā ipīkitxi apoka ikini-
manemoni. Iua atokokana āti kiki kamakitiā, ipīkani ōkitikiko apoka. ²² Adāo kamakitiā ikinimane ipina. Kristo kamakitiā iua sākire auīākani auapininiika ātipirika. ²³ Kākiti ōkitikaāka ia atoko. Kristo mitxi ōkitikaua. Iua merepanika ōkitikakariua. Ikanapiri-
iākasaaki iua nakitiakori ōkitikauako apaka. ²⁴ Eereka itixi xipokaāka. Iuasaaki ikinika auītetxi maerekati, ikinika kaposotiireri maerekati pakini ixipokako. Eereka ikinika iua nakitiakori isika iri Teosomoni. ²⁵ Kristo ikinimane auīte itxauako. Iuasaaki ixipokari ikinika imokaiakari posotiire, kotxi ikiti patapi itakana ninoa. ²⁶ Imokaiakari atoko itxa

ipīkitxi. Imokaiakariakori ixipokasaaki, imapotōkire ixipokari ipīkitxi. ²⁷ Teoso sākire iōkatsopatakori txari:

Teoso takapekari ikinika iua kiti patapi.

Ikara Teoso sākireē “ikinika” aua, iuaritika aimarotari iuaka litakaua Xesosi kiti patapi, kotxi Teosora txīkitakari Xesosi ikinimane auīte ininiua. ²⁸ Kristo ikinimane auīte inakasaakiua, iua Teoso ākiri auītetariko Teoso, kotxi mitxi Teoso txīkitakari iua ikinimane auīte ininiua. Iuasaaki Teosonoka ikinimane auīte itxaua.

²⁹ Ipīkani mōkitikakaniāua, kinirepa apanakini patxisataāka ipīkani ōkitikiniua īkapani? ³⁰ Atepekana, ipīkani mōkitikakaniāua, kinirepa ikiniōtika amīteenekari monōkori? ³¹ Nitariakori, nimarotari ipīkitxi monōkori ikiniōtika. Ikara nisāpiretai, kotxi niuikai hīte. Niuikari aāuini aāuīte Kristo Xesosikata. ³² Uai Épeso sitatxitiā kākiti ākiti kaneenamari atoko inakani nirekari imaīkinino nota. Ipīkani mōkitikakaniāua, kinirepa nimīteenekari ikara atoko inakari? Ipīkani mōkitikakaniāua, ininiā atxari:

Manipokota, maiāta, kotxi katana apinako.

³³ Kona hāuiritapiri āti misirienetini. Kākiti erekari moianatiniāri maerekati kamakani, ninoa txīkitakari iua maerekati kamakari ininiua. ³⁴ Himerekako. Himarotariko atāo inakari hīkamini īkapani. Maerekati !hīkamapinikako. Hīpētauatako, kotxi apanakini hīte !imarotari Teoso.

Kākiti Īto Ōkitikasaakiua

³⁵ Atxiīti āti txari: “Kanatokopa itxa kākiti ōkitikiko? Iuasaaki kanatokopa inakaripa iīto?” itxa. ³⁶ !Kūkiteri kākiti pimarauatini ikara atoko. Takariki, pimatakaniāri kipatxi āki !ipitxaka. ³⁷ Pitakarauatakasaaki, pitakari okinoka, atxiīti triko, atxiīti kimi. Takari aneēkari kona pitaka. Kona takariki atokoni itxa takari ipitxakasaaki. Ipitxere ipinimoni. ³⁸ Teoso kamari takari pitxere inireēkiti iaōka. Ikini takariki Teoso sikari ipitxere. ³⁹ Āti xinitxi kona āti xinitxi atokoni. Aua kākiti xini. Kaxipirini xini ipinimoni itxa. Kotipiriki xini ipinimoni itxa. Ximaki xini ipinimoni itxa.

⁴⁰ Aua iaxiti apiko nopinixiti auakani, aua itixi takote auakani apaka. Peereri ikinipoko, iuaritika iaxiti apiko nopinixiti auakani ipinimoni, itixi takote auakani ipinimoni. ⁴¹ Peereri atokatxi. Peereri kasiri apaka, txamari kasiri ātiāo. Peereri iōriki apaka, txamari iōriki ātiāo. Apaka āti iōriki āti iōriki atokotxikana !auari.

⁴² Iua atokokana itxa ipīkani iuaīkana ōkitikikosaaki. Ītotxi ixiti taākori !auaika. Iua ōkitikakori kona ipinaika. ⁴³ Ītotxi katikosaaki, !erekari. Ītotxi iuaīkana ōkitikikosaaki, peerekari. Ītotxi katikosaaki !kataparari. Iuaīkana ōkitikikosaaki, kataparari. ⁴⁴ Aīto katikosaaki, aīto itixi auakani ĩto atokotxikana. Aīto iuaīkana ōkitikikosaaki ātiāo aīto. Ītotxi ĩkorapokoriti aāuini īkapani aua. Apaka aua ĩtotxi ipinimoni, Teoso sikakiti apīkasaaki. Ikara ĩtotxi !ipina. ⁴⁵ Teoso sākire iōkatsopatakori txari:

Teoso txīkitakari kiki merepitipanika auakari Adāo inakori auāki inini.

Adāo imatonōkari auakari, Kristo inakori, txīkitakari kākiti auāki inini, apaka imapinakani īkapani.

⁴⁶ Teoso nireēkiti axinikini kona apoka merepanika. Merepanika axinikari ateka nireēkiti, eereka axinikari Teoso nireēkiti. ⁴⁷ Kiki merepitipanika auakari kipatxi kamakori itxaua. Āti kiki Apiananiri, Teoso tixinekiri iua. ⁴⁸ Ikinimane kākiti itixi auakani, iua Adāo kipatxi kamakori atokokana. Ikinimane kākiti Teoso tixine sikani, Kristo Teoso tixinekiri atokokana. ⁴⁹ Aponaniākasaaki, kipatxi kamakori aīto, Adāo ĩto atokokana itxa aīto. Iua atokokana Teoso tixinekiri ĩto, Kristo ĩto atokokana itxako aīto.

⁵⁰ Nitariakori, nisāpiretai hīte, !apakata kākiti ĩto, iarēka pakini sini Teoso auītetxi ininiātaāua. Ipinakari kona auapininiika !itxa. ⁵¹ Hīkenakotariko nisākire. Nisāpiretaiko kākiti mimarotakinini mitxi. Kona ikinimaneni ipina. Iuaritika amakinika txīkitakaāka ipinipo aniniua. ⁵² Iuasaaki imapotōkire trōpetakero xōkaāka. Iuasaaki mēkokari katimari atoko itxa. Poki katimari matākaātini atoko itxa. Amakinika katimaritika txīkitakaāka ipinipo aniniua. Iua trōpeta xōkikosaaki, iuasaaki ipīkani ōkitikaāka. Kona ipinaikanako. Iuasaaki atxīkitakaāka ipinipo aniniua. ⁵³ Kotxi arakakani txīkitakaākako miarakakani ininiua. Ipīkani txīkitakaākako mipīkani ininiua. ⁵⁴ Arakakani

txīkitakikosaaki miarakakani ininiua, apaka ipīkani txīkitakikosaaki mipīkani ininiua, iusaaki Teoso sākire iōkatsopatakori apopeka. Ia atoko itxa Teoso sākire kitxakapirīka: Ipīkitxi xipokaākako. Auape kāiatakari, ipīkitxi xipokakari.

⁵⁵ Ipīkitxi tsii !auaika. Maerekani misiritikoātaā anikakari kona kāiata.

⁵⁶ Ipīkitxi tsii mitxi aua amaerekani xika. Teoso paniātakiti iōkatsopatakori oerekaua amaerekani. Teoso paniātakiti iōkatsopatakori mauakaniā, !auari kākiti misiritiko. Txamari maerekanitxi tapara aua, kotxi Teoso paniātakiti iōkatsopatakori auapitika.

⁵⁷ Erekapitikari Teoso, kotxi aāuīte Xesosi Kristo txīkitakaua akāiatini.

⁵⁸ Ikara atoko ininiā, nitariakori nota tiretakini, kataparaxinire hītxako. Kona hāuiritapiri apanakini txīkitakinii maerekati hīkamini. Hīparīkauatako ikiniōtika Apiananiri īkapani, kotxi himarotari maxikatiīka !hīparīkauata iua īkapani. Hīparīka īki hāpakapapitikako.

16

Txineiro Sikiko Xesosi Sākire Auiākani Īkapani

¹ Uatxa nisāpiretai txineiro himakatzakini Teoso nakitiakori īkapani. Hīkamariko Karásia tixini auakani nipaniātini atokotxikana. Nipaniātana ninoa Teoso misākiretikoātaā apotiitakaniua ia atoko: ² Ikini Tomīko hīkinika hīte nīkataro txineiro ninoa īkapani. Txineiro Teoso siākiti iaōka, hinīkatari ipixini ninoa īkapani. Ininiā ereē napokasaaki apikomoni txineiro kona apotiitaāka. ³ Napokasaaki ereē, niokanataro kākiti, txineiro hīsikakito anikakani Xerosareēmoni. Hīsāpiretano hīokanatsopatakitiā himereēkini hītxineirote anikakani īkapani. ⁴ Atxiīti erekari nota sini apaka, ininiā ninoa moianatano nota.

Paoro Paniātakiti Pirena

⁵ Masetónia tixinimoni nisako, eereka napoka hītemoni, kotxi nisapitikako Masetóniamoni. ⁶ Iuasaaki atxiīti nikaikota hītekata. Atxiīti nikaikota mitaāsaaki hītekata. Ininiā eereka hīte posotari himoianatinino nota naiamatakasaaki apikoxiti nisini īkapani. ⁷ Kona ninirekari mapaōtinoka nikaikotini hītekata uatxa. Apiananiri auiritiniāno, ninirekari apikomoni nikaikotini hītekata. ⁸ Txamari nikaikota uai Épeso sitatxiti Pētekósitxi kiiniriti manapi ōti. ⁹ Kotxi uatxa kaiāopokori kākiti īkorapokoriti auakani nirekari nisāpiretiniri Teoso iokanapirena erekari ninoamoni. Txamari kaiāopokori kākiti !inirekano.

¹⁰ Atxiīti Tximótxio sari hītemoni, ininiā hāpakapariko iua, imapīkarauatakani īkapani hīte sauaki, kotxi iua parīkauata Apiananiri īkapani nota parīkauatini atokokana. ¹¹ Ininiā kona apakata kākiti mamaākatakaniri iua. Ikanapiriākasaaki notamoni, iusaaki hīokanataro iua erekaxinire inini. Niātapari iua aītariakorikata.

¹² Iteene ninirekari aītari Aporo apokini hītemoni aītariakorikata. Txamari uatxa ! inirekari isini hītemoni, iuaritika iposotakasaaki isapitikako hītemoni.

¹³ Araōkire hītxako. Iteene hāuikariko Teoso sākire. Hītaparaxinireritika hāuako. Hītapararitika hāuako Teoso īkapani. ¹⁴ Xesosi tiraōkiā ikinipoko hīkamako.

¹⁵ Hīte imarotari Esitépana, inirimane pakini. Ninoa Akaia tixini auakani. Iuaātaā ninoa merepitipanika auikari Xesosi sākire. Ninoa iteene parīkauata Teoso nakitiakori īkapani. Nitariakori, iteene nipaniātai hīte. ¹⁶ Hīkamariko kākiti ikara atoko inakani paniātakiti. Hīkamariko ikinimane amoianari paniātakiti, atekata parīkauatakani paniātakiti. ¹⁷ Esitépana, Potonato, Akaiko pakini apokasaaki uai, nipoxokoniua, kotxi iminarina notamoni mauakati hīte masikakiniti. ¹⁸ Ninoa sikapoxokonitari nākixinire, hīte ākixinire apaka. Erekaro ate iuikiniri kākiti ikara atoko inakani.

¹⁹ Teoso misākiretikoātaā apotiitakaniua Ásia tixini auakani xinikamanapitai hīte. Ákira inakori, Pirisira inakoro pakini iteene xinikamanapitai hīte, kotxi Apiananiri nakiti hītxaua. Apaka Xesosi sākire auiākani ninoa aapoko apotiitakaniua xinikamanapitai hīte. ²⁰ Ikinimane aītariakori uai auakani xinikamanapitai hīte. Haōkitakakasaakiaua, himaratakakauako, kotxi Teoso nakitiakori hītxaua.

²¹ Nota Paoro iōkatsopatari ia nitakapiretanapini niuakoã. ²² Kākiti matiretakaniāri Apiananiri Xesosi Kristo, maerekati takaãka iua nopini.

“Apiananiri, uai pina atemoni,” atxari Xesosi.

²³ Apiananiri Xesosi Kristo sikari ikinipoko erekari hītemoni. ²⁴ Nitiretai hīte hīkinika, kotxi Kristo Xesosi nakitiakori atxaua. Ameẽ.

2 KORĪTO

Paoro Iokanatsopatakiti Iuaīkana Korīto Auakanimoni

¹ Nota Paoro, Xesosi Kristo iokanatakito. Teoso nirekari iokanatinino kākitimoni isākire nisāpiretini īkapani. Ia aātsopa niōkatsopata. Aītari Tximótxio aua notakata. Ia iōkatsopari niokanata kākiti Teoso mereēkinimoni, Korīto sitatxiti auakanimoni. Apaka ia iōkatsopari niokanata kākiti Teoso nakitiakorimoni, Akaia tixini auakanimoni. ² Aīri Teoso, Xesosi Kristo Apiananiri pakini sikari ikinipoko erekari hītemoni. Ikamaerekaxiniretai hīte.

Teoso Mīkapiritiniua Pirena

³ Peerekari Teoso. Aāuīte Xesosi Kristo iri itxaua. Kaamonīkareri iua. Āti kākiti amonīkakari iua atoko inakari !auari. Amaerekaxinirensaaki, iua atekata aua. Amaerekaxinireni imaktxakinaua. Iuasaaki imīkapiritaua. ⁴ Imīkapiritaua amaerekaxinirensaaki, ininiā apanakini maerekaxinirensaaki, iua atokotxikana ate mīkapiritana ninoa apaka, kotxi aimarotari Teoso mīkapiritiniua ate. ⁵ Kristo iteene misiritaāka, ininiā ate misiritaāka apaka. Iua atokokana Teoso moianatari Kristo, ininiā iua moianataua ate apaka. ⁶ Apanakini misiritaua, kotxi anirekari Teoso mīkapiritinii hīte. Anirekari Teoso maktxakiniri himaerekani. Teoso mīkapiritaua ate, ininiā hīte apaka imīkapirita. Teoso mīkapiritakasaakii hīte, isikataparatai himisiritiko hīpoxokoniritika himīteenekini īkapani. Hīte misiritiko ate misiritiko atokokana. ⁷ Aimarotapitikari erekari Teoso sikinii hīte, kotxi himisiritaāka ate misiritiko atokokana, ininiā Teoso mīkapiritai hīte, ate imīkapiritini atokokana.

⁸ Aītariakori, anirekari hīxinikiniri ate misiritiko Ásia tixini aāuakasaaki. Iuasaaki iteene amaxikaāka. Kona amīteenekari. Auākatari aōkiko. ⁹ Iuasaaki aākixinireē atxa: “Apinapitikako,” atxa. Ikara atoko ininiā, aimarotari kona ate posotiire !auari. Aimarotari Teosonoka sikataparataua, kotxi iua posotari ōkitikiniri ipikari. ¹⁰ Pamōkoniri iuasaaki, iuaritika Teoso maktxakaua amapinakani īkapani. Iua maktxakapanikaua amapinakani īkapani. Ate auikari iua sākire, iuaīkana imaktxakiniua tīkane. ¹¹ Hīte moianataua ate, kotxi himisākiretari Teoso ate īkapani. Ininiā Teoso kamari hamanaākiti iaōka, kotxi Teoso kamari erekari atemoni. Eereka kaiāopokori kākiti sāpiretari Teoso iua ereka inini, kotxi ikamari ninoa amanaākiti iaōka ate īkapani.

Paoro Masikani Korītomoni

¹² Ate poxokoniuata, kotxi ate kamari erekarinoka Teoso oerekakitinoka, kākitimoni, hītemoni apaka. Atāonoka anireka akamini kākitimoni. Aimarotari ikara aākixinireē, ininiā apoxokoniuata. Ikara atoko aāuini, kotxi ikinipoko erekari Teoso sikakiti sikataparataua. Kākiti imaroreē !iposotari ikaminiri iua auini ereka inini, kotxi !kiīkiteri kākiti. ¹³ Hātatsopatakasaakiri aiōkatsopatakiti hītemoni, himarotari axinikakiti aākixinireē. Axinikakiti, asākire pakini ātinoka itxaua. ¹⁴ Hīte na iteene imarotapanikaua ate, iuaritika ninirekari hīuikiniua ate, Apiananiri Xesosi uai ikanapiriini ōtisaaki, ate iuikini atokotxikana.

¹⁵ Ikara nimarota, ininiā ninirekamari hītemoni nisini, ipikata hīpoxokoniuatini īkapani. ¹⁶ Masetónia tixinimoni nisini apisapanika, ninirekamari hītemoni nisini. Eereka nikanapiriāksaaki uaimoni, ninirekamari hītemoni iuaīkana nisini, ininiā iuasaaki ninirekamari hīte iokanatinino nota Xotéia tōpamoni. Txamari na nisa. ¹⁷ Atxīiti hīte txano nota: “Pixinikasaakiri uai papokini, na iteene pinirekari uai papokini,” hītxano. Txamari ninirekapitikari napokini hītemoni. Na nota xinikari Teoso sākire mauīākani xinikakiti atoko, kotxi ninoa sākire: “Ari, nisapitika,” txamari ākixinireē itxana: “Na nisapani,” itxana. ¹⁸ Nota sākire hītemoni ninamaā: “Ari nisapitika,” ninakasaaki, nākixinireē apaka txari: “Ari, nisapitika,” nitxa. Teoso atāonoka sākirauatakari imarotari ikara nisākire atāo inini. ¹⁹ Síراسi inakori, Tximótxio inakori, nota pakini sāpiretapekai hīte Teoso ākiri, Xesosi Kristo sākire. Xesosi sākire inamaā auakari, isākire ākixinireē

auakaritxikana isākireta. “Nikamapitikariko,” inakasaaki, ākixinireē inirekapitikari ikaminiri. Ikamari isākire iaōka. ²⁰ Teoso sikaenetakiti kākitimoni kaiāopokori aua. Iua Kristo sikaua ikinipoko Teoso sikaenetakiti, ininiākara atxari: “Ameē.” Peerekari Teoso, kotxi Kristo sikapitikaua Teoso sikaenetakiti. ²¹ Teosokara sikataparaxiniretai hīte, ate apaka, Xesosi Kristo amatakanapakani īkapani. Teosokara mereēua iua nakitiakori aniniua īkapani. ²² Apaka Teosokara sikaua Erekarī Matamatakoti, Teoso nakiti aniniua aimarotini īkapani. Iua Erekarī Matamatakoti aua aākixinireē. Teoso takaōtxikare itxaua iua. Iua Erekarī Matamatakoti merepitipanika Teoso sikakiti atemoni, ininiā aimarotari apikomoni isikapantikaua itanapoko inīkatakiti ate īkapani.

²³ Kona nisari hīte Korīto sitatxiti auakanimoni, kotxi kona ninirekarī hīte matinaniuatini hīte maerekani nisāpiretini xika. Teoso imarotari ikara atāo inini. ²⁴ Hīauīte kona ate txaua. Kona apaniātai: “Ia atoko inakari hāuika. Kona ikara atoko inakari kona hāuikape.” Kona ikara atoko !atxai hīte, kotxi hīte auikapitikari Teoso sākire atāo inakari. Aparīkauata hītekata hīpoxokoniuatini īkapani.

2

¹ Nākixinireē nitxari: “Na nisa iuaīkana ninoamoni nikamamatinanitinina īkapani.” ² Nota xika maerekaxinireninoka hininiā, kiripa kamapoxokinitano nota? Hītenoka aua nota kamapoxokonitakani. Ininiā kona nota nirekarī maerekaxinireni hinini nota xika. ³ Kona ninirekarī hītemoni napokini, maerekaxiniretikano ninini, hīte maerekani xika, ininiākara nota iokanatsopatarī īkora mitxi niōkatsopatakiti hītemoni ereē napokini apisapanika. Kotxi nikamapoxokonitakini hītxaua hīte. Nimarotari ia. Nota nienenīkasaaki, hīte himakinika enenīka apaka. ⁴ Niokanatsopatarī īkora niōkatsopatakiti hītemoni, kotxi himaerekani xika maerekaxiniretinoka nitxa. Nitxiapata. Niokanatsopatarī īkora niōkatsopatakiti hītemoni, iteene nitiretinii himarotini īkapani. Na ninirekarī nikamamatinanitinii.

Maerekanitxi Maxinīkaretiko

⁵ Iua kiki maerekati kamakari maerekaxinireti txīkitakano. Iua apia maerekaxinireti txīkitakai hīte, maerekati ikamini xika. Na iteene ninirekarī nitxitiniri iua. ⁶ Uatxa atokopeka homanatiniri. Iua txitaākapeka imaerekani xika. ⁷ Uatxa himaxinīkaretariko maerekati ikamakiti, ininiā hāpakapariko iua. Himisākiretariko iua. Hīkamapoxokoni-tari iua. Ikara atoko himinakaniāri, iua kona erekaxinireri. Ikara atoko himinakaniāri, atxiīti itakanapari Teoso kimapore. ⁸ Ininiākara nota otākikai hīte nitapararitika. “Atiretapitikai,” hītxariko iua, hītiretiniri imarotini īkapani. ⁹ Ininiā mitxi niokanatsopata hītemoni, kotxi iusaaki nataerekatai hīte. Ninirekarī nimarotiniri, hīkīpitatari nōtākikinii atxiīti? ¹⁰ Himaxinīkaretakasaakiri maerekati āti kamakiti, nota apaka maxinīkaretari. Maerekati āti ereē kamakiti auiniā, nimaxinīkaretari, kotxi nitiretai hīte. Kristo nirekarī nimaxinīkaretiniri maerekati ikamakiti. ¹¹ Axinikasaakiri maerekati āti kamakiti, akamari Satanasi nireēkiti. Ininiākara !akamari Satanasi nireēkiti. Paimatireri iua. Inirekarī akerokiniri. Aimarotari iua nireēkiti, ininiā apia imatirerini matxaua.

Txito Paoro Nitini

¹² Tōatxi sitatxiti napokasaaki Kristo iokanapirena erekari nisāpiretini tikane, kākiti iuaā auakani nirekarī nisākire imarotinina, kotxi Apiananiri sikanireōtana nisākire imarotinina īkapani. ¹³ Iuaritika lerekaxinireno, kotxi ninitapiimari aitari Txito inakori. Kona napokari. Ininiā nitakapiretanapana kākiti iuaā auakani: “Ereēpiko. Masetónia tixinimoni nisako,” nitxana.

Kamariāro Atoko Atxa

¹⁴ Peerekari Teoso kamakiti ate īkapani. Kristo nakiti aniniāua, Teoso txīkitakaua ātipirika akāiatini, ikinimane imarotini īkapani. Teosokata akāiata. Teoso paniātaua Kristo pirena imarotiko ikini tōpati iaripiretini, kamariāro iarikatxiātini atokokana Kristo pirena iaripiretini īkapani. ¹⁵ Kristo sikaua Teosomoni, ininiā Teoso apokaerekataua, kotxi kamariāro arikiko Teoso īkapani atokokana atxa. Kamariāro arikasaaki omari samariāpota ikini tōpati. Iua atokokana asaāpota kākitimoni, kākiti

apokakonimoni, kākiti pīpinanaākanimoni apaka. ¹⁶ Kākiti pīpinanaākanimoni kana-iatxiāri atoko atxa, kotxi asāpiretana Kristo sākire imauikakaniāna, ipinana. Kākiti Teoso apokakinimoni kamariāro eretxiāro atoko atxa, kotxi asāpiretana Kristo sākire auikiniāna, auapininiika itxanako Teosokata. Kiripa posotari ikara atoko inakari parīkatxi ikamini Teoso īkapani? ¹⁷ Ate posotari Teoso īkapani aparīkauatini, kotxi kona apanakini atokoni !atxa ate. Kaiāopokori kākiti sāpiretari Teoso sākire txineiro apakapini īkapani. Ninoamoni Teoso sākire tiitxi vētxitiko atoko itxa. Kona ikara atokoni !akama, kotxi Teoso iokanataua ate kākitimoni. Teoso atamataua, ininiā atāonoka asākirauata, kotxi Kristo nitiriakori atxaua.

3

Iōkatsopari Atoko Hītxa

¹ Atxiīti iuaīkana ate sāpiretari erekari akamakiti asākire hāuikini īkapani? Atxiīti hinirekatari apanakini iōkatsopatiniri erekari ate kamakiti ate sākire hāuikini īkapani? Atxiīti ate nirekatari apanakini iōkatsopatiniri erekari hīte kamakiti hīte sākire ate auikini īkapani? Apanakini kamari ikara atoko. Ate kona kamari ikara atoko. ² Kona ninirekari iōkatsopari ikara atoko inakari, kotxi iua iōkatsopari atoko hītxa hīte. Ate ākixinireē iōkatsopari atoko hītxa. Ikinimane atatsopatarari ikara iōkatsopari, ininiā imarotarina erekari hīte kamakiti. ³ Iōkatsopari Kristo iōkatsopatakiti ate mīkiti atoko hītxa. Kona txītaā iōkatsopataāka. Erekari Matamatakoti Teoso Mapinakati iōkatsopatarari. Kona aātsopaā iōkatsopataāka. Kākiti ākixinireē iōkatsopataāka.

⁴ Ikara atoko atxai hīte, kotxi iteene aimarotari Teoso, Kristo nakitiakori aniniua. ⁵ !Kimaroreua ate. Ateka !aposotari aparīkauatini Teoso īkapani. Teosora sikaposotiiretaua. Isikari imarore atemoni. ⁶ Isikaposotiiretaua Teoso īkapani aparīkauatini īkapani, isākire amaneri kākiti asāpiretini īkapani. Ikara isākire amaneri oerekaua Erekari Matamatakoti aākixinireē auini. Isākire amaneri !oerekaua ipaniātakiti iōkatsopatakori Moisesimoni isikakiti. Ipaniātakiti iōkatsopatakori Moisesimoni isikakiti paniātari kākiti ipinini imaerekani xika. Erekari Matamatakoti aākixinireē auiniā, itxīkitakaua aūapininiika anini.

Teoso Parīka Amaneri

⁷ Teoso paniātakiti tesi pakini iōkataāka kai nopini. Teoso sikasaakiri ikara Moisesimoni, Teoso iotximere iteene aua. Moisesi toō iuasaaki apakapari Teoso iotximere. Iteene iotximere aua Moisesi toō, ininiā kākiti Isaeo auakani kona posotari atamatiniri. Iotximere poiāoāpotakasaaki, !iposotapanikarina itoō atamatinina. Ininiā Teoso iotximere auakasaaki, isākire iōkatakori apoka itiximoni kākiti ipinini īkapani. ⁸ Uatxa iua Erekari Matamatakoti txīkitakari kākiti ātipirika auini īkapani, ininiā uatxa Teoso parīka apiata. Peerekari ikara iparīka. ⁹ Peerekari Teoso parīka ipaniātakiti iōkatakori kākitimoni isikasaaki, txamari iuasaaki oerekari kākiti misiritiko imaerekani xika. Uatxa Teoso parīka apiaerekata, kotxi Kristo kamaerekatarari kākiti. ¹⁰ Uatxa Teoso parīka apiata. Peerekari. Iotximere apiari atoko itxa, ininiā iua parīka kitxakapirīka iotximere napakari atoko itxa. ¹¹ Kitxakapirīka Teoso parīka ipaniātakiti iōkatakori isikasaaki peerekari, txamari ikara Teoso parīka xipope. Īkorasaaki iparīka kākiti ikamaerekatini !ixipoka, ininiā apiaerekata.

¹² Ia Teoso parīka !ixipoka, ininiā ataparaxinireritika asākirauata. ¹³ Moisesi atoko !atxaua, kotxi iua ipatoōtaua mākatxi mataā, itoō iotximere Isaeo auakani matamatakani īkapani. Itoō iotximere poiāota, iuaritika !iposotarina atamatinirina. ¹⁴ Moisesi ipatoōtiniua atokokana ninoa Isaeo auakani oki ipataāka, kotxi !imarotarina atāo Teoso nireēkiti. Uatxapiima okina ipataākapanika atatsopatakasaakirina Teoso sākire iōkatsopatakori, Xesosi apokini apisapanika auakari sākiretxiti. !Imarotarina Teoso nireēkiti. Kristo sākire auikikosaaki, iua ipatoōtiko makatxakaāka, ininiā iuasaaki kākiti imarotari Teoso nireēkiti. ¹⁵ Īkorasaaki apaka Moisesi iōkatsopare atatsopatakasaakina, !imarotarina. Okina ipataākapanika. ¹⁶ Kākiti akiritakasaakiri Apiananiri, ipatoōtiko makatxakaāka. ¹⁷ Erekari Matamatakoti itxaua Apiananiri. Erekari Matamatakoti auiniā

aākixinireē, !aparīkauataika amaerekani makatxakiko īkapani, kotxi Xesosi makatxakapekari amaerekani. ¹⁸ Xesosi sākire auiākani atxaua, ininiā atoō kona ipataāka. Ātakaāri atoko atxaua. Kākiti atamatakasaakia ate, atamatari Apiananiri iotximere. Apiananiri Erekarī Matamatakoti aākixinireē txīkitakaāpotaua ikara atoko aniniua, ininiā apiaāpota aiotximere.

4

Teoso Iokanapirena Erekarī Pokamara Atoko Itxa

¹ Teoso amonīkaua ate, ininiā iua paniātaua ia parīkatxi akamini, iokanapirena erekarī apanakinimoni asāpiretini. Ikara atoko ininiā, isikataparaxiniretaua, ininiā !anirekarī atakanapiniri ikara parīkatxi. ² Kākiti kipatari ikamakiti, maerekati ikamakasaaki, kotxi ipētauata. Ikara atoko inakarī maerekati !akamaika. Atakanapapekarī. !Amisirienetari kākiti. Kona akoketari ate sākire Teoso sākirekata. Teoso kenakotari asākire, ininiā atāonoka asākire, ininiā kākiti ākixinireē imarotari akamakiti atāo inini. ³ Kākiti mimarotakanisaakiri Teoso iokanapirena erekarī asāpiretakiti, kākiti pīpinanaākarī atoko itxa. ⁴ Kākiti pīpinanaākarī !imarotari Teoso iokanapirena, kotxi kākiti teosone, Satanasi inakori, ipatari ninoa oki, ininiā !atamatarina pokamara ninoa iopiniākarī. Teoso iokanapirena erekarī pokamara atoko itxa. Peerekari ikara Teoso iokanapirena. Iua erekarī pirena sāpiretari Kristo Apiananiri ininiua, kotxi Teoso itxaua. ⁵ Ate kona sāpiretari kākiti ateka pirena. Ate sāpiretari Xesosi Kristo Apiananiri ininiua. Ate hīte nitiriakori atxaua, kotxi Xesosi nirekarī hinitiriakori aniniua. ⁶ Kitxakapirīka ipiānoka auakasaaki, Teoso txari: “Piopinikaxitita.” Iuasaakipeka iopinikaxitita. Iua Teosotxikana iopinikari aākixinire. Ikara iopinikare kamaimarorettaua Teoso Apiananiri kaiotximereri ininiua. Kristo aātamatakasaaki, aātamatarī Teoso iotximere.

Xesosi Sākire Auiākani Misiritiko

⁷ Kopiti maikoti atoko atxaua, kotxi atapara !auari. Iuaritika atemoni auari Teoso iokanapirena erekarī katireri. Ininiā aimarotari Teosonoka kaposotiireri, kataparari ininiua. Atepekana !aposotari. Atapara !auari. ⁸ Asinimoni amaxikakini aua, iuaritika !okaua ate. Atxiīti !aimarotari akamakiti tīkane, iuaritika kona aiotokakari Kristo sākire aāuikini. ⁹ Amisiritiko aua, iuaritika Teoso kona takanapaua ate. Atxiīti akarotaāka, iuaritika kona aōkaāka. ¹⁰ Ikiniōtika aīto okiko monōkoni aua Xesosi sākire aāuikini xika. Xesosi atatsiirauata. Ipina. Iua atokotxikana ate atatsiirauata. Atxiīti aīto ipina iua sākire aāuikini xika. Xesosi auapika, kotxi ipīpe, eereka ōkitikaua, ininiā iua atokokana aīto auapika. ¹¹ Auapanika anakasaaki, aōkiko monōkoni aua Xesosi sākire aāuikini xika. Aīto ipinapitikako, iuaritika aāuapanika, kotxi Xesosi auapanika. ¹² Xesosi iokanapirena asāpiretini xika, apanakini nirekarī okiniua ate. Xesosi iokanapirena asāpiretakasaakii, hīte auikari, ininiā hīte auapika himaxipokakani.

¹³ Teoso sākire iōkatsopatakori txari:

Nota auikari Teoso sākire, ininiā nisāpiretari kākiti.

Iua atokotxikana ate auikari Teoso sākire, ininiā ate sāpiretari kākiti. ¹⁴ Teoso ōkitikari Apiananiri Xesosi, iuaīkana auini īkapani, ininiā aimarotari Teoso ōkitikiniua ate apaka, iuaīkana aāuini īkapani. Eereka Teoso anikauako ate hītekata Xesosi aaōkitini Teoso apisatoō. ¹⁵ Amīteenekari ikinipoko amisiritiko Xesosi sākire hītemoni asāpiretini īkapani. Kākiti apikomoni, apikomoni, apikomoni, txaāpota apakapari ikinipoko erekarī Teoso sikakiti, ininiā ninoa kākiti kaiāopokori txari Teoso: “Erekapitikari pisikakiti notamoni.” Ikara atoko ininiā, kākitypokoni txari: “Peerekari Teoso,” itxako.

Maerekaxinireni !Atxaua

¹⁶ Ininiākara maerekaxinireni !atxaua. Aīto xipokaāpota, iuaritika aākixinire ikiniōtika apiataparaāpota. ¹⁷ Īkorasaaki amaxikiko auapitika Xesosi sākire aāuikini xika. Kona okanani aua amaxikiko. Eereka Teosokata ātipirika aāuapika, kotxi aāuikari isākire. Peerekari iuasaakiko. !Axinikaikari mitxi amaxikiko, kotxi iuasaakiko peerekari.

¹⁸ Kona amaākatari aātamatakiti. Amatamatakiniti axinika. Atamatakori xipokako. Matamatakoti kona xipoka.

5

Aāuapoko Teoso Tixineē

¹ Īkorapokoriti aāuakasaaki, aīto aāuapoko itxaua aākixinire ĩkapani. Āti ōti aīto xipoka. Ixipokasaaki, Teoso sikari ātiāo aāuapoko. Iua aīto isikaua, itixine aāpokasaaki. Iua aīto kona xipokaika. Iua aāuapoko kona uakōtxiā kamakorini. ² Īkorsaaki aātatsi-irauatakasaaki, atxari: “Ninirekari ātiāo niīto, niīto Teoso sikakiti itixine napokasaaki.”

³ Anirekari ātiāo aīto, ininiā maītotika !atxaua. ⁴ Īkorsaaki ia aīto auapanika inakasaaki, aātatsiitari katiiri. Kona kataparari ia aīto. Anirekapitikamari aīto. Anirekari ātiāo aīto, ininiā aīto maxipoākati makatxakari aīto xipoākari. ⁵ Teoso kamari aīto maxipoākani ĩkapani. Isikapaniakauako aīto ikara atoko inakari. Aimarotari ikara atāo inini, kotxi isikapekari Erekarī Matamatakoti atemoni. Ipixini Teoso sikaenetakiti isikapekua, ininiā apikomoni isikaenetakiti isikapitikauako.

⁶ Ininiā kataparaxinirepitikaua ate. Aimarotari aāuapoko ia aīto ininiāua, kona aāpokapanika Apiananiri tixinemoni. ⁷ Xesosi sākire auikiko oerekaua atāo aāuini tīkane. Aōkinoka kona oerekaua atāo aāuini tīkane. ⁸ Kataparaxinirepitikaua ate. Kona ate pīkari apinini. Apiaerekata apinini, kotxi iuasaakiko Apiananirikata aāua. ⁹ Anirekari amiinitiniri Apiananiri, ia aīto āki aāuakasaaki, ia aīto xipokasaaki apaka. ¹⁰ Āti ōti ate amakinika sariko Kristomoni. Iuasaaki Kristo sāpiretaua aparīka ĩki. Iua imarotari ikinipoko akamakiti ia aīto āki aāuakasaaki. Atxiīti akamari erekari. Atxiīti akamari maerekati. Akamakiti iaōka isikaua aparīka ĩki.

Kākiti Mikanapiriīko Teosomoni

¹¹ Aimarotari Apiananiri katapara inini, kotxi imisiritari kākiti imaerekani xika. Ininiā asāpiretari kākiti auikiniri iua sākire. Aparīkauata, iua sākire kākiti auikini ĩkapani. Teoso iteene imarotaua. Imarotari axinikakiti aākixinireē. Ninirekari hīte apaka iteene imarotiniua ate hākixinireē. ¹² Kona ate nirekari iuaīkana asāpiretinii hīte ereka anini. Anirekari asāpiretinii, apakatapitika hīuikinīua ate, kotxi atāonoka akama. Ikara atoko inakari himarotiniā, himarotari kākiti hāpakapapiretini, ninoa misākirepiretakasaakiua ate. Ninoa kākiti ate misākirepiretakani iuikari atamatakoriinoka. Kona imaākatari kākiti ākixinire ereka inini. ¹³ Atxiīti kākitimoni kona kiīkiteua ate. Ikara atoko atxa Teoso ĩkapani. Atxiīti paīkiteua ate. Ikara atoko atxa hīte ĩkapani. ¹⁴ Kristo iteene tiretaua, ininiākara anirekari iua nireēkiti akamini, kotxi aimarotari iua ipina ikinimane ĩkapani, kotxi ikinimane ipīkani atoko itxauana. ¹⁵ Kristo ipina ikinimane kākiti ĩkapani, kākiti mapinakani ĩkapani, kākiti ātipirika auini ĩkapani. Ininiā iua kākiti kona kamaikariko iuaka nireēkiti ikiniōtika. Ikamariko Kristo nireēkitinoka, kotxi Kristo ipina iua ĩkapani. Iuaīkana ōkitikapekua.

¹⁶ Ininiā uatxa !axinikaikari kākiti ĩkorapokoriti auakani xinikakiti atokokana. Mītxi axinikari Kristo ninoa xinikiniri atoko. Uatxa !axinikaikari Kristo ninoa xinikiniri atoko. ¹⁷ Kristo sākire auīākari ākixinire amaneri itxaua. Mītxi maerekati ikamakiti kona ikamaika. Amanerinoka ikama. ¹⁸ Ikara atoko inakari Teosora kamināua. Mītxi amokaiakari atoko itxa Teoso, iuaritika imikanapiriāua ate iuamoni, kotxi Kristo ipina ate ĩkapani. Ipaniātaua ate asāpiretiniri ikinimane kākiti, Teoso nirekari imikanapiriinina ninoa iuamoni. ¹⁹ Teoso mikanapiriāri kākiti ikini itixiti auakani iuamoni, kotxi Kristo ipina kākiti ĩkapani. Teoso mikanapiriākasaakiri kākiti iuamoni, kona iaōtari maerekati ikamakitina. Kona ixinikaikari imaerekanina, ininiā kona imisiritana imaerekani xika. Ia pirena, kākiti imikanapiriini pirena, ipaniātaua asāpiretiniri ikinimane kākiti.

²⁰ Asāpiretari Kristo sākire kākitimoni. Asākirauata iua ĩkapani, ininiā Teoso iteene ōtākikai hīte ate sākireē. Kristo nireēkiti iaōka ate ōtākikai hīte. Hīkanapiriāko Teosomoni. ²¹ Kristo kona kamari maerekati, iuaritika Teoso misiritari iua maerekati kamakari imisiritini atokokana. Ininiā Xesosi sākire aāuikiniā, Teoso apakapaua ate, maerekati makamakani apakapini atoko, kotxi iua kamaerekataua ate.

6

¹ Ate parīkauata Teosokata, ininiā ate iteene ōtākikai hīte. Teoso sikari ikinipoko erekari hītemoni, ininiā lapakata mamaākatakinitika hininiri Teoso. ² Kotxi Teoso sākire iōkatsopatakori txari:

Erekari kākitimoni nisika. Niketo apokasaaki, iusaaki nikenakotari hākiritinino nota.

Kākiti maerekani nimaktxakini ōtisaaki, nimoianatai hīte. Nisāpiretai. Uatxa apokapeka Teoso keto erekari kākitimoni isikini. Uatxa Teoso maktxakari kākiti maerekani.

Teoso Nitiriakori Atāo Inakani

³ Kona xatiki akerokari akamakiti kākitimoni, ininiā kākiti kona txari: “Ninoa kerokari ikamakitina, atāo minakati isāpiretiniua,” !itxana. ⁴ Teoso nitiriakori atāo atxaua. Aāuini ikiniōtika oerekari kākiti Teoso nitiriakori atāo inakani aniniua, kotxi amīteenekari amaxikiko. Amīteenekari amisiritiko. Amīteenekari katsiiri. ⁵ Teoso nitiriakori atāo atxaua, kotxi Teoso parīka akamini xika anoropataākapeka. Kateia āki atakaākapeka. Ahoaātaā kākiti apotiitakaniua naiatapekaua. Teoso parīka akamini, pasāpaniri aparīka. Itokata !aimaka. Itokata anatxita. ⁶ Kākiti imarotari ate Teoso nitiriakori aniniua, kotxi kona akamari maerekati. Aimarotari Teoso sākire. Kona katimari aomanākarauatini. Amoianatari kākiti. Erekari Matamatakoti oerekaua atāo akamini. Atāo atiretari kākiti. Ikara atoko aniniā, kākiti imarotari Teoso nitiriakori aniniua. ⁷ Ate Teoso nitiriakori atāo atxaua, kotxi atāo inakarinnoka asāpireta. Teosora sikaposotiiretaua. Erekari akamakiti aīkeeko akikomoni, asanaremoni pakini atoko itxa, kotxi erekari akamakasaaki, maerekati iokanataāka. ⁸ Teoso nitiriakori atxaua, ininiā apanakini kākiti paxitaua. Txamari apanakini kākiti kona paxitaua. Apanakini sākire: “Peerekana ninoa.” Txamari apanakini sākire: “!Erekana ninoa.” Apanakini sākire: “Kamisirienererini ninoa,” iuaritika atāo inakarinnoka asākire. ⁹ Minakaniua ate, iuaritika ikinimane imarotaua. Kaiōkatani apinaarita, iuaritika aāuapanika. Amisiritaāka, iuaritika kākiti kona okapanikaua. ¹⁰ Amatinaniuatakasaaiki, Apiananiri kamapoxokonitaua ate. Kona katxineiroteua ate, iuaritika atxīkitakari kaiōpokori kākiti ikini sereti erekari Teoso sikakiti apakapinina. Minakani atxaua, iuaritika ikinipoko erekari Apiananiri sikakiti aua atemoni.

¹¹ Hīte Korīto sitatxiti auakani asāpiretai ikinipoko axinikakiti. Nikipatakiti !auari. Iteene atiretai hīte. ¹² Ate nirekari atiretini hīte, txamari kona hīte nirekari hītiretiniua ate. ¹³ Uatxa nimisākiretai hīte namariteakori nimisākiretini atokotxikana. Hītiretauako ate, ate turetini atokotxikana. Hōerekaua hītiretiniua ate.

Xesosi Sākire Mauiākani Moianariakori !Hītixapeua

¹⁴ Xesosi sākire mauiākani moianariakori !hītixapeua, kotxi !apakata erekari kaikotini maerekatikata. !Apakata pokamara iānōkarikata auini. ¹⁵ Kona Kristo moianatari Satanasi. Xesosi sākire auiākari nireēkiti āti. Xesosi sākire mauiākati nireēkiti ātiāo. Ininiā !apakata Xesosi sākire auiākari auini Xesosi sākire mauiākatikata. ¹⁶ Teoso misākiretiko aikoti āki !auari kākiti kamakiti teoso. Aīto Teoso misākiretiko aikoti atoko itxa. Teoso ātipirika auakari itxaua. lua txari:

Nota auako ninakitiakorikata. Nitīpokota ninoa sauaki. Ninoa Teosone nitxauako. Nota nakitiakori itxauanako ninoa.

¹⁷ Ininiākara hītakanapanako nisākire mauiākani. Kona ninoakata !hāuape. !Hīkaikotape maerekati takote, ininiā napakapai hīte.

¹⁸ Ininiā hīri nitxauako. Namariteakori, namariteakoro hītixauako hīte, itxa Apiananiri, Kaposotiireri sākire.

7

¹ Nitiretakini ikara atoko itxa Teoso kamaenetakiti ate ikapani. Ininiā matakapanari ikinipoko maerekati aīto txikotakari, aākixinire txikotakari pakini. Teoso nakitiakorinnoka matxaua. Erekarinoka makama Teoso apaxitini.

Paoro Poxokoni

² Hītiretauako ate. Kona amisiritari kākiti. Kona aōerekari kākiti maerekati ikamini. Kona amisirienetari kākiti. ³ Kona ikara atokoni nitxa hīte nitxitini ikapani. Kona

nitxitai, kotxi nisāpiretapekai iteene atiretinii hīte. Ininiā ipīkitxi kona oiarikaua. Auakari kona oiarikaua. Ate oiarikakari !auari. ⁴ Nimarotari hīte kaminiri nota ōtākikakiti iaōka. Nota iuikai hīte. Hīte kamataraxiniretano nota. Amaxikaākapika, iuaritika iteene nipoxokoniua.

⁵ Masetónia tixini ate apokasaaki, kona aiotoka. Kona atomata, kotxi asinimoni aua kākiti ate misiritakani. Kākiti naiataua. Aāxixinireē apīkarauata. ⁶ Teoso, mīkapiritari kākiti matinaniuatakani, ininiā imīkapiritaua ate Txito apokasaaki. ⁷ Iua apokini kamapoxokonitaua. Apaka isākire kamapoxokonitaua, kotxi isāpiretaua hīte kamapoxokonitini iua. Isāpiretaua ate hīte kinirāo aōkitaka ininino nota. Isāpiretaua, hīte maerekaxinireni, kotxi hītxīkitakano maerekaxinire ninini. Isāpiretaua hīte ātipirika sāpiretiniri apanakini nota kamakiti ereka inini. Txito sāpirena nikenakotakasaaki, apia nipoxokoniua.

⁸ Mitxi niokanatsopatakiti hītemoni maerekaxinireti txīkitakai hīte, iuaritika erekari niokanatiniri iua niōkatsopatakiti hītemoni. Merepanika nota matinaniuata, kotxi nimarotari niokanatsopatakiti hātatsopatini xika hīte matinaniuata. Mapaōtinoka maerekaxinireni hītxaua. ⁹ Uatxa poxokopekano nota. Na nipoxokoniua hīte maerekaxinireni nitxīkitakini īkapani. Nipoxokoniua, kotxi maerekaxinireni hinini xika, hītakanapari maerekati hīkamakiti. Iuasaaki hīkanapiriā Teosomoni. Teoso apokaerekatari ikara atoko inakari himaerekaxinireni, ininiā kona ate misiritai. ¹⁰ Erekari Teoso txīkitakiniri kākiti matinaniuatini, kotxi iuasaaki kākiti takanapari maerekati ikamakiti. Ikanapiriā Teosomoni, ininiā Teoso makatxakari iua maerekani. Ikara atoko inakari matinaniitxi erekari. Txamari kākiti Teoso manirekakani matinani ātiāo, ininiā ninoa ipinapikako. ¹¹ Hīte matinaniuata himaerekani xika, ininiā Teoso kamaerekatai. Ininiākara uatxa erekarinoka hinireka hīkamini. Uatxa iteene hinirekari hīkaminiri Teoso nireēkiti. Hinirekari ikinimane imarotiniri hīkamakiti ereka inini. Uatxa homanatarari maerekati mitxi hīkamakiti. Maerekaxinireti hītxaua himaerekani xika. Uatxa iteene hītiraōki aua. Hinirekari himarotiniri nota pirena, nota ereka ninini himarotini īkapani. Uatxa hinirekari maerekati kamakari misiritiko. Ininiākara kona hīkerokari, iua kiki maerekati ikamakasaaki.

¹² Iua iōkatsopari mitxi niokanatakiti hītemoni, niōkatsopata hīte īkapanikara. Kona iua maerekati kamakari īkapanini niokanatsopata. Kona iua maerekati kamakari misiritakiti īkapanini niokanatsopata. Niokanatarari iua iōkatsopari hītemoni atiraōki himarotini īkapani. Teoso imarotari atiretinii.

¹³ Ininiā ate kamataraxiniretaāka, kotxi hīte kamataraxiniretaāka apaka. Apaka apoxokoniua, kotxi Txito poxokoniua. Iua poxokoniua, kotxi hīte himakinika kamapoxokonitari iua. ¹⁴ Txito hītemoni isini apisapanika, nota sāpiretari iua niuikinii hīte, kotxi peerekai hīte. Atāo nisākire, kotxi kona nipētauata hīkamakiti xika, kotxi hīkamakiti atāo. Atāonoka asākire hītemoni. Atāonoka asākire Txitomoni apaka ate iuikinii hīte. ¹⁵ Apiaāpota Txito tiretinii, kotxi hīkamari iua sākire iaōka. Imarotari hāpakapiniri iua hīpaxitiniritika. ¹⁶ Nipoxokoniua, kotxi nimarotapitikari hīkaminiri nōtākikinii iaōka.

8

Txineiro Apanakini Sikakito

¹ Nitariakori, anirekari asāpiretinii Teoso misākiretikoātaā apotiitakaniua Masetónia tixini auakani. Peerekari Teoso kamakiti ninoa īkapani, kotxi ikinipoko erekari isika ninoamoni. ² Ninoa liteene kauarena. Pasāpaniri ninoa misiritiko, iuaritika ienenīkana ninoa. Na katxineiroteni, iuaritika ipotxitarina itiina isikinina kākiti kaamonirini-moni. ³ Nota imarotari ninoa minakati auiniāna, isikarauatana apanakinimoni. Iteene isikarauatana, ininiā kaiāokatani inatxitana. ⁴ Nota kona amanaāri ninoa txineirote kākiti Teoso nakitiakori Xerosareē sitatxiti auakani īkapani, iuaritika ninoaka txano: “Ate nirekari txineiro asikini ninoamoni. Pauiritaua asikiniro ninoamoni. Asikinīaro apoxokoniua, kotxi ikara atoko akamini amoianatarari kākiti Teoso nakitiakori,” itxana. ⁵ Kona ikarananini ninoa nireka. Iteene ninoa kamapoxokonitaua ate, kotxi mitxi

ninoa txaua: “Ate nirekari Apiananiri nireēkiti akamini,” itxana. “Iua oerekiniāri inireēkiti hītemoni, ate nirekari hīte paniātakiti apaka akamini,” itxana Masetónia tixini auakani. ⁶ Txito amanaāpekai hīte txineiro hīsikini Xerosareē sitatxiti auakani ĩkapani, ininiā apaniātari iua sini hītemoni hīsikakiti apakapini ĩkapani, hītiraōki ninoa Teoso nakitiakori hōerekini ĩkapani. ⁷ Hīte iteene auikari Xesosi sākire. Apanakini poiāoka. Hīte imarotari Xesosi sākire hīsāpiretini kākitimoni. Apanakini na iteene imarotari. Hīte iteene imarotari Xesosi sākire. Apanakini poiāonoka imarota. Hīte iteene nirekari Teoso parīka hīkamini. Apanakini poiāonoka nirekari. Hīte iteene tiretaua ate. Apanakini poiāoka tiretaua. Hīte apiaerekata, ininiākara ninirekari hīsikakiti apaka apiari inini, kotxi ikara atoko hīkaminiā, hōerekari Xerosareē sitatxiti auakani hītiretinina.

⁸ Kona nipaniātai nitapararitika hīsikiniro hītxineirote ninoamoni. Nataerekatari hītirāōki. Atāo atxiīti hītiretari apanakini? Masetónia tixini auakani atāo tiretari apanakini. Hīte tiraōki ninoa tiraōki atoko atxiīti? ⁹ Himarotari Apiananiri Xesosi Kristo sikari ikinipoko erekari hītemoni. Itanapoko auiniri Xesosi Teoso tixine auakasaaki. Iuaritika itakanapari ikinipoko. Minakati mauakinitinoka itxapeka hīte ĩkapani. Ininiākara ikinipoko itakanapini xika, ikinipoko aua hītemoni.

¹⁰ Uatxa nota ōtākikai hīte, erekari hīkaminiri hīsākire iaōka, kotxi kita anokanani hīte merepanika xinikari: “Natokopa itxa akaminiri Xerosareē sitatxiti auakani ĩkapani?” hītxa. Hīte merepanika nirekari txineiro hīsikinina ninoa. ¹¹ Ininiā nōtākikai uatxa. Hīkamariko mitxi hīsākire iaōka. Hīpoxokoniritika hinirekariko hīokanatiniro txineiro ninoamoni, ininiā erekari hīpoxokoniritika hīkaminiri hīsākire iaōka. Ipixini txineiro hītemoni auakaro hīsikako ninoamoni. ¹² Hīpoxokoniritika hinirekiniāri hīsikarautini Teosomoni, iua apakapapitikari hīsikakiti. Poiāoka auiniāi, ininiā erekapitikari poiāonoka hīsikini Teosomoni. Iua apakapapitikari. Iua imarotari !apakata apikomoni hīsikiniri.

¹³ Kona ate nirekari hīte kaamoni hinini, ikinipoko ninoamoni auini ĩkapani. Erekari ninoa auakiti hīte auakitixikana. ¹⁴ Uatxa hīte txineirote auapitika ninoa hīsikini ĩkapani. Āti ōti hīte txineirote mauakanisaaki, atxiīti ninoa txineirote aua, ininiā ninoa sikai hīte. Ininiā hīte moianatinina atokotxikana, ninoa moianatai hīte. Ikara atoko inakari atāo. ¹⁵ Teoso sākire iōkatsopatakori txari:

Kiki kaiāopokori apakapakari itetakori !uari. Kiki poiāoka apakapakari !kaamoniri.

Txito Iokanatiko Korītomoni

¹⁶ “Peerekai,” atxari Teoso, kotxi iua sikanireōtari Txito itiretinii hīte, nota tiritinii atokotxikana. ¹⁷ Txito nirekapitikari ate paniātakiti ikamini, hītemoni isini. Apaniātiniri apisapanika, inirekari hītemoni isini, ininiā ipoxokoniritika isa hītemoni. ¹⁸ Aiokanatarī āti aītari iuakata. Ikinimane Teoso misākiretikoātaā apotiitakanua iteene apokaerekatari iua, kotxi isāpiretari Teoso iokanapirena erekari ikinimanemoni. ¹⁹ Ninoa mereēri iua aītari atekata isini Xerosareēmoni, oa txineiro aanikasaaki. Oa txineiro asikakito oerekana Xerosareē auakani Apiananiri ereka inini. Oerekana apoxokoniritika amoianatinina.

²⁰ Oa txineiro kaiāopokoro aua, ininiā iua aītari siniā atekata, iua imarotari atāo asikiniro oa txineiro Xerosareē auakanimoni. ²¹ Anirekari atāo akamini oa txineiro asikasaaki ninoamoni. Anirekari Apiananiri imarotiniri atāo akamini. Anirekari kākiti apaka imarotiniri atāo akamini.

²² Iuaīkana aiokanatarī ātipekana aītari hītemoni. Aātaerekatapekari iua. Ipoxoniritika imoianatarī kākiti. Apiapoxokonita iua, kotxi imarotari hīte kaminiri mitxi hīsākire iaōka. ²³ Txitopekana, nota moianari itxaua. Iua miparīkatano nota, hīte amoianatini ĩkapani. Xesosi sākire auiākani mereēna aītariakori Txitokata sikani hītemoni. Kākiti imarotakasaakina ninoa, “Peerekari Kristo,” itxana kākiti. ²⁴ Ininiākara hōerekanako ninoa kikiakori atāo hītiretinina, ininiā ikinimane Xesosi sākire auiākani imarotari atāo hītiraōkiuatini. Iuaaakiko ninoa imarotari ate sākire atāo inini ate iuikinii hīte.

9

¹ Nisāpiretai hīte txineiro asikakito tīkane Teoso nakitiakorimoni, Xerosareē auakanimoni. Nimasāpiretakaniāi hīte, iuaritika hīte nirekari hīttxineirote hīsikini ninoamoni. Nimarotari ikara. ² Nimarotari iteene hinirekari himoianatinina ninoa. Nitxapekana Masetónia tixini auakani: “Nota iuikana aītariakori Korīto sitatxiti auakani, Akaia tixini auakani, kotxi kita anokanani ninoa iposope txineiro iokanatinina Xerosareēmoni,” nitxana. Hīte poxokoni txineiro hōkanatini, sikanireōtana Masetónia tixini auakani apaka iokanatiniro txineiro. ³ Uatxa niokanatanana ninoa aītariakori ipi āti pakini hītemoni. Hīte iposope hininiā hīttxineirote hōkanatini, erekapitikari, kotxi ikara nisākire iaōka. Ininiā atāo ate iuikinii hīte. ⁴ Masetónia tixini auakani siniā notakata, hīttxineirote miposonitipanika, ininiā ate pētauata, kotxi ate auikari hīsākire. Hītepekana apia pētauata hīsākire iaōka himakamakani xika. ⁵ Ininiākara ninirekari ninoa aītariakori sini hītemoni nota ereē napokini apisapanika. Ninoa moianatai txineiro kaiāopokoro hīsikaenetakito hāpotiitini ĩkapani. Ininiā napokasaaki ereē, iposope hīsikakito nanikini. Ininiā iusaaki aimarotariko kinirāo sikaenetaka hinakito txineiro. Iusaaki aimarotariko hīpoxokoniritika hīsikiniro hīttxineirote.

Takari Itori Auini

⁶ Ia nisākire hīxinika. Poiāoka komiri pitakiniā pitakarauatakasaaki, poiāonoka iri pimaporoka. Kaiāopokori pitakiniā, kaiāopokori pimaporoka. ⁷ Ininiā pākixinireē pixinikari atāo pisikakiti ātimoni. Kona erekari pimanirekasikatakiniti pisikini. Āti itapararitika paniātiniāi pisikarauatini, !apakata. Teoso apokaerekatari kākiti ipoxokoniritika isikarauatini ātimoni. ⁸ Teoso posotari ikinipoko erekari isikinii hīte, ininiā ikiniōtika ikini sereti hiamonitakiti auiniā, hāpakapari ikinika hinireēkiti. Ininiā ikinipoko erekari hīkama. ⁹ Teoso sākire iōkatsopatakori txari: Teoso sikari itori erekari matxineirotenimoni. Teoso kamakiti atāo inakari !ixipoka. Auapikako.

¹⁰ Teosora sikari takariki katakarerimoni itakarauatini ĩkapani, ininiā eereka iposope inakasaaki, auari kienatxi inikakiti ĩkapani. Iua atokokana Teoso sikari kaiāopokori takariki hītemoni. Iua anekakari hītakare, ininiā eereka iposope inakasaaki, kaiāopokori auari, ininiā kaiāopokori hīkamakiti atāo inakari apanakinimoni. ¹¹ Teoso sikai ikini sereti erekari, ininiā ikinipoko auape hītemoni. Ininiākara kākiti mauarenimoni hīsikariko kaiāopokori. Ate anikasaakiro hīsikakito apanakinimoni, ninoa txariko: “Peerekari Teoso, kotxi ninoa sikaua ate aamonitakiti,” itxanako.

¹² Ikara atoko inakari hīkaminiā, hīsikari Teoso nakitiakori amonitakiti ninoamoni. Apaka hīsikasaakiri hīsikakiti ninoamoni, ninoa kaiāopokori txari: “Peerekari Teoso,” itxanako. ¹³ Ninoa poxokoniuatako, kotxi hīte sikari kaiāopokori ninoamoni, apanakinimoni apaka. Ninoa txariko: “Peerekari Teoso,” kotxi imarotarina erekari hīte kamakiti. Imarotarina hīte kaminiri Kristo paniātakiti iaōka. Imarotarina hīte atāo auikiniri Kristo iokanapirena erekari. ¹⁴ Ininiā ninoa misākiretari Teoso hīte ĩkapani, kotxi iteene ninoa tiretai hīte, kotxi Teoso sikari ikinipoko erekari hītemoni. ¹⁵ Matxari Teoso: “Peerekai pite, kotxi pite sikaua pamarite. Āti pisikakiti iua atoko inakari !auari.”

10

Paoro Apakapapiretari Apoītiko

¹ Kataparaxinireri Kristo, iuaritika ianaka oītākikari kākiti, ininiā nota Paoro ianaka nōtākikai. Txamari apanakini hīte sauaki auakani txari: “Paoro ĩtakoxiti auakasaaki, itapararitika itxitaua ate, atemoni iōkatsopatakasaaki. Txamari iua atekata auakasaaki, ipīkarauata amaerekani isāpiretiniua,” itxana. Ikara apanakini sākire na atāo, kotxi ĩtakoxiti nauanāta, iuaritika amaātiki nōtākikai hīte. ² Kona ninirekari noerekini hīte apanakini nitxitini ereē napokasaaki. Niposotapitikari nitapararitika nitxitiniri apanakini ereē napokasaaki, kotxi ninoa txari: “Paoro kamakiti Teoso sākire mauīākani kamakiti atokotxikana,” itxana. Txamari na atāo ninoa sākire. ³ Aīto tapara poiāoka,

kotxi kākiti atxaua, ininiā aīto taparaā !apakata anaiatiniri maerekati. Teosora sikataparataua aākixinireē, maerekati anaiatini īkapani. ⁴ Ate ikeeko kona Xesosi sākire mauiākani ikeeko atokoni. Teoso ikeeko isika atemoni. Kaposotiireri Teoso ikeeko, ininiā aposotari Satanasi kamakiti axipokini aiko kaikori axipokini atokokana. ⁵ Kākiti iuikaua. !Inirekarina auikininirina Teoso imarore. “Paimatireua ate,” itxanātana. Teoso sikaimaroretua ate, ninoa sākire paxirari inini aōerekini īkapani. Ikinipoko axinikakiti anireka Kristo nireēkiti iaōka axinikini, ininiā axinikakiti ātiāo auiniā, atxīkitakari iua axinikakiti imamakini Kristo nireēkiti iaōka inini īkapani. ⁶ Hīte iteene kamakasaakiri Kristo nireēkiti iaōka, ate misiritariko kākiti ereē Kristo nireēkiti imakamakanisaaki.

⁷ Hīte xinikari hātamatakitinoka. Kona hīxinikari kākiti ākixinireē auakari. Kākiti ereē uākatiniāri Kristo nakiti ininiuana, erekari imarotininirina ate apaka Kristo nakitiakori aniniuana, ninoa Kristo nakiti ininiuana atokotxikana. ⁸ Atxiīti iteene niuikari Apiananiri sikaposotiiretiniua ate, iuaritika kona nipētatauata niuikiniri ikara, kotxi Apiananiri sikaposotiiretatau ate, hīte akamataparaxiniretini īkapani. Kona ate nirekari hīte ākixinire tapara poiāoāpotini. ⁹ Kona ninirekari hīpīkarauatini, iōkatsopari niokanatsopatakiti hātatsopatini xika. ¹⁰ Apanakini txari: “Paoro txitaua itapararitika iokanatsopatakitiā, txamari iua atekata auakasaaki, isākire ātiāo. Iuasaaki kona kataparaxinireri iua. Iuasaaki ipīkarauata ate itxitini,” itxana apanakini. Na atāo ninoa sākire. ¹¹ Itakoxiti ate auakasaaki, asākire aiokanatsopatakiti iuatxikana asākireta, ereē hītekata aūakasaaki.

¹² Ninoa ate misākirepiretakani iteene iuikaua. Atauako ninoa apiaerekata? Atauako !erekaua ate? !Kiīkitena ninoa. Ninoa uākatari ninoa kamakitinoka erekari inini, ininiā ninoa iaōtari apanakini kamakiti. Apanakini kamakiti ninoa kamakiti atoko ininiā, ninoa uākatari apanakini kamakiti apaka erekatxikana. Txamari na atāo. ¹³ Atepekana, kona ate iuikari ateka kamakiti. Ate iuikari parīkatxi Teoso sikakiti atemoni akamini īkapani. Iuanoka ate iuika. Iua paniātaua aparīkauatini hīte īkapani. Iua aparīka ate iuikapitika. ¹⁴ Teoso paniātakitinoka akama. Ia aparīka, ininiā ate sari hītemoni Kristo iokanapirena erekari asāpiretini īkapani. Ininiā apakatapitika ate iuikiniri ikara aparīka. ¹⁵ Apanakini parīka Teoso īkapani ate kona txari: “Iua parīkatxi ate kamakiti,” kona atxa. Ate nirekari hīte auikaāpotiniri Kristo sākire, Kristo sākire iteene hāuikini īkapani, ininiā ate nirekari aparīkauatini Teoso īkapani hīte auiniātaā, Kristo sākire apanakini auikini īkapani. ¹⁶ Ate nirekari Kristo iokanapirena erekari asāpiretiniri kākiti, hīte tixine apiko auakani Xesosi sākire masāpiretakotipanika ininiātaā. Ininiā kona aparīkauata apanakini parīkauatiniātaā. Ininiā apanakini parīka: “Ate parīkakara iua,” kona atxari.

¹⁷ Teoso sākire iōkatsopatakori txari:

Pinirekatari piuikarauatini? Pinirekiniāri, ininiā piuikariko Apiananiri kamakitinoka.

¹⁸ Teoso kona apokaerekatari kākiti iuaka, “Erekapitikano,” inakari. Teoso sāpiretiniāri: “Erekapitikari iua kākiti,” ininiā Teoso apokaerekatari iua.

11

Teoso Maiokanatakini

¹ Atxiīti miīkiteti sākirauatini atoko nimisākiretai hīte, iuaritika hāuiritano nota. ² Teoso nirekinii hīte iua nakitiakorinani hininiua, iua atokotxikana nota nirekai hīte Teoso nakitiakorinani hininiua. Nisikaenetai Kristomoni hītaniri atoko inini īkapani. Iuamoninani nisikaenetai. Ninirekari iuamoni nisikinii, ātokoro kikikata masirīkakato atoko inakaro. ³ Kitxakapirīka Satanasi auāitotari imini. Iua imini misirienetarō Eva, kotxi paimatireri Satanasi sākire. Nipīkari Satanasi misirienetinii hīte apaka, ininiā eereka hīxinikakiti na atāoni. Nota pīkari Xesosi hītakanapini. Mītxi iteene hītoretari iua. Iuananira hītireta. ⁴ Kotxi hīte apakapari hīpoxokoniritika ikinimane ereē apokakani, “Ate Xesosi sākire sāpiretakaniua” inakani, txamari Xesosi pirena ninoa sāpiretakiti na atāoni. Kona ate sāpiretari ikara atoko inakari, iuaritika hāuikari ninoa sākire. Hāuikasaakiri ninoa sākire, atxiīti hāpakapari matamatakoti, txamari kona hāpakapari Erekari Matamatakoti ate sāpiretakiti. Ate sāpiretai hīte atāo Kristo iokanapirena erekari, txamari hīte auikari ātiāo.

⁵ Hītemoni, Teoso iokanatanana ninoa kākitimoni. Hītemoni, ninoa Teoso iokanatakini apiarini. Nota poião atxiīti? Ninoa apiata atxiīti? Konapitini. ⁶ Atxiīti kona nota iteene imarotari nisākirauatini, iuaritika nimarotapitikari Teoso sākire. Himarotapekari ikara atoko inakari, kotxi asāpiretapekai.

⁷ Teoso iokanapirena erekari nisāpiretakasaakii hīte, maxikatīka nisāpiretai. Kona ninirekari hīkitxitinino, ininiā nota poiōtakaua, hīte atāo inakari himarotini ikapani. Ikara atoko nikerokatarari atxiīti? ⁸ Hītekata nīparīkauatakasaaki, kākiti ātiātaā Xesosi sākire auīākani iokanataro txineiro notamoni, txamari kona nota moianatanana ninoa iusaaki. Hītekara nimoianata iusaaki. ⁹ Hītekata nauakasaaki, nota nirekamaro txineiro. Txamari kona nota amanaāi hītxineirote. Aītariakori Masetónia tixinikini mininano itanapoko niamonitakiti. Iua atokotxikana kona namanaāpaniro hītxineirote nota ikapani, kotxi atxiīti nota minari atoko nitxa hīporikiā. Kona ninirekari ikara atoko inakari nininiua. ¹⁰ Kristo atāonoka isākire. Isākire nākixinireē auape, ininiā nota sākire apaka atāo. Nisāpiretapanikari kākiti hītxineirote nimanirekakani pirena. !Auari ikara nisākire iotokakakari ikinika Akaia tixiniā. ¹¹ Kinirepa ikara atoko nitxa sākireta? Atxiīti kona nitiretai hīte? Teoso imarotari nota iteene tīretinīi hīte.

¹² Uatxa iuaīkana nisāpiretai hītxineirote nīmapakapakani. Nanera kākiti uatxa hītekata auakani Teoso maiokanatakini txari: “Ate kamari Paoro parīkatxikana,” itxana. Ikara atoko ininiā iuikauana. Txamari ninoa parīka ātiāo, kotxi ninoa apakaparo hītxineirote. Ate kona apakaparo hītxineirote. ¹³ Teoso kona iokanatanana nanera hītemoni. Na atāo Teoso iokanatakini !itxauana. Imisirienetaina hīte, “Aparīkauata Teoso ikapani,” inakasaakina. Nanera txari: “Kristo iokanatakiniraua ate,” itxana. Txamari na atāo nanera sākire. ¹⁴ Ikara atoko inakari auapitika, kotxi Satanasi sari kākitimoni. Itxari: “Nota Teoso nitiri nitxaua. Nota oerekai atāo inakari.” Ininiā iua sākire auīākani auapitika. ¹⁵ Ininiākara nanera kikiakori Satanasi nitiriakori txari: “Atāo inakari kamakaniua ate. Teoso nitiriakori atxaua,” itxana. Xipokatxi ōtisaaki imisiritaākanako ninoa maerekati ikamakitina xika.

Paoro Misiritiko Pirena

¹⁶ Iuaīkana nisāpiretai. Mīkiteti !nitxaua, iuaritika hīte potxitari kākiti mīkiteni, ininiā mīkiteti atoko niuikaua, kotxi nota posotari niuikiniua. ¹⁷ Apiananiri kona sākirauata ia atoko. Mīkitetinoka sākirauata ia atoko iuikiniua. ¹⁸ Nanera kikiakori iuikaua, Teoso sākire mauīākani iuikiniua atokokana, ininiā nota apaka sāpiretari niuikiniua. ¹⁹ Hīte auiritari kākiti mīkiteni himoianarini ininiua, kotxi !kiīkitei hīte. ²⁰ Nanera hītekata auakani txīkitakai hīte inītiriakorina hininiua. Hīte auiritari ikara atoko inakari. Nanera amanaāpotari ikini sereti hīte nakiti. Ikamarina inireēkitina hītemoni. Ipaniātaina ikiniōtika inireēkitina hīkamini. Imisiritaina hīte. Hīte auiritari ikara atoko inakari ikaminina. ²¹ Erekari nipētauatini atxiīti? Kotxi kona kataparaxinireno nota nanera kamakiti atoko nikamini hītemoni. Kataparaxinirena nanera.

Ikamakitina iuikana, ininiā mīkiteti atoko kataparaxinireno nota. Nikamakiti niuikako. ²² Nanera Epireoakorikani? Ari. Nota apaka Epireo nitxaua. Nanera Isaeo apika mekaniriakorikani? Ari. Nota apaka Isaeo apika mekaniri nitxaua. Nanera Apraōo apika mekaniriakorikani? Ari. Apraōo apika mekanirikanarano nota apaka. ²³ Nanera Kristo nitiriakorikani? Atxiīti. Mīkiteti iuikiniua atoko nitxa: “Kristo nitiri apiaerekatakari nitxaua nota.” Nota apia parīkauata Teoso ikapani. Apiata nīmisiritiko, kotxi kaiōokatani kateia āki nitakaāka. Kaiōokatani nota noropataāka aāpitsā. Kaiōokatani nipinaarita. ²⁴ Ipi ipi āti pakinikata Xoteoakori noropatano aāpitsā. Iusaaki inoropatanona trīta novi pakinikata. ²⁵ Ipi āti pakinikata Homanoakori noropatano aākeē. Ātikata kai soroā nikiporonakaāka. Ipi āti pakinikata maporoā nisikasaaki, maporo sakika apanīkakiā. Āti ikanōkati, āti pokamarariti pakini ninapa potxoari uiniti nipimakaātini. ²⁶ Nianaxititapika. Natamonōkonitari uini torōkani. Natamonōkonitari kītiririni. Natamonōkonitari ninirimane. Natamonōkonitari ninirimane minakaniua. Natamonōkonitari sitatxi nauakasaaki, kākiti mauakaniātaā nauakasaaki, potxoari uiniti nīpiriātakasaaki pakini. Natamonōkonitari kākiti, “Xesosi sākire aāuika” inakanikata nauakasaaki, kotxi na atāo ninoa sākire. ²⁷ Kaiōokatani nisāpaka itori parīkatxi xika.

Kaiãokatani nitsii aua. Kaiãokatani kona apakata nimakini îkanõka. Kaiãokatani ninatxita, niposonata. Kaiãokatani nipokori !auari. Kaiãokatani nimîteenekari katxîkareri. Kaiãokatani nimãka !auari. ²⁸ Ikara atoko inakari monõkori auapika notamoni. Apaka niparîka kasãpaniri aua, kotxi ikiniõtika niparîkauata kãkiti Teoso misãkiretikoãtaã apotiitakaniua îkapani. ²⁹ Æti iõkapetiniã, nota apaka niõkapeta. Æti txîkitakaãka maerekati ikamini, ininiã nota maerekaxiniretinoka nitxa.

³⁰ Hîte nirekiniãri niuikiniua, ininiã niuikari niõkapere. ³¹ Aãuîte Xesosi Kristo iri, Teoso imarotari nisãkire atão inini. Ætipirika matxari: “Peerekai.” ³² Tamásiko sitatxiti nauakasaaki, kãkiti auîte apiari Areta inakori auakasaaki, Tamásiko auakani auîte paniãtari sotatoakori kaikotini sitatxi kãkiti îronakiniãtaã nota imaïkinina îkapani. ³³ Txamari kona nota pokîka sitatxi toreãtaã. Niïroã kotari mitari ãki. Iuasaaki aïtariakori iokatxakano aapokotxi sonaã sitatxi pirikere mapara. Ixitipe apoka nitxa. Ikara atoko itxa nimatekini, ininiã kona ninoa maïkano iuasaaki.

12

Taponetxi Teoso Sikiniri Paoro

¹ Hinirekatari apikomoni niuikiniua? !Apakata, iuaritika hinirekiniãri, niuikapanikauako, kotxi Apiananiri sikano taponetxi peereri. Iua oerekano imarore. ² Akokaxiti katosi anokanani inakasaaki, nanikaãka Teoso tixinemoni iaxiti apiko nopinixiti. Iuasaaki nitaponeuataako? Atxiïti niïto atão anikaãkauako? Kona iteene nimarotari. Teosonokara imarotari. ³ Ianoka nimarota. Nanikaãka Teoso tixinemoni nitaponeë atxiïti, atão niïto anikaãka atxiïti. Teosonoka imarotari. ⁴ Iuaxiti nikenakotari sãkiretxi erekari. Ikara kona nimarota iuaïkana nisãpiretini. Apaka !auritaãka nisãpiretiniri kãkiti. ⁵ Ninirekiniãri, niuikari nitapone ikara atoko inakari, txamari !apakata notaka niuikiniua. Niõkaperenoka niuika. ⁶ Ninirekiniãri niuikiniua, atãonoka nisãpireta, kotxi kona miïkiteti !nitxaua. Txamari kona ninirekari niuikiniua, kotxi atxiïti kãkiti uãkatari nota apiari nininiua. Ninirekari kãkiti atão imarotinino. Erekarikãkiti imarotinino nisãkireë, nikamakitiã pakini.

Paoro Misiritiko Inako Tsii Atoko Inini

⁷ Peerekari nitikakiti Teoso tixine nanikikosaaki, iuaritika Teoso kona nirekari niuikiniua, ininiãkara Teoso auiritari Satanasi misiritinino niïtoã. Katsiiri. Inako atoko itxa niïtoã, ininiã niuikiniua !auari. ⁸ Ipi ãti pakinikata namanaãri Apiananiri ia nitsii imaktxakini. ⁹ Txamari itxano: “Kona nimaktxakari. Ikinipoko erekari nisikakiti sikataparatai. Iuanoka pinireka. Piõkapetakasaaki, nota tapara pãkixinireë apiata,” itxano. Ininiãkara nipoxokoniritika niuikari niõkapere, kotxi iuasaaki nimarotari Kristo posotiire nãkixinireë auini. ¹⁰ Niõkapetakasaaki, nipoxokoniua. Nixiniketikosaaki, nipoxokoniua. Nimaxikikosaaki, nipoxokoniua. Nimisiritikosaaki, nipoxokoniua. Nikamakiti tîkane nimimarotakanisaaki, nipoxokoniua. Ikara atoko inakari nimîteeneka nipoxokoniritika, kotxi Kristo nakiti nitxaua. Niõkapetakasaaki, nitapara nãkixinireë apiata.

Paoro Nirekari Erekarikorîto Auakanimoni

¹¹ Miïkiteti sãkirauatini atoko nisãkirauata, txamari hîte xika nisãkirauata miïkiteti sãkirauatini atoko, kotxi hîte iukaãkamanoko nota, kona nota nirekamariko niuikiniua. Minakati nitxaua, iuaritika nanera Teoso maiokanatakini hîtekata auakani kona api-aerekata. ¹² Hîtekata nauakasaaki, nikamakiti oerekai atão Teoso iokanatakiti nininiua, kotxi iuasaaki noerekai Teoso oerekakiti kãkitimoni. Noerekai kãkiti maposotakiniti. Noerekai posotiiretxi iuasaaki. !Asãpaka ikara atoko inakari aõerekini hîte. ¹³ Atxiïti apiata nitiretatari apanakini Teoso misãkiretikoãtaã apotiitakaniua ãtiãtaã auakani? Konapitini. Ninoa nitiretini atokotxikana nitiretai hîte. Namanaãna ninoa txineirote niamonitakiti îkapani. Hîte txineirote kona xatiki namanaãi, ininiã nikerokatari atxiïti? Himaxinîkaretariko ia nikerokakiti.

¹⁴ Ipiakata nisipeka hîtemoni. Naiamatapeka iuaïkana hîtemoni nisini tîkane. Kona hîtxineirote kona namanaãpanii. Hîtxineirote kona ninireka. Hîtera ninireka. Amarini

kona nīkatana iri, inoro pakini. Iri, inoro pakinira nīkatana imiakori. Nota hīri atoko nitxaua. ¹⁵ Nipoxokoniuata ikinika nota nakiti nisikinii hīte. Notaka nisikaua hītemoni. Nipoxokoniritika nisikai. Txamari nota tiraōki hīte īkapani apiaāpotakasaaki, hīte tiraōki nota īkapani poiāoāpota.

¹⁶ Atāokani ikara atxiīti? Iuaritika ia nimarota. Kona xatiki namanaāi hinakiti hīsikinino. Atxiīti āti ereē auakari txari: “Paoro misirienetaua ate. Paxirari isākire,” itxa atxiīti. Txamari ikara na atāo. ¹⁷ Natokopa nitxa nimisirienetini? Atauako kikiakori hītemoni nota iokanatakini misirienetai hīte? !Imisirienetaina. ¹⁸ Nōtākikari Txito hītemoni isini tīkane. Nipaniātari āti aītari iuakata isini. Atauako Txito misirienetai hīte? Konapitini. Erekarī Matamatakotira anikano nota. Iua apaka anikari Txito. Nota sari Xesosi nirekinimoni. Txito apaka sari iua nirekinimoni.

Paoro Pīkare

¹⁹ Atxiīti hīte xinikari ikara asāpiretai, ate ereka anini himarotini īkapani. Konapitini. Ate sākirauata hītekata Kristo sākirauatini atokokana, kotxi Teoso atamataua. Ate tīretakini hītxaua hīte, ininiā ikinipoko akamakiti akaminii hīte, hīte ākixinire tapara auini īkapani. ²⁰ Nipīkarauata ereē napokini, kotxi atxiīti hīte kamari nimanirekakiniti. Atxiīti napokasaaki ereē, kona hīte apokaerekatano nota. Ereē napokasaaki, nipīkari nimarotini hīte txitakakiniua, hīxikotakakiniua, homanatakakiniua, hīpotxinani auini, himisākirepiretakakiniua, aāpirena hīsāpiretini, hīuikiniua, hineenamauatini. Ikara nimarotini nipīka, ereē napokasaaki. ²¹ Ininiā hītemoni napokasaaki, nipīkari Teoso kamapētatinino nota hīte maerekani xika. Nipīkari nitxiapatini maerekati hīkamakiti xika, kotxi kaiāopokori kamari maerekati akokaxiti, iuaritika !itakanapapanikari iua maerekati. Ixinikakitina maerekatinoka. Maerekati ikini sereti iūtona nireēkiti aua. Itanoro minakotokatika isirīkana. Ikara atoko inakari kona itakanapapanikana.

13

Paoro Sākire Imapotōkire Ōtākikare

¹ Ipekata nota sari hītemoni. Iuaīkana hītemoni nisako. Teoso sākire iōkatsopatakori txari:

Ipi āti pakini kākiti atamatiniāri maerekati āti kamakiti, ninoa sākire auikaāka, ininiā iua maerekati kamakari misiritaākako. Ipi kākiti atamatiniāri maerekati āti kamakiti, ninoa sākire apaka auikaāka, ininiā iua maerekati kamakari misiritaākako, itxa Teoso sākire. ² Akokaxiti hītekata nauakasaaki, nōtākikapekai himaerekani hī-takanapini. Iuasaaki nōtākikana mitxi maerekati kamakani, apanakini apaka. Nitxana: “Ātikata uai napokasaaki, nimisiritaipitikari ikinimane maerekati kamakani,” nitxapekana. Iuaīkana uatxa itakoxiti nauakasaaki, ikara nisākiretxikana nisāpiretai hīte. ³ Hīte nirekari himarotini: “Atāokani atxiīti Paoro sāpiretari Kristo sākire?” hītxa. Napokasaaki ereē, himarotapitikariko atāo nisāpiretiniri Kristo sākire. Kristo !iōkapeta. Oerekepekai iposotiire hīte sauaki. ⁴ Kristo okikosaaki aamina ipiriāmitakari nopini, iūto iōkapere aua. Uatxa kataparari iua, kotxi Teoso sikataparatarari iua. Ate iūto apaka iōkapeta, mitxi Kristo iūto iōkapetini atoko, iuaritika Teoso sikataparataua Kristokata aūuini hīte amoiatini īkapani.

⁵ Hīxinikariko hākixinireē auakari. Atāokani hāuikatari Teoso sākire? Hīteka ataerekatauako. Himarotatarari Xesosi Kristo hākixinireē auini? Teoso sākire hākixinireē mauakaniā, Kristo Xesosi !auari hākixinireē. ⁶ Ninirekari himarotini Kristo Xesosi auini ate ākixinireē. ⁷ Ate misākiretari Teoso, maerekati hīte makamakani īkapani. Kona ate nirekari kākiti sākire: “Peerekari Paoro. Iua imarotapitikari Teoso sākire oerekini, kotxi Korīto sitatxiti auakani kamari Teoso sākire iaōka.” Ikara kona ate nireka, ate iuikiniua īkapani. Atxiīti kākiti uākatari Xesosi Kristo !auari ate ākixinireē, iuaritika ate nirekari hīte kaminiri atāonoka. ⁸ !Apakata aiotokakiniri atāo inakari. Atāo inakari auapika. Atāo inakari !ixipoka. Apakata aōerekiniri atāo inakari. ⁹ Atxiīti ate iōkapeta, iuaritika apoxokoniuata hītaparaxinire akenakoenetakasaaki. Ate misākiretari Teoso hīte atāonoka hīkamini īkapani ikiniōtika, Xesosi sākire iaōka hīkamini īkapani. ¹⁰ Ikara atoko inakari niōkatsopata hīte īkapani hītekata nimauakanisaaki, kotxi ereē

napokasaaki, kona ninirekari nitxitinii hīte. Niposotapitikari nitxitinii, kotxi Apiananiri sikaposotiiretapekano atāo nikamini hītemoni. Txamari kona ninirekari Xesosi sākire hītakanapini, nota txitirii xika. Ninirekari hīte kataparaxinire hinini, Xesosi sākire iteene hāuikini īkapani.

¹¹ Nitariakori, xipope niōkatsopare. Ereēpiko. Ikiniōtika atāonoka hīkamako. Xesosi sākire iaōka hīkamako. Hīkamariko nisāpiretakiti iaōka. Hīxinikakiti ātinoka itxauako. Kona hītakitakapeua. Ininiākara Teoso katiraōkiri, kauāireri, auapikako hītekata.

¹² Haōkitakakasaakia, hīpoxokoniritika hāpakapakakauako, kotxi Apiananiri nakitiakori hītixaua.

Ikinimane Teoso nakitiakori uai auakani xinikamanapitai hīte.

¹³ Apiananiri Xesosi Kristo sikari ikinipoko erekari hītemoni. Teoso iteene tiretai. Erekari Matamatakoti moianatai hīte hīkinika. Ameē.

KARÁSIA

Paoro Iokanatsopata Karásia Auakanimoni

¹ Nota Paoro iokanatsopata ia aätsopa hitemoni. Nota Teoso iokanatakitino kãkitimoni Teoso iokanapirena nisãpiretini ïkapani. Kona kãkitini iokanatano nota. Xesosi Kristora iokanatano nota. Aïri Teoso, Xesosi ipinaãka atoko õkitikakarira, iuara iokanatano nota kãkitimoni. ² Ikinika aïtariakori notakata auakani, nota apaka xinikanãtai hïte. Hïte ikini aikoti Teoso misãkiretikoãtaã apotiitakaniua Karásia tixini auakani axinikanãtapika.

³ Aïri Teoso, Xesosi Kristo aãuïte pakini sikari ikinipoko erekari hitemoni. Ninoa kamaerekaxiniretai hïte.

⁴ Xesosi ipina amaerekani imaktxakini ïkapani. !Erekari uatxa auakani. Maerekati kamakani sauaki aãuakasaaki, Xesosi ipina ate imaktxakini ïkapani, amapinakani ïkapani. Xesosi ipïpe ate ïkapani, kotxi aïri Teoso nirekari Xesosi ipinini ate maerekani imaktxakini ïkapani. ⁵ Ikiniõtika: “Peerekai,” matxari Teoso. Aïtipirika kãkiti txapikari Teoso: “Peerekai.” Ameë.

Äti Iokanapirena Erekari !Auari

⁶ Nikenakopiretari Teoso hïtakanapaãpotini. Iuasaaki nitsorïkaãnãta. Kinirepa hïtakanapari Teoso sãkire? Kotxi mapa kasiritinoka hïte auikari Teoso iokanapirena erekari. Kristo iteene tiretai hïte, ininiã akiritai hïte inakitiakori hininiua ïkapani. Kinirepa hãuikatari äti iokanapirena? ⁷ Atão nisãpiretai hïte. Äti iokanapirena erekari !auari. Nikenakopiretari kãkiti hïte oereëkani. Ninoa nirekari ikoketinirina isãkirena Kristo iokanapirenakata. Uatxa !himarotaikari atão sãpirenatxi. ⁸ Atão asãpiretapekai Teoso iokanapirena erekari. Ätião sãkiretxiti asãpiretiniãi, Teoso iokanataua ate kãkiti misiritikomoni, ätipirika misirikaretxi auiniãtaã. Teoso nitiri iaxitikiri apaka sãpiretiniãi ätião iokanapirenatxi, Teoso iokanatari iua initiri imisiritikomoni ätipirika misirikaretxi auiniãtaã. ⁹ Hïte auikapekari Teoso iokanapirena erekari. Ätião iokanapirenatxi sãpiretakari sãpiretiniãi Teoso iokanapirena atão minakati, iokanataãkako imisiritikomoni ätipirika misirikaretxi auiniãtaã. Asãpiretapekai ikara inakari sãkiretxiti. Uatxa iuaïkana nisãpiretai.

¹⁰ Ikara atoko nitxai hïte, ininiã himarotari kona ninirekari: “Peerekari Paoro kamakiti,” niniko. Nota nirekari Teosonoka: “Peerekari Paoro kamakiti” ininino. Nanera atão minakati sãpiretakani txai hïte: “Paoro nirekari kãkiti apokaerekatini iua.” Ikara na atãoni. !Ninirekari kãkiti apokaerekatini nota. Ninirekiniãri kãkiti apokaerekatini, kona Kristo nitiri !nitxaikaua.

Teoso Akiritari Paoro

¹¹ Nanera atão minakati sãpiretakani hïte oereëkani: “Paoro iokanapirena kona Teoso iokanapirenani,” itxana ninoa sãkire. Nitariakori atãopitikara nisãpiretai hïte. Iokanapirenatxi hitemoni nisãpiretakiti kona kãkiti sãkireni. Teoso sãkirena. ¹² Kona kãkitini sãpiretano ia iokanapirenatxi. Kona kãkitini oerekano. Xesosi Kristora sãpiretano nota iua iokanapirenatxi.

¹³ Hïte imarotari mitxi nauakasaaki, Xoteo kiomaneakorini oerekakiti nauikasaaki, iuasaaki kona nitiretana Xesosi sãkire auiãkani. Iteene nimisiritana ninoa. Ninirekari nixipokiniri Xesosi sãkire kïpitakani. ¹⁴ Iuasaaki nimarotari Xoteoakori kitxakapirïkarini paniãtakiti. Nikamari imakinika ninoa paniãtakiti. Iuasaaki nimoianariakori apaka kamari ninoa kitxakapirïkarini paniãtakiti. Nota apiata kamari ninoa sãkire iaõka. Iteene ninirekari nikaminiri kitxakapirïkarini paniãtakiti.

¹⁵ Teoso iteene tiretano nota. Iua mereëno nota nauini apisapanika. Iuasaaki akiritano nota initiri nininiua tïkane. ¹⁶ Teoso keto manapi apokasaaki, oerekari imi notamoni, imi Xoteo minakonimoni nisãpiretini ïkapani. Iuasaaki kona nisãpiretari kãkiti Teoso

oerekakiti sáki-retxiti, ininiã na kákitini sápi-retano nikamakiti tíkane. ¹⁷ Iuasaaki kona nisari Xerosareë sitatxitimoni, ininiã nota apisapanika Teoso iokanatakini kona òtá-kikano. Kona kákitimonini nisa noerekiko íkapani. Arápia tixinimoni nisapitipo. Eereka nikanapiriã Tamásiko sitatxitimoni.

¹⁸ Ipi anokanani, áti anokanani pakinikanani napaáka atoko, nisa Xerosareëmoni Petro nimisáki-retini íkapani. Ipi semanati ninapa Petrokata. ¹⁹ Apanakini Teoso iokanatakini isáki-re sápi-retakani kona naókita. Apiananiri itari Txiako inakorinoka naókita. Ininiákara kona kákiti sáki-reni nisápi-retai híte. Teoso iokanapirenakara nisápi-retai híte.

²⁰ Ia niókatsopatakiti nisápi-retakiti hítemoni atão inakari. Teoso imarotari atão inakari nisápi-retinii.

²¹ Xerosareëmoni nisaáka atoko, nisari Síria tixini, Sirísia tixini apaka. ²² Iuasaaki Kristo sáki-re auíákani, Xotéia tópa auakani, !aókitapanikano nota iuasaaki. ²³ Ninoa imarotari apanakini minapiretakiti. Apanakini sáki-re: “Kiki mitxi ate misiritakari, uatxa sápi-retari Xesosi sáki-re. Mitxi iua nirekari ixipokiniri Xesosi oereékiti sáki-retxiti, iuaritika uatxa inirekari oerekiniri Xesosi oerekakiti sáki-retxiti kákitimoni,” itxana apanakini sáki-re. ²⁴ Ininiákara ninoa: “Peerekari Teoso,” itxana, kotxi nota auíkapekari Xesosi sáki-re.

2

Xesosi Iokanatakini Apakapari Paoro

¹ Katosi anokanani napaáka atoko, nikanapiriã Xerosareëmoni nimoianari Panapee inakorikata. Nanikari nimoianari Txito inakori apaka notakata. ² Xerosareëmoni nisa, kotxi Teoso oerekano nisini iuamoni. Iuaã napokasaaki, nisákirauata Xesosi sáki-re auíákani auíteakorikata. Ninoakatanoka nisákirauata. Teoso iokanapirena erekari Xoteo minakonimoni nisápi-retakiti nisápi-retana ninoa. Nota nirekari ninoa imarotiniiri nisápi-retakiti atão inini. Apaka ninirekari ninoa imarotiniiri iuaíkana katana nisápi-retakiti atão inini íkapani. Nisápi-retakiti ikenakotakasaakina, ninoa: “Atãopitikara pisápi-retakiti Xoteo minakonimoni,” itxana. ³ Txito nimoianari na Xoteo !itxaua. Krekora itxaua, ininiákara Teoso takaótxikare !auari iuamoni, iuaritika Xesosi sáki-re auíákani auíteakori na paniátari itsiki mata kisauakiko. ⁴ Mitxi apanakini kikiakori apoka iuaã. Ninoa sáki-re: “Ate auikari Xesosi sáki-re,” itxana ninoa. Txamari na atão ninoa sáki-re. Ninoa apotiitaua Xesosi sáki-re auíákanikata. Inirekarina Txito ítoã Teoso takaótxikare takiko. Ninoa nirekari imarotiniirina kitxakapiríkarini Xoteo kiomaneakorini paniátakiti atakanapini, kotxi atakanapapekari ipixini ninoa paniátakiti, kotxi Kristo Xesosi nakitiakori atxapekaua. Ninoa nirekari imarotiniiri ikinika ate oerekakiti sáki-retxiti. Ninoa nirekari ate kaminiri ikinika kitxakapiríkarini Xoteo kiomaneakorini paniátakiti. Ninoa nirekari ikinika Xesosi sáki-re auíákani, Xoteo minakanuia apaka kaminiri Xoteo kiomaneakorini paniátakiti. Ninoa nirekari nitiritxi amotakoni atoko aniniua. ⁵ Kona xatiki akamari ninoa nireékiti, kotxi inirekarina Teoso iokanapirena atão inakari akoketini Xoteo kiomaneakorini paniátakitikata. Ate nirekari Teoso iokanapirena atãonoka inakari asápi-retinii.

⁶ Xesosi sáki-re auíákani auíteakori txari notamoni: “Xoteo minakonimoni pisápi-retakiti erekapitikari. Apikomoni ate sáki-re !auari ninoa pisápi-retini íkapani,” itxana. Ninoa auítetxiakori itxauana, iuaritika Teosomoni ninoa apanakini kákiti poiãorini atokotxikana itxauana, kotxi Teoso atamatari aákixinire. Ininiákara nota !nipíkari auítetxi. ⁷ Ninoa Xesosi sáki-re auíákani auíteakori apokaerekatari niparíka. Ninoa imarotari Teoso sikano nota ia paríkatxi, ia iokanapirenatxi erekari nisápi-retinina Xoteo minakanuia. Iua atokotxikana Teoso sikari paríkatxi Petromoni, iokanapirenatxi erekari Xoteoakori isápi-retini íkapani. ⁸ Teoso iokanatarari Petro Xoteoakorimoni, ininiã isikaposotiiretari iua ninoa sauaki iparíkauatakasaaki. Iua atokotxikana Teoso iokanatanota Xoteo minakonimoni. Nota apaka isikaposotiireta ninoa sauaki niparíkauatakasaaki. ⁹ Iuasaaki ninoa auíteakori Txiako, Petro, Xoão pakini imarotari

Teoso sikinino notamoni ia parĩkatxi, ininiākara imaĩkarina niuako, Panapee uako pakini, kotxi akinika aparĩkauata Teoso ĩkapani. Akinika aãpokaerekatari nota, Panapee pakini sãpiretiniri Teoso sãkire Xoteo minakonimoni. Akinika aãpokaerekatari Txiako, Petro, Xoão pakini sãpiretiniri Teoso sãkire Xoteoakorimoni. ¹⁰ Ninoa paniãtaua ate matxineiroteni atiretini. Iuanoka ipaniãtaua. Napokaerekatari ninoa sãkire, kotxi ninirekapitikari matxineiroteni nitiretini.

Paoro Ôtãkikari Petro

¹¹ Eereka Petro motikaẽtaua ate ãtxiokia sitatxiti aãuakasaaki. Iuasaaki Petro kamakiti na atãoni. Ininiākara nota sãkirauata Petro apisatoõ: “Petro, pite kerokari,” nitxari iua. ¹² Merepanika Petro nipokota ikiniõtika aĩtariakori Xoteo minakonikata. Eereka ãtikaka kikiãkini apoka Txiako iokanatakini. Iuasaaki Petro pĩkana ninoa, ininiã kona inikaika aĩtariakori Xoteo minakonikata, Xoteo kiomaneakorini sãkire xika, kotxi ninoa sãkire: “Kãkiti Teoso takaõtxikare iĩtoã mauakaniã, !pinipokotape ninoakata,” itxana ninoa sãkire. Petro pĩkana Txiako iokanatakini, kotxi ninoa nirekari Teoso takaõtxikare auini aĩtariakori iĩtoã, Xoteo minakaniua iĩtoã. ¹³ Apanakini Xoteoakorini Xesosi sãkire auĩãkani apaka kamari Petro kamakiti atokokana, ininiã ninoa apaka kerokari. !Inipokotaikana aĩtariakorikata, Xoteo minakanikata. Ninoa kerokiniri xika Panapee apaka kerokari. Iua apaka !inipokotaika aĩtariakorikata, Xoteo minakonikata. ¹⁴ Nimarotakasaakiri ninoa kerokiniri ikamakitina, nota misãkiretari Petro ikinimane õkiãtaã, kotxi ninoa !ikamari atão inakari. Teoso iokanapirena erekari iaõka !ikamana. Nitxari iua: “Xoteokari, iuaritika pauanãta Xoteo minakaniua sauaki, ininiã Xoteo kamakiti atoko !pikamaika. Xoteo minakaniua atoko pitxaua. Ininiākara kinirepa pite paniãtana Xoteo minakaniua: ‘Hĩkĩpitariko Xoteo kiomaneakorini sãkire?’ !Erekari,” nitxa Petromoni.

Xesosi Sãkire Auikiko Kamaerekatari Kãkiti

¹⁵ Ate Xoteo atxaua, kotxi aĩri, ainoro pakini Xoteo txaua apaka. Xoteo kiomaneakorini sãkire: “Xoteo minakaniua maerekati kamakani itxauana,” itxana isãkirena. Xoteo minakaniua !atxaua ate. ¹⁶ Aimarotari, aãuikiniãri Xesosi Kristo sãkire, iua kamaerekatari aãkixinire, ininiākara Teoso apakapaua. Kitxakapirĩka Teoso sãpiretari Moisesi ipaniãtakiti kãkiti kamini tĩkane. Ininiākara Moisesi iõkatsopatarini ikara Teoso sãkire. Txamari !aposotari akaminiri imakinika Teoso paniãtakiti, Moisesi iõkatsopatakiti, ininiākara !ikamaerekatari aãkixinire. !Apakapaua ate. Ate auikari Xesosi sãkire ereka anini ĩkapani, ininiã Teoso apakapapitikaua ate. Teoso paniãtakiti iõkatsopatakori ikinika !aposota akamini, ininiã Xesosi kamaerekatari aãkixinire Teoso apakapiniua ĩkapani, Kristo sãkire aãuikasaaki. ¹⁷ Anirekasaakiri Teoso kamaerekatinina, aãpoka Kristomoni. Iuasaaki aimarotari maerekati kamakani aniniua. Iuaritika Kristo makatxakari amaerekani Teoso apakapiniua ĩkapani. Ikara atoko ininiã, atxiĩti Kristo nirekatari maerekati akamini, imakatxakiniri ĩkapani? Konapitini. ¹⁸ Atxiĩti kãkiti imarotari Xoteo kiomaneakorini paniãtakiti kamiko na kamaerekatari kãkiti ãkixinire, ininiã itakanapari ninoa paniãtakiti ikamini. Atxiĩti ãti õti iuaĩkana ikamari ninoa Xoteo kiomaneakorini paniãtakiti iaõka, ininiã iuasaakiikarako ikerokari. ¹⁹ Moisesi iõkatsopatakiti oerekano nota ipĩkari atoko nininiua, kotxi nota kona posotari ikinika Moisesi iõkatsopatakiti iaõka nikamini, ininiã nimisiritiko auapitikako. Ininiã nimarotari Moisesi iõkatsopatakiti kona makatxakari nimaerekani. Ininiã nimarotari Xesosi sãkire auĩãkarinokara auapininiika. Ininiã uatxa ikiniõtika ninirekari Teoso nireẽkitinoka nikamini. ²⁰ Xesosi okaãka aamina ĩpiriãmitakari nopini. Aamina ĩpiriãmitakari nopini okakori atoko nitxaua, kotxi maerekati mitxi nikamakiti !ninirekaikari nikaminiri. Mitxi ninireẽkiti kona auaika. Iuaritika auãkipanika nitxaua, kotxi Kristo aua nãkixinireẽ. Teoso ãkiri sãkire nauikiniã, auãkipanika nitxa. Iua tiretano nota. Iua ipĩpe nota ĩkapani. ²¹ Moisesi iõkatsopatakiti kamiko kamaerekatiniãua ate, kinirepa Xesosi ipina? Moisesi iõkatsopatakiti kamiko na xatiki kamaerekataua ate. Teoso tiraõkinokara kamaerekatari aãkixinire.

3

Natokopa Itxa Teoso Kamaerekatiniua?

¹ Hīte Karásia tixini auakanii kona kīkīte hīte. Kipa misirienetai hīte atāo inakari himakamakani īkapani? Kotxi himarotapitikari atāo inakari. Himarotari Xesosi Kristo ipina aamina īpiriāmitakari nopini amaerekani imakatzakini īkapani. Ate oerekapekai ikara atāo inini. ² Ianoka nipimaāi hīte: Kisaakipa hāpakapari Erekarī Matamatakoti? Hāpakapatari iua, Moisesi paniātakiti hīkamakasaaki? Konapitini. Hāpakapatari Erekarī Matamatakoti Teoso iokanapirena erekarī hāuikasaaki? Ari, Teoso iokanapirena erekarī hāuikasaaki, iusaakiikara hāpakapari iua Erekarī Matamatakoti. ³ Kipa iomaīkītetai hīte? Merepanika Teoso sikari Erekarī Matamatakoti hītemoni, ininiā Erekarī Matamatakoti sikaposotiiretai hīte Teoso paniātakiti hīkamini īkapani. Uatxa hīxinikatarī Teoso paniātakiti hīkamini hīteka posotiireēkani? Konapitini. Kona hīte posotari. ⁴ Himisiritapeēkaika Xesosi sākire hāuikini xika. Kinirepa himīteenekatarī himisiritiko? Atauako uatxa kona hāuikaikari mitxi hāuikakiti Xesosi sākire? ⁵ Kirisaakipa Teoso sikari Erekarī Matamatakoti hītemoni? Kirisaakipa Teoso oerekarī iposotiire hītemoni? Atauako ikara atoko itxa Moisesi paniātakiti hīkamakasaaki? Konapitini. Isikai Erekarī Matamatakoti, oerekarī iposotiire, Teoso iokanapirena hāuikasaaki.

⁶ Hīxinikariko Apraōni. Apraō auikari Teoso sākire, ininiākara Teoso kamaerekatarī iua, ininiā Teoso apakapari iua. ⁷ Ininiā ninirekarī himarotiniri, kākiti Teoso sākire auīākani Apraō apika mekaniriakori atāo inakani itxauana ninoa. ⁸ Teoso kamaerekatarī Xoteo minakaniua, kotxi ninoa auikari Xesosi sākire. Kitxakapirīka Teoso sākire iōkatsopatakori sāpiretapekari ikara Teoso iokanapirena erekarī Apraōmoni. Ikara iōkatsopari txari: “Nota sikariko erekarī ikinimane kākitimoni, kotxi pite Apraō auikari nota sākire.” ⁹ Apraō kīpitari Teoso sākire, ininiākara Teoso takari erekarī iuamoni. Iua atokotxikana Teoso takari erekarī iua sākire kīpitakanimoni.

¹⁰ Apanakini uākatari Teoso apakapinina ninoa, kotxi ikīpitarina Moisesini sākire. Txamari Teoso misirikare pamonōkonipaniriko ninoamoni, kotxi Teoso sākire iōkatsopatakori txari: “Teoso misiritariko kākiti ikinika Moisesi paniātakiti ikiniōtika imakamakanisaaki.” ¹¹ Teoso sākire iōkatsopatakori txari: “Teoso kamaerekatariko kākiti, iua sākire auīākani. Ininiā isākire auīākani auapininiika itxako Teosokata,” itxa Teoso sākire iōkatsopatakori. Ininiākara aimarotari Moisesi paniātakiti kīpitiko kona kamaerekatarī kākiti. ¹² Moisesini iōkatsopatakiti kona paniātaua aūuikiniri Xesosi ipinini amaerekani imakatzakini īkapani. Moisesi iōkatsopatakiti paniātaua akaminiri ikinika Teoso paniātakiti. Teoso sākire iōkatsopatakori txari: “Kākiti, Teoso paniātakiti iōkatsopatakori ikinika makerokakatirako auapininiika itxako Teosokata,” itxa Teoso sākire iōkatsopatakori.

¹³ Txamari ātika Teoso paniātakiti Moisesi iōkatsopatakiti akerokiniā, amisiritaākako. Kristo makatzakaua ate ikara misirikaretxi monōkori, kotxi Teoso misiritari Xesosi Kristo aamina īpiriāmitakari nopini ate maerekani xika ate mapinakani īkapani. Teoso sākire iōkatsopatakori txari:

Kākiti aamina nopini okakori Teoso misiritakiti itxaua.

¹⁴ Teoso sikaenetari erekarī Apraōmoni. Kristo ipīpe hīte Xoteo minakaniua ikara erekarī hāpakapini īkapani. Ininiā Xesosi Kristo sākire aūuikasaaki, aāpakapari mitxi Teoso sikaenetakiti. Aāpakapari aākixinireē Erekarī Matamatakoti, Teoso sikaenetakiti atemoni.

Teoso Sikaenetakiti Sākiretxiti

¹⁵ Nitariakori, ikinimane kākiti imarotakiti nisāpiretaiko hīte, noereēkiti sākiretxiti iteene himarotini īkapani. Ipi kākiti aua itiina isikaenetakakana. Iusaaki, iōkatarina iuākana isikaenetakitina tsopaā. Eereka !auiritaākana imaxinīkaretinirina isikaenetakitina. Apaka !auiritaāka sākiretxi apikomoni itakinina isikaenetakitina tsopaā. Teoso sikaenetakiti inakitiakorimoni ikara atoko itxa. ¹⁶ Himarotariko ia. Teoso sikaenetari erekarī Apraōmoni, Apraō apika mekanirimoni apaka. Teoso sākire iōkatsopatakori

na txari: “Apika mekaniriakori.” Teoso sákire iókatsopatakori txari: “Apika mekaniri.” Ininiã átika apika mekaniri. Kristo itxaua iua. ¹⁷ Ia ninireka nisápiretinii. Kitxakapiríka Teoso sikaenetakiti Apraãomoni apokapeka. Koatrosêtosi tríta pakini anokanani Apraão auaka atoko, Teoso sápiretari Moisesi ipaniãtakiti iókatsopatini íkapani kákiti kamini íkapani. Moisesi iókatsopatakiti kona xipokari Teoso sikaenetakiti Apraãomonikari. ¹⁸ Teoso sikari Kristo kákitimoni, kotxi mitxi isápiretari isikaenetakiti Apraãomoni. Teoso sikasaakiri ipaniãtakiti sákiretxiti Moisesimoni ikara iaõka kákiti kamini íkapani, isikaenetakiti auapeka iusaaki. Ipaniãtakiti sikiko lixipokari isikaenetakiti.

¹⁹ Ininiãkara kininiãpa Teoso sikari ipaniãtakiti Moisesimoni kákiti kamini íkapani? Teoso paniãtakiti iókatsopatakori oerekaua maerekati kamakaniua ate, kotxi !aposotari ikinika ipaniãtakiti akamini. Kristo, Apraão apika mekaniri íkorapokoriti apokini apisapanika, Moisesi iókatsopatakiti oerekaua Teoso nireëkiti akamini íkapani. Teoso sikaenetakiti itxaua Xesosi Kristo. Teoso sikasaakiri ipaniãtakiti sákiretxiti Moisesimoni, Teoso nitiriakori aua iuaãtaã. Teoso sápiretari isákire Moisesimoni. Eereka Moisesi sápiretari kákiti. ²⁰ Teoso sápiretakasaakiri Apraão isikaenetakiti, !ipaniãtari áti kákiti sápiretiniri Apraão. Teosonokara sápiretari Apraão.

Moisesi Iókatsopatakiti

²¹ Moisesi iókatsopatakiti aũukiniã, atxiíti !anirekaikari Teoso sikaenetakiti? Anirekapitikari. Akiomaneakorini paniãtakiti sákiretxiti, kona txíkitakaua aũupininiika anini tíkane. Ininiãkara akiomaneakorini sákire kona kamaerekataua ate, ininiã Teoso kona apakapaua ate, ininiãkara kona aũupininiika !atxa Teosokata. !Auari mauiritakoti sákiretxiti kákiti aupininiika inini txíkitakakari. ²² Teoso sákire iókatsopatakori txari: “Íkininape kákiti kamari maerekati.” Kateia áki auakani atoko atxaua, kotxi !aposotari erekari akamini. Teoso sikaenetakiti sikaãka Xesosi Kristo sákire auiãkanimoni.

²³ Xesosi Kristo sákire auikiko apisa, kákiti kateia áki auakani atokokana itxauana. Kákiti moiaãkari atoko itxaua Teoso paniãtakiti Moisesimoni sikakori. !Aposotari anirekinimoni asini. Uatxara aposotapitikari anirekinimoni asini, kotxi Xesosi apokapeka íkorapokoriti. Ipinapeka kákiti íkapani, ininiã uatxa aũukiniãri iua sákire, kona Teoso misiritaikaua uatxa. ²⁴ Kristo mapokakani apisa, ate oerekakari atoko itxaua Teoso paniãtakiti iókatsopatakori. Kristomoni anikakari atoko itxaua ikara. Kristo apokasaaki, Teoso kamaerekataua ate, kotxi aũukari Kristo sákire. ²⁵ Uatxa apokapeka Xesosi Kristo sákire auikiko. Ininiãkara Teoso paniãtakiti iókatsopatakori !imoiaãikaua ate.

²⁶ Teoso anaakori hĩtxaua, kotxi hũukari Kristo Xesosi sákire. ²⁷ Hĩte patxisat-apeëkaika, ininiãkara hĩpatxisatiko oerekari apanakini Kristo átipirika himoianatini íkapani. Ininiãkara Kristo atokopeka hĩtxa. ²⁸ Ikara atoko aniniã, akinika Kristo Xesosi nakiti atxaua, kotxi akaikotapika iuakata. Xoteoakori, Xoteo minakaniua, nitiritxi, nitiritxi minakaniua, kiki, sito, amakinika Kristo nakiti atxaua. ²⁹ Kristo nakiti pininiãua, Apraão apika mekaniri pitxaua apaka. Ininiã pite apakapapitikariko Teoso sikaenetakiti.

4

Teoso Anaakori

¹ Apikomoni nisápiretaiko hĩte áti sákiretxiti. Amarini !apakapari irini tii itakanapakiti iua íkapani, kotxi xapitipanikari. Ikinipoko irini nakiti imi nakiti txapekaua, iuaritika na apakapapanikari. Axapitipanika inakasaaki, nitiritxi atoko itxaua. ² Axapitipanika inakasaaki apanakini moiaãri iua. Ninoa nĩkatari itxineirote. Irini ketotiniri manapi apokasaaki, imi apakapari ikinika irini tii itakanapakiti. ³ Mitxi iua eenetxi atoko atxaua ate. Nitiritxi atoko atxaua ate. Akiomaneakorini paniãtakiti sákiretxiti amoaãkiri atoko itxaua, kotxi oerekaua akamakiti tíkane. ⁴ Teoso iokanatarari imi kákitimoni iketo manapisaaki. Sito ítõ áki aua merepanika, ikinimane kákiti atoko. Iua kĩpitari ikinika Teoso paniãtakiti iókatsopatakori. ⁵ Amakamakaniãri ikinika Teoso paniãtakiti iókatsopatakori, amisiritiko auapitika. Xesosi makatxakaua ate amamisiritakoni íkapani. Ininiã Teoso anaakori atxaua.

⁶ Teoso anaakori aniniãua, Teoso iokanatari Erekar Matamatakoti imi nakiti aãkixiniremoni. Ininiã iua Erekar Matamatakoti aãkixinireẽ auiniã, aãkiritari Teoso: “Papai, niri,” atxariko. ⁷ Ininiã nitiritxi atoko !atxaikaua. Teoso anaakori atxapekaua. Iua anaakori aniniãua, ikini isikaenetakiti isikaua atemonikari, kotxi Kristo makatxakapekari amaerekani.

!Erekaxinireri Paoro Karásia Auakani Xika

⁸ Mitxi hïte !imarotari Teoso. Iusaaki nitiritxiakori amotakoni atoko hïtxaua. Hïparïkauata teoso minakaniua ïkapani. ⁹ Uatxa hïte imarotari Teoso. Ari, uatxa Teoso imarotai hïte. Ininiã kinirepa hïte nirekari hïkanapiriini mitxi hïauïteakorimoni. Kona kaposotiirena ninoa. !Kïïkitena ninoa. Kinirepa hïte nirekari iuaïkana ninoa nitiriakori amotakoni atoko hininiãua? Kinirepa hïte nirekatari iuaïkana hïuikiniri ninoa oereëkiti sãkiretxiti? ¹⁰ Hïte nirekari Xoteo kamakiti atoko inakari hïkamini. Hïuãkatari Teoso apokaerekatini hïte, kotxi ninoa kiinirite atokotxikana hïte apaka kama. ¹¹ Ininiã !erekaxinireno nota ikara nikenakoenetini. Atauako maxikatiïka nota sãpiretari Teoso sãkire hïtemoni?

¹² Nitariakori, nota iteene õtãkikai hïte. Hïtakanapariko Xoteo kiomaneakorini paniãtakiti hïkamini. Nota atoko hïtxako, kotxi hïte sauaki nauakasaaki nota hïte atoko nitxaua. Xoteo minakaniua atoko nitxaua. Hïtekata nauakasaaki, !himisiritano nota. Hïtoretano nota. ¹³ Hïxinikari merepitipanika Teoso iokanapirena erekari hïte nisãpiretakasaaki, namianare xikara nisãpiretai hïte, hïtekata nauakasaaki. ¹⁴ Iusaaki namianatakasaaki, hïparïkauatapitipo nota ïkapani. !Hinaiakakano. !Hïokanatano nisini namianare xika. Hïte apakapano nota Teoso nitiri iaxitikiri hãpakapini atokokana. Hïte apakapano nota, Kristo Xesosi hãpakapini atokokana. ¹⁵ Iusaaki hïte iteene hïpoxokoniua. Nimarotari ereka hinini, kotxi noki amianatakasaaki, hïposotaãkamariko, himakatxakamariko hïteka oki notamoni hïsikini ïkapani. ¹⁶ Atauako uatxa himokaiakari nitxataua nota, atão inakari nisãpiretinii xika?

¹⁷ Ninoa kamisirienererini iteene tiretapitikamai hïte, txamari ninoa ãkixinire nireëkiti !erekari hïte ïkapani. Inirekarina hïte omanatiniua ate. Inirekarina hïte apokaerekatini ninoanoka. ¹⁸ Erekar kãkiti iteene tiretinii hïte, ãkixinire inireëkiti erekari inakasaaki. Nota hïtekata nimauakanisaaki apaka, erekari kãkiti iteene tiretinii, ãkixinire inireëkiti erekari inakasaaki. ¹⁹ Hïte namariteni nota tiretakini atoko hïtxa. Hinoro atokotxikana nitxa nota. Kaiamapeka auanenetakaro atoko nitxa, kotxi nota atatsiirauata hïte xika. Kristo kamakiti atokotxikana hïkamakasaaki, iusaakinoka nitsii nãkixinire auakari iotoka. ²⁰ Kinirão auaka nitxa hïtekata uatxa. Ninirekari aãpisatoõtakaniua, ininiã nixinikakiti ipinimonipo itxa atxiïti. !Erekaxinireno nota hïte xika.

Akaa, Sara Pakini

²¹ Hïte Xoteo kiomaneakorini paniãtakiti nireëkani, himarotatari ninoa sãkire? ²² Teoso sãkire iõkatsopatakori sãpiretaua, ipi Apraão anaakori aua. Sito niterotxi iamotakitokata aua imi ãti. Niterotxi minakotokata ïtanorokata aua ãti imi. ²³ Akaa inakoromoni, niterotxi iamotakitomoni imi aua, kotxi Apraão sirïka oakata. Imi aua Saramoni niterotxi minakotomoni, kotxi Teoso sikaenetari iua imi. ²⁴ Apraão anaakori oerekaua Teoso parïka kãkiti ïkapani. Iparïka ipi aua, naia sito ipi atoko. Akaa inakoro ãkiri nitiritxi amotakori itxaua. Teoso parïka õtanoxiratari Sinai inakori iua auakasaaki, niterotxi Akaa atoko itxa. Teoso paniãtakiti iusaaki amakamakaniã, amisiritiko auapitikako, nitiritxi amotakori atokotxikana. Nitiritxi makamakaniãri ipatrãote paniãtakiti imisiritiko auapitikako. ²⁵ Ininiãkara õtanoxiratari Sinai inakori Arãpia tixini auakari Akaa atoko itxa. Apaka ïkorasaaki Xerosareẽ sitatxiti oa atokokana itxa, kotxi Xerosareẽ auakani Akaa anaakori atoko itxana ninoa. Nitiritxiakori amotakoni atoko itxana. Ninoa Xerosareẽ auakani !ikamari ikinika Teoso paniãtakiti, ininiã Teoso misiritapitikanako ninoa. ²⁶ ãti Xerosareẽ auapitika, iaxiti auakari Xerosareẽ, Teoso tixine. Xerosareẽ iaxiti auakari Sara atoko, kotxi Sara niterotxi amotakoro !otxaua oa. Ate inoro atoko otxaua oa. Sara ãkiri atoko atxaua, kotxi amisiritiko !auaika. Aãuikiniãri Xesosi

sáikire, akiomaneakorini kona paniátaikaua ate ninoa nireékiti akamini. ²⁷ Teoso sáikire iókatsopatakori txari:

Pite sito meenetoí pipoxokoniuatako. Pite sito pauákitakarauatini tsii mimarotakatoí, pixikarauata pipoxokoniritika, kotxi pite takanapakoroi, itori pamariteakori auako. Kítaniriro poiáoka oamariteakori auako,

itxa Teoso sáikire iókatsopatakori.

²⁸ Ininiá nitariakori, Sara ákiri, Isaki inakori atoko atxaua, kotxi Teoso sikaenetari Apraão imi Saramoni auini. Iuatxikana Teoso sikaenetaua Xesosi amaerekani imakatzakini íkapani, Teoso anaakori aniniua íkapani. ²⁹ Akaa ákiri Isimaeo inakori iponaniá, kotxi Apraão nirekari imi, ininiá iua siríka Akaakata. Sara ákiri Isaki inakori iponaniá Erekarí Matamatakoti posotiireé. Eereka Isimaeo misiritari Isaki. Iua atokokana itxa uatxa. Teoso anaakori minakaniua misiritari Teoso anaakori. ³⁰ Teoso sáikire iókatsopatakori txari:

Híokanataroko niterotxi iamotakoro osipinini imikata, kotxi niterotxi ákiri kona apakapapaniri ipixini iri tii. Niterotxi minakoto ákirinoka apakapari iri tii, itxa Teoso sáikire iókatsopatakori. ³¹ Ininiá nitariakori, niterotxi amotakoro ákiri atoko !atxaua. Niterotxi minakoto ákiri atoko atxaua.

5

Takaótxikari !ikamaerekatari Kákiti

¹ Nitiritxi kamari ipatráote nireékitinani. Ikara atoko uatxa !atxaika, kotxi aúikari Kristo sáikire. Kristo makatzakapekua amisiritiko monókoni. Ininiákara nitiritxi amotakoni atoko iuaíkana !hítxapeua. !Háuiritapiri kákiti paniátinii ninoa auiákiti háuikini.

² Híkenakotako. Nota Paoro sápiretaiko híte. Háuiritiniári takaótxikari takiko hítoá Xoteo atoko, ininiá háuikari takaótxikari kamaekatinii híte Teoso apakapinií íkapani. Txamari na atáo. Kristonoka kamaerekatari kákiti Teoso apakapini íkapani. Erepaniko, pinirekiniári takaótxikari, !pinirekaikari Kristo. ³ Iuaíkana nota ótáikikai híte. Háuiritiniári takaótxikari takiko hítoá Xoteo atoko, ininiá Moisesi paniátakiti ipixini híkamapeka. Ikara atoko hininiá, ikinika ipaniátakiti híkamako. ⁴ Átikaka híte nirekari Moisesi paniátakiti híkamini Teoso kamaekatinii íkapani. Txamari ikara atoko hinirekiniá, hítakanapari Kristo. Ininiákara Teoso !iposotari ikinipoko erekari isikinii. ⁵ Atepekana, ate auikari Xesosinoka txíkitakiniri kákiti ereka inini íkapani, Teoso apakapini íkapani. Ikamaerekataua Erekarí Matamatakoti posotiireé, kotxi aúikari Xesosi sáikire. ⁶ Takaótxikari hítoá auiniá, iua takaótxikari !ikamaerekatai híte. Takaótxikari hítoá mauakaniá, takaótxikari mauakani !ikamaerekatai apaka. Kristo Xesosi nakitiakori aniniáua, Teosora kamaerekataua, kotxi aúikari Xesosi sáikire, ininiá atiretari iua.

⁷ Merepanika híte auikapitikari Xesosi sáikire. Kipa xipokatarí atáo inakari Teoso sáikire háuikini? Natokopa itxa Teoso sáikire atáo inakari hítakanapini? ⁸ Híte akiritakari itxaua Teoso. Kona iuani xipokari háuikiniri atáo inakari isáikire. ⁹ Kákiti sáikire txari: “Páo átikaákari axapitiri ipani, iuaritika iátikakakiti itori ipe.” Iua atokokana átika maerekati kamakari xika kaiáopokori kákiti kamari maerekati. ¹⁰ Teoso kamaimaroretano nota híte takanapiniri híkerokakiti, atáo inakari híkamini íkapani. Híte nitariakori hítxaua, kotxi Apiananiri nakitiakori atxaua, ininiárako nimarotari nota ótáikikinii iaóka híkamapanikako. !Nimarotari iua kiki himisirienetakiri. Ia nimarota. Teoso misiritapanikariko iua.

¹¹ Apanakini sápirenátari: “Paoro paniátari Xoteo minakaniua takiniri takaótxikari hítoána.” Na atáo ninoa sáikire. Nipaniátaákkamariko takaótxikari takiko, nimisiritiko ! auamako. Kona nipaniátari Xoteo minakaniua takiniri takaótxikari hítoána. Ikara xika nimisiritaáka. Nisápiretari ia: Kristo aamina ípiriámitakari nopini ipípe amaerekani imakatzakini íkapani. Kristonoka kamaerekataua Teoso apakapiniua íkapani. Ikara noerekakiti xika nimisiritaáka. ¹² Ninoa kamisirienererini nirekiniári itsiki mata

kisauakiko, erekari itsikipati tsotatiko apaka. Nomanākarauata, ninoa misirienetini xika.

¹³ Nitariakori, Teoso akiritai hīte iua nakitiakori hininiua ikapani, ininiākara uatxa hīposotari hīteka nireēkiti hīkamini. Iuaritika !hīkamapiri maerekati hīto nireēkiti. Ia hīkamako: Hītiretakakauako ātipirika. Ikara atoko hininiā, himoianatakakauako.

¹⁴ Teoso paniātakiti txari: “Pitiretana apanakini piteka pitiretiniua atokokana.” Ikara paniāretxi pikaminiā, pikamapekari ikinika Moisesi paniātakiti. ¹⁵ Kaxipiri itopa auakani atoko !hītxape. Ninoa karotakakaua, okakakaua itxana. Erepaniko. Kaxipiri itopa auakani atoko hininiā, hīxipokakauako.

Aīto Nireēkiti

¹⁶ Nōtākikare ia atoko itxapaniko: Hāuiritariko Erekar Matamatakoti oerekinii iua kimapore ikiniōtika. Iua hīkimapore oereēkari ininiāua, !hīkamapiri maerekati hīto nireēkiti. ¹⁷ Aīto !nirekari Erekar Matamatakoti nireēkiti. Iuatxikana Erekar Matamatakoti !nirekari hīto nireēkiti. Erekar Matamatakoti mokaiakari itxaua aīto. Ininiā aākixinire nireēkiti !aposota akamini aīto nireēkiti xika. ¹⁸ Iua Erekar Matamatakoti oerekiniāi pikimapore ikiniōtika, pikaminiāri iua nireēkiti, ininiā Xoteo kiomanearorini paniātakiti !oerekaikari pikimapore.

¹⁹ Aimarotapitikari kākiti ito nireēkiti. Inirekari itaniritxi minakotikatika osirīkini, itanorotxi minakotokatika isirīkini, mitxitakari ātokata isirīkini. Kākiti ito nirekari kākiti xinikaxititini maerekati ito nireēkiti. Kākiti ito nirekari āti kākiti ito, maerekati ikaminina ikapani. ²⁰ Kākiti ito nirekari teoso kākiti kamakiti iteosone ikapani. Kākiti ito nirekari maerekani matamatakoni paniātakiti ikamini. Kākiti ito nirekari omanākaretxi, neenamati, xikoretxi, norikaretxi, iuikaretxi. Kākiti ito nirekari kākiti omanatiniri apanakini. ²¹ Kākiti ito nirekari āti kākiti tii. Inirekari okanitxi, poātakatxi, maerekati kiiniriti ikamini. Ikara atoko inakari maerekati kākiti ito nireēkiti. Uatxa nipinitai hīte, mitxi nipinitini atokotxikana. Ikara maerekati kamakani !auapani Teoso auītetxi ininiātaāua.

Erekar Matamatakoti Nireēkiti

²² Iua Erekar Matamatakoti aākixinireē auiniā, !ikara atokoni itxa akamakiti. Iua Erekar Matamatakoti aākixinireē auiniā, atiraōkiuata. Apoxokoniua. Erekaixinireua. !Katimari aomanākarauatini. Aamonīkarauata. Ereka. Akamaenetakiti akamapitika. ²³ Ate !iuikaua. !Akamari maerekati aīto nireēkiti. Ikara atoko atxa, Erekar Matamatakoti aākixinireē auiniāua. Ikara atoko aniniā, amisiritiko !auari. ²⁴ Kristo nakitiakori aniniāua, !anirekaikari akaminiri maerekati aīto potxitakiti, aīto nireēkiti. Amanirekakiniti aōkini atokokana, aōkapekari maerekati aīto nireēkiti. ²⁵ Erekar Matamatakoti txikitakari axinire auāki inini, ininiākara makamari ikinipoko iua nireēkiti ikiniōtika. ²⁶ !Apakata aāuikiniua. !Apakata aneenamauatini. !Apakata axikotakakiniua.

6

Himoianatakakiniua

¹ Nitariakori, hīte Erekar Matamatakoti nireēkiti kamakanii, himarotakasaakiri aītari kaminiri maerekati, hōtākikariko iua imaerekani itakanapini ikapani. Hōtākikariko hītiraōkiritika. Iuasaaki erepaniko, kotxi atxiīti hīte apaka nirekari iua maerekani atokotxikana hīkamini. ² Himoianatakakauako hītapara poiāonoka inakasaaki. Ikara atoko hininiā, hīkamari Kristo paniātakiti apanakini hītiretini. ³ !Erekar ate iuikiniua. Kākiti minakati: “Apiari nota,” inakari, iuanika misirienetaua. ⁴ Erekar nataerekatiniri notaka kamakiti. Erekar atxiīti? Nikamakiti ereka ininiā, nipoxokoniua. !Apakata nākixinireē nixinikiniri: “Iua āti kamakiti apiaerekata. Nota kamakiti poiāo erekari.” !Apakata ikara atoko ninini. ⁵ Ikininape kākiti aua iparīka kasāpaniri. Iuanoka posotari ikaminiri.

⁶ Teoso sākire oereēkari oerekiniāi pite Teoso sākire, iuasaaki minakati auiniāi pisikari iuamoni. Nipokori atxiīti, txineiro atxiīti, pisika iuamoni, kotxi iua kikiote !auari. ⁷ Piteka !pimisirienetapeuako, kotxi !piposotari Teoso pimisirienetini. Teoso misirienetakari !auari. Pikikioteē mitxi pitakakiti iaōka papakapa. Iua atokokana pikamakiti ereka

inini, papakapari erekari. Pikamakiti maerekati inini, papakapari maerekati. ⁸ Piïto nireëkiti pikaminiã, papakapari piïto siãkitinoka. Piïto sikai ipïkitxinoka. Teoso misiritapitikai. Erekar Matamatakoti nireëkiti pikaminiã, papakapari iua siãkiti. Iua siãkiti Teosokata ätipirika pauini ïkapani. ⁹ !Apakata asãpakini erekari ikiniõtika akamini. Makamari erekari ikiniõtika, maiotokakanikaua anini. Erekar akamini amaiotokakaniã, erekari Teoso sikakiti aãpakapini apokapitikako. ¹⁰ Ininiã aposotakasaakiri, makamari erekari ikininapemoni. Merepanika makamari erekari aïtariakorimoni Xesosi säkire auiãkanimoni.

Imapotökire Ötãkikaretxi

¹¹ Hätamatariko ia niökatsopare mitari. Ia iökatsopari imapotökire nota niuakoã niökatsopatakiti. ¹² Apanakini hïte sauaki nirekari ninoaka apokaerekatiko, ininiã isãpiretari kãkiti potxitakitinoka. Ninoakara paniãtai hïtakiniri takaötxikari hïtoã. Kininiãpa ninoa nirekatari takaötxikari hïtakini? Ninoa misiritiko monökoni xika, ninoa paniãtari Xoteo minakanuia takiniri takaötxikari iïtoãna, ininiã Xoteoakori potxitari ninoa oereëkiti säkiretxiti. Inirekarina Xoteoakori apokaerekatinina ninoa. Txamari Kristonoka kamaerekatari kãkiti, kotxi ipïpe aamina ïpiriãmitakari nopini kãkiti maerekani imaktxakini ïkapani. ¹³ Ninoa kamisirienererini kamari Moisesi paniãtakiti takaötxikari itakinina iïtoãna. Txamari ikinika Moisesi paniãtakiti !ikamana. Ninoa nirekari hïte takiniri takaötxikari hïtoã, ininiã eereka ninoa iuikaua, kotxi hïte kamari ninoa paniãtakiti. ¹⁴ Kona ninirekari niuikiniua. Teoso !inirekari niuikiniua. Nota iuikari aãuïte Xesosi Kristo. Iuanokara niuika, kotxi iua ipina aamina ïpiriãmitakari nopini ate ïkapani. Ininiã nota !ninarekaikari Xesosi säkire mauïäkani nireëkiti. Iuatxikana ninoa !inirekari nota nireëkiti. ¹⁵ Takaötxikari hïtoã auiniã, iua takaötxikari !ikamaerekatai hïte. Takaötxikari hïtoã mauakaniã, takaötxikari mauakani !ikamaerekatai. Teoso txïkitakiniãi iua anaakori hininiãua, iusaaki ikamaerekatai hïte. Ininiãkara häkixinire amaneri itxaua. Ininiã mitxi hinireëkiti !hinirekaika. ¹⁶ Teoso kamaerekaxiniretai hïte, ikara säkiretxiti häuikasaaki. Iua amonïkai hïte. Ikara atoko Teoso kamari kãkiti iua nakitiakori ininiuana, atão Isaeo mekaniriakori ininiuana.

¹⁷ Ixipope ia iökatsopari. Nipinitana nota kamamaxiretakani. !Hïkamamaxiretapeno, kotxi nimisiritaãkapeka. Nikaro mata auapeka niïtoã. Auïtetxi nitiri amotakori karo mata atoko itxa nikaro mata, kotxi Apiananiri Xesosi nitiri nitxaua.

¹⁸ Nitariakori, aãuïte Xesosi Kristo sikari ikinipoko erekari hïte äkixiniremoni. Ameë.

ÉPESO

Paoro Iokanatsopatakiti Épeso Auakanimoni

¹ Nota, Paoro. Niökatsopataria aãtsopa. Teoso nirekano Xesosi Kristo iokanatakiti nininiua. Ininiã niokanatsopata Teoso nakitiakorimoni Épeso sitatxiti auakanimoni. Kristo Xesosi sãkire auiãkanimoni, ipaniãtakiti kamakanimoni niokanatsopata. ² Aïri Teoso, Apiananiri Xesosi Kristo pakini sikari ikinipoko erekari hitemoni. Ninoa kamarekaxiniretai hite.

Teoso Mereëua Itixi Kamiko Apisapanika

³ Masãpiretari Teoso, aãuïte Xesosi Kristo iri: “Erekapitikai,” kotxi itakapekari ikinika erekari ate ãkixiniremoni, kotxi Kristo nakitiakori atxaua. Ikara erekari isikakiti Teoso tixinekiri. ⁴ Itakari ikara erekari ate ãkixiniremoni, kotxi itixi kamiko apisapanika Teoso mereëpekaua Kristo nakitiakori aniniua. Imereëua Teoso nireëkitinoka akamini ïkapani, maerekati amakamakani ïkapani, atiraõkiuatini ïkapani. ⁵ Itixi kamiko apisapanika, Teoso mereëua iua anaakori aniniua ïkapani. Xesosi Kristo ipïpe ate ïkapani, ininiã iua txïkitakaua Teoso anaakori aniniua. Teoso txïkitakaua iua anaakori aniniua, kotxi iua potxitari ikara atoko ikamini. Inirekari ikara atoko ikamini. Erekari ipotxitakiti ikamini tïkane.

⁶ Teoso txïkitakaua iua anaakori aniniua, kotxi inirekari asãpiretiniri: “Peerekari ikinipoko erekari pisikakiti kãkitimoni.” Teoso sikaua ikara erekari, kotxi iua tirketakiti nakitiakori atxaua.

⁷ Xesosi ïkitxitari amaerekani, kotxi iarëka xiketa ate ïkapani, ininiã Teoso maxinïkaretari amaerekani. Uatxa !imisiritaikaua amaerekani xika. Teoso kamari ikara ate ïkapani, kotxi ikinipoko erekari isika atemoni. !Ixipoka ikara erekari Teoso sikakiti. Ikinipoko erekari aua iuamoni. ⁸ Kãkiti kona posotari iaõtiniri erekari Teoso sikakiti ate maerekati kamakanimoni. !Kaiãotikori. Ikinipoko imaroretxi aua iuamoni. Atão inakarinnoka imarota ikamini, ininiã ikara erekari ikaminiãua. ⁹ Mitxi !aimarotari Teoso inireëkiti ikamini tïkane. Uatxa ikamaimarorettaua. Ipotxitari oerekiniua inireëkiti. Peerekari iua potxitakiti. ãkixinireë ixinikari ikara ikamini. ¹⁰ Teoso ketotini õti manapi, ikinipoko iposope inakasaaki, iua apotiitariko ikinimane itixine auakani, itixiã auakani pakini.

¹¹ Xesosi Kristo nakitiakori atxaua, ininiã aãpakapari ate ïkapani inïkatakiti. Itixi kamiko apisapanika ixinikari ikamakiti ate ïkapani. Ikamari ikinika inirekakiti iaõka.

¹² Iua mereëua ate, merepitipanika Kristo sãkire auiãkaniua, ikinimane asãpiretini ïkapani: “Peerekari Teoso. Erekapitikari ikamakiti.”

¹³ Hitepekana auikari Xesosi sãkire, atão inakari hïkenakotakasaaki. Ikara atão inakari Teoso iokanapirena erekari itxaua, kotxi iua iokanapirena oerekai himaerekani makatxakiko. Xesosi sãkire hãuikasaaki, Erekari Matamatakoti apoka hãkixinireë. Iua Teoso takaõtxikare itxaua. Iua oerekai hite Teoso nakitiakori hininiua. Xesosi sikaenetapekari Erekari Matamatakoti atemoni iokanatini. ¹⁴ Isikaenetakiti Erekari Matamatakoti atemoni auape, ininiã aimarotapitikari aãpakapiniri ikinika isikaenetakiti, inïkatakiti ate ïkapani. Iuasaaki Xesosi apakapaua ate iua nakitiakori, iua iamotakini, kotxi imaktxakapekari amaerekani. Ikara atoko ininiã, ikinimane kãkiti txari iua: “Peerekai pite. Erekapitikari ikinipoko pikamakiti.”

Paoro Misãkiretiniri Teoso

¹⁵ Ikara atoko ininiã, nota kenakopiretakasaakiri Apiananiri Xesosi sãkire hãuikini, ikinimane Teoso nakitiakori hïtoretini nikenakopiretakasaaki, ¹⁶ nimisãkiretapikari Teoso hite ïkapani. Nitxari iua: “Erekapitikai, kotxi pite makatxakari ninoa Épeso sitatxiti auakani maerekani,” nitxa. ¹⁷ Teoso, aãuïte Xesosi Kristo Teosone itxaua. Xesosi iri itxaua. Kaiotximereri iua Teoso. Nimisãkiretari Teoso hite ïkapani ia atoko: “Pisikaimaroretana ninoa ãkixinire. Ninirekari Erekari Matamatakoti oerekinina pite

iteene imarotininina ïkapani. ¹⁸ Piopinikariko ninoa ãkixinire atão inakari imarotininina ïkapani. Pite akiritana ninoa ikinipoko erekari apakapininina ïkapani. Ikara poerekana ninoa imarotininirina ïkapani, iãtapininirina ïkapani. Pikamaimaroretana ninoa pite nïkatakiti pite nakitiakori ïkapani. Ikara pinïkatakiti, pisikaenetakiti, peerekari. Itori pinïkatakiti. !Ixipoka pinïkatakiti. !Kaiãotikori pinïkatakiti pinakitiakori ïkapani. ¹⁹ Pikamaimaroretana ninoa kaposotiire pinini. Ininiã piposotari iteene pisikaposotiire-tiniua ate pisãkire auiaãkani. Ikara piposotiire !auari ãtimoni. Pataparari pite posotiire.” Ia atoko nimisãkiretari Teoso hïte ïkapani.

²⁰ Ikara Teoso posotiire õkitikari Kristo ipïkani sauaki auakasaaki. Iposo atoko iposotiireẽ itakari Kristo apiari topãkiniãtaã, ikikomoni itixineẽ. ²¹ Ininiã Kristo Apiananiri itxaua. Iua posotiire apiata. Maerekani matamatakoni auïteakori posotiire poiãoka. ïkorapokoriti auïtetxiakori posotiire poiãoka. Kristo posotiire apiata. ïkorasaaki Kristo Apiananiri. Apaka katana Kristo atoko inakari !auari. !Auari ãti kaposotiireri Kristo atoko. Kristo apiata. ²² Teoso txïkitakari Kristo ikinimane auïte ininiua. Itakari ikini-mane imokaiakariakori ikiti patapi, ininiã Xesosi paniãtakitinoka ikamana. Imokaiakari !auaika. Ininiã ikinipoko Teoso kamakiti auïte itxaua Kristo. Teoso sikari iua isãkire auiaãkani auïte ininiua. Inakitiakori kii atoko itxa Xesosi. ²³ Iua ïto atoko itxa inakitiakori, ininiã ikinimane inakitiakori sauaki iua aua. Itxïkitakari ikinipoko atão inini.

2

Mitxi Ipïkani Atoko Atxaua

¹ Hïtepekana, Xesosi txïkitapekari hïxinire auãki inini. Mitxi, isãkire hãuikini apisapanika, ipïkani atoko itxa hãkixinire, Teoso manirekakinini hïkamini xika, himaerekani xika. ² Iuasaaki hïte kamari ikini sereti maerekati, ïkorapokoriti auakani maerekani atokokana. Iuasaaki hïkïpitari Satanasi sãkire, maerekani matamatakoni auïte sãkire. Iua, initiriakorikata aua ïtima auiniãtaã. Iua parïkauata Teoso sãkire makïpitakani xinire ãki. ³ Mitxipeka amakinika ate Teoso sãkire makïpitakani atxaua, kotxi akamari maerekati aïto paniãtakiti. Iuasaaki akamari maerekati aïto nireẽkiti. Akamari maerekati axinikakiti iaõka iuasaaki. Ikinimane itixi auakani atoko, ate, apanakini apaka maerekati kamakani atxaua iuasaaki, ininiã Teoso omanãkarauata amaerekani xika. Iposope amisiritiko.

⁴ Iuaritika Teoso iteene amonïkaua. Kaamonïkareri Teoso atoko inakari !auari. Iua iteene tiretaua. Ate maerekati kamakani atxaua, iuaritika itiretaua. ⁵ Ipïkani atoko anakasaaki, maerekatinoka akamakasaaki, iuasaaki itxïkitakaua auãki anini, Kristo auãki inïkitakini atoko. Iuasaaki imakatzakari amaerekani, kotxi inirekari ikinipoko erekari isikiniua. ⁶ Ininiã Teoso õkitikaua ipïkani sauaki aãuakasaaki, Kristo õkitikini atokokana. Ininiã itixineẽ Teoso takaua ate aïtopãkini Kristo Xesosikata, kotxi iua nakitiakori atxaua. ⁷ Ininiã katanarako ãtipirika inirekari oerekiniri ikinipoko erekari atemoni. Erekari isikakiti !ixipoka. !Kamapotõkireri. Kona erekaua, iuaritika iteene itiretaua, kotxi Xesosi Kristo nakitiakori atxaua. ⁸ Atemoni erekari isikakitinokara makatzakari amaerekani, isãkire aãuikasaaki. Ininiã !aposota ateka maerekani amakatzakini, kotxi maerekati kamakani atxaua. Teoso sikakitinokara makatzakari amaerekani. ⁹ Akamakiti erekari !iposotari amaerekani imakatzakini. Ininiã kãkiti iuikiniua !auari. Teosonokara posotari imakatzakiniri kãkiti maerekani. ¹⁰ Peerekari Teoso parïka aãkixinireẽ, kotxi ikamaua ate ereka anini. Ininiã Xesosi Kristo nakitiakori atxaua. Ikara iparïka amaneri. Ikamaua ate amaneri anini, erekari akamini ïkapani. Ikara ikamini apisapanika Teoso xinikari ikara. Iuasaaki inirekari erekarinoka akamini.

Kristo Nakitiakori ãtika Nirimanetxi

¹¹ Xoteo minakanuia hïtxaua, kotxi ikara atoko hïponaniã. Teoso takaõtxikare auãitotakini takauãkatai hïte: “Teoso takaõtxikare mauãitotakini.” Xoteoakori auari ikara Teoso takaõtxikare, kotxi ikisauakarina amarini tsiki mata axapiti. Ikara oerekari Teoso nakitiakori ininiuana. ¹² Hïxinikariko mitxi, Kristo sãkire hãuikini apisa, Kristo !auari hïtemoni. Iuasaaki maparakini atoko hïtxaua. Isaeokini !hïtxaua. ãtião hïtxaua.

Ikara xika kona hīte posotari hāpakapiniri Teoso sikaenetakiti iusaaki. Iusaaki ! himarotari Xesosi makatxakiniri himaerekani. Iusaaki !himarotari Teoso.

¹³ Uatxa Kristo Xesosi apakapapekai hīte. Mitxi itakoxiti auakani atoko hītxaua, iuaritika uatxa iua minai hīte Teosomoni, kotxi Kristo arēka xiketa hīte ikapani.

¹⁴ Iuanokara kamaerekaxiniretaua, ininiā ixipokari Xoteo, Xoteo minakaniua pakini omanatakakiniua. Ikara omanākaretxi paretxi atoko itxa. !Auiritari Xoteo sini Xoteo minakonimoni. Uatxa ātika nirimanetxi atxaua. ¹⁵ Kristo ipīkasaaki, ixipokari ikara omanākaretxi, kotxi iusaaki ikamari ikinika paniātakori iōkatsopatakori ikinimane ikapani. Ikara Xoteoakorimoni sikakori. !Isikaāka Xoteo minakonimoni. Ininiā Kristo ipīkasaaki, itxīkitakana Xoteoakori, Xoteo minakaniua pakini ātika kākiti amaneri atoko inini. Neenamatz! lauauka, kotxi Kristo kamaerekaxiniretaua amakinika. ¹⁶ Ipina aamina ipiriāmitakari nopini, ininiā iusaaki iuaīkana iminana Xoteoakori, Xoteo minakaniua pakini Teosomoni. Ātika nirimanetxi atoko iminana Teosomoni. Iusaaki ixipokari Xoteoakori, Xoteo minakaniua omanatakakiniua. ¹⁷ Xesosi apoka ikorapokoriti Teoso iokanapirena erekari isāpiretiniri kākiti. Isāpiretari kākiti, Teoso omanatiniri kākiti imaerekani xika xipope, Xesosi sākire auikasaakina. Isāpiretai hīte Xoteo minakaniua. Apaka isāpiretari Xoteoakori. Mitxi otakoxiti auakani atoko hītxaua, kotxi iusaaki !himarotari Teoso sākire. Mitxi Xoteoakori imarotari Teoso sākire, ininiā Teoso takote auakani atoko itxauana. ¹⁸ Erekari Matamatakoti ātinoka aua. Kristo sākire aāuikasaaki, iua Erekari Matamatakoti anikaua aīri Teosomoni. Anikari Xoteoakori, Xoteo minakaniua pakini iuamoni.

Teoso Aapoko Atxaua

¹⁹ Uatxa Teoso mimarotakani !hītxaikaua. Uatxa āti uāka !hītxaikaua. Teoso tixine auakani hītxaua, apanakini Teoso sākire auīākanikata. Iua aapoko auakani hītxaua.

²⁰ Teoso aapoko atoko atxaua. Aapokotxi kamaāka kaikori nopini imirikakani ikapani. Xesosi moianariakori tosi pakini, iua iokanatakini kākitimoni, ninoa sāpiretakiti iua kaikori atoko itxa. Kitxakapirīka Teoso sākire sāpiretakani sāpiretakiti apaka iua kaikori atoko itxa. Aapokotxi aua ātika kai mitari, apanakini kai soro maīkakari. Xesosi Kristo iua kai mitari atoko itxa. ²¹ Ininiā iua maīkaua. Iuakata aāua, ininiā kākiti itoāpotari auikiniri Xesosi sākire. Apiananiri aapoko aneeāpotini atoko itxa. Iua Apiananiri aapoko atoko atxa. Imisākiretiko aikoti atoko atxa. ²² Ininiā iua apotiitai hīte hīkinika iua aapoko hininiua ikapani, kotxi Teoso auiniātaā hītxaua. Erekari Matamatakoti auiniātaā hītxaua apaka.

3

Paoro Sāpiretari Teoso Sākire Xoteo Minakonimoni

¹ Ikara atoko ininiā, nota Paoro kateia āki naua, hīte Xoteo minakaniua Xesosi Kristo sākire nisāpiretini xika. Kateia āki naua, kotxi nauikari Xesosi sākire.

² Hīkenakopiretpekari parīkatxi Teoso sikakiti notamoni, isākire Xoteo minakaniua nisāpiretini ikapani. Ikinipoko erekari isika notamoni, hīte nisāpiretini ikapani. ³ Teoso oerekapekano kākiti mitxi mimarotakiniti. Mitxi axapitiki ikara Teoso oerekakiti niōkatsopatapeka hītemoni. ⁴ Uatxa ia hātatsopatakasaaki, hīposotari himarotiniri nimarotakiti, kākiti mitxi mimarotakiniti, Kristo parīka kākiti ikapani. ⁵ Kitxakapirīka kākiti kona imarotari ikara Kristo parīka kākiti ikapani. Uatxa Erekari Matamatakoti oerekari ikara Xesosi iokanatakinimoni. Apaka oerekari ikara Teoso sākire sāpiretanimoni. Teoso parīkanoka ikamana ninoa. ⁶ Nisāpiretai hīte kākiti mitxi mimarotakiniti. Xoteo minakaniua apakapariko Teoso nīkatakiti itixineē, Xoteoakori apakapiniri atokotxikana. Xoteo minakaniua, Xoteoakorikata Kristo ito atoko itxauana. Xoteo minakaniua apakapariko Teoso sikaenetakiti, Xoteoakori apakapiniri atokotxikana. Teoso iokanapirena erekari sāpiretari kākiti isikaenetakiti, kotxi isikari Kristo, Xoteoakori maerekani, Xoteo minakaniua maerekani apaka imakatxakini ikapani. Ikara kākiti mitxi mimarotakiniti.

⁷ Teoso iokanatanano nota kākitimoni iua iokanapirena erekari nisāpiretini ikapani. Ikara parīkatxi isikano, kotxi ikinipoko erekari Teoso sikano nota iposotiireē. ⁸ Itomaneri

Teoso nakitiakori poiãorini, iuaritika nota poiãori nininiua atoko inakari lauari. Iuaritika Teoso sikano ikinipoko erekari, kotxi iokanatano Xoteo minakonimoni erekari Kristo auakiti nisãpiretinina ïkapani. Ikara erekari !ixipoka. Itori. !Kimarotikori ikinipoko erekari Kristo auakiti. ⁹ Apaka Teoso nirekari noerekiniri ikinimane, ikara mitxi imimarotakiniti, Teoso nakitiakori tiretakakiniua. Itixi kamikosaaki, Teoso kipatari ikara kãkiti mimarotakiniti. Ikipatiniritika uatxa ikara noerekari ikinimane. Teoso kamakasaakiri itixi, Xesosi Kristokata ikamari ikinipoko. Mitxi kona xatiki !auari. ¹⁰ Uatxa Teoso nirekari imereëkini oerekiniri ikinipoko Teoso imarore auïtetxiakori matamatakonimoni, Teoso tixine auakanimoni. ¹¹ Itixi kamiko apisapanika, ãtipirika Teoso nirekari aãuïte Kristo Xesosi kaminiri ikinika inirekakiti kãkiti ïkapani. ¹² Kristo kamakiti ate ïkapani aãuïkiniã, aposotapitikari aãpokini Teosomoni, ininiã !kapikareua Teosomoni aãpokini. Ataparaxinireritika asari iuamoni. ¹³ Ininiãkara nõtãkikai hïte. ! Himatinaniuatape nimisiritiko xika. Nimisiritaãka hïte ïkapani, Xesosi sãkire hãuikini ïkapani, ininiã hïuikariko nimisiritiko. Teoso auritari nimisiritiko, kotxi iua iteene tiretai hïte.

Iuaïkana Paoro Misãkiretiniri Teoso

¹⁴ Teoso nirekakiti kãkiti ïkapani nixinkasaaki, nikapotoreëkaua aãuïte Xesosi Kristo iri apisatoõ, nimisãkiretiniri ïkapani. ¹⁵ Ikinimane Teoso nakitiakori, itixine auakani, apaka ikinimane ïkorapokoriti auakani apakapari iua uãka. ¹⁶ Ia atoko nimisãkiretari Teoso hïte ïkapani: “Peerekai pite. Ikinipoko erekari aua pitemoni. !ixipoka ikara erekari. Ininiãkara, pisikaposotiiretana Épeso auakani ãkixinire. Ninirekari Erekar Matamatakoti iteene sikataparatinina ninoa ãkixinire. ¹⁷ Ninirekari iteene auikininina Kristo sãkire, ininiã Kristo auapika ãkixinireëna. Ninirekari ninoa iteene imarotini pite tiraõki. Takari kotsa kipatxi erekari ãki auini atokokana, ninirekari ninoa kaikotini pitekata pitiraõki sikataparatinina ïkapani. Imarotiniãrina pitiraõki, !irikana. ! Ikamarina maerekati. ¹⁸ Ninirekari ninoa, pinakitiakori, apanakini pinakitiakori pakini, imarotini Kristo tiraõki kãkiti ïkapani, kotxi Kristo tiraõki !ixipoka. !Kaiãotikori iua tiraõki. ¹⁹ Kãkiti kona posotari imarotini ikinika Kristo tiraõki. Ninirekari ninoa Épeso auakani apakapiniri ikini sereti erekari pisikakiti ãkixinireëna, pite atão imarotini ïkapani.” Ikara atoko nimisãkiretari Teoso hïte ïkapani.

²⁰ Ininiã uatxa maxinikariko iua. Kaposotiireri apiatakari itxaua. Ikinipoko iposota ikamini. Imaposotakiniti !auari, ininiã ikinika aamanaãkiti, ikinika axinikakiti pakini, iposota ikamini. Ari, apikomoni iposota ikamini ate ïkapani. Axinikakiti, aamanaãkiti poiãoka. Apiata iposotiire. Iua posotiire parïkauata aãkixinireë. ²¹ Ininiã Teoso mereëkini kitxakapirïka auakani, uatxa auakani, katana auakani pakini ãtipirika txariko Teoso: “Peerekai pite. Apiananiri pitxaua.” Ikara atoko itxana, kotxi Xesosi Kristo makatxakari amaerekani Teoso anaakori aniniua ïkapani. Ameë.

4

Xesosi Auiãkani Ætika Iïto Atoko Itxauana

¹ Kateia ãki naua, kotxi nauikari Apiananiri sãkire. Ininiã nota iteene õtãkikai hïte ikiniõtika atão hïkamini, kotxi Teoso akiritai hïte iua anaakori hininiua ïkapani. Ikara atoko hininiã, iua kamakiti atokokana hïkamako. ² Ininiãkara !hïuikapeua. ! Hinirekapiri hinirekakitinoka hïkamini. Hãuiritariko ãti kaminiri iua nirekakiti. Katima homanãkarauataka !hïtxapeko. Himïteenekakakauako hïkerokasaakiri hïkamakiti. Hïtoretakakauako. ³ Erekar Matamatakoti txïkitakari axinikakiti, anireëkiti pakini ãtinoka inini, kotxi iua kamaerekaxiniretaua. Ininiãkara hïparïkauatako ikara atoko auini ïkapani. ⁴ Xesosi ïto atoko atxaua. Ætika iïto, ininiã ïtotxi ãtika atoko atxaua. Erekar Matamatakoti ãtinoka aua. Teoso akiritakasaakii inakitiakori hininiua, hiãtapariko hãpokini iua tixine iuakata hãuini ïkapani. Ininiã ãtinoka hiãtapakiti. ⁵ Ætinokara Apiananiri aua. Ætinokara aãuiãkiti sãkiretxiti aua. Ætinokara apatxisatiko. ⁶ Ætika Teoso

aua. Iua ikinimane iri ātika aua. Iua ikinimane apisatoō apiatakari itxaua. Ikini itixiti iua aua. Amakinika aākixinireē iua aua.

Teoso Sikakiti Atemoni

⁷ Kristo sikapekari iposotiire ate amakinimoni iparīka akamini ĩkapani. Iposotiire isikaua aparīka akamini ĩkapani. Aparīka pamimari, ininiā apiata isika iposotiire atemoni. ⁸ Kotxi Teoso sākire kitxakapirīka txari:

Ikanīkasaaki itixinemoni, imikanapiriāna kākiti mitxi imokaiakari maīkakini. Iuasaaki isikari erekari kākitemoni.

⁹ Iua kanīka, kotxi mitxipe iua katxaka itixi patapixiti ipīkani auiniātaā. ¹⁰ Iua itixi patapixiti katxakakari, iuatxikana kanīka iaxiti apiko nopinixiti, ininiā uatxa iua aua ikini itixiti, iaxiti, Teoso tixine pakini. !Auari iua mauakaniātaā.

¹¹ Iposotiire isikasaaki isākire auīākanimoni, isikari ia atoko parīkauatakani ininiuana ĩkapani: Kristo iokanatakini kākitemoni, Teoso sākire sāpiretakani, Teoso iokanapirena erekari sāpiretakani, Teoso nakitiakori ōtākikakani, Teoso sākire oerekakani pakini isikaua. ¹² Ikara atoko isikaua, kotxi inirekari ninoa oerekiniua inakitiakori iparīka atāo akamini ĩkapani. Ikara atoko isikaua, kotxi ninoa sikataparaxiniretaua. ¹³ Ninoa sikataparaxiniretiniritika ātika aāuiākiti auako. Ipinimoni inakari aāuiākiti !auaika, kotxi atāo aimarotariko Teoso ākiri sākire. Ininiā kiīkiteua, kimaroreua iuasaaki. Kristo atoko atxauako, kotxi paimatireri iua.

¹⁴ Ininiā iuasaaki amarini atoko !atxaikaua, kotxi amarini !imarotari atāo inakari. Tsakati anikakiti atoko, ĩtima anikakiti atoko itxana kākiti kamisirienereri sākire auīākani. !Imarotarina atāo Teoso sākire. Ninoa kamisirienereri xinikaxitita atāo minakati oerekini ĩkapani. ¹⁵ Atāo inakaranoka asāpiretako kākiti atiraōkiritika. Ikara atoko akaminiā, aimarore aneeāpota. Kristo sākire iteene aāuikaāpota. Erekari akamakiti aneeāpota. Ininiā Kristo atoko atxaua, kotxi iua ĩto atokotxikana atxaua. Ate kii atoko itxaua Kristo. ¹⁶ ĩtotxi kamari ikii paniātakiti. Iua atokokana ate kamari Kristo paniātakiti. Ininiā aāpotiitaua. Amoianatakakaua Kristo parīka akamini ĩkapani, kotxi ĩtotxi ātika atoko atxaua. Kristo sikataparataua amoianatakakiniua. Ininiā ikinika Kristo nakitiakori atāo parīkauatiniā iua ĩkapani, apiaāpota aimarotari iua imarore atāo akamini ĩkapani. Akinika atāo aparīkauatiniā Kristo ĩkapani, ikamataparaxiniretaua. Iuasaaki atiretakakaua. Iuasaaki ĩtotxi erekari, mamianatakati atoko itxaua Kristo nakitiakori.

Aāuini Amaneri

¹⁷ Ikara atoko ininiā, ia nisāpiretai. Apiananiri imaroreē iteene nōtākikai. !Hīkamapinikariko apanakini Xoteo minakaniua kamakiti atoko. !Kiīkiteri ninoa kamakiti. !Kiīkiteri ixinikakitina. ¹⁸ !Imarotarina atāo inakari. Mapiāri atoko itxa iīkitena. Ikara atoko ininiā, !kimarorena. Teoso !itxīkitakana auapininiika ininina, kotxi ākixinireēna !inirekarina atāo inakari imarotinina. ¹⁹ Ninoa ākixinire āpatapeka, ininiā !ipētauatana maerekati ikamakasaakina. Ininiākara ninoaka sikaua Satanasimoni ĩtona nireēkitinoka ikaminina ĩkapani. Ininiā ikamarina ikinika maerekati. Itori maerekati inireka ikaminina. !Inirekarina iotokakinirina ikara maerekati ikaminina.

²⁰ Hītepekana, ikara maerekati !hōerekaāka, Kristo himarotakasaaki. ²¹ Iuasaaki hīkenakotapitikari iua sākire. Iua oerekai atāo inakari, kotxi Xesosi imarotari ikinipoko atāo inakari. ²² Hōerekaāka hītakanapiniri maerekati mitxi hīkamakiti, hīxinikakiti pakini. Himāka kitxakari hōkini atokokana hītxapaniko himaerekani hītakanapini. Hītakanapariko ikara kitxakari hinireēkiti, kotxi ikara maerekati hinireēkiti misirienetai. ²³ Ininiā eereka hamanaāriko Teoso txīkitakiniri hīxinikakiti, hinireēkiti pakini amaneri inini. ²⁴ Ininiā himāka amaneri hīretakini atokokana, amanerinoka atāo inakaranoka hīkamako, kotxi Teoso txīkitakai hīxinire amaneri inini, Teoso atoko hinini ĩkapani. Ininiā atāo inakari himarota. Erekarinoka hīkama. Teoso ĩkapaninanira hīparīkauatako.

²⁵ Ininiā aāpirena kona hīkamape hītariakorimoni. Atāo inakaranoka hīsākiretako, kotxi amakinika ate ātika ĩtotxi atoko atxaua. ²⁶ Hinaiatakasaakiua, !hāuiritapiri homanākare txīkitakinii maerekati hīkamini. Himakini apisapanika, hītokakariko

homanākarauatini. ²⁷ Ikara homanākare himatakanapakanisaaki, hāuiritari Satanasi txīkitakinii maerekati hīkamini, ininiā !hāuiritapiriko iua.

²⁸ Atxiīti hīitiriuatapeka, ininiā ! hīitiriuatapinikako. Hīparīkauatako. Erekarī parīkatxi hīuakoā hīkamako, hīparīka īki hāpakapini īkapani. Ininiā eereka aua minakati hītemoni, kākiti minakati mauinakinimoni hīsikini īkapani. ²⁹ Maerekati sākiretxiti ! hīsāpiretapiri kākiti. Erekarinoka hīsāpiretako, hīsākire kenakotakani hīsikataparaxiniretini īkapani, ikinipoko erekari Teoso sikakiti ninoa apakapini īkapani. ³⁰ Kona hīkamatinanitapiri Erekarī Matamatakoti Teoso nakiti himaerekani xika. Erekarī Matamatakoti Teoso takaōtxikare itxaua. Teoso sikapekari iua atemoni, ininiā aimarotapitikari aāpakapiniri ikinipoko Teoso sikaenetakiti Kristo uai kanapiriākasaaki. Iusaaki imakatzakaua ikinika maerekati auiniātaā. ³¹ !Hinīkatapiri homanākare hākixinireē. Katima naiataka !hītxapeko. Ātipirika apanakini homanatinini, hītakanapako. !Hītxitapiri āti. !Himisākirepiretapiri āti. Ikini sereti maerekati ikara atoko inakari hītakanapako. ³² Erekarī hīkaminakakauako. Hiamonīkakauako. Himaxinīkaretariko maerekati āti kamakiti hītemoni, maerekati ate kamakiti Teoso maxinīkaretini atokotxikana. Teoso maxinīkaretari amaerekani, kotxi Kristo ipina ate īkapani.

5

Hītiraōkiuatako Ikiniōtika

¹ Teoso anaakori itiretakini hītxaua, ininiā hīkamariko Teoso kamakiti atokotxikana. ² Hītiraōkiuatako ikiniōtika, Kristo turetiniua atokotxikana. Iuaka isikaua Teosomoni, kotxi ipina ate īkapani. Teoso apokaerekatari Kristo ipinini ate īkapani. Peerekari isikiniua Teosomoni.

³ Teoso nakitiakori hītxaua, ininiā kona ninirekari nikenakopiretiniri pītaniri minakotikatika, pītanoro minakotokatika pisirīkini. !Apakata maerekati hīito nireēkiti hīkamini. !Apakata maerekati hīito nireēkiti hīxinikini, hīsāpiretini. Ikara hīxinire txikotakari hītakanapako. Txineiro potxitakani !hītxapeuako. ⁴ !Hīsāpiretapiriko sākiretxi maerekati. Sākiretxi mīikiteti apaka !hīsāpiretape. !Hinapetapiri āti. Hīsākirauatakasaaiki, hītxariko: “Peerekari Teoso, kotxi isikaua ikinipoko erekari.” ⁵ Aimarotari ia: Ītanoro minakotokatika sirīkakari, maerekati iito nireēkiti kamakari, txineiro potxitakani pakini !iteosonetari Teoso. Teoso kamakori misākiretakani atoko itxana. Ikara atoko inakani !apakapari Teoso sikaenetakiti iua anaakorimoni, Kristo, Teoso pakini auītetxi ininiātaāua.

⁶ Kona hāuiritapiri kākiti misirienetini hīte mīikiteti sākiretxitiā. Kona !hāuikapiri ninoa sākire, kotxi ikara atoko inakari maerekati xika, Teoso misiritariko isākire makīpitakani. ⁷ Ininiā ikara atoko inakani moianariakori !hītxapeuako.

Pokamara Atoko Hītxaua

⁸ Mitxi hīte mapiāri atoko hītxa, kotxi !himarotari Apiananiri iusaaki. Uatxa hīte imarotapitikari iua, ininiā pokamara atoko hītxaua. Ininiākara erekarinoka hīkamako ikiniōtika. ⁹ Erekarī Matamatakoti auakasaaki kākiti ākixinireē, erekarinoka inireka ikamini. Atāonoka ikama. Atāo inakarinnoka isāpireta. Ikara atoko inakari Erekarī Matamatakoti sikakiti. ¹⁰ Hinitariko Apiananiri nireēkiti hīkamini īkapani. ¹¹ Ikara atoko ininiā, kona himoianatapiri kākiti maerekati kamakani, kotxi ikara parīkatxi ipiāā potorikakari. Ikara atoko inakari parīkatxi !iminari erekari atemoni. Ininiā maerekati !hīkamape. Ia hīkamako. Hōerekariko kākiti maerekati makamakani. ¹² Apētauata asāpiretiniri Teoso sākire makīpitakani kamakiti ipiāā, kotxi apia maerekati īkora. ¹³ Ikinika tirikapi kamara auiniātaā atamataāka, ¹⁴ kotxi tirikapi iopinikari ikinika. Ininiā āti txari: “Himereka, imakakani atoko inakanii. Hōkitikauako ipīkani atoko inakanii. Ininiā iusaaki Kristo iopinikariko hākixinire.”

Mīikiteti !Hītxapeua

¹⁵ Erepaniko. Atāo inakari hīkamako ikiniōtika. !Hīkamapiri mīikiteti kamakiti atoko. Hīkamariko kākiti kīikiteri kamakiti atoko. ¹⁶ Hīkamariko erekari, kotxi poiāonoka

hāuini. Hīkamariko erekari ikiniōtika, kotxi maerekati auapitika īkorasaaki. ¹⁷ Ininiā miīkiteti lhītẏapeua. Himarotariko Apiananiri nireēkiti.

¹⁸ Kona hiātapero iāriā kapoāro hīpoātini īkapani, kotxi itxīkitakai maerekati hīkamini. Hāuiritariko Erekari Matamatakoti txīkitakinii erekarinoka hīkamini. ¹⁹ Hīsāpiretakakaua xikari Teoso īkapani, xikari kitxakari, xikari īkorapokoriti auakari pakini. Hīxikaretari ikara atoko inakari xikari Teoso īkapani. Hākixinireē apaka hīxikarauata Teoso īkapani. ²⁰ Ātipirika hītẏariko aīri Teoso: “Erekapitikai pite, kotxi erekari ikinipoko pisikakiti atemoni.” Xesosi Kristo aāuīte ininiua, asāpiretari Teoso ikara atoko inakari.

Tanorotxi Pirena.

²¹ Hīpaxitakakauako, āti nirekakiti hīkamini, kotxi hīpīkariko Teoso manirekakiniti hīkamini. ²² Ininiā hīte sitoakoro hīkamariko hītaniri nireēkiti. Apiananiri nireēkiti hīkamini atokokana hīkamariko hītaniri nireēkiti, ²³ kotxi pītāniri pikii atoko itxaua. Ininiā iua piauīte itxaua. Iua atokokana Kristo inakitiakori kii atoko itxaua Kristo. Iua īto atoko atxaua. Aāuīte itxaua. Amaerekani makatxakakari itxaua. Ininiā sito kamariko oītaniri paniātakiti. ²⁴ Ininiā kākiti Kristo nakitiakori kamari Kristo nireēkiti. Iua atokotxikana sito kamariko ikinipoko oītaniri nireēkiti.

Taniritxi Pirena

²⁵ Hīte taniritxi, hītiretaroko hītanoro. Kristo tiretinina inakitiakori atokokana, hītiretaroko hītanoro. Iua iteene turetana, kotxi ipina inakitiakori īkapani. ²⁶ Iua ipina, kotxi inirekari itxīkitakinia ate iua nakitiakori aniniua. Inirekari imaktxakiniri amaerekani. Āparaā makatxakiniri aīto txiko atokokana, iua sākire makatxakari amaerekani aākixinireē auakari. ²⁷ Kristo ipina inakitiakori īkapani, kotxi inirekaua iposope anini ate apakapini īkapani. Iuasaaki peerekaua. Ātika amaerekani !auaika. Ātika akerokakiti !auaika. Ikara atoko inakari maerekati !auaika. Iuasaaki atāo Teoso nakitiakori atxaua. Erekarinoka akama iuasaaki. ²⁸ Ikara atoko ininiā, kiki tiretaroko ītanoro, iīto itiretini atokokana. Ītanoro turetakari iuaka itiretaua. ²⁹ Kākiti !omanatari iuaka īto. Isikakienatari. Itiretari. Apiananiri tiretiniri inakitiakori atokokana, kākiti turetari iuaka īto. ³⁰ Apiananiri īto atoko atxaua. Ixini atoko atxaua. Api atoko atxaua. Ikanoke atoko atxaua. Iuako atoko atxaua. Itxaāpota. ³¹ Iua īto atoko atxaua, ininiākara kiki ītanorouatakasaaki, itakanapana iri, inoro pakini ītanorokata ikaikotini īkapani. Ininiā ātinoka itotxi atoko itxauana. ³² Nisāpiretai mitxi !kimarotikori. Kristo inakitiakorikata ātika itotxi atoko itxauana. Kākiti !imarotari ikara mitxi. ³³ Ininiā pītiretaroko pītānoro piteka īto pītiretini atokokana. Pite tanorotxipekana, pipaxitariko pītāniri.

6

Amarini Pirena

¹ Hīte amariniakori, hīkīpitanako hīri, hinoro pakini sākire, kotxi ikara Apiananiri paniātakiti. Atāo pikīpitanako ninoa sākire. ² Kitxakapirīka Teoso sākire paniātaua: Hīpaxitanako hīri, hinoro pakini.

Ikara Teoso paniātakiti hīkaminiā, Teoso sikaenetakiti isika hītemoni. Mitxi Teoso paniātakiti !auari Teoso sikaenetakiti.

³ Hīri, hinoro pakini sākire hīkīpitiniā, ia isikaenetakiti apokapitikako hītemoni. Hīkīpitiniāri ninoa sākire, erekari hāuini. Hīkīpitiniāri ninoa sākire, hāuiniritika kiomātẏi hītẏauako.

Irītẏi Pirena

⁴ Hītepekana irītẏiakori, kona hītẏikitakapena hamariteakori omanākaruatini atāo minakati hīkamini xika. Hōerekanako Apiananiri nireēkiti ikaminina. Hōerekanako Apiananiri sākire imarotinina.

Nītiritxi Pirena

⁵ Hītepekana nitiritxiakori amotakoni, hīkamariko hīauīteakori īkorapokoriti auakani paniātakiti. Hīpaxitanako ninoa. Hīpīkariko ninoa manirekakiniti hīkamini. Hākixinireē

hinirekariko ninoa nireëkitinoka hīkamini. Kristo paniātakiti hīkamini atokokana, hīkamariko ninoa paniātakiti. ⁶!Hīparīkauatapeko hīparīka erekari apanakini atamatini īkapani īkapani, kotxi iuasaaki hinirekari ninoa poxokotini. Kristo nitiriakori hītxaua, ininiā hīparīkauata Teoso nireëkiti hīkamini, kotxi hākixinireē ikaranoka hinireka hīkamini. ⁷Hīkamariko hīparīka ikinika hīpoxokoniritika, hinirekiniritika. Apiananiri īkapani hīparīkauatini atokokana, hīparīkauatako hīauīte īkorapokoriti auakari īkapani. ⁸Kotxi himarotari Apiananiri sikariko parīkatxi īki kākītimoni, ikinipoko erekari ikamakiti īki. Nitiritxi iamotakoni, apaka nitiritxi miamotakoni Kristo nakitiakori apakapariko erekari ikamakitina īki.

Patrão Pirena

⁹Hītepekana patrão, ia atoko inakari hīkamako hinitiriakorimoni. !Hītxapiri hinitiriakori: “Ikinika nota paniātakiti himakamakaniā, iteene nimisiritai hīte,” kotxi hīte patrãoote aua apaka iaxiti. Iua Teoso. Teoso kamakiti poiāorimoni, iua atokotxikana ikamakiti auītetximoni.

Kākīti Xinire Tokapare

¹⁰Nitiriakori, ia nisākire mapotōkire: Katapara hītxako. Hīkosekataparatariko Apiananiri tapara, kotxi kaposotiireri iua. ¹¹Sotato ieretakari iīto tokapare, neenamatzī ikamini apisapanika. Iua atokokana Teoso sikaua axinire tokapare, ininiā maeretakariko ikinika ikara axinire tokapare, kotxi neenamatzī auapitika Satanasikata. Iua paimatireri. Ixinikaxititapekari itxīkitakiniua maerekati akamini. ¹²!Aneenamauata kākītikata. Aneenamauata maerekani matamatakoni auīteakorikata, ikinika maerekani matamatakoni kaposotiirerinikata. Aneenamauata auītetxiakorikata īkorapokoriti ipiā auakanikata. Aneenamauata ikinipoko maerekani matamatakoni iaxiti auakanikata.

¹³Ininiākara hīretakariko ikinika Teoso sikakiti hīxinire tokapare. Ininiā maerekati apokasaaki, !inokai. Kona hīrika. Kona himiteka. Hīokanatarī Satanasī isini. Hīte kāiata.

¹⁴Sotato iposope ineenamauatini atoko hītxako. Sotato takari ipakiomatare. Ipakiomatare maīkari ikinipoko iīto tokapare. Sotato pakiomatare atoko itxa hīxinire tokapare maīkiko. Atāo inakari sākiretxiti itxaua iua. Ininiā hītakariko ikara hīpakiomatare.

Sotato takari itorota koana, itorota tokapare īkapani. Sotato torota koana atoko itxa hīkamakiti atāo inakarīnoka. Ininiā hīretakariko ikara hītorota tokapare.

¹⁵Sotato kiti apaka iposope ineenamauatini, kotxi itakari ikiti mata ikiti tokapare īkapani. Sotato kiti mata atoko itxa Teoso iokanapirena erekari aanikapiretakiti kākītimoni. Ikara iokanapirena sāpiretaua Teoso !imisiritakaua, isākire aūikasaaki. Ininiā hīretakariko ikara hīkiti mata.

¹⁶Sotato maīkari itokapare, iīto imokaiakari xiripi minokakani īkapani. Xiripitxi tirinakari itokaparemoni apokasaaki, oaka. Iua tokaparetxi atoko itxa Teoso sākire auikiko. Iteene hāuikiniāri Teoso sākire Satanasī liposotari inokinii maerekatiā. Ininiā himaīkariko ikara tokaparetxi.

¹⁷Sotato takari ikii tokapare metao kamakori. Sotato kii tāta atoko itxa amaerekani makatxakiko aimarotini. Ikara imaroretxi axinikakiti akii tokapare itxaua. Ininiā hītakariko ikara hīkii tāta.

Sotato anikaro iouata mitaro. Oa iouata mitaro atoko itxa Erekari Matamatakoti sāpiretiniua Teoso sākire. Ininiā himaīkaroko oa iouata mitaro.

¹⁸Himisākiretariko Teoso ātipirika. Hamanaāriko, Erekari Matamatakoti nireëkiti iaōka hāpakapini. Araōkire hītxako. !Hītakanapapiri hīsākirauatini Teosokata. Hamanaāriko Teoso, ikinimane inakitiakori nireëkiti isikinina.

¹⁹Himisākiretari Teoso nota īkapani apaka. Hamanaāri Teoso, isākire isikinino nisākirauatakasaaki, nitaparaxinireritika nisākirauatini īkapani, kotxi ninirekari Teoso iokanapirena erekari nisāpiretiniri kākīti. Mitxi Teoso iokanapirena erekari !kimarotikorī. ²⁰Uatxa Teoso iokanatanō nota kākītimoni, iokanapirena erekari nisāpiretini īkapani. Ikara nisāpiretini xika, kateia āki naua nota uatxa. Hamanaāri Teoso, isākire nitaparaxinireritika nisāpiretini, kotxi ikara inakari niparīka.

²¹Niokanatari Txíkiko inakori hĩtemoni. Aĩtari atiretakiti iua. Apiananiri nitiri itxaua. Atão iparĩkauata Apiananiri ĩkapani. Iua sãpiretaiko hĩte nota pirena. Ikara atoko himarotariko nauini, nikamakiti pakini. Iua sãpiretai ikinipoko nota pirena. ²²Ininiã niokanatari iua hĩtemoni ate pirena himarotini ĩkapani, isikataparaxiniretinii hĩte ĩkapani. ²³Nitariakori, aĩri Teoso, Apiananiri Xesosi Kristo pakini kamaerekaxiniretai. Itiretaina hĩte. Itxĩkitakaina Teoso sãkire iteene hãuikini. ²⁴Teoso sikari ikinipoko erekari aãuĩte Xesosi Kristo ãtipirika tiretakanimoni. Ameẽ.

PIRIPOSI

Paoro Iokanatsopatakiti Piriposi Auakanimoni

¹ Nota Paoro, Tximótxio pakini, Kristo Xesosi nitiriakori iua amotakini atxaua. Niökatsopata ikini kākiti Kristo Xesosi nakitiakorimoni, Piriposi sitatxiti auakanimoni aiokanapireta. Niökatsopata hīte kōtākikarerinimoni, kotxi hīte ōtākikana Xesosi sākire auiākani. Hītepekana, kamiparīkarerini, niökatsopata hītemoni, kotxi hīte moianatana Xesosi sākire auiākani.

² Ereēkai hīte. Aīri Teoso, Xesosi Kristo Apiananiri pakini sikai ikinipoko erekari. Ninoa kamaerekaxiniretai.

Paoro Misākiretari Teoso Piriposi Auakani Īkapani

³ Hīte nixinikasaaki: “Erekapitikari aTeosone,” nitxa. ⁴ Teoso nimisākiretakasaaki hīte himakinika Īkapani, nipoxokoniritika nimisākiretari Teoso. ⁵ Nipoxokoniuata, kotxi hīte miparīkatano nota Teoso iokanapirena erekari nisāpiretini Īkapani, kotxi hīte iokanataro txineiro notamoni. Teoso iokanapirena erekari hāuikasaaki, hīpotorika himiparīkatinino. Eereka kona hīte iotokaika himiparīkatinino nota. Uatxa auapika himiparīkatinino nota. ⁶ Teoso sikari erekari hītemoni merepanika isākire hāuikasaaki, ininiā nota imarotapitikari Teoso sikari erekari hītemoni ikiniōtika. Ikara Teoso parīka hītemoni. Erekarī isikiniritika Xesosi kanapiriā ĩkorapokoriti. ⁷ Atāopitika nixinikinii hīte nipoxokoniritika, kotxi iteene nitiretai hīte himakinika. Atxiīti kateia āki naua. Atxiīti mapara naua, kākiti Teoso iokanapirena erekari atāo ininiua noerekini Īkapani. Atxiīti nisāpiretari Teoso iokanapirena erekari, kākiti iteene imarotiniri Īkapani. Kateia āki nauakasaaki, mapara nauakasaaki, ikiniōtika hīte notakata apakapari ikinipoko erekari Teoso sikakiti. ⁸ Nota iteene tiretai hīte. Kristo Xesosi tiretini atokokana nitiretai hīte. Teoso imarotari ikara nisākire atāo inini.

⁹ Nota misākiretari Teoso hīte Īkapani ia atoko: Ninirekari hītiraōkiuatini apiaāpotini ikiniōtika. Hītiraōki aneeāpotakasaaki, ninirekari himarore apaka aneeāpotini. Imaroretxi himarōāpotakasaaki, ninirekari atāonoka himarotini. ¹⁰ Ikara atoko hininiā, himereēri apia erekari hīkamini. Ininiā maerekati lhīkama. Maerekati na apanakinimoni !hīkama. Ikara atoko hininiā, iposopeka hītxa Kristo kanapiriākasaaki. ¹¹ Ikara atoko hininiā, ikinipoko hīkamakiti erekari. Xesosi Kristonokara kamaerekatai hīte hīkamakiti eereka inini Īkapani. Apanakini atamatakasaakiri erekari hīkamakiti, ninoa imarotari Teoso posotiire, ininiā eereka ninoa: “Peerekari Teoso,” itxanako.

Paoro Misiritiko Pirena

¹² Nitariakori, himarotari nota iteene misiritaāka. Iuaritika Teoso iokanapirena erekari iaripiretapeka. Ninirekari himarotiniri, nimsiritiko xika apikomoni kākiti imarotari Teoso iokanapirena erekari. ¹³ Ininiā nimsiritiko xika ikinika sotatoakori, Homanoakori auīte aapoko inīkatakani, ikinimane kākiti mapara auakani apaka imarotari nota uai kateia āki nauakasaaki Kristo sākire nisāpiretini xika. ¹⁴ Itori aītariakori Apiananiri sākire auiākani, sikataparaxiniretaāka, kotxi imarotarina Teoso nīkatinino nota kateia āki nauakasaaki. Ininiā ninoa sāpiretari Teoso sākire itaparaxinireritikana. Mapīkaretika itxana.

¹⁵ Ninoa sāpiretari Kristo sākire, kotxi inirekarina erekari ikaminina. Txamari apanakinipekana sāpiretari Kristo sākire nota xikotiko xika. Inirekarina kākiti auikiniri ninoaka sākire, nota sākire poiāoka auikinina Īkapani. Ninoa sāpiretari Kristo iokanapirena, kotxi ninoa potxitari kākiti taparakienatakakiniua. ¹⁶ Aītariakori, erekarinani nirekakani, sāpiretari Kristo iokanapirena, kotxi ninoa tiretano nota. Ninoa imarotari Teoso sakinino nota ia parīkatxi, Teoso iokanapirena erekari atāo inini noerekini Īkapani. ¹⁷ Nota xikotakani sāpiretari Kristo sākire, txamari inirekarina ninoaka

nireēkiti ikaminina. !Inirekarina Teoso nireēkiti. Inirekarina nota apia atatsiitiniri nimisiritiko uai kateia āki nauakasaaki.

¹⁸ Atxiīti Kristo iokanapirena sāpiretakani ākixinire erekari. Atxiīti ninoa ākixinire kona erekari. Iuaritika erekapitikari, kotxi Kristo iokanapirena sāpiretapeēkaika. Ininiākara nipoxokoniuaata nota. Ari, !niotokapani nipoxokoniuatini. ¹⁹ Nipoxokoniuaata, kotxi nimarotari nitakanapiniri kateia, kotxi hīte misākiretari Teoso nota ĩkapani. Nimakatzakaākako kateia āki, kotxi Erekaru Matamatakoti Xesosi Kristokata auakari moianatano nota. ²⁰ Kona ninirekari nipētauatini, Kristo iokanapirena nisāpiretakasaaki. Ninirekari kataparaxinire ninini, Kristo apanakini nisāpiretini ĩkapani. Ikara atoko nininiā, apanakini imarotari Kristo Apiananiri ininiua. Ikiniōtika nauapanika ninakasaaki, ninirekari kākiti imarotiniri Kristo Apiananiri ininiua. Ari, nipīkasaaki apaka, ninirekari apanakini imarotiniri Kristo Apiananiri ininiua. ²¹ Auapanika ninakasaaki, ninirekari Kristo nireēkitinoka nikamini. Erekapitikari nipinini, kotxi eereka Kristokata nauapika. ²² Auapanika ninakasaaki, niparīkauatapitipo Teoso sākire nisāpiretini, ininiākara erekari niparīka. Kipa ninireka? Nota auapanika nininikani? Nipininikani? ! Nimarotari ninireēkiti. ²³ Ninirekari auapanika ninini. Apaka ninirekari nipinini. Apiata ninirekari nipinini Kristokata nauini ĩkapani. Ikara atoko apiaerekata. ²⁴ Txamari hīte noerekini ĩkapani, ninirekari auapanika ninini, kotxi hīte nirekapanikano nota. ²⁵ Ikara nimarotapitika, ininiā auapanika nitxa, himakinika noerekini ĩkapani, kotxi nota nirekari himaroāpotiniri Teoso sākire. Ninirekari hāuikiniri hīpoxokoniritika. ²⁶ Ininiā eereka hītxari: “Erekapitikari Kristo Xesosi, kotxi Paoro iuaīkana apoka atemoni,” hītxapaniko. Ininiā iteene hīpoxokoniuaata iusaaki.

²⁷ Atxiīti auapanika nitxa, atxiīti nipina, iuaritika ikiniōtika ereka hītxako hāuini. Erekaru Kristo iokanapirena, ininiā hīte apaka ereka hītxako hāuini. Atxiīti nisa hītemoni. Atxiīti kona nisa. Atxiīti nikenakopiretai hīte uai kateia āki nauakasaaki. Iuaritika, hāuini ereka inakasaaki, nimarotariko hīte himakinika iteene auikiniri Kristo sākire iua iokanapirena erekari. Hāuini ereka inakasaaki, nimarotari hīte himakinika sāpiretiniri Kristo iokanapirena iaōka apanakinimoni. ²⁸ Hāuini ereka inakasaaki, na hīpīkana hīte omanatakani. Hītaparaxinireritika hāuiniā, ninoa hīte omanatakani imarotari ixipokinina āti ōti. Hītaparaxinireritika hāuiniā, ninoa imarotari Teoso makatzakinii hīte himapinakanu ĩkapani. ²⁹ Ininiā Teoso sikari erekari hītemoni, kotxi iua auiritai hīte auikiniri Kristo iokanapirena. Apaka erekari isikai hīte, kotxi iua auiritai hīte atatsiitiniri himisiritiko Kristo ĩkapani. ³⁰ Hīte atamatapekari nota misiritiko, hīte sauaki nauakasaaki. Hīkenakopiretari nimisiritiko auapanika uatxa. Uatxa hīte nota atoko, kotxi hīte apaka misiritaāka.

2

Kristoka Poiāotakaua.

¹ Kristo sikataparaxiniretaua ate, iua nakiti aniniāua. Kristo mīkapiritaua ate, amarini axapitiri inoro mīkapiritini atoko itxa, kotxi iua tiretaua. Ātipirika iua Erekaru Matamatakoti amoiannari itxaua. Kristo iteene tiretaua. Iua amonīkaua. ² Ininiākara nota ōtākikai hīte hīkinika. Hīxinikariko Teoso nireēkitinoka hīkamini, ininiā hīxinikakiti ātinoka txauako. Hītiretakauako Teoso tiritiniua atokokana. Hinireēkiti ātinoka txauako. Ikara atoko hininiā, iteene hīkamapoxokonitano nota. ³ Kona kapotxinaniri hītxapeua. !Hūiikapeua. Hīteka minakati hītxauako. Hīxinikariko: “Apanakini apiata, nota poiāoka”. ⁴ !Hīxinikapiri pite nireēkitinani. Himiparīkatanako apanakini, ninoa nireēkiti ikaminina ĩkapani.

⁵ Xesosi Kristo xiniākitikanerako hīxinikako. Kristo kamakitikanerako hīkamako. ⁶ Teoso itxaua Kristo Xesosi, ininiā iposotari ipaniātiniri ikinimane inireēkiti ikaminina. ⁷ Iuaritika itakanapari auītetxi ininiua. Nitiritxi atoko itxapekaua. Iuaka minakati itxīkitakaua, kotxi kākitipeka itxaua uai itixi iponaniākasaaki. ⁸ Iusaaki kiki inakasaak- iua, iuaīkana iuaka ipoiāotakaua, kotxi ikīpitari Teoso sākire ipinini ĩkapani. Imarotari okiko tīkane, kokaniri okiko atoko inaākako aamina ĩpiriāmitakari nopini. Iuaritika

ikīpitari Teoso sākire ipinini ĩkapani. ⁹ Ikara atoko ininiā, Teoso txīkitakari iua Apiananiri ininiāua. Āti iua atoko inakari !auari. Teoso takari iuāka. Āti uāka iua atoko inakari !auari, ¹⁰ kotxi kākiti ikininape kenakotakasaakiri iuāka Xesosi, ikapotoreēkauako Xesosi apisatoō. Ikinimane Teoso tixine auakani, ikinimane itixi auakani, ikinimane ipīkani auiniātaā pakini kapotoreēkauako Xesosi apisatoō, kotxi iauītena itxaua Xesosi. ¹¹ Ikinipoko kākiti txako: “Xesosi Kristo Apiananiri itxaua,” itxanako. Ikara atoko ininiā ikinimane: “Peerekari aīri Teoso,” itxanako.

Iōriki Atoko Hītxako

¹² Ininiā nota tīretakini, hīkīpitariko nisākire uatxa, mitxi hītekata nauakasaaki nisākire hīkīpitini atokokana hītxako. Uatxa kona hītekataikano, iuaritika ninirekari apiata hīkīpitiniri nisākire. Teoso makatxakapekari himaerekani itixine hīsini ĩkapani, ininiākara ikiniōtika hīparīkauatako Teoso ĩkapani. Hīpīkariko maerekati hīkamini. Erekarinanira hīkamapikako. ¹³ Hīposotari ikara atoko hīkamini, kotxi Teosokara moianatai hīte. Iua kamanirekaretai hīte iua nireēkiti hinirekini ĩkapani. Iua sikaposoti-iretai hīte iua nireēkiti hīkamini ĩkapani.

¹⁴ Hīparīkauatakasaaki, !hītsoatape, !hītxitakapeua. ¹⁵ Ikara atoko hīkaminiā, hīkerokiniri !auari, himaerekani !auari, ininiā erekarinoka hīkama apanakinimoni. Ininiā Teoso anaakori erekarini hītxaua. Kākiti kamisirienererini sauaki hāuanāta hīte. Kākiti maerekani sauaki hāuanāta. Iōriki iopinikari iaxiti ĩkanōka. Iōriki atoko hītxako. Hīopinikariko maerekati auiniātaā, atāo inakari kākiti imarotini ĩkapani. ¹⁶ Hīte iopinikari ipiā, Teoso sākire apanakinimoni hīsāpiretakasaaki. Teoso sākire txīkitakari kākiti ātipirika auāki inini tīkane, Teosokata auini ĩkapani. Hīte Teoso anaakori erekarini hininiāua, nota iuikaiko hīte, Kristo uaimoni kanapiriākasaaki, kotxi hīte auikapekari Teoso sākire nisāpiretakiti. Kona maxikatiīkani nīparīkauatāpitipo hīte ĩkapani, kotxi hīte auikapekari Teoso sākire nisāpiretakiti.

¹⁷ Atxiīti nota okaāka Teoso sākire nisāpiretini xika. Atxiīti niarēka oxikepoakataāka, Teosomoni sikakori atoko inakari, Teoso sākire nisāpiretinii xika, Teoso sākire hāuikini xika. Nokaāka atxiīti, iuaritika nīpoxokoniūata. Nīpoxokoniūata hītekata. ¹⁸ Ininiā erekari hīte apaka poxokoniūatini. Erekarini hīpoxokoniūatini notakata.

Tximótxio Pirena

¹⁹ Xesosi Apiananiri nirekiniāri nota iokanatiniri Tximótxio hītemoni, ininiā ma-paōtipeka inakasaaki niokanatarini iua. Ininiā eereka iua mināpiretari hīte pirena, nota apaka poxokoniūatini ĩkapani. ²⁰ Āti Tximótxio atoko inakari uai !auari, kotxi iua iteene tīretai hīte. Iua nirekari hāuini ereka inini. ²¹ Apanakini kākiti xinikari ninoaka nireēkitinoka. !Ixinikarina Xesosi Kristo nireēkiti. ²² Himarotari iua Tximótxio parīkauatape notakata, imi irikata parīkauatakari atoko itxa. Iparīkauata notakata Teoso iokanāpirena erekari apanakini asāpiretini ĩkapani. Ininiākara himarotari Tximótxio atamakaākapeka, ininiā himarotari erekapitikari iua. ²³ Kiatokopa ninataāka? Uatxa !nimarotari. Nimarotakasaakiri, niokanatarini Tximótxio hītemoni. ²⁴ Apiananiri kamaimaroretano nota, Tximótxio tikinimoni nota apaka apoka ereē hītemoni.

Eparotxito Pirena

²⁵ Notamoni erekari iuaīkana niokanatiniri hīokanāpirena mīkari, Eparotxito inakori. Hīte iokanātakekari iua notamoni nota itīretini ĩkapani. Iua nitari atoko itxa. Imiparīkatāpitipono nota, Teoso iokanāpirena asāpiretakasaaki. Iua, nota pakini sotato atoko atxaua, kotxi ate neenamauata Teoso ĩkapani. ²⁶ Iua ipiātai hīte hīkinika. Iua maerekaxiniretinoka itxa, kotxi ikenakopiretari hīte imaropiretiniri iua amianatini. ²⁷ Atāopitikara iua amianatāpitika. Iua ipinaarita, iuaritika Teoso amonīkari iua. Itxīkitakari iua iuaīkana ereka inini. Ininiā Teoso amonīkano nota apaka, kotxi Eparotxito ipinaākamako, apia maerekaxiniretinoka nitxamako. ²⁸ Ininiākara iteene ninirekari niokanatiniri iua hītemoni, hīpoxokoniūatini ĩkapani haōkitakasaakiri. Ikara atoko ininiā, nota maerekaxiniretinoka ninini !auaika. ²⁹ Ininiā hīpoxokoniritika hāpaka-pariko iua, kotxi iua Eparotxito aītari itxaua, kotxi Apiananiri nakitiakori atxaua.

Hīpaxitariko kākiti Epaparotxito atoko inakari, ³⁰ kotxi Kristo ĩkapani iparĩkauatini xika ipinaarita. Iuaka monōkorimoni isa nota imoianatini ĩkapani, kotxi iua imarotari hīte nirekapitikamari himoianatinino, txamari !hīposota himoianatinino, ininiã iua iteene moianatano.

3

Kiatokopa Kākiti Atã Ereka Inini?

¹ Nitariakori, apikomoni nisãpiretai. Hīpoxokoniuatoko, kotxi Apiananiri nakitiakori atxaua. !Nisãpaka iuaĩkana nisãpiretakitipeka nisãpiretinii hīte. Iuaĩkana nõtãkikai hīte, atã minakati himauikakani ĩkapani. ² Erepaniko kākiti maerekati kamakani, atã minakati sãpiretakani, kotxi ninoa sãpiretari kākiti: “Teoso takaõtxikare piĩtoã mauakaniã, kona Teoso nakiti !pitxaua,” itxana. ³ Ninoa auapitika Teoso takaõtxikare iĩtoãna, txamari kona Teoso nakitiakori !itxauana. Atera Teoso nakitiakori, kotxi atemoni aua atã inakari Teoso takaõtxikare ate ãkixinireẽ, kotxi Erekaru Matamatakoti oerekaua amisãkiretiniri Teoso. Kristo Xesosinokara ate iuika. Aimarotari ateka kamakiti litxa. Teoso kamakitinokara apakata.

⁴ Hīuãkatari atxiĩti hīte kamakiti ereka inini Teoso apakapinii ĩkapani? Konapitini. Nota kamakiti apiaerekata, iuaritika nikamakiti !txĩkitakano Teoso apakapinino ĩkapani. Hīkenakotariko erekaru nota kamakiti: ⁵ Teoso takaõtxikare niĩtoã takaãka oito õti nauakasaaki. Nirini, ninoroni pakini Xoteo itxauana. Natokiri kitxakapirĩka Pẽxamiĩ inakori. Kitxakapirĩka natokiriakorini, nakiroakoroni pakini ikinika Xoteoakori itxauana, ininiã atã Xoteo nitxaua. Nota kĩpitari aãuĩteakori kitxakapirĩkarini paniãtakiti, kotxi nota pariseo nitxaua, ininiã Teoso sãkire iõkatsopatakori oerekakari nitxaua. ⁶ Nota iteene nirekaru Teoso nireẽkiti nikamini, ininiã nimisiritari kākiti Xesosi sãkire auiãkani, kotxi niuãkatari Teoso nirekaru ikara nikamini. Aãtokiriakorini paniãtakiti ikinika nikĩpita. !Nikerokari.

⁷ Mitxi niuãkatari ikara atoko nininiã erekapitikari, ininiã, “Teoso apakapapitikano nota,” nitxa. Uatxa nimarotari Kristo, ininiã nimarotari mitxipe minakati nininiua nota. ⁸ Uatxa nimarotari niauĩte Kristo Xesosi. Ikara apiaerekata. Xesosi nimarotini apisapanika, nikamakiti !itxa xatiki. Nitakanapapekari mitxi nikamakiti. !Itxaika. Mitxi nikamakiti itiki atoko, kotxi !niniĩrekaikari. Kristo nakiti uatxa nitxaua. ⁹ Nitakanapapekari mitxi nikamakiti Kristokata ãtipirika nauini ĩkapani. Nota kĩpitari Moisesini paniãtakiti. Ikara atoko inakarinani kona ereka txĩkitakano nota. Teosonokara kamaerekatano nota, kotxi nauikari Kristo sãkire. ¹⁰ Ninirekaru Kristo iteene nimarotini. Ninirekaru nimarotiniri Teoso posotiire, kotxi iposotiireẽ õkitikari Kristo, iuaĩkana auãki inini ĩkapani. Kristo atatsiirauatape, ininiã nota apaka nirekaru natatsiirauatini atã imoianari nininiua ĩkapani. Ninirekaru nota nireẽkiti ipinini, Kristo aamina ĩpiriãmitakari nopini ipinini atoko. Ninirekaru Xesosi nireẽkitinoka nikamini, ininiã iua atoko nitxaua. ¹¹ Ininiã itixi xipokini õti Teoso õkitikanoko, iuaĩkana auãki ninini tĩkane.

Mitekakari Atoko Nitxa

¹² Ikara ikinika !nimarotapanika. Nimaroãpotapanikariko. Teoso kamapanikari iparĩka nota ãkixinireẽ. !Ixipokapanikari, ininiã !niotokakari niparĩka Teoso ĩkapani. Niparĩkauatapitipo. Mitekakari mitekini atoko, !niotoka. Mitekakari nirekaru mitekaxi mapotõkire apokini. Iua atokokana nota nirekaru niparĩka mapotõkire napokini, kotxi Kristo Xesosi mereẽno nota ikara atoko nikamini ĩkapani. ¹³ Nitariakori, niparĩka mapotõkire !napokapanika. Ia nikamako: !Nixinikaikari mitxi nikamakiti. Mitekakari masapotorikakati atoko nitxa. Nitapararitika nisa apikomoni, niparĩka mapotõkire napokini ĩkapani. ¹⁴ Mitekakari iteene nirekaru mitekaxi mapotõkire apokini imitekini ĩki apakapini ĩkapani, ininiã imitekapitipo. !Iotoka. Iua atokokana nota parĩkauatapitipo Teoso ĩkapani, niparĩka mapotõkire napokini ĩkapani, niparĩka ĩki Teoso sikakiti napakapini ĩkapani, kotxi Teoso pĩkapiretano nota Kristo Xesosiã itixine nisini ĩkapani, niparĩka ĩki napakapini ĩkapani.

¹⁵ Akinika ate Kristo iteene imarotakani xinikamariko nota oerekakiti atoko inakari. Ikara atoko himaxinikakanisaaki, Teoso oerekaiko hīte atã inakari. ¹⁶ Mitekaxi

kamakari paniãtakiti iaõka mitekakari kama imitekasaaki. Iua atokokana makamariko Teoso paniãtakiti. Uatxaika akamakiti atokokana makama.

¹⁷ Nitariakori, hikamariko nota kamakiti atoko inakari, kotxi ate oerekepekai hite ikara atoko inakari hikamini. Hikipitariko nota kamakiti atoko inakari kamakani sãkire. ¹⁸ Kaiãopokori kãkiti !auikari Kristo ipinini amaerekani imatxakini ikapani. Kristo omanatakani itxauana ninoa. Itokatapeka ikara nisãpiretai hite, ininiã iuaikana uatxa ikara nisãpiretai. Iteene nimatinaniuata ninoa xika. ¹⁹ Itixi mapotõkire õtisaaki ninoa iokanataãkako maerekani misiritikoãtaã. Iitona iteasonena atoko itxana, kotxi iitona nireëkitinoka ikamana. Ikamakitina !erekari, iuaritika iuikarina ikamakitina. !Ipëtauatana. Ninoa xinikapikari ikorapokoriti. !Ixinikarina Teoso. ²⁰ Atepekana, Teoso tixine auakani atxapekaua. Aiãtapari apoxokoniritika kãkiti maerekani makatxakari iuaxitikiri uaimoni apokini. Iua Xesosi Kristo Apiananiri itxaua. ²¹ Iuasaakiko inoãkari aito mataparati. Itxikitakari aito iua ito erekari atoko inini. Iposotari, kotxi kaposotiireri itxaua iua. Ikinimane kamapitikariko ipaniãtakiti, kotxi kataparari iua Xesosi.

4

Õtãkipirenatxi

¹ Nitariakori, nota iteene tiretai hite. Nipiãtai hite. Hikamapoxokonitano nota. Niukai hite, kotxi nipaika iki atoko hitxa. Nitiretakini, hixinikariko ikara nota õtãkikinii uatxa. Nota õtãkikinii hikipitiniã, !hitakanapari Apiananiri.

² Nota õtãkikai hite Epõtxia inakoro, Sõtixiki inakoro pakini. Hikipitariko Apiananiri sãkire. Hiotokakariko hitxitakiniua. ³ Pitepekana nimoianari erekari, nota nirekai pite õtãkikinina naia sito ipi, kotxi ninoa parikauatapeka notakata Teoso iokanapirena erekari asãpiretakasaaki. Ninoa parikauata notakata, Kremëtxi inakori pakinikata, apanakini nimoianariakorikata apaka. Ninoa uãka Teoso aãtsopateë iõkatapeëkaika, Teosokata auapininiika ininina tikane.

⁴ Hienenikapakiko, kotxi Apiananiri nakiti hitxaua. Iuaikana nitxai. Hienenikako.

⁵ Erekari hikamako apanakinimoni. !Hitxitapena. Erekari apanakini imarotini hite ereka hinini. Apiananiri kiamapeka ikanapiriini uaimoni. ⁶ Na xatiki maerekaxiniretika !hitxape. Maerekaxinireti hinakasaaki, himisãkiretariko Teoso. Hamanaãri hinireëkiti. Himisãkiretakasaakiri Teoso, hitxariko: "Erekapitikari notamoni pikamakiti," hitxariko. ⁷ Ikara atoko aniniã, Teoso kamaerekaxiniretaua. Kiãtokopa ininiãpa Teoso kamaerekaxiniretaua? !Kimarotikori, iuaritika peerekari. Hãkixinire erekaxinirepeka ininiã, maerekati !iãroã hãkixinireë. !Hinirekaikari maerekati hixinikini. !Hinirekaikari maerekati, kotxi Kristo Xesosi nakiti hitxapekaua.

⁸ Nitariakori, nisãpiretakiti xipokini apisa, nisãpiretapanikaiko hite. Hixinikariko atão inakari sãkiretxiti. Hixinikariko atão inakari hīsãpiretini. Hixinikariko atão inakari hikamini. Hixinikariko erekarinoka. Hixinikariko tiraõkitxi. Hixinikariko potxitakori. Ikara atoko inakarinoka hixinikako, kotxi erekapitikari ikara. Peerekari ikara. ⁹ Hikamapikariko noerekakiti iaõka. Hīsãpiretanako apanakini hitemoni nisãpiretakiti. Hikamariko nota kamakiti hitiãkiti atokokana. Ininiã Teoso kãkiti kamaerekaxiniretakari kaikota hitekata.

Paoro Potxitari Ninoa Sikakiti

¹⁰ Apiananiri nakiti nitxaua, ininiã iteene nipoxokoniua. Iuaikana hite oerekari hitiretinino, txineiro hīsikakito hōkanatinano, ininiã nipoxokoniua. ãtipirika hixinikano, kotxi iteene hitiretano. Txamari mitxi !hiposotari hīsikakiti hōkanatini notamoni. ¹¹ !Namanaãi iuaikana txineiro hōkanatini notamoni. Ikinipoko ninireëkiti auakasaaki, nipoxokoniua. Ikinipoko ninireëkiti mauakanisaaki, iuaritika nipoxokoniua. ¹² Nota napapekari nimamãkani, nimanipokoreni, nimatxineiroteni pakini. Apaka nimarotari ãtikataã ninireëkiti ikinipoko auinano. Teoso oerekepekano ikiniõtika nipoxokoniuatini. Nienenika nipokori auakasaaki. Nienenika ninatxitakasaaki apaka. Nienenika ikini sereti auinakasaakino. Nienenika minakati mauinakanisaakino. ¹³ Ikinipoko niposota nikamini, kotxi Kristo sikano iposotiire.

¹⁴ Erekapitikai hīte, kotxi nimatxineirotenisaaki, hīokanatarī txineiro notamoni. ¹⁵ Teoso iokanapirena erekari merepitipanika hīkenakotakasaaki, ereē Masetónia tixini nosipikasaaki, hīte Piriposi auakaninokara iokanataro txineiro napakapini ĩkapani. Apanakini Xesosi sākire auīākani ātiātaā auakani, !iokanatinano nota. Himarotapekari ikara. ¹⁶ Tesarónika sitatxiti nauakasaaki, ninirekakiti auakasaaki, itokata txineiro hīokanatinano. ¹⁷ !Niātaparo txineiro hīsikinino. Niātapari Teoso sikinii erekari, kotxi hīte tirtapekano nota. ¹⁸ Napakapapekari ikinipoko hīokanatakiti. Kaiāopokori hīokanatakiti. Eparotxito inakori mininano hīsikakiti, ininiā ikinika ninireēkiti uatxa auinano nota. Teosomoni sikakori kamariri atoko itxa hīte sikakiti notamoni. Teoso potxitari hīsikakiti notamoni. ¹⁹ NiTeosone sikaiko hīte hinireēkiti ikini sereti, kotxi ikinipoko aua iuamoni. Isikaua, kotxi Kristo Xesosi nakitiakori atxaua. ²⁰ Ātipirika matxari Teoso: “Peerekai aīri, aTeosone. Ameē.”

Takanapapirenatxi

²¹ Hīsāpiretanako ikinimane ereē auakani Kristo Xesosi nakitiakori, nixinikamanapitinina ninoa. Aītariakori uai notakata auakani xinikamanapitai hīte apaka. ²² Ikinimane uai auakani Teoso nakitiakori iokanapireta hītemoni ixinikiniina. Homanoakori auīte aapoko auakani, Teoso nakitiakori, iokanapireta hītemoni iteene ixinikiniina.

²³ Xesosi Kristo Apiananiri sikari ikinipoko erekari hītemoni. Ameē.

KOROSO

Paoro Iokanatsopatakiti Koroso Auakanimoni

¹ Nota Paoro. Niokanatsopata hitemoni. Teoso mereeno nota, kotxi inirekari nota Xesosi Kristo iokanatakiti nininiua. Aitari Tximótxio apaka iokanapireta hitemoni. ² Ininiã aiokanataria ia iokatsopari Teoso nakitiakorimoni, ikinika Teoso paniãatakiti kamakanimoni Koroso sitatxiti auakanimoni. Aitariakori hitxaua. Aïri Teoso, Apiananiri Xesosi Kristo pakini sikari ikinipoko erekari hitemoni. Ninoa kamaerekaxiniretai hite.

Teoso Misãkiretiko Koroso Auakani Ìkapani

³ “Erekapitikai,” atxari Teoso, aãuïte Xesosi Kristo iri, iua amisãkiretakasaaki hite ìkapani. Ætipirika amisãkiretari Teoso hite ìkapani. ⁴ Ikara atoko atxari Teoso, kotxi ate kenakopiretari hite auikiniri Kristo Xesosi sãkire. Apaka akenakopiretari hite tiritiniri ikinika kãkiti Teoso nakitiakori. ⁵ Teoso iokanapirena erekari atão sãkiretxiti itxaua. Ikara hïkenakotakasaaki, hïkenakotari Teoso sikaenetakiti ipotetakiti itixineë hite ìkapani, ininiã hiãtapari hãpakapiniri Teoso sikaenetakiti. Himarotari hãpakapiniri, ininiã Teoso sãkire hãuikini aua, hïtiraõkiuatini pakini aua. ⁶ Teoso iokanapirena erekari hïkenakotakiti iaripiretapeka ikini itixitimoni. Ikiniõtika apikomoni kãkiti kenakotari. Iuasaaki kãkiti auikaãpotari Teoso iokanapirena. Ikiniõtika kãkiti apakapari erekari Teoso sikakiti. Iua atokokana hite kenakotari Teoso iokanapirena erekari. Iuasaaki himarotari ikinipoko erekari Teoso sikakiti. Iuasaaki himarotari Teoso atão sakiniri ikinipoko erekari kãkitimoni.

⁷ Amoianari, atiretakiti, Epãpara inakori, iuara oerekai Teoso sakiniri ikinipoko erekari kãkitimoni. Iua Kristo nitiri itxaua. Ætipirika iparïkauata Kristo ìkapani, ininiã Ætipirika iparïkauata hite ìkapani. ⁸ Iua sãpiretaua ate hïtiraõki, Erekar Matamatakoti siãkiti hitemoni.

⁹ Hite pirena akenakopiretakasaaki, Ætipirika amisãkiretari Teoso hite ìkapani. Ate nirekari hite iteene imarotiniri Teoso nireëkiti hïkamini ìkapani. Anirekari kiïkiteni hininiãua. Anirekari himarotiniri Teoso imarore Erekar Matamatakoti siãkiti.

¹⁰ Ininiã ate misãkiretari Teoso hite atão hïkamini ikiniõtika, kotxi Apiananiri anaakori hitxaua. Anirekari hïkamakiti kamapoxokonitiniri Teoso. Ininiã hïkamakiti ikiniõtika erekarinoka, amãtiiri erekari atoko. Ininiã ikiniõtika himaroãpotari apikomoni Teoso nireëkiti. ¹¹ Anirekari Teoso sikataparaxiniretinii hite iposotiireë, kotxi kaposotiireri iua. Ininiã iuasaaki hiãtapari himisiritiko xipokini. Iuasaaki !hinaiataua. Iuasaaki hïposotari himiteenekiniri himisiritiko hïpoxokoniritika. ¹² Iuasaaki hitxariko aïri: “Erekapitikai,” kotxi iua kamaerekataua. Ininiã aãpakapari iua potetakiti inakitiakori ìkapani Teoso tixineë, ipiã mauakaniãtaã. ¹³ Iua sikakaua ipiã posotiireë aãuakasaaki, maerekati posotiireë aãuakasaaki. Iua anikaua imi itiretakiti auiniãtaã. Iuaãtaã auakani auïte itxaua imi. ¹⁴ Imi Kristo iïkitxitari Teoso amaerekani ìki ipïkasaaki, ininiã Teoso makatxakari amaerekani. !Ixinikaikari amaerekani.

Kristo Apiananiri

¹⁵ Kãkiti kona posotari atamatiniri Teoso. Teosotxikana itxaua Kristo, iuaritika aposotari Kristo aãtamatiniri. Ikinipoko kamiko apisa, Kristo aua Teosokata. ¹⁶ Iua kamari ikinipoko. Ikamari iaxiti auakani, uai itixi auakani apaka. Ikamari ikinipoko kãkiti atamatakiti, kãkiti matamatakiniri apaka. Ikamari ikinika kaposotiirerini, auïtetxiakori matamatakoni, ikinika Teoso nitiriakori pakini. Ikamari ikinika. Ikinika kamaãka iua ìkapani. ¹⁷ Kristo aua ikinipoko apisa. Iua maïkari ikinika imaxipokakani ìkapani. Ikara atoko ininiã, ikinipoko auapanika. Iua mauakaniã, ikinika iarika. Iua mauakaniã, ikinipoko xipoka.

¹⁸ Kãkiti Teoso mereëkini Kristo ìto atoko itxauana. Teoso mereëkini kii atoko itxa Kristo. Merepitipanika ipïkari õkitikakariua iua. Ininiã õkitikasaakiua, oerekari kãkiti

Apiananiri ininiua. Āti kaposotiireri iua atokokana inakari !auari. ¹⁹ Teosotxikana iua. Ikinika Teosomoni auakari aua iuamoni. Ikara atoko Teoso apokaerekatari. ²⁰ Kristo arēka xiketakasaaki aamina ĩpiriāmitakari nopini, iusaaki Kristo xipokari Teoso omanākarauatini kākiti maerekani xika. Kotxi Teoso nirekari Kristo mininiri ikinipoko iuaĭkana iuamoni, ĩkorapokoriti auakani, iaxiti auakani pakini. Ininiā uatxa Teoso apakapari Kristo sākire auĭākani.

Kristo Kamakiti Koroso Auakani Īkapani

²¹ Hĭtepekana, mitxi !hĭmarotari Teoso. Iusaaki !hāuari Teosokata. Maerekati hĭkamakiti xika homanatarari Teoso hākixinireē. Teoso mokaiakariakori hĭtxaua iusaaki. Uatxa Teoso apakapai hĭte, ²² kotxi Kristo ĩto ipina hĭte ĩkapani. Ininiā iua anikai hĭte Teosomoni iua makatxakakini hininiua ĩkapani. Teosomoni himaerekani !auaika, kotxi Kristo makatxakapekari imakinika himaerekani. Teoso apisatoō hāpokasaaki, kona āti posotari apoĭtinii himaerekani xika. ²³ Ikara atoko aua hĭtemoni, iteene hāuikiniāri Kristo sākire ikiniōtika, Kristo sākirenoka hāuikiniā, isākire himatakanapakaniā. Ikara atoko hĭkaminiā, apanakini kona txĭkitakai hĭtakanapiniri hĭātapiniri ikinika Teoso kamakiti hĭte ĩkapani. Teoso iokanapirena erekari sāpiretaua ikinika Teoso kamakiti inakitiakori ĩkapani. Hĭte kenakotapekari Teoso iokanapirena erekari. Isāpiretaākapeka ikinika itixi auakanimoni. Nota Paoro Teoso nitiri, iua iokanapirena erekari ikinimane nisāpiretini ĩkapani.

Paoro Parĭkauata Kākiti Teoso Mereēkini Īkapani

²⁴ Uatxa nipoxokoniua hĭte ĩkapani natatsiirauatini, kotxi natatsiirauatini xika hĭte auikari Kristo sākire. Natatsiirauata niĭtoā Teoso mereēkini ĩkapani. Kristo ĩto atoko itxauana kākiti Teoso mereēkini. Natatsiirauatapitika, iuaritika Kristo atatsiirauatini apiata. ²⁵ Teoso iokanatano nota imereēkini nitiri nininiua. Ipaniātano nisāpiretiniri ikinika isākire hĭtemoni. ²⁶ Ipaniātano nisāpiretinii mitxi kākiti mimarotakiniti. Okananipeka Teoso !oerekari ikara kākiti mimarotakiniti. Kristo ipinini apisa ikini itixiti auakani !imarotari ikara. Mitxi kākiti mimarotakiniti uatxa oerekaāka Teoso nakitiakorimoni. ²⁷ Uatxa Teoso nirekari inakitiakori Xoteo minakanuia imarotiniri mitxi kākiti mimarotakiniti, kotxi peerekari. Natokopa itxa ikara kākiti mimarotakiniti? Nisāpiretai. Kristo posotari kākiti ākixinireē auini. Ia mitxi kākiti mimarotakiniti. Kristo aua hākixinireē. Ininiā himarotari hĭsini Teoso tixinemoni. ²⁸ Ininiā asāpiretari kākiti Kristo pirena. Aōtākikari ikinimane Teoso imaroreē. Aōerekari ikinimane Teoso imaroreē, kotxi Teoso sikaimaroretua. Iua aua ikinika imaroretxi. Ikara atoko aanikana Kristo nireēkitinoka kamakani Teosomoni. ²⁹ Ikara nikamini ĩkapani, nĭparĭkauatapitipo. Pasāpaniri. Kristo posotiireē nĭparĭkauata, kotxi kaposotiireri iua. Iua iteene sikataparatarari nākixinire, ininiā nĭposotari iteene nĭparĭkauatini iua ĩkapani.

2

Paoro Nirekakiti

¹ Ninirekari himarotiniri iteene nimisiritiko hĭte ĩkapani. Apaka iteene nimisiritaāka Araotxisĕia sitatxiti auakani ĩkapani. Nimisiritaāka apanakini nimataōkitakini ĩkapani apaka. ² Ninirekari ikinimane ninoa kataparaxinire ininina. Apaka ninirekana itiretakakiniuana, ininiā ātika ninoa nireēkiti. Ikara atoko ininiāna, iteene imarotarina ikinika Teoso sākire. Iusaaki imarotarina Kristo, mitxi kākiti mimarotakiniti, mitxi āri Teoso moerekakiniti. ³ Paimatireri Kristo. Iua mimarotakiniti !auari. Ikinipoko imarota. ⁴ Ikara atoko nisāpiretai hĭte, apanakini mamisirienetakani tĭkane kākiti imaroreē. ⁵ Niĭto !auari hĭtekata, iuaritika nixinikapikai hĭte nākixinireē. Nĭpoxokoniua, kotxi nĭmarotari hĭkamakiti atāo inini. Apaka nĭpoxokoniua, kotxi hĭte iteene auikari Kristo sākire.

Atāo Kristo Sākire Auĭākani Kamakiti

⁶ Hāpakapapekari Kristo Xesosi hĭauĭte ininiua ĩkapani, ininiā hĭkamariko inirekakiti ikiniōtika. ⁷ Iua taparanoka hĭkosekako. Aākotsa kosekiniri āparaā atoko hĭtxako. Ikara

atoko hininiã, kataparari hixinire. Ininiã atão hãuikari Kristo sãkire mitxi aõerekakiti atoko, ininiã kataparaiko. Ininiã iteene hĩtxariko Teoso: “Ikinika pikamakiti ate ĩkapani peerekari,” hĩtxako.

⁸ Erepaniko. Kona hãuiritapiri kãkiti makatxakinii Teoso kimaporeẽ. !Hãuikapiri ninoã sãkire, kotxi ãtião ninoã sãkire. Na atão isãkirena. Kãkiti imarorenoka imarotana. Kamisirienererini ninoã. Maxikatĩika isãkirauatana. Kitxakapirĩka auakani sãpiretakiti ninoã sãkire. ĩkorapokoriti auakani nireẽkiti maerekati isãpiretana kãkiti. Kona Kristo sãkireni.

Apiananiri Itxaua Kristo

⁹ Kristo aua ĩto, iuaritika Teosotxikana iua. Kristo aua ikinipoko Teoso posotiire, ikinipoko itiraõki, ikinipoko imarore, txaãpokata, kotxi Teoso itxaua. ¹⁰ Kristo aua hãkixinireẽ, ininiã ikinipoko aua hĩtemoni. !Auari apikomoni hinirekakiti, kotxi auĩtetxiakori iaxiti auakani auĩte itxaua. Apiananiri itxaua. Kaposotiireri iua atoko inakari !auari.

Kristo Kamakiti Hĩte ĩkapani

¹¹ Hãpakapapekari Teoso takaõtxikare kãkiti mataãkiniti. Hãkixinireẽ Teoso takari itakaõtxikare. Kristo makatxakasaakiri himaerekani hĩto nireẽkiti, iusaaki hãpakapari Teoso takaõtxikare. ¹² Hĩpatxisatikosaaki, Kristokata ikatakoni atoko hĩtxaua. Eereka hõkitikaãka Kristo õkitikiko atoko. Hĩte õkitikaãkako, kotxi hĩte auikari Teoso posotiire Kristo õkitikini ipĩkasaaki.

¹³ Mitxi ipĩkani atoko hĩtxaua himaerekani xika. Xoteo minakanuia hĩte, ininiã mitxi kona himarotari Teoso nireẽkiti. Hĩponaniãkasaaki, maerekati auape hĩtemoni. Iuaritika Teoso txĩkitakai auãki hinini Kristokata. Teoso makatxakari ikinipoko himaerekani. !Ixinikaikari himaerekani. ¹⁴ Iua oakari iõkatsopatakori amaerekani sãpiretiko. Ikara iõkatsopatakori sãpiretari amisiritiko amaerekani xika. Amitekini !auari. Amisiritiko auapitika. Iuaritika iua oakari ikara iõkatsopatakori. Imakatxakari ikara iõkatsopatakori. ĩpiriãmitakari nopini Kristo tokakitikosaaki, ikara iõkatsopatakori tokakitaãka apaka iuaã, ininiã !itxaika. Iusaaki amisiritiko !auaika. ¹⁵ Kristo ĩpiriãmitakari nopini ipĩkasaaki, iusaaki imakatxakari ikinika Satanasi posotiire, iniritiakori posotiire pakini. Iua oerekari ikinimane !kaposotiirena ninoã. Iua õkitikasaakiaua, oerekari ikinimane iuananira Apiananiri ininiua. Iusaaki Kristo oerekari ikinimane ikãiatini.

¹⁶ Ininiã kona hãuiritapiri apanakini txitinii hinikakiti xika, hiãtakiti xika pakini. Kona hãuiritapiri apanakini txitinii kiiniri Teoso ĩkapani hĩkamini xika, kiiniri kasiri itopaĩtakasaaki hĩkamini xika, kiiniri tomatiko õti hĩkamakiti xika pakini. ¹⁷ Kiiniri Teoso ĩkapani ĩkorasaaki sanõkatxi atoko itxa. Oerekaua atão inakari, txamari na iteene oerekaua. Iteene oerekaãka atemoni, Kristo aõkitakasaaki. ¹⁸ Erepaniko kãkiti ia atoko inakari: Ninoã iuikari imiuikakanianua. Ninoã teosonetari Teoso nitiriakori matamatakoni. Ninoã sãpiretari kãkiti matamatakoni aõkitinina itaponeẽna. Ixinikarina ninoaka nireẽkitinoka. Ixinikarina kimarorerini ininiuana, ininiã iuikauana. Erepaniko kãkiti ikara atoko inakani. Hãuikiniãri ninoã sãkire, !auaika hĩparĩka ĩki. ¹⁹ Kãkiti ikara atoko inakani ĩnirekari Kristo iauĩtena ininiua. Kotxi Kristo akii atoko itxa. Ate iua ĩto atoko atxaua. Ikara atoko ininiã, isikataparataua. Aãpotiitaua. Asikataparatakakaua. Ātika ĩtotxi atoko atxaua. Ikara atoko aniniã, aimaroãpotari isãkire. Aaneẽ, kãkiti ĩto aneini atoko.

Apinini, Aãuini Pakini Kristokata

²⁰ Mitxi hinireẽkiti itixi auakani nireẽkiti atoko. Hãuikasaakiri Kristo sãkire, mitxi hinireẽkiti !auaika. Ipĩpe. Txamari hĩkamapanikari ĩkorapokoriti auakani kamakiti atoko. Ninoã nireẽkiti iaõka hĩkamapanika. ²¹ Ninoã txari: “Kona pimaĩkapiri ikara. Kona pinikapiri ikara nipokori. Kona piouãtakapiri ikara.” Kinirepa hĩkĩpitari ikara isãkirena? ²² Ninoã paniãtakiti xipokapitikako. Ikara atoko !itxa, kotxi ikara atoko inakari paniãtakori kãkitinoka paniãtakiti. Kãkiti oerekakiti sãkiretxitinoka ikara. ²³ Kãkiti uãkatari ninoã paniãtakiti kimarorerini paniãtakiti atoko. Ninoã xinikakiti

iaōka inirekarina Teoso. “!Erekano,” itxana, txamari ākixinireēna itxana “Peerekano.” Ninoaka misiritaua iītoāna. Ikamarina ikinika iītona nireēkiti.

3

Atāo Hīkamakiti Erekarī Hāuini Īkapani

¹ Hīte ōkitikaāka Kristokata hāuini amaneri inini ĩkapani, ininiā hinirekariko hīkaminiri Teoso tixine auakani kamakiti iaōka. Iuaā Kristo topākanāta Teoso kikomoni. Apiananiri itxaua Teoso kikomoni topākakari. ² Hīxinikariko Teoso tixine. Kona hīxinikapiri ĩkorapokoriti. ³ Ipīkani atokopeka hīttxa, kotxi hāuini kitxakari !auaika, ininiā kona hīxinikaikari ĩkorapokoriti auakari. Teoso sākire mauīākani !imarotari hāuini amaneri Kristokata Teoso auiniātaā. ⁴ Kristo txīkitakari aāuini amaneri inini. Iua uai apokasaaki iuaīkana atamataāka. Iuasaaki hīte apaka atamataāka iuakata. Iuasaaki hītemoni auari Kristo iotximere atokokana. ⁵ Hīxipokariko hīito nireēkiti, kotxi ĩkorapokoriti auakari nirekari ĩtotxi nireēkitinoka. Hōkariko. Kipa aua aākixinireē aōkini ĩkapani? Auari anokaretxi. Auari āito nireēkitinoka kamiko nirekiko. Auari āti ĩto nirekiko. Apaka auari āti nakiti nirekiko aākixinireē. Iteene anirekiniāri āti nakiti, ateosone atoko itxaua anireēkiti. ⁶ Ikara maerekati xika, Teoso omanākare apokapitikako Teoso paniātakiti makīpitakanimoni. ⁷ Mitxi hīte kamari maerekati ikara atoko inakari. Iuasaaki hītotapekari ikara atoko inakari hīkamini. ⁸ Uatxa ia atoko inakari hītakanapako: omanākaretxi, āti iteene txitiko, Teoso misākirepiretiko, maerekati sākiretxiti pakini. ⁹ Kona himisirienetakakapeua, kotxi hītakanapapekari maerekati mitxi hīkamakiti. Himāka kitxakari hōkini atoko, hītakanapapekari ikara maerekati.

¹⁰ Uatxa hīkamakiti amaneri. Himāka amaneri hīeretakini atoko, hīkamakiti uatxa amaneri. Teoso txīkitakari hīkamakiti amaneri inini, ininiā himarotari atāo inakari imaroretxi. Ininiā Teoso kamakiti atokokana hīkama, kotxi hīte kamakari itxaua. ¹¹ Uatxa kākiti apiari !auari. Krekoakori, Xoteoakori, Teoso takaōtxikare auaiōtakini, Teoso takaōtxikare mauaiōtakini, mimaroreni, kākiti ĩtopa auakani, nitiritxi amotakoni, kākiti miamotakoni pakini !auari kākiti apiari. Āti kākiti āti kākititxikana, kotxi Kristonoka Apiananiri. Iua aua ikinimane isākire auīākani ākixinireē.

¹² Ininiākara hiamonīkariko āti. Hīkamariko erekari ātimoni. !Hīuikapeua. Kanneenama !hīttxape. !Katimari homanākarauatini. Ikara atoko hāuako, kotxi Teoso mereēkini, iua nakitiakori, itiretakini hīttxaua. ¹³ Himīteenekakakauako. Himaxinīkaretariko apanakini kamakiti, hīte mapokaerekatakiniti. Kristo maxinīkaretapekari maerekati hīte kamakiti, ininiā iua atokotxikana himaxinīkaretariko maerekati apanakini kamakiti hītemoni. ¹⁴ Ikara erekari hīkamako. Erekarī apiari hīkamini, hītiraōkiuatini. Hītiraōkiuatako. Hītiraōkiuatakasaaki, ininiā iuasaaki ikinika hīkamakiti atāo.

¹⁵ Kristo kamaerekaxiniretai, ininiā erekari hākixinire. Hāuiritariko ikara erekari kaikotini. !Hīkamapiri ikara erekari makatxakiko ĩkapani. Hīkinika ātika ĩtotxi atoko hīttxaua. Teoso akiritai hīte hākixinire ereka inini ĩkapani. Hīttxariko Teoso ātipirika: “Erekapitikari pikamakiti nota ĩkapani,” hīttxako. ¹⁶ Hāuiritariko ikinika Kristo sākire kaikotini hākixinireē, ininiā iuasaaki himarore iteene aua. Hōerekakakaua. Hōtākikakakaua. Hīxikaretari xikari Teoso ĩkapani. Hīxikaretariko xikari Teoso sākire iōkatsopatakori xikariti. Hīxikaretariko xikari kitxakari, amaneri pakini Teoso ĩkapani. Hīxikarauatakasaaki, hākixinireē hīttxariko Teoso: “Erekapitikari pikamakiti nota ĩkapani.” ¹⁷ Ikinika hīkamakiti hīkamako Apiananiri Xesosi ĩkapani. Hīsākirauatakasaaki, hīsākirauata Apiananiri Xesosi ĩkapani. Iuasaaki hīttxariko aīri Teoso: “Erekapitikari pikamakiti nota ĩkapani,” hīttxariko.

Kākiti Aapoko Auakani Ōtākikiko

¹⁸ Hīte ĩtanorotxi, hīkīpitariko hītaniri sākire, kotxi Apiananiri nakiti hīttxaua, ininiā ikara atāo hīkamini.

¹⁹ Hīte ĩtaniritxi, hītiretaroko hītanoro. Kona hīttxitapero oa. Kona homanatapero.

²⁰ Hīte amarini, hīkīpitariko hīri, hinoro pakini sākire. Ikinika ninoa paniātakiti hīkamako, kotxi Teoso apokaerekatari ikara atoko inakari.

²¹ Hīte irītxi, kona hīkamanaiamanetapena hamariteakori, kotxi eereka maerekax-inireti aua ninoamoni, ininiā !nirekaikarina hīte paniātakiti ikaminina.

²² Hīte nitiritxi, hīpatrāote ikorapokoriti aua, ininiā hīkamariko ikinika ninoa paniātakiti. Apanakini iteene parīkauata ipatrāote apisatoō, iua apokaerekatiniri iġapani. Iua mauakanisaaki apaka iteene hīparīkauatako. Ikinika hīxinireritika hīkamariko hīparīka. Ikara atoko ininiā, atāo hīpaxitari Teoso. ²³ Ikinika hīkamakiti hīkamako hītaparax-inireritika. Hīparīkauatakasaaki, parīkatxi Apiananiri iġapani hīkamini atokotxikana, hīparīkauata kākiti iġapani. ²⁴ Hīparīkauatako ikara atoko, kotxi himarotari Apiananiri sikinii ipotetakiti iaxitikiri hīparīka iġi. Itixine hāpokasaaki, hāpakapariko. Apiananiri Kristo nitiriakori hītxaua. ²⁵ Maerekati kamakari apakapariko imisiritiko. Teoso misiritari āti maerekati kamakari, āti maerekati kamakari imisiritini atokotxikana.

4

¹ Hīte patrāo, hīkamariko atāo inakari hinitiriakori iġapani. Kona himisirienetapena ninoa. Kotxi hīte apaka aua hīpatrāote Teoso tixineē.

Apikomoni Paoro Ōtakikakiti

² Kona hītakanapapiri Teoso himisākiretini. Araōkire hītxako maerekati mapokakani iġapani. Ātipirika hītxariko Teoso: “Erekapitikari ikinipoko pikamakiti nota iġapani,” hītxariko iua.

³ Apaka himisākiretariko Teoso ate iġapani. Hamanaāriko Teoso, iua oerekiniua isākire apanakinimoni asāpiretini iġapani, kotxi anirekari asāpiretiniri kākiti Kristo pirena, mitxi kākiti mimarotakiniti. Ikara nisāpiretini xika, kateia āki naua.

⁴ Himisākiretariko Teoso, Kristo pirena atāo nisāpiretini iġapani, kākiti atāo imarotini iġapani.

⁵ Kimarorerini hītxauako Teoso sākire mauīākani sauaki hāuakasaaki. Aūini poiāo, ininiā ikiniōtika hinitari kākiti Teoso sākire hīsāpiretini iġapani.

⁶ Teoso sikapekai ikinipoko erekari, ininiā hīsākirauatakasaaki, hōerekari kākiti hīsākireē hītiretinina. Iōkira mauakaniā nipokoriā, !kaposeri. Iua atokotxikana erekari mauakaniā hīsākireē, kākiti !nirekari ikenakotiniri hīsākire. Erekarī hīsākire ininiā, himarotari hāpakapapiretiniri kākiti.

Paoro Iokanapiretini Pirena

⁷ Txīkiko inakori sāpiretaiko ikinika nota pirena. Aītari, atiretakiti itxaua. Iua parīkauatapitipo Apiananiri iġapani. Apiananiri nitiri itxaua atekata. ⁸ Niokanatarī iua hītemoni, hīte imaropiretini iġapani, hīte isikataparaxiniretini iġapani. ⁹ Niokanatarī Onésimo inakori apaka iuakata. Koroso sitatxitikiri iua, hīte atoko. Aītari atiretakiti itxaua apaka. Ātipirika atāo iparīkauata Kristo iġapani. Ninoa sāpiretaiko hīte ikinipoko Kristo sākire auīākani kamakiti uai.

¹⁰ Arisitako inakori, notakata kateia āki auakari, xinikamanapitai hīte. Panapee itaro ākiri Marko, xinikamanapitai hīte apaka. Nisāpiretapekai hīte Marko pirena. Ininiā ereē iua apokasaaki, hīpoxokoniritika hāpakapariko iua. ¹¹ Xosoe Xósito inakori xinikamanapitai hīte apaka. Ninoa ipi āti pakini Xoteoakori notakata parīkauatakani itxauana. Ninoa parīkauata notakata, Teoso auītetxi ininiua pirena asāpiretini iġapani. Isikataparaxiniretanona nota.

¹² Epāpara inakori apaka xinikamanapitai hīte. Ereēkiri iua. Kristo nitiri itxaua. Ātipirika imisākiretari Teoso hīte iġapani, Teoso nireēkitinoka hīkamini iġapani, ikinika hīkamakiti atāonoka hīkamini iġapani. ¹³ Nota imarotari iteene iparīkauatini hīte iġapani. Apaka nimarotari iparīkauata kākiti Araotxiséia sitatxiti auakani iġapani. Apaka nimarotari iparīkauata Ierapori sitatxiti auakani iġapani.

¹⁴ Aītari atiretakiti, amianari imarotakarī Arókasi inakori apaka xinikamanapitai hīte. Témasi inakori apaka xinikamanapitai hīte. ¹⁵ Hīsāpiretanako aītariakori Araotxiséia

auakani nixinikinina ninoa. Hīsāpiretaroko Nīpa inakoro, Teoso mereēkini oaāpoko apotiitakaniua pakini, nixinikinina ninoa. ¹⁶ Ia niokanatsopatakiti hātatsopatako hīkinika hīkenakotini īkapani, eereka hīpaniātariko atatsopatiko Araotxiséia sitatxitiā, Kristo sākire auiākani kenakotiniri īkapani. Apaka hīte atatsopatariko Araotxiséia auakani iokanatsopatakiti. ¹⁷ Hītchariko Akipo inakori: “Pikamariko ikinipoko parīkatxi Apiananiri paniātakiti pikamini.” ¹⁸ Nota Paoro niōkatsopatari ia niuakoā: Hīxinikariko kateia āki nauini. Teoso sikari ikinipoko erekari hītemoni. Ameē.

1 TESARÓNIKA

Merepanika Paoro Iokanatsopatakiti Tesarónika Auakanimoni

¹ Paoro, Síراسи, Tximótxio pakini iokanatsopata Teoso mereëkinimoni Tesarónika sitatxitiã. Aïri Teoso nakitiakori hïtxaua. Apiananiri Xesosi Kristo nakitiakori hïtxaua. Aïri Teoso, Apiananiri Xesosi Kristo pakini sikai ikinipoko erekari. Ninoa kamaerekaxiniretai hïte.

Paoro Misäkiretari Teoso Tesarónika Auakani Ìkapani

² Amisäkiretari Teoso hïte ìkapani. Ätipirika atxari Teoso: “Peerekai pite, kotxi Tesarónika auakani auikari pisäkire,” atxari. ³ Aïri Teoso amisäkiretakasaaki, axinikapikari hïte parïka Teoso ìkapani. Atão hïparïkauata, kotxi iteene häuikari iua säkire. Axinikari hïparïka Teoso ìkapani, kotxi iteene hïtoretari iua. Axinikari himarotiniiri Apiananiri Xesosi Kristo säkire iaõka hïkamini. Hïpoxokoniritika hiätapari isäkire iaõka apokini.

⁴ Nitariakori, Teoso tiretapitikai hïte. Iua mereëi hïte iua nakitiakori hininiua ìkapani. Aimarotari ikara. ⁵ Teoso iokanapirena erekari hïtemoni asäpireta Teoso posotiireë. Ate säkirenoka !kaposotiireri. Erekari Matamatakoti oerekai asäkire atão inini. Hïte iteene imarotari asäkire atãonoka inini. Hätamatarari aparïka hïte ìkapani hïte sauaki aäuakasaaki, ininiã himarotapitikaua ate. ⁶ Ininiã hïte kamari ate kamakiti atokotxikana. Hïkamari Apiananiri kamakiti atokotxikana. Himisiritiko aua, iuaritika häuikari Xesosi säkire. Himisiritiko aua, iuaritika Erekari Matamatakoti kamapoxokonitai. ⁷ Ininiãkara Masetónia tixini auakani, Akaia tixini auakani pakini nirekari hïte atoko ininina. ⁸ Inirekarina hïte atoko ininina, kotxi hïte säpiretari Apiananiri säkire Masetónia auakanimoni, Akaia auakanimoni pakini. Apaka ikini itixiti iaripireta hïte iteene auikiniri Teoso säkire. Ininiã kona ate säpiretari käkiti iteene häuikiniri Teoso säkire, kotxi ikinimane imarotape. ⁹ Ikinimane säpiretari hïpoxokoniritika häpakapiniua ate. Ninoa säpiretari hïte takanapiniiri teoso kamakori. Isäpiretarina hïparïkauatini uatxa Teoso atão inakari ìkapani, auäkipika inakari ìkapani. ¹⁰ Ninoa säpiretari, hïte iätapiniiri Teoso äkiri itixine auakari kanapiriini ìkorapokoriti. Iua Xesosi. Ipïkani sauaki Teoso õkitikakiti iua. Iua makatxakapekari amaerekani, ininiã amisiritiko !auaika käkiti misiritiko õti apokasaaki.

2

Paoro Parïka Tesarónika Sitatxitiã (Ätosi 17.1-9)

¹ Nitariakori, himarotari maxikatïka kona ate sari hïtemoni. ² Himarotari amisiritiko Piriposi sitatxiti aäuakasaaki, hïtemoni aäpokini apisa. Iuaã auakani äsokaua, kateia äki taka itxauana. Iuaritika Teoso sikataparaxiniretaua asäpiretiniri Teoso iokanapirena erekari hïtemoni. Itori käkiti !inirekari asäkire, iuaritika ate säpiretari Teoso iokanapirena erekari hïtemoni. ³ Ate oerekakiti !akeroka. Teoso nireëkitinoka anireka akamini. Äti anireëkiti !auari. !Anirekari amisirienetinii hïte.

⁴ Teoso auiritaua iua iokanapirena erekari asäpiretiniri käkiti. Teoso auikari atão asäpiretiniri isäkire käkitimoni, ininiã asäpiretari isäkire käkitimoni. Asäkirauata, kona käkiti akamapoxokonitini ìkapanini. Anirekari akamapoxokonitiniiri Teoso, kotxi iua ataerekatarari aäkixinire. ⁵ !Asäpiretai ereka hinini, ate nireëkiti hïkamini ìkapani. Asäpiretari Teoso säkire hïtemoni, kona hïte nakiti anirekini ìkapanini. Ikara himarotape. Teoso apaka imarotari ikara nisäkire atão inini. ⁶ Ate !anirekari käkiti iuikiniua ate. !Anirekai hïte iuikiniua ate. !Anirekari apanakini iuikiniua ate. Kristo iokanatakiniraua ate hïtemoni, ininiã aposotari apaniätinii ikinipoko anireëkiti hïsikiniua. Iuaritika !anirekari ikara atoko akamini. ⁷ Hïte sauaki aäuakasaaki iteene atiretai hïte. Sito tiretiniri oimi atokokana, ate tiretai hïte. ⁸ Iteene atiretai, ininiã anirekari asikinii

Teoso iokanapirena erekari. Kona iuananini anireka asikinii hīte. Axinire, aīto pakini anireka asikinii, kotxi ate tiretakini hītxapekaua. ⁹ Nitariakori, hīxinikari aparīka hīte sauaki. Pasāpaniri. Īkanōka, pokamara pakini aparīkauatapitipo, akiena, anirekiti pakini aāpakapini ĩkapani, kotxi !anirekari aamanainii hīte aamonitakiti ĩkapani. ! Anirekari hīte parīka apiatini ate ĩkapani, Teoso iokanapirena erekari asāpiretakasaakii.

¹⁰ Hīte Kristo sākire auiākani sauaki aāuakasaaki, hīte itikari aāuini ikiniōtika. Teoso apaka itikari. Himarotari Teoso nireēkitinoka akama iusaaki. Himarotari erekarinoka akama iusaaki. Himarotari !akamari maerekati iusaaki. ¹¹ Hīri atoko atxaua iusaaki, kotxi aōtākikai hīte. Amīkapiritai, imi iri mīkapiritini atokokana. Apaniātai atāo inakarinoaka hīkamini. ¹² Ikara atoko akaminii, kotxi Teoso anaakori hītxaua, ininiā anirekari hīte kaminiri hīri kamakiti iaōka. Iua akiritai hīte hīauīte inini ĩkapani. Inirekari hātamatini iua iotximere itixine hāuakasaaki. ¹³ Ininiā ātipirika amisākiretari Teoso: “Erekapitikai, kotxi Tesarónika auakani auikari pisākire, ninoamoni asāpiretakiti. Ninoa imarotari kona ate sākireni asāpiretana. Ninoa imarotari asāpiretana atāo pite sākire,” nitxari Teoso. Teoso sākire parīkauata hīte Xesosi sākire auiākani ākixinireē isākire hāuikini ĩkapani. ¹⁴ Xotēia tixini auakani, Kristo Xesosi nakitiakori, Teoso sākire auiākani, ninoa kamakiti atoko hīkamako hīte nitariakori. Xoteoakori misiritana ninoa. Iua atokotxikana hīte nirimane misiritapekai hīte. ¹⁵ Ninoa Xoteoakori okari Apiananiri Xesosi. Ninoa apaka okana ninoaka nirimane, Teoso sākire sāpiretakani. Ninoatxikana misiritapekaua ate. Teoso !apokaerekatari ninoa kamakiti. Ninoa omanatari kākiti. ¹⁶ Kotxi !auritarina Xesosi sākire asāpiretini Xoteo minakanuia, imaerekanina makatxakiko ĩkapani. Uatxa ninoa maerekani xāpoka. Uatxa Teoso omanākare apokaepka ninoamoni.

Paoro Ipiātina Tesarónika Auakani

¹⁷ Ātiātaā ate auakasaaki, ātipirika axinikapikai. Aīto hītekata mauakanisaaki, aākixinire xinikapikai. Ate ipiātai. Iteene anirekari iuaīkana aōkitinii. ¹⁸ Anirekapitikamari hītemoni akanapiriini. Nota Paoro itokata nirekamari napokini hītemoni, txamari Satanasi !auritaua asini hītemoni. ¹⁹ Aāuīte Xesosi āti ōti ikanapiriākasaaki, aāpotiitaua iua apisatoō. Iusaaki aiātapakiti apokaepka. Kipa aiātapakiti? Hītera. Iusaaki iteene apoxokoniutako. Kinirepa apoxokoniutako? Kotxi hīte aua iuaā. Iusaaki aāpakapari aparīka ĩki. Kinirepa aāpakapari aparīka ĩki? Kotxi hīte auikari Xesosi sākire ate sāpiretakiti. Ininiā peerekari iusaaki. ²⁰ Atāopitikara nisākire. Ate iuikai hīte. Hīte kamapoxokonitaua ate.

3

¹ Iusaaki !amīteenekari amimaropiretakanii hīte, ininiā axinikari atenoka kaikota uai Atena sitatxitiā. ² Ininiā iusaaki aiokanatarari aītari Tximótxio hītemoni. Teoso nitiri itxaua. Imoianataua Kristo iokanapirena erekari asāpiretakasaakiri kākiti. Aiokanatarari iua hītemoni, Xesosi sākire iteene hāuikini ĩkapani, isikataparaxiniretinii ĩkapani. ³ Ikara atoko ininiā, kona hīxinikari Teoso sākire hītakanapini, kākiti misiritinii xika, kotxi himarotari amisiritiko apokapitikako. Teoso auiritari. ⁴ Hītekata aāuakasaaki, asāpiretpekai amisiritiko apokini. Uatxa himarotapitikari atāo asākire, kotxi uatxa apopeka asākire iaōka. ⁵ Ininiā apikomoni !nimīteenekakarari nimimaropiretakanii hīte. Ininiā iusaaki niokanatarari Tximótxio hītemoni, Xesosi sākire hāuikini nimarotini ĩkapani. Nipīkari Satanasi sikanireōtinii hīte, Xesosi sākire hāuikini hītakanapini. Nipīkari maxikatīika Xesosi sākire asāpiretinii hīte, hītekata aāuakasaaki.

Tximótxio Sāpiretakiti Ikanapiriākasaaki

⁶ Uatxa Tximótxio kanapiripeka atemoni. Iua minapiretai hīte. Erekarari isāpiretakiti. Iua txaua ate: “Tesarónika auakani iteene auikari Xesosi sākire. Ninoa tiraōkiuatapika. Ipotxitarina ixinikiniina hīte. Ipiātina hīte, ninoa hīpiātini atokotxikana,” itxa Tximótxio atemoni. ⁷ Nitariakori, ate amaxikiko auapitika. Ate misiritiko auapitika, iuaritika hīkamapoxokonitaua, kotxi iteene hāuikari Xesosi sākire. ⁸ Uatxa peerekari ate auini, kotxi Apiananiri sākire iaōka hīkama. ⁹ Iteene apoxokoniutako Teoso apisatoō,

kotxi hãuikari iua sãkire. Axinikasaakii, apoxokoni iteene auapitika. Ininiã ätipirika atxari aTeosone: “Peerekai pite, kotxi Tesarónika auakani iteene auikari pisãkire, ininiã ikamapoxokonitauana ate,” atxari. ¹⁰ İkanõka, pokamara pakini iteene aamanaãri Teoso hıte iuaıkana aaõkitini, kotxi anirekari apikomoni Teoso sãkire himimarotakiniti aõerekinii.

¹¹ Anirekari aıri Teoso, aãuıte Xesosi Kristo pakini oerekiniãua aãpokini hıtemoni.

¹² Anirekari Apiananiri txıkitakinii himarotiniri hıtiretakakinia. Anirekari hıtiraõki aneini. Anirekari iteene hıtiraõkiuatini. Anirekari ikinimane apaka hıtiretini, ate tiretinii hıte atokotxikana. ¹³ Anirekari Apiananiri sikataparaxiniretinii hıte. Ininiã Apiananiri Xesosi Kristo ikinika inakitiakorikata İkasaaki uai, iusaaki maerekati lauauka hıtemoni aıri Teoso apisatoõ. Iusaaki hıte apoıtakari !auari. Iusaaki erekai hıte.

4

Akamakiti Teoso Apokaerekatakiti

¹ Nitariakori, apikomoni nisãpiretai. Asãpiretapekai hıkamakiti tıkane, hãuini Teoso apokaerekatini İkapani. Ikara atoko inakari hıkamapitika uatxa. Erekari hãuini uatxa, ininiã nõtãkikai Apiananiri Xesosi posotiireẽ, apikomoni iua apokaerekatakiti ikiniõtika hıkamini İkapani. ² Himarotapitikari aõereẽkiti hıkamini İkapani. Apiananiri Xesosi paniãtaua ikara aõerekinii hıte.

³ Teoso nirekari himaerekani xipokaãpotini hãkixinireẽ. Ininiãkara hıtaniri minakotikatika, hıtanoro minakotokatika, !hısirikape. ⁴ !Hãuiritapiri hıito nireẽkiti ikamini. Hıito auıte hıtxauako, ininiã maerekati hıito nireẽkiti !hıkama. Atão hıpxitariko hıteka İto, apanakini İto apaka. ⁵ !Apakata hıxinikiniri ätipirika maerekati hıito nireẽkiti äti İtokata hıkamini. Xoteo minakanıua, Teoso mimarotakani, xinikari ikara atoko inakari. ⁶ !Apakata hıtxıkitakiniri äti aıtari maerekati İtotxi nireẽkiti ikamini, kotxi Apiananiri misiritariko kãkiti ikara atoko inakari maerekati ikaminiã. Asãpiretapekai ikara. Apinitapekai. ⁷ Teoso kona akiritaua iuamoni, maerekati aıto nireẽkiti akamini İkapani. Akiritaua iua nakiti anıniua İkapani, erekarinoka akamini İkapani. ⁸ Ininiã ikara asãkire manirekakati, !omanataua ate. Omanatari Teoso. !Nirekari Teoso sãkire, kotxi Teoso sikari Erekari Matamatakoti kãkitimoni.

⁹ Hıtariakori hıtiretini pirena kona aiõkatsopata hıtemoni, kotxi Teoso oerekapekai hıtiretakakinıua. ¹⁰ Nimarotari hıtiretiniri ikinika hıtariakori Masetónia tixini auakani. Iuaritika nitariakori, aõtãkikai apiata hıtiretiniri kãkiti ikiniõtika. ¹¹ Hãpaiaõkariko hıtsorıkaätini. Apanakini parıka !himaãkatape. Hıkamariko hıteka parıka hãuini İkapani. Ikara atoko asãpiretapekai hıte. ¹² Ikara atoko hıkaminiã, Xesosi sãkire mauıakani paxitai. Ikara atoko hıkaminiã, !auari hiamonitakiti.

Apiananiri Kanapiriini

¹³ Nitariakori, anirekari himarotiniri atão inakari ipıkanı pirena. Kona anirekari himatinanıuatini Xesosi sãkire mauıakani matinanıuatini atoko, kotxi ninoa ipıkasaaki, !imarotarına isinimonına. ¹⁴ Aãuikari Xesosi ipinini. Aãuikari iuaıkana õkitikiniua. Ininiãkara aãuikari ipıkanı Teoso sãkire auıakani apaka õkitikiniua. Teoso minana ninoa Xesosikata ikanapiriãkasaaki. ¹⁵ Iusaaki ate auãkipanika inakanıua Apiananiri kanapiriãkasaaki, !asari ninoa mitxi ipıkanı apisapanika. Mitxi ninoa sa. Iposo atoko ate sa Apiananirimoni. Apiananirira sãpiretapekua ikara. ¹⁶ Iusaaki Apiananiri potorika itixine. Iuaka katxaka uaimoni. Iusaaki akiripoakata iua apokasaaki, ininiã kãkiti kenakotariko Teoso nitiriakori auıte sãkire. Teoso trõpetane xõkiko kenakotaãka. Iusaaki mitxi ipıkanı, Kristo sãkire auıakani, merepanika õkitikauako. ¹⁷ Eereka ate auapanika inakanıua anikaãkako ipıkanıkata Apiananiri aaõkitini İkapani. Aaõkitari iua itanoxiti katxiãriã. Ininiã eereka iuakata aãuapininiika. ¹⁸ Ikara sãkiretxiti hısãpiretakakauako, ininiã hıkamataraxiniretakakauako.

5

Apiananiri Kanapiriini Öti

¹ Nitariakori, kona asāpiretari Xesosi kanapiriini ōti. !Asāpiretari apokini kasiriti, ikanapiriinikanani pakini. ² Kotxi atāo himarotari, Apiananiri uai apokini, kiītiriri ikanōka apokini atokokana itxako. Ininiā kākiti !imarotari Apiananiri apokini ōti. ³ Iuasaaki kākiti sākire: “Neenamatxi !auari. Ereka. Imonōkoni !auari,” inakasaaki, iuasaakipeka katimaritika Teoso xipokari ikinipoko. Katimari sito amarini tsiīkini atoko itxako. Oa sito tsi apokasaaki, omitekini !auari. Iua atokokana kākiti mitekini !auari iuasaaki Xesosi kanapiriāksaaki. ⁴ Nitariakori, kākiti ipiā auakani atoko !hītxaua. Himarotapitikari āti ōti Apiananiri uai kanapiriini, ininiā hiātapari ikanapiriini ōti apokini, himatikokakani iċapani, kiītiriri tikokakiniri kākiti atoko himinakani iċapani ikanapiriāksaaki. ⁵ Hīte hīkinika kaiotximereri anaakori hītxaua. Pokamarari anaakori atoko hītxaua. !Akaikota ipiā. !Akaikota ikanōka, kotxi !anirekaikari maerekati akamini. ⁶ Ininiākara apanakini imakakani atoko !himapeko. Araōkire matxako, maerekati mapokakani iċapani. Aīto auīte matxaua. ⁷ Imakakani imaka ikanōka. Poātakani poāta ikanōka. !Iātapari Xesosi kanapiriini. Ikara atoko !hītxapeko.

⁸ Pokamarari anaakori atxaua, ininiā aīto auīte matxaua. Sotato takari itorota koana, itorota tokapare iċapani. Sotato torota koana atoko itxa Teoso sākire iteene hāuikini. Sotato torota koana atoko itxa apaka hītiraōki. Ininiā hāuikasaakiri Teoso sākire, hītiraōkiuatakasaaki, hākixinire tokapare auape. Sotato takari ikii tāta ikii tokapare iċapani. Sotato kii tāta atoko itxa amaerekani makatxakiko aimarotini. Ikara imaroretxi axinikakiti akii tokapare itxaua. ⁹ Teoso mereēua ate kona imisiritiniua iċapanini. Iua mereēua ate amaerekani aāuīte Xesosi Kristo makatxakini iċapani. ¹⁰ Iua ipina kākiti iċapani. Ipina iuakata aāuini iċapani. Ikanapiriāksaaki, isākire auīākani auākipanika inakani, ipīkani pakini aua iuakata. ¹¹ Ininiā hīsikataparaxiniretakakauako. Himoianatakakauako Teoso sākire iteene hāuikini iċapani. Uatxa ikara atoko inakari hīkamapeka.

Paoro Ōtākikare Mapotōkire

¹² Nitariakori, aōtākikai himarotinina hīte sauaki parīkauatakani, Apiananiri sākire sāpiretakani, hīte ōtākikakani. ¹³ Ininiā iteene hīpaxitanako. Hītiretanako ninoa, kotxi ninoa iteene parīkauata hīte iċapani. !Hītixitakakapeua. !Hineenamauatape. ¹⁴ Nitariakori, iteene aōtākikai hīte ia atoko: Hīpinitariko kākiti paniātakiti makīpitakani. Hīsikataparaxiniretariko pīkarauatakani. Himoianatariko mataparani. Katima !hītxapeko homanākarauatini kākiti kerokasaaki. ¹⁵ Kona hāuiritapiri misiritakori misiritiniri imisiritakiri. Ātipirika hīkamariko erekari hītariakorimoni, Xesosi sākire mauīākanimoni apaka.

¹⁶ Ātipirika hīpoxokoniuatako. ¹⁷ Himisākiretapikariko Teoso. ¹⁸ Hīpoxokoniuatakasaaki, hītxariko Teoso: “Erekari pikamakiti nota iċapani,” hītxako. Himatinaniuatakasaaki, iuaritika hītxariko Teoso: “Erekari pikamakiti nota iċapani,” hītxako. Ikara atoko Teoso nirekari ātipirika hīsāpiretiniri iua, kotxi Kristo Xesosi nakitiakori hītxaua. ¹⁹ !Hīotokakapiri Erekari Matamatakoti parīkauatini hākixinireē. Hīkamariko ipaniātakiti. ²⁰ !Homanatapiri Teoso sākire kākiti sāpiretakiti. ²¹ Hātaerekatariko ikinika. Erekarinoka hīkamako. ²² !Hīsipeko maerekati kamikoātaā, kotxi hīsiniā, apanakini xinikari atāo maerekati hinireka hīkamini.

²³ Anirekari Teoso, kākiti kamaerekaxiniretakari, iua iteene kamaerekatinii hīte iua nakitiakorinoka hininiua iċapani. Nimisākiretari Teoso hīte iċapani, hīxinire, hākixinire, hīto pakini ereka inini, ininiā aāuīte Xesosi Kristo uai apokasaaki maerekati !auaika hītemoni, ininiā hīte apoītiko !auari. ²⁴ Hīte akiritakari kamari isākire iaōka.

²⁵ Nitariakori, himisākiretariko Teoso ate iċapani. ²⁶ Haōkitakakasaakiua, hītiraōkiritika hāpakapakakauako, kotxi hītariakori itxauana. ²⁷ Apiananiri posotiireē nipaniātai hātatsopatiniri ia niokanatsopatakiti ikinika aītariakori kenakotini iċapani. ²⁸ Aāuīte Xesosi Kristo sikari ikinipoko erekari hītemoni. Ameē.

2 TESARÓNIKA

Paoro Iokanatsopatakiti Iuaĩkana Tesarónika Auakanimoni

¹ Paoro, Síراسи, Tximótxio pakini iokanatsopata Teoso mereėkinimoni Tesarónika sitatxitiã. Aĩri Teoso nakitiakori hĩtxaua. Apiananiri Xesosi Kristo nakitiakori hĩtxaua. ² Aĩri Teoso, Apiananiri Xesosi Kristo pakini sikai ikinipoko erekari. Ninoa kamaerekax-iniretai hĩte.

Xesosi Kanapiriini Pirena

³ Nitariakori, ātipirika atxari Teoso: “Erekapitikari pikamakiti Tesarónika auakani ĩkapani,” atxa. Ikara atoko asāpiretari Teoso, kotxi ikiniōtika Teoso sākire hāuikini apiaāpota. Apaka hĩtiretakiniua ikiniōtika apiaāpota. ⁴ Ininiã apanakini Teoso sākire auiākanikata aāuakasaaki, asāpiretana ninoa ate iuikinii hĩte. Ate iuikari himisiritiko himĩteenekini. Ate iuikari hāuikiniri Teoso sākire. Iteene himaxikiko, himisiritiko pakini, iuaritika himĩteenekari. Iteene hāuikari Teoso sākire.

⁵ Himisiritiko himĩteenekini oerekari Teoso misiritiniri maerekati kamakani, kotxi ikara atāo. Hĩte misiritaāka, kotxi hĩkamari hāuĩte Teoso paniātakiti, ininiākara iuamoni apakatapitika hāuini Teoso auĩtetxi ininiātaāua. ⁶ Teoso kamari atāo inakaranoka. Ininiã imisiritariko hĩte misiritakani. ⁷ Ixipokariko hĩte misiritiko, ate misiritiko apaka. Iuasaaki hĩtomata atekata. Ikara atoko inakari ikama, Apiananiri Xesosi oerekikosaaki Teoso tixine ipotorikasaaki, initiriakori kaposotiirerinkata. ⁸ Xamina tirinakariã imisiritanako Teoso mimarotakani, aāuĩte Xesosi Kristo iokanapirena erekari makĩpitakani. ⁹ Ninoa misiritaākako ātipirika. Ikinipoko xipope ninoa ĩkapani. ! Auiritaākana Apiananiri auiniātaã apokinina. !Atamatarina iua iotximere. !Atamatarina iposotiire. ¹⁰ Ninoa misiritaāka, Apiananiri kanapiriini ōtisaaki. Iuasaaki inakitiakori, isākire auiākani, txariko: “Peerekai. Peerekai. Āti kaposotiireri pite atoko inakari !auari,” itxanako. Ikara atoko hĩte apaka sāpiretari iua iuasaaki, kotxi hĩte auikari asāpiretakiti hĩtemoni.

¹¹ Ininiã amisākiretapikari aTeosone hĩte ĩkapani. Ia atoko atxari iua: “Pite akiritari Tesarónika auakani pinakitiakori ininiuana ĩkapani, ininiã ninirekari pite apokaerekatiniri ninoa kamakiti pite ĩkapani. Pisikaposotiiretana ninoa ikinipoko inireėkitina erekari ikaminina ĩkapani. Ninoa auikari pisākire, ininiã iparĩkauatana pite ĩkapani. Ininiã pisikaposotiiretana ninoa ikara iparĩkana ikaminina ĩkapani.” ¹² Ikara atoko amisākiretari Teoso, kotxi apanakini atamatakasaakiri erekari hĩkamakiti, itxarinako aāuĩte Xesosi Kristo: “Peerekai pite,” itxanako, ininiã Xesosi uāka iuikaāka. Apaka Xesosi txaike hĩte: “Peerekai hĩte,” itxaiko. Ikara atoko aua, kotxi aTeosone, Apiananiri Xesosi Kristo pakini sikari ikinipoko erekari hĩtemoni.

2

Apia Maerekati Apokini

¹ Nitariakori, maxinikari aāuĩte Xesosi Kristo kanapiriini. Maxinikari iuakata aāpoti-itiniua. Ikara axinikasaaki, aōtākikai hĩte. ² Apanakini sāpiretai: “Apiananiri kanapiriini ōti apokapeka,” itxana. Maerekaxiniretika !hĩtxape. Ikara atoko inakasaakina, ! hĩpĩkarauatape. Paxirari ninoa sākire. Atxiĩti ninoa txari: “Erekari Matamatakoti sāpiretano ikara.” Atxiĩti ninoa txari: “Paoro sāpiretari ikara.” Atxiĩti ninoa txari: “Paoro iōkatsopatari ikara.” Paxirari ninoa sākire. Kona hāuikapiri ikara atoko inakari. ³ Kona xatiki hāuiritapiri kākiti misirienetinii. Apiananiri kanapiriini apisapanika, kākiti !inirekari Teoso sākire ikĩpitini. Iuasaaki maerekati kamakari apiatakari apoka. Xipokatxi ākiri akiritaāka. Iua xipokaākapitikako. ⁴ Iua apia maerekati !inirekari Teoso paniātakiti ikamini. Iuikauako. “Kākiti teosonetakini posotiire poiāoka. Nota posotiire apiata,” itxako. Iuasaaki iitopāka Teoso misākiretiko aikoti āki. “Teosorano

nota. Notanokara Teoso txaua. *Āti Teoso !auari,*” itxako iuasaaki. ⁵ Hĭtekata nauakasaaki, nisāpiretapekai ikara. Atxiĭti hĭte xinikapanikari nisāpiretakiti? ⁶ Uatxa kona apakatapanika iua apia maerekati apokini. Himarotari Teoso !auiritari iua apokini uatxa. Iketo ōtinokara Teoso auiritari iua apokini. Iuasaaki iuaka oerekaua. ⁷ Maerekati kipatakori posotiire auape uatxa, iuaritika maerekati mauiritakati !auiritapanikari iteene maerekati iarikini. *Āti ōti maerekati mauiritakati makatxakaāka.* ⁸ Iuasaaki iua apia maerekati oerekaua kākitemoni. Apiananiri kanapiriākasaaki, okari iua. Ixōkare, isinanirenani xipokari iua. Iotximere xipokari iua apia maerekati. ⁹ Iua apia maerekati apokasaaki, Satanasi posotiire aua iuamoni. Ikamariko ikini sereti posotiiretxi kākiti maposotakiniti. Iua oerekari ikara, kākiti imisirienetini ĩkapani, isākire kākiti auikini ĩkapani. ¹⁰ Ikini sereti maerekati ikama kākiti pĭpinanaākani imisirienetini ĩkapani. Ninoa pĭpinanaākani xipokapitikako, kotxi !inirekarina atāo inakari itiretinina, ininiā imaerekanina makatxakiko !auari. ¹¹ Ininiā iuasaaki Teoso txĭkitakana auikinirina ninoa misirienetakani sākire, ininiā auikarina atāo minakati apiatakari. ¹² Ininiā atāo inakari mauikakati misiritaākako, kotxi iteene ioptxitari imaerekani.

Iteene Hāuikariko Teoso Sākire

¹³ Nitariakori, Apiananiri turetakinĭ, ātipirika erekari amisākiretiniri Teoso hĭte ĩkapani ia atoko: “Erekapitikai, kotxi pite mereēna Tesarónika auakani imaerekanina pimakatxakini ĩkapani.”

Itixi kamiko apisapanika, iua mereēi hĭte. Imakatxakari himaerekani, kotxi Erekarĭ Matamatakoti txĭkitakai Teoso nakitiakori hininiua. Imakatxakari himaerekani, kotxi hāuikari atāo inakari. ¹⁴ Teoso iokanapirena erekari asāpiretakiti hĭtemoni hāuikasaaki, iuasaaki Teoso akiritai hĭte. Ininiā aāuĭte Xesosi Kristo iotximere hĭte apaka apakapako. ¹⁵ Ininiā nitariakori, iteene kataparaxinire hĭtxako. Iteene hāuikariko Teoso sākire asāpiretakiti, aiōkatsopatakiti pakini. !Hĭtakanapapiri.

¹⁶ Anirekari aāuĭte Xesosi Kristo, aĭri Teoso pakini sikataparaxiniretinii hĭte. Ninoa iteene turetāua. *Ātipirika isikataparaxiniretāua.* Isikaua erekari aiātapini ĩkapani. Aimarotari ikara erekari apokapitikako. Ikara atoko inakari ikama ate ĩkapani, kotxi isikaua ikinipoko erekari. ¹⁷ Erekarĭ hĭsākiretakasaaki, erekari hĭkamakasaaki, anirekari isikataparaxiniretinii hĭte apikomoni erekari hĭkamini ĩkapani.

3

Himisākiretariko Teoso Ate ĩkapani

¹ Nitariakori, nisākire mapotōkire apoka. Himisākiretariko Teoso ate ĩkapani Apiananiri sākire katima iaripiretini ĩkapani. Himisākiretariko Teoso Apiananiri sākire auikiko ĩkapani, hĭte auikiniri atokotxikana. ² Himisākiretariko Teoso imakatxakiniua ate amapinakani ĩkapani, maerekati kamakani sauaki aāuakasaaki, kotxi apanakini !auikari Teoso sākire. ³ Apiananiri kamari ikinika isākire iaōka. Iua sikataparaxiniretai hĭte. Itokapakeētai, ininiā Satanasi !inokai. ⁴ Apiananiri txĭkitakaua ate aimarotiniri ate paniātakiti hĭkamini. Ate imarotari, katana apaka hĭkamapanikariko asākire iaōka. ⁵ Anirekari Apiananiri oerekinii Teoso tiraōki. Anirekari himĭteenekiniri ikinika himisir-itiko, Kristo imisiritiko imĭteenekini atokokana.

Kākiti Paniātakiti Makĭpitakani

⁶ Nitariakori, aāuĭte Xesosi Kristo nireēkiti iaōka asāpiretai hĭte, ininiā apaniātai ia atoko. Hĭtari kākiti paniātakiti makĭpitakati, aōereēkiti iaōka imakamakaniā, ininiā iua moianari !hĭtxapeuako. Hĭtakanapariko iua. ⁷ Hĭte imarotari akamakiti iaōka hĭkamini, kotxi hĭtekata aāuakasaaki ate kĭpitari kākiti paniātakiti. ⁸ Kona anikari nipokori amaĭkitxitakiniti. Iuasaaki iteene aparĭkauata. *Īkanōka,* pokamara pakini aparĭkauata akiena aiamotini ĩkapani, kotxi !anirekari hĭte kaamatini hĭte kiena. ⁹ Apakatapitika kākiti ĩkitxitiniua aparĭka ĩkapani, iuaritika !anirekari hiĭkitxitiniua, kotxi anirekari hĭte parĭkauatini ate parĭkauatini atokokana. ¹⁰ Hĭtekata ate auakasaaki, ate paniātai hĭte ia atoko: “Kākiti manirekakaniāri iparĭkauatini, !inikapani.”

¹¹ Ate kenakopiretari hīte sauaki auari kākiti paniātakiti makīpitakani. !Iparīkauatana. Ātipirika ipotxitarina imarotininirina āti kākiti kamakiti. ¹² Aāuīte Xesosi Kristo posotiiireē, apaniātana kākiti ikara atoko inakani iparīkauatinina. Aōtākikana iparīkanoka ikaminina ikienana apokinina īkapani. !Himaākatapiri apanakini kamakiti. ¹³ Nitariakori, !hīsāpakape erekari hīkamini.

¹⁴ Kākiti ereē makamakaniāri ate oṭākikakiti ia iōkatsopariā, erepaniko iua. Iua moianari !hītxapeuako. Hītakanapariko iua, ininiā iuasaaki atxiīti ipētauata. Iuasaaki atxiīti iuaīkana atāo ikama. ¹⁵ Imoianari !hītxapeuako, iuaritika himokaiakari !itxaua. Hīpinitariko iua, kotxi hītari itxaua.

Paoro Sākire Mapotōkire

¹⁶ Anirekari Apiananiri, kākiti kamaerekaxiniretakari, kamaerekaxiniretinii hīte ikiniōtika. Anirekari iua kaikotini hītekata.

¹⁷ Nota Paoro iōkatsopata nisākire mapotōkire niuakoā. Ia nitakaōtxikare, ininiā himarotari atāo ia nota iokanatsopatakiti. Ia atoko inakari niōkatsopata. ¹⁸ Aāuīte Xesosi Kristo sikari ikinipoko erekari hīte hīkinikamoni. Ameē.

1 TXIMÓTXIO

Merepanika Paoro Iokanatsopatakiti Tximótxiomoni

¹ Nota Paoro iokanatsopata pite Tximótxiomoni. Xesosi Kristo iokanapirena sãpiretakari nota. Teoso amaerekani makatxakakari itxaua. Aimarotari Xesosinoka anikaua Teoso tixinemoni. Apiananiri itxaua. Teoso, Xesosi Kristo pakini iokanatano nota kãkitimoni, iokanapirena nisãpiretini ïkapani. ² Pite Tximótxio, nota ãkiri atoko pitxaua, kotxi merepitipanika pauikari Xesosi sãkire nota sãpiretakasaakii. Aïri Teoso, aãuïte Xesosi Kristo pakini sikai ikinipoko erekari. Iamonïkaina. Ikamaerekaxiniretaina pite.

Atão Minakati Oerekakani

³ Masetônia tixinimoni nisikasaaki, nipaniãtai pite Épeso sitatxiti pikaikotini. Uatxa iuaïkana nipaniãtai ereë Épeso pikaikotini. Ikara ninireka, kotxi apanakini ereë auakani oerekari Teoso sãkire kãkitimoni, txamari na atãoni ninoa oerekakiti. Ninirekai pite pinitinina ninoa atão minakati imoerekakanina ïkapani, ⁴ kotxi ninoa sãpiretapikari kitxakapirïkari pirena. Ninoa xinikapikari aãtokiriakorini uãka, ininiãkara kãkiti taparakienatakakaua iuãkana ixinikasaakina. Põtãkikanako ninoa ikara atoko inakari sãkiretxiti itakanapinina, kotxi ikara sãkiretxiti !oerekari kãkiti Teoso nireëkiti. Teoso sãkire aãuikiniã, aimarotari Teoso nireëkiti. ⁵ Nipaniãtai pite ikara atoko, kotxi ninirekari ereë Teoso sãkire auïãkani tiretakakiniua. Kãkiti ãkixinire maerekati mauakaniã, ininiã itiretakakaua. Kãkiti imarotakasaakiri ikamakiti ereka inini, itiretakakaua. Kãkiti ikara atoko inakari atão auikari Xesosi sãkire. ⁶ Kãkiti, Teoso sãkire atão masãpiretakani, takanapari ikara erekari kimaporiti. Pïpinanaãkani atoko itxauana, kotxi !imarotaikarina Teoso kimapore. Maxikatiïka isãkirauatapikana. ⁷ Ninoa kãkiti nirekamari Teoso paniãtakiti oerekakani ininiuana, txamari !imarotarina Teoso paniãtakiti. !marotarina isãpiretakitina, iuaritika ninoa: “Atãopitika asãkire,” itxanãtana.

⁸ Kãkiti atão sãpiretakasaakiri Teoso paniãtakiti iõkatakori, iuasaaki aimarotari ipaniãtakiti ereka inini. ⁹ Mauritakoti aua, kona kãkiti atão inakari kamakani ïkapanini. Mauritakoti aua, kotxi maerekati kamakani auapitika. Aua mauritakoti manireëkani. Aua Teoso manireëkani. Aua maerekati kamakani. Aua erekari manireëkani. Aua Teoso paniãtakiti napetakani. Kãkiti aua iri okakani. Kãkiti aua inoro okakani. Aua kokanirini. Mauritakoti aua, kãkiti ikara atoko inakari ïkapani. ¹⁰ Aua kãkiti ãti ïtanorokata sirïkakari. Aua kãkiti ãto tanirikata sirïkakaro. Aua kiki ãti kikikata sirïkakari. Aua sito ãto sitokata sirïkakaro. Aua kãkiti ãti kãkiti ïtiriãkani ivëtxitiniri ïkapani. Aua aãpirenaãri. Aua kãkiti ãti apoïtakani. Mauritakoti aua ikara atoko inakari kãkiti ïkapani. Ninoa !auikari Teoso sãkire atão inakari. ¹¹ Ikara Teoso iokanapirena erekari sãpiretaua. Peerekari Teoso. Peerekari iua iokanapirena. Iua paniãtano nota iua iokanapirena nisãpiretini ikininapemoni.

Teoso Amonïkiniri Paoro

¹² Nitxari aãuïte Kristo Xesosi: “Erekari pite kaminano, kotxi pisikataparaxiniretano nota pite ïkapani nïparïkauatini ïkapani. Erekari pauikiniri nisãkire. Erekari pimereinino nota pisãkire ikininapemoni nisãpiretini ïkapani,” nitxari Kristo Xesosi. ¹³ Meresaaki nota misãkirepiretari iua Xesosi. Nasikatikinitana iua sãkire auïãkani nokinina ïkapani. Kaneenamari nitxaua iuasaaki. Iuaritika Teoso amonïkano. ! Imisiritano nota, kotxi iuasaaki !nimarotari nikamakiti Xesosi sãkire nimauikakani xika. ¹⁴ Iuasaaki !erekano. Maerekati nitxaua. Iuaritika aãuïte Kristo Xesosi sikari ikinipoko erekari notamoni. Kristo Xesosi nakiti nitxapekaua, ininiãkara nauikari isãkire. Iua nakiti nininiãua, nitiretari iua. Nitiretari apanakini apaka. Mitxi !nimarotari nitiraõkiuatini. ¹⁵ Nisãpiretaiko ia sãkiretxiti atão inakari, pauikiniri ïkapani, ikinimane auikiniri ïkapani. Nitxai: “Kristo Xesosi apoka ïkorapokoriti maerekati kamakani maerekani imakatxakini ïkapani,” nitxa. Maerekati apiata kamakari nitxaua nota. ¹⁶ Maerekati apiata kamakari nitxaua, iuaritika Teoso !imisiritano. Iamonïkano, kotxi

inirekari apanakini imarotiniri Kristo matima omanãkarauatakani kãkiti maerekani xika. Xesosi nirekari nota eereka auakani, isãkire auiãkani imarotiniri Xesosi amonĩkina ninoa, kotxi iua amonĩkano nota maerekati apiata kamakarino. Ninoa auikari isãkire, ininiãkara auapininiika Teosokata. ¹⁷ Nitxari Teoso: “Ari Teoso, peerekai. Átipirika ikinimane auite pitxaua. Pipinini !auari. Matamatakoti pitxaua. Pitenokara Teoso txaua. Pitenokara kimaroreri. Ikinimane paxitaiko átipirika. Ikinimane átipirika sãpiretaiko ereka pinini. Atãopitikara nisãkire. Ameẽ.”

Xesosi Sãkire Iteene Auikiko

¹⁸ Tximótxio, namarite atoko pitxaua. Nisãpiretai noerekakiti sãkiretxiti pikaminiri ïkapani. Pixinikariko akokaxiti Teoso sãkire sãpiretakani sãpiretakiti. Ninoa sãpiretai Teoso nirekakiti pite kamini tĩkane. Nota sãkire uatxa ninoa sãkire atokotxikana. Ikara ninoa oerekakiti sãkiretxiti pikamapikako, ininiãkara pite sotato erekari atoko pitxaua Satanasi pinaiatini. ¹⁹ Pauikapikariko Xesosi sãkire. Ikara pikeeko atoko itxa. !Pikamapiri pãkixinire mapokaerekatakiniti. Ikara apaka pikeeko atoko itxa. Apanakini kamapekari ãkixinirena mapokaerekatakiniti, ininiã eereka !auikaikarina Xesosi sãkire. Kanaua sakikini atoko itxa ninoa auikiniri Xesosi sãkire. ²⁰ Imeneo inakori, Arexãtri inakori apaka ikara atokokana itxana. Ninoa misãkirepiretari Teoso, ininiãkara nota sikanapana ninoa Satanasi. Satanasi misiritakasaakina ninoa, atxiiti itakanaparina Teoso imisãkirepiretinina.

2

Teoso Misãkiretiko Ikinimane ïkapani

¹ Merepanika nõtãkikai pimisãkiretiniri Teoso ikininape kãkiti ïkapani. Pimisãkiretariko Teoso ninoa nireẽkiti ïkapani. Pamanaãriko Teoso sikiniri erekari ninoamoni. Pitxariko Teoso: “Peerekai pite, kotxi erekari pisikakiti kãkitimoni.” ² Teoso pimisãkiretako auĩtetxiakori apiari ïkapani, auĩtetxiakori poiãori ïkapani apaka. Pamanaãriko Teoso ninoa ïkapani, aãuini ereka inini ïkapani, neenamati mauakani ïkapani. Ikara atoko aniniã, akamari Teoso nireẽkiti erekarinoka. ³ Ikara akaminiã erekapitikari. Teoso, amaerekani makatxakakari, apokaerekatari asãkire ikara atoko inakari akamini. ⁴ Teoso nirekari imaktxakiniri ikinimane maerekani. Inirekari ikinimane imarotiniri atão inakari sãkiretxiti. ⁵ Átinokara Teoso aua. Áti kikinokara mikanapiriãri kãkiti Teosomoni. Xesosi Kristonokara mikanapiriãri kãkiti Teosomoni, kotxi iuanoka misãkiretari Teoso kãkiti ïkapani. ⁶ Iua ipina ikinimane kãkiti iĩkitxitini ïkapani. Teoso ketotini õti manapi Xesosi ipina. Xesosi ipinini oerekaua Teoso nirekiniri imaktxakiniri ikinimane maerekani. ⁷ Ininiãkara Teoso akiritano nota isãkire ikinimanemoni nisãpiretini ïkapani. Ininiã Teoso iokanatakiti kãkitimoni nitxaua nota. Ikara nisãkire atão. Kona paxirarini. Teoso akiritano Xoteo minakaniua noerekini ïkapani. Akiritano atão inakari sãkiretxiti noerekinina ïkapani. Akiritano noerekinina Teoso sãkire auikinina ïkapani.

⁸ Ininiã ninirekari kikiakori erekarinoka kamakani, ikini itixiti auakani, misãkiretiniri Teoso. Ninirekari Teoso imisãkiretakasaakina, iusaaki ninirekari isãkire auikinina apaka, áti imomanatakanina.

Sitoakoro Xesosi Sãkire Auiãkani

⁹ Ninirekari sito mãka atão inini, kiki paxitiniro ïkapani. !Apakata oũuikiniua omãka ereka inini xika. !Erekari sito átipirika oeretiniri oiãko kãkiti xikaueretiniro ïkapani. Oro, pérora pakini otakiniã oiãtoã kãkiti xikaueretiniro ïkapani, !erekari. !Erekari mãkatxi kakaroneri oieretakini. ¹⁰ Sito Teoso nireẽkiti nireẽkaro kaminiãri erekari, erekapitikari. Mãkatxi peereri atoko itxa erekari okamakiti, kotxi kãkiti atamatari okamakiti. ¹¹ Teoso sãkire sãpiretakari oerekarauatakasaaki, erekari sito kenakotiniri. !Apakata iusaaki osãkirauatini. Erekari opaxitiniri iua, isãkire okĩpitini ïkapani. ¹² Nota !auiritaro sito oerekinina kikiakori, ikamakitina tĩkane opaniãtinina. Erekari masãkiretoka onini. ¹³ Ikara atoko itxa, kotxi merepitipanika Teoso kamari kiki Adão inakori. Eerekaikara ikamaro sito Eva inakoro. ¹⁴ Kona Adãoni misirienetaãka. Sitora misirienetapeẽka. Oa

kamari maerekati, kotxi !okamari Teoso paniātakiti, ininiākara !apakata sito paniātiniri kiki ikamakiti tīkane. ¹⁵ Sito auikiniāri Teoso sākire, otiretiniāri apanakini, maerekati omakamakaniā, omasarauatakaniā, Teoso makatxakari omaerekani, kotxi āto sito eene-tari Xesosi, amaerekani makatxaākari.

3

Kōtākikarerini Pirena

¹ Ia nisākire atāo. Kiki nirekiniāri kōtākikarereri ininiua, Teoso sākire auīākani ōtākikini inirekiniā, iua nirekari parīkatxi erekari. ² Ia atoko kōtākikarereri txauako: !Ikamari maerekati, ininiā iua apoitiko lauari. Ātonanirako ĩtanoro. Kiīkiteri itxauako. !Katimari omanākarauatini. Ipaxitaākako. Kākiti ātiātaā ĩkani apakapako aapoko. Imarotariko oerekarauatini. ³ !Ipoātapeko. Kaneenamari litxapeuako. Katiraōkiri itxauako. !Ipotxi-tapiriko neenamati. Txineiro iteene !ixinikaperoko. ⁴ Iua nīkatanako aapoko auakani, ninoa auini ereka ininina tīkane. Itxīkitakanako imiakori ipaniātakiti ikīpitinina ĩkapani, ininiā ninoa paxitari iua. ⁵ Ikara atoko itxako kōtākikarereri, kotxi aapoko auakani imamimatanīkaretakaniā, ininiā !imarotari kākiti Xesosi sākire auīākani inīkatini. ⁶ Kiki mapaōtinoka auikiniāri Xesosi sākire, !apakata iua Xesosi sākire auīākani ōtākikakari ininiua. Xesosi sākire auīākani ōtākikakari ininiāua, iuikaua atxiīti. Iuikiniāua, Teoso misiritari iua, kitxakapirīka Satanasi iuikasaakiua imisiritini atokokana. ⁷ Kiki Xesosi sākire auīākani ōtākikakari paxitaākako, Xesosi sākire mauīākani apaka paxitari iua. Ikara atoko ininiā, !ikamapaniri kākiti kamapētatakari. Ininiā Satanasi !imaīkari iua itakapiremoni.

Kamiparīkarerini Pirena

⁸ Ātipekana, Xesosi sākire auīākani miparīkatakanipekana nisāpiretaiko: Iua kamariko erekari, ipaxitiko tīkane. Ātika isākire itxauako. !Ipoātapeko. !Apakata txineironoka ixinikini. ⁹ Kamiparīkarereri iteene auikariko Teoso sākire atāo inakari. Ākixinire imarotariko ikaminiri Teoso sākire iaōka. ¹⁰ Xesosi sākire auīākani ataerekatariko kiki, kamiparīkarereri ininiua nireēkari. Erekarinoka ikaminiā, ininiā iua auiritaāka ninoa miparīkatakari ininiua. ¹¹ Iua atokokana kamiparīkarereri ĩtanoro kamariko erekari opaxitiko ĩkapani. Aāpirena !okamapeko. !Opoātapeko. Okamariko okamaenetakiti iaōka. Ininiā kākiti auikari osākire. ¹² Ātonanirako kamiparīkarereri ĩtanoro. Inīkatariko imiakori, kākiti iua aapoko auakani apaka, ninoa auini ereka ininina ĩkapani. ¹³ Kamiparīkarereri atāo parīkauatiniā, iteene ipaxitaāka. Apanakini apokaerekatarari iparīka. Ininiā itaparax-iniriritika isāpiretari Kristo Xesosi sākire auikiko kākitemoni.

¹⁴ Uatxa pitemoni niōkatsopatakasaaki, ninirekari paītiki nisini hītemoni. ¹⁵ Atxiīti uai okanani nauapanika, ininiā ia iōkatsopari oerekaiko pite Teoso nakitiakori atāo auini ikiniōtika, kotxi Teoso aapoko atoko atxaua, iua auiniātaā ĩkapani. Teoso auāki itxapika. Kākiti iua nakitiakori nīkatari iua sākire. !Auiritana apanakini koketiniri atāo minakati Teoso sākirekata. Isāpiretana ikinimane Teoso sākire atāo inakari. ¹⁶ Peerekari Teoso parīka kākiti ĩkapani. Merepanika kākiti !imarotari, eereka Teoso oerekari iparīka. Ia atoko Teoso kaminua ate:

Kākiti itxapekaua. Iua Xesosi. Erekari Matamatakoti oerekari kākiti Xesosi sākire atāo inini. Teoso nitiriakori iaxitikini atamatari iua. Isākire sāpiretaāka ikini itixiti auakanimoni. Kākiti auikari isākire. Eereka Xesosi anikaāka iaxiti Teoso tixinemoni.

Ikara atoko inakari Teoso parīka kākiti ĩkapani.

4

Atāo Minakati Oerekakani

¹ Iua Erekari Matamatakoti sāpiretaua, apanakini !auikaikari Xesosi sākire itixi mapotōkire ōti takote. Ikara atāo. Iuasaaki ninoa auikari maerekani matamatakoni misirienere. Auikarina Satanasi nitiriakori oerekakiti. ² Kākiti ikara atoko inakani sāpiretari atāo minakati. Ninoa sākire āti, txamari ninoa xinikakiti ipinimoni. Ninoa

ākixinire sākire !auaika. !Isāpiretaikarina maerekati imakamakanina ikapani. Kapatakari arikakiti atoko itxa ninoa ākixinire sākire. ³ Kākiti ikara atoko inakani ! auiritari kākiti itanorouatini. “!Erekari kākiti itanorouatini,” itxa ninoa sākire. Teoso kamari ikini nipokori kākiti nikini ikapani. Txamari ninoa kamisirienererini !auiritari kākiti apanakini nipokori inikinina. Teoso nirekari Xesosi sākire auiākani, atāo inakari imarotakani, nikiniri ikara nipokori Teoso imisākiretaka atoko: “Erekapitikai ia nipokori pisikiniāua.” ⁴ Ikinika Teoso kamakiti erekari. !Apakata kākiti manirekakaniāri apanakini nipokori. Ikinipoko nipokori hinikasaaki, himisākiretariko Teoso. Hītchariko: “Erekapitikai ia nipokori pisikiniāua.” ⁵ Teoso sākire sāpiretaua ikinipoko nipokori anikini. Nipokori anikasaaki, amisākiretiniāri Teoso, nipokori isikakiti ereka inini asāpiretiniāri, ininiā ikara nipokori erekari anikini.

Kristo Xesosi Nitiri Erekari Inakari

⁶ Aītariakori pōtākikiniā ikara atoko, Xesosi Kristo nitiri erekari pitxaua. Nipokori sikataparatarari kākiti ito. Teoso sākire aāuiākiti, oerekaretxi atāo inakari, nipokori atoko itxa, kotxi isikataparatarari axinire. Pite auikapikari oerekaretxi atāo inakari. ⁷ !Pimaākatapiri mīikiteti sāpiretakiti, sākiretxi Teoso mapokaerekatakiniti. Ikiniōtika piteka poerekauako Teoso paniātakitinoka pikamini, ininiā Teoso nireēkitixkana pikama. ⁸ Piīto parīkauatakasaaki, piīto tapara apiaāpota, ininiā erekari piparīkauatini. Apiaerekata pixinire parīkauatini pixinire auāki inini ikapani. Pixinire ikorasaaki auāki ininiā, pauapikako Teosokata ātipirika. ⁹ Ikara nisākire atāo. Erekari ikinimane auikiniri ikara. Erekari ikinimane kaminiri ikara. ¹⁰ Ininiākara iteene aparīkauata Teoso ikapani. Pasāpaniri, iuaritika aparīkauatipitipo, kotxi aāuikari Teoso sākire, Teoso mipikati sākire. Iua ikinimane kākiti maerekani makatxaākari itxaua. Iua makatxakari isākire auiākani maerekani, maerekani misiritikoātaā imasikanina ikapani.

¹¹ Pipaniātariko kākiti noerekakiti sākiretxiti iaōka ikaminina. Poerekana noerekakiti.

¹² Pite ātokoripanika, iuaritika pimarotapitikari Teoso sākire, ininiā !pauiritapiri kākiti napetiniri poerekakiti sākiretxiti. Atāo inakarinoka pikamako Xesosi sākire auiākani atamatini ikapani, ininiākara ninoa auikapitikariko pisākire, ininiā ninoa nirekari pite atoko ininina. Erekarinoka pisāpiretako. Erekarinoka pikamako. Kākiti pitiretako. Iteene pauikariko Teoso sākire. Maerekati !pikamapeko. Ikara atoko pininiā, ninoa nirekari pite atoko ininina. ¹³ Ereē nimapokakanisaakipanika, patatsopatariko Teoso sākire iōkatsopatakori, apanakini kenakotiniri ikapani. Pisāpiretanako Teoso sākire. Teoso sākireē pōtākikanako. Poerekana Teoso sākire atāo imarotinina ikapani. Ikara atoko pitxapikanako, ereē napokini apisapanika. ¹⁴ Akokaxiti kōtākikarerini sāpiretai piparīka Teoso ikapani. Iuasaaki ninoa takari iuakona pite nopini, pite ikapani imisākiretakasaakirina Teoso. Ikara atoko ininiākara, pikamapikariko ikara piparīka Teoso ikapani. ¹⁵ Ātipirika pixinikariko ikara nōtākikini. Ikiniōtika pikamariko piparīka Teoso ikapani. Ininiā apanakini imarotari Teoso sākire apiaāpota pauikini. ¹⁶ Erepaniko pikamakiti ereka inini ikapani. Erepaniko poerekakiti sākiretxiti Xesosi oerekakiti iaōka inini. Ikara ātipirika pikaminiā, piteka makatxakaua pimapinakani ikapani. Apaka pimakatxakana pisākire auiākani imapinakani ikapani.

5

Ōtākipirenatxi Pirena

¹ !Pitxitapiri kiki aneēkari. Pōtākikariko, piri pimisākiretini atokokana. Pōtākikariko kikiakori pite tikini auakani, pitariakori pimisākiretini atokokana. ² Pōtākikaroko sito aneēkaro pinoro pōtākikini atokokana. Pōtākikaroko ātokoro, pitaro pōtākikini atoko. Iuasaaki pipaxitaroko.

Sitoākini Tikinitakoni

³ Piniākatanako sitoākini tikinitakoni onirimane matiretakini. ⁴ Tikinitakoro oimiakori auiniā, oītariakori anaakori auiniā, ninoa nīkatamaroko oa. Ikara ikaminiāna, erekari Teosomoni. Teoso poxokotana ninoa. Merepanika ninoa kaminiāri erekari

ninoaka aapoko āki, aimarotari ninoa atāo auikiniri Teoso sākire, kotxi meresaaki irina, inorona pakini nīkatana ninoa. ⁵ Tikinitakoro minīkatakoto auikari Teoso inīkatiniro oa. Oa misākiretari iua pokamara, īkanōka pakini inīkatiniro īkapani. ⁶ Tikinitakoro osarauatininoka nireēkaro, ipīkaro atoko otxaua. ⁷ Pisāpiretanako ereē auakani, Xesosi sākire auiākani nīkatiniro inorona, inorona itaro tikinitakoro pakini. Inīkatiniāna, ! apoītaākana. ⁸ Xesosi sākire auiākani manīkatakaniāri inirimane, itakanaparina Teoso sākire auikinina. Apia maerekanita iua aapoko āki auakani imanīkatakaniā. Kākiti Teoso sākire mauīākati maerekati itxaua. Apia maerekati itxaua iua aapoko āki auakani manīkatakati.

⁹ Apanakini sito tikinitakoni moianatana Xesosi sākire auiākani. Pitakariko ninoa tikinitakoni uāka aātsopaā himoianatini īkapani. Sito ikara atoko inakaro sesēta ano apiko auakaro oa. Ātinoka oītanirini. ¹⁰ Oa imarotaāka, kotxi erekarinani okama. Atāo oōerekari oimiakori. Osikakienatana ātiātaā īkani. Oimarotaāka, kotxi oa arokakititari kākiti Teoso nakitiakori. Oimarotaāka, kotxi kākiti maerekaxinireni otireta. Oimaro-taāka, kotxi ikini sereti erekari ātipirika okama. Tikinitakoro ikara atoko inakoro uāka aātsopaā pitaka himoianatini īkapani.

Tikinitakoni Ātokoropanika Inakani Ōtākikiko

¹¹ !Pitakapiri tikinitakoro uāka iua aātsopaā, ātokoropanika inakaro, kotxi iuaīkana onirekari kikikata osirīkini, ininiā onirekari iuaīkana oītaniriuatini, ininiā !onirekaikari Kristo. ¹² Ikara atoko okaminiā, okamari maerekati, kotxi mitxi osākire: “Nikamariko parīkatxi Teoso īkapaninani. !Nītaniriuataikako,” otxama. ¹³ Tikinitakoro ātokoropanika inakaro itotari oiarinauatini. Oianapokotapika. Apia maerekati okama, kotxi ototari aāpirena okamini. Onirekari ikinika apanakini kamakiti oimarotini, txamari ikara atoko !apakata. !Apakata āti kamakiti osāpiretini apanakinimoni. ¹⁴ Ikara atoko ininiā, ! pitakapiri tikinitakoro ātokoro inakaro uāka iua aātsopaā. Nota ōtākikana ātokoroakoro tikinitakoni iuaīkana taniriuatini. Erekari keene ininina, aapokona iparīkauatinina. Ikara atoko ininiā, Xesosi sākire mauīākani kona misākirepiretana Xesosi sākire auiākani. ¹⁵ Nota ikara atoko nisāpiretai, kotxi ātikaka tikinitakoni ātokoroakoro inakani takanapa-pekari Xesosi sākire auikinina, Satanasi paniātakiti ikaminina īkapani. ¹⁶ Xesosi sākire auiākani inirimanena tikinitikoā, inīkatanako ninoa. !Erekari imanīkatakanirina iniri-manena tikinitakoni. !Erekari inirekinirina apanakini Xesosi sākire auiākani nīkatiniro inirimanena, kotxi ninoa nīkatana kaiāopokori tikinitakoni manirimaneni. Pasāpaniri ninoa parīka.

Kōtākikarerini Pirena

¹⁷ Kōtākikarerini atāo kaminiāri iparīka Xesosi sākire auiākani īkapani, erekari hīsinina iparīkana īki apiata. Teoso sākire isāpiretiniāna apanakinimoni, Teoso sākire oerekiniāna, ininiākara erekapitikari apiata iparīkana īki hīikitxitinina. ¹⁸ Teoso sākire iōkatsopatakori txari:

!Hīaxirikanamatapiri kema auīte iparīkauatakasaaki, triko ikatxaratakasaaki. Pauiri-tariko inikiniri triko iki, iparīkauanātakasaaki.

Teoso sākire iōkatsopatakori txari apaka:

Erekapitikari parīkauatakari apakapiniri iparīka īki.

¹⁹ Āti apoītiniāri kōtākikarerini, !pimaākatapiri isāpiretakiti. Ipi, atxiīti ipi āti pakini kākiti atamatiniāri kōtākikarerini kaminiri maerekati, isāpiretiniāna pite, pikenakotapitikari ninoa sāpiretakiti. ²⁰ Pōtākikanako Xesosi sākire auiākani maerekati kamakani apanakini Xesosi sākire auiākani apisatoō, ininiākara apanakini pīkari maerekati ikaminina.

²¹ Tximótxio, nota paniātai ikara noerekakiti iaōka pikamini. Teoso apisatoō, Api-ananiri Xesosi Kristo apisatoō apaka, Teoso nitiriakori iaxitikini imereēkini apisatoō apaka, nīpaniātai ikara noerekakiti iaōka pikamini. Ninoa kenakotari nisākire pitemoni. Ātinokarako pisākire txauako ikininape kākitemoni. Erekari pikamako ikininape kākitemoni, kākiti pipotxitakinimoni, kākiti pimapotxitakinimoni apaka. ²² Atxiīti aua Teoso sākire auiākari iteene pimimarotakinini. Ininiā !pimereēpiri iua Xesosi sākire auiākani

õtãkiãkari ininiua. Atxiïti ikamapanikari maerekati. Pimereiniãri iua, pite moianatari iua maerekati ikamini. Erepaniko maerekati pimamakakani ïkapani.

²³ Pite itokata amianata. Pitsii iriko, ininiãkara kona ãparaãnanini piãta. Ovaã poiãoka apaka piãtako pipini ïkapani.

²⁴ Apanakini ! ikipatari maerekati ikamakiti, ininiã ikinimane imarotari. Apanakinipekana maerekati ikamakitina !atamataãka ikamakasaakina. Ninoa kipatari. Okananixiti atokoikara imarotaãka ninoa maerekani. ²⁵ Iua atokokana erekari apanakini kamakiti atamataãka. Erekari apanakini kamakiti !atamataãka ikamakasaaki. Iuaritika okananixiti atokoikara imarotaãka.

6

Nitiritxi Amotakoni Pirena

¹ Nitiritxi amotakoni, Xesosi sãkire auiãkani, iteenerako iparïkauatana ipatrãotena ïkapani. Ninoa paxitanako ipatrãotena. Ikara atoko ininiãna, Teoso uãka !imisãkirepiretaãka. Iua sãkire ate oerekakiti apaka limisãkirepiretaãka iusaaki. ² Nitiritxi patrãote Xesosi sãkire auiãkari ininiãua, initiri paxitariko iua, kotxi itari apaka itxaua iua. ! Apakata poiãonoka ipaxitiniri ipatrãote, itari ininiua xika. Erekari iteene iparïkauatini ipatrãote ïkapani, kotxi ipatrãote auikari Xesosi sãkire. Teoso tirketakiti ipatrãote. Tximótxio, ikara noerekakiti sãkiretxiti poerekariko apanakinimoni. Põtãkikanako ikara iaõka ikaminina.

Txineiro Potxitakani Pirena

³ Aua kãkiti atão minakati oereëkani. Ninoa !auikari aãuïte Xesosi Kristo sãkire atão inakari. !Auikarina atão inakari oerekakori, Teoso sãkire. ⁴ Kãkiti ikara atoko inakari iuikaua, txamari !kimaroreri. Ipotxitari isãkirauatini apanakinikata itaparakiendatakiniuana ïkapani. Ininiãkara xikoretxi aua, neenamatchi aua, misãkirepiretakatchi aua. Ininiã kãkiti !auikari ãti sãkire. Iuãkatari ãti kaminiri maerekati. ⁵ Ninoa txitakakapikaua, kotxi ixinikakitina maerekatinoka. !Imarotaikarina Teoso sãkire atão inakari mitxi imarotakitina. Ninoa oerekari Teoso sãkire kãkitimoni txineiro ito apakapinina ïkapani. Txamari na atão ninoa oerekakiti sãkiretxiti. !Pimaãkatapiri kãkiti ikara atoko inakari.

⁶ Teoso nireëkitinoka pinirekiniã, ikinipoko pinireëkiti auape, ininiã pãkixinire poxononiua. Kipa apikomoni pinireka? !Auari. ⁷ Kiripa ate mina uai itixi aponaniãkasaaki? !Kaminareua. Kiripa aanika atekata apïkasaaki? !Kanikareua. ⁸ Kamãka aniniã, kanipokore aniniã, apakatape. ⁹ Satanasi oerekari kãkiti maerekati ikamini txineiro apakapini ïkapani. Ininiã tiitxi nireëkari mokatanitika kamari Satanasi oereëkiti. ! Erekari tiitxi nireëkari nireëkiti. !Kiikiteri iua. Inireëkiti txikatoro atoko, kotxi imaïkari iua. Eereka !auaika itii, itxineirote, ipoxokoni pakini xipope. Inireëkiti xika Teoso iokanataru iua kãkiti misiritikomoni. ¹⁰ Kãkiti iteene potxitiniãri txineiro, ikamari maerekati. Takari aneë, kotxi ikotsa aua. Iua atokokana maerekati aua ikotsa. Txineiro potxitiko maerekati kotsa itxaua. Txineiro potxitiko auiniã, ikini sereti maerekati aneë. Apanakini txineiro potxitakani takanapaãpotari Teoso sãkire, ininiãkara txineiro potxitakari iuaka karotapekaua ãkixinireë. Iuaka maerekaxinireti itxïkitakaua.

Paoro Ôtãkikiniri Tximótxio

¹¹ Pitepekana Tximótxio, Teoso paniãtakiti kamakari pitxaua, ininiãkara ikara maerekati xatiki !pikamape. Atão inakarinarirako ikiniõtika pikamako. Teoso nireëkitinoka pikamako. Itene pauikariko Teoso sãkire. Katiraõkiri pitxauako. Pimisiritiko auakasaaki, pimiteenekariko. Teoso nireëkitinoka pinirekako. Kona pinirekapiri piteka nireëkiti. ¹² Pineenamauatako Teoso ïkapani. Ikara neenamatchi erekari, Satanasi piokanadini, kãkiti Teoso sãkire auikini ïkapani. Papakapariko Teoso sikakiti, kotxi iua akiritai iuakata pauapininiika pinini ïkapani. Kaiãopokori kãkiti imarotari Xesosi sãkire iteene pauikini, kotxi ikenakotapekari pisãpiretinina. Peerekari pisãkire ninoamoni. ¹³ Tximótxio, nimisãkiretai pite Teoso apisatoõ, Kristo Xesosi apisatoõ apaka. Ninoakara kenakotari nisãkire uatxa. Teoso ikinimane auãki inini txïkitakakari iua. Kristo

Xesosi Homano auíte Põsio Pirato inakori apisatoõ auakasaaki, isãpiretari atão Teoso sãkire. ¹⁴ Nipaniãtai ikara noerekakiti sãkiretxiti iaõka pikamini. !Pimamakapiri ikara noerekakiti. Ikara noerekakiti iaõka pikaminiritika aãuíte Xesosi Kristo kanapiriãko. ¹⁵ Teoso ketotari Xesosi kanapiriini õti. Iuasaaki Teoso akiritari Xesosi ìkorapokoriti ikanapiriini ìkapani. Iuanokara kaposotiireri. Peerekari iua. Auítetxiakori auíte itxaua. Apiarini sauaki iuanokara Apiananiri txaua. ¹⁶ Iuanoka !ipina. Iuanokara ikinipoko auãki inini txìkitakakari. Iua auiniãtaã iotximere auapika, ininiãkara kãkiti !iposota imatokotiniri Teoso. !Katamatikori. Kãkiti !iposotari atamatiniri iua. Iuanokara kaposotiireri ãtipirika. ãtipirika maãkiritari: “Peerekari Teoso.” Ameẽ.

Xesosi Sãkire Auiãkani Katxineiroterini

¹⁷ Pipaniãtanako kãkiti katxineiroterini: “Katii hininiã, !hũikapeuako. !Hĩpoxokotapero hĩtxineirote, kotxi ãti õti atxiĩti hĩtxineirote !auaika. Hĩpoxokotariko Teoso, ãtipirika auãkiri, kotxi iuara sikaua ikinipoko apotxitakiti. Kaiãopokori isikaua. ¹⁸ Erekarì hĩkamako. Hĩtxineirote kaiãopokoro auini atokokana, erekari kaiãopokori hĩkaminanako apanakini. Kaiãopokori hĩti auiniã, hĩsika kãkiti kaamonirimoni. Himarotakasaakiri, matxineiroteni amonitakiti hĩsikanako ninoa. ¹⁹ Ikara atoko hininiã, hãpotiiãpotari erekari Teoso tixinekiri. Iuaã apotiitakori !ixipoka. Ipinaãkana atoko, auinapanikana. Ikara atoko hĩkaminiã, hãpakapari Teoso sikakiti. Iua txìkitakai hãupininiika hinini Teosokata.”

Ikara pisãpiretako katxineirotenimoni.

Paoro Iõkatsopare Mapotõkire

²⁰ Ari, Tximótxio, atão pikamariko parĩkatxi Teoso sikakiti pitemoni pikamini ìkapani. !Pimaãkatapiri sãkiretxi Teoso mapokaerekatakiniti. !Pimaãkatapiri kãkiti, “Kimaroreno nota,” inakari, kotxi !imarotari imaroretxi atão inakari. ²¹ Ninoa sãkire: “Imaroretxi auapitika notamoni,” itxa. Txamari na xatiki imarotari Teoso imarore. Ikara xika ninoa takanapaãpotari Teoso sãkire auikinina.

Teoso sikai ikinipoko erekari. Ameẽ.

2 TXIMÓTXIO

Paoro Iokanatsopatakiti Iuaĩkana Tximótxiomoni

¹ Tximótxio, nota Paoro iokanatsopata pitemoni. Teoso mereẽno nota, Kristo Xesosi iokanatinino ĩkapani, isãkire nisãpiretini ĩkapani. Kãkiti Kristo Xesosi nakiti ininiãua, Teoso txĩkitakari ixinire auãki inini, kotxi Teoso kamaenetapekari ikara ikamini.

² Pite Tximótxio namarite nitiretakiti atoko pitxaua. Aĩri Teoso, aãuĩte Kristo Xesosi pakini sikai ikinipoko erekari. Iamonĩkana. Ikamaerekaxiniretaina.

Paoro Ôtãkikiniri Tximótxio

³ Nota parĩkauata Teoso ĩkapani. Ninirimane kitxakapirĩkarini parĩkauatini atokokana niparĩkauata. Nãkixinireẽ nimarotari maerekati nimakamakani, Teoso ĩkapani niparĩkauatakasaaki. Nota txari Teoso: “Erekapitikari pikamakiti Tximótxio ĩkapani,” nitxa. Nimisãkiretapikari Teoso pite ĩkapani, ĩkanõka, pokamara, ĩkanõka, pokamara nitxapika. ⁴ Nipiãtai. Nixinikari pite txiapatini nitakanapakasaakii, ininiã ninirekari naõkitinii iuaĩkana nipoxoniuatini ĩkapani. ⁵ Nixinikari pite atão auikiniri Teoso sãkire. Merepanika pakiro Aróitxi inakoro, pinoro Eonisi inakoro pakini atão auikari Teoso sãkire. Nimarotapitikari pite apaka auikiniri Teoso sãkire ninoa auikiniri atokotxikana. ⁶ Ininiãkara nõtãkikai. Akoka niuako nitakasaakiri pikiiã, Teoso sikai parĩkatxi iua ĩkapani pikamini. Iusaaki isikaposotiiretai ikara parĩkatxi pikamini ĩkapani. Iteene pikamariko ikara parĩkatxi iua ĩkapani. ⁷ Teoso sikapekaua Erekar Matamatakoti, ininiã !kapĩkareua. Iua Erekar Matamatakoti sikataparitari aãkixinire. Iua oerekaua atiraõkiuatini. Oerekaua maerekati aĩto nireẽkiti amanirekakani.

⁸ Ininiã !pipẽtatapiri aãuĩte sãkire pisãpiretini. Apaka !pipẽtatapeno nota, kotxi kateia ãki naua Xesosi sãkire nisãpiretini xika. Maãtatsiirauata, Teoso iokanapirena erekari asãpiretini xika, kotxi Teoso sikataparataua amisiritiko amĩteenekini ĩkapani. ⁹ Teoso makatxakapekari amaerekani. Iua akiritapekaua inakitiakori aniniua ĩkapani. Aparĩka kona txĩkitakari Teoso makatxakiniri amaerekani. Imakatxakari amaerekani, kotxi inirekari ikara atoko ikamini. Imakatxakari amaerekani, kotxi inirekari ikinipoko erekari isikiniua. Itixi kamiko apisapanika Kristo Xesosi sikari ikara erekari atemoni. Iusaaki imakatxakari amaerekani. Iusaaki akiritaua inakitiakori aniniua ĩkapani. ¹⁰ Uatxa Teoso oerekari ikara erekari kãkitimoni, kotxi amaerekani makatxakakari Xesosi Kristo apokapeka ĩkorapokoriti. Iua xipokapekari ipĩkitxi. Isãpiretari Teoso iokanapirena erekari, kãkiti mapinakani ĩkapani, Teosokata ãtipirika auini ĩkapani.

¹¹ Teoso mereẽno nota ikara iokanapirenatxi sãpiretakari nininiua tĩkane. Imereẽno iua iokanatakiti kãkitimoni nininiua. Imereẽno Xoteo minakanua oereẽkari nininiua. ¹² Teoso iokanapirena erekari nisãpiretini xika, natatsiirauata. Iuaritika !nipẽtauata, kotxi nimarotari Xesosi. Iteene nauikari iua sãkire. Nimarotapitikari iua nĩkatinino nota. Inĩkatiniritikano ikanapiriãko. ¹³ Teoso sãkire pitemoni noerekakiti iaõka poerekako apanakini, kotxi noerekakiti atão. Pauikapikariko Kristo Xesosi sãkire. Katiraõki pitxako, kotxi Xesosi nakiti atxaua. ¹⁴ Pimarotari Teoso iokanapirena erekari. !Pauiritapiri ikoketiko. Teoso sikari ikara iokanapirena pitemoni, apanakini pisãpiretini ĩkapani. Erekar Matamatakoti auãitotaua. Iua posotiireẽ pinĩkatariko Teoso iokanapirena pitemoni isikakiti.

¹⁵ Pimarotari kãkiti Xesosi sãkire auĩãkani Ásia tixine auakani takanapano nota. Aĩtariakori Pixero inakori, Emoxeni inakori pakini takanapano nota. ¹⁶ Onesĩporo inakori !itakanapano. Ninirekari Teoso tiretinina iua aapoko auakani. Itokata ikamapoxokonitano nota. !Ipẽtatano kateia ãki nauakasaaki. ¹⁷ Homa sitatxiti apokasaaki, initaãpotano nota, eereka apokano. ¹⁸ Pite imarotari iua iteene moianatinino nota, Épeso sitatxiti nauakasaaki. Ininiã nitxari Apiananiri: “Ninirekari piamonĩkiniri Onesĩporo itixi xipokini õti manapisaaki.”

2

Misirikaretxi Miteenekiko

¹ Pitepekana namarite Tximótxio, kataparaxinire pitxako. Kristo Xesosi nakitiakori atxaua, ininiã iua sikari ikinipoko erekari atemoni. Ikara erekari sikataparatarari axinire. ² Pite kenakotapekari nisãkire noerekakiti kãkitimoni. Ininiã poerekariko ikara iaõka apanakinimoni atão inakari kamakanimoni. Eereka ninoa posotari oerekiniri nisãkire noerekakiti apanakinimoni apaka.

³ Sotato erekari miteenekari imisiritiko. Kristo Xesosi sotatone atoko atxaua, ininiã pimiteenekariko pimisiritiko sotato erekari miteenekiniri atoko. ⁴ Sotato parĩkau-atakasaaki, !ixinikaikari iparĩka mitxi ikamakiti sotato iminakanisaaki. Ixinikapikari sotato auĩte nireẽkiti ikamini, iauĩte poxokotiniri ikapani. Ikaranokara ixinikanãta.

⁵ ãtipekana nisãpiretai. Miteẽkari mitekatzxi mapotõkire merepanika apoãkari apakapari imitekini ãki. Mitekatzxi paniãtakari paniãtini iaõka imitekiniã, apakapari imitekini ãki.

⁶ ãtipekana nisãpiretai. Katarareri poparĩkari nikari itakare merepanika, kotxi iteene iparĩkauata. ⁷ Pixinikariko ikara nisãkire. Apiananiri kamaimaroretai ikara.

⁸ Pixinikariko Teoso iokanapirena erekari nisãpiretakiti kãkitimoni. Xesosi Kristo nisãpireta ikinimanemoni. Iua ipinaka atoko, iuaĩkana auãki itxikitakaãka. Iua Taviini apika mekaniri. ⁹ Natatsiirauata Teoso iokanapirena erekari nisãpiretini xika. Nota omanatakani iaxirikapekano kohẽtxiã, kokaniri iaxirikinina atoko, nota masikani ikapani. Teoso sãkire !iaxiriãka. Iaripireta ikini tõpati. ¹⁰ Teoso mereẽpekari kãkiti, imaerekani imaktxakini ikapani. Ininiã nota miteenekari nimisiritiko Teoso iokanapirena ninoa kenakotini ikapani, imaerekanina Kristo Xesosi maktxakini ikapani, ãtipirika Teosokata auinina ikapani. Iuusaaki peerekari. ¹¹ Nisãpiretaiko ia sãkiretxi atão inakari:

Xesosi Kristo ipina ate ikapani, ininiã amanirekakaniãri mitxi anireẽkiti, Xesosi nireẽkitinoka anirekiniã, ininiã aãuapika iuakata ãtipirika.

¹² Amiteenekiniãri amisiritiko Xesosi sãkire aãuikini xika, auĩtetxi atxauako iuakata. Akipatiniãri iua aimarotini, iua apaka kipatarari ate imarotini.

¹³ Atxiĩti !akamari akamaenetakiti. Xesosi kamapitikari iua kamaenetakiti, kotxi iua ! iposotari maerekati ikamini.

Teoso Nitiri Atão Inakari

¹⁴ Ikara nisãkire pikamaxinikaretana Xesosi sãkire auĩãkani. Ninoa Apiananiri apisatoõ apotiitakasaakiua, põtãkikanako: “!Hĩtxitakakapeua maxikatĩka kãkiti sãkire xika, kotxi !erekari,” pitxako ninoamoni. Kãkiti kenakotiniãri hĩtxitakakiniua, ininiã ! inirekaikarina Xesosi sãkire auĩkinina.

¹⁵ Tximótxio, pite Teoso nitiri pitxaua, ininiã iteene papaiaõkariko isãkire iõkatsopatakori Teoso apokaerekatinii ikapani. Ininiã !pipẽtauata, kotxi atão poerekari Teoso sãkire iõkatsopatakori apanakinimoni. Teoso sãkire iõkatsopatakori atão inakaranoka itxa. ¹⁶ Apanakini sãkirauatakasaaki, isãkiretarina sãkiretxi Teoso mapokaerekatakiniti. Ikara atoko !pisãkiretape. Kãkiti ikara atoko inakani takanapaãpotari Teoso. ¹⁷ Ninoa oerekakiti sãkiretxiti karõtxi arakakari atoko itxa. Ikara atoko inakari amianari iarikaãpota. Ikara amianari iarikini atoko, ninoa oerekakiti iarikaãpota. Itxikitakari kãkiti maerekati ikamini. Imeneo inakori, Pireto inakori pakini oerekakiti sãkiretxiti ikara atoko itxa. ¹⁸ Ninoa takanapapekari Teoso sãkire atão inakari. Ninoa sãkire: “Teoso õkitikapekana Xesosi sãkire auĩãkani ixinirena auãki inini ikapani. !Õkitikapanina iĩtona itixi xipokini õti,” itxana. Ikara ninoa sãkire xika, apanakini !auikaikari Xesosi sãkire.

¹⁹ Aapokotxi tsota paikori inakasaaki, itsota iriko paĩtanori inakasaaki, iua aapokotxi ! irika. Teoso sãkire ikara aãtsota atoko. Auapika. !Ixipoka. Teoso sãkire txari: “Apiananiri imarotari inakitiakori.” Apaka Teoso sãkire txari: “Kãkiti, ‘Nota Kristo nakiti’ inakari takanapariko imaerekani.”

²⁰ Ikini sereti tiitxi aua aapokotxi mitari ãki. Aua apiata karonetakari oro kamakori, pirata kamakori pakini. Apaka aua poião ãki aamina kamakori, kipatxi kamakori pakini.

Apanakini tiitxi āki kaapokori takari nipokori kiiniri ĩkapani. Apanakini tiitxi āki itakari nipokori ikiniōtika kākiti nikini ĩkapani. ²¹ Ikara tiitxi atoko itxa kākiti. Kākiti takanapiniāri imaerekani, tiitxi apiata karonetakari atoko itxa iua. Teoso nirekari iua. Imereēri iua iparīka erekari ikamini ĩkapani. Ininiā kākiti iua atoko inakani iposope Teoso parīka ikamini ĩkapani.

²² Ātokoripanika pinakasaakiua, apanakini nirekiniāi maerekati pikamini, pimatekako, maerekati pimamakani ĩkapani. Pinirekariko atāo inakarínoka pikamini ikiniōtika. Pinirekariko Xesosi sākire iteene pauikini. Pinirekariko iteene katiraōki pinini. ! Pinirekapiri neenamati. Ikara atoko kākiti kaminiā, erekaxinireri. Iua akiritari Apiananiri imoianatiniri ĩkapani.

²³ Tximótxio, kākiti txitakasaakiua sākiretxi miikiteti mimaroreti xika, !pikapapiri ikara atoko inakari, kotxi eereka ninoa neenamauata isākirena xika. ²⁴ Apiananiri nitiri atāo inakari ia atoko itxako: “!Itxitari āti. Itiretari ikinimane. Koerekareri erekari itxaua. !Katimari omanākarauatini. ²⁵ Ōtākikanako isākire mauikakani momanākaretika.” Ikara atoko Apiananiri nitiri ininiāua, atxiiti Teoso oerekana isākire mauikakani atāo inakari imarotinina ĩkapani, imaerekani itakanapinina ĩkapani. ²⁶ Ininiā iuaīkana kiikitepeka itxana. Teoso sikakana ninoa txikatoro Satanasi takakitiā, kotxi mitxi Satanasi maīkana, iua nireēkiti ikaminina ĩkapani.

3

Itixi Xipokini Ōti Apisa

¹ Tximótxio, pimarotariko ia nisākire. Itixi xipokini ōti apisa pamonōkopaniriko. ² Iuasaaki kākiti ia atoko inakari: Kapotxinaniri iua. Txineiro tiretakani iua. Isāpiretari iposotiire ikinimanemoni. Iuikaua. Imisākirepiretari Teoso, kākiti pakini. !Ikamari iri paniātakiti. Inoro paniātakiti apaka !ikama. Āti kamakasaakiri erekari iuamoni, !itxari: “Erekapitikari pikamakiti nota ĩkapani,” !itxari. !Nirekari Teoso. ³ !Itiretari inirimane. !Ikamari ikamaenetakiti. Imisākirepiretari āti maxikatīka. !Iposotari erekari ikamini. Paneenamari. Omanatana erekari kamakani. ⁴ Imīkapiritari āti. Ikamakiti ikamini apisa, !ixinikari ikamakiti tīkane. Iuaka ixinikapikaua. Isarauatininokara itireta. !Itiretari Teoso. ⁵ Iua sākire: “Nauikari Teoso sākire,” txamari !auikari Teoso posotiire. !Pauikapiri kākiti ikara atoko inakari sākire.

⁶ Kākiti ikara atoko inakari ianapokota sitomoni oaāpokomoni. Sito ikara atoko inakaro miikiteto. Maerekatínoka okama. Ōito nireēkiti maerekati onirekapika. Iua ianapokotapika oamoni, ininiā oa auikaāpotari iua oerekakiti sākiretxiti. ⁷ Sito ikara atoko inakaro nirekari oimarotiniri oerekaretxi, txamari !oimarotari oerekaretxi atāo inakari.

⁸ Kitxakapirīka Moisesi Exito tixine auakasaaki, Xani inakori, Xāpiri inakori pakini ! inirekari auikinirina Moisesi sāpiretakiti. Ninoa atokokana kākiti itixi xipokini ōti apisa auakani, !inirekari atāo inakari. Ixinikapikarina maerekatínoka. Teoso !inirekari kākiti ikara atoko inakari, kotxi iua kākiti !auikari Teoso sākire. ⁹ Poiāonoka kākiti auikari ikara atoko inakari sākire, kotxi imarotari miikiteti iua. Iua atokokana kitxakapirīka apanakini imarotari Xani, Xāpiri pakini miikiteni ininiua.

Teoso Nakitiakori Misiritiko

¹⁰ Pitepekana, pimarotapitikari noereēkiti sākiretxiti. Pimarotari nikamakiti ikiniōtika. Pimarotari ninireēkiti nikamini. Pimarotari iteene nauikiniri Xesosi sākire. Pimarotari nimīteenekiniri nimisiritiko. Pimarotari nitiretiniri āti. Pimarotari ! katimari nomanākarauatini. ¹¹ Pimarotari nimisiritiko. Pimarotari natatsiirauatini. Pimarotari nimīteenekiniri nimisiritiko Ātxiokia sitatxiti nauakasaaki, Ikónio sitatxiti apaka nauakasaaki, Arisitara sitatxiti apaka nauakasaaki. Iteene natatsiirauata, iuaritika Apiananiri makatxakano ikinika nimisiritiko. ¹² Ari, ikininape kākiti nirekiniāri Kristo Xesosi nakiti ininiāua, inirekiniāri Teoso nireēkitínoka ikaminiā, atatsiitariko imisiritiko. ¹³ Iuasaaki maerekati kamakani maerekani, kamisirienererini maerekani, apiaāpotako. Ninoa misirienetari apanakini. Apaka apanakini misirienetana ninoa.

Teoso Säkire Iökatsopatakori

¹⁴ Pitepekana Tximótxio, pauikapikariko atão inakari poerekiko. Ikara pauikapitika, kotxi pimarotana pite oerekakani. Pimarotari atãonoka ninoa oerekakiti. ¹⁵ Pite axapitipatika pinakasaaki, pimarotari Teoso säkire iökatsopatakori. Iua säkire iökatsopatakori txikitakaua kimatire anini. Isäkire iökatsopatakori oerekaua Teoso makatxakiniri amaerekani Kristo Xesosi säkire aũukasaaki. ¹⁶ Teoso oerekana isäkire iökatsopatakani atãonoka iökatsopatinina, ininiã ikinika Teoso säkire iökatsopatakori atãonoka. Ininiã apakata Teoso säkire iökatsopatakori oerekiniua atão Teoso säkire aũukini ikapani. Oerekaua ikinipoko Teoso säkire iökatsopatakori atão inini. Isäkire iökatsopatakori õtãkikaua amaerekani atakanapini. Oerekaua atão inakarínoka akamini. ¹⁷ Ininiã kãkiti Teoso nakiti imarotiniãri Teoso säkire iökatsopatakori, iposotari ikinika parikatxi Teoso paniãtakiti ikamini. Erekariparika.

4

Tximótxio Õtãkikiko

¹ Tximótxio, nõtãkikai Teoso apisatoõ, Apiananiri Xesosi Kristo apisatoõ apaka, kotxi ãti õti Kristo Xesosi kanapiriãkasaaki, isãpiretari ikininape kãkiti sinimoni. Isäkire auiãkani sari Teosomoni ikaikotinina ikapani. Isäkire mauiãkani sari kãkiti misiritikomoni ikaikotinina ikapani. Isãpiretari kãkiti auapanika inakani, kãkiti mitxi ipikani apaka. Xesosi kanapiriã ikininape auite ininiua ikapani, ininiãkara nipaniãtai ia: ² Pisãpiretariko Teoso säkire kãkitimoni. Iposope pitxako Teoso säkire ikiniõtika pisãpiretini kãkitimoni, piito tapara auakasaaki, pisãpakasaaki apaka. Põtãkikanako imaerekani itakanapinina, erekarínoka ikaminina ikapani. Pisikataparaxiniretanako, Teoso säkire poekinina. Pisãkirauatakasaaki, !katimari pomanãkarauatini. ³ ãti õti apokako. Iuasaaki kãkiti !nirekaikari oerekaretxi atão inakari ikenakotinina. Ninoaka nireëkitinoka inirekana, ininiã apotiiãpotana ninoakata koerekarerini ninoa potxitakiti oerekaretxiti oereëkani. ⁴ !Inirekaikarina atão inakari. Auikarina sãkiretxi atão minakati.

⁵ Pitepekana, ikinika pikamako pũkiteritika. Pimiteenekariko pimisiritiko. Pika-mariko piparika Teoso iokanapirena erekari pisãpiretini kãkitimoni ninoa auikini ikapani. Teoso nitiri pitxaua, ininiã pikamariko ikinika piparika Teoso paniãtakiti.

⁶ Notapekana, nipinini õti manapi apokaãpotape. Nipinako Teoso ikapani. Pirãtxi Teoso ikapani okiko atokokana, notaka sikauako Teosomoni. Niketo apokapeka itixi nosipikini ikapani. ⁷ Neenamãtxi erekari inakari nikamapeka Satanasi ninaiatini. Miteëkari mitekãtxi mapotõkire apokini atokokana, nota apokapeka niparika mapotõkire. !Nitakanapari Xesosi säkire nauikini. ⁸ Uatxa Teoso nãkatari niparika iki nota kãiatakiti napakapini ikapani. Miteëkari merepanika mitekãtxi mapotõkire apokakari apakapari imitekini iki. Apakapari saporieãta. Iua atokokana Apiananiri sikanoko niparika iki, kotxi nota nirekari atão inakarínoka nikamini. Apiananiri imarotari atão, ininiã imarotari parikatxi iki apakapakani. Imarotari imisiritiko apakapakani apaka. Niparika iki isikano notamoni uai ikanapiriini õtisaaki. Na notananini apakapari. Isikari parikatxi iki ikininapemone ikanapiriini nirekakanimoni.

Paoro Iökatsopatakiti Mapotõkire

⁹ Piposotiniã, katima pitxako notamoni papokini. ¹⁰ Témasi inakori asikapekano, kotxi itiretari Xesosi säkire mauiãkani nireëkiti. Isipeka Tesarónika sitatxitimoni. Kiresëtxi inakori sari Karásia tixinimoni iparĩkauatini ikapani. Txito inakori sari Taomásia tixinimoni iparĩkauatini ikapani. ¹¹ Arókasínokara moianatano uatxa. Pakiritariko Marko. Piminari iua pitekata. Iua posotari imiparĩkatinino, Xesosi säkire nisãpiretakasaaki kãkitimoni. ¹² Txíkiko inakori nipaniãta Épeso sitatxitimoni isini. ¹³ Tóatxi sitatxiti nauakasaaki, nitakanapari nimãka ãti nimãka nopini nitakakiti. Nitakanapari iua nimãka Kapo inakorikata. Pite uai ikasaaki piminariko. Apaka piminariko atatsopari ninakiti aãtsopa kamakori. Apia ninirekari pimininiri atatsopari ninakiti aamata kamakori.

¹⁴ Arexãtri inakori iteene misiritano. Iua Arexãtri tiitxi kamakari iua. Tiitxi metao kamakorinoka ikama. Iua misiritinino xika, Teoso misiritari iua. ¹⁵ Erepaniko iua. Pamonõkoniri iua, kotxi iua iteene misãkirepiretari aõereëkiti sãkiretxiti.

¹⁶ Merepitipanika nota apoõtakani anikasaakino auõtetxiakori apisatoõ, nisãkire ikenakotinina ïkapani, na ãti nimoianari kaikota notakata iusaaki. Ikinimane nimoianariakori takanapano, iuaritika na ninirekari Teoso misiritinina itakanapinino xika. ¹⁷ Ninoa takanapano, iuaritika Apiananiri kaikota notakata. Iua sikataparaxiniretano, ininiã niposotari Teoso iokanapirena ikinika nisãpiretinina ninoa Xoteo minakaniua ikenakotinirina ïkapani. Ininiã ãkiti namaã takote nauakasaaki, Teoso tokapakeëtano nota. ¹⁸ Nimarotapitikari Apiananiri tokapakeëtapanikano nota ikini sereti maerekati auakasaaki. Iua nïkatano. Anikano itixinemoni, iua auõtetxi ininiãtaãua. Ikinimane ãtipirika sãpiretari iua: “Peerekai. Pitenokara erekari.” Ameë.

¹⁹ Pisãpiretana Pisisira inakoro, Ákira inakori pakini nixinikamanapitana. Apaka Onesíporo inakori aapoko auakani nixinikamanapita. ²⁰ Erásito inakori kaikota Korïto sitatxiti. Tópimo inakori nitakanapa Mireto sitatxitiã, kotxi iua amianata.

²¹ Tximótxio, piposotiniã, mitaã apisapanika papokako uaimoni. Eoporo inakori, Porotëtxi inakori, Arino inakori, Karáotxia inakori pakini ikini aïtariakorikata iokanapireta pitemoni ixinikamanapitiniina.

²² Apiananiri Xesosi Kristo ãtipirika kaikota pitekata pãkixinireë. Ikinipoko erekari isika pitemoni. Ameë.

TXITO Paoro Iokanatsopatakiti Txitomoni

¹ Nota Paoro. Teoso nitiri amotakori nitxaua. Xesosi Kristo iokanatakiti nitxaua. Iua iokanatano kãkitimoni Teoso mereëkini auiãkiti sãkiretxiti nisãpiretini ïkapani. Iokanatano kãkitimoni atão inakari imarotininina ïkapani. Atão inakari imarotiko oerekaua Teoso nireëkiti akamini ïkapani. ² Aãuikari aãuapininika anini Teosokata, kotxi kitxakapirika itixi kamiko apisa Teoso kamaenetari ikara. Ininiã apokapitikako, kotxi atãonoka iua sãkire. !Iposotari atão minakati isãpiretini. ³ Iketotiniri manapi oerekari isãkire. Isãkire sãpiretakani sãpiretari isãkire. Ininiã Teoso sãkire notamoni isikakiti nisãpiretai, kotxi Teoso amaerekani makatxakakari paniãtano nota nisãpiretiniri isãkire.

⁴ Niokanatsopata pite Txitomoni. Namarite atão inakari atoko pitxaua, kotxi pite auikari Xesosi sãkire nota auikiniri atokotxikana. Aïri Teoso, aãuïte Xesosi Kristo amaerekani makatxakakari pakini, sikari ikinipoko erekari pitemoni. Ninoa iamoniãkai. Ikamaerekaxiniretaina.

Kõtãkikarerini

⁵ Nitakanapai pite Kreta pokomiriïti, kotxi aparika iuaãtaã kona xipokapanika, ininiã ninirekari pite kaminiri ikara parikatxi. Pimereëna kötãkikarerini ikini sitatxitiã Teoso sãkire auiãkani ôtãkikakani tikane. Pimereëna mitxi nisãpiretakiti iaõka. ⁶ Ia atoko inakari kãkiti pimereë kötãkikarerini ïkapani: Iua kamari erekari, ininiã maerekati auakasaaki, kona iua xikani maerekati apoka. ãtonokara ïtanoro aua. Imiakori auikari Xesosi sãkire. Ninoa !neenamauata. Ikamarina iri paniãtakiti iaõka.

⁷ Teoso sikari iparika kötãkikarerimoni ikamini ïkapani, ininiã kötãkikarerini kamari erekarinoka. Maerekati auakasaaki, kona iua xikani maerekati apoka. !Iuikaua. !Kati-mari omanãkarauatini. !Ipoãta. Kona kaneenamari. !Itiretaro txineiro. ⁸ Kõtãkikarerini atão inakari potxitari apakapiniri kãkiti iua aapoko ãki. Ipotxitari kãkiti erekari kamakani. !Katima omanãkarauatini. Erekarinoka ikama. !Ikamari maerekati. Erekari imarotakiti litakanapari ikamini. ⁹ Kõtãkikarerini atão inakari oerekaãkapeka Teoso sãkire. Imarotari Teoso kaminiri isãkire iaõka, ininiã iteene inikatari Teoso sãkire. !Imamakari Teoso sãkire. Ininiãkara imarotari ôtãkikiniri apanakini. Iteene imarotari Teoso sãkire, ininiã imarotari oerekiniri apanakini Teoso sãkire manirekakani, Teoso sãkire auikinina ïkapani.

Erepaniko, Atão Minakati Oerekakani

¹⁰ Kaiãopokori kãkiti kona nirekari Teoso nireëkiti ikaminina. Maxikatika isãkirauat-pika. Kamisirienererini ninoa. Ikara atoko inakani nirekari Teoso takaõttxikare Xoteo minakanuia ïtoã auini. ¹¹ Matxikitakari ninoa iotokakiniri atão minakati isãpiretinina, kotxi kãkiti aapoko ãki auakani naiatakakaua ninoa oerekakiti sãkiretxiti xika. !Apakata ninoa oerekakiti sãkiretxiti. Iuaritika ninoa oerekari atão minakati, txineiro apakapinina ïkapani. ¹² Ninoa atokirini kitxakapirika, koerekareri, uai Kreta pokomiriïti auakarini, txari: “Kreta auakani ãtipirika misirienetari kãkiti. Maerekati kamakani itxauana. Kaneenamari ïtopa auakari atoko ikamana. Iarinouatana. Paixonina,” itxa iua.

¹³ Isãpiretakiti atãopitikara. Ininiã pitaparaxinireritika pipinitana ninoa imasãpiretakinirina ikara atão minakati, Xesosi sãkire atão auikinina ïkapani. ¹⁴ Ininiã pisãpiretana: “!Himaãkatapiriko Xoteoakori kiomaneakorini sãkire atão minakati. !Himaãkatapena atão inakari manirekaãkani paniãtakiti.” ¹⁵ Kãkiti Teoso kamaerekatakiti, ikamakiti erekari. Ikinipoko ikamakiti erekari, kotxi Teoso makatxakapekari imaerekani. Kãkiti imaerekani auapanika inakari, Teoso sãkire iaõka makamakati, ikinipoko ikamakiti aua imaerekani. Imaerekani txikotari ixinikakiti. Imaerekani txikotari iua ãkixinire, ininiã ãkixinire !õtãkikari iua maerekati imakamakani ïkapani. ¹⁶ Ninoa txa: “Ate imarotari Teoso,” txamari ikamarina Teoso manirekakiniti, ininiã !imarotarina Teoso. !Nirekarina

Teoso. Arakakani atoko itxana, maerekati ikamakitina xika. !Ikamarina Teoso nireëkiti, ininiã !liposotarina erekari ikaminina.

2

Txito Õtākikiko

¹ Ininiã poerekariko ikinika atão inakari Teoso oerekiko sākiretxiti.

Kiki Aneëkani Õtākikiko

² Ia atoko põtākikana kiki aneëkani: “Hīxinikariko hīkamakiti tīkane hīkaminiri apisapanika. Erekari hīkamako apanakini paxitinii ikapani. Kona hīkamapiri hiito nireëkiti. Iteene himarotariko hāuiākiti. Iteene hītiraōkiuatako. Katima omanākarauataka ! hītixape.” Ikara atoko põtākikana kiki aneëkani.

Sito Aneëkani Õtākikiko

³ Ia atoko põtākikana sito aneëkani: “Hīkamariko Teoso pīkakani kamakiti atoko. Maxikatiika ! hāpoītapiri āti. Kona iteene hiātapiri iāriã kapoãro. Erekarinoka hōerekako.” Ikara atoko põtākikana ninoa. ⁴ Apaka põtākikana sito aneëkani õtākikinina ātokoroakoro ia atoko: “Hītiretanako hītaniri, hamariteakori pakini. ⁵ Kona hīkīpitapiri hiito paniātakiti. Erekarinanira hīkamako. Hīkamariko hīparīka haāpoko āki. Erekari hīkamako apanakini ikapani. Hītaniri nireëkiti hīkamako, ininiã iuasaaki Teoso sākire mauiākani ! imisākirepiretari Teoso sākire.” Ikara atoko sito aneëkani oerekanako ātokoroakoro.

Ātokoriakori Õtākikiko

⁶ Ininiã iua atokokana põtākikana ātokoriakori ia atoko: “!Apakata hīkaminiri hiito nireëkiti.”

Txito Õtākikiko

⁷ Txito, ikini pikamakiti pikamako kākiti erekari kamiko imarotini ikapani. Poerekarauatakasaaki, poerekari kākiti pitiretiniri atão inakari sākiretxitinoka. Poerekanako Teoso sākirenoka apiari inini. Poerekarauatakasaaki, poerekariko kākiti pimakoketakaniri atão minakati pisākirekata. ⁸ Poerekariko atão inakarinoka, ininiã ! auari papoītiko, kotxi !pikerokari pisākire. Ikara atoko ininiã, pimokaiakarini pētauata, kotxi !liposotarina imisākirepiretinii.

Nitiritxi Amotakoni Õtākikiko

⁹ Ia atoko poerekanako nitiritxi amotakoni: “Hīkīpitariko hīpatrãote sākire. Hīkamariko hīpatrãote apokaerekatakitinoka. Kapakapaenere ! hītixape. ¹⁰ !Hiitirīkapiri hīpatrãote tii. Hōerekariko hīpatrãote pisākire atão inini. Ininiã hīpatrãote nirekari imarotininirina Teoso oerekiko, amaerekani makatxakakari oerekiko.”

Ikinipoko Erekari Teoso Sikakiti

¹¹ Ikinimanemoni Teoso oerekapekari erekari isikakiti kākiti maerekani imakatxakini. ¹² Teoso sikakiti erekari oerekaua atakanapiniri Teoso manirekakinii. Teoso sikakiti erekari oerekaua amanirekakaniri ikorapokoriti auakani ito nireëkiti. Teoso sikakiti erekari oerekaua aīto paniātakiti atakanapini, atão inakarinoka akamini, Teoso nireëkiti akamini ikorapokoriti aāuakasaaki. ¹³ Ikorapokoriti aāuakasaaki, aiātapari poxokonitxi õti Apiananiri aTeosone apokini õti. Iuasaaki Xesosi Kristo, amaerekani makatxakakari, motika atemoni. ¹⁴ Iuaka sikaua Teosomoni ate ikapani ipīkasaaki. Iuasaaki iikitxitari Teoso, ininiã Teoso makatxakaua ikinika maerekanitxi sauaki. Ikara atoko ininiã, ikamaerekataua ate. Ininiã itxīkitakaua inakitiakori aniniua, ininiã anirekari erekari akamini.

¹⁵ Auītetxi pininiua atoko pipaniātariko kākiti kīpitiniri ikara nisāpiretakiti. Põtākikana nisākire makīpitakani. Kona pauiritapiri kākiti sāpiretiniri pisākire atão minakati inini.

3

Teoso Nireëkiti Kamiko

¹ Txito, ia atoko poerekariko kākiti: “Hīpaxitariko īkorapokoriti auītetxiakori paniātakiti, poiāori auītetxiakori paniātakiti apaka. Iposope hītxako ikinika erekari hīkamini. ² Kona himisākirepiretapiri apanakini. !Hineenamauatape. Merepanika hīxinikariko apanakini, eereka hīteka hīxinika. Hōerekariko kākiti, hīxinireē hinirekiniri erekari hīkamini ikinimanemoni.” Ikara atoko poerekana.

³ Teoso aimarotini apisapanika miīkiteni atxaua. Kona akīpitari kākiti sākire, Teoso sākire apaka. Iuasaaki ate misirienetaāka. Iuasaaki akamari aīto nireēkitinoka. Ikini sereti maerekati akama apoxokoniuatini īkapani. Iuasaaki ikiniōtika axinikari maerekati akamini. !Apakata akamakiti. Kaxikorinerini atxaua iuasaaki. Ate omanataāka. Apaka ate omanatari apanakini iuasaaki.

⁴ Ininiā eereka Teoso tiraōki, amaerekani makatxakakari tiraōki, iua amonīkare, apoka atemoni. ⁵ Ateka parīka erekari !imakatxakari amaerekani. Iua amonīkarenokara makatxakari amaerekani. Iuasaaki na atāo akama, iuaritika imakatxakari amaerekani, kotxi itiretaua. Iuasaaki iua arokari aākixinire. Itxīkitakaua ate aponaniini iuaīkana. Iuasaaki Erekari Matamatakoti kamarī ikinika amaneri axinireē. ⁶ Teoso iokanatarī Erekari Matamatakoti kaposotiireri atemoni, kotxi Xesosi Kristo, amaerekani makatxakakari, ipina ate īkapani. ⁷ Iua sikari ikinipoko erekari atemoni, ininiā ikamaerekataua. Ininiā itxīkitakaua Teoso anaakori aniniua, ininiā aāpakapariko ipotetakiti ate īkapani. Iua atoko ininiā, aiātapari ātipirika Teosokata aūini īkapani. ⁸ Atāopitikara ia nisāpiretakiti.

Ininiā ninirekari ātipirika pisāpiretiniri ikinika nisāpiretakiti Teoso sākire auīākanimoni. Ikara atoko Teoso auīākani itaparaxinireritika kamariko erekari apanakini īkapani. Kona maxikatiīka ikamarina erekari. Teoso atāo īkitxitariko kākiti. Ikara atoko kākiti kaminiā, ininiā erekari ikinimane īkapani.

⁹ Kona pimaākatapiri miīkiteti sākire. !Hītaparakienatakakapeua kitxakapirīkarini uāka xika. Kona himaākatapenako kākiti kiomātxiakori oerekakiti xika tsoatakani. Ikara sākiretxiti !itxīkitakai erekari hininiua. !Itxa ikara sākiretxiti.

¹⁰ Kākiti oerekiniāri atāo minakati Teoso manirekakiniti, pōtākikari iua ipikata. Iposo atoko !pimaākataikari. ¹¹ Ikara atoko inakari atāo iīkite !auari. Maerekati ikama. Ikamakiti oerekari apanakini, maerekati kamakari ininiua. Iuaka imaerekani xika imisiritiko apokako.

Paoro Sāpiretakiti Mapotōkire

¹² Niokanatarī Atemasi inakori, atxīīti Txīkiko inakori apaka pitemoni. Ninoa apokasaaki, paiamata pisini īkapani, katimari notamoni Nikópori sitatxitiā hāpokini īkapani. Ninirekari ia mitaāti nikaikotini iuaā.

¹³ Pimoianatarī Sena inakori, Aporo inakori pakini. Auītetxiakori paniātakiti imarotakarī iua Sena. Pimoianatanako ninoa aiamatini. Iamonitakitina pisikanako. ¹⁴ Aītariakori Xesosi sākire auīākani apaiaōkariko erekari ikaminina, kākiti minakati mauakiniti imoianatinina īkapani. Makamaretika hinini !apakata.

¹⁵ Notakata auakani xinikapikai pite. Pisāpiretanako ate tiretakani ereē Xesosi sākire auīākani nixinikamanapitana ninoa.

Ikinika erekari Teoso sikai hīte hīkinika. Ikara atoko niōkatsopata pitemoni. Ameē.

PIREMÕ Paoro Iokanatsopatakiti Piremõmoni

¹ Nota Paoro. Kateia äki naua, Kristo Xesosi säkire nauikini xika. Nota, aĩtari Tximótxiokata aiokanatsopata pitemoni Piremõmoni. Ate iteene tiretai pite. Atekata parĩkauatakari pitxaua. ² Aiokanapireta Xesosi säkire auĩãkanimoni, paapoko apoti-itakanimoni. Aiokanapireta aĩtaro Ápiamoni, Akipo pakinimoni. Iua Akipo Xesosi sotatone itxaua, ate Xesosi sotatone atokotxikana.

³ Aĩri Teoso, Xesosi Kristo Apiananiri pakini sikai ikinipoko erekari. Ikamaerekaxiniretaina.

Piremõ Tiraõkiuatini Pirena

⁴ Nitari Piremõ, Teoso nimisäkiretakasaaki, ätipirika nisäkirauata pite ĩkapani. Nisãpiretari Teoso ereka inini, kotxi iua kamaerekatai pite. ⁵ Ikara atoko itxa nisäkire, kotxi nikenakopiretari iteene pauikiniri Apiananiri Xesosi säkire. Nikenakopiretari ikinimane kãkiti Teoso nakitiakori pitiretini. ⁶ Nimisäkiretari Teoso pite ĩkapani, kotxi ninirekari pisãpiretiniri pauĩãkiti säkiretxiti ikiniõtika apanakinimoni, ininiãkara pimarotari ikini sereti erekari Teoso siãkiti Kristo nakitiakorimoni. ⁷ Ate poxokoniuata, kotxi pite turetana kãkiti Teoso nakitiakori. Pitiraõki iteene sikataparaxiniretaua ate. Pite aĩtari kamapoxokonitana Teoso nakitiakori äkixinire.

Paoro Amanãkiti Säkiiretxiti

⁸ Kristo sikaposotiiretano, ininiã nitapararitika niposotapitikari nipaniãtinii atão inakari pikamini. ⁹ Iuaritika nitapararitika na nipaniãtai atão inakari pikamini. Nõtãkikai Kristo tiraõkiã pikaminiri atão inakari. Nota Paoro kiomãtxipekano. Kateia äki nauanãta, Kristo Xesosi säkire nauikini xika. Notakara õtãkikai pite atão pikamini. ¹⁰ Nota amanaãi pinitiri Onésimo inakori piamonĩkini ĩkapani. Namarite atoko inakari iua, kotxi iua kĩpitari nisäkire uai kateia äki nauakasaaki. Uatxa iua auikari Xesosi säkire. ¹¹ Nimarotari iuãka poparĩkari uãka itxaua. Mitxi !iparĩkauata, pitekata auakasaaki. Paiariniri. Uatxa poparĩkari itxapekua iuãka atokokana. Uatxa iparĩkauatapitikako pite ĩkapani, nota ĩkapani iparĩkauatini atokokana.

¹² Niokanatariko Onésimo, ikanapiriini pitemoni. Ininiã papakapariko iua. Nitiretari iua nota niĩto nitiretini atokokana. ¹³ Ninirekamari notakata uai ikaikotini, nota imoianatini ĩkapani, kotxi pite kona posotari pimoianatinino uai kateia äki nauakasaaki, kotxi pite auini maioakari. Nota uai aua Teoso iokanapirena erekari nisãpiretini xika. ¹⁴ Ninirekamari Onésimo uai, txamari !nininekari nikaminiri pite mauiritakiniti. ! Ninirekari nitapararitika nipaniãtinii paunitiniri Onésimo notakata ikaikotini. Pite nirekiniãri, imoianatano.

¹⁵ Akokaxiti Onésimo miteka. Mapakanani itakanapai. Atxiĩti Teoso auiritari poiãoka itakanapinii, ätipirika pitekata iuaĩkana ikaikotini ĩkapani. ¹⁶ Iua pinitiri piamotakiti itxapanikaua. Uatxa apiaerekata iua. Pitari pitiretakiti itxapekua, kotxi iua auikari Kristo säkire. Iteene nota turetari iua. Pite apia turetari iua, kotxi iua pinitiri itxaua. Apaka iua pitari itxaua, kotxi Apiananiri nakiti hĩtxaua.

¹⁷ Nota pimoianari nininiãua, nota papakapini atokokana pitxariko papakapiniri iua. ¹⁸ Akokaxiti maerekati ikaminiã, ĩtiriuatiniã, pisãpiretano. Nota ĩkitxitaiko. ¹⁹ Nota Paoro, uatxa niuakoã niõkatsopitari ia säkiretxiti. Notakarako ĩkitxita pite. Pite imarotari pite xinire auãki inini, kotxi notara akokaxiti nisãpiretai Xesosi säkire pauikini ĩkapani. Ininiã atxiĩti erekape pite ĩkitxitinino nota? ²⁰ Ininiãkara nitari, pikaminano ninirekakiti, kotxi Apiananiri nakitiakori atxaua. Pikamapoxokonitariko nãkixinire, kotxi Kristo nakitiakori atxaua. ²¹ Niõkatsopitari pite ĩkapani, kotxi nimarotapitikari pikaminiri namanaãkiti. Ari, nimarotari apiata pikaminano.

²² Apikomoni nitxai. Poeretari ereẽ nimakiniãtaã ìkapani. Hìte misãkire-tapekari Teoso kateia nitakanapini ìkapani, ininiã nimarotari Teoso auiritano iuaìkana nikanapiriini hìtemoni.

Itakapiretanapini Pirena

²³ Epápara inakori notakata kateia ãki aua, kotxi iua parìkauata Kristo Xesosi ìkapani. Iua xinikamanapitai hìte. ²⁴ Markoma, Arisitakoma, Témasima, Arókasima pakini notakata parìkauatakani, ninoa apaka xinikamanapitai hìte.

²⁵ Aãuìte Xesosi Kristo sikari ikinipoko erekari hãkixiniremoni. Ameẽ.

EPIREO

Teoso Ākiri Apiatini Pirena

¹ Teoso kitxakapirīka sāpiretari isākire kaiāokataikani, isākire sāpiretakanimoni. Ininiā ninoa sāpiretana aātokiriakorini Teoso sāpiretakiti. Kiriāpa Teoso misākiretana ninoa? Kaiāopokoriā imisākiretana ninoa: Itaponeēna, ixinireēna, isākire iōkatsopatakoriā, initiri itixine auakari sākireē, txaāpota imisākiretinina ninoa.

² Uatxa īkorasaaki, Teoso misākiretaua iua ākiri sākireē. Teoso mereēri iua ākiri ikinipoko apakapini īkapani. Teoso ākiri kamari ikinipoko. Ikamari itixi, ikinipoko iaxiti apiko nopinixiti auakari apaka. ³ Iua iotximere Teoso iotximeretxikana. Teosotxikana iua. Kaposotiireri iua, kotxi isākireēnoka imaīkari imakinika auini īkapani. Iuanokara makatxakari amaerekani. Amaerekani imakatxakasaaki, iusaaki iitopāka ikinimane auīte Teoso kikomoni itixineē.

Teoso Ākiri Apiata, Initiriakori Poiāoka

⁴ Ininiā Teoso ākiri iteene apiaerekata. Apiananiri iua. Teoso nitiriakori iaxitikini poiāorini. Teoso mereēri iuāka apiari. Ninoa uāka poiāorini itxauana.

⁵ Teoso !isāpiretari initiriakori ia isākire kitxakapirīkari: Pite nota ākiri pitxaua. Uatxa pite iri nitxaua nota, !itxa initiriakorimoni.

Apaka Teoso !isāpiretana ninoa ia isākire kitxakapirīkari: Nota iua iri nitxauako. Iua nota amarite itxauako, !itxa initiriakori itixine auakanimoni.

⁶ Ātipekana. Teoso mīkasaakiri iua ākiri imatonōkari īkorapokoritimoni, iponaniini īkapani, iusaaki Teoso txari initiriakori: Ninitiriakori, hīkapotoreēkauako iua apisatoō. Hīteosonetariko iua, itxa. Ikara atoko Teoso paniātari initiriakori.

⁷ Teoso sākire iōkatsopatakori, initiriakori pirena txari: Itxīkitakana initiriakori matamatakoni ininiuana, itima atoko ininiuana. Xamina tirinakari atoko itxauana ninoa, kotxi kaposotiirerini ninoa, itxa. ⁸ Iua amaritemoni Teoso txari:

Teoso pitxaua. !ixipoka auītetxi pininiāua. Ātipirika pite atāo mīkiikari pite auītetakani. ⁹ Pite taretari atāo inakari. Pomanatari maerekati. Ikara atoko ininiā, nota piTeosone mereēi pite apiari pininiua īkapani, pimoianariakori poiāorini ininiuana īkapani, kotxi apiata nikamapoxokonitai pite. !itxiā nimereēkiti nopini nitakini atokokana, nitakari poxokonitxi pite nopini. Nimereēi pite auītetxi pininiāua.

Ikara atoko itxa Teoso kitxakapirīka. ¹⁰ Iuaīkana Teoso sākire iōkatsopatakori txari: Apiananiri, merepitipanika pite kamari itixi. Apaka pikamari iaxiti piuakoā.

¹¹ Īkorapokoriti, iaxiti pakini xipokapitikako. Iuaritika pite auapanika. Mākatxi kitxakariāpotakari atoko itxa ikinika.

¹² Mākatxi atoko piapirikariko iaxiti, itixi pakini. Ininiā ipinimoni itxako. Iuaritika pite mitxi atoko pitxapikako. !Pixipoka.

Itxa Teoso sākire.

¹³ Teoso txari imi:

Nota kikomoni piitopākiniritika nixipokariko pimokaiakariakori. Nikamariko ninoa pikiti pitakiniātaā atoko ininiuana.

Ikara atoko !itxari initiriakori iaxitikini.

¹⁴ Ininiā kipa Teoso nitiriakori iaxitikini? Ninoa erekari matamatakoni. Iparīkauatana Teoso īkapani. Teoso iokanatana ninoa imoianatinirina kākiti iua sākire auīākani, kotxi Teoso makatxakari ninoa kākiti maerekani.

¹ Ininiã iteene mamixinikari ikinika atão sãkiretxiti mitxi akenakotakiti. Amakamaniãri ikara atoko, kanaua tiokaãpotakari atoko atxaua. Ininiã iuasaaki !aimarotaikari atão. Maxinikari atão inakari. ² Kitxakapirĩka Teoso nitiriakori iaxitikini sãpiretari atão inakari ate apiko atokiriakorimoni. Kãkiti makamakaniãri ninoa paniãtakiti, ininiã ninoa kãkiti apakapari Teoso misirikare. Atão ninoa apakapiniri imisiritikona. ³ Ininiã uatxa amitekini !auari, amanirekakaniãri amaerekani makatxakiko. Peerekari Teoso makatxakiniri kãkiti maerekani. Merepitipanika Apiananiri sãpiretari ikara maerekanitxi makatxakiko. Iua sãkire kenakotakani apaka sãpiretaua ate iua sãpiretakiti atokotxikana. ⁴ Teoso apaka oerekaua ninoa sãkire atão inini, kotxi oerekari itakaõtxikare. Ikamari kãkiti mimarotakiniti. Ikamari ikini sereti posotiiretxi. Erekari Matamatakoti siãkiti isika inirekakinimoni. Kãkiti isika inirekaka iaõka. Ikara atoko Teoso oerekaua ninoa sãkire atão inini.

Xesosi Kãkiti Atoko Itxa

⁵ Teoso !itxĩkitakana initiriakori iaxitikini itixi amaneriã auakani auiteakori ininiuana. Iua itixi amaneri ãkari asãpiretai hite. ⁶ Kitxakapirĩka Teoso sãkire iõkatsopatakori Xikari oitõãtaã txari:

Kipa kãkiti? Kinirepa pite xinikana ninoa? Ate minakati. Kinirepa aĩtari iaxitikiri maãkatatari kãkiti?

⁷ Mapakanani pikamari kãkiti itari iaxitikiri poiãori ininiãua. Iuasaaki pinitiriakori iaxitikini apiatakani txaua. Eereka pitxĩkitakari iua auĩtetxi ininiuua. Pitxĩkitakari iua kaiotximereri ininiuua. Pitxĩkitakari ikinimane paxitiniri iua. Pitxĩkitakari iua ikinipoko auĩte ininiuua.

⁸ Pitxĩkitakari ikinimane kaminiri iua paniãtakiti. !Auari ãtika iua paniãtakiti makamakati.

Ikara atoko Teoso sãpiretaua ate itxĩkitakiniri ikinipoko auĩtetiniri iua. !Auari ãtika iua maauĩtetakati. Txamari kona ate atamatapanikari iua ikinipoko auĩte ininiuua.

⁹ Iuapitikara aãtamatakiti Xesosi. Mapakananinoka Teoso txĩkitakari iua poiãori ininiuua. Iuasaaki Teoso nitiriakori iaxitikini apiata. Teoso txĩkitakari iua poiãori ininiuua, kotxi iuasaaki Xesosi atatsiirauata. Iuasaaki ipina. Uatxa Teoso txĩkitakari iua auĩtetxi ininiuua. Itxĩkitakari iua kaiotximereri ininiuua. Itxĩkitakari ikinimane paxitiniri iua. Teoso kamari ikara atoko inakari, kotxi Xesosi ipina kãkiti mapinakanani ãkapani. Iuasaaki Teoso oerekari ikinipoko erekari isikini kãkitimoni.

¹⁰ Ikinika Teoso nakiti. Ikinika iua kamakiti. Apakata iua txĩkitakiniri kãkiti maerekani makatxakakari atatsiirauatini, kotxi iuasaaki iposope kãkiti maerekani makatxakiko, kotxi iuasaaki Xesosi kamari ikinipoko iri paniãtakiti. Ininiãkara Teoso anikari iua anaakori iotximere auiniãtaã. Kaiãori ninoa. ¹¹ Kãkiti kamaerekatakari iritxikana iua kamaerekatakini iri. Ikara atoko ininiã, Xesosi !ipõtataru iua itariakori akiritiniua ate.

¹² Itxari Teosomoni:

Nisãpiretariko piuãka nitariakorimoni. Pitemoni apotiitakaniua sauaki nixikaretari ereka pinini.

¹³ Iuaĩkana kitxakapirĩka Teoso sãkire iõkatsopatakori txari:

Nauikariko Teoso sãkire.

Iuaĩkana Xesosi txari Teoso:

Uai nota aua pamariteakorikata. Pite sikana ninoa notamoni. itxa.

¹⁴ Kaĩtori Teoso anaakori. Ninoa aua ixini, iarẽka pakini. Ininiã kaĩtopekari Xesosi ninoa atokokana. Ininiã ipĩkasaaki ixipokari ipĩkitxi posotiire auakiti. Satanasi inakori iua. ¹⁵ Ikara atoko inakasaaki, isikakari kãkiti ipĩkitxi pĩkakani. Mitxi ninoa iaxirikakoni atoko itxana. ¹⁶ Aimarotari, iuasaaki !imoianatana initiriakori iaxitikini. Iuasaaki imoianatana Apraão apika mekaniriakori. ¹⁷ Ikara atoko ininiã, Xesosi txĩkitakaãka itariakori atokokana ininiuua, ininiã iposotari sasetotxi auĩte apiatakari ininiuua kãkiti ãkapani. Iparĩkauatakasaaki Teoso ãkapani, ikamari ikinipoko ikamaenetakiti. Maerekati kamakani kãkiti, iuaritika iamoniãkari kãkiti. Kãkiti itxapekaua Xesosi, ininiã iua ipina kãkiti maerekani imakatxakini ãkapani, iuaĩkana kãkiti imikanapiriini Teosomoni

ĭkapani. ¹⁸ ĭkorapokoriti Xesosi auakasaaki, imarotari Satanasi atamakaerekatiniri iua. Ininiã Satanasi atamakaerekatakasaakina kãkiti, iua posotari isikataparatinina ninoa.

3

Xesosi Apiatakari, Moisesi Poiãori

¹ Ininiã nitariakori, Teoso mereẽkini, hĩte akiritaãka Teoso tixine hãuini ĭkapani. Iteene hĩxinikariko Kristo Xesosi, kotxi iua Teoso iokanatakiti itxaua. Apaka iua sasetotxi auĩte apiatakari itxaua. Iuara asãpiretari apanakini. ² Moisesi kamari ikinika Teoso paniãtakiti inirimane apisatoõ, Teoso aapoko aamata kamakori ikamakasaaki. Iua atokokana Xesosi kamari ikinika iua mereẽkari paniãtakiti. ³ Apiaerekata Xesosi, ininiã iua apakapari apiata ipaxitiko, Moisesi poião, kotxi aapokotxi kamakari apakapari apiata ipaxitiko. Poião aapokotxi paxitiko aua. Iua atokokana, Xesosi aapokotxi kamakari atoko itxaua. Moisesi aapokotxi atoko itxaua. ⁴ Ikinika kãkiti aapokona kamakani auapitika, iuaritika Teoso ikinipoko kamakari itxaua. ⁵ Moisesi Teoso nitiri itxaua. Iua ãtipirika kamari ikinipoko Teoso nirekakiti inirimane apisatoõ. Ikara erekari ikamakiti oerekari Teoso sãkire iua sãpiretakiti atão inini.

⁶ Kristo Teoso ãkiri itxaua. Iua ãtipirika kamari ikinipoko Teoso paniãtakiti Teoso aapoko inĩkatini. Teoso aapoko atoko atxaua ate, iteene aãuikiniãri iua sãkire, apoxokoniritika ãtipirika aiãtapiniãri Xesosi kanapiriini õti.

Erepaniko, ĩĥitakanapapiri Hãuikakiti

⁷ Ininiã Erekari Matamatakoti txari:

Uatxa õti hĩkenakotakasaakiri nisãkire,

⁸ kona hĩkamapiriko hĩxinire paikori inini hãtokiriakorini atoko hinini. Āparaã makipakaniãtaã auakasaakina, iuaã ninoa !auikari nota sãkire. !Ikamarina nipaniãtakiti. Iuasaaki ninoa ataerekatapikano nota.

⁹ Koarẽtakanani, ikiniõtika hĩte apika atokiriakori ataerekatapikano nota. Ninoa atamatarini niposotiire. Txamari ikiniõtika ninoa ataerekatano nota. !Auikarina nisãkire.

¹⁰ Ikara xika nomanatana ninoa. Iuasaaki nitxa: “ãtipirika ninoa sapika apanakini sãkire tikini. ĩmarotarina nixinikakiti, nikamakiti pakini.”

¹¹ Nomanatakasaakina ninoa imaerekanina xika, iuasaaki nitxako: “Atão nisãpiretana ninoa. Ninoa maĩroãpekaniikarako nikamakiti tomatikoãtaã,”

itxa Erekari Matamatakoti.

¹² Ininiã nitariakori, erepaniko. Atxiĩti ãtikaka hĩte aua hĩxinire maerekati mauikareti. Ikara atoko inakasaaki, hĩtakanapapekari Teoso ãtipirika auãki inakari, maerekati tikini hĩsini ĭkapani.

¹³ Ininiã ikiniõtika hĩkamataparaxiniretakakauako. Uatxapanika inakasaaki hõtãkikakauako. Ininiã maerekanitxi kona misirienetai. !Ikamari kaikoxinire hinini.

¹⁴ Aãuini mapotõkire manapi iteene aãuikiniãri Kristo sãkire merepitipanika aãuikiniri atokotxikana, atão iuakata parĩkauatakani atxaua. ¹⁵ Uatxa nisãpiretai kitxakapirĩka iõkatsopatakiti:

Uatxa ia õti hĩkenakotakasaakiri iua sãkire, kona hĩkamapiriko hĩxinire paikori inini, hãtokiriakorini atoko hinini, ãparaã makipakaniãtaã auakasaakina. Ninoa !auikari nota sãkire.

¹⁶ Ninoa kenakotari Teoso sãkire, txamari !inirekarina ikaminirina isãkire iaõka. Kipa ninoa? Exito tixini Moisesi makatxakakinira ninoa. ¹⁷ Kikãkititipa kamari Teoso naiatiniua koarẽtakanani? Ninoa maerekati kamakani. Ikara xika ninoa ipĩpeka ãparaã makipakaniãtaã. ¹⁸ Kirimonipa Teoso txari ia? “Atão nisãpiretai hĩte. Kona himaĩroãpekaniikarako nikamakiti tomatikoãtaã.” Teoso sãpiretari ikara iua sãkire mauikakanimoni. ¹⁹ Ininiã aimarotari, ninoa ĩroã iuaã, Teoso sãkire imauikakanina xika.

4

Tomatikoãtaã Aua Teoso Nakitiakori ĭkapani

¹ Auapitika Teoso kamaenetakiti kākiti tomatiniātaā Teoso kamakiti aïroini tîkane, ininiā erepaniko. Atāo inakari hîkamako iuaā hîïroini îkapani. ² Teoso iokanapirena erekari sâpiretaāka atemoni, kitxakapirîka Moisesi auakasaaki auakanimoni apaka. Txamari maxikatiika ninoa kenakotari Teoso sâkire, kotxi ninoa lauikari ikenakotakitina. ³ Ate, Teoso sâkire auiâkaniua, îroā ikara Teoso kamakiti tomatikoātaā. Ininiā Teoso sâpiretakiti iaōka auapeka. Ia atoko Teoso txari:

Nomanatakasaakina ninoa imaerekanina xika, iusaaki nitxako: “Atāo nisâpiretana ninoa. Ninoa maïroāpekaniikarako nikamakiti tomatikoātaā,”

itxa Teoso. Ikara atoko itxama, iuaritika ikara tomatikoātaā iposope iparîka ixipokasaaki, itixi ikamakasaaki. Ikara atoko ikama ate îkapani. ⁴ Teoso sâkire iōkatsopatakori sâpiretari itomatini ôti pirena. Itxari:

Iparîkauata seisi ôti, ininiā eereka apikomoni âti ôti inakasaaki itomata. Iusaaki itakanapari ikinika iparîka,

itxa Teoso sâkire iōkatsopatakori. ⁵ Teoso sâkire iōkatsopatakori txari:

Ninoa maïroāpekaniikarako nikamakiti tomatikoātaā.

⁶ Iuaritika apanakini îroāpanikako iua tomatikoātaā. Txama apanakini kitxakapirîka auakani !îroā. Ninoa merepitipanika sâpiretaāka Teoso iokanapirena erekari, txamari !îroāna, kotxi !ikamarina Teoso paniātakiti. ⁷ Ininiā Teoso kamari iketo ôti apanakini iuaātaā apokini îkapani. Iusaaki Teoso akiritari iketo ôti “uatxa.” Ikara atoko Teoso misâkiretari Tavii:

Uatxa ôti hîkenakotiniāri nisâkire, ininiā kona hîkamapiriko hîxinire paikori inini.

⁸ Aātokiri kitxakapirîka auakari Xosoe inakori, iuara anikari kākiti itixi Teoso sikaenetakitimoni. Txamari !îroāna atāo inakari tomatikoātaā Teoso sikakiti, kotxi eereka Teoso sâpiretari âti ôti tomatikoātaā îroïko ôti. ⁹ Ikara atoko ininiā, auapanikako Teoso kamakiti tomatikoātaā inakitiakori îkapani. ¹⁰ Ininiā kākiti îroākasaaki Teoso kamakiti tomatikoātaā, iotokakari iparîka, Teoso iparîka iotokakini atokokana. ¹¹ Ininiā nitariakori makamariko ikinika atāo inakari iua tomatikoātaā aïroini îkapani. Erepaniko, kotxi apanakini !îroā, Teoso sâkire imauikakanina xika. Ininiā !hîkamapiri ninoa kamakiti atokokana.

¹² Teoso sâkire kaposotiireri. Isâkire auâki itxapika, kotxi Teoso âtipirika auâki inakari sâpiretakiti. Saasara ipi auanaro auakaro, iteene kauanaro, ininiā iposotari ikisauakiniri inirekiniātaā. Iposotari ikisauakiniri kākiti pakaki, iua âki auakari axîpe imakatzakini îkapani. Apiata Teoso sâkire, kotxi Teoso sâkire posotari apokini kākiti iikite kākiti xinirekata apotiitiniātaāua. Teoso sâkire imarotari ikinika axinikakiti, anireêkiti pakini aâkixinireê. Teoso sâkire atamakaerekatari ikara aâkixinireê auakari. ¹³ Teoso atamatari ikinipoko akamakiti, ininiā !auari iomaātakori. Ikinipoko !ipataāka. Aâuïte Teoso apisatoō ikinipoko kasarori.

Xesosi Sasetotxi Auïte Apiatakari

¹⁴ Ininiā atemoni auari sasetotxi auïte apiatakari, Xesosi, Teoso âkiri. Apiananiri iua. Iua sari iaxiti Teoso auiniātaā. Ininiā iteene maâuikari iua sâkire. ¹⁵ Ate nakiti sasetotxi auïte apiatakari imarotari ate âkixinire iōkapetini. Imarotari ate maposotakinini. Imarotari ate tsii. Ikara atoko inakari imarota, kotxi Satanasiteene atamakaerekatari iua, ate atamakaerekatiko atoko. Iuaritika maerekati !ikama. ¹⁶ Ininiā ataparaxinireritika masa Teosomoni. Aâuïte topâkiniātaā masa ikinipoko erekari isikakiti aâpakapini îkapani, iamoniâkiniua îkapani. Isikaua ikinipoko erekari. Isikataparataua amaxikiko auakasaaki.

5

Xesosi Sasetotxi Auïte Apiatakari Mereïko

¹ Ikinimane sasetotxi auïte apiatakari mereeêka kākiti sauaki. Iua misâkiretari Teoso kākiti îkapani. Isikari kākiti sikakiti iuamoni. Kitxakapirîka iua okari pirâtxi Teoso apisatoō kākiti maerekani iikitxitini îkapani. ² Iamonîkari mimaroreni, Teoso takanapakani pakini, kotxi imarotari kākiti âkixinire iōkapetini, kotxi iua apaka kākiti itxaua. ³ Sasetotxi apaka maerekati kamakari itxaua. Ikara xika merepanika iua okari

pirãtxi Teoso apisatoõ iuaka maerekani iikitxitini ikapani. Eereka iua okari pirãtxi kãkiti maerekani iikitxitini ikapani.

⁴ Kãkiti paxitari sasetotxi, iuaritika ninoa kona mereëri sasetotxi parika. Teosonoka mereëri kãkiti sasetotxi ininiua ikapani, sasetotxi Arão inakori Teoso mereini atokokana kitxakapirika.

⁵ Xesosi iuaka likamaua sasetotxi auite apiatakari ininiua. Kona itxari: "Apakatapitika sasetotxi nininiua." Iuaritika Teoso txari iua: Pite namarite. Uatxa noerekariko kãkiti nota pite iri nininiua, itxa Teoso.

⁶ Iuaikana Teoso txari: Ætipirika sasetotxi pitxaua. Sasetotxi Meokisiteki inakori atoko inakari pitxaua, itxa Teoso Xesosimoni. ⁷ Xesosi ikorapokoriti auakasaaki, iua iteene misãkiretari iri. Ipinini apisapanika iteene amanaãri iri imapinakani ikapani. Imisãkiretakasaakiri iua, iteene itxiãta. Irinokara posotari itxikitakiniri imapinakani. Iri kenakotari isãkire, kotxi Xesosi txari: "Pinirekakitinokara ninireka." ⁸ Xesosi Teoso ãkiri, iuaritika atatsiirauatakasaaki, imaroãpotari Teoso nireëkiti iaõka ikamini. ⁹ Iua kamari ikinipoko iri paniãtakiti. Ikara atoko ininiã, kãkiti maerekani makatxakakari itxapekaua. Imakatxakari ipaniãtakiti kamakani maerekani, ininiã ninoa auapininiika itxanako Teosokata. ¹⁰ Teoso mereëri iua sasetotxi auite apiatakari ininiua, Meokisiteki inakori sasetotxi ininiua atokokana.

Erepaniko, Atão Sãkiretxiti !Hítakanapape

¹¹ Aua apikomoni kaiãopokori ikara atoko inakari asãpiretinii hite, txamari pamimari ikara asãpiretinii hite, kotxi !katimari himarotiniiri Teoso sãkire. ¹² Akokaxiti hite auikari Xesosi sãkire, ininiã uatxa apiaerekata Xesosi sãkire oereëkani hininiua. Txamari hite nirekari ãti oerekinii iuaikana merepitipanika atão inakari Teoso sãkire iõkatsopatakoriã auakari. Hite eenetxi xapitikiri atoko. Hinirekari Teoso sãkire tinitxiã atoko inakari. Teoso sãkire nipokori atoko inakari !hĩposotapanika hãpakapini. ¹³ Teoso sãkire imarotakari tinitxiãnoka nirekakari atoko inakari, iteene !imarotapanikari Teoso sãkire. !Imarotari atão inakarínoka ikamini, kotxi iua eenetxi xapitiri atoko inakari. ¹⁴ Kãkiti aneëkari nikari xinitxi. Kataparaxinireri nirekari Teoso sãkire, xinitxi aneëkari nirekini atokokana. Kãkiti ikiniõtika kenakotiniãri Teoso sãkire, ininiã imarotari atão inakari. Imarotari atão minakati apaka.

6

Maãpaiaõkarauata Apikomoni

¹ !Apakata ikiniõtika merepitipanika Kristo sãkire oerekakorínoka axinikini, kotxi aimarotapekari. Aimarotapekari atakanapiniri maerekati akamakiti. Aimarotapekari ateka kamakiti txikitakaua apinini. Aimarotapekari Teoso sãkire aãuikini. ² Aimarotapekari apatxisarauatini. Aimarotapekari atakauakotiniua ãti nopini. Aimarotapekari ipikani iuaikana õkitikiniua. Aimarotapekari Teoso misiritinina maerekati kamakani ãtipirika. !Apakata ikara ãtipirika aõerekinii. ³ Apikomoni auapitika, ininiã maãpaiaõkarauata apikomoni. Teoso auiritiniãua, apikomoni maxinika.

⁴ Kãkiti takanapiniãri Teoso sãkire auikini, !apakataika ikanapiriinina Teosomoni. Mitxi ninoa imarotari Teoso sãkire atão inakari. Mitxi ninoa imarotari erekari iaxitikiri. Mitxi imarotari Erekari Matamatakoti parika ãkixinireëna. ⁵ Mitxi imarotarina Teoso sãkire ereka inini. Mitxi imarotarina Teoso posotiire itixi amaneri apokasaaki. ⁶ Ikara atoko ninoa imarota, iuaritika ninoa takanapari Teoso. Ininiãkara !apakata iuaikana ikanapiriinina Teosomoni, kotxi iuaikana imisiritarina Teoso ãkiri aamina ipiriãmitakari nopini imisiritiko atoko. Iuasaaki ninoa txikitakari kãkiti iuaikana napetiniri Xesosi.

Kikio Atoko Anini Pirena

⁷ Teoso takari erekari itixi ia atoko inakari nopini: Æparaã ikipa kaiãokatani iuaã, ininiã iminaua kienatxi katakareri nirekakiti. ⁸ Txamari itixi inako, aanaia pakini auiniã, !itxa. Ikara xika atxiiti imisiritaãka. Ininiã arikaãkako. Ikara atoko inapeëkanako kãkiti.

Maerekati aniniãua, ininiã pamonõkoniri atemoni. Ikara atoko ininiã, imapotõkire õti Teoso !inirekaikaua ate. Ixipokaua aanaia xipokiko atoko.

⁹ Nitariakori, ikara atoko asãpiretai hïte, iuaritika ate imarotari kona hïte ikara atokoni. Aimarotari hãpakapiniri erekari, kotxi Teoso makatxakapekari himaerekani. ¹⁰ Teoso kamari ikinika atão. Iua !imaxinïkaretari hïparïka iua ïkapani. Hïtiraõki iuamoni !imaxinïkareta, kotxi himoianatapekari iua nakitiakori. Uatxa himoianatapanikana ninoa. ¹¹ Ate nirekari ikinika hïkaminiritika Teoso ïkapani imapotõkire õti manapi apokini. Ikara atoko ininiã, himarotari hiãtapakiti apokapitikako hïtemoni. ¹² Kona apakata hïarinauatini. Apanakini Teoso sãkire auiãkani kamakiti atoko hïkamako, kotxi ninoa iãtapari Teoso sikaenetakiti apakapinina.

Teoso Sikapitïkariko Isikaenetakiti

¹³ Kitxakapirïka Teoso sãpiretari isikaenetakiti Apraãomoni. Apiatakari Teosonokara aua. Åti apiatakari iua atoko inakari !auari, ininiã iuaka uãkaã isãpiretari isikaenetakiti isikini Apraãomoni. ¹⁴ Ininiã Teoso txari Apraão: “Nitakapitïkari erekari pitemoni. Nisikaiko itomaneri papïka mekaniriakori,” itxa. ¹⁵ Ininiã Apraão kenakotakasaakiri ikara, iteene iãtapari Teoso sãpiretakiti apokini. Eereka Apraão apakapari Teoso sikaenetakiti.

¹⁶ Kãkiti sãpiretakasaakiri isikaenetakiti åti kãkitimoni, iusaaki ninoa apoka åti apiatakari apisatoõ isikaenetakiti isãpiretinina ïkapani. Ininiã iusaaki kãkiti imarotapitïkari isãkire atão inini. Ikara atoko ininiã, aãpirena !auari isikaenetakiti xika. ¹⁷ Teoso nirekari inakitiakori iteene imarotiniri imatakanapakaniri isikaenetakiti isikinina ninoa. Ininiã isikaenetakiti isãpiretakasaaki, isikari isãkire iuaka uãkaã. ¹⁸ Ininiã ipi aua: Teoso, Teoso sãkire pakini. Teoso mitxi atoko itxapikako. Teoso sãkire mitxi atoko itxapikako. Ininiã Teoso !iposotari atão minakati isãpiretini. Amiteka iuamoni, iua nïkatiniua ïkapani, aiãtapakiti aãpakapini ïkapani. Ininiã asikataparaxiniretaãka.

¹⁹ Ikara atoko inakasaaki, aposotari iteene aãuikiniri Teoso sãkire. Aiãtapari ikinipoko iua sãkire iaõka apokini. Teoso sãkire aãuikini, minari maporo maïkakari atoko itxa. Maporo maïkakari !auiritari maporo tiokini. Teoso sãkire aãuikini maïkari axinire. Isikataparatarari axinire. !Auiritaua atiokini maerekanitximoni. Teoso sãkire aãuikini anikaua Teosonani Auini Pakitaãtaã, mãkatxi mata arõkakari apikomoni auakari pakitamoni. Kitxakapirïka sasetotxiakori auïte apiatakarinoka ïroã iuaã. ²⁰ Iuaã Xesosi ïroã ate ïroini apisa. Iuaã imisãkiretari iri ate ïkapani. Sasetotxiakori auïte apiatakari itxapekaua åtipirika ate ïkapani. Meokisiteki inakori sasetotxi ininiua atoko itxa Xesosi.

7

Meokisiteki Pirena

¹ Meokisiteki inakori Sareẽ tixini auakani auïte itxaua. Iusaaki sasetotxi itxaua apaka. Teoso, Apiananiri, kamari iua sasetotxi ininiua. Kitxakapirïka Apraão kamari neenamtxi åti tixini auakani auïteakorikata. Iua kanapiriãkasaaki, aõkitari Meokisiteki. Iusaaki Meokisiteki takari erekari Teoso sikakiti iuamoni. ² Iusaaki Apraão sikari iua tiitxi imaktxakakiti ipixini. Tesi tiitxi auiniã, isikari åti Meokisitekimoni. Meokisiteki akiritaãka “Auïtetxi Atão Inakari Kamakari.” Apaka akiritaãka “Auïtetxi Kãkiti Kamarekaxiniretakari.” ³ !Kimarotikori Meokisiteki iri, inoro pakini. !Kimarotikori apika atokiriakori. !Kimarotikori iponaniini, ipinini pakini. Teoso åkiri atoko itxa. Sasetotxi åtipirika itxaua.

⁴ Hïxinïkariko iua Meokisiteki. Apiatakari iua. Apraão iteene paxitari iua, ininiã isikari ipixini tiitxi iua makatxakakiti iuamoni. ⁵ Eereka åti õti Apraão tikini Teoso paniãtari Arevii apika mekaniriakori, sasetotxiakori, apakapiniri ipixini kãkiti apakapakiti, txineiro, tiitxi pakini. Ninoa apakapari kãkiti sikakiti Teoso ïkapani. Ikinimane ninoa Apraão apika mekaniriakori itxauana. Iuaritika sasetotxiakori apakapari inirimane sikakiti. ⁶ Iua Meokisiteki Arevii nirimane !itxaua. Iua aua kitxakapirïka Arevii apisapanika. Iuaritika iua apakapari ipixini Apraão makatxakakiti. Eereka Meokisiteki takari

erekari Teoso sikakiti Apraãomoni, Teoso sikaenetakiti apakapakarimoni. ⁷ Iua Apraão poiãori. Apiatakari Meokisiteki, kotxi apiari takari erekari Teoso sikakiti poiãorimoni. ⁸ Ikinika Arevii apika mekaniriakori, Teosomoni kãkiti sikakiti apakapakani, ipinanipeka. Ātipirika auakari atoko itxa Meokisiteki. ⁹ Atxiĩti aposotari asãpiretiniri ia atoko: “Arevii sikari isikakiti Meokisitekimoni Teoso ĩkapani, kotxi iua ina Apraão ĩto ãki.” ¹⁰ Kotxi Apraão aõkitakasaakiri Meokisiteki, iuasaaki Arevii kona auapanika. Ininiã iua auini apisapanika Apraão ĩtoã aua, kotxi Apraão apika mekaniri itxaua Arevii.

Xesosi Meokisiteki Atoko Inini

¹¹ Arevii apika mekaniriakori sasetotxiakori itxauana. Iua apika mekaniri Arão inakori. Arão apika mekaniriakori apaka sasetotxiakori itxauana. Teoso sikari ipaniãtakiti iõkatsopatakori ninoamoni, isãkire kãkiti imarotini ĩkapani. Iuaritika ninoa sasetotxiakori parĩka !oerekari kãkiti kamaerekatiko. Ininiã ãtião sasetotxi nirekaãka. Sasetotxi Arão atoko inakari linirekaãkaika. Sasetotxi Meokisiteki atoko inakari nirekaãka.

¹² Ātião sasetotxi auakasaaki, ãtião Teoso paniãtakiti iõkatsopatakori aua iuasaaki. ¹³ Xesosi kona Arevii apika mekanirini. Iua Xotaa apika mekaniri. Xotaa mekaniriakori kona sasetotxiakorini. Ninoa kona okari pirãtxi Teoso ĩkapani. Kona iparĩkauatana Teosomoni sikakori takikoãtaã. ¹⁴ Ikinimane imarotari aãũite Xesosi Xotaa nirimane ininiuua. Moisesi iõkatsopatakiti !auritana ninoa sasetotxi ininiuua. ¹⁵ Ate sãpiretapekari Meokisiteki pirena. Aimarotari auapitika ãti sasetotxi, Meokisiteki atoko inakari. Uatxa aimarotari Xesosi Meokisiteki atoko itxaua.

¹⁶ Kitxakapirĩka sasetotxi pitxaua, kotxi pikiomaneakori sasetotxi apaka itxauana. Teoso kamari Xesosi sasetotxi ininiuua, kotxi iua auapikako. Kaposotiireri iua. !Ixipoka. ¹⁷ Teoso txari Xesosi isãkire iõkatsopatakoriã:

Ātipirika sasetotxi pitxaua. Sasetotxi Meokisiteki atoko inakari pitxaua, itxa.

¹⁸ Ininiã mitxi auakari sasetotxiakori parĩka !auaika, kotxi itapara !auari. Xipope ikara. ¹⁹ Moisesi paniãtakiti iõkatsopatakori !ikamari kãkiti ereka inini. Uatxa apiaerekatakari aiãtapakiti apokapeka ĩkorapokoriti. Ininiã iua anikaua Teosomoni.

²⁰ Teoso isãkireẽ txĩkitakari Xesosi sasetotxi ininiuua. ²¹ Teoso !isãkirauata ikara atoko kãkiti sasetotxipeka inakasaaki. Teoso txĩkitakari Xesosi sasetotxi ininiuua isãkireẽ, kotxi itxari Xesosi:

Nota Apiananiri sãpiretapekari nikamaenetakiti. Ikara nikamapitikako, ininiã ãtipirika sasetotxi pitxaua, sasetotxi Meokisiteki atoko inakari pitxaua, itxa Teoso. ²² Ininiã ikara Teoso sãkireẽ, aimarotari Teoso kamapitikariko ikamaenetakiti apiari, kotxi iposope isikiniuua Xesosi.

²³ Auapeka itori sasetotxiakori. Ninoa kona posotari ãtipirika iparĩkauatinina, kotxi ikoriãpekana. ²⁴ Xesosi auapikako, ininiã ãtipirika sasetotxi itxaua. ²⁵ Ininiã iposotari imaktxakiniri ikinika amaerekani, Teosomoni anikasaakiua, kotxi ãtipirika aua, ininiã ãtipirika imisãkiretari Teoso ate ĩkapani.

²⁶ Ininiã ikara atoko inakari sasetotxi auĩte apiatakari anirekapitika. Apiaerekatakari iua. !Kaneenamari. Ikerokakiti !auari. Itxiko ixinireẽ !auari. Maerekati !ikama. Iaxiti apiko nopinixiti auakari, auĩtetxi Apiatakari itxaua. Ikara atoko inakari sasetotxi anirekapitika. ²⁷ Apanakini sasetotxi auĩte apiatakani ĩkorapokoriti auakani atoko ! itxaua. Ninoa ikiniõtika okari pirãtxi, merepanika ninoaka maerekani makatxakiko ĩkapani. Eereka ninoa okari pirãtxi kãkiti maerekani makatxakiko ĩkapani. Kona ikara atokoni itxa Xesosi. Ātikatanokara Xesosi oxiketari iarẽka kãkiti ĩkapani. Iuaka ipina kãkiti ĩkapani. ²⁸ Mitxipe sasetotxi auĩte apiatakani mereeẽka Moisesi paniãtakiti iõkatsopatakori iaõka. Ninoa tapara !auari. Moisesi sãkire tikini Teoso mereeri imi ãtipirika sasetotxi ininiuua ĩkapani. Ātipirika erekarinoka kamakari iua.

¹ Ia atoko asāpiretakiti: Atemoni auapitika atāo sasetotxi auīte apiatakari. Iaxiti iua topāka aūūte Teoso kikomoni, auītetxi auiniātaā. ² Iuaā Teoso auiniātaā, imisākiretari iua ate ĩkapani. Iuaā aua atāo inakari Teoso aapoko, Apiananiri kamakiti. Kona kākiti kamakitini.

³ Ikinika sasetotxi auīte apiatakari auari iparīka. Isikari kākiti siākiti Teosomoni. Isikari pirātxi okakori Teosomoni. Ininiā Xesosi parīka apaka aua isikarauatini. Iuaka isikaua Teosomoni. ⁴ ĩkorapokoriti Xesosi auakasaaki, sasetotxi !itxaua, kotxi auape ĩkorapokoriti sasetotxiakori kākiti siākiti sikakani Teosomoni. Moisesi iōkatsopatakiti atokotxikana ikamana. ⁵ Sasetotxi ĩkorapokoriti auakani kamakiti atāo, txamari ninoa parīka !inirekaākaika. Ninoa parīka sanōkatxi atoko itxa, Xesosi parīka iaxitikiri aimarotini ĩkapani.

Kitxakapirīka Teoso paniātakasaakiri Moisesi Teoso aapoko aamata kamakori ikamini ĩkapani, Teoso txari Moisesi:

Pikamariko naapoko nipaniātakiti iaōka ixirata auīte nopini aūuakasaaki noerekakiti.

Ipinimoni inakari !pikamape,
itxa Teoso.

⁶ Xesosi parīka Teoso sikakiti apiaerekata. Kitxakapirīka sasetotxiakori parīka poiāo erekari. Iua atokokana Teoso kamaenetakiti amaneri apiaerekata. Kitxakapirīka ikamaenetakiti poiāo erekari. Xesosi txīkitakari Teoso kamaenetakiti amaneri apokini kākiti ĩkapani, kotxi iua ipina kākiti ĩkapani. Teoso kamaenetakiti amaneri apiaerekata, kotxi ikamaenetari kaiāopokori erekari apiaerekatakari.

⁷ Teoso kamaenetakiti Moisesimoni apakatiniā maerekati imakatzakini ĩkapani, ininiā kona ikamari āti ikamaenetakiti apiatakari. ⁸ Txamari Teoso !apokaerekatari kākiti, kotxi kākiti kamapanikari maerekati. Ininiā Apiananiri txari kākiti:

Āti ōti nisāpiretariko nikamaenetakiti amaneri Isaeo nirimanemoni, Xotaa niri-manemoni pakini.

⁹ Kitxakapirīka nisāpiretari mitxi nikamaenetakiti ninoa atokiriakorinimoni. Iuasaaki nota makatzakana ninoa imisiritikosaakina Exito tixiniā. Txamari ninoa likamari nisākire iaōka. Ininiā nitakanapana ninoa. Nikamaenetakiti amaneri kona mitxi nikamaenetakiti atokoikani.

¹⁰ Āti ōti ĩkari nikamaenetakiti amaneri nisāpiretariko Isaeo tixini auakani. Ia atoko inakari nikamaenetakiti amaneri: Nitakariko nipaniātakiti kākiti ĩkitekē. Niōkatariko nipaniātakiti ninoa ākixinireē. Iuasaaki ninoa Teosone nitxauako. Iuasaaki ninoa nota nakitiakori itxauanako.

¹¹ Iuasaaki kākiti kona oerekari āti imarotini Apiananiri. Kona kākiti oerekari itari imarotini Apiananiri, kotxi iuasaaki ikinimane imarotanoko nota. Poiāoka inakani, apiatakani pakini imarotanoko nota.

¹² Nimaxinīkaretariko ikinika maerekati ikamakitina. Kona nimisiritaitakanako ninoa. Kona nixinikaikariko maerekati ikamakitina, itxa Apiananiri. ¹³ Teoso kamakasaakiri ikamaenetakiti amaneri, iuasaaki oerekari kākiti mitxi ikamaenetakiti Xoteoakorinoka ĩkapani ikamape, ininiā inapape. Tiitxi kitxakari patimari xipokini atoko, ikara mitxi Teoso kamaenetakiti xipoka.

9

Teoso Aapoko Aamata Kamakori

¹ Kitxakapirīka Teoso kamaenetakiti isāpiretakasaakiri Moisesi, Teoso oerekari Moisesi oerekiniri kākiti Teoso apisatoō apokini. Iua apaka sāpiretari kākiti iua aapoko ĩkorapokoriti ikaminina ĩkapani. ² Ininiā ninoa kamari Teoso aapoko aamata kamakori. Sasetotxiakori ĩroiniātaā aua tirikapī takiko tiitxiti. Iuaā aua apaka komiri Teosomoni siākori amesa nopini. Iua pakita ninoa takauākatari “Teoso Auini Pakitaātaā.” ³ Apanīkaki mākatxi mata kasipiri arōkakari aua. Iua mākatxi mata apikomoni auakari pakita ninoa takauākatari “Teosonani Auini Pakitaātaā.” ⁴ Iuaā aua kamariāro arikiko amesati oro kamakoro. Iuaā aua Teoso kaixane. Iua kaixa akiritaāka “Teoso

kamaenetakiti kaixati.” Iua kaixa nopini mapara itaāka oronokara. Iua āki itakaāka kopitipaki oro kamakoro. Iua kopitipaki āki itakaāka xapitiri komiri manaa inakori. Iua kaixa āki aua apaka Arāo tsonareke. Īkora mitxi pitxaka iuaīkana. Apaka iua kaixa āki aua ipi kaita. Īkora kaita nopini aua Teoso paniātakiti iōkatakori. ⁵ Iua kaixa nopini aua ipi Teoso nitiriakori iaxitikini atoko inakani. Oro kamakori ninoa. Akiritaāka Keropiī inakoni. Keropiī matameēkari imikita iua kaixa tore nopini. Iuaā Teoso maxiniġaretari kākiti maerekani.

Uatxa !apakata apikomoni noerekinii ikara pirena.

⁶ Teoso Auini Pakitaātaā sasetotxiakori ĩroā ikiniōtika iparīkana ikaminina Teoso ĩkapani. ⁷ Sasetotxi auīte apiatakarinoka ĩroā Teosonani Auini Pakitaātaā. Ātikanani ātikatika ĩroā. Iua anikari arēkatxi iuakata. Arēkatxi imanikakaniā, !īroā. Iua arēkatxi isika Teosomoni merepanika iuaka maerekani Teoso makatxakini ĩkapani. Eereka ikamari ikara apanakini kākiti maerekani Teoso makatxakini ĩkapani. ⁸ Iuasaaki Teoso kona auiritari kākiti ĩroini Teosonani Auini Pakitaātaā. Ikara atoko Erekaru Matamatakoti oerekaua ate, kotxi kona Teoso oerekapanikari ikinimane kākiti ĩroini Teoso apisatoō. Teoso aapoko aamata kamakori auapanika inakasaaki, Teoso kona oerekari kākiti iuamoni apokini. ⁹ Ikara Teoso aapoko kitxakapirīka auakari ate oerekiko itxaua uatxa. Oerekari ia. Kākiti sikakiti Teosomoni, pirātxi okiko Teoso ĩkapani apaka, kona posotari oeretiniri Teoso teosonetakani ākixinire. ¹⁰ Ikara Teoso oerekakiti kitxakapirīka oerekari kākiti iniākiti atāo inakari, iātakiti atāo inakari pakini. Oerekari kākiti iīto arokiko, itii arokiko pakini Teoso apisatoō apokini iposope inini ĩkapani. Teoso kamaenetakiti amaneri apokasaaki, kona akamaikari ikara mitxi Teoso oerekakiti.

Kristo Arēka

¹¹ Kristo apokapeka. Sasetotxi auīte apiatakari itxaua. Oerekaua erekari Teoso sikakiti. Iparīkauata Teoso aapoko apiaerekatakari āki. Iua Teoso aapoko kākiti makamakinini. Iua aapoko !auari ĩkorapokoriti. ¹² Iua ĩroāksaaki iuaātaā, !anikari potxi arēka, kema auīte ākiri arēka ĩroini ĩkapani. Iua ĩroāksaaki Teosonani Auini Pakitaātaā iaxiti auakariātaā, anikari iuaka arēka, kotxi ikitakari iarēka ātikatika ikinimane kākiti ĩkapani. Ininiā ĩkitxitari Teoso ātikatika kākiti maerekani ĩki, ininiā kākiti aua Teosokata ātipirika. ¹³ Potxi arēkaā, kema auīte arēkaā, kema auīte ākiri ariākori paniā pakiniā, kitxakapirīka sasetotxi tseētari maerekati kamakani Teoso apisatoō apokinina ĩkapani. Ininiā iuasaaki maparanoka oeretaāka. Ākixinirena !oeretaāka.

¹⁴ Apiaerekata Kristo arēka, kotxi iua posotari oeretiniri aākixinire. Maerekati !auari Kristomoni. Iuaka sikaua Teosomoni Erekaru Matamatakoti posotiireē, ātipirika auakari posotiireē. Iuara oeretari aākixinire. Imakinika akamakiti apinini txīkitakakari imaktxaka. Ininiā uatxa aposota aparīkauatini Teoso ātipirika auāki inakari ĩkapani.

¹⁵ Ininiā iua Kristo txīkitakari Teoso kamaenetakiti amaneri apokini. Ininiā kākiti Teoso akiritakini posotari apakapiniri ātipirika Teoso sikaenetakiti iua anaakori ĩkapani. Kristo ipīksaaki, isikakana ninoa imaerekanina itakanapinina ĩkapani. Iuasaaki ĩkitxitari Teoso imaerekanina ĩki. Ikara imaerekanina ikamana Teoso kamaenetakiti mitxipe auakari auakasaaki.

¹⁶ Kākiti ipinini apisa, iōkatsopatari itii apakapakani uāka, ininiā ipīksaaki itii apakapakani imarotaāka. Ininiā iua ipinini imarotiko tsopa auiniā, iuasaaki itii apakapakani apakapari ipīkari tii. ¹⁷ Ipīkari tii apakapakani imarotiko tsopa nirekaāka kākiti ipīksaakinokara. Ikara !inirekaāka ipinini apisa. Iua auākipanika inakasaaki, kākiti !apakapari itii. ¹⁸ Ininiākara mitxi Teoso sikaenetakiti isika kākitemoni, arēkatxi auakasaaki, ipīkari auakasaaki. ¹⁹ Kitxakapirīka Moisesi merepitipanika sāpiretari kākiti ikinika Teoso paniātakiti iōkatsopatakori. Eereka ikosekari kema auīte ākiri arēka, potxi arēka pakini. Ikara ikoketa āparaākata. Iposo atoko itseētari Teoso sākire aātsopate, ikinimane kākiti pakini isopo inakori poriā, soti auīte piti pōkamarariā pakiniā. ²⁰ Iuasaaki itxari: “Ia arēkatxi oerekaua Teoso kaminiri ikamaenetakiti. Teoso paniātai hīkīpitiniri iua sākire.” ²¹ Iua atokokana Moisesi tseētari Teoso aapoko aamata kamakori, ikinika iua āki auakari pakini arēkatxiā. ²² Teoso sākire iōkatsopatakori

paniātari kākiti, tiitxi pakini oeretiko arēkatxiā. Okakori mauakaniā, arēkatxi kitaākori mauakaniā, Teoso !imakatxakari kākiti maerekani.

²³ Ininiā Moisesi takari pirātxi arēka ikinika Teoso aapoko āki auakari nopini oeretiniri ĩkapani. Ikinika Teoso aapoko āki auakari ĩkorapokoritikiri, iaxitikiri oerekiko ĩkapani itxa. Sanōkatxi atoko itxa. Pirātxi arēka kona apakata iaxiti ĩkapani. Teoso nirekakari arēkatxi apiatakari. ²⁴ Kristo iparĩka ikamakasaaki ate ĩkapani, kona ĩroā Teoso aapoko kākiti kamakitiā. ĩkorapokoriti kākiti kamari Teoso aapoko atoko inakari, txamari na atāo iua aapoko. Kristo ĩroā atāo Teoso aapoko Teoso tixineē. Uatxa iuaātaā Teoso apisatoō iua misākiretari Teoso ate ĩkapani. ²⁵ Sasetotxiakori auĩte apiatakari ĩroā Teosonani Auini Pakitaātaā ikinikanani. Iuasaaki anikari pirātxi arēka. Kristo ! ikamari ikara atoko. Ātikatika Kristo oxiketari iarēka. ²⁶ Iua ninoa atoko inaākamako, itokata imisiritaākamako itixi kamikosaakipekamako. Uatxa imapotōkire ōti takote iua apokapeka maerekati ātikatika imaktxakini ĩkapani. Iuaka isikaua ipinini ĩkapani, amaerekani ixipokini ĩkapani. ²⁷ Teoso kamari ikinimane kākiti ātikatika koriini. Eereka ikinimane sari Teoso apisatoō. Iuasaaki apanakini apakapari imisiritiko. Apanakini apakapari iparĩkana ĩki. ²⁸ Ininiā Kristo okaāka ātikatika kaiāopokori kākiti ĩkapani, imaerekanina imaktxakini ĩkapani. Iuaĩkana iua kanapiriā. Iuasaaki !imisiritaākaikako kākiti maerekani xika. Iua ĩkasaaki, imaktxakariko iua iātapakani, maerekani sauaki auakani. Anikana itixinemoni ātipirika Teosokata auinina ĩkapani.

10

Pirātxi Arēka Kona Apakata

¹ Kitxakapirĩka Teoso paniātakiti Xoteoakorimoni sanōkatxi atoko itxa. Ikara oerekari kākiti iuasaaki auakani atāo inakari apokini āti ōti. Ikinipoko atāo inakari !apokapanika ninoamoni. Ininiā pirātxi okiko ātipirika kona txĩkitakari kākiti iposope Teosomoni apokini. !Ikamaerekatana ninoa. ² Pirātxi arēka makatxakiniāri kākiti maerekani, ininiā ninoa takanapamariko pirātxi okinina, kotxi Teosomoni apokakani oeretapeēkaika, ininiā imarotamarina ākixinireēna imaerekanina mauakani. ³ Txamari pirātxi arēka !imakatxakari kākiti maerekani. Ininiā ikinikanani pirātxi okakori oerekari kākiti imaerekani auapanika. ⁴ Kema auĩte arēka, potxi arēka pakini kona posotari imaktx-akiniri kākiti maerekani.

⁵ Kristo apokasaaki ĩkorapokoriti, itxari Teoso:

Pirātxi okakori pitemoni siākori kona pinireka. Ininiā pite kamari ĩtotxi nota ĩkapani.

⁶ Pirātxi arikiko pite ĩkapani, pite !apokaerekatari. Kākiti sikiniri isikakiti pitemoni imaerekani pimakatxakini ĩkapani, pite !apokaerekatari. !Ikamapoxokonitai.

⁷ Iuasaaki nitxai. “Uaikarano nota. Paātsopateē iōkatapeēkaika nota pirena. NiTeosone uai napoka pinireēkiti nikamini ĩkapani,” itxa Xesosi.

⁸ Merepanika Xesosi txari iri: “Pirātxi okakori pitemoni siākori kona pinireka. Pirātxi arikiko pite ĩkapani, pite !apokaerekatari. Kākiti sikiniri isikakiti pitemoni, pite ! apokaerekatari. !Ikamapoxokonitai,” itxa. Iuaritika Teoso sākire iōkatsopatakori kitxakapirĩka paniātari ikara kamiko. ⁹ Eereka Kristo txari iri: “Uaikarano nota. Uai napoka pinireēkiti nikamini ĩkapani,” itxa. Ikara atoko inakasaaki, Xesosi xipokari pirātxi okiko, kotxi iua apoka uai Teoso nireēkiti ikamini ĩkapani.

¹⁰ Teoso nireēkiti iaōka ikamini kamaerekataua ate, kotxi Xesosi Kristo ipina ātikatika ikinimane ĩkapani.

¹¹ Sasetoxiakori ĩkorapokoriti auakani sapĩka ikiniōtika Teoso apisatoō iparĩkana ikaminina ĩkapani. Ātipirika iua okari pirātxi Teoso isikini ĩkapani. Itxama, ikara ! iposotari maerekati imaktxakini. ¹² Iuaritika Kristo, ate sasetotxine, iuaka sikapekaua ĩkoriini kākiti maerekani imaktxakini ĩkapani. Ikamari ikara ātikatika. Iposo atoko, iitopāka Teoso kikomoni. Ikara atoko ininiā, ixipokari iparĩka. ¹³ Iuaā iātapari ikinika imokaiakari xipokini. Ikiti itakiniātaā atoko ninoa. ¹⁴ Ininiā ātikatika okaāka kākiti ereka inini ĩkapani. Iua kamaāpotana ninoa erekaāpo ininina ĩkapani.

³⁵ Ininiã kona hĭtakanapapiri hĭtaparaxinire, kotxi āti ōti Teoso iĭkitxitai hĭtaparaxinire auiniã. ³⁶ Himĭteenekariko ikinika Kristo ĭkapani. Hĭkamariko ikinika hĭtaparaxinireritika. Ininiã Teoso paniātakiti hĭkamakasaaki, hāpakapariko isikaenetakiti. ³⁷ Teoso sākire iōkatsopatakori txari:

Apikomoni mokatanitika iua kanapiriāko. Iketo ōti ikanapiriāpitika.

³⁸ Kākiti atāo inakari kamakari auini erekari, kotxi auikari nota sākire. Kākiti sipikapapiretiniāri nisākire, nota lapokaerekatari iua, itxa Teoso. ³⁹ Ate kona sipikapapiretari Teoso sākire. Ininiã !axipokaāka. Teoso sākire auiākani atxaua ate. Iua makatxakari amaerekani aākixinireē auakari.

11

Teoso Sākire Auikiko Pirena

¹ Atāo aāuikasaakiri Teoso sākire, iusaaki aimarotapitikari aāpakapiniri aiātapakiti. Atāo aāuikasaakiri Teoso sākire, iusaaki aimarotari amatamatakiniti auapitika. ² Kitxakapirĭka Teoso apokaerekatana isākire auiākani, kotxi iteene auikarina isākire.

³ Teoso sākire aāuikasaaki, aimarotari iua kamari itixi, iaxiti pakini isākireēnokara. Aātamatakitiā !kamari itixi, iaxiti pakini. Isākireēnokara ikamari ikinipoko.

Teoso Sākire Auiākari Apeo Inakori (*Xénesisi 4.2-12*)

⁴ Apeo inakori auikari Teoso sākire, ininiã Teosomoni isikakiti apiaerekata, kotxi Apeo sikari Teosomoni Teoso sākire iaōka. Itari Kaiĭ inakori sikakiti poiāo erekari. Apeo auikari Teoso sākire, ininiã Teoso apokaerekatari iua sikakiti. Teosomoni atāo inakari kamakari itxaua Apeo. Kitxakapirĭka Apeo koriā, iuaritika iua auikiniri Teoso sākire oerekapanikaua Teoso tiretiniri kākiti isākire auiākani.

Teoso Sākire Auiākari Enoki Inakori (*Xénesisi 5.21-24*)

⁵ Enoki inakori apaka auikari Teoso sākire. Ininiã Teoso anikari iua iaxiti. Kona ipina. Mapĭkatipanika anikaāka Teosomoni. Iusaaki kākiti !apokaikari iua, kotxi Teoso anikapekari iua. Isini apisa kākiti imarotari Teoso apokaerekatiniri iua. Iua kamapoxokonitari Teoso. ⁶ Teoso sākire amauikakaniā, kona akamapoxokonitari Teoso. Kākiti Teosomoni apoākari, merepanika auikariko Teoso auini. Apaka ninoa auikariko Teoso sikiniri erekari kaiāopokori iua nitakarimoni.

Teoso Sākire Auiākari Noee Inakori (*Xénesisi 5.28-9.29*)

⁷ Noee apaka auikari Teoso sākire. Teoso sāpiretari iua kākiti mimarotakiniti monōkoni. Iusaaki iua pĭkarauata, ininiã ikamari maporo mitari iua aapoko āki auakani mapinakani ĭkapani. Noee auikari Teoso sākire, ininiã isāpiretari Teoso misiritiniri kākiti imaerekani xika. Teoso txĭkitakari iua atāo inakari ikamini, kotxi iua auikari Teoso sākire.

Teoso Sākire Auiākari Apraão Inakori

⁸ Apraão apaka auikari Teoso sākire, Teoso paniātakasaakiri iua ātiātaā isini. Iua kĭpitari Teoso sākire, ininiã iua sari, txamari kona imarotari isinimoni. ⁹ Iua auikari Teoso sākire, ininiã iua aua Teoso sikaenetakiti tixitiā. Iuaā iua aapoko aamata kamakori, kotxi āti tixinikiri itxaua. Apaka Isaki, Xakoo pakini aua aapokotxi aamata kamakori. Ninoa apaka apakapari itixi Teoso sikaenetakiti. ¹⁰ Apraão iātapari Teoso sitatxine apokini, kotxi Teoso kamari ikara sitatxi. Ixinikakiti iaōka ikamari. Ikara sitatxi kamaāka kaikori nopini, ininiã lixipoka.

¹¹ Apraão auikari Teoso sākire. Iua imarotari ikiomaneēpeka inini. Apaka imarotari ĭtanoro Sara kona posotaikari keene onini. Iuaritika auikari Teoso sākire irĭtxi ininiua ĭkapani. Imarotari Teoso sikapitikariko isikaenetakiti. ¹² Ininiã iua kiki iteene kiomātxi inakariua, iuaritika irĭtxi itxaua. Iua aua itomaneri imekaniriakori, itomaneri apika

mekaniriakori pakini. Itomaneri apika mekaniriakori iōriki iaxiti auakani atoko itx-anako. Ikipatxite atoko itxanako apika mekaniriakori. Kaiāopanina ninoa.

Teoso Sākire Auiākani Iātapakiti

¹³ Ikinika ninoa kākiti Apeo, Enoki, Noee, Apraão pakini auikari Teoso sākire. Ikoriākasaakina, ninoa kona apakaparina ikinika Teoso sikaenetakiti. Ninoa imarotari Teoso sikaenetakiti ōtakopanikari apokini tīkane. Ninoamoni ikorapokoriti kona atāo ninoa tixine. Maparakini atoko itxauana. ¹⁴ Kākiti ikara atoko inakani oerekari ninoa nitiniri ninoaka tixine. ¹⁵ Itixi itakanapakitina ixinikaākamanako, ininiā iuaīkana ikanapiriāmanako iuaātaā. ¹⁶ Ninoa kona kanapiriā, kotxi inirekarina apiaerekatakari itixiti, iaxiti auakari. Ininiā Teoso !ipētauata ninoa Teosone ininiua iġapani, kotxi iua kamapekari sitatxi ninoa iġapani.

Apraão Okaaritiniri Imi

¹⁷ Apraão auikari Teoso sākire, Teoso ataerekatakasaakiri iua. Iuasaaki iposope okiniri Isaki Teoso iġapani. Teoso sikaenetakiti apakapakari iua Apraão. Iposope imatonōkari imi okini Teoso iġapani. ¹⁸ Teoso sāpiretapekari iua: “Isakimoni auako pimekaniriakori, papika mekaniriakori pakini,” itxari. ¹⁹ Iuasaaki Apraão xinikari Isaki ipininiā, Teoso ōkitikari iua iuaīkana. Iuasaaki Isaki ipinaarita, ininiā kākiti ipīkari iuaīkana ōkitikiniua atoko itxa Isaki iuasaaki.

Isaki, Xakoo, Xosee Pakini Auikiniri Teoso Sākire

²⁰ Isaki apaka auikari Teoso sākire, kotxi itakari erekari imi Xakoo, Isao pakinimoni, Teoso nireēkiti iaōka ikaminina tīkane. ²¹ Xakoo apaka auikari Teoso sākire. Ikorinini apisa itakari erekari Xosee anaakorimoni. Iuasaaki isāpiretari Teoso iua ereka inini. Iuasaaki iioġekaua itsonarekeē. ²² Xosee apaka auikari Teoso sākire. Ipinini apisa isāpiretana Isaeokini Exito osipikinina iġapani. Ininiā iua paniātana ninoa anikiniri iua api Teoso siākiti itixitimoni.

Moisesi Auikiniri Teoso Sākire

²³ Moisesi iri, inoro pakini auikari Teoso sākire. Iponaniāka atoko, ninoa kipatari iua ipi āti pakini kasiriti. Iuasaaki imarotarina Moisesi kona āti eenetxi atokoni. Ipinimoni itxa. Ninoa imarotari Paraoo paniātiniri amarini okiko, iuaritika !ipīkarina Paraoo paniātakiti.

²⁴ Moisesi auikari Teoso sākire. Mitapeka inakasaaki, kona inirekari kākiti akiritiniri iua Paraoo ākero ākiri ininiua. ²⁵ Iua mereēri imisiritiko Teoso nakitiakorikata. Ininiā iua sari ninoakata. !Inirekari poxokonitxi maerekati kamakiti, kotxi ikara poxokonitxi mokatanitika xipoka. ²⁶ Iuamoni apiaerekata ninoa xinitiniri iua Kristo sākire auikini xika. Kona iua nirekari katiiri ininiua Exito auakanikata, kotxi imarotari āti ōti Teoso sikiniri iua iparīka iġi.

²⁷ Exito ipotorikasaaki, iua auikari Teoso sākire. Iuasaaki Exito auakani auīte omanākarauata. Iuaritika !ipīkari iua. Imīteenekari ikinipoko, kotxi auikari Mata-matakoti sākire. Atamatakiti sākire auikini atokotxikana, auikari imatamatakiniti sākire. ²⁸ Iua auikari Teoso sākire, ininiā ipaniātari kākiti okiniri soti auīte. Eereka ipaniātari itakiniri iarēka iġronakikoātaā tinikata. Ininiā Teoso nitiri ipīkitxi mīkari iaxitikiri ninoa nopini inapaāpotakasaaki, kona okari Isaeokini merepanika auakani, kotxi atamatari arēkatxi.

²⁹ Kākiti Isaeokini auikari Teoso sākire, ininiā iġpiriātarina potxoari uiniti Pōkamarariā inakori sonākakari kimaporiti nopini. Kākiti Exitokini apaka nirekari inapinina ninoa napini atoko. Txamari iuasaaki āparaā kanapiriāpe iua kimapori nopini, ininiā ikinika ninoani axāpoātape.

Teoso Sākire Auiākani Kāiatini

³⁰ Isaeokini auikari Teoso sākire, ininiā Xerikoo sitatxiti iakirokana setxi pakini ōti. Iuasaaki pirikeri sitatxi ākitakari irikapoakata, kotxi ninoa kamari Teoso sākire iaōka.

³¹ Haapi inakoro kanokarero otxaua mitxi. Eereka oāuikari Teoso sākire, kotxi oāpakapana kākiti iuaātaā apokakani, Teoso iokanatakini, ininiā kona okoriā kākiti Teoso sākire mauīākanikata.

³² Kiripa apikomoni nisāpiretai? Auapitika apikomoni itomaneri kākiti Teoso sākire auīākani. Kona apakata uatxa nisāpiretini hīte Kitxiāo pirena, Paraki pirena, Sāsō pirena, Xepitee pirena, Tavii pirena, Samoeo pirena, apanakini Teoso sākire sāpiretakani pirena pakini. ³³ Ninoa kākiti auikari Teoso sākire. Ininiā inaiatakasaakina Teoso sākire mauīākani, ninoa kāiata. Ninoa kamari atāo inakarinoka. Iuasaaki apakaparina Teoso sikaenetakiti. Ninoa okaāka ākitimoni. Iuaritika kona ākiti okana. Ākiti nama totaāka iuasaaki. ³⁴ Xaminamoni okapeēkana, iuaritika xamina !arikana. Kona apakata okikona iouata mitaroā. Ninoa mataparani, iuaritika kataparaxinirepeka itxana, kotxi auikarina Teoso sākire. Neenamati auakasaaki, pataparana ninoa, ininiā āti uāka sotatoakori miteka.

³⁵ Sitoakoro Teoso sākire auīākani iuaīkana aua imiakori, kotxi Teoso ōkitikana ninoa ipīkasaakina. Apanakini Teoso sākire auīākani noropataāka. Imatakanapakaniārina Teoso sākire auikinina, okaākana, iuaritika ninoa !inirekarina itakanapinirina, kotxi ninoa imarotari āti ōti Teoso ōkitikana ninoa. Iuasaaki apiaerekata ninoa apakapakiti.

³⁶ Apanakini Teoso sākire auīākani napetaāka. Inoropataākana aāpitsā. Apanakini Teoso sākire auīākani iaxirikaāka, kateia āki taka inaākana. ³⁷ Apanakini kiporonakaāka kai soroā. Apanakini kākiti sehotxiā kitxirākaāka apanīkaki iītona, auākipanika inakasaakina. Apanakini okapeēka iouata mitaroā. Apanakini māka soti auīte mata, potxi mata pakini. !Kamākana. !Katiina. Maerekati kamakani nitana ninoa okinina īkapani. Imisiritapeēkana. ³⁸ !Apakata īkorapokoriti ninoa īkapani, kotxi ninoa iteene erekari.

Ninoa miteēkata āparaā makipakaniātaā, ōtanoxiratari auiniātaā apaka. Aariko itixiākiriā, kai iriko āki apaka apanakini Teoso sākire auīākani aua, kotxi aapokona !auari.

³⁹ Teosomoni peerekana ninoa, kotxi iteene auikarina iua sākire. Iuaritika ninoa !apakapapanikari Teoso sikaenetakiti iuasaaki. ⁴⁰ Teoso nirekari apiari erekari ate īkapani. Inirekana ninoa atekata aāpakapiniri isikaenetakiti.

12

Teoso Oerekari Atāo Iua Anaakori Aniniua

¹ Ininiā kaiāopokori Teoso sākire auīākani itixine apokakani atamataua ate uatxa. Ininiā matakanapari ikinika ate iomakotetakari. Matakanapari maerekati akamakiti, kotxi ikara patimari iaxirikiniri axinire. Ataparaxinireritika maūako. Mamīteenekari ikinipoko. Mitekakani mitekini atoko mamitekako Teoso oerekinimoni. ² Ātipirika maātamatari Xesosi. Maūuikari iua sākire, kotxi iuanoka amaerekani makatxakakari. Iua txīkitakaua ate atāo aūuikiniri Teoso sākire. Xesosi xinikari poxokonitxi apokini ōti, ininiā iuasaaki imīteenekari aamina ipiriāmitakari nopini ipinini. !Imaākatari pētatxi ikara atoko ipinini. Ikinipoko iposo atoko iitopāka iri kikomoni, kotxi iparīka ate īkapani iposope. ³ Hīxinikariko Xesosi. Iteene imīteenekari maerekati kamakani manirekakaniri iua. Hīxinikariko iua, ininiā kataparaxinirei hīte. Iuasaaki !hiōkapeta.

⁴ Hīrēka kona xiketapanika maerekati hītakanapini xika. Ininiā hīte kona naiatari maerekati iua Xesosi naiatiniri atoko. ⁵ Atxiīti himaxinīkaretari Teoso sāpiretakiti ate isikataparaxiniretini īkapani. Iua akiritaua iua anaakori aniniua. Ia isākire:

Namarite, Apiananiri auiritai pite atatsiirauatini atāo inakari pimarotini īkapani, ininiā kona pimatinaniuatape iua misiritakasaakii pimaerekani xika.

⁶ Kotxi Apiananiri misiritana itiretakini maerekati ikamakasaakina, imaerekani itakanapinina īkapani. Imisiritana ikinimane iua anaakori atāo inakari imarotinina īkapani.

⁷ Ininiā himīteenekariko hīri iaxitikiri misiritinini himaerekani xika. Ikara himisiritiko oerekai Teoso anaakori hininiua, kotxi inīkantai hīte amarini irītxi nīkatini atokokana. Ikinini irītxi īkorapokoriti auakari misiritari iua anaakori atāo erekari ikaminina īkapani.

⁸ Teoso mamisiritakaniāi hīte maerekati hīkamakasaaki, ininiā iua anaakori atāo inakani

!hĩtxaua. Teoso hĩri !itxaua iuasaaki. Ikinimane Teoso sãkire auiãkani misiritaãka, maerekati ikamakasaakina. ⁹ Akinika ate irĩtxi aua ïkorapokoriti. Ninoa misiritaua maerekati akamakasaaki. Iuaritika ate paxitana ninoa. Apiata apaxitari aĩri iaxiti auakari imisiritakasaakiua ate, maerekati akamakasaaki, kotxi axinire iri itxaua. Ininiã akamakasaakiri aĩri iaxiti auakari nireẽkiti, aãuapininiika atxako. ¹⁰ ïkorapokoriti auakani irĩtxi misiritaua maerekati akamakasaaki. Mapakananinani ikara atoko ikamana. Imarotakitina iaõka ikamana. Teoso misiritaua maerekati akamakasaaki ereka anini ïkapani iua atoko anini ïkapani. ¹¹ Amisiritikosaaki, kona apoxokoniuaata, kotxi patsiiri. Iuaritika eereka akamari atão inakarinoka. Iuasaaki erekaxinireua, kotxi Teoso oerekapekaua atakanapiniri amaerekani imisiritakasaakiua.

¹² Ininiã hõkitikari hĩuako sãpakakari. Hĩkamataparatari hĩpotoriki iõkapetakari. ¹³ Hõeretariko kimapori atão hĩsini ïkapani. Ikinika himaerekani hĩtakanapako. Ininiã hĩkamakiti atão inakari aua. Ininiã apanakini hĩte atamatakani !irika hĩte maerekani xika. Ininiã maerekati !ikamana, kotxi hĩte oerekapekana erekari imarotinina ïkapani. Ininiã erekapekana ninoa.

¹⁴ Ikinipoko hĩkamako apanakinikata himaneenamauatakani ïkapani. Ikinipoko hĩkamako erekarinoka hĩkamini ïkapani. Kãkiti makamakanisaakiri erekari, kona atamatapaniri Apiananiri. ¹⁵ Erepaniko, kotxi atxiĩti kona hãpakapari ikinipoko erekari Teoso siãkiti. Kona hãuiritapiri kapixi inakari aneini hãkixinireẽ, kotxi ikara maxikari kaiãori kãkiti. Itxikotari ninoa ãkixinire. ¹⁶ Kona hãuiritapiri anokaretxi kamakani auini hĩtekata. Kona hãuiritapiri Teoso manirekakiniti kamakari Isao atoko inakari auini hĩte sauaki. Merepitipanika iponaniãkari iua Isao, txamari isikari iri sikaenetakiti itarimoni axapitiki nipokori apakapini ïkapani. ¹⁷ Eereka iuaĩkana inirekamari ikara iri sikaenetakiti. Inirekari iri takiniri erekari iuamoni, txamari !apakataika iua apakapiniri. Itxiapata, kotxi mitxi ikamakiti inirekari imamakini, txamari iposope itarimoni iri sikaenetakiti isikini.

¹⁸ Kitxakapirĩka kãkiti Isaeokini sari ixirata Sinai inakorimoni Teoso paniãtakiti apakapinina ïkapani. Iuasaaki ixirata arika. Ipiã, ïtima kataparari apaka aua iuasaaki. Ikara atoko inakari ixiratamoni kãkiti maãtakakitimoni !haãpoka. ¹⁹ Ixirata Sinai inakoriãtaã kãkiti kenakotari trõpeta. Ikenakotari iaxitikiri sãkire. Iuasaaki iteene ipĩkarena auana, ininiã !inirekaikarina ikenakotinirina apikomoni ikara sãkiretxi. ²⁰ Kotxi iuasaaki !imĩteenekarina ia Teoso paniãtakiti, kotxi iuasaaki Teoso txari: “Kãkiti, pirãtxipeka apaka maãtakiniãri oxiratari, ikiporonakaãkana kai soroã ipininina ïkapani.” ²¹ Iua xirata auĩte kamari kãkiti pĩkarauatini. Iuasaaki Moisesi txari: “Nĩtitinanaka. Iteene nipĩkarauata,” itxa.

²² Hĩte kona apoka oxiratari Sinai inakorimoni. Hĩte apokapeka ixirata auĩte iaxitikiri Sião inakorimoni. Hãpokapeka Xerosareẽ sitatxiti iaxitikirimoni, Teoso ãtipirika auãki inakari sitatxineãtaã. Hĩte apokapeka Teoso nitiriakori iaxitikini apotiitiniãtaãua. Ninoa iaõtiko !auari, kotxi kaiãopokori. ²³ Hĩte apopeka Teoso mereẽkini apotiitiniãtaãua. Ipoxononiuatana. Teoso anaakori itxauana. Iuãkana iõkatsopatapeẽkaika Teoso aãt-sopateẽ itixineẽ. Hĩte apopeka Teosomoni. Iuara sãpiretari kãkiti misiritiko. Apaka iua ïkitxitana atão inakari kamakani erekari ikamakiti ïkapani. Hĩte apopeka erekari kamakanimoni. Teoso txĩkitakana ninoa atão inakari ikaminina. ²⁴ Hĩte apoka Xesosimoni. Iuara txĩkitakari Teoso kamaenetakiti amaneri apokini. Xesosi arẽka xiketakasaaki, hĩte apoka Teosomoni. Apeo oxiketari pirãtxi arẽka imaerekani makatxakiko ïkapani. Kristo oxiketari iuaka arẽka ãtikatika amaerekani imakatxakini ïkapani, ininiã Kristo arẽka apiaerekata.

²⁵ Ininiã erepaniko. Hĩkenakotariko Teoso sãkire isãkirauatakasaaki. Kitxakapirĩka kãkiti manirekakaniãri Teoso sãkire sãpiretakari ïkorapokoriti auakari, imisiritaãkana. Imitekinina !auari. Teoso tixine auakari sãkire amanirekakaniã, apiata amisiritiko. Amitekini !auari, ininiã erepaniko. ²⁶ Teoso misãkiretakasaakiri Moisesi, itixi iakeka. Uatxa Teoso sãpiretari ikamaenetakiti. Itxari: “Iuaĩkana niõkokariko itixi. Niõkokariko

iaxiti apaka,” itxa. ²⁷ Isākire “iuaīkana,” kotxi iōkokariko ikinipoko ikamakiti. Ninoa makatxakaākako. Auapitikako maiōkokaeētakoni. Ikara kaikotako.

²⁸ Teoso auītetxi ininiātaāua, ate sinimoni, !iōkokaāka. Iuaātaā ixipokini !auari. Ininiā mapoxokoniuaata. Masāpiretari iua: “Peerekai pite.” Atāo maparīkauata Teoso īkapani. Makamari iua apokaerekatakiti. Mapaxitari iua. Mapīkari iua manirekakiniti akamini.

²⁹ Kotxi aTeosone xipokari imanirekakiniti, xamina tirinakari xipokiniri atokokana.

13

Iōkatsopari Mapotōkire Pirena

¹ Ininiā hītiretakauako. Itaritxi atoko hītixako, kotxi Teoso anaakori hītixaua. ² Ātiātaā īkani apokiniā, hāpakapanako ninoa haāpoko. Apanakini apakapakasaakina ātiātaā īkani, apakapana Teoso nitiriakori itixinekini. Iuasaaki !imarotarina ninoa Teoso nitiriakori ininiuana. ³ Hītiretanako Teoso sākire auiākani kateia āki auakani. Kateia āki ninoakata hāuini atokokana, hīxinikanako ninoa. Ininiā hītiretanako misiritakoni. Kāk-iti misiritiniāi hīte, iuasaaki hinirekari apanakini tiretinii. Iua atokotxikana hītiretanako misiritakoni.

⁴ Hīpaxitaroko āti ītanoro. Hīpaxitariko āto ītaniri. Pītanirikatanani pisirīkako. Pītanorokatanani pisirīkako. Teoso misiritanako ikinika kanokarero, kanokareri pakini.

⁵ Txineiro !hītiretape. !Hinirekapiri āti kākiti nakiti. Hīpoxokotariko hīteka tii, hīteka txineirote pakini. Apikomoni !hinirekape, kotxi Teoso txari:

Nimatakanapapekaniikaraiko hīte. Nimasikapekaniikaraiko hīte, itxa. ⁶ Ininiā ia Teoso sākire iōkatsopatakori aāuika:

Apiananiri nimoianari itxaua, ininiā kona nipīkari kākiti kaminiri maerekati notamoni.

⁷ Hīxinikariko hīauīteakori Teoso sākire hītemoni sāpiretakani. Hīxinikariko ninoa auini, ninoa ipinini apaka. Hāuikariko Teoso sākire ninoa auikiniri atokotxikana. ⁸ Xesosi Kristo kitxakapirīka atokotxikana uatxa. Xesosi Kristo uatxa atokotxikana ātipirika.

⁹ Kona hāuikapiri apanakini oerekakiti atāo minakati, kotxi ikini sereti oerekakori atāo minakati auapitika. Hāuiritariko ikinipoko erekari Teoso sikakiti sikataparatiniri hākixinire. Anikakiti !isikataparatarī aākixinire, ininiā !hāuikapiri kākiti sāpiretinii apanakini nipokori erekari hīxinire īkapani, apanakini nipokori !erekari hīxinire īkapani.

¹⁰ Sasetotxiakori Teoso aapoko aamata kamakori āki parīkauatakani Teosomoni sikakori takikoātaā !apakaparina erekari Teoso sikakiti ate apakapiniri atokokana.

¹¹ Teoso aapoko aamata kamakori auakasaaki, sasetotxiakori auīte apiatakari anikari pirātxi arēka Teosonani Auini Pakitaātaā. Iuaā isikari pirātxi arēka Teosomoni kākiti maerekani Teoso makatxakini īkapani. Iua pirātxi īto anikaāka aapokotxi mapotōkire. Iuaā arikaāka. ¹² Xesosi pirātxi okakori atoko itxa, kotxi anikaāka sitatxi mapotōkire okiko īkapani. Ininiā iua arēkaā imakatxakari kākiti maerekani, ikamaerekatina īkapani. ¹³ Ininiā masa iuamoni ipininiātaā. Iua napetiko atokokana maāpakapa. ¹⁴ Īkorapokoriti kona aua sitatxi maxipoākati. Aiātapari sitatxi iaxiti īkari.

¹⁵ Kipa asika Xesosimoni Teoso īkapani? Ātipirika masikari asākire erekari. Matxari: “Peerekari Teoso.” Ikara asikakiti Teosomoni, kotxi asāpiretari kākiti iua aāuīte ininiu. ¹⁶ !Himaxinīkaretapiri erekari hīkamini apanakinimoni. !Himaxinīkaretapiri himoianatakiniua. Ikara atoko akaminiā, Teosomoni asikakiti inireēkiti atoko itxa, ininiā ikara atoko inakari akaminiā, ikamapoxokonitari Teoso.

¹⁷ Hīkīpitariko hīauīteakori sākire. Hīkamariko ninoa paniātakiti, kotxi ninoa nīkatari hīxinire. Teoso sikari ikara parīkatxi ninoamoni, ininiā āti ōti ninoa sāpiretari Teoso ikamakitina. Ininiā hīkamariko ninoa paniātakiti, ininiā iuasaaki ninoa poxokoniuaata iparīkauatakasaaki. Himakamakaniāri ninoa paniātakiti, ninoa matinaniuaata, ininiā ikara atoko inakari !erekari hīte īkapani.

¹⁸ Himisākiretariko Teoso ate īkapani. Aimarotari aākixinire ereka inini, kotxi anirekari ikiniōtika atāo inakarinoka akamini. ¹⁹ Iteene namanaāi himisākiretiniri Teoso, iua paītiki iokanatinino iuaīkana hītemoni.

Teoso Misākiretiko

²⁰ Nimisākiretari Teoso, kākiti kamaerekaxiniretakari. Aāuīte Xesosi ipīkaripeka inakasaaki, Teoso ōkitikari iua. Soti auīte atoko atxaua. Soti auīte nīkatakari apiari atoko itxa Xesosi, ininiā iua iteene nīkataua. Xesosi ipīkasaaki, iuasaaki kākiti apakapari Teoso sikaenetakiti. Ātipirika Teoso sikari ikara isikaenetakiti kākitimoni. ²¹ Nimisākiretari Teoso isikiniri ikinika erekari hinireēkiti hītemoni, iua nireēkiti hīkamini īkapani. Namanaāri iua Xesosi Kristo uākaā, ikaminaua ate iua apokaerekatakiti. Ātipirika kākiti txari Xesosi: “Erekai pite.” Ameē.

²² Nitariakori, iteene hīkenakotariko ikara nisāpiretakiti. Ia niōkatsopatakiti xapitinoka.

²³ Ninirekari himarotiniri aītari Tximótxio kateia āki auakari sikakaāka. Mokatanitika iua apokiniā uai, nota sari iuakata hītemoni. ²⁴ Hīsāpiretari hīauīteakori ate xinikamanapitinina ninoa. Hīsāpiretari ikinimane Teoso nakitiakori axinikamanapitinina. Xesosi sākire auiākani uai Itária tixini auakani xinikamanapitai hīte. ²⁵ Ikinipoko erekari Teoso sikakiti aua hītemoni.

Ameē.

TXIAKO Txiako Iokanatsopatakiti

¹ Nota Txiako. Teoso nitiri nitxaua. Apiananiri Xesosi Kristo nitiri nitxaua apaka. Niökatsopataria aätsopa hitemoni, Xoteakori tosi nirimanetximoni Xesosi säkire auiäkaniimoni. Hite iarikape ikinika itixiti.

Ereëkai hite.

Auiäkori Ataerekatiko

² Nitariakori, ikini sereti maerekati apokasaaki hitemoni, hieneniakako, kotxi ikara ataerekatai hite. ³ Kotxi himarotari häuiäkiti ataerekatikosaaki, hïtaparaxinireritika häua. Himïteenekari imakinika himisiritiko hïpoxokoniritika. ⁴ Ininiä imakinika himïteenekasaaki, hïxinikakiti, hïsäkire, hïkamakiti pakini erekari. Kona apikomoni pinireka ereka pinini ikapani.

⁵ Himarore mauakanisaaki, hamanaäri Teoso imarore isikini ikapani. Ininiä isikaiko hite hamanaäkiti. Itori Teoso sikakiti ikinimanemoni. !Isäpaka ate ätipirika aamanainiri iua. !Itxitai. Isikapitikari hamanaäkiti. ⁶ Hamanaäkasaakiri, häuikariko Teoso sikini hamanaäkiti. !Erekari hïxinikiniri: "Atxiïti iua sikano namanaäkiti. Atxiïti kona isikano namanaäkiti." Ikara atoko !hïxinikape. Ikara atoko xinikakari, tsakati potxoari uinitikiri atoko itxa. Itima anikari tsakati itano, eereka ixitika. Käkiti ikara atoko inakari, äti öti auikari Teoso säkire, äti öti kona auikari Teoso säkire. Itxaäpota. ⁷ Käkiti ikara atoko inakari kona xatiki apakapari Apiananiri säkiti, ⁸ kotxi ipi ixinikakiti aua, ininiä apanakini lauikari isäkire ikamakiti tïkane.

Matiiti, Katiiri Pakini Poxokoniuatini

⁹ Pite äitari Teoso säkire auiäkari, atxiïti poiäori pitxaua, iuaritika pipoxokoniuatako, kotxi Teoso txïkitakai pite apiari pininiua. ¹⁰ Pite katiiri, pipoxokoniuatako, kotxi Teoso kamapoiäotakai pite, kotxi katimari pixipokini äui katimari xipokini atoko. ¹¹ Atokatxi kanïkasaaki, kapatakari itxaua. Iusaaki katsotati txiaroka. Iui katxaka. !Erekaikaro. Iua atokokana käkiti katiiri xipokini. Païtiki ipinako, ininiä itakanapariko imakinika itii, iparïka pakini.

Misirikaretxi Mïteenekakani

¹² Teoso takari erekari käkitemoni imisiritiko mïteenekakarimoni, Teoso säkire matakapanakatimoni. Ikinipoko imïteenekasaaki, Teoso txïkitakari iua ätipirika auini Teosokata. Apiananiri sikaenetari ikara iua tirketanimoni.

¹³ Pinirekasaakiri maerekati pikamini, kona pitxapiri: "Teoso sikanireötano maerekati nikamini," kotxi Teoso kamanireötiko maerekati ikamini ikapani !auari. Apaka kona Teoso sikanireötari käkiti maerekati ikamini ikapani. ¹⁴ Käkiti sikanireötaäka maerekati ikamini, kotxi iua ito nireëkiti kosekari iua maerekati ikamini. Iusaaki iteene inirekari inireëkiti ikamini. ¹⁵ Maerekati piïto nireëkiti pikamakasaaki, maerekati itxaua. Ininiä eereka maerekati pikamapika. Eereka iua maerekati txïkitakari pixinire ipinini.

¹⁶ Nitariakori nota tirketakini, kona häuiritapiri äti misirienetini. ¹⁷ Ikinipoko sikakori erekari atao inakari, iaxitikiri itxaua. Äiri sikakiti ikara. Iuara kamari atokatxi, kasiri, iöriki pakini ponikini. Iua ätipirika kamari erekarinoka. Kita, uatxa, katana pakini, iua atokotxikana äiri Teoso. ¹⁸ Aponaniä uaiäkana ääkixinireë, kotxi äuiäkari iua säkire. Iua nirekari aponaniini ikara atoko. Teoso kamari ikinipoko. Ikamakini, merepanika iuaäkana ponaniäkani, atxaua ate.

Teoso Säkire Kïpitiko Pirena

¹⁹ Ininiä nitariakori nota tirketakini, iteene himixinikariko äti säkire. Eereka iteene hïxinikariko hïkenakotakiti, hïsäkirauatini apisapanika. Katima !hïtxape hinaiatiniua. Hinaiatiniua apisa hïxinikariko hïkamakiti tïkane, ²⁰ kotxi käkiti omanäkarauatakasaaki, !ikamari atao inakari Teoso paniätakiti iaöka. ²¹ Ininiä hïkariko ikinika maerekati

hākixinire txikotakari. Hītakanapariko ikinipoko maerekati. Hāuikariko Teoso sākire hākixinireē takakori. Himarotariko iuanoka makatxakiniri himaerekani.

²² Teoso sākire akenakotakanani atxa, !hīt xape. Hīkamariko isākire iaōka apaka. Teoso sākire kenakotakanani makamakaniāri ipaniātakiti, ninoaka misirienetaua. ²³ Teoso sākire kenakotakari makamakaniāri isākire iaōka, kiki ātakaāriā atamatoōtakari atoko itxa. ²⁴ Iua itoō atamataka atoko, isa. Iuasaakipeka imaxinīkaretoōtapekaua. Isanōka ! ixinikaika. ²⁵ Ikinika Teoso paniātakiti erekari. Maerekati kamakani iaxirikakoni atoko. !Iposotarina erekari ikaminina. Ininiā kākiti kamakasaakiri Teoso paniātakiti, Teoso paniātakiti sikakari kākiti erekari ikamini īkapani. Kākiti iteene imarotiniāri Teoso paniātakiti, imamaxinīkaretakaniāri, ātipirika ikaminiāri, ininiā Teoso takari erekari iuamoni, ikamakitimoni.

²⁶ Kākiti sāpiretiniāri: “Nota auikari Teoso sākire. Nikamari iua sākire iaōka,” txamari kākiti nini iauīte atoko itxa. !Iposotari iotokakiniri maerekati isāpiretini. Iuaka misirienetaua. Iua auīākiti na atāo. Ikamakiti na atāo apaka. ²⁷ Kākiti auīākiti atāo inakari auakasaaki, ikamakiti atāo inakari auakasaaki, aīri Teoso apokaerekatari. Iua kākiti kamari ia atoko: Itiretana imenōkariakori, tikinitakoni pakini, kotxi mauareni nino. !Auiritari īkorapokoriti maerekati txikotiniri iua ākixinire.

2

Hīpaxitana Ikinī Kākiti

¹ Nitariakori, Xesosi Kristo aāuīte Apiananiri itxaua. Iua sākire atāo auīākani hininiāua, ininiā hīpaxitariko ikinimane kākiti. !Apakata hīpotxitakininani hītiretini. ² Maxinikariko. Atxiīti hāpotiitakasaakiua, kiki apoka eremākari. Iuakokiā aneo oro kamakoro aua. Apaka iuasaaki apoka āti kiki matiiti. Kitxakari imāka. ³ !Apakata hīpaxitiniri eremākarinoka. Hīsāpiretiniāri: “Uai iitopanatxi ereri nopini piitopāka,” pitxari. Txamari hīsāpiretari matiiti: “Ikiraā pitima.” Atxiīti hīsāpiretari iua: “Uai ixiti nikiti takote piitopāka,” pitxari. Ikara atoko hīkaminiā, !apakata. ⁴ Ikara atoko hīkamakasaaki, hīxinikari katiiri apiaerekatini, matiiti poiāo ereka inini. Iuasaaki hīxiniākiti na atāo itxaua. Hākixinire maerekati itxaua.

⁵ Nitariakori nota tirketakini, hīkenakotariko nisākire. Teoso mereēpekari matiini īkorapokoriti auakani isākire iteene auikinina īkapani. Ininiā nino Teoso tirketakani sariko Teoso auītetxi ininiātaāua. Ikara isikaenetapeka iua tirketanimoni. ⁶ Txamari hīte kona paxitana matiini. !Apakata. Katiirinira misirienetai hīte. Nino anikai hīte kākiti misiritiko mereēkanimoni. ⁷ Nino katiirini misākirepiretari Teoso. Peerekari iua uāka, iuaritika nino kona paxitari iuāka. Nino misākirepiretakiti nakitiakori hīt xaua hīte.

⁸ Kitxakapirīka Teoso sākire iōkatsopatakori txari:

Piteka pitiretiniua atokokanera, pitiretanako pite takote auakani.

Ikara ikinimane auīte paniātakiti hīkaminiā, hīkamari atāo inakari. ⁹ Hītiretiniāri hīpotxitakininani, maerekati hīkama. Ikara Teoso paniātakiti oerekai maerekati kamakani hininiāua. ¹⁰ Ikinika Teoso paniātakiti hīkaminiā, txamari ātinoka Teoso paniātakiti himakamakaniā, ininiā ikinika ipaniātakiti makamakani atoko hīt xaua. ¹¹ Teoso txari:

Kona pisirīkape pītanoro minakotokatika.

Apaka itxari:

Kona pokaniuatape.

Atxiīti kona pisirīka pītanoro minakotokatika, txamari pokaniuata, ininiākara !pikamari ikinika Teoso paniātakiti. Ātika Teoso paniātakiti pimakamakaniā, !apakata. Ikara atoko ininiā, Teosomoni maerekati kamakari pitxaua.

¹² Teoso sākire iaōka akaminiā, aposotari erekari akamini. Ōpoiīkakoni atoko atxaua. Maerekati !imaīkaikaua. Ininiākara atāo hīsākirauatako. Atāo inakari hīkamako, kotxi Teoso kamariko hītemoni isākire iaōka. ¹³ Himaamonīkakaniāri āti, Teoso kona amonīkai

hïte. Imereëri himisiritiko. Apiaerekata hiamonïkiniri äti, maerekati ikamakasaaki. Poião erekari himisiritiniri iua imaerekani xika.

Käkiti Säkire, Käkiti Kamakiti Pakini Pirena

¹⁴ Nitariakori, käkiti txari: “Nota Teoso säkire auiäkari nitxaua,” itxamari, !ikamari Teoso nirekaäkiti. Atauako iua auikari Teoso säkire? Atauako, iua säkire posotari imaktxakiniri imaerekani Teosomoni isini ïkapani? Konapitini. ¹⁵ Atxiïti hïtari, atxiïti hïtaro Teoso säkire auiäkani imäkana !auari. Atxiïti nipokori !auari ninoamoni. ¹⁶ Iusaaki atxiïti hïtxana: “Hïsipiniikaua, erekaxinire hinini. Kamäkaiko. Itene hinikako,” hïtxana atxiïti. Txamari iusaaki mäkatxi !hïsikana, nipokori !hïsikana. Ikara atoko hïkaminiä, !apakata hïkamakiti. Hïsäkirenanira hïsikiniä, ininiä maxikatïka hïsäpiretakiti. ¹⁷ Atxiïti ikara atoko atxa. Asäpiretari aäuiquiniri Xesosi säkire. Txamari kona akamari ipaniätakiti. Ikara atoko aniniä, asäkire kona itxa. Aäuiäkiti säkiretxiti ipinakari atoko itxa. !Kakamareri iua.

¹⁸ Käkiti atxiïti txari: “Pite auikari Teoso säkire. Nota parïkauata Teoso ïkapani.” Puposotari atxiïti poerekinino pauïäkiti, Teoso paniätakiti pimakamakanisaaki? Kona piposota, kotxi atão pauïäkiti !auari. Notapekana, nota posotari noerekiniri nisäkire nauïäkiti nikamakitiä Teoso paniätakiti nikamakasaaki. Ikara atoko nininiä, käkiti imarotapitikari atão nauikiniri Xesosi säkire. ¹⁹ Pite auikari ätinani Teoso auini. Ininiä erekapitikari pauïkakiti. Txamari ikara !imaktxakari pimaerekani Teosomoni pisini ïkapani, kotxi Satanasi nitiriakori apaka auikari ätinani Teoso auini. Iua xika ninoa titinanaka ipïkarauatiniäna. Ninoa imarotari äti öti ixipokinina.

²⁰ !Kiïkitei pite. Pinirekatari noerekinii !apakata pisäkireë pauikiniri Xesosi säkire, iua paniätakiti iaöka pimakamakanisaaki. Iusaaki pisäkire na atão. Ipïkari atoko itxa. ²¹ Maxinikariko ate apika atokirini, Apraão. Kitxakapirïka isikasaakiri amarite Isaki inakori Teosomoni sikakori takikoätaä, iusaaki Teoso apokaerekatari ikamakiti, kotxi ikamakiti oerekari Teoso, iua auikiniri isäkire, ininiä Teoso kamaerekatari iua. ²² Ininiä himarotari atão iua auikiniri Teoso säkire. Ikamakiti oerekari isäkire atão inini. Hïxinikari iua. Atão ikamari Teoso paniätakiti, ininiä atão iua auikari Teoso säkire. ²³ Ininiä Teoso säkire iökatsopatakori apokapeka. Itxari:

Apraão auikari Teoso säkire, ininiä Teoso txïkitakari iua atão inakari ikamini, Teoso apakapiniri ïkapani.

Ininiä iua akiritaäka Teoso moianari. ²⁴ Ininiäkara ia himarota. Teoso kamaerekatari käkiti äkixinire isäkire iaöka ikamakasaaki. Kona Teoso kamaerekatari käkiti äkixinire, isäkirenoka auakasaaki. Inirekari atamatiniri käkiti parïka apaka.

²⁵ Äto atão Teoso säkire auiäkaro nisäpiretai hïte. Kitxakapirïka kanokarero Haapi inakoro aua. Teoso kamaerekatari oa äkixinire, kotxi oa apakapana Xosoe iokanatakini otixine apokasaakina. Oaäpoko okipatana ninoa. Iusaaki oa oerekana äti kimaporiti imitekinina ïkapani.

²⁶ Käkiti ïtoä ixinire mauakanisaaki, iua ipïpe. Iua !kakamareri. Ininiä iua atokokana iua säkire iua auiäkiti ipinakari atoko, erekari imakamakanisaaki. Iua auiäkitinani, isäkirenani, !imaktxakari imaerekani.

3

Käkiti Nini Pirena

¹ Nitariakori, !apakata itori hïte Teoso säkire oerekakani hininiua, kotxi ate Teoso säkire oerekakani maerekati akamakasaaki, apiata Teoso misiritaua ate. ² Amakinika ate kerokapanikari. Käkiti makerokakaniäri isäkire, ininiä erekari iua. !Auiritari iïto kaminiri maerekati.

³ Anirekasaakiri kavaro kïpitiniri anireëkiti, atakari inamaä metaoke ipiriäketakari. Ininiä iusaaki ikamariko anireëkiti. Ia metaoke axapitikeri, iuaritika aposotari akakiriokiniri kavaro, ininiä isari anirekinimoni.

⁴ Apaka hīxinikaroko maporo. Maporo mitaro. Ītima kataparari anikaro. Maporo oerekakire axapitiki, iuaritika kākiti kakiriokaro maporo oerekakireē, ininiā maporo sari kākiti nirekinimoni.

⁵ Iua atokokana, aītoā auakari anini apaka axapitiki, iuaritika iposotari iteene maerekati ikamini. Hīxinikariko. Xaminaminiki axapitiki, iuaritika iposotari iotikiniri itori kikio. ⁶ Iua atokokana ninitxi. Xamina tirinakari atoko itxa, ininiā kona erekari. Maerekati ninitxi sāpiretakiti. Iarika kākiti xinireē ikinika, xamina itopa iarikini atoko. Ininiā iua maerekatinoka itxa, ininiā ikinipoko ikamakiti maerekatinoka. Maerekani misiritikoātaā ĩkari itxa asākire maerekati. Xamina tirinakari iuaātaākiri atoko itxa asākire maerekati.

⁷ Kākiti piratari ikini sereti kaxipiri ĩtopakiri, kotipiriki, imini, iaā auakari pakini. Itori kākiti piratapeka. ⁸ Txamari ninitxi paneenamari. Kākiti liposotari imīkapiritiniri inini. Kona ikamari anireēkiti. Imini katsiiri atoko itxa. Imini tsii posotari okiniri kākiti. Iua atokokana, kākiti sāpiretakiti posotari okiniri kākiti.

⁹ Anini posotari isāpiretiniri erekari aīri aāuītemoni. Apaka iposotari maerekati isāpiretini kākitimoni. Īkora atoko !erekari, kotxi Teoso kamari kākiti iuaka atoko inakari ĩkapani. ¹⁰ Anamaā potorika erekari, maerekati pakini. Nitariakori, ia koketakori na atāo. !Apakata. ¹¹ Amomo !oposotari āparaā ponikoāri, posiāri pakini otxīkitakini. ¹² Nitariakori, atauako māka mina iritari iōpeta? Atauako iōpeta mina iritari māka? Konapitini. Apaka amomo āparaā ponikoāri !auari āparaā maxiāri pakini. Iua atokokana kākiti sākire. !Apakata kākiti āti ōti isākire ereka inini, āti ōti isākire maerekati inini.

Imaroretxi Pirena

¹³ Kiripa kimaroreri hīte sauaki auakari? Kākiti atāo kimaroreri inakari, oerekari imarore ikamakiti erekari ikamakasaaki. Erekari ikamakasaaki, !iuikaua, kotxi atāo imaroretxi auiniā kākitimoni, !auiritari iua iuikiniua. ¹⁴ Txamari pinīkatiniāri xikoretxi papixiri pākixinireē, piteka nireēkitinani pinirekiniā pākixinireē, kona pitxape: “Kimaroreno nota.” Iuasaaki kona pikipatapiri atāo inakari. ¹⁵ Īkora pimarore !iaxitikirini. Īkorapokoritikirinokara ikara pimarore. Ikara pimarore pīto nireēkitikara. Imaroretxi ikara atoko inakari Satanasi oerekakiti. ¹⁶ Xikoretxi auakasaaki, piteka nireēkitinani pinirekini auakasaaki, ikara atoko inakasaaki, neenamatinoka aua, ikini sereti maerekati aua apaka.

¹⁷ Imaroretxi iaxiti ĩkari kona ikara atokoni itxa. Iua imaroretxi imarotakari, erekarinoka ikama. !Inirekari neenamati. Merepitipanika ixinikari apanakini kākiti nireēkiti. Apiananiri nireēkiti ikama. Iamonīkari āti. Erekarinoka ikama ātimoni. Apiarimoni isākire atokotxikana isākire poiāorimoni. Ikamakiti isākire iaōka itxa. ¹⁸ Kauārieri ōtākikari apanakini imaneenamauatakani, ininiākara itori kākiti kamari atāo inakarinoka.

4

Īkorapokoriti Auakani Nireēkiti !Hinirekape

¹ Neenamati auakasaaki hītemoni, hītxitakakasaakiua, nāpa ikara atoko inakari potorika? Hākixinireē ipotorika neenamati. Hinireēkiti maerekati xika hineenamauata.

² Hinireēkiti kona hāpakapa, ininiā hōkari āti. Iteene hinirekari āti nakiti, txamari !hāpakapari hinireēkiti. Hītxitakakaua. Hineenamauata. Txamari kona hāpakapari hinireēkiti. Kona hamanaāri Teoso hinireēkiti hāpakapini ĩkapani. Ikara xika kona hāpakapari hinireēkiti. ³ Atxiīti Teoso hamanaākasaaki, kona hāpakapari hinirekati, kotxi hamanaākasaaki, maerekati hīxinikapanika. Hinirekari hāpakapiniri hamanaākiti hītenani ĩkapani, hītenoka poxokoniatini ĩkapani. Ikara xika Teoso !isikai hinireēkiti.

⁴ Kanokarero, kanokareri pakini atoko hītxaua. Hīte takanapari Teoso, ĩkorapokoriti auakaninoka hītiretini ĩkapani. Hītiretiniāri ĩkorapokoritinoka, iuasaaki homanitari Teoso. Hinirekiniāri ĩkorapokoriti auakani nireēkiti, ininiā Teoso mokaiakari hītxaua.

⁵ Kona maxikatiīka Teoso sākire iōkatsopatakori sāpiretaua ia atoko inakari:

Erekari Matamatakoti aākixinireē auakari nirekari iteene anirekiniri Teoso turetiniua. Iua !inirekari anirekiniri ikorapokoriti auakaninoka turetiniua.

⁶ Teoso sikari iteene erekari atemoni, kotxi Teoso sākire iōkatsopatakori txari: Teoso !apokaerekatari kākiti iuikakaniua. !Imoianatana ninoa. Kākiti miuikakaniua, ikinipoko erekari isika ninoamoni.

⁷ Ininiā hāuiritariko Teoso hāuīte ininiua. Iua nireēkitinoka hīkamako. Kona hīkamapiri Satanasi nireēkiti. Kona hīkīpitapiri iua sākire, ininiā eereka iua miteka.

⁸ Teosomoni hāpokako, ininiā iua apoka hītemoni. Maerekati kamakani hininiāua, hītakanapariko himaerekani. Kona hāuiritapiri hīuako kaminiri maerekati. Hītepekana, hīte sākire ipinimoni itxa. Hākixinire xinikakiti ipinimoni itxa. Ininiākara hīokanatariko maerekati hākixinire auakari, erekarinoka kaikotini ikapani. ⁹ Himatinaniuatako, hītxiapatako iteene, maerekati hīkamakiti xika. Hītakanapariko hīsiroatini hītxiapatini ikapani. Hītakanapariko hīpoxokoniuatini himatinaniuatini ikapani. Ikara atoko hīkamako, maerekati hīkamakiti xika. ¹⁰ Apiananirimoni hītxariko: “Nimaerekani xika !erekano nota. Minakati nitxaua. !Niposotari erekari nikamini. Piamonīkano,” hītxariko Teoso. Eereka iua sikataparaxiniretai hīte.

!Himisākirepiretapiri Hītari

¹¹ Nītariakori, !himisākirepiretakakapeua. Āti misākirepiretiniāri āti, kona ipaxitari Teoso paniātakiti. Āti akiritiniāri āti: “Maerekati kamakarii,” akiritari Teoso paniātakiti: “maerekati.” Ikara atoko inakasaaki, iuamoni iuaka sākire apiata, ininiā iua !ikamari Teoso paniātakiti iaōka. ¹² Teosonokara atāo inakari imarotakari aua. Iuanoka posotari isāpiretiniri kākiti: “Pite kamakiti kona erekari. Pitepekana kamakiti erekari.” Iuanoka posotari ikara atoko ininii, kotxi iuanoka posotari kākiti maerekani imaktxakini. Iuanoka posotari iokanatiniri kākiti imisiritikomoni. !Apakata ikara atoko hīte ininiri apanakini.

Katana Kamaenetakori

¹³ Atxiīti hīte txari: “Atxiīti uatxa, atxiīti katana asa sitatximoni. Anapariko ātikanani iuaātaā. Aparīkauata itomane txineiro aāpakapini ikapani,” hītxama. ¹⁴ Txamari kona himarotari katana auakari tīkane. Kanatokopa itxa kākiti? Ianī atoko itxa kākiti. Ianī apoka, eereka patimari ixipokini. Ikara atoko kākiti auini. ¹⁵ Apiaerekata hīsākire ia atoko hinini: “Teoso nirekiniāri, nauapanika ninakasaaki, nikamariko ikara parīkatxi,” hītxako. ¹⁶ Ikara atoko himasākirauatakaniā, hīuikaua, kotxi hīuikari hīkamakiti tīkane. Maerekati ikara atoko inakari. ¹⁷ Ininiā erepaniko. Kākiti erekari imarotakani makamaniāri ikara erekari imarotakiti, ikamari maerekati.

5

Katiiri Pirena

¹ Hīkenakotariko nisākire. Ikinika katiirini kapotxinanirini hīkenakotariko nisākire. Hītxiapatako. Hākiripoatako, kotxi itori hātatsiire apokako hītemoni. ² Hītii pa-iakepeka. Kapite nikapekari himāka. ³ Hinakiti oro kamakori, pirata kamakori pakini oereēkatapeka. Ikara oerekari hīkamakiti !apakata. Hītii xipokini atoko, hīte apaka xipokako. Apiata himisiritiko. Maxikatīka hāpotiitari hītii, kotxi itixi xipokini ōti apokanapanoka. ⁴ Himarotariko ia. Kākiti hīte kikioteē parīkauatakasaaki, himisirienetana ninoa. Na atāo hīkitxitana iparīkana īki. Ininiā ninoa akiritari Teoso. Iuasaaki Apiananiri kaposotiireri kenakotari ninoa sākire. ⁵ Ikorapokoriti hāuakasaaki, ikinipoko aua hītemoni. Hiamotari ikinika hīto potxitakiti. Kākiti sikari kema auīte ito kienatxi, okiko ōti manapi paīperi inini ikapani. ⁶ Hīte iokanatapekari kākiti erekarini ipinimoni. Hōkapekana ninoa maxikatīka. Ninoani kona naiatai hīte, iuaritika hōkana ninoani.

Apiananiri Kanapiriini Hiātapini

⁷ Nītariakori, atxiīti hītemoni !katimari Apiananiri kanapiriini, iuaritika hiātapariko hīpoxokoniritika, kotxi himarotapitikari āti ōti iua kanapiriini. Hīxinikariko katakareri.

Iua iātapapikari itakare aneini, ikiena iposope inikini ĩkapani. Iātapari āparaā kipini itakare aneini ĩkapani. Iua imarotapitikari ikiena aneini, ininiā iātapari. ⁸ Iua atokokana hiātapariko Apiananiri kanapiriini. Hiātaparaxinireritika hiātapari, kotxi Xesosi kaimapeka ikanapiriini. ⁹ Nitariakori, kona hitxitakakapeua. Hitxitakakiniāua, hāpakapariko himisiritiko. Kākiti misiritiko mereēkari kaimapeka apokini hitemoni.

¹⁰ Nitariakori, hixinikariko Teoso sākire sāpiretakani, kitxakapirika auakani, sāpiretari Teoso sākire Teoso posotiireē. Ninoa misiritaāka, iuaritika ninoa mīteenekari imakinika. Ninoa oerekaua amīteenekiniri imakinika. ¹¹ Ari, aimarotari Teoso takari erekari misirikaretxi mīteeneēkanimoni. Hixinikari Xo inakori. Iua iteene atatsiirauata, iuaritika, litakanapari Teoso. Atatsiirauataka atoko, Apiananiri sikari ikini sereti erekari iuamoni, kotxi katiraōkiri, kaamonikareri itxaua iua.

¹² Nitariakori, “Ari,” hinakasaaki, “Kona,” hinakasaaki, kona maxikatīka hīsākirauatape. Hikamariko hīsāpiretakiti iaōka. Hikamaenetakiti hīsāpiretakasaaki, kona hākir-itapiri Teoso tixine auakani uāka, kona hākiritapiri itixi auakani uāka, hīsāpiretakiti apanakini atāo imarotini ĩkapani. Na atāo hīsākire ininiā, Teoso misiritapitikai.

Teoso Misākiretiko Kākiti ĩkapani

¹³ Hātatsiirauatakasaaki, himisākiretariko Teoso. Hīpoxokiniuatakasaaki, hixikarauata Teoso ĩkapani. ¹⁴ Āti amianatakasaaki, hīpīkapiretanako kōtākikarerini Xesosi sākire auiākani Teoso imisākiretinina amianatakari ĩkapani. Iuasaaki itakarina iītxi iua amianatakari nopini Apiananiri uākaā. ¹⁵ Hāuikiniāri Teoso posotiire himisākiretakasaakiri Teoso, iua makananitapitikari iua amianatakari. Ininiā Apiananiri ōkitikariko iua. Maerekati ikaminiā, Teoso makatxakari imaerekani apaka. ¹⁶ Ininiā hīkerokakiti hīsāpiretakakauako. Himisākiretariko Teoso āti ĩkapani. Ininiā apanakini misākiretariko Teoso hīte ĩkapani. Iua atokokana, Teoso txīkitakari hākixinire ereka inini. Atāo inakarinka kamakari sākire kataparari, Teosokata isākirauatakasaaki, kotxi Teoso kamapitikari iua amanaākiti iaōka.

¹⁷ Kitxakapirika Erīasi inakori, ate atoko inakari iua. Iua misākiretari Teoso itapararitika āparaā makipakani ĩkapani. Ikara atoko inakasaaki, āparaā !ikipa ipi āti pakini anokanani, seisi kasiriti. ¹⁸ Iuaīkana imisākiretari Teoso āparaā iuaīkana ikipini ĩkapani. Ininiā āparaā kipa. Iuaīkana itixi iriuata.

¹⁹ Nitariakori, āti takanapiniāri atāo inakari Teoso sākire, hōtākikariko iua Teosomoni ikanapiriini ĩkapani. ²⁰ Maerekati kamakari takanapiniāri imaerekani, iua pōtākikasaaki, ininiā pite makatxakapekari iua ipinini. Teoso makatxakari ikinipoko maerekati ikamakiti.

1 PETRO

Merepanika Petro Iokanatsopatakiti

¹ Petro nitxaua nota. Xesosi Kristo iokanatakiti nitxaua. Niokanatsopata hīte Xesosi sākire auiākanimoni. Hīte iarikape Pōto tixiniā, Karásia tixiniā, Kapatósia tixiniā, Ásia tixiniā, Pitxínia tixiniā pakini. Hītakanapari hīteka tixine Xesosi sākire hāuikini xika. Āti uākakata hāuanāta.

² Aīri Teoso mereēi hīte iua nakitiakori hininiua ĩkapani. Itixi kamiko apisa, iua imarotapekari hīte iua anaakori hininiua. Erekaru Matamatakoti parĳkauata hāķixinireē Teoso nireēķitinoka hĳkamini ĩkapani. Ininiā uatxa hĳposotiire aua Xesosi Kristo paniātakiti hĳkamini ĩkapani, kotxi Xesosi Kristo arēka xikepoata hīte ĩkapani. Teoso sikari ĩkinipoko erekari hĳtemoni. Itori isikai. Iteene ikamaerekaxiniretai.

Kāķiti Maerekani Makatxakiko

³ Mamisākiretari Teoso: “Peerekai pite. Aāuĳte Xesosi Kristo Teosone pitxaua. Iua iri pitxaua,” matxari. Maerekati kamakanuia, iuaritika iteene iamoniķaua. Itxĳķitakari axinire iuaĳkana iponaniini, kotxi Xesosi Kristo ipina, iuaritika iuaĳkana ōķitĳkaua. Ininiā ĩkiniōķtika aimarotari Teoso kaminiri ĩkinipoko ikamaenetakiti. ⁴ Iuaĳkana axinire iponaniā, ininiā iua anaakori atxaua. Ininiā aīri potetakiti erekari aua itixineē aāpakapini ĩkapani. Ikara ipotetakiti lixipoka. !Oerēkata. Auapika. Teoso nĳkatari ikara hīte ĩkapani.

⁵ Hīte auikari Teoso sākire, ininiā iposotiire tokapakeētai hīte. Hīte itokapakeētiniritika Xesosi kanapiriāķo xipokatxi ōķisaaki. ⁶ Ikara himarota, ininiā iteene hĳpoxokoniuata. Uatxa atxiĳti !erekaxinirei hīte, kotxi ĩkini sereti maerekati apoka hĳtemoni. ⁷ ĩkini sereti himaxikiko apoka hĳtemoni, kotxi iusaaki Teoso imarotari atāo hāuķiniri iua sākire, himĳteenekiniāri himaxikiko. Iusaaki Teoso ataerekatai hīte, oro ataerekatiko atokokana. Kāķiti axitaro oro otxiko makatxakiko ĩkapani, oronoka kaķotini ĩkapani. Iusaaki peerekaro. Pakaronero. Iuaritika āti ōķi oxipokaāķako. Erekaro oro, iuaritika apiaerekata hāuķiniri Teoso sākire, kotxi isākire hāuķini !lixipoka. Xesosi Kristo kanapiriāķasaaki ĩkorapokoriti, Teoso sāpiretaiko hīte: “Erekari hāuķiniri nisākire, kotxi himĳteenekari ĩkinipoko. Peerekai hīte,” itxaiko hīte. Iusaaki hĳito iotximere auape Xesosi iotximere atokokana.

⁸ Hīte kona aōķitapanikari Teoso, iuaritika hĳtĳretari iua. Kona hātamatapanikari, iuaritika hāuķari iua sākire. Ininiā hīte iteene poxokoniuata. Kāķiti sākireē !apakata hĳsāpiretiniri hĳpoxokoni. ⁹ Hĳpoxokoniuata, kotxi himaerekani makatxakaāķapeka. Ininiā hĳxinire !ĳpinaika, kotxi hāuķari Xesosi sākire.

¹⁰ ĳtxakapiriķa Teoso sākire sāpiretakani nirekamari imarotĳnirina kāķiti maerekani makatxakiko. Initarina ikara imarotĳnina Teoso sākire iōķatsopatakoriā. Iteene apaiaōķarauatana ikara imarotĳnina ĩkapani. Ninoa sāpiretari ikara erekari, Teoso āti ōķi sĳķiniri kāķiti. ¹¹ Inirekarina imarotĳnirina ikara erekari apokini ōķi. “ĳsaakĳpa apoka atxiĳti? Natokopa itxa apokini?” itxanātana. Iusaaki Erekaru Matamatakoti oerekana ninoa āķixinireēna Kristo atatsiirauatini tĳkane. Oerekana ninoa Kristo atatsiirauatini xipoka atoko, ĩkinimane auĳte itxauako. Peerekari iusaaki. ¹² ĳtxakapiriķa Teoso sāpiretari ikamakiti tĳkane isākire sāpiretakanimoni, kona ninoanoka imarotĳni ĩkapanini. Ninoa sāpiretari Teoso kamakiti tĳkane hīte ĩkapani, kotxi uatxa apokapeka ninoa sākire iaōķa. ĳtxakapiriķa Teoso sāpiretari ikamakiti tĳkane ninoamoni, ate uatxa imarotĳni ĩkapani. Teoso iokanapirena erekari sāpiretakani sāpiretapekai uatxa ikara Teoso sāpiretakiti ĳtxakapiriķa. Teoso paniātari Erekaru Matamatakoti potoriķini itixine uai apokini ĩkapani. Erekaru Matamatakoti posotiireē ninoa sāpiretari Teoso iokanapirena erekari. Teoso nitiriakori iaxitĳķini iteene nirekamari imarotĳnirina hīte imarotakiti.

Ereka Hĳtxako

¹³ Ininiã iposope hĩtxako hĩxinikiniri atão inakari hĩkamini. !Hĩkamapiri maerekati hĩto nireẽkiti. Iteene hãuikariko hãpakapiniri ikinipoko erekari Teoso sikakiti Xesosi Kristo kanapiriãkasaaki. ¹⁴ Amarini kaminiri iri paniãtakiti atokotxikana, hĩkamariko Teoso paniãtakiti. Xesosi sãkire himimarotakanisaaki, hĩkamari maerekati hinireẽkiti. Uatxa !hĩkamapinikariko. ¹⁵ Hĩte akiritakari kamari erekarinoka, ininiã iua atokokana erekarinoka hĩkama ikiniõtika. ¹⁶ Teoso sãkire iõkatsopatakori txari: Erekarinoka hĩkamako, kotxi nota kamari erekarinoka, itxa Teoso kitxakapirĩka.

¹⁷ Himisãkiretari hĩri iaxiti auakari. Atãonoka ikaminana ikinimane kãkiti iparĩkana atamatakasaaki. Ininiã kãkiti kamakasaakiri maerekati, aĩri misiritiniri ãti atokotxikana, imisiritari ãti. Himitekini !auari. Hĩxinikariko, haãpoko atão inakari ãkorapokoriti !auari. Teoso tixineẽ aua haãpoko. Ininiã ãkorapokoriti hãuakasaaki, iteene hĩpaxitariko Teoso. Hĩpĩkariko iua manirekakiniti hĩkamini. ¹⁸ Mitxi !apakata hãuini, kotxi iuasaaki hĩkamari hãtokiriakorini sãkire iaõka. Uatxa Xesosi oerekai ãtiã hãuini, kotxi iamotai hĩte, iua nakitiakori hininiua ãkapani. Himarotari iamotinii. !Iamotai pirataã. !Iamotai oroã. !Iamotai txineiroã, kotxi pirata, oro, txineiro pakini xipokako. ¹⁹ Kristo arẽkaã iamotai hĩte, kotxi ipĩkasaaki iamotai hĩte. Peerekari iua arẽka, kotxi iua arẽka makatxakari amaerekani. Soti auĩte erekari atoko itxa Kristo. Kona maerekati aua iuamoni. ²⁰ Itixi kamiko apisa, Teoso mereẽri iua. Iua apoka uai himaerekani imakatxakini ãkapani. ²¹ Xesosi txĩkitakai hĩte auikiniri Teoso auini, kotxi Teoso iuaĩkana õkitikari Xesosi ipĩkani sauaki. Iuasaaki isãpiretari Xesosi ikinika ikamakiti ereka inini. Ikara atoko ininiã, hãuikari Teoso sãkire. Himarotari isãkire iaõka ikamini. ²² Erekari Matamatakoti oerekepekai atão inakari, ininiã uatxa hĩkamari atão inakari. Ikara atoko ininiã, hãkixinire erekari. Ininiãkara atão hĩtoretari hĩtariakori. Ininiã iteene hĩtoretakakauako hãkixinireẽ.

²³ Hĩte xinire iuaĩkana iponaniãpeka. Teoso sãkireẽ hĩxinire iponaniã iuaĩkana. Teoso sãkire auapika. !Ixpoka. Ininiã iua anaakori hĩtxaua. Hĩri ãkorapokoriti auakani xipoka. Hĩri iaxiti auakari !ixipoka, ininiã hĩte iua anaakori !ixipoka apaka. ²⁴ Teoso sãkire iõkatsopatakori txari:

Kãkiti katsotati atoko itxa. Katsotati paĩtiki ipinini. Iua atokokana patimari kãkiti ipina. Ikinika erekari ikamakiti, aãui atoko itxa. Aãui patimari ipinini. Iua atokokana patimari kãkiti kamakiti xipokini.

²⁵ Iuaritika Teoso sãkire auapika. !Kaxiporeri, itxa Teoso sãkire iõkatsopatakori. Teoso sãkirepitikara sãpiretaãkapeka hĩtemoni, hĩkenakotakasaakiri Teoso iokanapirena erekari.

2

¹ Ininiãkara hĩtakanapariko ikinipoko maerekati hĩkamakiti. !Himisirienetapiri ãti. Hĩkamariko hĩsãkire iaõka. !Hĩxikotapiri ãti. !Himisãkirepiretapiri ãti. Ikini sereti maerekati kãkiti kamakiti hĩtakanapako.

² Hinirekariko Teoso sãkire makoketakoti. Tinitxiã imi axapitiri nirekini atokokana, hinirekariko Teoso sãkire. Teoso sãkire hãpakapakasaaki, himaroãpotari iua, ininiã apiaãpota hãuikiniri iua sãkire. ³ Kotxi uatxa himarotapekari Apiananiri ereka inini.

Kai Atoko Itxa Xesosi

⁴ Ininiã hĩsako Xesosimoni, kotxi auapika inakari itxaua. Kai aapokotxi kamakari manirekakiniti atoko itxa Xesosi. Kãkiti !inirekari iua. Iuaritika Teoso mereẽri iua. Teoso tiretakiti itxaua Xesosi. ⁵ Hĩte apaka kai atoko hĩtxaua Teoso aapoko ãkapani. Itxĩkitakari hĩxinire auãki inini, kotxi iua nakitiakori hĩtxaua. Ininiã, Teoso aapoko atoko hĩtxaua. Ininiã iua aapoko ãki sasetotxi hĩtxaua, iua ãkapani hĩparĩkauatini. Ininiã hĩsakariko iua amanaãkiti, iua nireẽkiti. Iua apakapariko hĩsikakiti, kotxi Xesosi Kristo makatxakapekari himaerekani. ⁶ Teoso sãkire iõkatsopatakori txari:

Hãtamata. Nitakari kai Sião sitatxitiã. Iua kai apiari, Teoso mereẽkiti. Apiaerekata iua. Iua kai atoko inakari sãkire auiãkani !ipẽtauata, itxa Teoso sãkire.

⁷ Iua kai atoko inakari itxaua Xesosi. Peerekari Xesosi hitemoni, kotxi hite auikari iua sākire. Āti iua atoko inakari lauari. Txamari isākire makipitakani linirekari iua. Teoso sākire iōkatsopatakori txari:

Aiko kamakani txari: “!Apakata ia kai. !Anirekari.” Iuaritika iua kai apiari. Itakaāka aiko kamikosaaki, apanakini kai soro maīkakari ininiua ikapani.

⁸ Iuaīkana Teoso sākire iōkatsopatakori txari:

Iua kai xika kākiti mākitita. Iua kai xika kākiti irika, itxa Teoso sākire. Imākititana, kotxi !auikarina Teoso sākire. Teoso txikitakana ninoa irikini, kotxi lauikarina iua sākire.

⁹ Hitepekana, Teoso mereēkini hītxaua. Sasetotxi hītxaua. Hīparīkauata Apiananiri ikapani. Hite makatxakaāka maerekani sauaki erekarinoka hīkamini ikapani. Teoso nakitiakori hītxaua. Imereēi hite iua ereka inini kākiti hōerekini ikapani, kotxi ipiā hāuakasaaki, iuara akiritai hite ipiā hītakanapini ikapani. Itakai ikamaraā atāo inakari himarotini ikapani. Peerekari iua kamara. ¹⁰ Mitxi Teoso nakitiakori !hītxaua. Uatxa Teoso nakitiakori hītxapekaua. Mitxi Teoso !amonīkanikai. Uatxa Teoso amonīkapekai.

Teoso Nitiriakori Iamotakoni Pirena

¹¹ Nitiretakini, uai itixi hāuakasaaki, āti tixinikini atoko hītxa. Atāo hāapoko Teoso tixine aua. Īkorasaaki hīsaāpota hāapokomoni. Ininiā ikini nixinireritika nōtākikai hite himakamakaniri maerekati hīto nireēkiti. Hīto nireēkiti hīxinire mokaiakari atoko itxa. Hīto !inirekari hīxinire nireēkiti. ¹² Teoso sākire mauīākani sauaki hāuakasaaki, ikiniōtika erekarinoka hīkamako. Atxiīti ninoa maxikatīka apoītai maerekati hīkamini, iuaritika iusaaki ninoa imarotari erekarinoka hīkamini. Ininiā Teoso ketotini ōti manapi iua oerekariko atāo inakari ninoamoni. Ininiā iusaaki ixinikarinako erekari hīkamakiti. Ininiā itxarinako Teoso: “Peerekai pite,” itxana.

Hīkamariko Hīauīte Paniātakiti

¹³ Hīkamariko kākiti auītetakini paniātakiti, kotxi Apiananiri nirekari ikara atoko hīkamini. Ikinimane hīauīteakori paniātakiti hīkamako. Hīauīte apiari paniātakiti hīkamako. ¹⁴ Hīauīte poiāori paniātakiti apaka hīkamako, kotxi hīauīte apiari paniātana hīauīte poiāorini maerekati kamakani imisiritinina ikapani. Ipaniātana ninoa isāpiretinina erekari kamakani: “Erekapitikari hīkamakiti.” ¹⁵ Teoso nirekari hīkaminiri erekari, ininiā iusaaki miīkiteni !iposotari imisākirepiretinii hite. !Kasākirena iusaaki, kotxi apanakini imarotari erekarinoka hīkamini. ¹⁶ Hīposotari ikinipoko hinireēkiti hīkamini, kotxi Teoso sikakai hite. Iuaritika kona hinirekapiri maerekati hīkamini. Teoso nitiriakori hītxaua, ininiā iua paniātakinoka hīkamako. ¹⁷ Hīpaxitariko ikinimane. Hītiretanako ikinimane aītariakori Teoso sākire auīākani. Hīpīkariko Teoso. Hīpaxitariko hīauīte apiari.

Hīkamariko Hīpatrāote Paniātakiti

¹⁸ Nitiritxiakori, hīkamariko hīpatrāote paniātakiti. Hīpaxitariko iua. Atxiīti iua tiretai. Atxiīti imisiritai. Iuaritika hīpaxitariko iua. ¹⁹ Erekapitikari himīteenekiniri kākiti misiritinii maxikatīka. Himīteenekiniāri, Teoso nireēkiti hīkamini ikapani, erekapitikari. ²⁰ Erekari hīpatrāote misiritinii hite, maerekati hīkamakasaaki. Iusaaki himīteenekiniri himisiritiko kona txikitakari Teoso apokaerekatinii. Erekari hīkamakasaaki, himīteenekiniāri himisiritiko, iusaaki Teosomoni erekapitikai.

Kristo Misiritiko

²¹ Teoso akiritai hite inakitiakori hininiua ikapani, himisiritiko himīteenekini ikapani. Kristo misiritaāka hite ikapani, ininiā iua nirekari amīteenekiniri amisiritiko iua misiritiko imīteenekini atokokana.

²² Maerekati !ikama. !Imisirienetari āti.

²³ Ninoa misākirepiretakasaakiri iua, !apakapaenetana. Imisiritakasaakirina iua, !itxitana. !Isāpiretana imisiritinina imaerekanina xika. Iua auikari iri nīkatiniri iua, kotxi atāonoka kamakari itxaua Teoso. Atāo imarotari kākiti kamakiti. ²⁴ Aamina

īpiriāmitakari nopini Xesosi īto misiritaāka ate maerekani xika. Ipina ate īkapani, apikomoni maerekati akamini amanirekakani īkapani. Inirekari anireēkiti maerekati ipīkari atoko inini. Itxīkitakari axinire auāki inini atāo inakaranoka akamini īkapani. Xesosi karo txīkitakaua erekape anini. ²⁵ Xesosi himarotini apisapanika, soti auīte pīpinanakakani atoko hītixa. Uatxa hīkanapiriāpeka hīpitikirimoni. Hīxinire nīkatakari-moni hāpokapeka uatxa.

3

Taniritxi, Tanorotxi Pakini Ōtākikiko Pirena

¹ Nītirixi kaminiri ipatrāote paniātakiti atokokana, hīte tanorotxi hīkamariko hītaniri nireēkiti. Atxiīti hītaniri !auikari Teoso sākire, ininiā erekarinoka hīkamako. Atamatakasaakirina erekari hīkamakiti, ninoa auikari Teoso sākire. Hīkamakiti erekari txīkitakana auikininirina Teoso sākire. Hīsākirenoka !itxīkitakana auikininirina. ² Maerekati himakamakanisaaki ikiniōtika, Teoso iteene hīpaxitiniā ikiniōtika, iusaaki ninoa auikari Teoso sākire atāo inini.

³ Apanakini sito xinikapikari oiāko oōeretini, oro oiōā otakini, omāka ereri oieretakinini, oiō ere inini īkapaninani oxinika. Sito erero !oxinikari ikaranani. ⁴ Sito erero oākixinire ereri apaka. Hākixinire ereri inakasaaki, ikara ereri !ixipokapani. Hākixinire ereri inakasaaki, !hītxitapiri hītaniri. Hīkamari iua nireēkiti. Teosomoni apiaerekata hākixinire ereri inini.

⁵ Kitxakapirīka sitoākini ererini, Teoso sākire auīākani, ikara atoko inakani. Ninoa ākixinire erekari, kotxi ikīpitarina ītanirina sākire. ⁶ Sara inakoro kamari Apraāo sākire iaōka. Oa kamari Apraāo paniātakiti, kotxi oamoni oa auīte itxaua Apraāo. Sara anaakoro atoko hītixaua atāonoka hīkaminiā, himapīkarauatakaniā.

⁷ Hīte taniritxi, iua atokokana hīxinikariko erekari hīkaminana hītanoro. Hīpaxitaroko hītanoro, kotxi !katapararo. Oa apaka hītekata apakapariko Teoso sikakiti erekari. Iua txīkitakai hāuapininiika hinini iuakata. Hītiretaroko hītanoro, ininiā Teoso kenakotariko himisākiretiniri iua.

Himisiritiko Pirena

⁸ Ia nisākire mapotōkire nisāpiretai. Hīxinikakiti ātika xinikakiti atoko hītixako. Hiamonīkakauako. Hītiretariko āti, hītari hītiretini atokotxikana. Hīkamariko erekari ātimoni. !Hīuikapeua. ⁹ Āti kaminiāri maerekati hītemoni, !hīkamapiri maerekati iuamoni. Āti misākirepiretakasaakii, kona hīte misākirepiretapiri iua. Āti kaminiāri maerekati hītemoni, iusaaki hamanaāri Teoso sikiniri erekari iuamoni, kotxi Teoso paniātai ikara atoko inakari hīkamini, erekari Teoso sikakiti hīte apaka apakapini īkapani. ¹⁰ Teoso sākire iōkatsopatakori txari:

Pinirekiniāri pauini ereka inini, pinirekiniāri ikiniōtika pipoxokoniuatini, !pauiritapiri pisākire maerekati inini. !Pimisirienetapiri āti.

¹¹ Pinirekiniāri pauini ereka inini, pitakanapariko maerekati pikamini. Erekarinoka pikamako. Pitakanapariko pineenamauatini. Pinirekariko kākiti auini ereka inini.

¹² Apiananiri nīkatari kākiti atāo inakari kamakani. Teoso imisākiretakasaakina, Teoso kenakotapitikari isākirena. Txamari Apiananiri misiritari maerekati kamakani, itxa Teoso sākire kitxakapirīka.

¹³ Erekari hīkamakasaaki, kākiti !inirekari imisiritinii. ¹⁴ Atāo inakari hīkamakasaaki, kākiti misiritiniāi, hāpakapariko erekari Teoso sikakiti. Ininiā !hīpīkapena ninoa. Maerekaxiniretinoka !hītixape. ¹⁵ Hākixinireē hītixako: “Teosonoka niaūite. Apiananiri itxaua. Iua nireēkitinoka nikamako.” Ikara atoko hītixako. Hāpaiaōkariko Teoso sākire, isākire iteene himarotini īkapani. Ininiā kākiti pimainiāi: “Kinirepa hāuikari Teoso sākire?” Iusaaki himarotari hāpakapapiretiniri iua. Hāpakapapiretakasaakiri iua, !hītxitapiri. Hīpaxitariko iua iusaaki. ¹⁶ Hīsākirauatakasaaki, !hīsāpiretapiri hākixinire manirekakiniti. Hinirekariko erekari hākixinire nireēkiti hīkamini. Apanakini misākirepiretai. Ninoa atamatakasaakiri erekari hīkamakiti Kristo paniātakiti, ipētataro imisākirepiretinii. ¹⁷ Teoso nirekiniāri hātatsiirauatini erekari hīkamini xika, ininiā

erekari, kotxi iusaaki hīkamari erekari. Txamari hātatsiirauatiniā himaerekani hīkamini xika, !erekari, kotxi iusaaki hīkamari maerekati.

¹⁸ Xesosi Kristo ipina kākiti maerekani imaktxakini ikapani. Iusaaki iposope imaktxakiniri kākiti maerekani. Iuaikana latatsiirauataika kākiti maerekani imaktxakini ikapani. Erekarinoka kamakari ipīpe maerekati kamakani ikapani. Ipīpe, Teosomoni ate anikini ikapani. Iito ipīpe, iuaritika Erekari Matamatakoti txikitakari iua iuaikana auāki inini. ¹⁹ Iusaaki Erekari Matamatakoti posotiireē isari ipīkani auiniātaāmoni. Iuaā kateia āki ipīkani aua. Iuaā isāpiretana Teoso misiritinina ninoa, kotxi iuaka kāiata. ²⁰ Kitxakapirīka ninoa ipīkani, auākipanika inakasaakina, linirekarina Teoso paniātakiti ikaminina. Iusaaki Noe kamanātari maporo. Teoso iātapana imaerekanina itakanapinina ikapani. Txamari !itakanaparina. Iusaaki poiāonoka ! ipina. Oitonoka !ipina, xirataātxi apokasaaki. Teoso nīkatana ninoa imapinakani ikapani. ²¹ Ikara xirataātxi hīpatxisatiko atokokana. Hīpatxisatiko oerekari kākiti, Teoso makatxakapekai himapinakani ikapani. Hīpatxisataāka hītoākiri txiko makatxakiko !ikapanini, kona maerekati hīkamakiti makatxakiko ikapanini. Hīpatxisatikosaaki, hītxari Teoso: “Nākixinireē ninirekari nikaminiri ikinika pite nireēkiti iaōka,” hītxariko. Xesosi iuaikana ōkitikasaakiua, imaktxakai himapinakani ikapani. ²² Iua kanapiriā Teoso tixinemoni. Uatxa iri kikomoni iitopāka. Iuaā Teoso nitiriakori, auītetxiakori, kaposotiirerini pakini auīte itxaua. Ninoa ikinika kamari Xesosi paniātakiti.

4

Hīkamariko Ikinipoko Teoso Nireēkiti

¹ Xesosi atatsiirauata iitoā hīte ikapani. Ininiā hinirekariko Xesosi xinikakiti iaōka hīkamini. Ikara atoko hinirekiniā, hīxinikakiti sikataparitari hākixinire. Kākiti atatsiirauatakasaaki iitoā, !inirekaikari maerekati ikamini. ² Ininiākara ikorapokoriti auakasaaki, !inirekaikari maerekati iito nireēkiti ikamini. Ikamari Teoso nireēkiti iaōka ikiniōtika. ³ Mitxi maerekati hīkamakiti iaōpe. Mitxi Teoso sākire mauīākani nireēkiti iaōka hīkama. Ikini sereti maerekati hīkama iusaaki. Iusaaki hīkamari ikini sereti hīto nireēkiti. Hinirekari āti kākiti iito. Hīpoāta. Ikinipoko maerekati hīkama hīpoātakasaaki. Hīkamari kiiniri maerekati. Hīteosonetari kākiti kamakiti, Teoso mauiritakinini.

⁴ Ninoa Teoso sākire mauīākani txai: “Kinirepa kona hīpotxitari ate kamakiti iaōka hīkamini? Peerekari akamakiti,” itxaina. Ininiā ninoa nireēkiti iaōka himanirekakani xika, ninoa misākirepiretai hīte. ⁵ Txamari āti ōti ninoa apakapapiretariko Teoso, kotxi Teoso iposope isāpiretiniri maerekati kamakani misiritiko. Isāpiretari kākiti auākipanika inakani, apaka kākiti mitxi ipīkani. ⁶ Ininiā Teoso iokanapirena erekari sāpiretaākapeka kākiti. Uatxa ninoa ipīpe. Auākipanika inakasaaki, isāpiretaāka ninoamoni kākiti misiritiko imaerekani xika. Isāpiretaāka ninoamoni kākiti kaminiri Teoso nireēkiti ākixinireē ikiniōtika.

⁷ Imakinika xipokini ōti imatokotapeka. Ininiā kona hāuiritapiri hīto kaminiri inireēkiti. Araōkire hītxako, ininiā hīposotari himisākiretiniri Teoso. ⁸ Iteene hītiretakakauako. Ia apiata Teoso nirekakiti. Iteene hītiretakakauako, kotxi iteene hītiretiniri āti, poiāo hīxinikari maerekati ikamakiti. ⁹ Kākiti apokasaaki hāapoko, hīpoxokoniritika hāpakapanako. Kona hītsoatape hākixinireē ninoa apokini xika. ¹⁰ Hīkinika hāpakapekari imaroretxi Teoso parīka hīkamini ikapani. Ikara Teoso sikakiti hītemoni. Ininiā ikara himaroreē hīparīkauata apanakini ikapani. Iusaaki Teoso nitiriakori erekarini hītxaua. Hīsikariko ātimoni ikini sereti erekari Teoso sikakiti. ¹¹ Hīsākirauatakasaaki, hīsāpiretariko Teoso sākire kākitimoni. Himoianatakasaakiri āti, himoianatariko Teoso posotiireē, ininiā iusaaki kākiti txari Teoso: “Peerekai pite, kotxi Xesosi Kristo nakitiakori atxaua,” itxari Teoso. Ātipirika ikinimane txapikari Teoso: “Peerekai pite. Ikinipoko posotiiretxi aua pitemoni.” Ameē.

Xesosi Sākire Auiākani Misiritiko

¹² Nitiretakini, !hītikokape himisiritiko apokasaaki, kotxi ikara ataerekatai. Iteene himisiritaākako, kotxi ikara atoko inakari apokapitikako. ¹³ Iusaaki hīpoxokoniuatoko,

kotxi Xesosi atatsiirauatape, ininiã hĩte apaka atatsiirauatako. Xesosi kanapiriãkasaaki, peerekari iusaaki. Hĩte atamatariko ikara, ininiã iusaaki iteene hĩpoxokoniuaata. ¹⁴ Kãkiti xinitakasaakii hĩte, Kristo nakitiakori hininiua xika, hĩpoxokoniuaatako, kotxi iusaaki himarotari Teoso aua hĩtekata. Himarotari Erekar Matamatakoti aua hãkixinireẽ. ¹⁵ Kokaniri, kiĩtiriri, maerekati kamakari, aãpirena kamakari pakini !hĩtxapeuako. Ikara atoko inakari hininiãua, apakatapitika hãtatsiirauatini, kotxi hãtatsiirauata maerekati hĩkamini xika. ¹⁶ Iuaritika hãtatsiirauatiniã Xesosi sãkire hãuikini xika, ininiã iusaaki erekapitikari. !Hĩpẽtauatape. Hĩtxariko Teoso: “Peerekai pite, kotxi Xesosi nakiti nitxaua,” hĩtxako. ¹⁷ Apokapeka Teoso anaakori misiritiko õti. Merepanika Teoso misiritari iua anaakori imaerekanina xika. Teoso misiritiniãua ate isãkire auĩakani amaerekani xika, ininiã Teoso iokanapirena erekari manirekakani mitekini !auari. Iteene imisiritana ninoa. ¹⁸ Kitxakapirĩka Teoso sãkire iõkatsopatakori txari: Pamimari atão inakari kamakani sini Teoso tixinemoni. Ininiãkara Teoso manirekakani mitekini, maerekati kamakani mitekini !auari. Imisiritaãkapitikanako, itxa Teoso sãkire. ¹⁹ Apanakini atatsiirauata, kotxi Teoso nirekari atatsiirauatini. Ikara atoko hãtatsiirauatiniã, iuaritika erekari hĩkamapanikako. Hãuikariko ikinipoko kamakari sãkire, kotxi iua kamari ikinipoko isãkire iaõka.

5

Kõtãkikarerini, Ætokoriakori Pakini

¹ Kõtãkikarerini nitxaua nota, ininiã nõtãkikai hĩte kõtãkikarerini. Nota atamatariko Kristo misiritiko. Ikanapiriãkasaaki, natamatarini iua iotximere ikinimane auĩte inakasaakiaua. ² Ininiã nota õtãkikai hĩte. Hinĩkatanako Teoso sãkire auĩakani ereẽ. Soti auĩteakori ipitikiri nĩkatini atokokana, hinĩkatana. Hĩsãpiretanako Teoso sãkire, kotxi ikara sikakienatari ninoa ãkixinire. Teoso sikana ninoa hĩtemoni hinĩkatina ãkapani. Atão hinirekariko hinĩkatina ninoa. Kona hĩtxape hãkixinireẽ: “!Ninirekari ninĩkatina ninoa, iuaritika ninĩkatana, kotxi ikara niparĩka.” Kona hĩxinikapiri ikara atoko inakari. !Hĩparĩkauatape txineiro hãpakapini ãkapani. Hĩparĩkauatako apanakini himoianatini ãkapani. ³ Ninoa auĩte atoko !hĩtxapeua. Teoso sikana ninoa hĩtemoni hinĩkatina ãkapani, soti auĩteakori ipitikiri nĩkatini atokokana, ininiã erekari hĩkamako, hĩte kamakiti iaõka ninoa kamini ãkapani. ⁴ Ininiã ipitikiri apiari apokasaaki, Xesosi apokasaaki, hãpakapariko hĩparĩka ãki. Iusaaki hãpakapariko saporĩeta atoko inakari. Ikara Teoso sikakiti peerero, ininiã ikara apakapakani auapininiika. Atamatapikarina Teoso iotximere. Iusaaki erekari hãpakapakiti !ixipoka.

⁵ Hĩte ãtokoriakoripekana, hĩkamariko aneẽkani paniãtakiti. Hĩkinika, himoianatakauako. !Hĩuikapeua, kotxi Teoso sãkire iõkatsopatakori txari: Teoso iotokakari iuikakaniua kaminiri inireẽkitina. Iua sikari ikinipoko erekari miuikakaniuamoni.

Itxa Teoso sãkire. ⁶ Ininiã hĩteka poiãotakauako, kotxi Teosonoka kaposotireri. Iketo manapi Teoso iuikai hĩte, erekari hĩkamakiti isãpiretiniri ikinimane. ⁷ Maerekaxiniretinoka hinakasaaki, imakinika himaerekaxinire hĩsãpiretariko iua. Hĩsakariko himaerekaxinireni iuamoni, kotxi iua tiretai.

⁸ Kona hĩkamapiri hiĩto nireẽkiti. Araõkire hĩtxako, kotxi himokaiakari Satanasi inakori ãkiti monõkori atoko itxa. Isaãpota initiniri ikiena. ⁹ Satanasi apokasaaki hĩtemoni, iteene hãuikariko Teoso sãkire. Iusaaki hĩtaparaxinireritika hãuako. ! Himitekape. !Hĩkamapiri inireẽkiti. Himarotari hĩtariakori ikini itixiti auakani atatsitiniri imisiritikona hĩte atatsiirauatini atokotxikana. ¹⁰ Hĩte atatsiirauatako poiãonoka, eereka Teoso parĩka hãkixinireẽ iposope ikamini. Iua sikataparaxiniretai. Iteene hãuikari Teoso sãkire iusaaki. Satanasi !iposotari itxĩkitakini maerekati hĩkamini iusaaki. Teoso, ikinipoko erekari sikakari, kamari ikara atoko inakari hĩte ãkapani. Iua akiritai itixine hĩsini, ãtipirika hãuini ãkapani, iua iotximere ãtipirika hãtamatinini ãkapani, kotxi Kristo Xesosi nakitiakori hĩtxaua. ¹¹ Ætipirika ikinimane txari iua: “Peerekai pite.” Ætipirika ikinimane auĩte itxaua. Ameẽ.

Petro Takapiretanapini

¹² Sírası moianatano ia niõkatsopatakiti axapitiri niõkatsopatini hĩte ĩkapani. Iua aĩtari. Iua iteene auikari Xesosi sãkire. Niõkatsopata hĩte nisikataparaxiniretini ĩkapani. Ninirekari himarotiniiri atão asãpiretinii erekari Teoso sikakiti pirena. !Hĩtakanapapiriko erekari Teoso sikakiti hĩtemoni. ¹³ Teoso nakitiakori, Papirónia sitatxiti auakani, xinikamanapitai hĩte. Teoso mereẽna ninoa hĩte imereini atokotxikana. Marko, namarite atoko inakari, xinikamanapitai hĩte apaka. ¹⁴ Haõkitakakasaakiua, himaratakakauako, kotxi hĩtiretakakaua. Teoso kamaerekaxiniretai hĩte Kristo Xesosi sãkire auiãkani. Ameẽ.

2 PETRO

Petro Iuaïkana Iokanatsopatakiti

¹ Nota Simão Petro nitxaua. Xesosi Kristo nitiri, iua iokanatakiti nitxaua. Niokanatsopata hitemoni, kotxi hite auikari Xesosi Kristo sãkire, ate auikiniri atokotxikana. Peerekari iua sãkire aãuikini. Aãuikari iua sãkire, kotxi atãonoka kamakari itxaua. ATeosone, amaerekani makatxakakari itxaua Xesosi Kristo.

² Himaroãpotakasaakina Teoso, aãuïte Xesosi pakini, hãpakapari ikinipoko erekari ninoa sikakiti. Itori hãpakapa. Ninoa iteene kamaerekaxiniretai hite.

Erekari Akamini

³ Teoso posotiireë isikaua imakinika anireëkiti ïkorapokoriti aãuini ïkapani, Teoso paniãtakiti akamini ïkapani. Aãpakapari iua posotiire, iua aimarotakasaaki. Iua akiritaua iua nakitiakori aniniua ïkapani. Aãpoka iuamoni akiritakasaakiau, kotxi peerekari iua. Aãpoka iuamoni, kotxi erekarinoka ikama. ⁴ Ikara atoko ininiã, isikaua apia erekari isikaenetakiti. Isikaenetakiti anirekakiti apiari. Ikamaenetari ikamakiti erekari ikaminaua. Teoso nirekari ikara atoko ikaminiãua, atão inakaranoka akamini ïkapani, atão inakaranoka Teoso kamini atokotxikana. Kristo sãkire mauïãkani nirekari maerekati ïtona nireëkiti ikaminina. Hite !nirekaikari ninoa nireëkiti iaõka hïkamini, ininiã ikara maerekati linokai hite.

⁵ Ininiã ikinika hãkixinire taparaã hãuikariko Teoso sãkire. Hãuikiniãri Teoso sãkire, hïkamariko erekarinoka. Erekarinoka hïkaminiã, hinirekariko Teoso sãkire iteene himarotini. ⁶ Iteene himarotiniãri Teoso sãkire, hïito auïte hïtxauako. Hïito auïte hininiãua, himïteenekariko himisiritiko. Himisiritiko himïteenekiniã, hïkamariko erekari Teoso kaminiri atokokana. ⁷ Hïkaminiãri erekari Teoso kaminiri atokokana, hïtiretanako hïtariakori, Teoso sãkire auïãkani. Hïtariakori, Teoso sãkire auïãkani, hïtiretiniã, hïtiretari ikinimane. ⁸ Ikara atoko hininiã, ikara atoko apiaãpotiniã, aãuïte Xesosi Kristo himarotakasaaki, erekari hïparïka iua ïkapani. Iuasaaki makamareti atoko !hïtxapeuako. Himinariko ito kãkiti Kristomoni isãkire auikinina ïkapani. ⁹ Ikara erekari mauakaniã hitemoni, mõiãreni atoko hïtxaua. !Himarotari atão inakari. !Hïxinikari Teoso kamakiti katana. Himaxinïkaretapekari Xesosi makatxakiniri himaerekani mitxi hïkamakiti.

¹⁰ Ininiã nitariakori, ikara atoko !hïtxapeko. Hïkamariko ikinipoko Teoso paniãtakiti, ininiã iteene himarotari Teoso akiritinii inakitiakori hininiua ïkapani. Iuasaaki himarotari Teoso mereinii hite iua anaakori hininiua ïkapani. Ikara atoko inakari hïkaminiã, !hïkamari maerekati. ¹¹ Ikara atoko hïkaminiã, Teoso ipoxokoniritika apakapai hite aãuïte Xesosi Kristo auïttxi ininiãtaãua hãuini ïkapani. Iuaã Xesosi, amaerekani makatxakakari, ãtipirika ikinimane auïte itxauako.

Atão Inakari Teoso Sãkire

¹² Ninirekari ikara noerekakiti ãtipirika nisãpiretinii. Himarotapekari ikara noerekakiti, iuaritika iuaïkana nisãpiretai. Hite imarotari ikara noerekakiti atão inini, iuaritika kona nitakanapari ikara nisãpiretinii. ¹³ Nota auapanika ninakasaaki, notamoni atãopitika nitxïkitakinii hite ikara noerekakiti hïxinikini. ¹⁴ Kotxi nimarotari païtiki nipinini. Aãuïte Xesosi Kristo oerekepekano païtiki nipinini. ¹⁵ Ininiã uatxa Teoso sãkire nisãpiretapikai, ininiã kona himaxinïkaretari noerekakiti nipïkasaaki.

¹⁶ Asãpiretai aãuïte Xesosi Kristo posotiire. Asãpiretai iua iuaïkana kanapiriini. Ikara asãpiretakiti hitemoni kona kãkiti sãkireni. Kona kãkiti kimarorerini xinikakitini asãpiretai. Atão inakari ate sãpiretai hite, kotxi ateka atamatari Xesosi ikinimane auïte ininiua. ¹⁷ Aïri Teoso oerekari iuikiniri iua. Oerekari iua ereka inini, kotxi itxari iua: "Ere namarite, nitiretakiti. Iua iteene kamapoxokonitano," itxa Teoso kaposotiireri. ¹⁸ Ateka kenakotari ikara Teoso sãkire, itixineë isãkïrauatakasaaki. Iuasaaki ate aua Xesosikata õtanoxiratarari Teoso nakiti nopini.

¹⁹ Ininiã aimarotapitikari Teoso sãkire sãpiretakani sãpiretakiti kitxakapirĩka atão inini. Himixinikariko ninoa sãpiretakiti. Ninoa sãpiretakiti tirikapi ipiã iopinikini atoko itxa, kãkiti sinimoni atamatini ĩkapani, kotxi axinikasaakiri ninoa oerekakiti, aimarotari atão inakari, atão minakati pakini. Teoso sãkire sãpiretakani sãpiretakiti hĩxinikiniritika Xesosi kanapiriãko. Iuasaaki iua txĩkitakai Teoso iteene himarotini. Iuasaaki atokatxi ponikini atoko itxa Xesosi apokini. Iõriki ĩkanõkapanika pokĩkini atoko itxa iuasaaki Xesosi apokini. ²⁰ Merepanika ninirekari iteene himarotiniri Teoso sãkire sãpiretakani sãpiretakiti Teoso sãkire iõkatsopatakoriã. Kona ninoa sãkireni. Kona ninoa xinikakitini. ²¹ Kitxakapirĩka Teoso sãkire sãpiretakani kona iõkatsopatarari kãkiti nireẽkiti sãkiretxiti. Erekari Matamatakoti txĩkitakari kãkiti Teoso nakitiakori sãpiretiniri atão inakari Teoso sãkire.

2

Atão Minakati Oerekakani

¹ Kitxakapirĩka Teoso sãkire sãpiretakani auakasaaki, auari apaka atão minakati oerekakani. Iua atokotxikana uatxa aua atão minakati oerekakani hĩte sauaki. Kãkiti mimarotakanisaakiri, oerekari atão minakati. Kona erekari ninoa oerekakiti. Na atão ninoa oerekari Teoso sãkire. Ninoa !auikari Apiananiri ipinini kãkiti ĩkapani Teoso ĩkitxitini ĩkapani. Ikara xika mokatanitika Teoso xipokanako ninoa. ² Itori kãkiti auikari isãkirena, ininiã ikamarina ninoa kamakiti atokokana. Ikamarina maerekati ĩtona nireẽkiti, maerekati ninoa kamini atokotxikana. Ininiã ikara xika, apanakini misãkirepiretari Teoso sãkire atão inakari auikiko. ³ Kapotxinanirini ninoa atão minakati oerekakani. Isãkirena atão minakati xika, imisirienetai. Ninoa nireẽkiti iaõka ikaminiina hĩte. Kitxakapirĩka Teoso sãpiretapekari imisiritinina ninoa imaerekanina xika. Ixipokinina õti paĩtiki apokapitikako. Teoso limaka. Ninoa xipokini õti apokapitikako.

⁴ Teoso nitiriakori iaxiti auakani kamakasaakiri maerekati, imisiritana. !Auiritana imitekinina. Iokanatanana maerekani misiritikoõtaã. Iuaã itakana kateia ãki ipiã. Iuaã iãtaparina Teoso misiritinina ninoa imaerekanina xika.

⁵ Kitxakapirĩka Teoso xipokari ikinimane kãkiti iua nireẽkiti manirekakani xirataãtxiã. Teoso !auiritana ninoa mitekini. Noee, apikomoni setxi kãkitikata nĩkataãka. Ninoanoka !xipokaãka. Iua nĩkatari Noee, kotxi atão inakari sãpiretakari itxaua.

⁶ Apaka ixipokari Sotoma sitatxiti auakani, Komoha sitatxiti auakani pakini arikatxiã. Atapaninoka kaikota iuasaaki. Ininiã ikara pinitari kãkiti Teoso nireẽkiti manirekakani. ⁷ Iuasaaki Teoso makatxakari Aroo inakori imapinakani ĩkapani, kotxi erekari kamakari itxaua. Maerekati kamakani txĩkitakari Aroo matinaniuatini, kotxi ikiniõtika iua atamatari maerekati ninoa kamakiti, maerekati ninoa ĩto nireẽkiti. Itxiko atoko itxa ninoa kamakiti. ⁸ Aroo, atão inakari kamakari, aua ninoa sauaki. Ikiniõtika atamatari maerekati ninoa Teoso paniãtakiti manirekakani kamakiti. Ikiniõtika ikenakotari maerekati ninoa sãpiretakiti. Ininiãkara ãkixinireẽ Aroo maerekaxiniretinoka itxa ninoa maerekani xika, kotxi iua ãkixinireẽ inirekari atão inakarinoka ikamini.

⁹ Ikara atoko ininiã, Apiananiri imarotari iua nireẽkiti nirekakani imaktxakini imisiritikosaakina. Iua apaka imarotari imisiritiniri atão minakati kamakani uatxa. Apaka imarotari imaĩkinina ninoa, kãkiti misiritiko sãpiretiko õtisaaki imisiritinina ĩkapani. ¹⁰ Iteene Teoso misiritari kãkiti, maerekati ĩto nireẽkiti kamakani. Ninoa maerekani txikotari ninoa ãkixinire. Apaka iteene imisiritari auĩtetxi paniãtakiti makamakani.

Ninoa atão minakati oerekakani iteene iuikaua. !Ipaxitarina ãti. !Ipĩkarina imisãkirepiretinirina iaxiti auakani. ¹¹ Teoso nitiriakori iaxitikini iteene kaposotiireni. Apiataparatanana ninoa. Iuaritika Teoso nitiriakori !apoĩtana ninoa atão minakati oerekakani. !Imisãkirepiretana Teoso apisatoõ.

¹² Ninoa atão minakati oerekakani misãkirepiretari ikinika imimarotakinina. Kaxipiri ĩtopa auakari atoko itxana, kotxi ikamarina ĩtona nireẽkitinoka. Kaxipiri ĩtopa auakari iponaniã, eereka imaĩkaãka, oka inaãka. Iua atokokana ninoa atão minakati oerekakani xipokaãkako imaerekanina xika.

¹³ Ininiã ninoa misiritaãka, kotxi na atão ninoa kamakiti. Kona ïkanõkanaanini ikamarina maerekati. Ipotxitarina maerekati iïtona nireëkiti ikaminina pokamara, ikinimane atamatini ïkapani. Ninoa kamapikari maerekati, iuaritika apotiitauana hïtekata kiiniri Teoso ïkapani hïkamakasaaki. Ininiã apanakini !auikari hïte sãkire ninoa maerekani xika. Itxiko mãkatxi kasarori nopinikiri atoko itxana ninoa. Karõtxi kãkiti toõã auakari atoko itxana ninoa. ¹⁴ Inirekapikarina sito ïtanoro minakotokatika isirïkinina. Kona iposotarina iotokakinirina maerekati ikaminina. Anikarina kãkiti mataparaxinireni, maerekati ikaminina ïkapani. Kapotxinanixinirena ninoa. Ininiã Teoso misiritapitikanako ninoa. ¹⁵ Ninoa osipikari kimapori atão inakari. Ipïpinanakana. Ikamarina maerekati Paraõo inakori maerekani atokokana. Iua Paraõo, Peoo inakori ãkiri. Kitxakapirïka aua. Iua nirekaro txineiro maerekati ikamini ïkapani. ¹⁶ Txamari ipira txitari iua imaerekani xika, kotxi Teoso txïkitakari poho sãkirauatini kãkiti sãkirauatini atokokana. Ininiã ipira iotokakari iua atão minakati sãpiretakari kaminiri maerekati miïkiteti.

¹⁷ Ninoa atão minakati oerekakani !iposotari ikaminirina ikamaenetakitina. Aariko ãparaã mauakinini atoko itxana. Kãkiti nirekari ãparaã, txamari !auari. Katxiãri ïtima anikakiti atoko itxana ninoa. Kãkiti nirekari ãparaã kipini, txamari !ïkupa. Teoso mereëri ipiaãtaã ninoa ãtipirika kaikotini ïkapani. Kãkiti atamarauatini iuaãtaã ! auari. ¹⁸ !Kiïkiteri ninoa sãkire. Iuikauana isãkirauatakasaakina. Isãpiretarina kãkiti, erekari akaminiri aïto nireëkiti. Ininiã isikanireõtari kãkiti ikara maerekati ikamini. Imisirienetarina Teoso sãkire poiãopanika auiãkani. Ninoa !okananipanikani auikari Teoso sãkire. !Okananipanikani imarotarina atão inakari. Atão minakati oerekakani sikanireõtana ninoa ikara maerekati ikaminina.

¹⁹ Itxana: “Kateia ãki auakani atoko hïtxaua. !Erekari ikara atoko hinini. Hïkamariko hinirekakiti. Ininiã ikara atoko hïkaminiã, hïsikakaãka,” itxana. Txamari ninoaka kateia ãki auakani atoko itxauana, kotxi ninoa !iposotari itakanapinirina imaerekanina. Imaerekanina iauïtena itxaua, kotxi ikamarina imaerekanina paniãtakitinoka. ²⁰ Mitxi ninoa imarotari Apiananiri Xesosi Kristo sãkire, kãkiti maerekani makatxakakari sãkire. Iusaaki ninoa iotokakari ikaminirina Xesosi sãkire mauïãkani kamakiti, kãkiti xinire maerekati inini txïkitakakari. Txamari eereka iuaïkana ikamarina ikara maerekati. Eereka !iposotakarina ikara maerekati itakanapinina. Ininiã uatxa apiata imisiritikona. ²¹ Erekamariko atão inakari kamiko ninoa mimarotakanimako, kotxi ninoa imarotari, iuaritika !inirekaikarina Teoso paniãtakiti, iua iokanatakini sãpiretakiti. Uatxa ninoa misiritiko apiata. ²² Atãopitikara kitxakapirïka sãkiretxiti:

Anãpa kanapiriã okanakakitimoni onikiniri ïkapani. Irari ipitikiri arokakito kanapiriã iãropemoni osirïkini ïkapani.

Ininiã iuaïkana ninoa atão minakati oerekakani kamari maerekati, mitxi ninoa takanapakiti.

3

Apiananiri Kanapiriini

¹ Nitiretakini, mitxi niokanatsopatapeka hïtemoni. Iuaïkana niõkatsopataria ia aãt-sopa. Imakinika niõkatsopata, kotxi ninirekari hïte iuaïkana hïxinikiniri erekari mitxi himarotakiti. ² Ninirekari hïxinikiniri Teoso sãkire sãpiretakani sãkire kitxakapirïka, kotxi Teoso nakitiakori itxauana. Apaka ninirekari hïxinikiniri ate paniãtakiti, kotxi Apiananiri iokanatakini atxaua. Kãkiti maerekani makatxakakari iokanatakini atxaua.

³ Merepanika himarotariko ia: Imapotõkire õti takote auako kãkiti Teoso sãkire napetakani. Ninoa kamari maerekati iïtona nireëkiti. ⁴ Ia atoko itxanako: “Ïtapari iua? ‘Nikanapiriãko,’ itxa iua. Txamari kona apoka. Aãtokiriakorini ipïkasaakipanika, itixi kamikosaakipanika iuatxikana. Mitxi itixi, uatxa iuatxikana,” itxana.

⁵ Ninoa nirekari imaxinïkaretinirina Teoso kamakiti kitxakapirïka auakari, kotxi Teoso txïkitakari iaxiti apiko nopinixiti auini isãkireë. Apaka ikamari itixi ãparaã kamakori. Ikamari itixi ãparaã sauaki. ⁶ Apaka ninoa maxinïkaretari ia: Teoso iokanataria iua ãparaã, ininiã xirataãtxi xipokari itixi mitxi auakari, ikinimane kãkiti iusaaki auakani apaka. ⁷ Uatxa isãkireë inïkatari iaxiti apiko nopinixiti, itixi pakini arikatxi xipokiniri

īkapani. Imakinika inīkatiniritika Teoso manirekakani misiritiko isāpiretako. Iuasaaki ninoa xipokaākako. Iuasaaki ixipokari iaxiti apiko nopinixiti, itixi pakini.

⁸ Nitiretakini, kona himaxinīkaretapiri ia nisākire: Teosomoni āti ōti, mio anokanani atokotxikana itxa. Iuamoni mio anokanani, āti ōti atokotxikana itxa. ⁹ Apiananiri kamapitikari ikamaenetakiti. Apanakini kākiti xinikari !katimari ikaminiri ikamaenetakiti. Kona ikara atokoni. Iātapari kākiti auikiniri isākire, kotxi !nirekari kākiti sini imisiritikomoni. Inirekari ikinimane takanapiniri imaerekani.

¹⁰ Apiananiri kanapiriākasaaki, kiītiriri ikanōka apokini atokokana. Iua apoka kākiti mimarotakanisaakiri. Iuasaaki iaxiti apiko nopinixiti ereēkoka itaparakieneritika. Iuasaaki ikinipoko xipokaāka arikatxiā. Iuasaaki iteene ipataka aua. Imakinika itixi xipokako iuasaaki.

¹¹ Ikara atoko itxako ikinipoko xipokini, ininiākara natokopa itxa hāuini ikiniōtika ereka hinini? Erekarinoka hīkamako ikiniōtika, kotxi iua nakitiakori hītxaua. Teoso nireēkitinoka hīkamako ikiniōtika. ¹² Iuasaaki hiātapari hīpoxokoniritika Teoso keto apokini. Iteene hinirekariko ikara ōti apokini. Iuasaaki iaxiti apiko nopinixiti xipokaāka arikatxiā. Ikinika iākokako kapatakari xika. ¹³ Iuaritika aiātapari iaxiti apiko nopinixiti amaneri, itixi amaneri apaka atāo inakari kamakani īkapani. Ikara atoko inakari Teoso sikaenetakiti.

¹⁴ Ininiā nota tiretakini, hinirekasaakiri Xesosi kanapiriini ōti apokini, iteene hīparīkauatako maerekati himakamakani īkapani. Ininiā iua kanapiriākasaaki, iua imarotari himakamakaniri maerekati. Iuasaaki imarotari hīkerokiniri lauari. Iuasaaki imarotari erekaxinire hinini. ¹⁵ !Katimari iua kanapiriini, kotxi iātapari kākiti takanapiniri maerekati ikamakiti, imisiritiko mapokakani īkapani. Iua atokokana aītari atiretakiti Paoro iōkatsopata hītemoni Teoso imaroreē. ¹⁶ Ikinika Paoro iokanatsopatakitiā isāpiretari Apiananiri kanapiriini ōti Teoso imaroreē. Ipixini iua iōkatsopatakiti pamimari kākiti imarotiniiri īkapani. Aua kākiti miīkiteni. !Apakata aūikiniri ninoa sākire. Kākiti ikara atoko inakani oerekari Paoro iōkatsopatakiti, apanakini Teoso sākire iōkatsopatakori pakini, txamari na atāo ninoa sāpiretakiti. Ipinimoni ninoa oerekakiti. Imamakarina Teoso sākire, ininiā ikara xika ixipokaākanako.

¹⁷ Nitiretakini, himarotapekari pamonōkoniri ninoa atāo minakati oerekakiti. Ininiā araōkire hītxako. Kona hāuikapiri Teoso sākire kerokakani sākire, kotxi Teoso paniātakiti makamakani itxauana. Kona hītakanapapiri Teoso sākire atāo inakari, uatxa iteene hāuikakiti. ¹⁸ Ikiniōtika himarotariko ikinipoko erekari aūiite Xesosi Kristo sikakiti hītemoni, amaerekani makatxakakari sikakiti hītemoni. Ikiniōtika himaroāpotariko iua. Ninirekari ikinimane uatxa sāpiretiniri iua: “Peerekai pite.” Ninirekari ikinimane ātipirika sāpiretiniri iua: “Peerekai pite.” Ameē.

1 XOÃO

Merepanika Xoão Iokanatsopatakiti

Xesosi “Teoso Säkire” Inakori

¹ Nota iökatsopata hïte ïkapani, iua “Teoso säkire” inakori asäpiretini ïkapani. Ätipirika auakari itxaua. Itxïkitakari ikinipoko auäki inini. Itixi kamiko apisa iua aua. Atera kenakotari isäkire. Aökiä ate atamatari iua. Auakoä amaätakari iua. Ininiä atäopitika ate imarotari iua. ² Iua ikinipoko auäki inïkitaäkari. Iuaka oerekaua atemoni. Ate imarotapekari iua, ininiä asäpiretai aätamatakiti, akenakotakiti pakini. Ate säpiretai hïte iua ätipirika auakari, käkiti auäki inïkitaäkari, ininiä käkiti auapikako Teosokata. Iua Xesosi Kristo inaäka akiritiko. Iua aua irikata, Teosokata. Iuaka oerekaua atemoni. Aätamatari iïto. ³ Ate säpiretai hïte aätamatakiti, akenakotakiti pakini, amoianatakakiniua ïkapani. Atäo nisäpiretai. Amoianatakakaua Teosokata, Xesosi Kristo pakinikata. ⁴ Ia säkiretxiti aiokanata hïtemoni, iteene hïpoxokoniuatini ïkapani.

Teoso Pokamara Atoko Itxa

⁵ Teoso pokamara atoko itxa, kotxi maerekati !ikama. Ipiä !auari Teoso auiniätaä, kotxi maerekati !ikama. Ikara iokanapirena imi säpiretaua ate. Ininiä ate säpiretai hïte. ⁶ Maerekati akamakasaaki, ipiaä auakani atoko atxa. Iuasaaki, “Teoso amoianata,” aniniä, paxirari asäkire. Kona atäo akamakiti iuasaaki. ⁷ Teoso aua ikamaraä, kotxi erekarinoka ikama. Ate ikamaraä aäuniä Teoso atoko aniniä, erekarinoka akaminiä, ininiä ate Teoso säkire auiäkani moianariakori atxaua, ininiä amoianatakakaua. Ikamaraä aäuniä, Teoso arokaua Xesosi arëkaä. Imaktxakari ikinika maerekati akamakiti, kotxi imi Xesosi Kristo ipina ate ïkapani. Iarëka xikepoakata ate maerekani imaktxakini ïkapani.

⁸ “Na nota kamari maerekati,” aniniä, ateka misirienetaua. Ikara atoko aniniä, ate !imarotari atäo Teoso säkire aäkixinireë. ⁹ Amaerekani Teosomoni asäpiretiniä, iua maktxakapitikari amaerekani. Oeretari ate äkixinire. Imaktxakari ikinipoko amaerekani. Ikamari ikara atoko, kotxi imaktxakaenetari amaerekani. Ikamapitikari ikamaenetakiti. Ikamapikari atäo. ¹⁰ “Uatxapiima maerekati !nikama,” pininiä, pitemoni Teoso säkire paxirari atxiïti? Kotxi Teoso txapekari käkiti: “Maerekati kamakari käkiti.” “Maerekati !nikama,” pininiä, !pimarotari Teoso säkire päkixinireë. !Pikamari Teoso säkire iaöka iuasaaki.

2

Käkiti Teoso Atäo Imarotakari

¹ Namariteni nota tirketakini atoko hïtxaua hïte. Ikara niökatsopata, maerekati himakamakani ïkapani. Maerekati akamakasaaki, masäpiretari Xesosi Kristo. Aïri Teoso misäkiretakari itxaua Xesosi. Atäo inakarinoka kamakari itxaua iua. Iua misäkiretari Teoso ate ïkapani, amaerekani imaktxakini ïkapani. ² Iua maktxakari maerekati akamakiti. Kona ate maerekaninanini imaktxaka. Ipina ikini itixiti auakani maerekani imaktxakini ïkapani.

³ Teoso paniätakiti akïpitiniä, atäo aimarotari Teoso. ⁴ Teoso paniätakiti makïpitakati, “Nota imarotari Teoso,” inakari, paxirari isäkire. Äkixinireë !imarotari atäo inakari Teoso säkire. ⁵ Teoso säkire kïpitakari iteene tirketari Teoso. Kininiäpa aimarotatari iua nakiti aniniäua? ⁶ Akamakiti ikiniötika Xesosi kamakiti atokokana akaminiä, iuasaaki aimarotari Teoso nakiti aniniäua. “Teoso nakiti nitxaua,” pininiä, pikamariko Xesosi kamakiti atokokana.

Iteene Matiretakakaua

⁷ Nitiretakini, Apiananiri paniätaua atiretakakiniua. Ia paniätxi niökatsopatakiti hïtemoni, kona amaneriikani. Hïkenakopiretapekari ikara paniätxi merepitpanika Xesosi

sākire hīkenakotakasaaki. Iuasaaki hīkenakotari ikara paniātxi hītiretakakiniua tīkane. Ikara paniātxi kitxakapirīkari itxaua. Hīkenakotapekari ikara paniātxi. ⁸ Iuaritika ikara paniātxi amaneri itxaua. Xesosi kīpitari ikara paniātxi, kotxi itiretari kākiti. Hīte apaka tiretari kākiti, ininiā aimarotari ikara paniātxi ereka inini. Ininiā ipiā napaāpota, kotxi kākiti imaroāpotari atāo Teoso sākire. Atāo inakari kākiti imarotakasaaki, pokamarari atoko itxa kākiti ākixinireē.

⁹ “Pokamara naua,” pininiā, txamari iuasaaki pomanatari pitari Xesosi sākire auīākari, ikara atoko pininiā, uatxapiima ipiā pauapanika. ¹⁰ Pitari Xesosi auīākari pitiretiniā, pokamara pauapitika. Ininiā erekari pākixinire, ininiākara pākixinireē auakari kona txīkitakai maerekati pikamini. ¹¹ Pitari Xesosi sākire auīākari pomanatiniā, ipiā auakari atoko pitxaua. Iuasaaki pitīpokotapika ipiā. !Pimarotari pisinimoni. Mōsiāreti atoko pitxaua, kotxi !apakata patamarauatini ipiā xika.

¹² Namariteni nota tiretakini, niōkatsopata hīte īkapani, kotxi Xesosi makatxakapekari himaerekani, kotxi kākiti maerekani makatxakakari itxaua.

¹³ Hīte irītxiakoripekana, niōkatsopata hīte īkapani, kotxi hīte iteene imarotari Xesosi, itixi kamikosaaki auapeka inakari.

Hīte ātokoriakoripekana, niōkatsopata hīte īkapani, kotxi homitikapekari Satanasi hītapararitika.

Namaritenipekana, niōkatsopata hīte īkapani, kotxi himarotari āri Teoso.

¹⁴ Hīte irītxiakoripekana, niōkatsopata hīte īkapani, kotxi himarotari Xesosi. Itixi kamikosaaki auakaripeka itxaua.

Hīte ātokoriakoripekana, niōkatsopata hīte īkapani, kotxi pataparari hākixinire. Teoso sākire auapika hākixinireē. Homitikapekari Satanasi hītapararitika.

!Hinirekapiri Itixi Auakani Nireēkiti

¹⁵ Itixi auakani nireēkiti atoko inakari !hinirekape, kotxi ninoa nirekari maerekati ikaminina. Hītiretiniāri ninoa kamakiti, !hītiretari āri Teoso. ¹⁶ Maerekati kākiti kamakiti ia atoko itxapaniko: Inirekarina maerekati iītona nireēkiti ikaminina. Inirekarina maerekati okina nireēkiti ikaminina. Iuikauana, katii ininiāuana. Iuikarina ikamakitina. Ikara maerekati kākiti kamakiti potorika īkorapokoriti. Kona Teosomonikirini ikara. ¹⁷ Itixi xipokako. Ikinipoko tiitxi kākiti nireēkiti apaka xipokako. Kākiti Teoso nireēkiti kamakarirako lixipoka. Auapininiika Teosokata.

Kristo Omanatakani

¹⁸ Namariteni nota tiretakini, itixi xipokini ōti katanapanoka apoka. Kristo omanatakani auīte apokako itixi xipokini ōti apisa. Ikara himarotapeka. Uatxa Kristo omanatakani itomane apokapeka. Ikara atoko ininiā, aimarotari itixi xipokini ōti takotepeka inini. ¹⁹ Ninoa Kristo omanatakani, mitxi atekata apotiitaua, Teosokata aāpotiitakasaakia. Txamari ninoa !auikari Xesosi sākire ate auikiniri atokokana, ininiā ninoa sipe. Ninoa atāo Xesosi sākire auikaākamako, atekata ikaikotapikamanako. Itakanapaua, kotxi ate auikari Xesosi sākire. Ninoa !auikari.

²⁰ Teoso, erekarinoka kamakari, sikapekai hīte Erekari Matamatakoti himoianari tīkane. Ininiā hīte imarotari atāo inakari Xesosi sākire. ²¹ Hīte imarotari atāo inakari Xesosi sākire, iuaritika niōkatsopata hītemoni. Niokanatsopata hītemoni, kotxi himarotari atāo inakari. Paxiene kamakari !imarotari atāo inakari sākiretixiti.

²² Natokopa itxa iua paxiene kamakari? Paxiene kamakari txari: “Xesosi kona Teoso mereēkitini.” Kākiti ikara atoko inakari Kristo omanatakari itxaua iua. Iua linirekari āri Teoso. Imi apaka !nireka. ²³ “Xesosi kona Teoso ākirini” inakari, na kaikota Teosokata. “Teoso ākiripitikara Xesosi” inakarirako kaikotapitikako Teosokata.

²⁴ Hāuiritariko merepitipanika Xesosi sākire hīkenakotakiti kaikotini hākixinireē. Ikara kaikotiniā hākixinireē, Teoso ākirikata hīkaikotapikako. Āri Teosokata hīkaikota apaka. ²⁵ Xesosi sikaenetapekaua aūapininiika anini Teosokata.

²⁶ Niōkatsopata hīte nōtākikini īkapani, kotxi aua kākiti Xesosi hītakanapini nireēkani. ²⁷ Erekari Matamatakoti, Xesosi sikakiti, auapanika hīte ākixinireē, ininiā hīte na nirekari

āti koerekareri. Iua Erekarer Matamatakoti oerekai ikinipoko. Iua oerekakiti atāopitika. Kona paxieneni iua. Ininiā hikaikotako Xesosikata, Erekarer Matamatakoti oereēkiti hīkīpitini.

²⁸ Ininiā namariteni nota tirketakini, himoianatapikariko Xesosi. Ininiā uaimoni ikanapiriākasaaki, hīpīkarauatini !auari. Ininiā na hīpētatauata haōkitakasaakiri iua. ²⁹ Xesosi kamari atāo inakarinoka. Ikara himarotapeka. Ininiākara himarotari, kākiti atāo inakarinoka kamakani Xesosi anaakori ininiuana.

3

Teoso Anaakori

¹ Aīri Teoso iteene tirketaua ate. Hīxinikariko iua tiraōki. Iua iteene tirketaua ate, ininiā, “Namariteni,” itxaua ate. Ari, atāopitikara Teoso anaakori atxaua. Ninoa Teoso anaakori minakaniua !auikari Teoso anaakori aniniua, kotxi ninoa !imarotari Teoso. ² Nitirketakini, Teoso anaakori atxapekaua uatxa. Eereka !aimarotari kanatokoako atxapaniko. Ia aimarotapitika. Xesosi kanapiriākasaaki, Xesosi atoko atxapekauako, kotxi iusaaki aātamatariko iua. ³ Kākiti ikara auīākani, linirekarina maerekati ikaminina, kotxi Xesosi !ikamari maerekati.

⁴ Maerekati kamakari !ikamari Teoso paniātakiti. Amakamakanisaakiri Teoso paniātakiti, iusaakipeka akamari maerekati. ⁵ Himarotari Xesosi apokapeka !korapokoriti maerekati akamakiti imakatkakini !kapani. Xesosi !ikamari maerekati. ⁶ Kākiti Xesosi ātipirika moianatakari linirekaikari maerekati ikamini. Iua ātipirika maerekati kamakari !aōkitapanikari Xesosi. !Imarotapanikari Xesosi.

⁷ Namariteni nota tirketakini, !hāuiritapiri apanakini misirienetini hīte. Atāo inakarinoka kamakari kamapitikari Teoso nireēkitinoka, Xesosi kaminiri atokokana, kotxi Xesosi kamari atāo inakarinoka. ⁸ Ātipirika maerekati kamakari Satanasi nakiti itxaua, kotxi Satanasi kamapikari maerekati. Itixi kamikosaakipekara ikamaāpokatapitiporiri maerekati. Uatxa ikamapanikari. Teoso ākiri apoka !korapokoriti maerekati Satanasi parīka ixipokini !kapani.

⁹ Teoso anaakori !inirekaikari maerekati ikaminina, kotxi Teoso aua ākixinireēna. Ininiā !iposotarina maerekati ikamaāpotinina, kotxi iritarina Teoso. ¹⁰ Ininiā kipa Teoso anaakori txataua? Atāo inakarinoka kamakanira Teoso anaakori txaua. Āti tirketakanira Teoso anaakori txaua. Ininiā kipa Satanasi anaakori txataua? Erekarer makamakanira Satanasi anaakori txaua. Āti matirketakanira Satanasi anaakori txaua.

Kākiti Tirketakiniua Pirena

¹¹ Matirketakakaua. Merepitipanika Xesosi sākire hīkenakotakasaaki, hīkenakotari ikara otākipirenatxi, hītirketakakiniua. ¹² Kaiī inakori atoko !hītixape. Maerekatinoka kamakari nakiti itxaua iua Kaiī. Satanasi nakiti itxaua. Kaiī okari atāo itarika. Kixikapa okari? Ixikotiniri xika okapiri, kotxi itari kamari erekarinoka. Kaiī kamari maerekatinoka.

¹³ Nitariakori, Xesosi sākire mauīākani omanatakasaakii hīte, !hītsorīkaātapeko. “Kixikapa ninoa omanataua ate?” !hītixapeko, kotxi ikara atoko inakari apokapitikako. ¹⁴ Atiretiniāri ātariakori Xesosi sākire auīākani, aimarotari !apinaika. Aāuapininiika Teosokata. Matiraōkiti ākixinire ipīkari atoko itxa. ¹⁵ Kākiti itari omanatakari, Xesosi sākire auīākari omanatakari, kokaniri atoko itxaua. Himarotari kokaniri !auari ātipirika Teosokata.

¹⁶ Xesosi Kristo ipina amaerekani imakatkakini !kapani, ātipirika Teosokata aāuini !kapani. Ikara oerekaua atāo tiraōkitxi. Ininiā erekarer ātariakori atiretini. Xesosi tirketiniua ate atokokana, erekarer atiretiniri ātariakori. Atxiīti apina ātari mapinakani !kapani. ¹⁷ Pitii, pikiena pakini auiniāi, pitari, Teoso sākire auīākari tii, ikiena pakini mauakaniā, pisikariko iuamoni. Pimasikakaniāri iuamoni, Teoso tiraōki pākixinireē !auari. ¹⁸ Namariteni nota tirketakini, “Apanakini ate tirketar,” atxaua, txamari kaamoni inakasaakina na asikana minakati, ininiā na atāo atiretana. Atāo matiretana apanakini. Kaamoni inakasaakina, masikana ninoa amonitakitina.

Teoso Säkire Kïpitakari

¹⁹ Ikara atoko akaminiã, aimarotari Teoso anaakori aniniãua. Aimarotari atão inakari sãkirextiti akïpitini. Ikara atoko akaminiã, erekapitikari aãkixinire. Ikara atoko akaminiã, !apïkari Teoso amisãkiretini. ²⁰ “Kona erekano,” pininiã pãkixinireẽ, mitxi pimaerekani pikamini xika, !pipïkarauatape, kotxi Teoso iteene imarotai, iuaritika iteene iamoniãkai. Poiãoka aimarotari aãkixinireẽ auakari. Teoso imarotari ikinipoko.

²¹ Nitiretakini, pãkixinireẽ: “Namanaãpekari Teoso imakinika nimaerekani imakatzakini,” pininiã, kataparaxinirepitikai Teoso pimisãkiretini. ²² Ininiã iua sikaua aamanaãkiti, kotxi ate kamari ipaniãtakiti iaõka. Iua apokaerekatakitinoka akama. ²³ Teoso paniãtaua ate: “Hãuikariko namarite Xesosi Kristo sãkire.” Apaka Teoso paniãtaua: “Hïtiretakakauako.” Teoso paniãtaua ikara akamini. ²⁴ Teoso sãkire iaõka kamakari kaikotapika Teosokata ätipirika. Teoso kaikotapika iuakata ätipirika apaka. Aimarotari Teoso kaikotini atekata, kotxi iua sikaua Erekaru Matamatakoti aãkixinireẽ auini ïkapani.

4

Atamakaerekarauatini

¹ Nitiretakini, !hãuikapiri ikinimane kãkiti sãkire, “Erekaru Matamatakoti aua nota ãkixinireẽ,” inakani. Hãtaerekatanako ninoa. Atão Erekaru Matamatakoti auatana atxiiti ãkixinireẽna? Atxiiti matamatakoti ãkixinireẽna auakari kona Teosomoni ïkarini. Itomaneri kãkiti, “Nota Teoso sãkire sãpiretakarino,” inakani, txamari na atão ninoa sãkire. Kãkiti ninoa atoko inakani aua ikini itixitika. !Isãpiretarina atão Teoso sãkire. Imisirienetarina kãkiti. ² Kãkiti sãpiretiniãua: “Teoso ãkiri Xesosi Kristo apokapeka ïkorapokoriti. Kãkitipeka itxaua,” ininiã iusaaki aimarotari Erekaru Matamatakoti auapitika iua ãkixinireẽ. Ikara atoko aimarotari Erekaru Matamatakoti Teoso sikakiti auaitotiniri kãkiti. ³ Kãkiti sãpiretiniãua: “Xesosi na atão kãkiti !itxaua,” ininiã iusaaki aimarotari Erekaru Matamatakoti !uari iua kãkiti ãkixinireẽ. Matamatakoti iua kãkiti ãkixinireẽ auakari Satanasi nakiti itxaua. Kristo omanatakari nakiti itxaua. Iua Erekaru Matamatakoti Teoso nakiti itxaua. Hïkenakopiretapekari: “Maerekati Matamatakoti Kristo omanatakari iokanatakiti apokapitikako ïkorapokoriti,” itxa. Uatxa apokapeka.

⁴ Hïte namariteni, Teoso nakitiakori hïtxaua. Ininiã hïte !auikari atão minakati sãpiretakani sãpiretakiti, kotxi Erekaru Matamatakoti hïte ãkixinireẽ auakari apia posotiireri itxaua iua. Maerekati matamatakoti, Xesosi sãkire mauïãkani ãkixinireẽ auakari, kaposotiireri itxaua, iuaritika Erekaru Matamatakoti hïte ãkixinireẽ auakari apia sikaimaroretai hïte. ⁵ Ninoa atão minakati sãpiretakani xinikakiti, itixi auakani xinikakiti atokotxikana, ininiãkara itixi auakani auikari ninoa sãkire. ⁶ Atepekana, Teoso nakitiakori atxaua. Teoso imarotakari auikari asãkire. Teoso nakiti minakatiua ! auikari asãkire. Ininiãkara aimarotari kãkiti Erekaru Matamatakoti auãkixiniretakini. Iua Erekaru Matamatakoti atãonoka isãkirauata. Aimarotari kãkiti äti matamatakoti auãkixiniretakini. Iua äti matamatakoti kamisirienenereri itxaua.

Teoso Tiraõki

⁷ Nitiretakini, matiretakakaua, kotxi tiraõkitxi Teosomoni potoriakari itxaua. Kati-raõkirini Teoso anaakori itxauana. Ninoa atão imarotari Teoso. ⁸ Matiraõkiti !imarotari Teoso, kotxi Teoso tiraõkiuatapika. Tiraõkitxi Teosomoni potoriãkari itxaua. ⁹ Teoso iokanataru imatonõkari imi atemoni, Teosokata ätipirika aãuini ïkapani. Ikara atoko ininiã, Teoso oerekaua itiretiniua. ¹⁰ Ikara tiraõkitxi atão inakari itxaua. Mitxi ate ! atiretari Teoso. Iuaritika iua tiretaua ate, ininiã iokanataru imi atemoni ipinini ïkapani, maerekati akamakiti imakatzakini ïkapani.

¹¹ Nitiretakini, ikara atokorako itxa Teoso tiretiniua, ininiã matiretakakaua. ¹² !Auari Teoso atamatakari, iuaritika Teoso auari aãkixinireẽ, atiretakakiniãua. Ininiã Teoso oerekaua atão atiraõkiuatini.

¹³ Aimarotari Teosokata akaikotini ätipirika. Aimarotari Teoso ätipirika kaikotini atekata. Aimarotari ikara atoko inakari, kotxi iua sikari Erekaru Matamatakoti atemoni. ¹⁴ Aãtamatapekari Xesosi kamakiti. Akenakotapekari isãpiretakiti. Ininiã asãpiretari ikinimane, aïri Teoso iokanataru imi kãkitimoni, amaerekani makatzakakari ininiua ïkapani, kãkiti ätipirika Teosokata auini ïkapani. ¹⁵ “Xesosi Teoso äkiripitikara,” ina

săkiretakani, Teoso kaikotapika ninoakata. Apaka ninoa kaikota Teosokata ātipirika. ¹⁶ Aimarotari Teoso tiretiniua. Aăuikapiretapitikari Teoso tiretiniua.

Teoso tiraōkiuatapika. Kăkiti katiraōkiri kaikota Teosokata ātipirika. Teoso kaikota ātipirika iuakata apaka. ¹⁷ Teoso oerekapekaua atăo atiraōkiuatini iua tiraōkiuatini atokokana. Ininiă kataparaxinireua Kristo apisatoō aăpokasaaki, kăkiti misiritiko ōtisaaki. Aimarotari !imisiritaua iuasaaki, ininiă kataparaxinireuako, kotxi !korapokoriti aăuakasaaki Kristo atoko atxaua. ¹⁸ Atiraōkiuatakasaaki, !ap!karauata. Atăo atiraōkiuatiniă, !auari ap!kare. Ap!karauatakasaaki, amaăkaua.

¹⁹ Atiretari Teoso, kotxi mitxipeka iua tiretaua ate. ²⁰ Iua itari omanatakari, “Nota tiretari Teoso” ina săkiretakari, paxirari isăkire. !tiretari itari iuakata auakari. Ininiă !iposotari itiretiniri Teoso imaōkitakiniti. ²¹ Ininiă Teoso paniătaua: “Teoso tiretakari tiretariko itari apaka.”

5

Teoso Ăkiri Auikiko

¹ Xesosi Teoso mereėkiti itxaua. Ikara auiaăkani Teoso anaakori itxauana. A!ri Teoso atiretiniă, a!tariakori apaka atireta, kotxi Teoso anaakori ninoa apaka txaua. ² Teoso atiretiniă, inireėkiti iaōka akaminiă, aimarotari Teoso anaakori apaka atiretini. ³ Teoso atiretiniă, ak!pitari ipaniătakiti. Aposotari akaminiri ipaniătakiti, kotxi na kamimari ipaniătakiti. ⁴ Aposotari akaminiri iua paniătakiti, kotxi iua anaakori atxapekaua, ininiă isikataparataua, maerekati itixi auakani nireėkiti amakamakani !kapani. Kininiăpa isikataparataua maerekati ninoa nireėkiti amakamakani !kapani? Isikataparataua, kotxi Xesosi săkire aăuika. ⁵ Kipa posotatari maerekati itixi auakani nireėkiti imakamakani? Kăkiti auikiniări Xesosi Teoso Ăkiri ininiăua, iuanokara posotari maerekati imakamakani.

⁶ Xesosi Kristo Teoso Ăkiri itxaua. Teoso oerekapekaua Xesosi iua Ăkiri ininiăua. Kăuaăriă Xesosi patxisatikosaaki isăpiretaua. Iua!kana Teoso săpiretaua Xesosi iua Ăkiri ininiăua, Xesosi ip!kasaaki iarėka ixikepoatakasaaki. Teoso săpiretaua kona Xesosi patxisatikosaakinanini. Iua oerekaua Xesosi Teoso Ăkiri ininiăua ip!kasaaki apaka. Erekar! Matamatakoti săpiretaua Xesosi Teoso Ăkiri ininiăua. Iua atăonoka isăkire. ⁷ Teoso tixini auakani ipi, Ăti pakini oerekaua Xesosi Teoso Ăkiri ininiăua, a!ri Teosoma, “Teoso Săkire” inakorima, Erekar! Matamatakotima pakini. Naia ipi, Ăti pakini Ătinoka. ⁸ !korapokoriti auakani ipi, Ăti pakini, Erekar! Matamatakotima, Xesosi patxisatikoma, Xesosi ipininima pakini oerekaua Teoso Ăkiri ininiăua Xesosi. ⁹ Kăkiti erekarini săpiretakiti aăuikapitika, ininiă apiata maăuikari Teoso săpiretakiti, kotxi atăonoka isăkire. Iuara săpiretaua Xesosi iua Ăkiri ininiăua. ¹⁰ Teoso Ăkiri auiaăkari Ăkixinire imarotari ikara Teoso săpiretakiti atăo inini. Teoso săpiretakiti mauiaăkati txari: “Paxirari Teoso săkire,” kotxi !auikari Teoso săpiretakiti Xesosi iua Ăkiri ininiua. ¹¹ Kiripa Teoso săpiretaua? Iua săpiretaua: “Nitx!kitakai auăki hinini notakata hăuapininika hinini !ikane. Ikara atoko nitx!kitakai namarite nakitiakori hinakasaakia.” ¹² Iua Teoso Ăkiri nakiti Teosokata ātipirika auako. Iua Teoso Ăkiri nakiti minakatiua, !aupani ātipirika Teosokata.

Aăuini Ătipirika Anini !ikane

¹³ H!te auikari Xesosi Teoso Ăkiri ininiua. Niokanatsopata h!temoni, Teosokata ātipirika hăuini himarotini !kapani. ¹⁴ Teoso nireėkiti atoktxikana aamanainiări Teoso, aimarotari ikenakotari amisăkiretiniri, ininiă kataparaxinirepitikaua amisăkiretiniri, kotxi aimarotari iua apakapapiretapitikaua. ¹⁵ Ikara atoko aniniă, aimarotari ikenakotari aamanaăkiti, ininiă isikapitikaua.

¹⁶ Himarotakasaakiri pitari kaminiri maerekati, himisăkiretari Teoso iua !kapani. Ininiă Teoso makatxakari maerekati ikamakiti. Teoso kamari iua ātipirika iuakata auini !kapani. Ikara maerekati makatxakiko auapitika, ininiă kona itx!kitakari iua xinire ipinini. Ătiăo maerekati kăkiti kamakiti aua. Ikara maerekati makatxakiko !auari, ininiă itx!kitakari kăkiti xinire ipinini. Nota !ŏtăkikai himisăkiretiniri Teoso ikara atoko inakari

maerekati kamakari ikapani. ¹⁷ Teoso paniätakiti amakamakaniã, iuara maerekati txaua. Iuaritika aamanainiãri Xesosi ikara maerekati imakatzakini, ininiã ikara maerekati ! itxikitakari kãkiti xinire ipinini.

¹⁸ Teoso anaakori atão inakani !inirekaikari maerekati ikaminina. Aimarotari ikara. ! Inirekaikarina maerekati ikaminina, kotxi Teoso ãkiri nikatana ninoa. Ininiã maerekati auite Satanasi !iposotari imisiritinina.

¹⁹ Ikini itixiti auakani auite itxaua Satanasi, maerekati kamakari. Iuaritika aimarotari Teoso anaakori aniniua ate.

²⁰ Aimarotari, Teoso ãkiri apokapeka ikorapokoriti. Aimarotari iua sikaua imarore, ininiã aimarotari Teoso atão inakari. Akaikota iua atão inakarikata. Ari akaikota imi Xesosi Kristokata. Teoso atão inakari itxaua iua. Itxikitakaua iuakata ãtipirika aãuini.

²¹ Namariteni, nota tirketakini, !hiteosonetapiri Teoso minakatua. Ameẽ.

2 XOÃO

Iuaĩkana Xoão Iokanatsopatakiti

¹ Nota Xoão, mitxipe Xesosi imarotakarino nota. Niokanatsopata hĩte Xesosi sãkire auiãkanimoni, hamariteakorimoni apaka. Teoso mereẽpekai hĩte inakitiakori hininiua ĩkapani. Nitiretai, kotxi hĩtoretari Teoso sãkire atão inakari. Kona notananini tiretai hĩte. Ikinimane atão inakari imarotakani tiretai hĩte apaka. ² Atiretai hĩte, kotxi atão inakari aua aãkixinireẽ. Atão inakari kaikotapika atekata ãtipirika.

³ Aĩri Teoso, imi Xesosi Kristo pakini sikari ikinipoko erekari hĩtemoni. Amonĩkai hĩte. Ikamaerekaxiniretaina hĩte. Ininiãkara himarotari atão inakari. Himarotari Teoso tiraõki.

⁴ Iteene nipoxokoniua, kotxi nimarotari apanakini hĩte kĩpitapikari Teoso sãkire. Atão inakaranoka hĩkama, kotxi aĩri Teoso paniãtaua ikara atoko inakari akamini.

⁵ Nota tiretakini, ia nipaniãtai: “Matiretakakaua.” Ikara Teoso paniãtakiti !amanerini. Akenakopiretapekari ikara Teoso paniãtakiti, merepitipanika Xesosi sãkire akenakotakasaaki. ⁶ Kisaakipa atiraõkiuata? Teoso paniãtakiti ikiniõtika akĩpitakasaakira, iusaaki atiraõkiuata. Merepitipanika pikenakotapekari ia Xesosi paniãtakiti: “Mati-raõkiuata ikiniõtika.”

Kristo Omanatakani

⁷ Kaiãopokori kamisirienererini aua ikini itixiti. Ninoa sãkire: “Na kãkiti !itxaua Xesosi Kristo,” itxana isãkirena. Ikara atoko inakani misirienetari kãkiti. Kristo omanatakani itxauana ninoa. ⁸ Erepaniko. !Hãuikapiri isãkirena atão minakati, kotxi ninoa nirekari ixipokinirina hĩparĩka Teoso ĩkapani. Hinirekapitikari Teoso sikinii ikinipoko hĩparĩka ĩki.

⁹ Kãkiti takanapiniãri Kristo oerekakiti sãkiretxiti, ikamari maerekati. Teoso nakiti !itxaua. Kãkiti ãtipirika auikiniãri Kristo oerekakiti, imoianatari aĩri Teoso, imi pakini. ¹⁰ Kãkiti apokiniã paapoko, Kristo oerekakiti mauikakati, sãkiretxi atão minakati oerekakari, kona pauiritapiri ikaikotini paapoko. !Papakapapiri iua. ¹¹ Iua apakapakari apaka kamari maerekati iuakata, kotxi auiritari atão minakati isãpiretini.

¹² Ninirekari ito nisãpiretinii, txamari !ninarekari aãtsopaã nisãpiretakiti nitakini. Ninirekari naõkitinii hĩte. Iusaaki asãkirauatako aãpisatoõtakakiniua, ininiã iteene apoxokoniua iusaaki.

¹³ Hĩtariakori Teoso mereẽkini uai auakani iokanapireta hĩtemoni. Ixinikamanapitainna hĩte. Ameẽ.

3 XOÃO

Iuaĩkana Xoão Iokanatsopatakiti

¹ Nota Xoão, mitxi Xesosi imarotakarino, niõkatsopata pite nitiretakiti Kaiomoni. Nitiretai pite, kotxi pite tiretari atão inakari Teoso sãkire.

² Nitiretakiti, ninirekari ereka pinini pauini. Nimarotari pãkixinire ereka inini. Iua atokotxikana ninirekari piito ereka inini pimamianareni ïkapani. ³ Aĩtariakori mitxi hĩtemoni nota iokanatakini, apokapeka uai. Isãpiretanona pite iteene auikiniri atão inakari Teoso sãkire. Ikiniõtika pikamari Teoso sãkire iaõka. Atãonoka pikama. Ininiã ninoa minapiretakiti iteene kamapoxokonitano. ⁴ Namariteni atoko hĩtxaua, ininiã nikenakopiretakasaakiri ikiniõtika hĩkaminiri atão inakari Teoso sãkire iaõka, nipoxokoniuata. Ikara atoko inakari minapirenatxi, ninoa minapiretakiti, apia kamapoxokonitano nota.

⁵ Nitiretakiti peerekai pite, kotxi ikiniõtika pimoianatana aĩtariakori ereẽ apokakani. Mitxi !pimarotana ninoa, iuaritika pimoianatana. ⁶ Ninoa aĩtariakori sãpiretapekari pitiraõki Xesosi sãkire auiãkanimoni uai auakanimoni. Paapoko iuaĩkana ipotorikasaakina, erekari ninoa amonitakiti pisikinina, kotxi Teoso apokaerekatari ikara atoko pitiretinina. ⁷ Ninoa takanapari aapokona Xesosi sãkire isãpiretinina ïkapani. Xesosi sãkire mauĩakani lisikana iamonitakitina ninoamoni. ⁸ Ininiãkara maãpakapana Xesosi sãkire sãpiretakani aãuapokoã. Ininiã amoianatana Teoso sãkire atão inakari iaripiretini ïkapani.

Txiótepi, Temétxio Pakini

⁹ Niõkatsopatapeka Xesosi sãkire auiãkanimoni ereẽ pauiniãtaã auakanimoni. Txamari Txiótepi inakori !ikĩpitari nõtãkikare. Iua iuikapikaua. Inirekari ninoa auĩtetiniri iua, ininiã !imaãkatari nisãkire. ¹⁰ Iua kamapiretapikaua ate. Kona ikarananini ikama. Apaka !apakapana aĩtariakori, hĩtemoni sikani. Apaka !auiritana apanakini apakapinina ninoa. !Auiritaikari aĩtariakori nirekaãkani apotiitiniua Teoso misãkiretiko aikotiã. Ereẽ napokasaaki, iusaakiko nisãpiretai hĩte iua apisatoõ ikinika maerekati ikamakiti.

¹¹ Nitiretakiti, !pikamapiri maerekani kamakiti atoko. Erekarini kamakiti atoko inakarananira pikamako. Erekarini kamakari Teoso nakiti itxaua. Maerekati kamakari !imarotari Teoso.

¹² Temétxio inakoripekana, ikinimane sãpiretari iua ereka inini. Atão inakari Teoso sãkire oerekaua Temétxio kamakiti atão inini. Ate apaka sãpiretari iua ereka inini. Himarotari atão inakaranoka asãpireta.

¹³ Ninirekamari ito nisãpiretinii, txamari !ninirekari aãtsopaã nisãpiretakiti nitakini.

¹⁴ Ninirekari paĩtiki naõkitinii pite. Iusaaki asãkirauatako aãpisatoõtakakauako.

¹⁵ Ninirekari Teoso kamaerekaxiniretinii. Aĩtariakori uai auakani sãpiretai ixinikamanapitinii. Pisãpiretana ikinikana aĩtariakori ereẽ auakani, axinikamanapitinina ninoa.

XOTA

Xota Iokanatsopatakiti

¹ Nota Xota. Xesosi Kristo nitiri amotakori nitxaua. Txiako itari nitxaua. Niokanatsopata kăkitimoni, Teoso akiritakinimoni, Teoso aïri turetakinimoni. Xesosi Kristo nïkatakiniimoni niokanatsopata.

² Teoso iteene amonïkai. Iteene ikamaerekaxiniretai. Iteene itiretai.

Atăo Minakati Oerekakani

³ Hïte nota turetakini, Xesosi makatxakapekari himaerekani, nota maerekani apaka. Ninirekamari niökatsopatiniri amaerekani makatxakiko pirena hïtemoni. Iuanoka ninireka niökatsopatiniri, txamari nixinikari erekape âtiăo niökatsopatiniri. Ninirekari nôtăkikiniri. Teoso oerekakiti săkiretxiti inakitiakorimoni isikakiti hinïkaenetariko. Teoso oerekakiti ikinika isikapekari inakitiakorimoni. !Hăuiritapiri apanakini koketiniiri ikara ninoa oereëkitikata. ⁴ Hïte Xesosi săkire auïăkani sauaki aua Teoso mapaxitakani. Merepanika ninoa apotiitakasaakiaua hïtekata, !himarotari kamisirienererini ininiuana. Ninoa koketari isăkirena Teoso săkirekata. Ninoa săkire: “Ate sirïka anireëkitokata, kotxi Teoso katiraökiri, ininiă iua !imisiritaua.” Ikara atokora itxana ninoa. Xesosi Kristonokara aăuïte. Apiananiri itxaua. Iuaritika ninoa !nirekari Xesosi. Kitxakapirïka Teoso săkire iökatsopatakori săpiretari Teoso misiritiniri kăkiti ninoa atoko inakani.

⁵ Kitxakapirïka Exito tixini auakani misiritana Xoteoakori. Himarotapekari ikara inakari. Ninirekari iuaïkana hïxinikiniri ikara inakari pirena. Teoso moianatana Xoteoakori, ininiă ninoa miteka, Exito tixini osipikinina ïkapani. Hïxinikariko ia: Teoso makatxakana ninoa iuasaaki imapinakanina ïkapani, iuaritika mapa kasiriti napa atoko Teoso okana ninoa iua săkire mauïăkani.

⁶ Âtipekana nisăpiretai. Hïxinikariko Teoso nitiriakori iaxitikini kitxakapirïka. Teoso txïkitakana ninoa auïtetxi ininiuana, txamari !nirekaikarina Teoso paniătakiti ikaminina, ininiă itakanaparina auiniătaăna Teoso tixineë. Hïxinikariko ia: Teoso paniătana ninoa ipiaă ikaikotinina âtipirika. Itixi xipokini ôtisaaki Teoso misiritanako ninoa.

⁷ Âtipekana nisăpiretai. Hïxinikariko Sotoma sitatxiti, Komoha sitatxiti, apanakini sitatxiti apaka iuaătaă takote auakari. Iuaă auakani !nirekari Teoso paniătakiti ikaminina, ninoa Teoso nitiriakori atokokana. Maerekatnoka inirekapikana, kiki sirïkini âti kikikata. Ininiă Teoso xipokari iuaă auakari sitatxiniri. Ninoa maerekani xika Teoso iokanatana ninoa arikatxi maxipokatimoni. Iuaă imisiritaăkapikana. Ikara ôtăkikaua maerekati amakamakani tïkane.

⁸ Ninoa maerekati kamakani, kamisirienererini hïte sauaki auakani, kitxakapirïkarini atokokana itxana. Ixiniăkitina maerekati xika ninoaka ïto imisiritauana. !Nirekarina Teoso ninoa auïte ininiuana. Imisăkirepiretarina Teoso nitiriakori iaxiti auakani. ⁹ Mikeo inakori Teoso nitiriakori auïte itxaua, iuaritika !imisăkirepiretari âti Teoso nitiri iaxitikiri. Kitxakapirïka iua Mikeo Satanasikata itaparakienatakakaua, kotxi Mikeo nirekari Moisesini ïto ïkatini, txamari Satanasini nirekari Moisesini ïto iua inakiti ïkapani. Iuasaaki Mikeo limisăkirepiretari Satanasini. Ianoka isăkire: “Teoso misiritapanikaiko pite,” itxari Satanasini. ¹⁰ Txamari ninoa kamisirienererini hïte sauaki auakani misăkirepiretari ikinika imimarotakininitina. Ninoa ïkrite kaxipiri ïtopa auakani ïkrite atokokana, kotxi ikamarina ïtonani nireëkiti. Ikara ïkrite xipokanako ninoa.

¹¹ Teoso misiritanako ninoa. Kitxakapirïka Kaiï inakori kamari maerekati. Iua maerekani atokokana ninoa maerekani. Kitxakapirïka Paraăo inakori kamari maerekati txineiro apakapini ïkapani. Iua maerekani atokokana ninoa maerekani. Kitxakapirïka Koree inakori !nirekari Moisesi iauïte ininiuana. Iua atokokana ninoa !nirekari Teoso iauïtetini. Ininiă ixipokaăkanako Koree xipokiko atokokana.

¹² Hăpotiitakasaakiaua hinipokotini ïkapani, ninoa kamisirienererini apaka nipokota hïtekata. !Pëtauatana. Itxikotarina iua kiiniri imaerekanina xika. Ninoaka itiretaua. !Itiretarina apanakini. Îtima anikari katxiări iaxitikiri, ininiă katxiări napiniătaă

ãparaã kipa, takari aneini ìkapani. Txamari ninoa kamisirienererini katxiãri ãki ãparaã mauakiniti atoko itxa. !Erekana kãkiti ìkapani. Mitaãsaaki aua txipokori, txamari ninoa kamisirienererini mitaãsaaki aamina mariti atokokana ninoa. Aamina mariti ipìkari atoko, kotxi !iminaua. Ninoa iua atokokana, kotxi !ikamari erekari. Aamina mariti tokaãka. Ikotsa maporokaãka, ininiã atão ipìkari itxaua. Ninoa kamisirienererini ikara aamina atoko, kotxi ipinanako. !Ikaikotana Teosokata ãtipirika.

¹³ Potxoari uiniti tsakati pamonõkoniri atoko itxa ninoa kamisirienererini. Tsakati sori txiko atoko itxa ninoa maerekani. Iõriki atoko itxana. Iua iõriki sinimoni ! kimarotikori. Ninoa sariko ipiãmoni ãtipirika ikaikotinina ìkapani. Teoso mereëri ikara ipiaãtaã ninoa auini ìkapani.

¹⁴ Kitxakapirika Enoki inakori sãpiretapekari kamisirienererini pirena. Iua Enoki Adão apika mekaniri apika mekaniri itxaua. Enoki txari: Hãtamatariko. Apiananiri apokako itiximoni itomaneri inakitiakorikata. Mio, apikomoni mio, apikomoni mio, itxaãpokata inakitiakori iuakata ìkani.

¹⁵ Iua ikinipoko misiritiko sãpiretakari itxaua. Iua apokasaaki, isãpiretanako maerekati kamakani misiritiko, Teoso manireëkani misiritiko, kotxi Teoso !ipotxitari ninoa kamakiti. Ninoa misãkirepiretapikari Teoso. Ninoa maerekani xika, Teoso imanirekakanina xika, imisiritaãkanako, itxa Enoki sãpiretakiti kitxakapirika.

¹⁶ Ninoa kamisirienererini ãtipirika tsoatapika. ãtipirika apoïtapikana apanakini. Ii-tona nireëkitinanira ikamana. Iuikauana. “Peerekai pite,” itxana ãtimoni inireëkitinani apakapinina ìkapani.

Õtãkipirenatxi

¹⁷ Nitiretakini hìxinikariko aãuïte Xesosi Kristo iokanatakini sãpiretakiti akokaxiti. ¹⁸ Ninoa txai: “Xipokatxi õti kaiamapeka inini manapi apokanako kikiakori hïte napetakani tìkane. Ninoa kamariko ninoaka nireëkiti, Teoso manireëkiniti,” itxana Xesosi Kristo iokanatakini sãpiretakiti. ¹⁹ Ninoa maerekani xika kãkiti txitakakaua. Ninoa kamisirienererini kamari iïtona nireëkitinoka. Erekari Matamatakoti !auinana ninoa.

²⁰ Hïtepekana nota tiretakini, iteene hãuikapikariko Teoso oereëkiti. Ikara atoko hininiã, kataparaxinireiko hïte. Hãuikariko Teoso oereëkiti, kotxi Teoso sãkire itxaua. Himisãkiretariko Teoso. Erekari Matamatakoti oerekai atão hïsãkirauatini ìkapani. ²¹ Maerekati kamakanii, iuaritika aãuïte Xesosi Kristo !imisiritai. Iua anikai ãtipirika iuakata hãuini ìkapani. Ikara hiãtapakasaaki, ãtipirika hìxinikapikariko Teoso tiraõki hïte ìkapani. !Hïtakanapapiri iua.

²² Apanakini !auikapanikari ikinika Teoso oereëkiti, iuaritika !hïtxitapena. Himioianatanako ninoa iteene auikiniri ìkapani. ²³ Pamonõkoniri, kãkiti kamakasaakiri maerekati. Xamina tirinakari atoko itxa imisiritikona imaerekanina xika. Ininiã hïsãpiretanako Teoso sãkire, imisiritikona apokini apisapanika. Xamina tirinakari ãki katxakakari pimaktxakini atokokana itxa, pisãpiretakasaakiri Teoso sãkire ninoamoni. Apanakinipekana hiamonìkako. Hiamonìkasaakina, erepaniko, kotxi pamonõkoniri ninoa maerekani. Homanatariko maerekati ninoa kamakiti, hïte makamakaniri ìkapani.

Peerekari Teoso

²⁴ Teoso kaposotiireri nìkataua maerekati amakamakani ìkapani. Iua anikaua iua apisatoõ apoxokoniritika. Iuasaakiko amaerekani !auaikako. Peerekari aãuini iua apisatoõ. ²⁵ Æti Teoso lauari. Iuanokara Teoso txaua. Iuanokara kimaroreri. Amaerekani makatxakakari itxaua, kotxi aãuïte Xesosi Kristo ipina ate ìkapani. Iua iotximere aua, kotxi imaerekani !auari. Auïtetxiakori auïte itxaua iua. Kaposotiireri iua. Iposotari ikinipoko ikamini. Itixi kamiko apisapanika ikara atoko itxa Teoso. Uatxa ikara atoko itxapanika Teoso. Ikara atoko itxapikako ãtipirika Teoso. Ameë.

APOKORÍPISI Xesosi Kristo Iuaka Oerekiniua Pirena

Ia Aãtsopa Oerekaua Xesosi Kamakiti

¹ Ia aãtsopa oerekari Teoso nakitiakori Xesosi Kristo paĩtiki kamaenetakiti. Teoso iokanatarini iniriti iaxitikiri Xoãomoni Xesosi Kristo kamaenetakiti oerekini ĩkapani. ² Ikinika Xoão atamatakiti, ikinika ikenakotakiti pakini isãpireta ia aãtsopaã. Ikara atoko isãpiretaua ate Teoso sãkire, Xesosi Kristo sãpiretakiti iuamoni. ³ Ia aãtsopa atatsopatakani Teoso takariko erekari ninoamoni. Teoso takariko erekari ia isãkire kenakotakanimoni, ia isãkire kĩpitakanimoni, kotxi ikinika Xoão iõkatsopatakiti okatapaniri apokini.

Xoão Iõkatsopare

⁴ Nota Xoão. Niokanatarini ia niõkatsopare Teoso mereẽkinimoni. Setxi sitatxiti Ásia inakori tixini auakanimoni niokanata niõkatsopare.

Teoso sikari ikinipoko erekari hĩtemoni. Ikamaerekaxiniretai hĩte. Uatxa iua aua. Merepitipanika kitxakapirĩka iua aua. Iua ãtipirika auapikako. Setxi matamatakoni iaxitikini Teoso topãkiniãtaã apisatoõ auakani sikari erekari hĩtemoni. ⁵ Xesosi Kristo apaka sikari erekari hĩtemoni. Atão inakarinnoka sãpiretakari itxaua iua. Iua merepitipanika õkitikaua ipĩkani sauaki. Apaka itixi auakani auĩteakori auĩte itxaua iua.

Iua ate tirketakari. Ipinata ate ĩkapani amaerekani imakatzakini ĩkapani, ininiã isikakaua erekari akamini ĩkapani. ⁶ Itxĩkitakaua auĩtetxiakori aniniua. Itxĩkitakaua sasetotxiakori aniniua, kotxi asãkirauata Teosokata. Ininiã atxari Xesosi:

“Ãtipirika peerekai pite. Ãtipirika pitenokara kaposotiireri. Ameẽ.”

⁷ Hãtamata, Xesosi napani. Iua inako katxiãrikata. Iuasaaki ikinimane kãkiti atamatariko. Aamina ĩpiriãmitakari nopini iua tokakitakani apaka atamatariko iua. Iuasaaki ikini uãkati kãkiti atapariko iua. Ninoa atapakasaakiri iua, itxiapatana, akiripoakatana maerekati ikamakitina xika. Ikara atoko apokako. Ameẽ.

⁸ Apiananiri txari:

—Iõkatxi merepitipanika auakari Aopa inakori atoko nitxaua. Iõkatxi imapotõkire auakari Ómika inakori atoko nitxaua. Uatxa naua. Merepitipanika naua. Katana nota auapikako. Ikini posotiiretxi aua notamoni —itxa.

Xoão Atamatari Aĩtari Iaxitikiri

⁹ Nota Xoão, hĩtari. Nikamari Xesosi Kristo nireẽkiti, ininiã himoianari nitxaua, kotxi ãtipirika nimĩteenekari nimisiritiko, hĩte misiritiko himĩteenekini atoko. Ikara misirikaretxi apokapitika atemoni, kotxi aũũte Xesosi Kristo nakitiakori atxaua. Nota aua Patamosi inakori pokomiriĩti. Nitakaãka uai, kotxi Teoso sãkire nisãpireta apanakinimoni. Ikinipoko nimarotakiti Xesosi Kristo pirena nisãpiretini xika kãkiti takano nota uai. ¹⁰ Kãkiti Apiananiri xinikini õtisaaki, Erekari Matamatakoti sikaimaroretano nota. Iuasaaki nikenakotari sãkiretxi nitikinimoni. Sãkiretxi apiaenetakari, trõpetata atoko nikenakota. ¹¹ Itxari:

—Kãkiti apisapanika naua nota. Nota auapanika ikinipoko xipokaãka atoko. Piõkatsopata aãtsopaã patamatakiti tĩkane. Eereka piokanatarini iua aãtsopa kãkiti Teoso mereẽkinimoni setxi sitatxiti auakanimoni Ásia tixineẽ. Piokanatsopata Épeso sitatxiti auakanimoni, Esimina sitatxiti auakanimoni, Pékamo sitatxiti auakanimoni, Txiatxira sitatxiti auakanimoni, Satxima sitatxiti auakanimoni, Piratéopia sitatxiti auakanimoni, Araotxiséia sitatxiti auakanimoni pakini —itxa notamoni.

¹² Ininiã eereka nikirioka notakata sãkirauatakari natamatini ĩkapani. Nikiriokasaaki, natamatari setxi tirikapi topãkini oro kamakori. ¹³ Tirikapi topãkiniãtaã, natamatari kãkiti itari iaxitikiri, iuaritika ipinimoni itxaua. Iua mãka õtanori. Ikitiãpeka apoka. Ipakiomatatare atoko oro kamakoro aua itorotamoni. ¹⁴ Iãko iteene kasarori mapoa atoko

itxa. Xamina tirinakari atoko itxa oki. ¹⁵ Ikiti mēkorīka pirōsi xamina āki imēkorīkini atoko. Isākire ene āparaā torōkani atoko. ¹⁶ Iuako ikikomoni imaīkaro setxi iōriki. Inamaā iouata mitari pokīka. Iua iouata ipi uanaro aua. Atokatxi iotximere atoko itxa itoō.

¹⁷ Natamatakasaakiri, nirika ikitimoni. Koriākari atoko nitxa. Ininiā iusaaki itakari iuako ikikomonikiri nota nopini. Itxano:

—Kona pipīkarauatape, kotxi ikinipoko auini apisapanika nota aua. Ikinipoko xipokaāka atoko nota auapanika. ¹⁸ Nota auākipika inakarino. Nota koriākaripekano, iuaritika hātamatano. Ātipirika auāki inakarino nota. Ameē. Kaposotiireno nota, kotxi nipaniātari kākiti ipinini. Niposotiire aua niokanatiniri kākiti maerekati kamakani misiritikoātaā. ¹⁹ Piōkatsopatarī mitxi patamatakiti, uatxaika patamatakiti pakini. Apikomoni noerekakiti apaka piōkatsopata, kotxi noerekaiko katana itiximoni īkari. ²⁰ Kiripa ninoa iōriki setxi pakini niuako nikikomoni auakani? Teoso nitiriakori itxauana. Ninoa anikari nota sākire nisākire auiākanimoni ninoa setxi sitatxi auakanimoni. Kiripa ninoa setxi tirikapi topākini oro kamakori? Nisākire auiākani ninoa setxi sitatxi auakani itxauana —itxa Xesosi Xoāomoni.

2

Xesosi Iokanapirena Épeso Auakanimoni

¹ Xesosi misākiretari Xoāo:

—Piokanatariko ia nisākire Teoso nitirimoni, Teoso sākire auiākanikata auakarimoni Épeso sitatxitiā:

Ninoa setxi iōriki maīkakarino nota. Nimaīkari ninoa iōriki niuako nikikomoni. Ninoa setxi tirikapi topākini oro kamakori sauaki tīpokotakarino nota. Ia nota sākire. ² Nimarotari ikinika hīkamakiti. Nimarotari itori parīkatxi pamimari hīkama. Parīkatxi kamimari inakasaaki, kona hītakanapari. Maerekati kamakani apokasaaki hītemoni, kona hīte apakapana. Apokapeka apanakini kākiti hītemoni. Itxana: “Teoso iokanatakiniraua ate.” Txamari, kona atāo ninoa sākire. Nimarotari kona hīte auiritana ninoa kaminiri maerekati. Hīte atamakaerekatana. Eereka himarotari kona atāo ninoa sākire. ³ Himisiritaāka nisākire hīsāpiretini xika, iuaritika himīteenekari ikinipoko nota īkapani. Kona hīsāpaka hīparīkauatini nota īkapani.

⁴ Ikara hīkamakiti erekari, txamari hītakanapari hītiretinino. Merepanika hītiretano. ⁵ Hīxinikariko merepitipanika hītiretinino. Uatxa poiāoka hītiretano. Iuaīkana hīkamariko merepitipanika hīkamakiti atoko. Himatakanapakaniāri ikara himaerekani, patimari napokini hītemoni. Nimakatxakariko hītirikapite topākini. Ininiā Teoso sākire auiākani !auaika ereē, himatakanapakaniāri ikara himaerekani. ⁶ Auapitika atāo hīkamakiti, kotxi hīte omanatari Nikoraito inakoni kamakiti. Nota apaka omanatari ninoa kamakiti.

⁷ Kakenakokii hīte, ininiā hīkenakotariko Erekari Matamatakoti sākire Teoso sākire auiākanimoni. Maerekati makamakati nauiritako amātiiri Teoso tixine apanīkaki auakari itximini. Iua amātiiri tximakari auapika ātipirika Teosokata,

—itxa Xesosi Épeso auakanimoni.

Xesosi Iokanapirena Esimina Auakanimoni

⁸ —Piokanatariko ia nisākire Teoso nitirimoni, Teoso sākire auiākanikata auakarimoni Esimina sitatxitiā:

Ikinipoko auini apisapanika nota aua. Ikinipoko xipokaāka atoko, nota auapanika. Nipīpe, iuaritika iuaīkana nōkitikaua. Uatxa !nipinaika. Ia nota sākire. ⁹ Nimarotari hātatsiire. Nimarotari hīte minakati !uari. Iuaritika ikinipoko erekari aua hītemoni. Nimarotari apanakini misākirepiretinii hīte. Ninoa txa: “Xoteoakorira ate.” Txama kona atāo Xoteoni !itxauana. Ninoa apotiitiniātaāua Satanasi nakiti. ¹⁰ Kona hīpīkapiri himisiritiko īkapani īkari. Satanasi takari apanakini hīte kateia āki ataerekatiniī īkapani. Himisiritaākako tesi pakini ōti. Atxiīti hīpina nisākire hāuikini xika, iuaritika kona hītakanapapiri nisākire hāuikini, ininiākara nisikai ātiāo saporīēta. Iua saporīēta apakapakari auapika ātipirika Teosokata.

¹¹ Kakenakokii hīte, ininiā hīkenakotariko Erekarī Matamatakoti sākire Teoso sākire auiañanimoni. Maerekati makamakati kona iuañkana ikoriāika, —itxa Xesosi Esimina auakanimoni.

Xesosi Iokanapirena Pékamo Sitatxiti Auakanimoni

¹² Eereka Xesosi iuañkana misākiretari Xoão:

—Piokanatariko ia nisākire Teoso nitirimoni, Teoso sākire auiañkanikata auakarimoni Pékamo sitatxitiā:

Notamoni auari oa iouata ipi uana auakito. Ia nota sākire. ¹³ Nimarotari ikinika hīkamakiti. Nimarotari hāuiniātaā. Ereē Satanasi kākiti auīte itxaua. Iuaritika hīte auikari nota sākire. Kona hīte takanapari nisākire hāuikini. Átxipa inakori auama hīte sauaki. Iua sāpiretapikari nisākire kākitimoni. Ikara xika okapeēka ereē Satanasi auiniātaā. Iuaritika kona hāsikano. !Hītakanapari nisākire hāuikini.

¹⁴ Txamari auapitika hīkerokakiti. Aua kākiti hīte sauaki Paraão inakori sākire auiañkani. Kitxakapirīka iua oerekari Paraki inakori kākiti Isaeo auakani imisirienetini. Iua Paraki xika ikamarina maerekati, kotxi inikarina xinitxi teoso kamakorimoni sikakori. Oerekana kākiti kaminiri maerekati iito nireēkiti āti kākiti itokata. !Apakata kākiti auikiniri Paraão sākire. ¹⁵ Hīte sauaki aua kākiti Nikoraito inakoni sākire auiañkani. Nota omanatari ninoa auiañkiti sākiretxiti. ¹⁶ Hītakanapariko ikinika himaerekani. Hīkanapiriāko notamoni. Ikara atoko himakamakaniā, patimari hītemoni napokini. Ininiā nineenamauata maerekati kamakanikata mitaro iouataā ninamaā auakaroā.

¹⁷ Kakenakokii hīte, ininiā hīkenakotariko Erekarī Matamatakoti sākire Teoso sākire auiañanimoni. Maerekati makamakati nisikariko komiri iaxitikiri kipatakori. Apaka nisikariko kai kasarori maerekati makamakanimoni. Iua kai nopini iōkataāka kākiti uāka amaneri apanakini mimarotakiniti. Apakapakarinani imarotari iuāka amaneri, —itxa Xesosi Pékamo auakanimoni.

Xesosi Iokanapirena Txiatxira Auakanimoni

¹⁸ Eereka Xesosi iuañkana misākiretari Xoão:

—Piokanatariko ia nisākire Teoso nitirimoni, Teoso sākire auiañkanikata auakarimoni Txiatxira sitatxitiā:

Teoso ākirirano nota. Noki xamina tirinakari atoko itxa. Nikiti mēkorīka pirōsi atoko itxa. Ia nota sākire. ¹⁹ Nimarotari ikinika hīkamakiti. Nimarotari hītiraōki. Nimarotari iteene hāuikari nisākire. Nimarotari iteene hīparīkauata nota ikapani, apanakini ikapani apaka. Hīparīka nota ikapani pasāpaniri inakasaaki, iuaritika hīkamapanikari nota ikapani. Uatxa apiaāpota hīparīka nota ikapani.

²⁰ Itxama, nisāpiretaiko hīkerokakiti. Hīte auiritaro sito, Xesapeo inakoro, maerekati okamini hīte sauaki. Oa txa: “Teoso sākire sāpiretakarono nota.” Otxama, omisirienetana ninitiriakori. Oa xika, ninoa kamari maerekati iitona nireēkiti apanakinikata isirīkinina. Apaka ninoa nikari nipokori teoso kamakori sikakori. ²¹ Niātapani otakanapiniri omaerekani, txamari kona onirekari otakanapiniri omaerekani. ²² Ininiā nota kamariko oa amianatini. Oakata sirīkakani matakana-pakaniāro, iteene ninoa atatsiirauata. ²³ Oa anaakori nokapitikako. Ikara atoko inakasaaki, ikinimane Teoso sākire auiañkani imarotariko nimarotari ikinika kākiti ākixinire, ikinika ixinikakiti pakini. Ininiā erekari nisikako erekari kamakanimoni. Apaka nimisiritari maerekati kamakani. Hīkamakiti iaōka niikitxitai hīte.

²⁴ Uatxa nimisākiretai hīte apanakini Txiatxira sitatxiti auakani. Hīte auikari Teoso sākire. Hīte !auikari Xesapeo sākire. Hīte kona apaiaōkari Satanasi oerekakiti, iua imarore. Kona ninirekari nisikinii apikomoni parīkatxi nota ikapani, kotxi uatxa iteene hīparīkauata nota ikapani. ²⁵ Ianoka ninireka hīkamini. Hīte auikari nisākire, ininiā hāuikiniritika nisākire, nikanapiriāko.

²⁶ Iua maerekati makamakati, ātipirika nipaniātakiti kamakari, iuamoni nisikariko niposotiire itixi auakani auīte ininiua. ²⁷ Teoso sākire kitxakapirīkari txari:

Auñtetxi itxauako. Itapararitika ipaniātana ninoa inireēkiti ikaminina. Imakamaniārina inireēkiti, imisiritana ninoa, tiitxi kamakari tii imanirekakiniti ipakauanakini atoko.

Niri posotiire napakapakiti atoko iua apakapa. ²⁸ Apaka nisikariko iōriki ñkanōka-panikero iuamoni, ininiā notaka nisikaua iuamoni, kotxi iua iōriki atoko nitxaua. ²⁹ Kakenakokii hñte, ininiā hñkenakotariko Erekaru Matamatakoti sākire Teoso sākire auñkanimoni,
—itxa Xesosi Txiatxira auakanimoni.

3

Xesosi Iokanapirena Satxi Auakanimoni

¹ Iuañkana Xesosi misākiretari Xoño:

—Piokanatariko ia nisākire ninitirimoni, Teoso sākire auñkanikata auakarimoni, Satxi sitatxitiā:

Notamoni aua ninoa setxi Matamatakoni Teoso nakiti. Notamoni aua ninoa setxi iōriki. Ia nota sākire. Nimarotari hñparñka. Apanakini sñpiretai hñte auñki hinini hñxinire, txamari Teosomoni koriñkanipekarai hñte. ² Himereka. Araōkire hñtxapaniko. Hñsikataparataru erekaru hñkixinireē auakarui, kotxi iua erekaru ipinaar-iñpota. Ininiā hñtxñkitakaru iua erekaru auñki inini iuañkana. Notamoni hñparñka Teoso apisatoō na atño. ³ Hñxinikariko hñpakapakiti, apaka hñkenakotakiti. Hñkñpitariko hñkenakotakiti. Hñtakanapariko maerekati. Erekaru hñkamako, kotxi kiñtiriri apokini atoko napokako uai. Kñkiti kona imarotari kiñtiriri apokini manapi. Ikara atokokana nitxako nikanapiriñkasaaki.

⁴ Hñte Satxi sitatxiti auakani sauaki auapanika apanakini maerekati makamakani. Ninoa auikapitikaru nisākire. Ninoa kñkiti imñka matxikotakani atoko itxana. Ininiā notakata isanako. Imñkana kasarori. Ikara atoko nikaminana, kotxi ninoa kamari erekaru nipaniñtakiti.

⁵ Maerekati makamakani ieretakariko mñkatxi kasarori. Kona noakapaniriko iuñkana nañtsopateē. Kñkiti iuñkana ikara añtsopañ auakani añtipirika auapikako Teosokata. Ikara atoko ininiā, nisñpiretari iuñkana nirimoni, initiriakori iaxitikini pakinimoni. Nitxana: “Nota nakitiakori itxauana ninoa.”

⁶ Kakenakokii hñte, ininiā hñkenakotariko Erekaru Matamatakoti sākire Teoso sākire auñkanimoni,
—itxa Xesosi Satxi auakanimoni.

Xesosi Iokanapirena Piratēopia Auakanimoni

⁷ Iuañkana Xesosi misākiretari Xoño:

—Piokanatariko ia nisākire Teoso nitirimoni, Teoso sākire auñkanikata auakarimoni Piratēopia sitatxitiā:

Nota maerekati makamakaturano. Atño inakarunani sñpiretakarukarano nota. Kaposotiireri auñtetxi Tavii inakori atoko nitxa, kotxi nota matakakakiti, kona añti totari. Nota totakiti kona añti matakakari. ⁸ Nimarotari hñte parñka. Hñtamata. Hñparñka nota ñkapani aapokotxi tore matakakakori atoko itxa. Kona añti posotari iseretiniri. Ininiā kñkiti !iposotari iotokakinii hñte nisākire hñsñpiretini. Ikara atoko nikaminii hñte, kotxi kona kataparai hñte. Ikara atoko nikaminii hñte, kotxi hñkñpitari nisākire. Kona hñkipataru nisākire apanakini apisatoō. ⁹ Apanakini txari: “Atño Xoteoakori atxaua.” Txamari Satanasi nakitiakori itxauana. Paxirari ninoa sākire. Nikamariko ninoa kapotoreēkiniñua hñte apisatoō. Iuasaaki ninoa txako: “Atñoopitikara Xesosi tiretapitikai.” ¹⁰ Hñkñpitapekaru nisākire. Kamonōkoniri inakasaaki, kona hñtakanapari nisākire, ininiñkara apia maerekati ikini itixiti apokasaaki, iuasaaki ninñkataiko hñte. Iua maerekati kona misiritai hñte. Iua maerekati apokako itixi auakani atamakaerekatini ñkapani.

¹¹ Erepaniko, patimapaniriko napokini ereē. Añtipirika hñkamariko erekaru. Hñtakanapapikariko maerekati. Ininiā iuasaaki añti kona posotari imakatzakiniri auñtetxi saporietane hñtemoni nisikakiti. !Imakatzakarina ikara hñparñka ñki. ¹² Nikamariko

maerekati makamakati itíkare mina atoko inini niTeosone misáki-retiko aikoti áki. Auapika Teoso misáki-retiko aikoti áki, ininiá !itakanapari Teoso sáki-re. Niókatariko niTeosone uáka iua nopini. Apaka niókatariko Teoso sitatxine uáka iua nopini. Ininiá apanakini imarotari Teoso nakitiakori ininiuana ninoa. Iua Teoso sitatxine Xerosareë amaneri iua tixine katxakakari. Iua maerekati makamakati nopini niókatariko apaka nota uáka amaneri.

¹³ Kakenakokii híte, ininiá híkenakotariko Erekarí Matamatakoti sáki-re Teoso sáki-re auíákanimoni,
—itxa Xesosi Piratéopia auakanimoni.

Xesosi Iokanapirena Araotxiséia Auakanimoni

¹⁴ Iuaíkana Xesosi misáki-retari Xoão:

—Piokanatariko ia nisáki-re Teoso nitirimoni, Teoso sáki-re auíákanikata auakarimoni Araotxiséia sitatxitiá:

Niuáka “Ameë.” Nota atão sáki-retxiti sápi-retakarikarano. Nikamari ikinika nisápi-retakiti. Merepanika nikamari ikinipoko. Ininiá ikinipoko auíte nitxaua nota.

¹⁵ Nimarotari ikinika hīparīka. Hītixari: “Nauikapitikari Xesosi sáki-re.” Txamari kona iteene hinirekari hīkaminiri nipaniá-takiti. Apaka kona iteene hinirekari hītakanap-iniri nisáki-re. Kona kapatakari atokoni hītixaua híte. Kona katxīkareri atokoni hītixaua híte. Poomari atoko hītixaua. Notamoni apiaerekata kapatakari atoko hininiua híte. Iuasaaki iteene hinirekari hīparīkauatini nota íkapani. Iteene himanirekakaniári hīparīkauatini nota íkapani, apiaerekata katxīkareri atoko hininiua híte, nisáki-re ikinika hītakanapini. ¹⁶ Notamoni híte áparaá poomari atoko hītixa. Ininiá kona áparaá kapatakaári atoko !hītixa. Apaka kona áparaá katxīkareēri atoko !hītixa. Ikara atoko inakasaaki !nini-rekai. Ininiá mapara nikanakai híte. ¹⁷ Híte txa: “Katxineiroteua ate. Katiiua ate. Apikomoni anirekakiti !auari,” hītixa. Txama kona himarotari hākixinireē iteene himatinaniuatini. Hākixinireē minakati !auari. Hākixinireē mokiri atoko hītixaua. Kasarari atoko hītixaua hākixinireē. Ikara atoko hininiá, kona himarotari Teoso. ¹⁸ Nótākikai híte hiamotiniri notamoni auakari oro atoko inakari. Oa oro xamina oeretakito. Ikara atoko hīkaminiá, ikinika hinirekakiti auako hītemoni. Hiamotariko mākaxi kasarori notamonikiri hīeretakini íkapani, ininiá kona hīpētauata kasara hinini xika. Ikara atoko hīkaminiá, hākixinire !auari maerekati. Hiamotariko apaka pinītxi notamoni auakari hōki íkapani, ininiá atão hīposota hātamarauatini.

¹⁹ Nitiretakini nótākika, apaka noerekana. Ininiá ikinipoko atão hīkamako maerekati hītakanapini íkapani. ²⁰ Hātamatako. Hākixinire toreē nota auapeka. Nota haápoko maparakiri akiritakari atoko. Híkenakotiniári nakiritinií, hōsereiniári hākixinire tore, niñroá hítekata nikaikotini íkapani. Iuasaaki ninipokota hítekata. Híte nipokota notakata.

²¹ Nauritari maerekati makamakati topākini notakata auítetxi topanere nopini. Iua auítetxi topanere nota nakiti. Iua atokotxikana nota topāka nirikata auítetxi topanere nopini iua nakiti nopini, kotxi maerekati makamakati nota apaka txaua.

²² Kakenakokii híte, ininiá híkenakotariko Erekarí Matamatakoti sáki-re Teoso sáki-re auíákanimoni,
—itxa Xesosi Araotxiséia auakanimoni.

4

Iaxiti Auítetxi Topanere

¹ Eereka natamatari iaxiti tore. Itore imatakakaáka. Merepanika nikenakotari trōpetá atoko inakari. Kákiti sáki-re atoko itxa. Imisáki-retano:

—Uai pina notamoni. Noerekaiko katana auakari tīkane.

² Iuasaakipeka Erekarí Matamatakoti anikano. Iuasaaki natamatari auítetxi topanere iaxiti. Topākakari aua iua nopini. ³ Iuaá topākakari kai peereri pomēkoriri atoko itxa. Iua kai satónia inakori atoko. Apaka áti kai sátxio inakori atoko itxa iua topākakari. Kisi ákitari iua auítetxi topanere. Iua kisi kai esimeráota inakori atoko itxa.

⁴ Iua ïtinikata aua vïtxi koatro pakini topaneretxi. Vïtxi koatro pakini totiakori topãka iua topaneretxi nopini. Ninoa mãka kasarori. Ikiina aua saporïêta oro kamakori. ⁵ Auïtetxi topanereãtaã atamataãka ito mẽkokari. Iotxira, iokaamori aua iuaãtaã. Iteene poenexitiri. Iua auïtetxi topanere apisatoõ aua setxi tirikapi. Setxi Matamatakoni Teoso nakitiakori itxauana ninoa setxi tirikapi.

⁶ Iua auïtetxi topanere apisatoõ ipoa ãtakaãri atoko itxa. Auïtetxi topanere ïtinikata aua koatro Teoso tixine auakani. Ninoa okïtxinoka xãpokaïtotakini. Auana okina ikini ïïtoãna. Itorotaãna aua okina. Iporikiãna apaka aua okina. ⁷ Okïtxinoka xãpokaïtotakiti ãti, ãkiti atoko itxa. Ætipekana kema auïte atoko itxa. Ætipekana aua kiki toõ atoko. Ætipekana kokoi araãkari atoko itxa. ⁸ Ninoa ikininape aua imïkitana seisi pakini. Imïkitana nopini, ipatapi apaka okina aua. Kona itomatana. Ikini pokamarariti, ikini ïkanõkati itxana:

“Erekai. Erekai. Erekai. Teoso Apiananiri pitxaua. Kaposotiireri pitxaua. Ætipirika auakarii. Kitxakapirika auakarii. Uatxa auakarii. Katana apaka pite aua-panika,”

itxana ãtipirika.

⁹ Ninoa okïtxinoka xãpokaïtotakini xipoãtakasaaki, ixikaretarina Teoso paxitiko pirena. Ixikaretarina: “Ikinipoko ikamakiti ate ïkapani erekarinoka. Peerekari iua auïtetxi topanere topãkakari, ãtipirika auapika inakari.” Ninoa xikaretari ikara Teoso ïkapani. ¹⁰ Ninoa vïtxi koatro pakini totiakori xikarauatakasaaki, ikapotoreëkauana ixitimoni iua auïtetxi topanere nopini topãkakari apisatoõ. “Ateosone,” itxana iua ãtipirika auapika inakarimoni. Itakarina isaporïêtane Apiananiri apisatoõ, kotxi Teosonokara ikinimane auïte. Iuasaaki itxana:

¹¹ “Apiananiri, aTeosone pitxaua. Erekai pite, ininiã apakatapitika apaxitinii. Apakatapitika ikinimane sãpiretinii: ‘Peerekai.’ Apakatapitika pite apakapiniri ikini posotiiretxi. Ikara atão, kotxi pite kamari ikinika. Pite kamari ikinika, kotxi pite nirekari pikaminiri. Pite nirekari ikinipoko auini,”

itxana ninoa vïtxi koatro pakini totiakori.

5

Aãtsopa Iapiriãkori Pirena

¹ Iuasaaki natamatari aãtsopa iapirikakori iua auïtetxi topanere nopini topãkakari uakoã. Iuako ikikomonikiriã aua. Iua aãtsopa auari iõka ãkiriko, inopinimoni pakini. Iua aãtsopa aua setxi popitari kãkiti makatamëkakaniri ïkapani. ² Iuasaaki natamatari ãti Teoso nitiri iaxitikiri. Kataparari iua. Itaparasãkireritika itxa:

—Kiripa apakata imaktxakiniri ia popitari? Kiripa posotari ikatamëkiniri ia aãtsopa? —itxa.

³ Itxama, kona auari iaxiti auakari, kona auari itixi auakari, apaka kona auari itixi patapi auakari, iua aãtsopa katamëkakari !auari. Ninoa !iposotari ikatamëkinirina iua aãtsopa. !Iposotarina atamatinirina iua aãtsopa ãki.

⁴ Ininiã iteene nitxiapatata, kotxi iua aãtsopa iapiriãkori katamëkakari !auari. Erekari kamakari !apokaãka ikatamëkiniri ïkapani, atatsopatiniri ïkapani. ⁵ Iuasaaki ninoa totiakori ãti txari notamoni:

—Kona pitxiapatape. Patamata ikiraã. Ækiti atoko inakari iua. Xotaa apika mekanirakori auïte iua. Tavii apika mekaniri iua. Oerekapekari Satanasi poiãori inini. Iua apiata. Ininiã iuanani posotari ikatamëkiniri iua aãtsopa iapiriãkori. Iuanani posotari imaktxakiniri ninoa setxi popitari —itxa iua toti.

⁶ Iuasaaki natamatari soti auïte okakori atoko. Iua itima iua auïtetxi topanere apisatoõ. Ninoa ipi ipi pakini okïtxinoka xãpokaïtotakini, ninoa totiakori pakini ãkitari iua. Setxi iko, setxi oki pakini aua iuamoni. Setxi oki aua iuamoni, kotxi setxi Matamatakoni Teoso nakitiakori aua. Teoso iokanatana ninoa ikini itixitimoni. ⁷ Iua soti auïte atoko inakari sari iua auïtetxi topaneremoni. Imaïkari aãtsopa topaneretxi nopini topãkakari uakoã auakari. Iuako ikikomonikiriã aua. ⁸ Imaïkasaakiri, ninoa koatro okïtxinoka

xāpokaītotakini, ninoa vītxi koatro totiakori pakini patimari ipamakinina soti auīte apisatoō. Ikinikana auari arpa inakori xikari ikaminina ĩkapani. Imakinikana auari kopitipaki oro kamakori. Naia kopitipaki xāpoka koria atoko inakari peeremariri. Ia kamariāro Teoso sākire auiākani sākire iuamoni.

Amaneri Xikariti

⁹ Iuasaaki ninoa xikaretari amaneri xikariti. Ixikaretarina:

“Pitenani apakata papakapiniri iua aātsopa iapiriākori. Pitenani apakata pimakatxakiniri popitari, kotxi pitenanira erekari. Pite okaāka. Piarēkaā piamotaua ate Teoso ĩkapani. Piamotapekaua ikini uākati kākiti sauaki. Ikini āti uāka sākire sākiretakani sauaki piamotapekaua. Ikinika itixiti auakani sauaki piamotapekaua ate.

¹⁰ Pite txīkitakaua ate auītetxiakori aniniua, sasetotxiakori apaka aniniua, Teoso ĩkapani aparīkauatini. Ininiā itixi auakani auīte atxauako ate.”

¹¹ Iuasaaki natamatari itomaneri Teoso nitiriakori. Nikenakotari ninoa sākire. Kaiāopokori ninoa. Seī mio, apikomoni seī mio, apikomoni seī mio itxaāpokatana. ! Apakata ninoa iaōtiko. Ninoa ākitari iua auītetxi topanere, okīt xinoka xāpokaītotakini, totiakori pakini. ¹² Itapasākireritika ixikarauatana. Itxana:

“Soti auīte okaāka kākiti ĩkapani. Ininiā ātipirika apakata iua apakapiniri posotiiretxi, ikinika erekari, imaroretxi, taparātxi pakini. Apakata ikinimane paxitiniri iua. Apakata ikinimane sāpiretiniri iua ereka inini. Apakata ikinimane iuikiniri iua.”

Ikara atoko ninoa xikarauata.

¹³ Ikara eereka nikenakotari ikinika iaxiti auakani, ikinika ĩkorapokoriti auakani, ikinika itixi patapi auakani, ikinika potxoari uiniti nopini auakani, ikinika potxoari uiniti āki auakani pakini xikarauatini. Itxana:

“Ikinika erekari ātipirika aua iua auītetxi topanere topākakarimoni, iua soti auīte pakinimoni. Ikinika ātipirika paxitana. Ikinika ātipirika txari: ‘Peerekana ninoa.’ Ikinika taparātxi ātipirika aua ninoamoni.”

¹⁴ Ininiā ninoa koatro, okīt xinoka xāpokaītotakini txana:

—Ameē.

Iuasaaki ninoa vītxi koatro totiakori patimari pamakini.

—ATEosone pitxaua —itxana iua ātipirika auakarimoni.

6

Soti Auīte Makatxakari Popitari

¹ Natamatari soti auīte makatxakiniri āti popitari. Ikara natamatakasaaki, nikenakotari okīt xinoka xāpokaītotakiti sākire. Isākire ikarokirauatini atoko itxa.

—Uai pinako. Patamata —itxa.

² Iuasaaki natamatari kavaro kasarori. Kiki aua oporikiā. Iua tapotxi aua. Auītetxi saporietane sikaāka iuamoni. Iua sari ikini itixitimoni kākiti auīte ininiua ĩkapani.

Āti Popitari Makatxakiko

³ Eereka soti auīte makatxakari āti popitari aātsopaā, ininiā ipi auape. Iuasaaki nikenakotari ātipekana, okīt xinoka xāpokaītotakiti sākire:

—Uai pinako. Patamata —itxa.

⁴ Ikara eereka natamatari kavaro pōkamarari. Kiki aua oporikiā. Iua kiki sikaāka posotiiretxi neenamtxi ikamini ikini itixitiā, ininiā neenamtxi mauakaniātaā !auari. Itxīkitakari kākiti okakakiniua. Isikaāka iouata mitapoari ineenamauatini ĩkapani.

Āti Popitari Makatxakiko

⁵ Eereka soti auīte makatxakari āti popitari, ininiā ipi āti auape. Iuasaaki ātipekana, okīt xinoka xāpokaītotakiti txari:

—Uai pina. Patamata —itxa.

Ininiã iusaaki natamatari kavaro pomamari. Kavaro nopini topãkakari aua minari iaõtiko iuakoã. ⁶ Eereka nikenakotari äti sãkirauatini okĩtxinoka xãpokaĩtotakini sauaki. Itxa:

—Ipixini kiro triko ìki, äti õti kãkiti parĩka ìkitxikana. Äti, ipixini pakini kiro atarokiri atoko inakari ìki, äti õti kãkiti parĩka ìkitxikana. Iĩtxiã ìki, ovaã ìki pakini poiãopanikako.

Äti Popitari Makatxakiko

⁷ Eereka soti auĩte makatxakari äti popitari, ininiã ipi ipi pakini auape. Iusaaki nikenakotari imapotõkirekiri, okĩtxinoka xãpokaĩtotakiti sãkire. Itxari:

—Uai pina. Patamata —itxa.

⁸ Iusaaki natamatari kavaro posẽtakari. Inopini topãkakari uãka “Ipĩkitxi” inaãka. Äti iua tikini sa. Iua akiritaãka “Maerekani Misiritikoãtaã” inaãka. Isikaãkana posotiiiretxi kaiãopokori itixi auakani okiniua ìkapani, ininiã koatro kãkiti auiniãtaã äti okaãka. Ninoa okana kãkiti neenamatiã, natxiã, amianariã, kaxipiri kaneenamariã pakini.

Äti Popitari Makatxakiko

⁹ Ininiã soti auĩte iuaĩkana makatxakari äti popitari, ininiã ipi ipi äti pakini auape. Iusaaki natamatari Teosomoni sikakori takikoãtaã patapi kãkiti okakoni. Ninoa okaãka Teoso sãkire isãpiretinina xika. Kona itakanaparina isãpiretinina Teoso kamakiti ninoa ìkapani, ininiã ikara xika okaãkana. ¹⁰ Itapasãkireritika akirikatarina Teoso. Itxana:

—Apiananiri, ätipirika erekari kamakarii pite. Atãonoka pisãkire. Kirisaakipa pimisiritari itixi auakani? Kirisaakipa pixikatxitaua ate, kotxi ninoa okaua ate? —itxana.

¹¹ Ininiã mãkatxi kasarori sikaãka ninoamoni. Eereka isãpiretaãkana:

—Hiãtapariko apikomoni. Teoso nirekari apanakini hĩtariakori, iniritariakori okiko hĩte atoko iniko. Hĩtariakori okaãka atoko, Teoso xikatxitai hĩte. Hiãtapariko ikara õti —itxa.

Äti Popitari Makatxakiko

¹² Eereka nitikari soti auĩte makatxakiniri äti popitari, ininiã seisi pakini auape. Iusaakipeka itixi iteene iakeẽkata. Atokatxi mamãka, sako mata pomamari potxi iãko kamakori atoko. Kasiri kamarãka arẽkatxi atoko. ¹³ Iõriki itori iaxiti auakaro irika ìkorapokoritimoni. Amãtiiri ìtima iokatxaãkiti atoko otxa. ¹⁴ Natamatari iaxiti aãtsopa iapirikiniua atoko. Ikinika ixirata mitari, ikinika ipokomiriĩ pakini makatxakaãka. Ätiãtaã itakaãka.

¹⁵ Iusaaki ìkorapokoriti auĩtetxiakori, kãkiti kaposotiirerini, katiirini, sotato auĩteakori, kãkiti katapararini, nitiritxi amotakoni, nitiritxi minakaniua pakini kipataua aarikoã, kai mitari sauaki ixirataã. ¹⁶ Iusaaki itxana ixirata auĩtemoni apaka kai mitarimoni:

—Hĩrikako ate nopini. Hĩkipataua, kotxi topaneretxi nopini topãkakari, soti auĩte pakini nirekari imisiritiniua ate. ¹⁷ Soti auĩte misirikare õti manapi apopeka. Kona kãkiti mĩteenekari ikara misirikaretxi.

7

Sẽto Koarẽta Koatro Mio Teoso Nitiriakori Itixi Auakani

¹ Eereka natamatari Teoso nitiri iaxitikiri timini atokatxi pokĩkinimoni, äti atokatxi ereẽkokinimoni, äti atokatxi kimapore sanaremoni, äti atokatxi kimapore kikomoni. Ininiã ipi ipi pakinipe ninoa. Ninoa mãkari ìtima ipi ipi pakini itixi auakari ìtimati. Ininiã ìtima kona inapaika itixiã. Kona kãuaãriã ìnapaika ìtima. Kona aaminaã ìnapaika ìtima. ² Natapari äti Teoso nitiri iaxitikiri inaãpotini atokatxi pokĩkinimoni. Teoso ätipirika auakari takaõtxikare aua iuamoni. Itapasãkireritika akiritana ninoa ipi ipi pakini Teoso nitiriakori. Ninoa parĩka itixi, potxoari uiniti pakini imisiritinina. ³ Iua Teoso takaõtxikare auakiti txari ninoamoni:

—Uatxa kona himisiritapiri itixi, potxoari uiniti, aamina pakini. Himisiritinina apisa, ate takari Teoso takaõtxikare iniritariakori itixi auakani teẽtaã.

⁴ Eereka nimarotari Teoso takaõtxikare apakapakani. Itakaõtxikaãkana sẽto koarẽta koatro mio kãkiti. Ikini uãka Isaeo tixinikini takaõtxikaãka.

⁵ Tosi mio Xotaa apika mekani takaõtxikaãka.

Tosi mio Hopē apika mekani takaōtxikaāka.
 Tosi mio Katxi apika mekani takaōtxikaāka.
⁶Tosi mio Asee apika mekani takaōtxikaāka.
 Tosi mio Natarii apika mekani takaōtxikaāka.
 Tosi mio Manasee apika mekani takaōtxikaāka.
⁷Tosi mio Simiāo apika mekani takaōtxikaāka.
 Tosi mio Arevii apika mekani takaōtxikaāka.
 Tosi mio Isakaa apika mekani takaōtxikaāka.
⁸Tosi mio Seporō apika mekani takaōtxikaāka.
 Tosi mio Xosee apika mekani takaōtxikaāka.
 Tosi mio Pēxamiī apika mekani takaōtxikaāka.

Itomaneri Kākiti Teoso Apisatoō

⁹ Ikara eereka natamatari itomaneri kākiti apotiitakaniua. !Apakata kākiti iaōtiniri ikinikana. Aua kākiti ikini itixitikini, kākiti ikini sereti. Aua ikini uāka sākire sākire-takani. Ikinikana ninoa timanāta Apiananiri apisatoō, soti auīte pakini apisatoō. Ninoa māka kasarori. Aātape aua iuakoāna. ¹⁰ Itapasākireritika itxana:

—ATEosone topāka auītetxi topanere nopini. Iuara, soti auīte pakini makatxakapekari amaerekani.

¹¹ Iuasaaki ikinika Teoso nitiriakori iaxiti auakani tima. Ninoa ākitana auītetxi topanere, totiakori, ninoa ipi ipi okītixinoka xāpokaītotakini pakini. Ikapotoreēkauana itoōna xitimoni, auītetxi topanere apisatoō. “Ateosone pite,” itxana Teosomoni.

¹² Ixipoātana Teosomoni:

—Ameē. Ātipirika ikinimane sāpiretai ereka pinini. Peerekai. Kimarorei. Erekarī pikamakiti ate īkapani. Ikinimane paxitai. Kaposotiirei. Pataparai. Ātipirika ikara atoko atxai. Ameē.

¹³ Ininiā eereka ninoa totiakori āti pimaāno nota:

—Kiripa ninoa kākiti mākatxi kasarori ieretakakani? Namonipa inana ninoa? —itxa iua.

¹⁴ Ininiā nota txari iua:

—Pitera imarotari.

Ininiā iua txano:

—Ninoa iteene misiritaākapeka. Uatxa ixipope ninoa misiritiko. Soti auīte makatxakapekari imaerekanina. Ininiā imākana soti auīte arēkaā arokakori atoko itxauana. Uatxa kasarori imākana, kotxi itxiko !lauari. Soti auīte makatxakapekari kākiti maerekani ipīkasaaki, ininiā mākatxi kasarori atoko itxa ninoa ākixinire.

¹⁵ —Ininiā ninoa aua Teoso topanere apisatoō. Imisākiretiko aikoti āki iparīkauatana Teoso īkapani ikiniōtika pokamara, īkanōka pakini. Ininiā iua auītetxi topanere nopini topākakari auapikako ninoa sauaki. ¹⁶ Ninoa kona natxitaika. Kona iposonataikana. Atokatxi kona arikana ninoa. Kona kapatakari kona arikana. ¹⁷ Kotxi soti auīte auītetxi topanereātaā auakari nīkatanako ninoa. Iua anikana ninoa sōtoārimoni. Iuaā auakari sōtoāri iātakani ātipirika auapikako. Teoso makatxakariko ikinika iātsaāna. ! Itxiapataikana.

8

Imapotōkire Popitari Makatxakiko

¹ Imapotōkire popitari imakatxakasaaki, ikinipoko tsorīkaxitita Teoso tixineē. Ikara atoko ipixini oara. ² Eereka natamatana setxi Teoso nitiriakori, iua apisatoō timakani. Isikaākana setxi xikari kamiko trōpeta inakori.

³ Eereka āti Teoso nitiri apoka. Itima Teosomoni sikakori takikoātaā. Kamariāro arikiko koanati oro kamakori iuamoni aua. Kamariāro ito sikaāka iuamoni, Teosomoni isikini īkapani, ikinika Teoso nakitiakori amanaākiti sākiretxitikata. Ininiā arikari iua kamariāro Teosomoni sikakori takikoātaā nopini. Oro kamakori iua Teosomoni sikakori takikoātaā auītetxi topanere apisatoō. ⁴ Ininiā iuakoā kamariāro txiā, Teoso

nakitiakori amanaãkiti sãkiretxitikata kanïka Teoso apisatoõ. ⁵ Ininiã eereka iua Teoso nitiri kosekari okoana. Ixãpokakari xaminaminiki mẽkorïkakariã, Teosomoni sikakori takikoãtaã nopini auakariã. Eereka okari itiximoni. Iuasaakipeka aua karokirauari, mẽkokari pakini. Apaka iuasaaki itixi iakeëkata.

Koatro Trõpeteta Pirena

⁶ Ininiã ninoa setxi Teoso nitiriakori setxi trõpeteta auakini iposope itrõpetane ixõkinina ïkapani.

⁷ Ininiã ninoa Teoso nitiriakori ãti xikarauata itrõpetaneë. Iuasaaki katxïkareri kai soro atoko inakari, apaka xaminaminiki mẽkorïkakari arëkatxiã koketakori okaãka itiximoni. Ikara xika apanakini aamina itixi auakari arika, ininiã ipi ãti pakini aamina auiniãtaã ãtika arikaãka. Ikinika katsotati arika apaka.

⁸ Eereka ãti Teoso nitiri xikarauata itrõpetaneë. Ininiã ixirata auïte atoko inakari arikatxikata okaãka potxoari uinitimoni. Ininiã ipixini potxoari uiniti arëkatxi itxapekaua. ⁹ Ininiã apanakini potxoari uiniti ãki auakani ipïpe, ininiã ipi ãti pakini potxoari uiniti auakani auiniãtaã ãtika ipïpe. Iuasaaki apanakini maporoni apaka xipokaãka, ininiã ipi ãti maporo auiniãtaã ãtoka xipokaãka.

¹⁰ Eereka ãti Teoso nitiri xikarauata itrõpetaneë, ininiã ipi ãti pakini initiriakori xikarauatape. Iuasaaki iõriki mitari iaxitikero katxaãkata. Otirika tirïkapi atoko. Oïrika ipixini uini nopini. Oïrika ipixini sõtoãri nopini apaka. ¹¹ Iõriki uãka, “Kapixiro,” otxaua. Ininiã ipixini ãparaã kapixiã. Ipi ãti pakini sõtoãri auiniãtaã, ãtinoka sõtoãri kapixiã. Ito kãkiti iãtari iua ãparaã, eereka ikoriãna, kotxi kapixiãri ãparaã.

¹² Ininiã ãti Teoso nitiri xikarauata itrõpetaneë, ininiã ipi ipi pakini initiriakori xikarauatape. Iuasaaki atokatxi ponikare, kasiri, iõriki pakini kona iteene ïponikaika. Imamãkapeka. Ininiãkara pokamara ipi ipi pakini oara atokatxi ïponikaika. Iua atokotxikana ïkanõka ipi ipi pakini oara kasiri, iõriki pakini ïponikaika. ¹³ Ininiã eereka nitikarauatakasaaki, nikenakotari ãti Teoso nitiri sãkire. Iua araaãpota Teoso tixine. Itapasãkireritika itxari:

—Erepaniko. Erepaniko. Erepaniko itixi auakanii. Auapanika apikomoni ipi, ãti pakini trõpeteta Teoso nitiriakori xõkini ïkapani.

9

Ãti Trõpeteta Xõkiko

¹ Ininiã ãti Teoso nitiri xikarauata itrõpetaneë. Iuasaaki nitikari ãto iõriki iaxitikero katxakini itiximoni. Iõrikimoni osikaãka xavi aariko mamapotõkire irikoti tore ïkapani.

² Ininiã iõriki atoko inakari mataakari iua aariko. Eereka katxiãri kaiãopoko pokïka. Katxiãri tokori arikikosaaki atoko itxa. Eereka iaxiti, atokatxi pakini piãka itxiã xika.

³ Iposo atoko txïtxiri atoko inakari pokïka itxiã. Posotiiretxi isiãkana, ininiã kaxipiro itixi auakari posotiire atoko aua txïtxirimoni, kãkiti ioãkini ïkapani. ⁴ Ipaniãtaãkana katsotati imokakanina, apaka takari, aamina pakini imokakanina. Ipaniãtaãkana imisiritinina Teoso takaõtxikare iteëtaã mauakini. ⁵ Kona isikaãkana posotiiretxi kãkiti okinina ïkapani. Sïko kasiritinanira ninoa paniãtaãka imisiritinina ninoa. Imisiritarina kaxipiro ioãkini atoko. ⁶ Iuasaaki kãkiti nirekariko ipinini. Itxama, kona iposotarina ikoriinina. Initarina ipïkitxi, txamari iuasaaki ipïkitxi mitekapeka.

⁷ Iua txïtxiri kavaro atoko itxana. Kavaro neenamatchi kamakani atoko itxana. Ikiiãna aua saporieãta atoko oro kamakori. Itoõna kãkiti toõ atoko itxana. ⁸ Ninoa iãko sito iãko atoko itxana. Itsiriãna ãkiti tsiriã atoko itxana. ⁹ Itorota ipatinina koana metao kamakori atoko. Imïkitana ene kavaro itomaneri miteëkani ene atoko. Mitekaï ene atoko itxana.

¹⁰ Ninoa xipi kaxipiro xipi atoko itxana. Oko aua ixipiãna. Ninoa posotari kamatsiitiniri kãkiti sïko kasiriti. ¹¹ Ninoa auïte aua. Iua Satanasi nitiri. Mitxi aariko mamapotõkire irikoti ãki auakari iua. Xoteo sãkireë iua uãka Apatõ itxaua. Kreko sãkireë iua uãka Aporioõ itxaua. Popïkari sãkireë “Ikinipoko Xipokakari,” itxaua.

¹² ãti misirikaretxi napapeka. Txama auapanikako apikomoni ipi misirikaretxi.

Āti Trōpeta Xōkiko

¹³ Āti Teoso nitiri xikarauata itrōpetaneē. Iuasaaki seisi trōpeta xōkapeēkaika. Teosomoni sikakori takikoātaā oro kamakori aua ipi ipi pakini iko. Ikara Teoso apisatoō. Nikenakotari iko takote auakari sākirauatini. ¹⁴ Ininiā iua txari Teoso nitiri iua trōpetaā xikarauatakari:

—Pisikakanako ipi ipi pakini Teoso nitiriakori iaxirikakoni Eoparatxi inakori uiniti auakani.

¹⁵ Naia ipi, ipi pakini Teoso nitiriakori iposopekana ia anokanani, ia kasiriti, ia ōti, ia oara manapi ĩkapani. Ininiā ninoa sikakaāka kaiāopokori kākiti okinina ĩkapani. Ininiā ipi āti pakini kākiti auiniātaā auiritaāka ātika okinina. ¹⁶ Āti sāpiretano ninoa sotatone kavaro nopini auakani tosētosi mirāo aua. Kaiāopokori.

¹⁷ Natamatari ninoa sotatoakori kavaro nopini nitaponemoni. Natamatakasaakina ia atoko ninoa. Itorotana koana metao kamakori auana. Apanakini torota koana pōkamarari xamina tirinakari atoko itxa. Apanakini poporeri. Apanakini posētakari ēxōpiri atoko. Ikiina ākiti kii atoko. Inamaāna ipokīka xamina tirika, katxiāri, ēxōpiri pakini. ¹⁸ Ikara xamina tirinakari, ikara katxiāri, ikara ēxōpiri pakini inamaāna pokīkakari, okari kaiāopokori kākiti itixi auakani. Ininiā ipi āti pakini kākiti auiniātaā ninoa okari ātika. ¹⁹ Kavaro posotiire inamaā, ixipiā pakini aua. Ninoa xipi imini atoko itxa. Ixipiāna aua ito kiiri. Ninoa kii misiritari kākiti.

²⁰ Ininiā itomane kākiti koriā ia misirikari xika. Iuaritika kākiti mokakoni maerekati kamakani linirekari itakanapinirina imaerekani. Ninoa kapotoreēkapanikaua Satanasi nitiriakorimoni. Ikamapanikarina ninoa amanaākiti. Iteosonetari aamina kamakori, oro kamakori, pirata kamakori, pirōsi kamakori, kai kamakori pakini. Ninoa teosone kona posotari atamarauatini. Kona iposotarina ikenakorauatini. Kona iposotarina itīpokotinina. ²¹ Ninoa kākiti okapanikari apanakini. Ikamapanikarina miīti parīka. Isirīkapanikana apanakinikata. Iitirīkapanikarina apanakini kākiti tii. Kona inirekarina maerekati itakanapinina.

10

Aātsopa Axapitiri Iapirikakori

¹ Iuasaaki natamatari Teoso nitiri iaxitikiri katxakini ĩkorapokoritimoni. Kataparari iua. Iua katxiāri iaxitikiri āki. Katxiāri imāka atoko itxa. Kisi ikii nopini aua. Itoō atokatxi atoko itxa. Itapike aātsota tirinakari atoko itxa. ² Imaīkanātari aātsopa iapirikakori axapitiri. Iuakoā aātsopa ikatamēka. Itakari ikiti ikikomnikiri potxoari uiniti nopini. Isanaremonikiri ikiti itakari imiriī. ³ Akiripoakata ākiti atoko. Iuasaaki setxi iokaamori kenakotaāka. ⁴ Iuasaaki niōkatsopaaritari ninoa setxi iokaamori sākire. Txamari nikenakotari āti iaxitikiri sākire. Itxano:

—Kona piōkatsopatapiri ninoa setxi iokaamori sākire —itxa iaxitikiri.

Aātsopa Axapitiri Nikiko

⁵ Iuasaaki Teoso nitiri aua āti ikiti imiriī. Potxoari uiniti nopini āti ikiti aua. Iua ōtanōkari iuako iaxiti. ⁶ Iuasaaki itxa:

—Uatxa nisāpiretakiti Teoso ātipirika auakari sākire. Ikamari ikinika iaxiti, iaxiti auakani pakini. Ikamari ikinika ĩkorapokoriti, ĩkorapokoriti auakani pakini. Ikamari potxoari uiniti, ikinika iua āki auakani pakini. Teoso misiritinina maerekati kamakani !okananiikari apokini. ⁷ Apikomoni āti trōpeta xikarauatapanika. Iuasaaki kitxakapirīka Teoso kipatakiti oerekaākako. Teoso sāpiretakiti iniritiakori ĩkorapokoritimoni, isākire sāpiretanimoni paītiki oerekaākako —itxa Teoso nitiri.

⁸ Eereka iuaīkana nikenakotari iaxitikiri sākirauatini:

—Pisa. Papariko aātsopa iapirikakori, Teoso nitiri uakoā auakari. Iua āti ikiti imiriī, āti ikiti potxoari uiniti pakini aua kititakari.

⁹ Ininiā nisa iuamoni, ininiā nitxari iua:

—Pisikano ere aātsopa iapirikakari.

Iuasaaki itxano:

—Papakapariko, nika pitxari ia aätsopa. Pitikakoã kapixiriko ia pinikakiti, iuaritika pinamaã potxoariko. Mapa atoko itxako —itxano nota.

¹⁰ Ininiã nimaïkari ïkora aätsopa, nika nitxari. Ninamaã potxoari. Mapa atoko itxa. Txamari nitikakoã kapixiri iua aätsopa ninikakiti. ¹¹ Iposo atoko isäpiretano:

—Iuaïkana pisäpiretariko apikomoni Teoso säkire, kaiäopokori kãkitimoni, kaiäopokori äti uäkamoni, kaiäopokori äti uäka säkire säkiretakanimoni, kaiäopokori auïtetxiakorimoni pakini pisäpiretariko nisäkire —itxano.

11

Ipi Teoso Säkire Säpiretakani

¹ Aäke niaörauati ïkapani nisikaäka. Iuasaaki Teoso nitiri txano:

—Pisa. Piaötariko Teoso misäkiretiko aikoti. Piaötariko Teosomoni sikakori takikoãtaã. Piaötana Teoso misäkiretakani iuaã auakani. ² Kona piaötapiri Teoso misäkiretiko aikoti pirikere, kotxi Xoteo minakaniua apotiitiniätaãua iuaã. Iuaã ninoa ïkapani. Ninoa misiritariko Teoso sitatxine koarëta toisi kasiriti. Ikara Teoso sitatxine, Xerosareë inakori. ³ Nisikaposotiiretanako ipi kiki. Teoso säkire säpiretakani ninoa. Ninoa ieretakariko sako mata. (Sako mata kãkiti ieretakasaaki oerekari imatinaniuatini.) Ininiã mio tosëtosì sesëta öti pakini ninoa säpiretariko nisäkire.

⁴ Ninoa ipi oriva mina atoko itxana. Apaka ipi tirikapi topãkini atoko itxana. Ikini itixiti auakani auïte apisatoö, Teoso apisatoö ninoa aua. ⁵ Kãkiti nirekasaakiri imisiritinina ninoa, iuasaaki xamina tirinakari pokïka inamaãna. Ininiã iuasaaki imokaiakarini xipope. Kãkiti nirekasaakiri imisiritinina, ikara atoko itxa okikona. ⁶ Teoso säkire isäpiretakasaakina, iposotarina iaxiti itotini. Ininiã iuasaaki äparaã kona ikipaika ïkorapokoriti. Ninoa posotari äparaã arëkatxi inïkitakini. Iposotarina itxïkitakiniri ikini sereti maerekati apokini ïkorapokoriti auakanimoni. Inirekasaakina, ninoa posotari ikara ikinika ikaminina.

⁷ Teoso säkire isäpiretinina xipoka atoko, monökori aariko mamapotökire irikoti äki potoriäkari pokïka. Iuasaaki iua kamari neenamatchi ninoa ipi Teoso säkire säpiretakanikata. Eereka iua okapena ninoa. ⁸ Ininiã ninoa ïto sirikako kimaporiätaã, mitari sitatxitiã. Iua sitatxitiã Apiananiri tokakitaäka aamina ïpiriämitakari nopini. Iua sitatxi akiriuaäkataäka Sotoma, Exito pakini, kotxi Sotoma, Exito pakini atoko itxa Xerosareë. ⁹ Ininiã iuaã ikini kãkiti, ikini inirimane, ikinimane äti uäka säkire säkiretakani, ikini äti uäka atamatanako ninoa ïto kimaporiätaã. Iuaã ikaikotanako ipi öti, äti öti, ipixini öti pakini. Kãkiti kona auiritari ikatikona. ¹⁰ Ininiã ikini kãkiti atamatariko ninoa koriäkani ïto. Ininiäkara ikinimane enenïkako. Ninoa kamari kiiniri. Ninoa iokanatariko isikakitina apanakinimoni ipoxokoniuatini ïkapani. Ninoa kamariko ikara atoko inakari, kotxi ninoamoni naia ipi Teoso säkire säpiretakani misiritana ninoa. Ininiã ninoa enenïka, kotxi Teoso säkire säpiretakani koriäpeka.

¹¹ Iuaritika ipi öti, äti öti, ipixini öti pakini napaka atoko, Teoso txïkitakana ninoa iuaïkana auäki ininina ïkapani. Ökitakauana. Iuasaaki kãkiti atamatana, ininiã ipïkarauatana. ¹² Ikara eereka ninoa ipi Teoso säkire säpiretakani kenakotari iaxitikiri säkirauatini:

—Uaimoni hina.

Ininiã ninoa kanïka katxiäriã Teoso tixinemoni. Ninoa mokaiakariakori itikana ninoa kanïkaäpotini Teoso tixinemoni. ¹³ Iuasaakipeka itixi iteene iakeëkata. Ininiã iua sitatxitiã kaiäopokori aapokotxi irika. Tesi aapokotxi auiniätaã ätika irika. Iuasaaki setxi mio kãkiti ipina. Kãkiti auapanika inakani pïkarauata. Iuasaaki itxana:

—Teoso iaxiti auakari apiatakari itxaua —itxana.

¹⁴ ïkora misirikaretxi xipopeka. Iuasaaki ipi misirikaretxi apiari napapeka. Iuaritika erepaniko, kotxi païtiki äti misirikaretxi apiari apokapanikako.

Tröpeta Imapotökirekiri Xökiko

¹⁵ Iuasaaki Teoso nitiri mapotökirekiri xikarauata itröpetaneë. Itomane iaxiti auakani iteene akiritari:

—Ikini itixiti auakani auíte itxapekaua aáuíte Teoso, Kristo pakini. Ātipirika iua ikinimane auíte itxauako —itxana.

¹⁶ Iuasaaki vītxi koatro totiakori Teoso topākiniātaā apisatoō topākakani pamaka Teoso apisatoō. Itxana:

¹⁷ “Erekapitikari ikinipoko pikamakiti. Apiananiri pitxaua. Kaposotiirei pite. Uatxa pite auapitika. Pite kitxakapirīka aua. Katana ātipirika pauapika. Erekapitikai, kotxi kaposotiirei, ininiā ātipirika ate auíte pitxaua.

¹⁸ Kākiti ikini itixiti auakani omanākarauata. Uatxa piteka omanākarauatini manapi apope. Uatxa apokapeka ipīkani misiritiko mereīko ōti. Pinitiriakori, pisākire sāpiretakani, apaka pinakitiakori pite paxitakani pakini ĩkitxitiko ōti apokapeka. Ikinimane kākiti poiāorini, kākiti kaposotiirerini pakini apakapariko ikamakitina ĩki. Iuasaaki pixipokariko ĩkorapokoriti xipokakani,” itxana.

¹⁹ Eereka natamatari iuaā Teoso tixineē imisākiretiko aikoti tore imataakaāka. Iua aiko āki natamatari Teoso kaixane, iua apokiniātaā. Iuasaaki natamatari ito mēkokari. Nikenakotari ito okaratxirari, ito iokaamori pakini. Itixi iakeēkata. Ito āparaā kai soro katxīkareri atoko katxaka.

12

Imini Mitapoari, Sito Pakini

¹ Eereka nitaponeē nitikoka. “Kipa atxiīti?” nitxa nākixinireē. “Natokopa itxa Teoso oerekiniri kākiti?” Kotxi sito tokiā Teoso tixine. Atokatxi iotximere iakirokaro oa omāka atoko inakari. Kasiri aua okiti patapi. Okiiā aua auītetxi saporietane, tosi iōriki kamakori. ² Oa kamixiro. Oa akiripoakata oātatsiirauatini xika, kotxi kaiamapeka amarini oāuākitakini.

³ Eereka iuaīkana nitikoka, kotxi imini mitapoari tokiā Teoso tixineē. Pōkamarari. Iua setxi ikii aua. Aua tesi iko. Ikininape ikii aua auītetxi saporietane. ⁴ Ixipiā ikosekari kaiāopokori iōriki iaxitikero, uai ixiti oka itxaro iōriki. Itima oa sito apisatoō, kotxi paītiki amarini oāuākitaka. Inirekari iixirākiniri amarini, amarini auakasaaki. ⁵ Eereka oa sito auākitakari amarini, kiki. Oa sito ākiri aneēkasaaki ikini itixiti auakani auíte itxauako. Auītetxi kataparari itxauako iua amarini. Auakasaaki, imini lixirākari amarini. Patimari maīkiko iua amarini. Teoso auinimoni anikaāka amarini. Iuaātaā Teoso topākanāta auītetxi itopanere nopini. ⁶ Oa sito miteka āparaā makipakaniātaā. Teoso oerekatapekari iuaā okaikotini ĩkapani. Iuaā oinīkataākako mio tosētosi sesēta ōti. Ipi anokanani, āti anokanani ipixini pakini itxa.

⁷ Eereka aua neenamati Teoso tixine. Teoso nitiri Mikeo inakori apanakinikata naiatari imini mitapoari initiriakorikata. Imini initiriakori pakini neenamauata apaka. ⁸ Teoso nitiriakori tapara apiata, ininiā imini initiriakorikata ! auiritaākaika Teoso tixine ikaikotinina. ⁹ Iua imini mitapoari iokanataāka maparamoni. Iua imini kitxakapirīkaripekara. Iua Txiapo inakori. Iua Satanasi inakori. Iua misirienetari kākiti ikini itixiti auakani. Maparamoni iokanatikosaaki, iua, initiriakori pakini okaākana uai ĩkorapokoritimoni.

¹⁰ Eereka nikenakotari Teoso tixinekiri sākire kataparakieneri:

—Kākiti maerekani makatxakiko apokapeka uatxa. Teoso makatxakari kākiti maerekani. Uatxa Kristo posotiire oerekaāka. Uatxa oerekari ikinimane auíte ininiua. Teoso mereēkiti ikinimane auíte itxaua uatxa, kotxi aītariakori kamapiretakari iokanatapeēkaika mapara. !Ikaikotaika Teoso tixine. Mitxi ikamapiretari aītariakori Teoso apisatoō. Pokamara, ĩkanōka ikamapiretana. ¹¹ Aītariakori iokanatapekari Satanasi isini. Ninoa posotari iokanatiniri Satanasi, kotxi Teoso Soti Auītene ipina ninoa ĩkapani. Iarēka xiketa ninoa ĩkapani. Ninoa posotari Satanasi iokanatinina, kotxi ninoa sāpiretari atāo inakari Teoso sākire. Ninoa iposope okikona Teoso ĩkapani. ¹² Hīte Teoso tixine auakani hīpoxokoniuatako. Txamari hīte itixi auakani, potxoari uiniti auakani, erepaniko, kotxi Satanasi apopeka ereē hīte sauaki. Iua iteene naiataua, kotxi imarotari paītiki Teoso ! auiritaikari iua maerekati apikomoni ikamini —itxa iua Teoso tixinekiri sāpirena.

¹³ Uai itiximoni okikosaaki, imini mitapoari asikatikinitaro oa sito amarini auāki-takakaro okiniro ĩkapani. ¹⁴ Oa osikaāka ipi mĩkitatxi kokoi mitari mĩkita, oāraini ĩkapani. Oa araā āparaā makipakanimoni. Teoso oerekinimoni osa. Iuaā Teoso nĩkataro oa ipi anokanani, āti anokanani, ipixini pakini. Iuaā imini mitapoari !iposotari oamoni apokini. ¹⁵ Oa araākasaaki, imini mitapoari koporikaātari āparaā inamaākiri oa tikini. Uini atoko itxĩkitakari āparaā, oa sito axāpoātini ĩkapani. ¹⁶ Kipatxi !auritari āparaā sini oamoni. Ixoreka. Ixorekasaaki, ikinika āparaā imini namaākiri kipatxi āki isa. ¹⁷ Ininiā imini iteene omanataro oa sito. Ininiā asikatikinitana apanakini oa anaakori inaiatinina ĩkapani. Kākiti Teoso paniātakiti kamakani oa anaakori itxauana. Kākiti Xesosi Kristo sākire auīākani oa anaakori itxauana.

13

Monōkori Potxoari Uiniti Pokīkaātakari

¹ Ininiā nitaponeē nitima ikipatxite nopini. Iuaā nitikari monōkori potxoari uiniti pokīkaātini, kanīkiīta itxa. Iuamoni auari iko tesi pakini. Apaka ikii setxi aua. Ikinika iko aua auītetxi saporietane. Ikini ikii aua uākatxi Teoso misākirepiretakari. ² Iua monōkori nitikakiti ākiti kaiōkari atoko itxa iito. Ikiti oso kiti atoko itxa. Inama ākiti nama atoko itxa. Iua imini mitapoari sikari iposotiire maerekati, iua potxoari uinitikirimoni. Ininiā iua auītetxi itxaua. Imini auītetxi ininiua atoko itxa. Imini txĩkitakari iua potxoari uinitikiri sākire kaposotiire inini, isākire kākiti auikini ĩkapani. ³ Nota atamataro ikiiniri. Ikii āti ipīpe ikaro mitari xika. Eereka ikaro tximōka. Iuaīkana auāki itxa ikii ipinakari. Kākiti ikini itixitikini atamatakasaakiri, itsorīkaātana. Ininiā auikarina isākire. Ikamarina iua nireēkiti. ⁴ Ikinimane auikari imini mitapoari sākire. Iteosonetarina iua, kotxi iua sikari iposotiire iua potxoari uinitikirimoni. Apaka ninoa auikari iua potxoari uinitikiri sākire. Ninoa teosonetari iua apaka. Ninoa sākire:

—Āti kaposotiireri potxoari uiniti pokīkaātakari atoko inakari !auari. Kākiti liposotari inaiatiniri iua —itxana.

⁵ Iua potxoari uinitikiri auiritaāka isāpiretiniri maerekati sākiretxiti. Imisākirepiretari Teoso. Auiritaāka auītetxi ininiua koarēta toisi pakini kasiriti. ⁶ Iua misākirepiretari Teoso. Imisākirepiretari Teoso uāka. Imisākirepiretari Teoso auiniātaā. Imisākirepiretari Teoso tixine auakani. ⁷ Iua auiritaāka inaiatiniri kākiti Teoso nakitiakori. Apaka auiritaāka ninoa imaīkini. Auiritaāka kākiti ikini uākatu auīte ininiua, ikini itixiti auakani auīte ininiua, ikini kākiti sākire sākiretakani auīte ininiua. Ikinimane auītetari iua maerekati kamakari. ⁸ Ikini itixiti auakani, Teoso nakitiakori minakanuia, auikariko iua potxoari uiniti pokīkaātakari sākire, kotxi iteosonetarina iua. Itixi kamiko apisapanika ninoa uāka !iōkataāka Soti Auīte okakori aātsopateē. Iua aātsopaā auauākatakani auapikako Teosokata mapīkaninoka ininina.

⁹ Hīte, ia atatsopatakani kakenakokii, ininiā hīkenakotariko nisākire. ¹⁰ Teoso nirekiniāri kateia āki pitakiko, ininiā erekapitikari kateia āki pauini. Teoso nirekiniāri pokiko iouata mitariā, erekapitikari pokiko. Ininiā pokaākako iouata mitariā. Ininiā hīte Teoso nakiti inakanuia himīteenekariko himisiritiko. Kona hītakanapapiri Teoso kimapore. Ātipirika hīkamariko Teoso nirekakiti.

Monōkori Itixiākiri

¹¹ Eereka nota itikari āti monōkori. Itixiā ipokīka. Aua ipi iko. Soti auīte ākiri iko atoko itxa, iuaritika isākirauata imini sākire atokokana. ¹² Potxoari uiniti pokīkaātakari nitiri itxaua iua itixiā pokīkakari. Potxoari uinitikiri sikaposotiiretari iua, ininiā isari ikini itixitimoni. Itxĩkitakana ikinimane teosonetiniri potxoari uinitikiri. Iua potxoari uinitikiri mitxi mita karori, eereka ikaro tximōka. ¹³ Iua itixiā pokīkakari kamari posotiiretxi mitxi mimarotakoti. Ipaniātari xamina tirinakari iaxiti auakari ĩkorapokoriti apokini ikinimane atamatiniri ĩkapani. ¹⁴ Iua potxoari uinitikiri auiritari itixiākiri kaminiri posotiiretxi iua ĩkapani. Posotiiretxi xika itixiākiri misirienetari ikinimane itixiā auakani. Itxĩkitakari kākiti kaminiri potxoari uinitikiri iito atoko inakari kai kamakori. Ikara atoko ipaxitarina potxoari uinitikiri, kotxi ikarotaāka iouata mitariā,

iuaritika iuaĩkana auapanika ikii. ¹⁵ Itixiã pokĩkakari auiritaãka itxĩkitakiniri potxoari uiniti pokĩkaãtakari atoko inakari kai kamakori kosekasinaniretiniua, ininiã iua kai kamakori posotari isãkirauatini kãkitikata. Ipaniãtari kãkiti okiko imanirekakanisaakiri iteosonetiniri iua. ¹⁶ Itixiã pokĩkakari paniãtari ikinimane kãkiti apakapiniri Satanasi takaõtxikare iuakoãna ikikomoni, minakaniã iteëtaãna. Ipaniãtari ikinimane kãkiti auĩtetxi inakaniua, auĩtetxi minakaniua, katiini, matiini, nitiritxi, nitiritxi minakaniua pakini, apakapiniri Satanasi takaõtxikare. ¹⁷ Kãkiti iua takaõtxikari mauakiniri ! auiritaãka iamotiitinina. !Auiritaãkana ivëtxirauatinina. Iua takaõtxikari potxoari uinitikiri uãka. Iuãka mauakanisaaki, aua nómero iua nakiti.

¹⁸ Kimarore hĩtxako, ikara himarotini ĩkapani. Kimarore hininiã himarotari potxoari uinitikiri nomerone kiki uãka itxa. Nómero 666.

14

Soti Auĩte Sëto Koarëta Koatro Mio Kãkitikata

¹ Eereka nionakaãta nitaponeë. Natamatari Soti Auĩte. Ôtanoxiratari nopini auanãta. Ixirata uãka Sião inaãka. Kãkiti sëto koarëta koatro mio pakini aua iuakata. Kaiãopokori kãkiti. Iteëtaãna Soti Auĩte iri uãka iõkatsopatapeëkaika. ² Eereka nikenakotari ninoa xikarauatini. Itorõkani ene atoko itxa, kotxi ama eneeneri. Ikarokirauatini ene atoko itxa ninoa xikare. Viorão ene atoko itxa iua xikari ene. ³ Ninoa kãkiti sëto koarëta koatro mio pakini tima auĩtetxi topanere apisatoõ, okĩtxinoka xãpokaĩtotakini ipi ipi pakini apisatoõ. Totiakori vĩtxi koatro pakini apisatoõ apaka itimana. Ninoa sëto koarëta koatro mio xikaretari xikari amaneri. Apanakini !imaĩkari iua xikari amaneri. Ninoa sëto koarëta koatro mio ĩkorapokoriti Teoso amotakini, ninoanoka posotari ixikaretiniri iua amaneri xikariti. ⁴ Ninoa kiki !isirĩkana sitokata. !Auiritarina ĩtona kaminiri maerekati. Soti Auĩte sinimoni ninoa apaka sa. ĩkorapokoriti auakasaakina, Teoso amotana ninoa. Ninoa merepanika sikaãka Teosomoni, Teoso Soti Auĩtene pakinimoni. ⁵ !Ikamarina maxikatĩka isãkirena. Atão inakaranoka isãpiretana. !Ikerokarina isãkirena Teoso iauĩtena apisatoõ.

Ipi Āti Pakini Teoso Nitiri Sãkire

⁶ Eereka nitikari Teoso nitiri araaãpotini iaxiti itanoxiti. Iua sãpiretari Teoso iokanapirena erekari kãkitimoni ikini itixiti auakanimoni. Iua iokanapirenatxi kona xipoka. Isãpiretari Teoso iokanapirena erekari ikini uãkatimoni. Āti uãka sãkire ipinimoni. Āti uãka sãkire ipinimoni. Itxaãpota, itixi auakani sãkire, iuaritika isãpiretari Teoso iokanapirena ikini uãkatimoni. ⁷ Itaparasãkireritika itxari:

—Hĩpĩkariko Teoso. Hĩsãpiretariko, iua Apiananiri ininiua. Apokapeka kãkiti maerekati kamakani misiritiko õti. Hĩteosonetariko Teoso, kotxi iua kamari iaxiti, ĩkoraxiti, potxoari uiniti, sõtoãri pakini —itxa iua Teoso nitiri araãkari sãkire.

⁸ Iua sãkirauataka atoko, āti Teoso nitiri txari:

—Paparõnia sitatxiti xipokapeka. Iuaã auakani kaposotiirerini, iuaritika ixipokapena. Paparõnia sitatxiti auakani paniãtari imakinika itixi auakani maerekati ikaminina, maerekati ĩtotxi nireëkiti. Ininiã ninoa kamari maerekati Paparõnia auakani paniãtakiti.

⁹ Ninoa Teoso nitiriakori ipi sãkirauataka atoko, āti Teoso nitiri txari itaparasãkireritika:

—Teoso misiritanako kãkiti potxoari uinitikiri teosonetakani, potxoari uinitikiri atoko inakari kai kamakori teosonetakani. Teoso misiritanako kãkiti Satanasi takaõtxikare iteëtaãna takakani, iuakoãna takakani. ¹⁰ Kãkiti iua atoko inakani misiritaãkako, kotxi Teoso iteene omanãkaruata maerekati ninoa kamakiti xika. Teoso misiritanako ninoa, ininiã atatsiirauatana xamina tirinakariã. Ēxõpiri arikanako ninoa. Teoso nitiriakori erekarini, itixine auakani, Teoso Soti Auĩtene pakini itikariko ikara kãkiti misiritiko. ¹¹ Iua xamina txĩkitakari kãkiti atatsiirauatini. Iua xamina tirinapikako. !Ixipoka. Itirinapika. Itxiãkapika. Ninoa misiritiko !iotoka. Pokamara, ĩkanõka auapika ninoa misiritiko. Kãkiti iua potxoari uinitikiri teosonetakani, potxoari uinitikiri atoko inakari kai kamakori teosonetakani, iuãka ĩtoãna auaĩtotakini misiritaãkako ikara atoko —itxa iua Teoso nitiri sãkire.

¹² Ininiã hïte Teoso nakitiakori, hïte ipaniãtakiti kïpitakani, hïte Xesosi nireëkiti ãtipirika kamakani, kataparaxinire hïtxako. Himïteenekariko kãkiti misiritinii.

¹³ Eereka nikenakotari Teoso tixine auakari sãkire. Itxano:

—Nisãpiretakiti piõkatsopata. Kãkiti ipïkasaaki Apiananiri ïkapani iparïkau-atakasaaki, Teoso sikari erekari iuamoni.

Iua Erekari Matamatakoti txari:

—Ia atão. Mitxi pasãpaniri Teoso parïka ikaminina. Uatxa itomatana, kotxi Teoso imarotapekari erekari ikamakitina.

Takari Amiko Pirena

¹⁴ Eereka nitaponeë nionakaãta iaxiti. Iuusaaki natamatari katxiãri kasarori iuaã. Aïtari iaxitikiri atoko inakari topãka iua katxiãri nopini. Ikiiã aua auïtetxi saporietane oro kamakori. Iuakoã saasara ãtoião aua. Pauanaro. ¹⁵ Iposo atoko ãti Teoso nitiri pokïka Teoso aapoko. Iua itaparasãkireritika akiritari iua katxiãri nopini topãkakari:

—Pikosekariko pisaasarate. Pamariko takari, kotxi takari amiko manapipekara. Takari ikini itixitikiri amiko manapipekara.

¹⁶ Ininiã iua katxiãri nopini topãkakari isaasarateë isauakari ikini itixiti nopini auakari. Amari takari imakinika.

¹⁷ Iposo atoko nitikari ãti Teoso nitiri pokïka Teoso aapoko Teoso tixineë. Iuamoni apaka aua saasara ãtoião iuakoã. Pauanaro.

¹⁸ Iuaïkana ãti Teoso nitiri apoka. Teosomoni sikakori takikoãtaã ipotorika iua. Inïkatari xamina tirinakari iuaã. Iua itaparasãkireritika akiritari Teoso nitiri saasara auakiti:

—Pimaïkaroko pisaasarate. Pimakatxakaroko ova ikini itixitikero, kotxi ova oionapeka —itxa.

¹⁹ Ininiã Teoso nitiri isaasarateë isauakaro ova ikini itixitikero. Itsotakitataro ovatsa. Iposo atoko okaro ova ori ova iopetiko mitari ãki. Okatsonakaãka. Teoso omanãkare iua ova iopetiko atoko itxa, kotxi Teoso iteene omanãkarauata kãkiti maerekani xika. ²⁰ Ova ori kãkiti kitiã iopetikoãtaã sitatxi mapotõkire. Txamari na ovapeëni ikara atoko itxa. Arëkatxiãra ikara atoko itxa. Iua arëkatxi uini panaã atoko itxa. Tresëtosi kirómetro arëkatxi aua. Arëkatxi ïpanaã kavaro namaãpeka apoka arëkatxi. ãti metro ipixini ïpanaã arëkatxi.

15

Teoso Misirikare Mïkani Setxi

¹ Eereka nitaponeë nitikoka iuaïkana.

—Kipa atxiïti? —nitxa iuaïkana nãkixinireë, kotxi natamatari Teoso nitiriakori setxi itixineë.

Ninoa minari misirikaretxi setxi pakini kãkitimoni. Apikomoni misirikaretxi !auaika. Ia misirikaretxi setxi inokasaakiri kãkiti, Teoso misiritana ninoa imaerekanina xika.

² Eereka natamatari ipoa atoko inakari. ãtakaãri, xamina tirinakarikata koketakori atoko itxa ipoa. Kãkiti tima ipoa ïtinikata. Ninoa iokanatapekari Satanasi sini, kotxi ! ikamarina iua potxoari uinitikiri paniãtakiti. Iua potxoari uinitikiri atoko inakari kai kamakori paniãtakiti !ikamana. !Apakaparina Satanasi takaõtxikare, iuãka nomerone. Ikininape aua viorão atoko inakari Teoso sikakiti. ³ Ninoa xikaretari Moisesi xikare, Teoso nitiri uai itixi auakari xikare. Ixikarenãtari Teoso Soti Auïtene xikare. Ia ixikaretana. Itxana:

“Teoso Apiananiri, ikini posotiiretxi auakitii pite. Peerekari piparïka. Pite kaposoti-ireri. Pite atãonani pikamakiti. Ikini uãkati auïte pitxaua pite.

⁴ Ikinimane paxitaiko pite ipïkareritika, kotxi pite Apiananiri pitxaua. Ikinimane txaike pite: ‘Peerekai,’ itxaina. Kotxi pitenoka !auari maerekati. Kãkiti ikini uãkati apokako pitemoni. Ninoa txaike: ‘Ate teosone pitxaua,’ itxana kotxi ikinimane itikari erekari pikamakiti.”

Ikara atoko itxa ninoa xikaretakiti.

⁵ Eereka natamatari Teoso aapoko āki. Natamatari iua auiniātaā. ⁶ Iposo atoko ninoa Teoso nitiriakori setxi, misirikaretxi setxi mīkani, pokīka Teoso aapoko. Ninoa māka katsopiri, pomēkoriri. Ninoamoni aua oro kamakori. Itinimaĩ nopini inapa. ⁷ Ninoa ipi ipi pakini okītxinoka xāpokaĩtotakini iuaā aua. Okītxinoka xāpokaĩtotakiti sikari iātatxi setxi pakini oro kamakori ninoa setxi Teoso nitiriakorimoni. Teoso auapininiika inakari xāpokakapekari iua setxi pakini iātatxi omanākareē. ⁸ Teoso iotximere xāpoka iua aapoko āki. Katxiāri kasarori atoko itxa. Iuasaaki kākiti Iauritaāka Teoso aapoko ĩroini, ninoa Teoso nitiriakori, misirikaretxi mīkani setxi pakini, misiritakasaakina kākiti.

16

Iātatxi Teoso Omanākare Auakiti

¹ Eereka nikenakotari Teoso aapoko āki auakari sākire. Itaparakieneritika imisākiretana ninoa Teoso nitiriakori setxi. Itxana:

—Hīsa. Hīkitakari Teoso omanākare iātatxi āki auakari itixi auakanimoni —itxa.

² Ininiā ninoa Teoso nitiriakori sari. Merepanika ātika initiri kitakari iātatxi ākikiri itixi auakanimoni. Iuasaaki kimiti mitari, katsiiri, apoka kākiti Satanasi takaōtxikare auakini ĩtomoni. Potxoari uunitikiri atoko inakari kai kamakori teosonetakani ĩtomoni apoka ikara atoko inakari amianari.

Āti Iātatxi

³ Iposo atoko ātipekana Teoso nitiri kitakari iātatxi ākikiri potxoari uunitimoni. Iuasaaki āparaā arēkatxi itxapekaua. Kākiti ipīkari arēka atoko itxa iuasaaki. Ininiā ikinipoko potxoari uuniti auakani iuasaaki xipoka.

Āti Iātatxi

⁴ Iposo atoko ātipekana Teoso nitiri kitakari iātatxi ākikiri uinimoni, sōtoāri pakinimoni. Iuasaaki āparaā arēkatxinoka itxapekaua. ⁵ Iuasaaki nikenakotari Teoso nitiri āparaā nīkatakari sākire. Itxari Teosomoni:

—Pite maerekati makamakatii. Ātipirika auakarii pite. Atāo pikamakiti pimisiritinina maerekati kamakani ĩkora atoko. ⁶ Kotxi ninoa okari kākiti pite nakitiakori. Okarina pisākire sāpiretakani. Ninoa oxiketari ninoa arēka. Ininiā uatxa pite sikana arēkatxi iātinina. Atāo imisiritikona kotxi maerekati ikamana —itxa Teoso nitiri.

⁷ Iposo atoko nikenakotari āti sākire. Teosomoni sikakori takikoātaā auakari iua. Itxari Teoso:

—Pite Teoso Apiananiri, Kaposotiireri pitxaua. Erekapitikari maerekati kamakani pimisiritini. Pite kona kerokari pikamakiti, kotxi atāo inakaranoka pikama —itxa.

Āti Iātatxi

⁸ Eereka ātipekana Teoso nitiri kitakari iātatxi ākikiri atokatximoni. Iuasaaki atokatxi apiata patakata. Auiritaāka kākiti arikini itaparapatakaā. ⁹ Ininiā kākiti arikaāka atokatxi patakaā. Iuaritika !nirekarina maerekati ikamakitina itakanapinina. “Peerekari Teoso,” kona itxana. Teosonoka posotari iotokakiniri iua misirikaretxi, txamari ninoa maerekati pirenaā akiritari Teoso uāka.

Āti Iātatxi

¹⁰ Ininiā ipi ipi pakini Teoso nitiriakori kitakapekari iātatxi ākikiri itiximoni. Eereka iuaīkana āti Teoso nitiri kitakari iātatxi ākikiri auĩtetxi topaneremoni iua potxoari uuniti pokīkaātakari topaneremoni. Iuasaakipeka iua potxoari uunitikiri auĩtetxi ininiātaāua patimari ipiākini. Kākiti iuaātaā auakani akatsaninitaua itsii xika. ¹¹ Iuaritika ! inirekarina maerekati ikamakitina itakanapinina. Imisākirepiretarina Teoso iaxiti apiko nopinixiti auakari, atatsiirena xika, kimiti xika.

Āti Iātatxi

¹² Eereka iuaīkana Teoso nitiri āti kitakari iātatxi ākikiri mitari uunitimoni Eoparatxi inakorimoni. Iuasaaki uini auaā. Isonāka. Kimapori itxaua, auĩtetxiakori atokatxi pokīkinimoni ĩkani inapinina ĩkapani. ¹³ Iposo atoko nitikari maerekani matamatakoni ipi āti pakini. Atiniro atoko itxana. Āto pokīka mitapoari imini namaā. Āto pokīka

iua potxoari uiniti pokíkaãtakari namaã. Āto pokíka iua itixi pokíkakari namaã. Iua itixi pokíkakari iua Satanasi sãkire sãpiretakari itxaua. Na atãoene isãkire. Poxirari ikama. ¹⁴ Ninoa maerekani matamatakoni ipi āti pakini Satanasi nitiriakori. Ninoa kamari posotiiretxi. Isana auĩtetxiakorimoni, ikini itixiti auakanimoni. Akiritana kãkiti apotiitiniua ineenamauatinina ĩkapani. Teoso kaposotiireri naiatanako ninoa itixi xipokini õtisaaki.

¹⁵ Hĩte ia atatsopatakani, Apiananiri txai hĩte:

—Erepaniko. Napokako kiĩtiriri apokini atoko, kãkiti mimarotakinitipanika. Napokasaaki ereẽ, pikoatiniã, kamãka pininiã, pipoxokoniuata. Ikara atoko pininiã, kona kasarai ikinimane apisatoõ pisini, ininiã kona kapẽtai —itxa Apiananiri sãkire.

¹⁶ Eereka ninoa ipi āti pakini Satanasi nitiriakori maerekani matamatakoni, apotiitari auĩtetxiakori Amaketõ inakoriãtaã. Iuaãtaã akiritaãka Amaketõ Xoteo sãkireẽ.

Imapotõkire Iãtatxi

¹⁷ Ninoa setxi Teoso nitiriakori, seisi kitakapekari iãtatxi ākikiri. Ātinoka !ikitakapanikari. Iuasaakiika iua kitakari iãtatxi ākikiri ĩtimamoni. Iuasaaki nikenakotari auĩtetxi itopanereãtaã auakari sãkire:

—Ixipokapeka —itxa itaparakieneritika.

¹⁸ Iposo atoko iotxira mẽkoãkata. Ikarokirauata. Pataparaeneri. Itixi iakeẽkata. Mitxi !auari itixi iakeẽkatini ĩkora atoko inakari. Iuasaakiikarako apiatako. ¹⁹ Iua sitatxi apiari Papirõnia inakori xoreka. Ipikata ixoreka, ininiã ipi āti pakini sitatxiti atoko itxaua. Ikini itixiti auakari sitatxi xipokaãka iuasaaki. Teoso limaxinĩkaretari Papirõnia sitatxiti auakani kamakiti, ininiã iteene imisiritana ninoa, kotxi iteene omanãkarauata imaerekanina xika. ²⁰ Iuasaaki ikini ipokomirĩ !auaika. Ōtanoxiratari ikinipoko xipoka iuasaaki. ²¹ Katxĩkareri iaxiti auakari, kai mitari atoko inakari, katxaka itiximoni. Apanakini kai minani koarẽta siko kiro. Iua irika kãkiti nopini. Ikara katxakakari pamonõkonipaniri. Iua xika kãkiti iteene misãkirepiretari Teoso.

17

Sito Potxoari Uinitikiri Nopini Topãkakarõ

¹ Ninoa Teoso nitiriakori setxi pakini iãtatxi setxi auakini, seisi kaikota. Ātika ina notamoni. Itxano nota:

—Notakata pisa. Noerekai sitatxi miramaneri. Sito kanokarero kaposotiirero atoko itxa iua sitatxi. Oa topãkanãta uini itori nopini. Iuaã auakani misiritiko noerekaiko pite.

² Auĩtetxiakori ikini itixiti auakani kamari maerekati iua sitatxiti auakanikata isirĩkinina. Iua sitatxi auakani txĩkitakari kãkiti ikini itixiti auakani maerekati ikaminina. Kapoãroã poãtakari nirekini atokokana, ninoa nirekari iua maerekati iua sitatxiti auakani kamakiti —itxa notamoni.

³ Eereka iua Erekari Matamatakoti paniãtano iua Teoso nitirikata nisini. Iua Teoso nitiri anikano āparaã makipakaniãtaã. Iuaã natamataro sito topãkanãta iua potxoari uinitikiri nopini. Põkamaraĩtori iua. Iĩtoã aua iõkatakori kaiãopokori Teoso imisãkirepiretini iõka. Ikii setxi aua. Iko tesi aua. ⁴ Oa sito mãka pomamari ipixini. Põkamarari itxa omãka. Pakaroneri omãka. Oĩtoã aua oro, pãrora, kai soro pomẽkoriri pakini aua. Omaĩkari iãkoanãtxi oro kamakori. Iua iãkoanãtxi āki aua maerekati okamakiti itxiko atoko inakari. Maerekati oĩto kamakiti ikara atoko itxa. ⁵ Oteẽtaã aua sãkiretxi iõkatakori. Itxari: “!Kimarotikori. Kanokareroakoro inoro itxaua Papirõnia sitatxiti miramaneri. Maerekati kamakani inoro itxaua Papirõnia.” ⁶ Nitikaro oa sito opoãtini, Teoso nakitiakori arẽka oãtini xika. Xesosi sãkire auikinina xika, okaãkana. Natamatakasaakiro nitikoka.

—Kipa atxĩti? —nitxa.

⁷ Iua Teoso nitiri txano:

—Kininiãpa pitikoka? Nisãpiretaiko oa sito pirena. Apaka nisãpiretaiko iua potxoari uinitikiri pirena, ikii setxi, iko tesi auakiti pirena, oa porikitakari pirena nisãpiretai, kotxi kona pimarotari. ⁸ Iua potxoari uinitikiri patamatakiti mitxi aua, txamari uatxa !

auaika. Iua eereka ipokíkapanikako aariko mamapotökire irikotiã. Eereka anikaãkako ixipokikomoni. Ikini itixiti auakani Teoso aãtsopateẽ iuãkana maiökatakoni tikokako iua potxoari uinitikiri atamatakasaakinako. Itixi kamiko apisa iuãkana liökatsopataãka Teoso aãtsopateẽ. Iua aãtsopaã iökauãkatakonioka ätipirika auapikako Teosokata. Käkiti tikokako iua potxoari uinitikiri atamatakasaakina, kotxi mitxi auãki itxa, eereka ! auaika, eereka iuaikana auãkipeka itxa.

⁹ —Ikara inakari pimarotini ikapani, iteene pimixinikariko. Kinirepa ikii setxi aua? Kotxi õtanoxiratarì setxi apaka aua. Oa sito topãkanãta iua õtanoxiratarì nopini. ¹⁰ Kinirepa ikii setxi aua? Kotxi auĩtetxiakori setxi apaka auako. Auĩtetxi !itxaikauana ninoa siko. Ätinoka auĩtetxi txapanikaua. Äti kona apokapanika. Iua apokasaaki mapaõtinoka auĩtetxi itxauako. ¹¹ Iua potxoari uinitikiri mitxi auãki inakari, iposo atoko !auaika inakari, iua apokako. Iuara auĩtetxi txauako. Iua mitxi apotiitaua ninoa setxi auĩtetxiakorikata. Äti õti iua xipokaãkako.

¹² —Patamatarì iko tesi pakini. Kinirepa iko tesi aua? Kotxi auĩtetxi tesi aua. Ninoa auĩtetxiakori kãkiti auĩteakori !itxapanikauana. Ninoa sikaposotiiretaãkako auĩtetxi ininiuana iua potxoari uinitikirikata. Ninoa auĩtetxi itxauanako äti oaranoka. ¹³ Ikininape ninoa tesi auĩtetxiakori parikauata iua potxoari uinitikiri ikapani. Iposotiireña, itaparaãna iparikauatana iua potxoari uinitikiri ikapani. ¹⁴ Inaiatarinako Teoso Soti Auĩtene. Teoso Soti Auĩtene iokanatanana ninoa isinina, kotxi iuanani Apiananiri itxaua. Auĩtetxiakori auĩte itxaua. Ätipirika iuakata sikani, iua akiritakini, imereëkini, ätipirika iua nireëkiti kamakani, ninoa moianatarì iua Soti Auĩte inenamauatini —itxa Teoso nitiri sãkire.

¹⁵ Iua Teoso nitiri apikomoni txari notamoni:

—Pite atamataro oa kanokarero topãkanãta kãuaãri nopini. Kinirepa kãuaãri nopini oãua? Kotxi iuaãtaã kãkitipokoni, ikini uãka, ikini itixiti auakani, ikini äti uãka sãkire sãkiretakani pakini. Iua kãuaãri mitari atoko itxana. ¹⁶ Iua potxoari uinitikiri, ninoa tesi auĩtetxiakori pakini omanataroko oa kanokarero. Ninoa makatxakariko ikinipoko oa nakiti. Imakatxakarinaroko omãka. Kasarapeka otxako. Oxini inikanako. Ninoa xipokaroko oa xaminaã. ¹⁷ Teoso txikitakari Teoso nireëkiti ikaminina, kotxi ninoa auĩtetxiakori parikauata iua potxoari uinitikiri ikapani Teoso nireëkiti iaõka. Ininiã Teoso sãkire mitxi auakari auapeka. Isãkire iaõka ikamana. Ininiã ninoa nirekari iparikauatinina iua potxoari uinitikiri ikapani. Ininiã ninoa auĩtetxiakori itxauana iua potxoari uinitikiri ikapani.

¹⁸ —Oa sito kanokarero patamatakito kona atão sitoni. Sitatxi miramaneriã auakani oa sito kanokarero atoko itxana, kotxi iua sitatxiã auakani paniãtana ikini auĩtetxiakori itixi auakani maerekati inireëkitina ikaminina.

18

Papirónia Sitatxiti Xipokini

¹ Ikara inaãka atoko nitikari äti Teoso nitiri Teoso tixine auakari katxakaãpotini ikorapokoriti Teoso tixine potoriãkari. Iua kaposotiireri. Iotximere iopinikari imakinika itixi. ² Iua sãkirauata itaparasãkireritika. Itxari:

—Ixipokapeka Papirónia sitatxiti miramaneri. !Auaika. Uatxa Satanasi nitiriakori aua iuaã. Ikini sereti maerekani matamatakoni aua iuaã. Araãkari ikini sereti arakakari nikakani, kãkiti mapokaerekatakiniti, iuaã apoka. ³ Oa sito kanokarero atoko itxa iua sitatxi, kotxi iua sitatxi auakani txikitakana ikini itixiti auakani maerekanitxi ninoa kamakiti iaõka ikaminina. Papirónia sitatxiti auakani kamari maerekati iitona nireëkiti. Itixi auakani nirekari ikara maerekati ikaminina kapoãroã poãtakari nirekini atokokana. Auĩtetxiakori ikini itixiti auakani kamari ikara maerekati Papirónia sitatxiti auakanikata. Tiitxi vëtxitakani apakaparo txineiro kaiãopokoro, kotxi Papirónia sitatxiti auakani amotari tiitxipokoni —itxa Teoso nitiri sãkire.

⁴ Eereka nikenakotari äti Teoso tixine auakari sãkire. Itxari:

“Hïte nota nakitiakori inakani takanapariko iua sitatxi. !Hïkamapiri maerekati ninoakata. Ininiã lhimisiritaãka ninoakata.

⁵ Kotxi maerekati ninoa kamakiti apiaãpota. Tiitxi tsorinatakori atoko itxana ninoa maerekani. Iaxitipeka apokaãpota ninoa maerekani. Teoso xinikari ninoa maerekani, ininiã iua misiritanako ninoa.

⁶ Himisiritanako ninoa. Hïte imisiritinina atokokana, hïte misiritana ninoa. Ipikata himisiritanako ninoa, ninoa maerekani xika. Ninoa misiritapekari apanakini, ininiã ia imisirikarena xika ipikata himisiritanako ninoa.

⁷ Hïtxïkitakanako ninoa atatsiirauatinina. Hïtxïkitakanako ninoa maerekaxiniretinoka ininina. Ikara atoko ninoamoni hïkaminiã, atãopitikara hïkamakiti, kotxi iteene iuikauana ninoa. Itomaneri itiina, ininiã ninoa iarinouata. Ninoa sãkire: ‘Ate uai topãkanãta, kotxi auïtetxi kaposotiireni atxaua. Tikinitakoro atoko !atxaua, ininiã maerekaxiniretika !atxa,’ itxana ãkixinireẽna.

⁸ Ikara isãkirena xika ãti õti ninoa misiritaãkako. Amianari, maerekaxinirenitxi, natxi pakini apokako ninoamoni. Arikatxi xipokanako ninoa, kotxi Teoso iusaaki misiritanako ninoa. Imisiritanako ninoa, kotxi Teoso Apiananiri Kaposotiireri itxaua,”

itxa iua Teoso tixine auakari sãkire.

Kãkiti Txiapatini Sitatxi Xipokini Xika

⁹ Auïtetxiakori ikini itixiti auakani, Papirõnia sitatxiti auakanikata sirïkakani, ni-noakata tiitxi apokaerekatakani, itikasaakirina iua sitatxi misiritiko, iteene itxiapatana. Ninoa auïtetxiakori txiapata iua sitatxi arikasaaki, xamina txiã itikasaakina.

¹⁰ Õtakoxiti itimana, kotxi ipïkarina sitatxi auakani xipokini. Iusaaki itxanako:

—!Erekari. !Erekari. Ia sitatxiti miramaneri lauauka. Papirõnia sitatxiti lauauka. Kãkiti kaposotiirerini xipokapeka. ãti oaranoka arikatxi xipokapena ninoa imaerekanina xika.

¹¹ Ikini itixiti tiitxi vëtxitakani apaka txiapatako. Ninoa maerekaxinireninoka itxanako sitatxi auakani xipokasaaki.

—Kiripa amotatari atii uatxa? —itxana.

¹² Mïtxi ninoa vëtxitari oro, pirata, kai soro pomëkoriri, kai soro kasarori pérora inakori. Mïtxi ivëtxitarina mãkatxi mata arinio inakori, mãkatxi mata seta inakori, mãkatxi mata pøkamarari, mãkatxi mata pomamari pakini, ivëtxitana. Ivëtxitarina ikini sereti aamina eremari inakari. Ivëtxitarina ikini sereti tiitxi iko kamakori, aamina pakaroneri kamakori, pirõsi kamakori, metao kamakori, kai kamakori. ¹³ Ivëtxitarina kanera, koketxi pakini. Ivëtxitarina kamariãro miha inakori. Ivëtxitarina kamariãro pirãkïsësi inakori. Ivëtxitarina iãriã, aseitona iï, triko, triko pani pakini. Ivëtxitarina kema auïte, soti auïte, kavaro, mitekaï kavaro anikakiti pakini. Kãkiti apaka ivëtxitana, nitiritxi ïkapani. Kãkiti ïto, kãkiti xinire apaka inirekana ivëtxitinina. ¹⁴ Ninoa tiitxi vëtxitakani sãkire sitatximoni:

—Ikinika hïtii erekari hinireëkiti xipokaãkapeka. Ikinika hïtxineirote !auaika. !Auaika hãpokaerekatakiti. Hïtii arikapeka —itxana ninoa sãkire.

¹⁵ Ninoa tiitxi vëtxitakani katxineiroterini itxauana, kotxi kãkiti iua sitatxiti auakani mitxi amotari ninoa tii. Iua sitatxi xipokasaaki, ninoa tiitxi vëtxitakani timanãta õtakoxiti, kotxi ipïkarina sitatxi arikini. Itxiapatana. Imatinaniuatana. ¹⁶ Itxana:

—!Erekari. Sitatxi miramaneri !auaika uatxa. Mïtxi ia sitatxi peerepokori sito erero atoko itxa. Oia sito mãka pakaroneri, pomamari, pøkamarari pakini. Oïtoã aua oro, kai soro pomëkoriri. Pérora pakini aua. Oia sito atokokana ia sitatxi. ¹⁷ ãti oara napa atoko ia sitatxiã auakani tii kakaroneri xipokapeka —itxana.

Sitatxi arikasaaki, maporo auakini, maporo ãki sikani, maporo ãki parïkauatakani apaka õtakoxiti atamatarina iua sitatxi arikini. ¹⁸ Ninoa itikasaakiri katxiãri iua sitatxi arikini, itxana:

—Ia sitatxi miramaneri atoko inakari lauari —itxana ninoa.

¹⁹ Iusaaki itakarina atapani ikiiãna imatinaniuatiniãna. Itxiapatana iusaaki. Imatinaniuatana iusaaki. Itxarina:

—!Erekari. !Erekari. Kamatinanipitikari sitatxi miramaneri xipokini. Mitxi iuaã ikinimane maporo auakini apakapari kaiãopokoro txineiro, kotxi iuaã auari txineiopokoni. Eereka äti oara napaka atoko ixipokapeka ikinika —itxana isäkirena.

²⁰ Hïtepekana Teoso tixine auakanii hïpoxokoniuatoko iua sitatxi xipokiniã. Hïte Teoso nakitiakori hïpoxokoniuatoko. Hïte Xesosi moianariakorii, hïte Teoso sãkire sãpiretakanii pakini hïpoxokoniuatoko, kotxi Teoso arikapekari iua sitatxiã auakani hïte imisiritinina xika.

Kai Miramaneri Potxoari Uunitimoni Okiko

²¹ Eereka äti Teoso nitiri kataparari maïkari kai meraminapoari. Kai triko kamiriãkari atoko itxa iua kai. Okari potxoari uunitimoni. Iua txari:

—Itapararitika kai nokini atoko, Papirónia sitatxiti miramaneri xipokini. !Atamataãkaika sitatxi iuaã —itxa isäkire.

²² Itxari iua sitatximoni:

—Xikari !ikenakotaãkaika ereë. !Auaika xikari viorãokata, koitxikata, trõpetapakinikata. Ereë kãkiti parïkauatini !auaika. Atarokiri kamiko ene !kakenakotikoikari.

²³ Tirikapi kamara !katamatikoikari ereë. Taniriuatakani kiinirite ene !kakenakotikoikari. Ereë mitxi vëtxirauatakani apiari itxauana. Ninoa atoko inakari !auari ikini itixiti. Kãkiti ereë auakani misirienetana ikini kãkiti ikini itixiti auakani, kotxi ninoa sãkire maerekatnoka —itxa Teoso nitiri sãkire.

²⁴ Papirónia sitatxiti misiritaãka, kotxi iuaã auakani okapena Teoso sãkire sãpiretakanii kãkiti Teoso nakitiakori. Ikinimane kãkiti itixi okakoni xika Papirónia sitatxiti xipokaãka.

19

Areroia, Peerekari Teoso

¹ Eereka nikenakotari kãkiti sãkire, kaiãopokori kãkiti Teoso tixine auakani. Itaparasãkireritikana itxana:

—Areroia. Peerekari Teoso. Ate Teosone makatxakari kãkiti maerekani. Kaiotximereri aTeosone. Kaposotiireri. ² !Ikerokari ikamakiti, kotxi atão inakarínoka ikama, ininiã atão imisiritinina maerekati kamakani. Erekarinoka ikama aTeosone. Iua misiritari Papirónia sitatxiti. Kanokarero kaposotiirero atoko itxa iua sitatxi, kotxi iua sitatxi auakani iomatari kãkiti xinire ikini itixiti auakani xinire, kotxi oerekarina maerekati ïtotxi nireëkiti ikaminina. Teoso misiritana Papirónia auakani, kotxi okana Teoso nitiriakori itixi auakani —itxana ninoa sãkire.

³ Iuaïkana itxana itaparakieneritikana:

—Areroia. Peerekari Teoso. Iua sitatxi miramaneri arikapikako. Katxiãri iuaãkiri itimatxiãtapikako ätipirika —itxana.

⁴ Iuasaaki ninoa totiakori vïtxi koatro pakini, ninoa okïtxinoka xãpokaïtotakini ipi ipi pakini apaka, ipamakana Teoso apisatoõ. Iuasaaki Teoso topãkanãta auïtetxi topanere nopini. Ninoa misãkiretari iua:

—Pite aTeosone. Peerekai pite. Ameë, areroia —itxana ninoa.

Soti Auïte ïtanorouatini Kiiniriti

⁵ Eereka nikenakotari Teoso topanereë auakari sãkire. Itxari:

—Hïte Teoso nitiriakori ikini itixiti auakanii, “Peerekari aTeosone” hïtxako. Hïte auïtetxi inakanii, auïtetxi minakanii apaka, hïpïkiniãri Teoso, “Peerekari aTeosone,” hïtxako —itxa.

⁶ Iposo atoko nikenakotari itomaneri kãkiti sãkire ene atoko itxa, ãparaã kai auiniãtaã auakari ene atoko itxa, ikarokirauatini ene atoko itxa. Nikenakotari ninoa sãkire:

—Areroia, peerekari Teoso, kotxi aTeosone, Apiananiri, kaposotiireri, ikinimane auïte itxaua —itxana ninoa.

⁷ —Mapoxokoniuatata. Apoxokoniritika masãkirauata. Matxari: “Peerekari Teoso.” Teoso Soti Auïtene ïtanorouatini iketo apokapeka. ïtaniriuataro iua ïkapani oãiamatapeka. ⁸ Osikaãka mãkatxi ereri, kasarori oieretaãkiti tïkane —itxana ninoa sãkire.

Teoso nakitiakori kamakiti atão inakari oa mãka atoko itxa.

⁹ Iposo atoko iua Teoso nitiri txano nota:

—Ia piökatsopata. Iua Soti Auíte ñtanorouatini kiiniriti kemaïtxitakoni poxokoniyata —itxa notamoni.

Iuaïkana itxano:

—Ia nisãpiretakiti Teoso sãkire atão itxa.

¹⁰ Ikara nikenakotakasaaki nipamaka iua Teoso nitiri apisatoõ, Teoso apisatoõ pamaãkarino atoko nitxaua. Txamari iua txano:

—Kona pipamakape nota apisatoõ. Nota Teoso nitiri pite atoko, pitariakori Xesosi sãpiretakiti auiãkani atoko. Teoso apisatoõnani pipamakako. Xesosi sãpiretakiti iopinikari Teoso sãkire sãpiretakani ãkixinire. Ininiã ninoa sãpiretari kãkiti atão Teoso sãkire —itxa.

Kavaro Kasarori Nopini Topãkakari

¹¹ Eereka natamatari Teoso tixineẽ auakari. Natamatari kavaro kasarori. Iua kavaro nopini topãkakari ikamaenetakiti kamakari itxaua. Isãkire atãonoka. Atão imereẽri kãkiti misiritiko imaerekani xika, kotxi iua imarotari ikinipoko kãkiti kamakiti, ininiã ikamari atão. Inaiatana maerekati kamakani, kotxi iua kamari atão. ¹² Oki xamina tirinakari atoko itxa. Ikiã ito auïtetxi saporietane aua. Iuãka iökatakori iitoã aua. ! Kimarotikori iua uãka. Iuanoka imarotari iuãka. ¹³ Arëkatxinoka imãkaã aua. Iua akiritaãka, “Teoso Sãkire” inakori. ¹⁴ Isotatoneakori, Teoso nitiriakori Teoso tixine auakani, saãpota iuakata. Iua ñkiika. Ninoa apaka topãka kavaro kasarori nopini. Imãkana peereri, kasarori. ¹⁵ Iua “Teoso Sãkire” inakori namaã opokïka iouata mitaro neenamtxi ikamini ñkapani. Kauanaro. Iua iouataneẽ okanako imokaiakarini ikini ãti uãka, ininiã ikini ãti uãka auíte kataparari itxauako iua. Imisiritanako ninoa imaerekanina xika. Ova katxaratiko atoko itxako imisiritikona. Teoso kaposotiireri omanãkare ova katxaratiko atoko itxako. Teoso iteene omanãkarauata iuasaaki kãkiti maerekani xika. ¹⁶ Iua “Teoso Sãkire” inakori mãkaã, itapikeẽ apaka iökataãka: “Auïtetxiakori auíte. Apiananiri,” iökataãka.

¹⁷ Iposo atoko natamatari ãti Teoso nitiri. Atokatxi iotximereẽ itima. Iua ita-parakieneritika akiritari ikinika itano araãkani:

—Hina. Hãpoka Teoso kiiniritemoni. Mitari ikiinirite —itxa.

¹⁸ —Hina. Auïtetxiakori xini hinika. Sotatoakori auíteakori xini hinika. Sotato xini apaka hinika. Kavaro xini hinika. Hinikari kikiãkini kavaro nopini topãkakani xini apaka. Hinikari ikini kãkiti xini, nitiritxi iamotakoni xini, nitiritxi minakanuia xini, kãkiti apiatakani xini, kãkiti mapiatakani xini apaka hinika —itxari itano araãkani.

¹⁹ Eereka nitikari iua potxoari uinitikiri. Iuakata aua itixi auakani auíteakori, isotatoneakori apaka. Ninoa apotiitaua, iua kavaro kasarori nopini topãkakari isotatoneakorikata inaiatinina ñkapani. ²⁰ Iua neenamtxi xipoka atoko, iua potxoari uinitikiri maïkaãka. Isãkire sãpiretakari, atão minasãkiretakati, imaïkaãka apaka. Mitxi iua kamari posotiiretxi iua potxoari uinitikiri ñkapani. Ikara posotiiretxi xika imisiriene-tana ninoa potxoari uinitikiri takaõtxikare auaïtotakini. Imisiriene-tana ninoa iua kai kamakori teosonetakani. Iua potxoari uiniti pokïkaãtakari, isãkire sãpiretakari pakini, auãkipanika okaãka ipoa atoko inakarimoni, ãxópiri arikiniãtaã. ²¹ Isotatoneakori okapeẽka iouataã, kavaro kasarori nopini topãkakari namaãkeroã. Iuasaaki ikinika maiori nikapena ninoa xini. Kamitopekana. !Iposotaikarina ikinika okakoni xini inikinina.

20

Mio Anokananisaaki

¹ Eereka nitikari Teoso nitiri katxakaãpotini Teoso tixine ñkari. Iuakoã iua minaro xavi iua mamapotökire irikotimoni. Apaka iminari kohëtxi mitari. ² Iuasaaki imaïkari iua imini mitapoari. Kitxakapirïkarikara iua imini. Iua maerekani matamatakoni auíte, Satanasi inakori. Iua maïkari Satanasi. Iaxirikari kohëtxiã, mio anokanani imatïpokotakani tïkane. ³ Iua Teoso nitiri okari Satanasi iua aarikoã, tota itxari itore. Ikakiriokari oa xavi itore sonaã, ininiã lapakata itore matakakiko. Ininiã mamapotökire

irikoti āki ikaikota Satanasi. !Iposotaikari imisirienetiniri ikini itixiti auakani. Mio anokanani auako iriko āki iua Satanasi. Mio ano napaāka atoko auiritaāka ipokīkini. Mapaōtinoka auiritaāka mapara auini.

⁴ Eereka natamatari auītetxiakori topanere. Kaiāopokori auari iuaā. Natamatari iua topanerexi nopini topākakani. Ninoa txikitaāka auītetxi ininiuana. Iuasaaki natamatari apanakini kākiti. Mitxi sauakanopitakoni. Okapeēkana Xesosi iokanapirena, Teoso sākire pakini isāpiretinina xika. !Iteosonetarina iua potxoari uinitikiri. Iua kai kamakori !iteosonetana. Iua potxoari uinitikiri takaōtxikare !itakana iteētaāna, iuakoāna pakini. Iuaīkana auapekana. Auītetxi itxapekauana Kristokata. Mio anokanani auītetxi itxauana. ⁵ Ikara ipīkani ōkitikiko merepanika ipīkani ōkitikiko. Iua mio anokanani napaāka atoko apanakini ipīkani ōkitikaāka. ⁶ Ipīkani merepanika ōkitikiko iuaīkana auāki ininina īkapani, Teoso nakitiakori itxauana ninoa. Teoso sikari erekari ninoamoni. !Atatsiitarina ātiāo ipīkitxi Teoso misiritakasaakina maerekati kamakani. Sasetotxi itxauana, kotxi Teoso nireēkiti ikamana. Kristo nireēkiti apaka ikamana. Mio anokanani auītetxi itxauana Teosokata.

Satanasi Xamina Mitapoarimoni Okiko

⁷ Mio ano napaāka atoko, Satanasi kateia āki auakari, sikakaākako. Ipokīka mapara. ⁸ Iuasaaki Satanasi ĩpirixititari itixi kākiti ikini āti uāka imisirienetini īkapani. Iua misākiretari āti uāka Koki inakori, Makoki inakori pakini. Txamari na atāo isākire. Inirekari ninoa neenamauatini iuakata. Apitiitana ninoa Teoso nakitiakori inaiatinina īkapani. Itori kākiti Satanasi apotiitakini. Uini ikipatxite atoko itxana.

⁹ ĩpirixititarina itixi. Iakirokarina Teoso tirketakiti sitatxiti, kākiti Teoso nakitiakori auiniātaā. Iuasaaki xamina iaxitikiri katxaka. Ixipokana ninoa ikinikana. ¹⁰ Iuasaaki Satanasi, kākiti misirienetakari, okaāka arikatxi mitapoarimoni ēxōpiri arikikoātaā. Iua potxoari uinitikiri, isākire sāpiretakari pakini okapeēkaika iuaā. Iuaā ninoa atatsiirauat-apikako pokamara, īkanōka ātipirika. !Ixipoka ninoa atatsiirauatini.

Ipinakani Apakapari Iparīkana Īki

¹¹ Eereka natamatari auītetxi topanere kasarori mitari. Natamatari iua inopini topākakari. Iuasaaki patimari iaxiti, itixi pakini ereēkokini iua topākakari apisatoō. Iaxiti, itixi pakini kona katamatikoikari. ¹² Iposo atoko natamatari kākiti mitxi ipinakani timini Teoso topanere apisatoō. Kākiti apiarini, kākiti poiāorini pakini tima Teoso apisatoō. Iposo atoko itori aātsopa katamēkitataāka. Iua aātsopaā aua ikinika kākiti kamakiti. Apaka āti aātsopa katamēkaāka. Kākiti uāka aua iua aātsopaā Teosokata auakani īkapani. Iuasaaki ninoa mitxi ipinakani apakapari ikamakitina ĩki uai itixiā auakasaakina. ¹³ Ninoa mitxi potxoari uiniti āki ipinakani apoka iuaā. Mitxi kipatxiā ikatakoni apaka apoka iuaā. Ikini kākiti ipīkani auiniātaā auakani apoka iuaā. Ikinika apakapari ikamakitina ĩki, ikamakitina itixiā auakasaakina. ¹⁴ Eereka ipīkitxi, ipīkani auiniātaā pakini okaāka iua arikatxi mitapoarimoni. Iua arikatxi mitapoarimoni iuaīkana kākiti ipina ātiāo ipīkitxi maxipokatimoni. ¹⁵ Kākiti ātipirika Teosokata auakani uāka aua Teoso aātsopateē. Kākiti iuaā mauauākatakani okaāka iua arikatximoni.

21

Iaxiti, Itixi Pakini Amaneri Txapekaua

¹ Eereka natamatari iaxiti amaneri, itixi amaneri pakini. Iaxiti mitxiri ereēkokape. Īkora itixi mitxiri ereēkokape. Potxoari uiniti !auaika. ² Natamatari Teoso sitatxine Xerosareē amaneri. Iua sitatxi Teoso tixinekiri. Teoso paniātari iua sitatxi ĩkorapokoriti apokini. Natamatari ikatxakaāpotini. Iua sitatxi peereri. Sito ĩtaniriutakasaaki, omāka peereri oĩtanirimoni osini īkapani. Oa sito erero atoko itxa iua sitatxi. ³ Nikenakotari Teoso topanereē auakari sākire. Itapasākireritika itxari:

—Uatxa Teoso kamari iua auini kākiti sauaki. Iua ninoakata aua. Iua nakitiakori itxauana. Teosora aua ninoakata. Ninoa Teosone itxaua. ⁴ Iuasaaki iua kaxipokariko

ninoa oki átsaã. Iitxiapataikana. Ipíkixi !auaika. Matinanitxi !auaika. Átsaãtxi !auaika. Katsiiri !auaika. Ikinipoko mitxiri ereëkokapeka uatxa —itxa.

⁵ Iua auítetxi topanere nopini topākakari txari:

—Uatxa nikamari ikinipoko amaneri —itxa.

Apikomoni itxari notamoni:

—Piökatsopatari nisäkire, kotxi nisäkire atão. Nisãpiretakiti apokapitikako.

⁶ Apikomoni itxano:

—Uatxa nipařika xipopeka. !Auaika. Merepitipanika iõka Aopa inakori atoko nitxa, kotxi nota merepitipanika aua. Imapotõkire iõka Ómika inakori atoko nitxa, kotxi ikinipoko mapotõkire nitxaua apaka. Nisikari kãkiti posonatakani iãtini ãkapani. Na ninirekari iiki. Iãtarinako ãparaã amomoãkiri. Iua ãparaã txíkítakari kãkiti átipirika Teosokata auini. ⁷ Nisikariko iua ãparaã kãkiti Satanasi nireëkiti makamakanimoni. Ninoa Teosone nitxaua nota. Nota anaakori itxauanako ninoa. ⁸ Kãkiti mataparaxinireni okaãkako xamina mitarimoni. Teoso sãkire mauikakani apaka okaãkako iua xaminamoni. Maerekati potxitakani, kokanirini, maerekati iitoãna potxitakiti kamakani apaka okaãkako xamina mitapoarimoni. Miiti apaka okaãkako iuamoni. Teoso kamakori teosonetakani okaãkako iuamoni. Ikinika kãkiti maxikatiika sãpiretakani apaka okaãkako xamina mitarimoni. Ninoa kãkiti ikinikana misiritaãkako arikatxi mitariã, êxópiri arikikoãtaã. Iuaã kãkiti iuaikana ipina, átião ipíkixi maxipokatimoni —itxa iua auítetxi topanere nopini topākakari sãkire.

Xerosareë Sitatxiti Amaneri

⁹ Ninoa Teoso nitiriakori setxi, iãtatxi setxi auakini, áti ina notamoni. Iua txari:

—Uai pina. Noerekaiko pite iua Soti Auíte tirketakito itanoro ãkapani —itxa.

¹⁰ Iua Erekaru Matamatakoti anikano nota. Itxíkítakari Teoso nitiri anikinino oxiratari nopini. Mitaxiratariã oerekano sitatxi Teoso nakiti Xerosareë inakori. Natamatari iua sitatxi Teoso tixine potorikakari katxakaãpotini ãkorapokoritimoni. ¹¹ Teoso iotximeretxikana aua iua sitatxi. Kai pomëkoriri kakaroneri xásipi inakori mëkorikini atoko itxa iotximere. Iua sitatxi iotximere peereri. Kristao mëkori atoko itxa. ¹² Pirikeri kai kamakori piriketari iua sitatxi. Iua pirikeri mitapoari, paítanori. Iua pirikeri tosi itore aua. Teoso nitiriakori iaxitikini tosi nãkatari iua tosi itore. Ikinika itore nopini iõkataãka Isaeo anaakori uãka, kotxi Isaeo tosi imiakori aua. ¹³ Ipi áti pakini iua itore atokatxi pokikiniimoni. Ipi áti pakini iua itore atokatxi pokikini sanaremoni. Ipi áti iua itore atokatxi pokikini ikikomoni. Ipi áti pakini iua itore atokatxi ereëkokinimoni. ¹⁴ Iua sitatxi pirikere tosi kai mitari nopini ikamaãka. Ikinika iua kai nopini Soti Auíte moianariakori uãka iõkataãka, kotxi Soti Auíte moianariakori tosi aua.

¹⁵ Iua Teoso nitiri notakata sãkirauatakari aua aãke oro kamakori iuakoã. Iua aãke iua sitatxi, itore, ipirikere pakini iaõtiko. ¹⁶ Sitatxi tore atokatxi pokikiniimoni ipotorika. Itore atokatxi ereëkokinimoni apoka. Iaõtari ipi mio, koatrosëtosi pakini kirómetro. Maioakari. Iuaikana ipotorika sitatxi itore atokatxi pokikini sanaremoni. Itore atokatxi pokikini ikikomoni apoka. Iaõtari iua atokotxikana ipi mio, koatrosëtosi pakini kirómetro. Eereka iaõtari sitatxi itano timakari. Iua atokotxikana ipi mio, koatrosëtosi pakini kirómetro. Iua Teoso nitiri iaõtari iua sitatxi iua aãkeë. ¹⁷ Iua Teoso nitiri iaõtari pirikeri timakari. Sesëta metro itano. Teoso nitiri iaõrauata kãkiti iaõrauadini atokokana. ¹⁸ Iua pirikeri kai kamakori xásipi inakori. Iua sitatxi oro kamakori. Kristao erero atoko itxa oa oro. ¹⁹ Iua kai mitari pirikeri patapi auakari ipataãka ikini sereti kai soroã. Pomëkoriri, kakaroneri iua kai soro.

Áti iua kai mitari aua kai soro xásipi inakori.

Áti iua kai mitari aua kai soro sapira inakori.

Áti aua ákata inakori.

Áti aua esimeráota inakori.

²⁰ Áti kai mitari aua kai soro satónia inakori.

Áti kai mitari aua kai soro sátxio inakori.

Áti aua krisórito inakori.

Āti aua periro inakori.

Āti aua topásio inakori.

Āti aua krisópraso inakori.

Āti aua xasīto inakori.

Āti aua ametxísita inakori.

²¹ Iua tosi itore tosi kai kasarori kamakori. Iua kai kasarori pérora inakoro. Iua itore ātika, pérora ātoka kamakori. Oro kamakori itxaua kimapori. Peereri. Pomēkoriri. Kristao atoko itxa ahoa.

²² Kona natamatarī Teoso misākiretiko aikoti. !Auari iua aiko iua sitatxiā, kotxi Teoso Apiananiri kaposotiireri, iua Soti Auīte apaka iuaā auapikana. ²³ Iuaā !inirekaāka atokatxi, kasiri pakini sitatxi iopinikini ĩkapani, kotxi Teoso iotximere iopinikari ikinipoko. Iua Soti Auīte sitatxi tirikapite atoko itxaua. ²⁴ Kākiti maerekanitxi mauakini ikini āti uāka auari iua kamaraā. Kākiti ikini itixiti auakani auīteakori apokako iuaā Teoso ipaxitinina ĩkapani, inirekakitina Teosomoni isikinina ĩkapani. ²⁵ Iua sitatxi tore imatakakaākapika. Īroāpikana kākiti. !Itotaāka, kotxi ĩkanōkari !auari iuaā. ²⁶ Kākiti ikini itixiti auakani anikariko ikinipoko erekari iua sitatximoni Teoso ipaxitinina ĩkapani. ²⁷ Kākiti maerekati kamakani !auritaākana ĩroinina. Ītotxi nireēkiti kamakani !auritaākana ĩroinina. Atāo masāpiretakani apaka !auritaākana ĩroinina. Kākiti Teoso iōkauākatakini aātsopateē, ninoanokara auritaāka ĩroinina iua sitatxitiā. Iua Soti Auīte aātsopateē auauākatakani auapikako Teosokata.

22

Iua Āparaā Iātakari Aua Teosokata Ātipirika

¹ Eereka iua Teoso nitiri oerekano sōtoāri. Iua sōtoāri mapotōkire ikiitaā Teoso itopanere aua. Apaka iua Soti Auīte itopanere aua iuaā. Iua āparaā peereēri. Kristao mēkori atoko itxa iua āparaā. Iua āparaā iātakari lipina. Ātipirika auapika. ² Iua sitatxi apanīkaki aua ahoa mitapoari. Iua sōtoāri sa ahoa apanīkaki. Sōtoāri ĩtinikata aua amātiirinape. Iua amātiiri tximakani !lipina. Auapikana. !Ipinaikana. Kasiri iaōka iriuata iua amātiiri. Āti kasiriti iri ātiāo, eereka āti kasiriti ātiāo. Iuaīkana āti kasiriti ātiāo. Itxaāpota iua amātiiri iriuatini iuaxiti. Tosi pakini kasiriti amātiiri iriuata. Amātiiri tsopa sikataparatarī kākiti ĩto, ikinimane kākiti itixi auakani ĩto.

³ Teoso misiritiniri kākiti !auaika. Teoso, Soti Auīte pakini auītetxi itxauana iuaā. Teoso nitiriakori itixi auakani kamari iua nireēkiti. ⁴ Ninoa atamatariko itoō. Teoso uāka iteētaāna auako. ⁵ Īkanōka !auaika iuaxiti. Kākiti iuaā kona nirekaikari tirikapī, atokatxi kamara pakini, kotxi Teoso Apiananiri iopinikari ikinika iuaā. Kākiti iuaā auakani auītetxiakori itxauana ātipirika.

⁶ Eereka iua Teoso nitiri txari notamoni:

—Atāo nisākire. Ia iaōka apokapitīkako. Teoso Apiananiri sikari Erekari Matamatakoti isākire sāpiretakanimoni. Iua paniātari initiri itixine auakari oerekinina initiriakori itixi auakani Teoso kamakiti apokini apisapanika —itxa iua Teoso nitiri sākire.

Xesosi Kanapiriini Pirena

⁷ —Hīkenakota —itxa Xesosi. —Patimariko napokini ereē. Ia aātsopa sāpiretari ereē nikanapiriini pirena. Kākiti auikiniāri Teoso sākire ia aātsopa sāpiretakiti, apakapari erekari Teoso sikakiti —itxa Xesosi.

⁸ Nota Xoāo sāpiretai hīte nitiākiti. Nikenakotakiti apaka nisāpiretai hīte. Ikinika nikenakotaka atoko, ikinika natamataka atoko, iusaaki nipamaka iua Teoso nitiri apisatoō, kotxi iua oerekari ikinipoko notamoni. Nipamaka iua apisatoō Teoso apisatoō nipamakini atokokana. ⁹ Txamari iua Teoso nitiri txari notamoni:

—Kona pipamakape nota apisatoō. Nota Teoso nitiri pite atokokana nitxa. Pitariakori Teoso sākire sāpiretakani Teoso nitiriakori itxauana. Ninoa atokokana nitxa nota. Ikinika kākiti ia aātsopa sāpiretakiti auīākani Teoso nitiriakori itxauana. Ninoa atokokana nitxa nota. Teoso apisatoōnoka pipamakiniā atāo —itxa Teoso nitiri sākire.

¹⁰ Iuaīkana itxano nota:

—Ia aätsopa säpiretari Teoso kamakiti apokini apisapanika. Na pikipatapiri ia aätsopa säpiretakiti, kotxi paítiki Teoso säkire iaõka apokapitikako. ¹¹ Maerekati pikamapanika pinakasaaki, ininiã apikomoni maerekati pikama. Maerekati piito nireëkiti pikamapanika pinakasaaki, ininiã apikomoni pikama. Atão inakari pikaminiã, apikomoni atão inakari pikama. Teoso nireëkitinoka pikaminiã, ininiã apikomoni Teoso nireëkitinoka pikama —itxa.

¹² —Hikenakota —itxa Xesosi. —Patimapaniriko napokini ereë. Nimiriko ikinimane parika iki ninoa apakapini ikapani. ¹³ Iõkatxi merepitipanika auakari Aopa inakori atoko nitxaua. Iõkatxi imapotõkire auakari Ómika inakori atoko nitxaua. Ikinipoko auini apisapanika nota aua. Ikinipoko xipokaãka atoko nota auapanika. Itixi kamiko apisapanika naua. Itixi xipoka atoko nauapanika nota —itxa Xesosi.

¹⁴ Teoso sikari erekari iua nireëkiti kamakanimoni. Ninoa kãkiti auiritaãkako Teoso amãtiirite itximinina auapika ininina tãkane. Auiritaãkanako ñroinina Teoso sitatxineë. ¹⁵ Kãkiti maerekati iñtona nireëkiti kamakani !auiritaãka ñroinina iua sitatxitiã. Miiti, iñtono minakatokatika sirikakani, kokanirini pakini !auiritaãka ñroinina iua sitatxitiã. Apaka kãkiti ikamakitika teosonetakani !auiritaãka ñroinina iua sitatxitiã. Aãpirena potxitakani, atão minasãkiretakani pakini !auiritaãka ñroinina iua sitatxitiã.

¹⁶ —Nota, Xesosi txaua. Nota paniãtari ninitiri nitixine auakari säpiretiniri ia nisãkire pitemoni, ininiã ikara pite säpiretanako Teoso misãkiretikoãtaã apotiitakaniua. Tavii apika mekanirirano nota. Iõriki mitaro pokamara iatokopeka inakasaaki ñkaro atoko nitxa nota —itxa Xesosi.

¹⁷ Erekari Matamatakoti txari Xesosi:

—Uai pina.

Xesosi nakitiakori txari iua:

—Uai pina.

Hite ia nisãkire kenakotakanii, hñtxariko:

—Uai pina.

Hite posonatakani, uai hina. Hinirekiniãri, ia ãparaã hiãtako, kotxi ia ãparaã kãkiti auapininiika inikitaãkari. Ia ãparaã Teoso sikakiti kãkitimoni. Na piikitxitari.

¹⁸ Nota, Xoão, õtãkikari kãkiti ia Teoso säkire iõkatsopatakori kenakotakani. Ia Teoso säpiretakiti apokini apisapanika, isãpiretaua. Ia aätsopa säpiretari kãkiti misiritiko. Ninoa misiritiko atokotxikana Teoso misiritai hñte, hñkoretiniãri hñteka säkire Teoso säkirekata. ¹⁹ Kãkiti kipatiniãri ipixini ia Teoso säpiretakiti iõkatsopatakori, Teoso !auiritari iua tximiniri iua amãtiiri kãkiti auapininiika inikitaãkari. !Auiritari iua ñroini isitatxineë. Ia aätsopa säpiretapekari iua amãtiiri, iua sitatxiti pakini.

²⁰ Xesosi txari:

—Ia niokanapirena atão. Iposopeka napokini tãkane.

Atxari iuamoni:

—Ameë. Ari, uai pina Xesosi, Apiananiri.

²¹ Xesosi Apiananiri sikari ikinipoko erekari ikinimane Teoso nakitiakorimoni. Ameë.